


Tũpa Ñehengagüer



New Testament in Guarayu (BL:gyr:Guarayu)

Tũpa Ñehengagüer

New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022

c27c2d97-c359-59f5-b367-83efb2e33739

Contents

| | |
|----------------------------|-----|
| SAN MATEO | 1 |
| SAN MARCOS | 74 |
| SAN LUCAS | 118 |
| SAN JUAN | 197 |
| LOS HECHOS | 253 |
| ROMANOS | 324 |
| 1 CORINTIOS | 355 |
| 2 CORINTIOS | 387 |
| GALATAS | 407 |
| EFESIOS | 418 |
| FILIPENSES | 428 |
| COLOSENSES | 435 |
| 1 TESALONICENSES | 442 |
| 2 TESALONICENSES | 448 |
| 1 TIMOTEO | 452 |
| 2 TIMOTEO | 461 |
| TITO | 467 |
| FILEMÓN | 471 |
| HEBREOS | 473 |
| SANTIAGO | 496 |
| 1 SAN PEDRO | 504 |
| 2 SAN PEDRO | 513 |
| 1 SAN JUAN | 518 |
| 2 SAN JUAN | 525 |
| 3 SAN JUAN | 527 |
| SAN JUDAS | 529 |
| APOCALIPSIS | 532 |

MATEO REMBICUACHIA JESUS RECOCUER RESENDAR SAN MATEO

Ava eta oyesu vahe Jesucristo yesu renondeve

¹ Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

² Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiqehir, tivireta reseve. ³ Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram. ⁴ Aram rahir Aminadab, Aminadab rahir Naasón, Naasón rahir evocoyase Salmón, ⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, ⁶ Isaí rahir mborerecuar guasu David, David rahir evocoyase Salomón, Urías rembirecocuer pipe oyesu vahe.

⁷ Salomón rahir Roboam, Roboam rahir Abías, Abías rahir Asa. ⁸ Asa rahir Josafat, Josafat rahir Joram, Joram rahir evocoyase Uzías. ⁹ Uzías rahir Jotam, Jotam rahir Acáz, Acáz rahir ahe Ezequías. ¹⁰ Ezequías rahir Manasés, Manasés rahir Amón, Amón rahir evocoyase Josías. ¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

¹² Mbiguai yuvirecoire Jeconías omboyesu Salatiel, Salatiel rahir ahe Zorobabel. ¹³ Zorobabel rahir Abiud, Abiud rahir ahe Eliaquim, Eliaquim rahir evocoyase Azor. ¹⁴ Azor rahir Sadoc, Sadoc rahir ahe Aquim, Aquim rahir evocoyase Eliud. ¹⁵ Eliud rahir Eleazar, Eleazar rahir ahe Matán, Matán rahir evocoyase Jacob. ¹⁶ Jacob rahir José, María mer, María evocoyase Jesús si secoi. Ahe imembi Tūpa Rembiporavo Poropisrosar.

¹⁷ Evocoyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota araviter Poropisrosar haragüer rupi, ahe omomba iri avei ambuae catorce yesu yoapi agüer.

Jesucristo yesu agüer

¹⁸ Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoiēhi viteseve rumo, Espíritu Santo pīratasa pipe imembi. ¹⁹ Evocoyase José, imevi, ahe ava seco catupri vahe, “Tapoiño ayase ava icuaēhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa

pipe. ²⁰ Aipo opihañemoñeta reseve oque. Iquerve rumo, Tũpa rembiguai oyemboyecua chupe aipo ehi: “José, David suindar, eresiquiyei rene María rese nde menda ãgua. Esepia, Espiritu Santo sui ou imembirã. ²¹ María virecose omembri, pemondora sererguã Jesús. Esepia, ahe oipĩsirora omu judío eta yangaipa sui” ehi.

²² Co rupi opa yaviye yande Yar remimombehugüer aipo ehi vahecuer ñehe mombehusar aracahe:

²³ “Cuña ndaseco marai vahe imembira.

Ahe imembri rer-ra Emanuel” ehi

(“Tũpa yande rese ité secoi’ oya aipo ehi).

²⁴ Omahese José, Tũpa rembiguai oyeupe ñehe agüer omboyeroia ité. Ichui omenda María rese cute. ²⁵ Ndoyapo vitei eté rumo mbahe oyese yuvireco. Yipindar imembira rane ité, ahese José omondo Jesús sererguã.

2

Ava yasitata rese oyembohe vahe ari sãsa cotindar yuviraso pĩtani repia

¹ Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sãsa coti sui Jerusalén ve. ² Ahe oporandu Herodes upe yuvireco aipo ehi:

—¿Que vo aipo oha judío rerecuar guasu? Esepia niha, caharu coti yasitata orosepia. Sese oroyu ari sãsa coti sui imboetei ãgua —ehi yuvireco chupe.

³ Aipo ihese, mborerecuar Herodes oyembosiquiye tẽi, ava Jerusalén pendar avei egüe ehi pãve yuvireco. ⁴ Iyavei cũriteimi opa omonuha uca pahĩ rerecuareta, Moisés porocuaita rese oporombohe vahe avei. Ipare oporandu chupe:

—¿Que vo aipo ohara Poropĩsĩrosar? —ehi.

⁵ Ahe omboyevi yuvireco chupe:

—Ahe ohara Judea rupi Belén ve —ehi—. Esepia, Tũpa ñehe mombehusar Miqueas rembicuachiagüer pipe aipo ehi:

⁶ ‘Pe, tecua mini Belén pipendar, ndahei ivi coti tẽi vahe ambuae tecua Judá pipendar sui peico.

Esepia, pe sui osẽra mborerecuar che recua iguar Israel yocuai ãgua’ ehi —ehi yuvireco Herodes upe.

⁷ Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pipe ité vo pesepia ramo aipo yasitata?” ehi.

⁸ Oyeupe mombehu pare, omondopa Belén ve aipo ehi chupe:

—Peso evocoyase, peseca pītani. Acoi peyosuse, co rupi avei peyevi cheu icua uca āgua. Che avei evocoyase tasomi imboetei —ehi angahu chupe.

⁹ Aipo oyeupe he pare, yasitata rese oyembohe vahe osiriño voi yuviraso. Ahe pipeve yasitata oyemboyecua iri senonera. Ichui pītani recosa rese tupri tecua Belén ve opita yasitata. ¹⁰ Sepiase, ovihareté yuvireco. ¹¹ Ipare yuviroique oi pipe, osepia pītani ichi María reseve yuvireco. Ichui oñenopiha sovai imboeteisa pipe. Ipare opōhe ombahe riru pipe yuvireco oicuavēhe vaherā oporerecosa sepirusu vahe oro, itaisi, ambuae mbahe siacua vahe mirra serer vahe avei. ¹² Yuviroyevise güecuave yuviraso, ndoyuviroyevi iri Jerusalén rupi mborerecuar Herodes upe imombehu. Esepia, Tūpa aipo omombehu iquerve chupe ambuae peri rupi iyevi āgua.

Jesús pītani seroñemisa Egipto ve

¹³ Aipo ava yepipi pare, José upe oyemboyecua Tūpa rembiguai iquerve, aipo ehi chupe: “Eñarapuha, eroñemi pītani ichi reseve eraso Egipto ve. Aheve erepitara acoi che amombehuse voi nde yevi āgua. Esepia, mborerecuar Herodes osecara pītani yuca āgua oico” ehi chupe.

¹⁴ Ahe pītu pipeve voi José viraso pītani ichi reseve Egipto ve. ¹⁵ Aheve yuvirecoi co mborerecuar Herodes mano rāro. Co rupi imboaviyesa Tūpa ñehe mombehusar remimombegüer: “Egipto sui anose che Rahir” ehi vahe.

Herodes oyuca uca chīhivahe eta

¹⁶ Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuviraso sundao tecua Belén ve, toyucapa chīhivahe cuimbahemi yuvireco opacatu ñuvirío araviter ovireco vahe, chīhivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe araviter opa cūritei. ¹⁷ Ēgüe ehi yaviye Tūpa ñehe mombehusar Jeremías remimombegüer aipo ehi vahe:

¹⁸ “Oyeendu ava Ramá ve.

Ahe Raquel oyaseho ité omembireta manose; ndoyemboviha catui eté ipipe” ehi.

¹⁹ Mborerecuar Herodes manore, Egipto ve José upe oñehe iri Tūpa rembiguai iquerve aipo ehi: ²⁰ “Eñarapuha, eroyevi pītani ichi reseve Israel recuave. Esepia, opa omano pītani yuca potasar yuvireco” ehi.

²¹ Aipo oyeupe hese, oñarapuha, viroyevi pītani ichi reseve Israel recuave. ²²⁻²³ Peri rupi oyanduse rumo Arquelao vu recoyar mborerecuar chinise, ahese oyembosiquiye aheve

oso āgua. Coiyemi tēi iquerve Tūpa, “Peso Galilea ivi rese” ehi chupe. Ichui yuviraso tecua Nazaret ve. Aheve opita yuvireco cute. Ēgüe ehi yaviye Tūpa ñehe mombehusar remimombehugüer: “ ‘Nazaret pendar’ ehira serecosa” ehi vahe.

3

Juan Oporoãpiramo vahe ivi iporupirēhisa rupi secoi

¹ Ipare Juan Oporoãpiramo vahe Tūpa recocuer rese oñehe oico Judea ivi rupi ava yemboerecuaēhisave ² aipo ehi: “¡Pembosi pe angaipa; peyevi Tūpa upe! Esepia, co Tūpa mborerecuasa cōimi secoi yandeu” ehi.

³ Co Juan rese niha oñehe yipive Tūpa ñehe mombehusar Isaías aipo ehi güembicuachiagüer pipe:

“Oyeendu ñehesa ava yemboerecuaēhisave:

‘Pemoingatu yande Yar raperã; pemohivi tupri avei’ ehi” ehi aracahe.

⁴ Juan turucuar ahese camello ragüer apopri, sumbicuasa mbahe pirer, sembihu evocoyase tucru, eiri caha pipendar avei. ⁵ Opacatu ava Jerusalén pendar, Judea rupindar tecua, iai Jordán rerovica pendar avei yuviraso iñehe rendu

⁶ oangaipagüer mombehu āgua. Ahese Juan oñapiramo iai Jordán pipe.

⁷ Yugüeru atise rumo fariseo iyavei saduceo oñeapiramo uca āgua, Juan aipo ehi ahe ava upe: “¡Pe mboi mboetasa tēi peico! ¿Ava vo, ‘Pesēra Tūpa ñemoirosa ou vaherã sui’ ehi tupri tēi pēu? ⁸ Yipindar toyecua tupri rane Tūpa upe pe yevisa pe angaipa mboasisa pipe. ⁹ Iyavei ndapeyeroyai chira ‘ore Abraham suindar oroico’ pe hesa rese tēi pe ñepisiro āgua. Esepia, Tūpa oicatuño ité co ita sui Abraham suindar nungar tupri apo āgua oyeupe nara yepi. ¹⁰ Hacha niha imoingatusa voi eté opacatu ivira ndihai vahe sapo rupi yasia āgua. Ichui yasia pare imondosa tatave. ¹¹ Che i pipe tēi opoãpiramo Tūpa upe pe yevi āgua. Oura rumo ambuae che raquicuei, ahe pe ãpiramora Espiritu Santo tata nungar pipe. Ahe seco pĩrata catu vahe secoi che sui. Sese cheu ndiyai eté ahe ipitaquisã yora āgua ichui. ¹² Ahe oipehara mbahe rãhii ihigüer sui. Sãhii evocoyase oyapocatura, ihigüer rumo omondora tata apirēhi vahesave” ehi.

Jesús ãpiramosa

¹³ Ipare Jesús oso Galilea sui iai Jordán ve Juan recosave ‘tache ãpiramo’ oya. ¹⁴ Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo āgua? —ehi.

15 —Ēgüe tehiño aipo. Iyacatu yayapora Tūpa porocuaíta — ehi Juan upe.

Evocoyase Juan, “Aviye” ehi chupe. 16 Oãpiramo pare, osẽ ive sui. Ahe pipeve voi iva oyemboi tupri, aheseve avei osepia Tūpa Espíritu ogüeyise ou iharive apicasu nungar. 17 Iyavei oyeendu ñehesa iva suindar aipo ehi vahe: “Co che Rahir, che rembiaisu. Sese aviharete vichico” ehi.

4

Jesús recoãhasa

1 Ipare Tūpa Espíritu viraso Jesús ava yemboerecuaẽhisave ‘tosecoãha Carugar’ ohesa pipe.

2 Aheve cuarenta ari, cuarenta pĩtu ndocarui. Sese ndasiepoi eté oico. 3 Evocoyase oyemboya Carugar sese secoãha ãgua, aipo ehi chupe:

—Tūpa Rahir ité nde recose, co ita sui eyapo pan cūrítei — ehi.

4 Jesús rumo omboyevi chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ēgüe ehi rumo opacatu Tūpa Ñehengagüer reroya pipe ava yuvirecovera yepi’ ehi —ehiño chupe.

5 Ichui Carugar viraso Jesús Jerusalén maranehi pipendar tūparo torre apiterve. 6 Aheve aipo ehi chupe:

—Tūpa Rahir ité nde recose, eviapi cohava sui. Esepia niha, icuachiapri pipe:

‘Tūpa oyocuaira güembiguai eta nde rãro ãgua.

Ahe nde mopuhara yuvireco que ñepeí ita nde momara rãgüer sui’ ehi —ehi Carugar chupe.

7 Evocoyase omboyevi Carugar upe:

—Icuachiapri pipe rumo aipo ehi avei no: ‘Nderesecoãhai chira nde Yar Tūpa’ ehi —ehi chupe.

8 Ipare Carugar viraso iri ivitri ivate vahe apiterve secoãha ãgua. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe, 9 aipo ehi:

—Che rovai ereñenopihase che mboeteisave, co opacatu mbahe nde rembiepia amondora nde mahera —ehi Carugar chupe.

10 Aipo oyeupe hese:

—Eyepipi che sui cūrítei, Carugar —ehi—. Esepia, icuachiapri: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Carugar upe.

11 Ahese Carugar oyeepipi ichui. Ipare Tūpa rembiguai yuvirogüeyi Jesús rese hañeco ãgua yuvireco.

Jesús omboipi oporombohe Galilea rupi

¹² Jesús oyanduse Juan roquendasa, oso Galilea ivi rese Nazaret ve. ¹³ Ndopítai rumo aheve. Osoño Capernaum ve, aheve opíta. Ahe tecua ipa Galilea ivii, ivi Zabulón iyavei Neftalí rupi avei. ¹⁴ Na ehi yaviye Tūpa ñehe mombehúsar Isaías rembicuachiagüer aipo ehi vahe aracahe:

¹⁵ “Co ava ivi Zabulón pendar, Neftalí pendar, para guasu ivirindar, iai Jordán rovaindar iyavei Galilea pipendar ndahei vahe judío,

¹⁶ ahe aviye pítumimbisave yuvirecoi vahe, osepia ramo vahe tesapesa yuvireco; iyavei mano rãgüer pipe yuvirecoi vahe upe avei aviye oyecua ramo vahe tesapesa” ehi.

¹⁷ Ahe ari suive Jesús omombehu Tūpa recocuer ava upe: “Pemboasi pe angaipa; peyevi Tūpa upe. Esepia, cõimi eté Tūpa mborerecuasa secoi” ehi.

Jesús, “Perio che rupi” ehi irungatu pira mbohasar upe

¹⁸ Coiye ipa Galilea ivii oguatase, Jesús osepia mbia Simón Pedro serer vahe tivri Andrés reseve. Ahe pira omboha yuvireco. ¹⁹ Evocoyase:

—Pe pira recasar peico. Perio che rupi. Na peye aveira ava reca água cheu nara —ehi chupe.

²⁰ Aipo he ramoseve, opoi opira mbohasa sui yuvireco, yuviraso supi.

²¹ Coi coti catu aipo Jesús osepia ambuae mbia Santiago tivri Juan reseve, ahe oguapi yuvinoi carite pipe oyesupa Zebedeo piri; omoingatu opira mbohasa yuvinoi. ²² “Perio che rupi” he ramoseve, opaño oporaviquisa sui opoi yuvireco, oseyaña oyesupa, yuviraso supi.

Jesús ombohe ava rehii

²³ Jesús evocoyase uguata opacatu Galilea ivi rupi, judío tūparo yacatu rupi oporombohe oico. Aheve ñehesa aviye vahe omombehu Tūpa mborerecuasa resendar. Oporombogüera avei opacatu-catu tēi mbaherasisa ava vireco vahe sui. ²⁴ Oyepotase rumo serãcua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, caruguar vireco vahe, que nañaca põrai vahe iyavei ndoguatai vahe. Ahe opa tupri ombogüera.

²⁵ Ëgüe ehi ava rehii uguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovaindar avei no.

5*Jesús oporombohe ivitrive*

¹ Ñepeí arí pipe, ava rehíi repiase, Jesús oyeupi ivitri rese. Aheve oguapí oĩ. Aheve semimbohe oyemboya yuvireco sese.

² Ichui omboipí imbohe aipo ehi:

³ “Sorivete catura acoi ava oicuase mbahe ipane vahe Tũpa rese ité güeco tuprí ãgua. Esepia niha, chupe nara ité Tũpa mborerecuasa.

⁴ “Sorivete catura acoi ava oyaseho vahe oviharẽhisa pipe. Esepia niha, Tũpa omboura viharetesa chupe coiye.

⁵ “Sorivete catura ndaseco asiimi vahe. Esepia, ahe chupe imondosara co ivi imahera curi.

⁶ “Sorivete catura ava oipota vahe teco catuprísa Tũpa suindar. Esepia, chupe ité ahe imondosara.

⁷ “Sorivete catura acoi ava oporoparisuereco vahe. Esepia, ahe Tũpa oiparisuerecora.

⁸ “Sorivete catura acoi ava ipihañemoñeta tuprí vahe. Esepia niha, ahe osepia ra Tũpa yuvireco curi.

⁹ “Sorivete catura acoi ava oporomoñeroi vahe mbahe tuprí pipe. Ahe chupe, ‘Che rahir ité’ ehira Tũpa.

¹⁰ “Sorivete catura acoi ava seco catuprí rese imombaraisuprí. Esepia, ahe chupe nara Tũpa mborerecuasa.

¹¹ “Perorivete catura pe acoi ava iñehe-ñehe tẽise pẽu, iyavei pe mombaraisuse, acoi oyapo-yapo tẽise güemira-mira tẽi pipe mbahe pe rese che recocuer sui tẽi yuvireco. ¹² Pe rumo peyembovihañora. Esepia, ivave tuvichá vahe porerecosa peipisira curi. Ëgüe ehi avei niha yipindar evocoi ava ramoi Tũpa ñehe mombehusareta mombaraisu yuvireco aracahe” ehi.

Jesús reroyasar aviye yucrí iyavei tesapesa yuvirecoi ava upe

¹³ “Co ivi pipe pe aviye yucrí peico opacatu ava upe. Yucrí rumo nasehe irise, ndayaicatui imoehe iri ãgua, ndiporusai chietera; imombopasara ava pirunga ãgua yuvireco.

¹⁴ “Iyavei pe tesapesa nungar peico opacatu ava upe co ivi pipe inungar que tecua guasu yapoprí ivitri rese. Ahe ndayaicatui ñomi ãgua. ¹⁵ Iyavei ndayamoendi chira tataendi mbahevrive tẽi. Iyacatu rumo yasupí ivate sendave opacatu oí pipendar ava resape ãgua. ¹⁶ Pe ãgüe peye aveira pemboye-cua ava eta upe pe recocuer aviye vahe. Ipipe sui tomoetei yande Ru Tũpa iva pendar yuvireco” ehi ava rehíi upe.

Jesús oporombohe Moisés porocuita rese

¹⁷ “Aní chira, ‘Co mbia revo oporombohe Tũpa ñehe mombehusar rembicuachía mboyeroyaẽhi ãgua iyavei Moisés porocuita cuachiaprí mboyeroyaẽhi ãgua avei no’ peye tẽi cheu. Ëgüe ehi rumo che ayu imboaviye ãgua. ¹⁸ Supí eté co iva, ivi avei yandeu oime vitemiseve, ndipoí chietera que ñepeí yepe Moisés porocuita, que ambuae Tũpa ñehe

mombehusar rembicuachiagüer ocañi tēi vaherã; ñepeï-peï porocuaïta imombehupri imboaviyesaño itera. ¹⁹ Sese acoi ava ndoviroyai vahe que ñepeï mborocuaïtamira viña, omböhe avei ava seroyaēhi āgua, ahe evocoiyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuaïta yuvireco iyavei oporombohe vahe yuvireco sese, ahe evocoiyase Tūpa osecomboivate catura omborerecuasave curi. ²⁰ Iyavei amombehu pēu: acoi pe reco ñvi tuprisa ndaheise aviye catu vahe fariseo recocuer sui iyavei ndaheise aviye catu vahe Moisés porocuaïta rese oporombohe vahe recocuer sui avei, ahese ndapeiquei chïtera Tūpa mborerecuasave” ehi.

Jesús oporombohe ñemoïroēhi āgua rese

²¹ “Pe peïcua acoi pe ramoï aracahendar upe aïpo ehi vahe: ‘Peporoyucaï rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirã’ ehi. ²² Che rumo aïpo ahe pēu: acoi ava ambuae ava rese oñemoïro vahe yuvireco, ahe avei serasosara aheve. Iyavei acoi ‘nde ēgüe ere tēi vahe eico’ ehi vahe ambuae ava upe, ahe serasosara porandu āgua mborerecuar ivate catu vahe rovai. Acoi ava rumo oñehe marase seroïrosave ambuae ava upe, ahe iyacatu imondosa ité tata guasuve.

²³ “Sese Tūpa upe pe porerecosa reropovēhesave tūparo pipe pemahenduhase ava pe amotarēhimbar rese, ²⁴ peseya rane pe porerecosa aheve; peyevi rane pe amotarēhimbar upe pēu iñero āgua rese. Acoi peñerose oyeupe, ahese voi peyevi, tapeïcuavēhe pe porerecosa Tūpa upe.

²⁵ “Iyavei peyeamotarēhise, peñero voi oyeupe peyoepïase. Anise, avieteramo coiye catu tēise pe mombehu tēira pe amotarēhimbar mborerecuar upe pe reraso āgua. Ichui avieteramo ahe pe roquenda ucara. ²⁶ Supi eté aïpo ahe pēu: Ndapesēi chïtera acoi peyemboepïpase voi eté pesēra ichui” ehi.

Jesús oporombohe yemboaguasaēhi āgua rese

²⁷ “Peïcua niha Moisés porocuaïta yipïndar: ‘Peaguasai rene ambuae ava rembireco rese’ ehi vahe. ²⁸ Che rumo aïpo ahe pēu: Acoi ava omahese cuña rese ipotasa pipe, ahe inungar oyapo vahe ité mbahe sese opïha pipe yepi.

²⁹ “Iyavei inungar que pe resa pe acato cotindar oïpota rai ucase mbahe pēu pe mboangaïpa āgua tēi, iya penose ité, pemombo amombri peyesui. Aní pe mondo uca opacatu pe recocuer tata guasuve. ³⁰ Iyavei inungar que pe po pe acato cotindar pe mboangaïpa ucase, iya peyasia ité imombo amombri peyesui. Aní pe mondo uca opacatu pe recocuer tata guasuve” ehi.

Jesús oporombohe ava mendasa sui poiēhi āgua rese

³¹ “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi. ³² Che rumo aipo ahe pēu: ava opoise güembireco sui, cuña ndoyaviise mbahe, ahese ombopihañemoñeta tiētera güembireco mboaguasa uca āgua. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

Jesús oporombohe Vu Tūpa rer poru tēiēhi āgua rese

³³ “Iyavei peicua acoi aipo ehi vahe pe ramo i upe aracahe: ‘Pemboaviye itera pemoingatu tuprise Tūpa rer pipe mbahe pemombehu vahe yepi’ ehi. ³⁴ Che rumo, ‘Ndapeñehei chira que mbahe rer pipe, iva rer pipe tēi avei’ ahe pēu. Esepia, ahe niha Tūpa renda; ³⁵ ivi rer pipe tēi avei ndapeñehei chira. Esepia, ahe Tūpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua. ³⁶ Pe āca rer pipe avei ndapeñehei chira. Esepia, ndapeicatui chira que ñepe i pe ha momorochi āgua, imou āgua avei. ³⁷ Sese niha peñehese, ñepe i reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

Jesús oporombohe yande amotarēhisar upe mbahe tēi mboyeviēhi āgua

³⁸ “Peicua acoi Moisés porocuita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sāi ichui, sāi avei senosesara’ ehi vahe. ³⁹ Che rumo aipo ahe pēu: Aní chira pemboyevi pēu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe. ⁴⁰ Porandusave pe rerasose pe camisa rerocua āgua yuvireco pe sui, pe sacó avei pemondoñora chupe. ⁴¹ Ñepe i legua rupi evosi co mbahe rese cheu’ ehise que ava pēu, pe rumo perasoñora ñuvirío legua rupi chupe. ⁴² Iyavei oporanduse que pe mbahe rese yuvireco pēu, pemondoño avei chupe. Aní chira perecatēhi sese” ehi.

Pesaisu pe amotarēhimbar

⁴³ “Iyavei pesendu ñehesa yipindar: ‘Pesepia potai rene pe amotarēhimbar, pe mboripar güeraño pesaisu’ ehi vahe. ⁴⁴ Che rumo aipo ahe pēu: Pesaisu catu pe amotarēhimbar iyavei peyeroqui pe momara potasar rese. ⁴⁵ Evocoi nungar apo pipe pe Ru Tūpa iva pendar rahir ité peicora. Ahe niha osesape uca arí ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei. ⁴⁶ Pe raisupar güeraño pesaisu catu tēise,

ndapeipisii chietera porrecosa evocoi nungar sui. Esepia niha, ava guarepochi rerocuasar ndipihai vahe guaisupar tēi osaisu yuvireco yepi. ⁴⁷ Ndahei yande mboripar upe güeraño yayapora ‘avirave’. Esepia, ava ndoicuai vahe avei Tūpa oyapo ‘avirave’ omboripar upe yuvireco yepi. ⁴⁸ Sese pe recocuer perecora pe Ru Tūpa iva pendar seco catupri vahe nungar” ehi.

6

Jesús oporombohe mbahe aviye vahe apo āgua rese

¹ “Tūpa upe mbahe peyapo potase, ‘Tache repia ava yuvireco’ ndapeyei chira. Esepia, ēgüe peyese, ndapeipisii chietera pe Ru Tūpa iva pendar porrecosa. ² Evocoiyase iparaisu vahe rese peporerecose, ‘Tamombehupa ava upe vichico’ ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbí omoñehe yuvireco ‘Co ava aviye ité yuvirecoi, tehí angahu yuvireco yandeu’ oya tēi. Supi eté aipo ahe pēu: Ēgüe ehi vahe rumo opa voi oipisi porrecosa co ivi pipe tēi yuvireco. ³ Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña. ⁴ Peporereco catu ava pe repiaēhisa pipe; pe Ru Tūpa niha mbahe ndoyecuai vahe osepia. Ahe omboura porrecosa pēu opacatu ava rembiepiave curi” ehi.

Jesús oporombohe yerure āgua rese

⁵ “Acoi peyerurese, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opūhápūha catu tūparo pipe oyerogui yuvireco cupiha yacatu avei ‘tayande repia angahu ava’ ohesa pipe tēi. Supi eté che aipo ahe pēu: Ēgüe ehi vahe opa voi eté co ivi pipeve tēi oipisi porrecosa yuvireco. ⁶ Iyacatu rumo pe, peyeroqui potase, peiquera pe rēta pipe peyeoquendara pe ae pe yeroqui āgua pe Ru Tūpa upe. Evocoiyase pe Ru Tūpa oicua vahe mbahe pe rembiapo, iporerecora pe rese.

⁷ “Iyavei peyeroquise, ndapemboyevi-yevii chira pe ñehe pe poranduse mbahe rese Tūpa upe inungar ava Tūpa ndoicuai vahe. Ahe omboyevi-yevi oyeruresa ‘Tūpa revo co rupi yande mboyeroya voira’ ohesave yuvireco viña. ⁸ Aní chira inungar tēi peico. Esepia, pe Ru Tūpa oicua pe porandu renondeve mbahe ipane vahe pēu. ⁹ Sese aipo peyera peyeroqui: ‘Ore Ru Tūpa, ivave ereico vahe, imboeteipri nde rer tasecoi. ¹⁰ Tou nde mborerecuasa oreu. Tayaposa nde remimbotar co ivi pipe, inungar ivave yaposa. ¹¹ Embou ore rembihu ari yacatundar oreu co ari pipe.

¹² Iyavei ndeñero ore angaipa rese oreu inungar ore oreñero ore amotarêhimbar upe.

¹³ Ore mboangaipa ucai rene eve; eipeha mbahe naporai vahe ore sui' peyera.

¹⁴ "Esepia, pe amotarêhimbar upe peñerose, pe Ru iva pendar avei iñerora pëu; ¹⁵ ndapeñeroise rumo, ahe avei niñeroi chietera pëu" ehi.

Jesús oporombohe yecuacusa rese

¹⁶ "Acoi peyecuacuse, ndapemboyecuai chira pe viharêhisa, inungar acoi Tūpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, 'Co oyecuacu vahe, tehi ava yande repiasar yuvireco yandeu' ohesa pipe tēi. Supi eté aipo ahe pëu: Ēgüe ehi vahe opa voi oipisi porerecosa ava güepia pipe tēi yuvireco. ¹⁷ Pe rumo peyecuacuse, peñeaca mondoro tuprira, peyovai tupri aveira. ¹⁸ Evocoiyase, 'Co oyecuacu vahe' ndehi chira ava yuvireco pëu. Pe Ru Tūpa, ndayasepiai vahe, güeraño oicuara pe yecuacusa. Ahe evocoiyase iporerecora pe rese curi" ehi.

Mbahe porañeté vahe oime ivave

¹⁹ "Ndapemonuha ati chietera mbahe pe rembiereco co ivi pipe. Esepia, ahe mbahe pe rembiereco mbahe rasi omboaso ati-ati imocañipa, iyavei sãve-sãve tēi opochi ati-ati oapocatusave, imonda vahe avei evocoiyase imondaño sese pëu. ²⁰ Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi ägua. ²¹ Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ivi pipe, anise que ivave avei" ehi.

Yande resa inungar tataendi yande recocuer uve

²² "Iyavei yande resa inungar tataendi yande retecuer upe. Evocoiyase yande resa aviye, opacatu yande retecuer upe osesape; ²³ acoi imarase rumo, opacatu yande retecuer pĩtumimisave tēi secoi. Tesapesa oime vahe yande rese, ahe ogüese rumo yande sui, mbahe tēi eté, pĩtumimbi nungar opacatu yande recocuer upe" ehi.

Guarepochi pota raisa; Tūpa mboyeroyaêhisa

²⁴ "Iyavei ndipoi chietera que ava ñuvirío güerecuar omboyeroya vahe. Esepia, ñepeï oyamotarêhira imboyeroya potaêhisa pipe, ambuae evocoiyase osaisu catura imboyeroya asa pipe. Ēgüe peye avei, ndapeicatui Tūpa mboyeroya guarepochi pota raisa pipe" ehi.

Tūpa osãro guahireta

²⁵ “Iyavei ndapeyemomahenduha guasu ai chira mbahe pe remihura rese pe recove ãgua, pe ihu ãgua rese, pe turucuarã rese tēi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no. ²⁶ Pesepia vīrai eta oveve vahe: nomahetii vahe, nomonuhai avei, ndoyapocatui avei mbahe yuvireco. Pe Ru Tūpa iva pendar ité niha omoime mbahe itohu. ¡Pe rumo ivate catu vahe ité peico vīrai sui! ²⁷ Ndipoi que ñepepe pe pāhu pendar oicatu vahe opihañemoñetasa pipe tēi güecocuer mopucu iri ãgua.

²⁸ “Ndahei chira pe turucuarã rese tēi peyemomahenduha guasu ai. Pemahecu ru mbahe potri caha pipendar rese: ndoporaviquii eté iyavei ndoipiai oturucuarã. ²⁹ Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. ³⁰ Tūpa niha omboporañete raimi tēi mbahe potri caha pipendar, moviro ari tēi yasepia, ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tuprii vahe! ³¹ Sese, ‘¿Mbahe pīha yahura, yaihura?’ Iyavei, ¿mbahe pīha yamondera?’ ndapeyei chira pe yemomahenduha guasu aisa pipe. ³² Ava Tūpa reroyasarēhi aipo nungar reseño tēi ipihañemoñeta yuvireco yepi. Pe Ru Tūpa iva pendar rumo oicua ité pēu mbahe ipane vahe. ³³ Pemahenduha rane Tūpa rese pe recocuer tupri pipe ipovrive mbahe pe yapo ãgua semimbotar rupi, ahese omboura opacatu co mbahe ipane vahe pēu. ³⁴ Peyemomahenduha guasa ai eme mbahe peyapo vahe rã rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoingatu vahe rã yepi.

7

Aní, “Oyavi mbahe” peye voi ambuae upe

¹ “Ndiyai, ‘Oyavi ité mbahe’ peye voiño tēi ambuae ava upe; evocoiyase Tūpa, ‘Oyavi mbahe’ ndehi chira pēu. ² Esepia, inungar pe ambuae ava upe peico, ãgüe ehi aveira niha Tūpa pēu. ³ ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia! ⁴ Ndiyai pēu, ‘Che toropitivii mbahe nde rembiavi rese’ peye vahe rã chupe. Esepia, ¡pe peyavi guasu catu mbahe ichui! ⁵ ¡Pe Tūpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

⁶ “Pemondo eme mbahe maranehi ava cave nungar tēi upe, iyavei ndapemondo chira mbahe porañete vahe ava cuchi

nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

Peporandu Tūpa upe pēu mbahe ipane vahe rese

7 “Peporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera pe yeroquisa pīpe Tūpa upe, ahese imbousara pe porandusa pēu. 8 Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeroquisa pīpe omota vahe oquenda Tūpa upe, chupe imboisara.

9 “Ndipoi eté revo que ñepepe pe pāhu pendar omondo vahe rã ita tēi guahir upe pan rese oyeupe poranduse. 10 Que pira rese oyeupe poranduse revo, ndomondo chiaveira mboi tēi chupe. 11 Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar oipota catu mbahe aviye vahe mondo āgua acoi ava mbahe rese oporandu vahe upe!

12 “Acoi mbahe peipota vahe ambuae ava oyapo vahe rã pēu, ahe tupri avei peyapora chupe. Ahe niha Moisés porocuita iyavei Tūpa ñehe mombehusareta porombohesa” ehi.

Oime peri icāhimi vahe ava recocuer upe nara

13 “Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuviraso; 14 teco apirēhisave oso vahe rumo oquendipi, peri reseve icāhimi. Supi guata āgua yavai eté; moviromi tēi ava oseca yuvireco” ehi.

Ivira aviye vahe icuasa iha rese

15 “Coie yugüerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pīpe rumo secocuer aviye mahembiar oñaro ai vahe. Sese peicua catu evocoi nungar sui. 16 Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sāchi ati vahe sui. 17 Evocoyase ivira aviye vahe, iha aviye avei; ivira naporai vahe, iha naporai avei no. 18 Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe. 19 Sese opacatu ivira iha naporai vahe yasiasa yepi. Ichui imondosapa tatave. 20 Na peyera ava recocuer cua sembiapo rese” ehi.

Ndahei chira opacatu ava yuviroique Tūpa mborerecuasave

21 “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru iva pendar remimbotar aposar año tupri rumo yuviroiquera

ahave. ²² Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo carugar ava sui nde rer pipe, setá poromondiisa oroyapo’ ehi tēira yuvireco cheu. ²³ Che rumo, ‘¡Aní, ndopocuai! ¡Pe mbahe tēi peico vahe, peyepipi che sui!’ aheñora aipo nungar upe” ehi.

Ñuvirío oi apopri

²⁴ “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarã. ²⁵ Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa. ²⁶ Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriēhisa pipe omopuha vahe ivi cuhi harive tēi güetarã. ²⁷ Ipape rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehi upe.

²⁸ Ñehe renduse ava rehi, “¿Mara ehi rutei?” ehi tēi yuvireco chupe. ²⁹ Esepia, ndahei Moisés porocuaita rese oporombohe vahe nungar; ahe rumo oporombohe güeco pīratasa pipe.

8

Jesús ombogüera ava lepra vireco vahe

¹ Ivitri sui ogüeyise Jesús, ava rehi avei yuvirecoi supi. ² Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cūritei! —ehi.

Aipo ihe ramoseve, ocuera voi eté.

⁴—Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipape eicuavēhe nde porerecosa nde cuera agüer resendar Moisés porocuaita rupi. Ipape sui toicua ava nde cuerasa yuvireco —ehi.

Jesús ombogüera sundao rereciar remimboacua

⁵ Ipape Jesús oguataño, ēgüe ehi tecua Capernaum ve oyepota oso. Aheve oime sundao rereciar Roma iguar. Ahe ou chupe ⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombaherasisa ou —ehi.

⁷—Aviye, cūritei evocoyase asora imbogüera —ehi.

⁸ —Aní, che Yar, ndiyai eté che rēta pipe nde reique āgua; iyacatu niha cohapeve ereñeheño tēi icuera āgua. Evocoyase nde ñehe pipe tēi che remimboacua ocuerara. ⁹ Esepia, che niha serecua vahe avei no, areco avei sundao che voya. Ahe chupe, “Eso peve” ahese, cūritei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

¹⁰ “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiái eté ava imbahe reroya vahe yuvireco yepi co ava nungar. ¹¹ Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coiye. ¹² Judío eta rumo, oyeupe ñehesa reroyaēhi pipe setá pītumimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaherasicuer rereco yuvireco —ehi oñehe.

¹³ Evocoyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

Jesús ombogüera Pedro rembireco si

¹⁴ Ipare Jesús oso Pedro rētave. Aheve osepia Pedro rembireco si sohí iteangase vupave ou. ¹⁵ Opocose ipo rese, ahe ramoseve sohí opituhu ichui. Ocuerare, oñarapuha ava rese ohañeco āgua.

Jesús ombogüera setá ava imbaheasi vahe

¹⁶ Ipare pītu ramose setá carugar vireco vahe ogüeru yuvireco chupe. Jesús rumo ñepeí reseve oñehe pipe tēi omombopa carugar ava rehii sui, iyavei opacatu imbaheasi vahe ombogüera avei no. ¹⁷ Ēgüe ehi omboaviye Tūpa ñehe mombehusar Isaías rembicuachiagüer aipo ehi vahe aracahe: “Ahe ae vīrocua opacatu yande mbaherasisa yande sui iyavei oiporara opacatu mbahe tasi vahe yande rese” ehi.

Oguata pota tēi vahe ava Jesús rupi yuvireco

¹⁸ Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so āgua” ehi. ¹⁹ Ahese Moisés porocuaíta rese oprombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

²⁰ Jesús rumo aipo ehi imboyeví chupe:

—Yavaira rumo ndeu. Esepia, v̄irai v̄ireco guaiti, iyavei aguara v̄ireco oquesa; che rumo, Ava Riqueh̄ir, ndarecoi que che r̄eta ité che p̄ituhu āgua yepi —ehi.

²¹ Ip̄are ñepei ivoya aipo ehi chupe:

—Che Yar, che ru manore voi che nde rupiño ité aicora —ehi.

²² —Aní, c̄uritei voi eyu che rupi —ehi—. Ēḡue tehiño ava secocuer omano vahe nungar, ahe ae toñeñeti yuv̄ireco —ehi chupe.

Jesús omombituhu iv̄itu ai, oh̄itu vahe avei

²³ Ip̄are Jesús yuv̄iroha güemimbohe reseve yuv̄iraso carite pipe. ²⁴ Ip̄a pipe yuv̄iraso pucu ramoseve Jesús oque ou. Ahese aviyeteramo t̄ei iv̄itu ai op̄uha ip̄a pipe; i oh̄itu vahe ndiguaȳi eté, seni-seni carite oyopi. ²⁵ Evocoyase semimbohe yuv̄iraso voi imomahe:

—¡Ore Yar, yande rerasora mo co carite ip̄ive! ¡Yande p̄s̄iro eve! —ehi yuv̄ireco chupe.

²⁶ Evocoyase aipo ehi:

—¡Mahera pesiquiye! ¡Ndapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, iv̄itu ai upe avei no: “Pep̄ituhupa” ehi. Aheseve voi opa tupri op̄ituhu yuv̄ireco.

²⁷ —¿Mara ehi rutei p̄iha co? —ehi t̄ei semimbohe yuv̄ireco chupe—. ¿Mara ehi vahe p̄iha co ava secoi?

Esepia niha, iv̄itu, para guasu avei omboyeroya yuv̄ireco no —ehi.

Jesús omboyep̄ipa carugar Gadara pendar sui

²⁸ Jesús oguataño güemimbohe eta reseve oyepota ip̄a rovai Gadara iv̄i rese yuv̄iraso. Aheve ñuv̄irío ava carugar v̄ireco vahe yuḡüeru sovañchi. Ahe ava tehōḡüer ruv̄ipa rupi t̄ei yuv̄irecoi vahe, iyavei ndiporomboetei vahe yuv̄ireco. Ichui osiquiyepave ava ndoguata potai ahe per̄i rupi yuv̄ireco yepi. ²⁹ Jesús repia ramoseve rumo, oñehe p̄rata yuv̄ireco chupe aipo ehi:

—¡Jesús, T̄upa Rah̄ir, eyepepi ore sui! Esepia niha, ndoyepota v̄itei ar̄i nde ore mombaraisu āgua oreu —ehi t̄ei yuv̄ireco.

³⁰ Namombriimi cuchi reh̄i yuv̄irecoi ichui. ³¹ Carugar evocoyase aipo ehi yuv̄ireco chupe:

—Ore mombopaño t̄ei eve evocoi cuchi rese —ehi.

³² —Av̄iye, peso —ehi carugareta upe.

Aipo hese, carugar opa yuv̄inose ava sui, yuv̄iroique cuchi reh̄i av̄iterve. Ip̄are rumo cuchi ndayaracua iri yuv̄ireco; iv̄i socuer rupi yuv̄inoña yuv̄iraso, opa ip̄a pipe ocañi t̄ei yuv̄ireco.

³³ Yuvinoña evocoyase cuchi rãrosar tecuave yuviraso opacatu mbahe güembiepia mombehu ava upe yuvireco. ³⁴ Ichui opacatu ava tecua pendar yuvinose ati Jesús upe, “¡Eso cohava sui!” ehi yuvireco chupe.

9

Jesús ombogüera ava ndoguatai vahe

¹ Ipare Jesús oha carite pipe osasa iri ipa rovai oso güecua Capernaum ve. ² Aheve, ava ndoguatai vahe omboyovai seraso imbaheasi vahe riru pipe yuvireco chupe. Ahe oicuaase co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopoase, che ñero nde angaipa rese ndeu —ehi.

³ “¡Co mbia oyemboivate ai tõi vahe, Tũpa ñehe nungar pipe tõi oñehel!” ehi Moisés porocuita rese oporombohe vahe yuvireco chupe. ⁴ Jesús rumo oicua ipihañemoñetasa, sese aipo ehi chupe:

—¡Mahera pepihañemoñeta rai pe yapisacasa rereco! ⁵ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pïha, anise, ‘Epũha, eguata’ hesa tie? ⁶ Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua —ehi.

Evocoyase aipo ehi imbaheasi vahe upe:

—Epũha, esupi nde rupa seraso nde rêtave —ehi.

⁷ Ahese opũha voi, oso güêtave. ⁸ “¡Too! ¿Mara ehi rutei vo?” ehi ava rehii yuvireco imboeteisave. “Esepia, ahe niha ombou opĩratasa ava upe” ehi yuvireco chupe.

Jesús, “Erio che rupi” ehi Mateo upe

⁹ Ichui osose Jesús, che repia, che Roma pendar mborerecuar guasu upe guarepochi rero cuasa mesave che rëise. Ipare aipo ehi cheu:

—Erio che rupi —ehi.

Evocoyase apũha, aso voi supi.

¹⁰ Ahe ari pipeve Jesús güemimbohe reseve yuviroique che rêtave. Ambocarú setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei. ¹¹ Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pãhuve tõi? —ehi seroĩrosa pipe yuvireco chupe.

¹² Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopõsano vahe; imbaheasi vaheño rumo oseca yuvireco. ¹³ Peyapisaca icuachiapri aracahendar aipo ehi vahe rese: ‘Poroparaisuerecosa aipota;

ndaipotai mbahe cheu serocuavēhepri tēi' ehi. Esepia, ndayui ava seco catupri vahe reca, ēgüe ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

¹⁴ Ipape Juan Oporoãpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoyase nde remimbohe eta ndoyecuacui yuvireco yepi? —ehi yuvireco chupe.

¹⁵ Ahe rumo omboyevi ahe ava upe:

—¡Ndiyai eté ichohopri mendasave ndoyembovihal yuvireco imer oicovese ipãhuve! Oimera rumo ari imer reraso ãgua ichui curi. Ahese ramo oyecuacura yuvireco cute —ehi.

¹⁶ “Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoyase tuvicha catu-catuño ité. ¹⁷ Iyavei ndiyai ava uva ricuer piasu oyapocatu siru mbahe piler cuacua vahe pipe. Ēgüe ehise, mbahe piler opura viña, ocañi tēira, uva ricuer avei evocoyase ocañi tēi aveira viña no. Acoi uva ricuer ipiasu vahe mbahe piler ipiasu vahe pipe yapocatupri rumo oyoya ndoyemomarai yuvireco” ehi.

Jairo rayri iyavei cuña Jesús turucuar rese opoco vahe

¹⁸ Jesús oporombohe vitesese, ou mborerecuar oñenopiha sovai aipo ehi chupe:

—Che rayri mo cūritei omano pota ité. Yaso, nde eremondose rumo nde po sese oicovera —ehi chupe.

¹⁹ “Aviye” ehi. Evocoyase opūha yuvirasos güemimbohe reseve supi. ²⁰ Ahe pipeve cuña doce araviter rupi suvi ndopai vahe opoco saquicuei coti iturucuar popi rese. ²¹ Esepia, ahe aipo ehi opiha pipe: “Yepe que iturucuar popi resemitēi apocora, acuerara rumo” ehi. ²² Jesús evocoyase oyemboyere cuña rese aipo ehi chupe:

—Che rayri, eyemopoase, erecuera cūritei nde yeroyasa pipe —ehi.

Aipo ihe ramoseve, cuña ocuera voi eté.

²³ Oyepotase Jesús mborerecuar rētave, osepia omimbi vahe iyemoingatupase omano vahe tĩ ãgua, ava yaseho atise avei no. ²⁴ Ahese aipo ehi ava oyaseho vahe upe:

—Pesēpa cohavesui. Co cuñatai nomanoi; oque tēi ou —ehi.

Ahe ava rumo opucaete atiño seroyaēhisave yuvireco. ²⁵ Ichui opa ava omose, ahese oique oi pipe oipopisi cuñatai. Evocoyase ahe oñarapuha voi. ²⁶ Co sembiapo evocoyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoi vahe

²⁷ Acoi osêse evocoi oi sui Jesús, ahese ñuvirío ndasesapisoi vahe osaquicue moña, osapucaí yuvireco chupe aipo ehi:

—¡Jesús, David suindar, ore paraísuerecomi tēi eve! —ehi pucu-pucu yuvireco chupe.

²⁸ Oi pipe seiquese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera ãgua rese peye? —ehi.

—Nde reroyasa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pẽu —ehi.

³⁰ Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

³¹ Ahe rumo ichui oyepepi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñehengatui vahe

³² Ichiri ramoseve rumo, ambuae ava viroyepota ava niñehengatui vahe carugar rerecosar Jesús upe yuvireco.

³³ Ichui omosese carugar, iñehengatu cute. Sepiase opacatu ava,

—¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tēi yuvireco.

³⁴ Fariseo eta rumo aipo ehiño yuvireco:

—Carugar rerecuar pĩratasa pipe co mbia omose carugar ava sui —ehi tupri tēi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tũparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tēi mbaherasisa sui avei no. ³⁶ Osepiase ava rehi, oiparaisuereco yuvireco. Esepia, ahe oñemosañõ tēi mbahe rasicuer pãhuve inungar ovesa ndovirecoi vahe guãrosar yuvireco ³⁷ Evocoiyase aipo ehi güemimbohe upe:

—Supi eté mbahe miti imonuhapirã setá iteanga; sese oporaviqui vahe rumo moviromi tēi. ³⁸ Sese peporandu mbahe miti Yar upe, ahe tomondo ava imonuha ãgua —ehi güemimbohe eta upe.

10*Jesús oiporavo doce tupri apóstol*

¹ Evocoiyase, “Perio” ehi Jesús doce güemimbohe upe. Chupe omondo güeco pĩratasa carugar ava sui imoyepepi ãgua iyavei iporombogüera ãgua opacatu-catu tēi mbaherasisa sui.

² Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir, ahe tivri Juan; ³ Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; ⁴ iyavei Simón, güecua rese secatēhi vahe pāhu pendarer; ipa vahe Judas Iscariote, ahe Jesús omondo vahe yamotarēhimbar upe.

Jesús oyocuai güemimbohe Vu mborerecuasa mombehu āgua

⁵⁻⁶ Ipape oyocuai güemimbohe imondo aipo ehi chupe: “Pesora yipindar judío recua rupi. Esepia, inungar ovesa ocañi vahe, ēgüe ehi tēi secocuer yuvireco. Evocoyase pesoi rene ndahei vahe judío recua rupi iyavei ndapeiquei chira tecua Samaria ve” ehi. ⁷ “Judío recua rupi pesoseve, ‘Cōimi Tūpa mborerecuasa seci yandeu’ peyera imombehu. ⁸ Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei carugar pemboyepipi serecosar sui. Esepia niha, peipisi pīratasa ndasepii vahe. Sese peyapoño evocoi mbahe guarepochi pisiēhisa pipe.

⁹⁻¹⁰ “Ava oporaviqui pipe sui ocaru yepi. Sese ndaperasoi chira guarepochi peyese. Ndaperasoi chiaveira pe mbahe riru, iyavei ambuae pe turucuar, pe pitaqui; peyesendar güeraño tupri perasora. Pe pococa avei ndaperasoi chira” ehi.

¹¹ “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, ahese ramo pesora ichui” ehi. ¹² “Evocoyase peique ramoseve oi pipe, peyapora, ‘Avirave, Tūpa tape rovasa’ peyera chupe. ¹³ Acoi aviyeise oi pipendar ava pēu, ahe oipisira Tūpa porovasasa; acoi ndahaviyeise rumo ava, ndoipisii chira Tūpa porovasasa yuvireco. ¹⁴ Acoi ndosendu potaise pe ñehe, ndape pisi potaise avei yuvireco, ahese pesēño ahe oi pipe sui, anise tecua sui. Peipipetera pe pi ivi rātachigüer sui, pesē pecua ichui ‘toipisi Tūpa ñemoirosa yuvireco’ pe yapave. ¹⁵ Evocoyase supi eté ari cañi oyepotase co tecua upe, ivate catura Tūpa ñemoirosa ava Sodoma, Gomorra iguar upendar sui curi” ehi.

Yamotarēhiprira Jesús reroyasar

¹⁶ “¡Psendu tupri che ñehe! Che opomondo ovesa nungar ava mbahe mimba oñaro ai vahe nungar pāhuve. Sese pesaeté tuprira peyese mboi nungar, iyavei inungar apicasu seco tupri vahe peicora. ¹⁷ Iyavei peicua catu peamotarēhimbar sui. Esepia, mborerecuar rovai pe rerasora iyavei pe nupara otūparo pipe yuvireco, ¹⁸ ichui pe reraso aveira mborerecuareta ivate catu vahe rovai yuvireco che recocuer sui tēi, ēgüe peyera peñehe che recocuer rese chupe iyavei ava

ndahei vahe judío upe avei. ¹⁹ Acoi pe rerasose mborerecuar upe yuvireco, ‘¿Mbahe p̄ha amombehura chupe?’ ndapeyei chira; acoi peñehe potase rumo, Tũpa omondora pe ñehe ãgua p̄u. ²⁰ Esepia, ndahei chira peyesui t̄i peñehe, pe Ru Tũpa Esp̄ritu pemoñehe ucara.

²¹ “Ipare rumo ava vivri omondora oamotar̄hisar upe ‘toyuca yuvireco’ oya. Ēḡue ehi aveira ava guahir upe; tahir avei oyamotar̄hira oyesupa yuca uca ãgua yuvireco che recocuer rese. ²² Iyavei opacatu ava ndape ambotai chira che recocuer sui t̄i yuvireco. Acoi oyemov̄iracua vaheño rumo ari ipa vahe rupi, ahe ip̄is̄iropri yuvirecoira curi. ²³ Iyavei acoi pe mañeco t̄ise ñepei tecuave yuvireco, ahese peyep̄epiñora ichui ambuae tecua p̄ipendar upe che recocuer mombehu ãgua. Supi eté Ava Riquehir oura ndapemboaviye viteiseve pe guatasa judío recua rupi.

²⁴ “Ñepei yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui. ²⁵ Iyavei semimbohe, ‘Aviye ité’ ehiñora ombohesar osecoupitise. Ēḡue ehi aveira mbiguai güerecuar upe. Acoi oi yar upe: ‘Carugar rerecuar Beelzebú’ ehise, aipo ehi aveira niha oi p̄ipendar upe yuvireco no” ehi.

¿Uma sui p̄ha siquiyesara?

²⁶ “Sese ndapesiquiyei chira ava pe amotar̄himbar sui. Esepia, yaposa vahe imombehupir̄ehi cūritei, icuasaño itera curi; iyavei mbahe ñomipri, icuasaño aveira no. ²⁷ Acoi che amombehu vahe p̄itumimbisave p̄u, pemombehu ari pipe coiye, iyavei acoi amombehu vahe p̄eñomi, perosapucai pe r̄eta harive imombehu opacatu ava upe. ²⁸ Iyavei ndapesiquiyei chira acoi ava peyuca potasar sui. Esepia, ndoicatui niha ava hã mocañi ãgua yuvireco. Tũpa sui rumo pesiquiye catura. Esepia, ahe oicatu yande retecuer, yande hã reseve imocañi ãgua tata guasu pipe” ehi.

²⁹ “Yamondo niha ñuvir̄io v̄iraimi repir̄ã ñepeiimi guarepochi yepi. Yande Ru Tũpa ndoipotaise rumo, ndoviapi chietera que ñepei v̄iraimi” ehi. ³⁰⁻³¹ “Sese pesiquiye eme. Esepia, pe niha ivate catu vahe ité peico opacatu v̄irai sui. Supi eté Tũpa niha oicua opacatu ñepei-peipe ha retacuer” ehi.

“Che aicua Jesucristo” ehi vahe opacatu ava rovaque

³² “Acoi ava ‘che aicua Jesucristo’ ehi vahe opacatu ava rovaque, che avei evocoyase: ‘Co ava che rupindar secoi’ ahera che Ru iva pendar upe. ³³ Acoi ava ‘che ndahei Cristo rese aico’ ehi vahe rumo cheu ava rovaque, che avei evocoyase, ‘Ndahei co che rupindar secoi’ ahera che Ru iva pendar upe.

Jesús reroyasa pipe sui oimera yeamotarēhisa

³⁴ “ ‘Mbahe tupri ai revo güeru co ivi pipe’ ndapeyei chira cheu. Ēgüe ehi rumo che yusa omoime ucara yeamotarēhisa. ³⁵⁻³⁶ Sese ava oñemu ae oyeamotarēhi-rēhira yuvireco; ava oyesupa oyamotarēhira, iyavei cuña membri osi oyamotarēhira, cuña vovayar oyamotarēhi aveira.

³⁷ “Iyavei acoi oyesupa tēi osaisu catu vahe che sui, ahe ndiyai eté secoi che voyarā; inungar avei osaisu catu vahe guahir, anise guayri che sui. ³⁸ Iyavei acoi noñemosai vahe mbahe rasicuer upe, inungar-ra curusu rese ovosi vahe ité viña che rupi uguata pipe, ahe chupe ndiyai eté che voya seco āgua. ³⁹ Acoi ava oipisiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepisiora” ehi Jesús güemimbohe eta upe.

Porerecosa resendar ñehesa

⁴⁰ “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar. ⁴¹ Acoi ava oipisi tupri vahe ambuae ava Tūpa ñehe mombehusar secosa rese, ahe oipisi aveira porerecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porerecosa inungar tupri. ⁴² Iyavei acoi omondo vahe que chīhi i sōhisa vahe que ñepeico seco mbegüemi catu vahe toihu che reroyasar seco rese, ahe oipisi aveira Tūpa suindar porerecosa” ehi.

11

Juan Oporoãpiramo vahe ovoya omondo Jesús recocuer cua uca āgua

¹ Opase Jesús oyocuai doce güemimbohe, ahese yuviraso oporombohe Tūpa Ñehengagüer rese judío recua rupi yuvireco.

² Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese ³ imboporandu āgua: “¿Nde ité vo Tūpa Rembiporavo aipo sãrombri ereico? anise, ¿oime tie ambuae orosãro vaherã?” ehi yuvireco chupe.

⁴ Ipare omboyevi chupe aipo ehi: “Peso, pemombe-hupa Juan upe mbahe pe rembiepia iyavei pesendu vahe. ⁵ ‘Ndasesapisoi vahe osareco tupri cūrítei yuvireco, ipãri-pãri vahe uguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pĩsirosa resendar ñehesa’ peyera chupe. ⁶ ¡Oviharetera acoi ava oyeroyañõ vahe che rese!” ehi Juan rupindar upe.

⁷ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave capihiata ivitu ombova-mbova vahe nungar pīha? ⁸ Anise, ¿pesepia tie iturucuar porañete ai vahe iyemboeteise? ¡Aní! Ēgüe ehi vahe rumo secoi mborerecuar guasu rētave yepi. ⁹ Evocoyase pesepiase, ¿‘Ava’ peye vo pe chupe? ¿Tūpa ñehe mombehusar ité pīha? Taa, ahe ité. Evocoi niha ivate catu vahe Tūpa ñehe mombehusar sui. ¹⁰ Ahe chupe ité Tūpa icuachiapri aracahendar pipe aipo ehi:

‘Che amondora nde renondeve che ñehe mombehusar nde raperā moingatu āgua’ ehi.

¹¹ Supi eté ndipoi que ñepeí ava seco ivate catu vahe Juan Oporoāpiramo vahe sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

¹² “Juan yusa suive tupri Tūpa povri pendar oiporara mbahe tēi yuvireco. Osāha-sāha ava opīratasa pipe imocañi āgua. ¹³ Opacatu Tūpa ñehe mombehusar rembicuachía pipe, Moisés porocuita icuachiapri pipe avei imombehusa Juan yusa rupive co Tūpa mborerecuasa resendar. ¹⁴ Yepe yavaira seroya āgua pēu viña, Juan rumo, Tūpa ñehe mombehusar Elías. Ahe imombehupri ou vahe. ¹⁵ Acoi ava osendu pota vahe che ñehe, toyapisacaño sese” ehi.

¹⁶ “¿Mbahe rese pīha amboyoyara ava recocuer cūriteindar? Esepia, co ava inungar acoi chīhivahe iguayi tēi vahe ocar rupi. Ipate oñehe pucu-pucu omboripar upe yuvireco aipo ehi: ¹⁷ ‘Oromoñehe tēi mimbí pēu, ndapepivoi eté rumo iyavei orosapucái tēi sapucaisa viharēhisa resendar pēu, pe rumo ndapeyasehoi eté’ ehi. ¹⁸ Esepia, ouse Juan Oporoāpiramo vahe, ahe ndohui tembihu sepirusu ai vahe iyavei ndoihui uva ricuer ipirata vahe, sese, ‘Co mbia carugar vireco vahe oyese’ peye tupri tēi chupe. ¹⁹ Coiye che ayu, Ava Riquehír, acarú, aihu tupri avei. Ipate, ‘Co icaru guasu ai vahe secoi, iihu guasu ai vahe avei’ peye cheu; ‘Ava angaipa viyar mboripar tēi iyavei guarepochi rerocuar mboripar tēi’ peye avei cheu. Acoi ava supi eté vireco vahe Tūpa mbahecuasa, ahe icuasara sembiapo rese yepi” ehi.

Tecua ndiporeroyai vahe

²⁰ Ahese Jesús oñehe pīrata moviro tecua pendar upe. Esepia, aheve acoi oyapo ati catu mbahe poromondiisa viña. Ahe pendar ava rumo ndosecuñaro potai eté güecocueraí Tūpa upe nara yuvireco. Evocoyase aipo ehi chupe: ²¹ “¡Peparaisu, ava tecua Corazín pendar! ¡Pe avei peparaisu tecua Betsaida

pendar! Esepia, acoi poromondiisa pe pãhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharēhisa resendar, tanimbu avei omondora oāca rese oangaipa mboasisa pipe yuvireco viña no. ²² Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye. ²³ Pe avei no, tecua Capernaum pendar pemoha co ivave pe reco āgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pãhuve yaposara viña, cūrítei oime vitera ahe tecua viña. ²⁴ Sese, pe peipisira ivate catu Tūpa ñemoirosa ava Sodoma iguar sui ari cañi pipe coiye” ehi.

Peyu cheu mbituhusa reca

²⁵ Iyavei ahe ari pipe Jesús oyerure: “Che Ru, aviye ndeu. Nde niha iva pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe. ²⁶ Ēgüe ere niha mbahe nde remimbotar apo, che Ru” ehi.

²⁷ “Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tupri. ²⁸ Peyu cheu opacatu icuerai vahe. Che amondora pe pituhu āgua. ²⁹⁻³⁰ Peico che povrive, peyembohe avei che sui. Esepia, che ndache reco asi, iyavei che povrive pe recosa ndayavaimi eté. Ahese ramo oimera mbituhusa pēu” ehi.

12

Mbituhusa ari pipe Jesús remimbohe oipoho trigo yuvireco

¹ Mbituhusa ari pipe Jesús yuviraso güemimbohe rese, oguata mbahe miti pãhu rupi. Ahese semimbohe ndasiepoi. Evocoiyase trigo rāñi oipoho-pohomi güemihura yuvireco.

² Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

³ Ahe rumo omboyevi ahe fariseo upe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. ⁴ Ahe niha yuviroique ité tūparo pipe pan imboeteipri Tūpa upendar hu āgua ondugüer reseve. Ahe chupe acoi ndipotasai ihu āgua yuvireco viña. Judío pahí yuvirecoi vahe upeño ité niha ipotasa ihu āgua yepi. ⁵ ¿Ndapeyeroqui vo Moisés porocuita resendar pipe? Esepia,

judío pahi tũparo rese hañecosar ndopituhui eté tũparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco. ⁶ Cũritei cohave oime ava ivate catu vahe tũparo sui. ⁷ Evocoiyase pe ndapesenducuai eté Tũpa Ñehengagüer aipo ehi vahe: ‘Che aipota peporoparisuereco, aní chira peropovēhepa porerecosa mbahe mimba tēi cheu’ ehi vahe. Pesenducuae viña, ahese, “Oyavi mbahe” ndapeye voi chira che remimbohe mbahe ndoyavii vahe upe viña. ⁸ Esepia, Ava Riquehir mbituhusa ari rerecuar ité secoi —ehi fariseo eta upe.

Mbia ipo nomii vahe Jesús ombogüera

⁹ Ichui oose Jesús, oique judío tũparove. ¹⁰ Aheve oime mbia ipo co cotigüer nomii vahe. Aheve avei fariseo, “Yaiñehengapo angahu Jesús” ehi yuvireco viña. Sese,

—¿Iyaño pñha mbituhusa ari pipe ava imbogüerasa yepi’ —ehi yuvireco chupe.

¹¹ Evocoiyase Jesús aipo ehi imboyevi:

—¿Ava vo pe pñhu pendar acoi mbituhusa ari pipe oviapise seimba ovesa ivicuarve ndosoi chira senose viña? ¹² ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

¹³ Ahese aipo ehi aipo mbia upe:

—Eichoho nde yiva —ehi.

Evocoiyase oichohose oyiva, ocuera tupri voi inungar ambuae iyiva. ¹⁴ Evocoiyase fariseo opa yuvinose yuviraso oyemoingatu Jesús yuca ãgua yuvireco.

Yaviye aracahendar imombehupri Jesús recocuer resendar

¹⁵ Evocoiyase Jesús oicuase fariseo pihañemoñetasa, osē oso, ava rehii avei yuviraso supi. Setá avei imbaheasi vahe ombogüera, ¹⁶ iyavei, “Che mombehui rene ava upe peyé” ehi. ¹⁷ Ëgüe ehi yaviyepa Tũpa ñehe mombehugar Isaiás remimombehugüer:

¹⁸ “Co ité che mboyeroyasar che rembiporavo.

Ahe asaisu etepri.

Sese ité ayemboviha.

Amondora che Espiritu chupe.

Ahe omombehu aveira mbahe ihivi vahe opacatu ava ivi pipendar upe.

¹⁹ Noiñehepoepi-epii chira ava, nasase-sasei tēi chiaveira; iyavei ndosendui chietera ava iñehe ocar rupi.

²⁰ Iyavei nomopei chietera que ñepeí patavimi oyeapa vahe; nombogüei chiaveira tataendi sātachiñomi tēi vahe.

Ëgüe ehira mbahe ihivi vahe pipe opacatu secopipa.

21 Evocoyase opacatu tecua pendar ava ndahei vahe judío oyeroyara yuvireco sese' ehi Isaías aracahe.

“Jesús vireco carugar pīratasa oyese” ehi tēi ava yuvireco

22 Ichui ava ndasesapiso vahe, noñehei vahe carugar rerecosar vīraso Jesús upe yuvireco. Evocoyase Jesús ombogüera. Ahese osareco, oñehe avei. 23 Evocoyase opacatu ava oyepihamondiisave aipo ehi yuvireco: “¿Tūpa Rembiporavo David suindar pīha co?” ehi yuvireco chupe.

24 Osenduse rumo fariseo, “Co mbīa carugar rerecuar Beelzebú pīratasa pipe tēi omboyepēpi carugar ava sui” ehi yuvireco.

25 Oicuaño rumo ipīhañemoñetasa. Sese aipo ehi: “Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei que tecua pendar, anise, que ava omu rese ovavase oyeupe, oyoya oyemocañi tēira yuvireco.

26 Ēgüe ehi avei carugar. Esepia, serecuar omboyepēpise opovri pendar, ovavara oyeupe yuvireco viña. Evocoyase ahe oyemocañi tēira yuvireco. 27 Iyavei pe, ‘Beelzebú pīratasa pipe sui tēi omboyepēpi carugar ava sui’ peye tēi cheu. Evocoyase, ¿ava pīratasa pipe vo pe voya eta omboyepēpi carugar ava sui yuvireco? Tūpa pīratasa pīpese, che avei evocoyase ayapo evocoi nungar ipīratasa pipe. Pe voya ae omboyecuar pe ñehe pe rembiavi yuvireco pēu. 28 Che rumo Tūpa Espiritu pīratasa pipe amboyepēpi carugar ava sui. Sese cūrīte pesepia ité Tūpa mborerecuasa.

29 “Iyavei no, que ava oique potase ambuae ava ipīrata etepri vahe rētave imbahe rerocua āgua ichui viña, yipīndar opa rane itera oñapīchi-pīchi. Ipare voi opara vīrocua imbahe ichui.

30 “Iyavei acoi ava ndache mboyoyai vahe, ahe che amotarēhimbar yuvirecoi; acoi ava ndosecai vahe ava cheu nara, ahe omosai tēi yuvireco che sui.

31 “Sese ava upe oimera ñeroisa opacatu angaipa rese iyavei iñehe mara-mara tēi vahe upe avei. Co catu acoi iñehe-ñehe tēi vahe Tūpa Espiritu upe, ahe chupe ndipoi chītera ñeroisa.

32 Iyavei acoi ava oñehe-ñehe tēi vahe che, Ava Riquehīr rese, ahe chupe oimeño ñeroisa; acoi oñehe-ñehe tēi vahe rumo Espiritu amotarēhisave, ahe chupe ndipoi chīra ñeroisa co ivi pipe iyavei ivave” ehi Jesús fariseo eta upe.

Ava recocuer icuasa sembiapo rese

33 “Emoatiro tupri ivira, ahe iha aviyera; nderemoatiro tupriise ivira, ahe evocoyase vīrecora oha naporai vahe. Esepia, ivira icuasa iha rese. 34 ¡Evocoyase pe, mboi nungar tēi

peico vahe, pe recocuer naporaise, ndapeicatu chira mbahe aviye vahe rese pe ñehe ãgua! Esepia, pe piha pipe sui tẽi osẽ pe ñehe ãgua. ³⁵ Iyavei acoi ava aviye vahe oñehe tupri opihañemoñeta catuprisa pipe; acoi ava recocuer naporai vahe rumo, opihañemoñeta raisa pipe tẽi oñehe. ³⁶ Sese ari cañi pipe opacatu ava opara omombehu oñehe-ñehe tẽisa Tũpa rovai yuvireco. ³⁷ Esepia, pe ñehe aviye vahe repri peipisira, pe ñehe naporai vahe repri peipisi aveira” ehi Jesús.

Ava eta ndaseco põrai vahe oporandu poromondiisa rese yuvireco

³⁸ Evocoyase fariseo iyavei Moisés porocuita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua ãgua —ehi yuvireco.

³⁹ Jesús rumo omboyevi ñehe:

—Pe ava ndaseco põrai vahe, ndiporeroyai vahe, peporandu tẽi poromondiisa tecocuer cua ãgua rese. Che rumo namboyecuai chira ambuae poromondiisa; Jonás recocuer rese güeraño opomomahenduhara. ⁴⁰ Esepia, inungar Jonás seci mbosapi ari pira guasu aviterve aracahe, ãgüe ehi aveira Ava Riquehir mbosapi ari ivivrive taira omano vahe pãhuve. ⁴¹ Evocoyase ari cañi pipe ava tecua Nínive pendar porandusave omombehura ava cũriteindar cañipa ãgua. Esepia, Nínive pendar niha omboasise oangaipa, oyevi Tũpa upe yuvireco Jonás omombehuse Tũpa Ñehengagüer chupe. Cũritei rumo oime Jonás sui aviye catu vahe pe pãhuve. ⁴² Iyavei ari cañi pipe cuña mborerecuar guasu irohi coti secua vahe porandusave, omombehura cũriteindar ava cañipa ãgua. Esepia, ahe ou amombri sui Salomón mbahecuasa rendu ãgua. Cũritei rumo oime ivate catu vahe Salomón sui —ehi fariseo eta upe.

Carugar oyevi iri ava güeco agüerve

⁴³ “Iyavei carugar osẽse ava sui, oguata tẽi ivi ipiru vahe rupi opituhu ãgua reca. Ipare rumo ndoyosuise, ipihañemoñeta, ⁴⁴ ‘Ayevi irira che reco agüerve vicho’ ehi. Aheve oyevisẽ, osepia iri secocuer inungar oi ndiporusai vahe, sahuvapri tupri. ⁴⁵ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tẽi catu itẽ secocuer yipindar güeco agüer sui. ãgüe ehi aveira ava cũriteindar ndaseco põrai vahe upe” ehi.

Jesús si, tivireta avei

⁴⁶ Jesús oñehe viteseve ava upe, ahese ichi, tivireta reseve ocarve yuvinoai. Ahe oñehe pota yuvireco chupe. ⁴⁷ Evocoyase mbia omombehu Jesús upe:

—Nde si, nde riviřeta reseve co ocarve yuvino hai. Ahe oñe he pota yuvireco ndeu —ehi.

⁴⁸ Ahe rumo,

—¿Ava pñha che si; ava pñha che rivri? —ehi ahe mbia upe.

⁴⁹ Evocoyase omboyecua opo pipe güemimbohe eta aipo ehi:

—Co che si eta, co che riviřeta. ⁵⁰ Esepia, acoi che Ru iva pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

13

Mbahe miti sui yembohesa

¹ Ahe ari pipe Jesús osẽ oi sui oso, oguapi ipa popive oĩ.

² Aheve ava oñemonuha atise yuvireco, oha carite pipe oguapi oĩ, evocoyase opacatu ava opita ipa popi rupi yuvireco.

³ Ahese omboyoya-yoya oporombohesa setá mbahe rese aipo ehi:

“Ñepei mbia osẽ omaheti oico. ⁴ Ahe otiapi-apise mbahe rãhi oso, moviro oiti peri rupi. Vĩrai ogüeyise rumo sese, opaño yuvirohu. ⁵ Iyavei moviro oiti ivi nayanai vahesave ita pãhuve. Sese cũriteimi sori; ⁶ ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rãhi oiti yu pãhuve. Ahe yu rumo sori poyava catu yuvireco ichui. Sese opaño oyopi. ⁸ Ambuae rumo oiti ivi aviye vahesave, ahe setá iha imonuhasa; ñepei ihi sui osẽ cién iha, ambuae sui osẽ sesenta, ambuae sui treinta. ⁹ Acoi ava osenducua pota vahe che ñe he, toyapisacaño sese” ehi Jesús ava eta upe.

¿Mahera pñha co yembohesa imboyoyasa ambuae mbahe rese?

¹⁰ Ichui semimbohe eta oyemboya Jesús rese yuvireco mbahe rese oporandu ãgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi.

¹¹ Jesús aipo ehi: “Pẽu rumo Tũpa oicua uca ité mbahe ndicua-sai vahe omborerecuasa resendar; ambuae ava upe rumo ndoicua ucai eté. ¹² Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasãora ichui. ¹³ Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tẽi, ndosepiacuai rumo yuvireco iyavei osendu tẽi, ndosenducuai avei yuvireco no. ¹⁴ Na ehi yaviye Tũpa Ñehengagüer Isaías remimombehu:

‘Pe niha pesendu tẽira, ndapeicuai chira rumo; iyavei pesepia tẽira, ndapesepiacuai chira rumo.

¹⁵ Esepia, evocoi ava eta upe yavai eté ipiha pipe imbahe reroya ãgua, ndayapisai eté sendu potaẽhisave; ndoyemboesapisoi avei sepiã potaẽhisave.

Esepia, ndosenducua potai opiha pipe yuvireco cheu oyeve
potaēhisave ombogüera āgua' ehi

Isaías aracahe.

¹⁶ “Pe rumo perorivete ité sepiacuase, pesenducuaase avei
no. ¹⁷ Supi eté setá Tūpa ñehe mombehusar iyavei ava seco
catupri vahe arachendar osepia pota tēi mbahe pe rem-
biepia, ahe rumo ndosepiai eté yuvireco; iyavei osendu pota
tēi co pe remiendu, ahe rumo ndosendui avei yuvireco” ehi
Jesús güemimbohe eta upe.

Jesús omombehu yembohesa mbahe miti resendar

¹⁸ Ipare aipo ehi: “Peyapisaca omaheti vahe recocuer rese.
¹⁹ Acoi osendu tēi vahe Tūpa Ñehengagüer imborerecuasa re-
sendar, ipare rumo ndosenducuai, ahe inungar acoi mbahe
rāhii oviapi vahe peri rupi. Ipare rumo carugar ou chupe.
Ahe ipiha pipe osendu vahe Tūpa Ñehengagüer opa tupriño
omocañi ichui. ²⁰ Iyavei acoi mbahe rāhii seitipri ita pāhuve,
ahe inungar ava recocuer yipiño osendu vahe, oipisi vahe
avei vorivetsa pipe Tūpa Ñehengagüer. ²¹ Ipare rumo inungar
co mbahe miti ndovirecoi vahe guapo ovīracua āgua, ēgüe
ehi avei evocoi nungar ava oimese mbahe-mbahe tēi Tūpa
Ñehengagüer sui chupe, cūriteimi seroyaēhisave oyepēpi ichui.
²² Acoi mbahe rāhii seitipri yu pāhuve, ahe inungar ava osendu
vahe Tūpa ñehe. Ipare rumo ahe ipihañemoñeta catu saisusave
opacatu ombahe eta co ivi pipendar rese. Ipipe sui oyembopa
uca ombahe eta upe. Ichui ndoguata iriño Tūpa Ñehengagüer
rupi. Sese secocuer ndaviye iri eté, inungar mbahe miti
ndihai vahe. ²³ Acoi itīsa vahe mbahe rāhii ivi aviye vahe rese,
ahe inungar ava osenducua vahe Tūpa Ñehengagüer. Iyavei
inungar acoi co mbahe miti ihá iteanga vahe, ēgüe ehi avei
ava secocuer aviye vahe inungar ñepeipei sāhii sui osē que
cien iha, sesenta iha, anise que treinta” ehi Jesús güemimbohe
eta upe.

Trigo pāhuve caha naporai vahe sui yembohesa

²⁴ Jesús omombehu iri co ambuae mbahe rese yembohesa
oyoya vahe: “Tūpa mborerecuasa oyoya tupri ava oivi pipe
mbahe rāhii oñoti vahe rese. ²⁵ Opacatu ava queseve rumo
oyepota yamotarēhisar, caha tēi rāhii oñoti trigo pāhuve oso.
²⁶ Acoi trigo iha potase, supive avei sorī caha. ²⁷ Evocoyase
oporaviqui vahe yuviraso, omombehu iyar upe aipo ehi
yuvireco: ‘Ore rerecuar, ¿ndahei vo acoi mbahe rāhii aviye
vahe ereñoti nde ivi pipe? ¿Que sui ru caha sorī ipāhuve?’ ehi
yuvireco chupe. ²⁸ Iyar rumo aipo ehi chupe: ‘Oime revo que
che amotarēhisar’ ehi. Evocoyase oporaviqui vahe oporandu
yuvireco chupe: ‘¿Ndiyai pīha caha tēi orosapohopara ichui

viña?’ ehi. ²⁹ Ahe rumo aipo ehi chupe: ‘Aní, aviyeteramo caha rupive pesapoho tiêtera trigo’ ehi. ³⁰ ‘Evocoyase peseya, tocuacuaño oyoya yuvireco. Yaviyese voi mbahe miti, ahese che ayocuaire oporaviqui vahe caha tēi rane rerocua ãgua imboapuha uca sapi. Ipare oyapocatura trigo rāhii che mbahe apocatusave yuvireco’ ehi ivi yar” ehi Jesús.

Yembohesa mostaza rāhii suindar

³¹ Jesús omombehu iri co ambuae mbahe rese yembohesa oyoya vahe: “Tūpa povri pendar oyoya tupri mostaza rāhii rese. Ahe mbia oñoti vahe oivi pipe. ³² Supi eté co mostaza rāhii tahimi catu opacatu ambuae mbahe rāhii sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sãca rese vīrai rehii oyapo guaitirã” ehi oporombohe.

Yembohesa pan mboapeposa sui

³³ Ipare Jesús oporombohe iri ambuae mbahe rese aipo ehi: “Tūpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo ãgua yepi” ehi oporombohe.

Jesús oiporu oporombohe ãgua mbahe rese mboyoyasa yepi

³⁴ Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe. ³⁵ Co rumo na ehi Tūpa ñehe mombehugar rembicuachiagüer aviye ãgua:

“Che añehese, amboyoyara che porombohesa ambuae mbahe rese.
Iyavei amombehura Tūpa ivi apo suive mbahe niporēhii vahe” ehi.

Jesús omombehu tupri oporombohesa caha tēi resendar

³⁶ Ahese Jesús, “Aviye” ehi ava upe. Ipare oi que oi pipe. Aheve semimbohe oyemboyapa yuvireco sese ‘tomombehu trigo pãhuve caha oime vahe resendar yandeu’ oya. ³⁷ Evocoyase omboyevi chupe: “Acoi ava mbahe rāhii aviye vahe oñoti vahe, ahe che, Ava Riquehir. ³⁸ Ivi mbahe miti rupa, ahe ava co ivi pipendar. Iyavei mbahe rāhii aviye vahe, ahe ava Tūpa povri pendar; caha naporai vahe, ahe ava carugar suindar yuvirecoi vahe. ³⁹ Acoi yamotarēhimbar, oñoti vahe caha, ahe niha Carugar ité. Evocoyase ari mbahe miti pohosa, ahe ari cañisa; acoi omonuha vahe mbahe miti, ahe Tūpa rembiguai iva pendar yuvireco. ⁴⁰ Iyavei inungar acoi caha tēi imonuhapri sapi ãgua, ãgüe ehi aveira ari cañi pipe coiye. ⁴¹ Evocoyase che, Ava Riquehir, che rembiguai iva pendar amondora opacatu ava ambuae omboangaipa uca vahe, mbahe-mbahe tēi aposar avei rerocua ãgua che povrive

yuvirecoi vahe pãhu sui. ⁴² Ichui omondopara tata guasuve. Aheve oyaseho tẽira iyavei ombotere-tere tẽira guãĩ yuvireco. ⁴³ Aheseve voi ava Tũpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

Mbahe repirusu ñomimbri sui yembohesa

⁴⁴ “Evocoyase Tũpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tẽi oyosura viña. Ahe rumo aheve avei oñomi. Ipare vorivetesu pipe opacatu ombahe omondopa co ivi rerocua ãgua mbahe sepirusu vahe pota raisa pipe” ehi.

Mbohir sepirusu catu vahe sui yembohesa

⁴⁵ “Iyavei Tũpa mborerecuasa inungar ava mbahe rerocuar oseca vahe mbohir icatupri vahe yepi. ⁴⁶ Ahe oyosuse mbohir sepi catu vahe, oso opacatu ombahe mondo co sepi catu vahe rerocua ãgua.

Pira mbohasa sui yembohesa

⁴⁷ “Iyavei Tũpa mborerecuasa inungar pira mbohasa. Imondopri ipive. Ipare omboha opacatu-catu tẽi pira. ⁴⁸ Acoi savapipose pira mbohasa, vinose ivi ãtasave yuvireco. Aheve oiporavo pira aviye vahe oñoñapa ombahe riruve yuvinoi, naporai vahe rumo opaño omombo yuvireco. ⁴⁹ Ëgüe ehi aveira ari cañi pipe: ahese Tũpa rembiguai iva pendar yuvinosera opacatu ava ndaseco põrai vahe mboyepipi ãgua ava seco catupri vahe sui. ⁵⁰ Evocoyase ava ndaseco põrai vahe imondosara tata guasuve. Aheve oyaseho tẽira iyavei ombotere-tere tẽira guãĩ yuvireco” ehi.

Mbahe ipiasu vahe iyavei ocuacua vahe sui yembohesa

⁵¹ Evocoyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

⁵² Evocoyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

Jesús Nazaret ve secoi

⁵³ Oñehe pare, Jesús osẽ ichui ⁵⁴ oyepota güecuave oso. Aheve ombohe ava judío tũparo pipe oico. Evocoyase ahe pendar ava oyepihamondii tẽi:

—¿Que pĩha co ava oyembohe catu ombahecua ãgua? iyavei, ¿mara ehi pĩha co mbahe poromondiiisa apo? —ehi yuvireco— . ⁵⁵ ¿Ndahei vo acoi carpintero rahir tẽi? Ichi niha acoi María,

iyavei yuvirecove tivri, ahe Santiago, José, Simón, Judas.
⁵⁶ Seindri avei niha yuvirecove yande pãhuve. Evocoyase,
 ¿que pãha oyembohera viña? —ehi tẽi yuvireco chupe.

⁵⁷ Ipipe sui ndoviroyai yuvireco. Ahe rumo aipo ehi chupe:
 —Tũpa ñehe mombehusar niha omboetei opacatu rupi
 yuvireco yepi. Secua pipendar, sẽta pipendar ae rumo nom-
 boetei yuvireco —ehi.

⁵⁸ Evocoyase, ahe ava viroyaẽhisa rese, moviro tẽi oyapo
 mbahe poromondiisa ipãhuve.

14

Juan Oporoãpiramo vahe mano agüer

¹ Ahe ari rupi Herodes, mborerecuar guasu Galilea pen-
 dar, oyandu Jesús rerãcua. ² Evocoyase aipo ehi opĩtivĩisar
 upe: “Juan Oporoãpiramo vahe revo ocuerayevi. Sese oyapo
 poromondiisa ipĩrata vahe” ehi.

³ Esepia niha, yipĩndar Herodes Juan oipisi, oñapichi carena
 pipe soquenda ãgua vivri Felipe rembireco Herodías sui tẽi,
⁴ “Ndiyai eté nde rembireco nungar ererecora” oyeupe hese.

⁵ Herodes oyuca pota Juan viña, osiquiyeño rumo ava eta
 sui. Esepia, ahe, “Tũpa ñehe mombehusar secoi” ehi yuvireco
 chupe. ⁶ Acoi Herodes haragüer mboeteisa pipe rumo aipo
 cuña Herodías membri osẽ opivoi ava rehi rembiepiave.
 Herodes upe evocoyase avĩye ai eté. ⁷ Sese ahe oyemoingatu
 ñepi reseve que mbahe oyeupe oporanduse imondo ãgua
 chupe. ⁸ Evocoyase ahe cuñatai oyeupe osi remimombehu
 rupi, aipo ehi Herodes upe:

—Embou Juan Oporoãpiramo vahe ãca poratu pipe cheu —
 ehi.

⁹ Aipo ñehesa nombovihai eté Herodes; ndiya iri rumo,
 “Aní” ohe ãgua. Esepia, opacatu ava güemimbori eta rovaque
 aipo ehi. Sese, “Taperu chupe” ehiño. ¹⁰ Ahese oporocuai
 Juan ãca hasia ãgua soquendasave. ¹¹ Ipare viraso poratu pipe
 cuñatai upe yuvireco. Evocoyase ahe omondo osi upe.

¹² Ahese Juan remimbohe oyepota yugüeru, viraso sete ñoti
 yuvireco. Ipare yuviraso Jesús upe imombehu.

Jesús oyopoi cinco mil cuimbahe

¹³ Jesús oyanduse Juan manosa, ahese ahe ae oso ava
 porẽhisave carite pipe. Ava rehi rumo oyanduse, yuvĩnose
 voi güecua sui, ivi rupi yuviraso osupiti secosave yuvireco.
¹⁴ Evocoyase osẽse carite pipe sui, osepia ava rehi. Ahese
 oiparisuereco ava eta. Sese opa ombogüera imbaheasi vahe
 serasopri. ¹⁵ Evocoyase caharuse semimbohe oyemboya
 yuvireco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovirocua mbahe güemihura yuvireco? —ehi yuvireco chupe.

16 —Aní, ndiyai yuviraso. Pe pemondora mbahe semihura yuvireco —ehiño chupe.

17 —Poyandepomi tēi rumo pan orovireco iyavei ñuviriomi tēi avei pira —ehiño semimbohe yuvireco chupe.

18 —Peruño ave cheu —ehi güemimbohe upe.

19 Ipare aipo ehi ava rehi upe: “Peguapi capihi harive” ehi. Evocoyase oipisi poyandepomi vahe pan, ñuviriomi vahe pira. Ichui omahese iva rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoyase omboyaho-yaho ava eta upe semihura yuvireco. 20 Evocoyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco. 21 Ahe cuimbahe ocaru vahe retacuer cinco mil. Cuña rumo iyavei chihivahe ndipapasai yuvireco.

Jesús oguata i hari rupi

22 Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe. 23 “Aviye” ohe pare ava upe, oyeupi oso ahe ae ivitri rese oyerogui água. Pītuse chupe, opitaño aheve. 24 Aheseve carite oso pucuse ipa popi sui, ivitu ipirata vahe osovañchi yuvireco. Sese ohitu vahe nambegüe-mbegüei ocua sese. 25 Cōhe potase, oguata i hari rupi oso güemimbohe coti. 26 Semimbohe i hari rupi iguatase, oyembosiquiye yuvireco ichui. Sese,

—¡Ndahei vo evocoi hāgüer secoi! —ehi yuvireco chupe.

27 Güemimbohe upe rumo aipo ehi:

—¡Peyemoviracuaño, che tēi! ¡PesiQuiye eme che sui! —ehi.

28 —Che Yar —ehi Pedro—. Nde ité ereicose, taguata i hari rupi vicho nde piri —ehi.

29 —Erio ru —ehi chupe.

Evocoyase Pedro ogüeyi carite pipe sui, oguata i hari rupi. Osora ipiri viña. 30 Ivitu pīrata repiase rumo, osiquiye ichui. Oso senise rumo ipive,

—¡Che Yar! ¡Che pīsiromi eve! —ehi.

31 Ahese cūriteimi voi oipisi Pedro po rese, aipo ehi chupe:

—¡Chīhi tēi ereyeroya che rese! ¡Mahera ndereyeroya tuprii che rese! —ehi.

32 Oyuvirohase rumo carite pipe, opituhu voi ivitu.

33 Evocoyase carite pipe yuvirecoi vahe oñenopiha sovai,

—¡Supi eté catu nde Tūpa Rahir ereico! —ehi yuvireco chupe.

Jesús ombogüera imbaheasi vahe Genesaret pendar

³⁴ Osasase ipa, oyepota Genesaret ivi rese yuviraso.
³⁵ Opacatu ahe pendar ava oicuaase Jesús yepota, ahese opacatu tecuami rupi omombehu-mbehu ava upe yuvireco. Evocoiyase viraso imbaheasi vahe chupe, ³⁶ aipo ehi yuvireco: “Topocomi tēi nde turucuar popi rese yuvireco” ehi; evocoiyase opacatu sese opoco vahe, ocuerapa voi eté yuvireco.

15

Porombohesa yande mboangaipa vahe resendar

¹ Oyemboya Jesús rese moviro fariseo iyavei Moisés porocuaita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

² —¿Mahera vo nde remimbohe ndoguatai yande ramoi aracahendar aracuasa rupi yuvireco? ¿Mahera vo yande porocuaita mboaviyeēhisa pipe ndoyepoi ocaru āgua yuvireco yepi? —ehi.

³ Jesús omboyevi aipo ehi chupe:

—Pe no, ¡mahera ndapemboyeroyai Tūpa porocuaita pe ramoi aracahendar aracuasa rupi tēi pe guata āgua! ⁴ Esepia, Tūpa aipo ehi: “Pemboyeroyara iyavei peipitivira pe ru, pe si avei no. Acoi ñehe mara vahe oyesupa upe, ahe tomanoño” ehi aracahe. ⁵ Pe rumo aipo peye tēi: “Acoi ava aipo ehi vahe vu upe, osi upe avei no: ‘Ndiyai chira mbahe mondo āgua pēu. Esepia, che opacatu mbahe areco vahe imondopri Tūpa upe’ ehise, ⁶ ahese ndiyai eté ipitivi āgua chupe” peye. Ēgüe peye pe aracua raisa pipe pemocañi Tūpa porocuaita peyesui. ⁷ ¡Pe Tūpa reroyasar angahu tēi peico vahe! Supi tupri ité Tūpa ñehe mombehusar Isaías rembicuachía aracahendar omombehu pe recocuer:

⁸ ‘Co tecua pendar ava oyuru pipe tēi che mboetei yuvireco; ipihañemoñetasa rumo amombri tēi che sui.

⁹ Oyerure tupri tēi yuvireco cheu.

Esepia, iporombohesa ava porocuaita tēi’

ehi Isaías rembicuachiagüer pipe aracahe —ehi Jesús imombehu.

¹⁰ Ipare,

—Perio —ehi ava rehi upe—. Peyapisaca, pesenducua tupri che ñehe: ¹¹ mbahe oique vahe ava yuru rupi nomboangaipa ucai. Mbahe osē vahe ava yuru pipe sui, ahe rumo omboangaipa uca —ehi.

¹² Evocoiyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

13 Ahe rumo aipo ehi chupe:

—Opacatu mbahe miti ndahei vahe che Ru iva pendar remiti, opara sapohosa curi —ehi—. 14 Ēgüe tehiño yuvireco. Esepia, evocoi inungar ndasesapisoi vahe viroguata ambuae ava ndasesapisoi vahe yuvireco. Ahe evocoyase oyoya voira oviapi ivicuar pipe yuviraso —ehi.

15 Evocoyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

16 —¿Ndapesenducua vitei avei catu pe co ñehesa?

17 ¿Ndapeicuai vo opacatu mbahe acoi ava yuru rupi oique vahe oso yaviterve, ipare osẽ setecuer sui?

18 Ava pihañemoñetasa sui osẽ vahe rumo iyuru rupi, ahe ava omboangaipa. 19 Esepia, ava pihañemoñetasa sui osẽ pihañemoñeta raisa, porapichisa, mendasa sui yemboaguasasa, nomendai vahe yemboaguasa tẽisa, mondasa, temira iyavei ava rese ñemoñeta tẽisa. 20 Evocoi nungar mbahe rumo omboangaipa ava; ndahei angaipa acoi yande caru renonde yande yepoiẽhisa nungar —ehi.

Cuña ndahei vahe judía viroya Jesús

21 Ichui osẽ Jesús oso, oguata Tiro ivi rupi, Sidón ivi rupi avei. 22 Cuña cananea, Tiro, Sidón ivi rese secoi vahe oyemboya Jesús rese aipo ehi:

—¡Che Yar, David suindar, che paraisuerecomi eve! ¡Che membri viresco caruguar oyese! —ehi pucu-pucu ou chupe.

23 Ahe rumo nomboyevii eté chupe. Evocoyase semimbohe oyemboya yuvireco sese aipo ehi:

—Emboyepipi co cuña yande sui. Esepia, sãse pucu-pucu ou yande raquicuei —ehi yuvireco chupe.

24 Evocoyase aipo ehi güemimbohe upe:

—Che Ru Tũpa rumo che mbou Israel recua pendar upeño. Esepia, ahe ovesa ocañi tẽi vahe nungar yuvireco —ehi.

25 Ahe cuña rumo oñenopiha sovai, aipo ehi chupe:

—¡Che Yar, che pĩtiviimi eve! —ehi.

26 Ahe rumo aipo ehi chupe:

—Naporai rumo yarocua pan tahir sui cave tohu yamondo vaherã —ehi.

27 —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.

28 —¡Cuña, tuvichá nde yeroyasa! Aviye, ěgüe tehi eté nde remimbotar rupi —ehi.

Aipo ihe ramoseve, ocuera voi eté imembri.

Jesús setá ombogüera ava imbaheasi vahe

²⁹ Ichui Jesús osẽ oso ipa Galilea ivii. Ipare oyeupi ivitri rese uguapi oĩ. ³⁰ Aheve setá ava oyepota, güeru ati imbaheasi vahe yuvireco chupe: ndipindugüei vahe, ndasesapiso vahe, ipãri-pãri vahe, niñhengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera. ³¹ Ichui ava niñhengatui vahe oñehe; ipãri-pãri vahe ocuera tupri; ndoguatai vahe uguata avei iyavei ndasesapiso vahe osareco yuvireco. Sepiase ava rehii oyepihamondii aipo ehi: “Imboetipri Israel Tũpa tasecoi” ehi yuvireco.

Jesús oyopoi cuatro mil cuimbahe

³² Evocoyase Jesús oñehe güemimbohe upe aipo ehi:

—Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semi-hura. Ndiyai sètave sie porẽhi reseve amondo. Aviyeteramo oviroviapi-api tiẽtera tieporẽhi peri rupi yuvireco viña —ehi.

³³ Evocoyase semimbohe aipo ehi yuvireco chupe:

—¿Que sui pĩha orosecara tembihu ava rehii upe nara co-have ava porẽhisave viña? —ehi yuvireco.

³⁴ —¿Mbovi vo pan pereco? —ehi.

—Orovirecomi siete pan iyavei moviromi tẽi pirami —ehi semimbohe yuvireco chupe.

³⁵ Evocoyase, “Peguapi ivi harive” ehi ava rehii upe.

³⁶ Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoyase omondopa ava rehii upe yuvireco. ³⁷ Opacatu ava ocaru vahe ihĩtaro yuvireco. Ipare semimbohe omboapipo iri rane sumbirer siete iruova yuvireco. ³⁸ Cuimbahe ocaru vahe retacuer cuatro mil. Cuña, chĩhivahe retacuer rumo ndicuasai. ³⁹ Ipare Jesús, “Aviye” ehi ava upe, ahese oha carite pipe oso ivi Magadán rupi.

16

Fariseo iyavei saduceo oporandu poromondiisa rese yuvireco

¹ Fariseo iyavei saduceo yuviraso Jesús repia secoãha ãgua yuvireco viña. “Emoporẽhi Tũpa suindar nde recosa poromondiisa pipe oreu” ehi yuvireco chupe.

² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pĩrá iteanga’; ³ iyavei añihivei: ‘Co pipe ari naporai chira. Esepia, iva rese pĩra vai anga, pĩtu guasu-guasú avei’ peye. Pe niha peicua mbahe iva resendar tẽi oyecua vahe mombehu; ndapeicuai rumo mara oyapave co poromondiisa cũriteindar ava upe imombehu. ⁴ Co ava ndaseco põrai vahe oyepipi vahe Tũpa sui oporandu poromondiisa rese ‘¿Tũpa

suindar ité p̄ha?” oyapave. Che rumo namboyecuai chira ambuae poromondiisa chupe; acoi poromondiisa Tūpa oyapo Jonás upe güeraño tupri asevara chupe” ehi.

Ichui oseyapaño ava rehii oso.

Fariseo iyavei saduceo porombohesa inungar pan mboapeposa

⁵ Evocoyase semimbohe oyepota ipa rovai yuviraso. Pan sui rumo sesarai eté yuvireco. ⁶ Evocoyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

⁷ Iñehe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tēi oyeupe yuvireco.

⁸ Ahe rumo oicua güemimbohe p̄hañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tuprii che rese! ⁹ ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbierer imonuhase? ¹⁰ ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbierer? ¹¹ ¡Too, mara peye rutei pe aipo senducuaēhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

¹² Ahese ramo oicua yuvireco cute, ndahei pan mboapeposa rese ité oñehe, Jesús rumo oñehe fariseo iyavei saduceo eta porombohesa rese tēi.

Pedro oicua uca Jesús Tūpa Rembiporavo secose

¹³ Oyepotase Jesús, oso tecua Cesarea coti Filipino ivi rese, aheve oporandu güemimbohe upe aipo ehi:

—¿Mara ehi vo ava oñehe yuvireco che rese, Ava Riquehir che recose? —ehi.

¹⁴ Semimbohe evocoyase aipo ehi yuvireco chupe:

—Amove ava: “Juan Oporoãpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tūpa ñehe mombehusar mboetasa” ehi yuvireco ndeu —ehi.

¹⁵ —Pe no, ¿‘Ava co secoi’ peye ru pe cheu no? —ehi güemimbohe upe.

¹⁶ —Nde niha Tūpa supi eté vahe Rembiporavo imombepri; Tahir ité ereico —ehi Simón Pedro.

¹⁷ —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—. ¹⁸ Nde Pedro ereico, co ita guasu

harive amopuhara che tũparoguã. Ñepe yepe manosa ndosecoreroyi chietera opĩratasa pĩpe. ¹⁹ Evocoyase che amondo Tũpa mborerecuasa resendar mboisa ndeu; acoi, “Aviye” erese que mbahe uve co ivi pĩpe, ěgũe ehi aveira ivave; iyavei, “Aní” erese que mbahe uve co ivi pĩpe, ěgũe ehi aveira ivave —ehi.

²⁰ Ipare Jesús aipo ehi güemimbohe upe: “Co Tũpa Rembiporavo Poropĩsĩrosar’ peye eme ava upe cheu” ehi.

Jesús omombehu omano āgua

²¹ Ichuive tupri Jesús omboipi imombehu güemimbohe upe oico: “Iya niha cheu che so āgua tecua guasu Jerusalén ve. Aheve judío rerecuar, pahi rerecuar ivate catu vahe iyavei Moisés porocuaite rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapĩsa ari pĩpe acuerayevira” ehi. ²² Pedro rumo viraso co cotimi chupe oñhengata āgua:

—¡Tũpa ndoipotai eté evocoi nungar nde reco āgua, che Yar! ¡Ndipoi chietera mbahe ndeu! —ehi Pedro chupe viña.

²³ —¡Esĩri che sui, Carugar! —ehi Pedro upe—. Nde che reiti pota eve mbahe tẽi pĩpe. Esepia, nandepihañemoñetai mbahe Tũpa upendar rese, ava nungar tẽi nde pĩhañemoñeta eico —ehi.

²⁴ Ipare aipo ehi güemimbohe upe:

—Acoi uguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosiira viña, toyemoingatu voi che recocuer rese oparaisu āgua iyavei toguata tupri che rupi. ²⁵ Esepia, acoi ava güetecuer tẽi raisupar, ocañi tẽi etera; acoi ava omocañi tẽi vahe rumo güetecuer che recocuer rese, ahe oñepĩsirora. ²⁶ Esepia, ¿aviye ai angahu pĩha ava upe opacatu mbahe co ivi pĩpendar pĩsi āgua, ahe ae tẽi omocañise güecocuer yuvireco viña? ¿Mbovi pĩha omondora ava güecocuer repirã viña? ²⁷ Esepia che, Ava Riquehir, ayevira che Ru reco pĩratasa pĩpe che rembiguai iva pendar reseve curi. Che evocoyase aicuara ñepeipei ava rembiapo agüer rupi chupe. ²⁸ Supi eté oimera amove cohava ava nomano vitei chivaherã, ahe che, Ava Riquehir, che repia rane itera che yevise che mborerecuasa pĩpe yuvireco curi —ehi güemimbohe upe.

17

Jesús ñecuaño agüer

¹ Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi. ² Aheve, aviyeteramo tẽi oñecuño güemimbohe rovai. Evocoyase sendi sova inungar

ari, iturucuar morochí, sendi avei. ³ Aheseve voi oyemboye-cua Moisés, Elías reseve yuvireco chupe. Ahe oñemoñeta oyeupe yuvinoha. ⁴ Ahese Pedro aipo ehi chupe:

—Che Yar, javiye ai eté cohave yaico! Ereipotase, ayapora mbosapi teyupami: ñepei ndeu nara, ambuae Moisés upe, ambuae evocoyase Elías upe nara —ehi.

⁵ Aviyeteramo tēi iva quiha rese osesapé ogüeyi ou oyopipa tupri ité. Ipãhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu iñehe rese” ehi vahe.

⁶ Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui. ⁷ Ahese oyemboya oso güemimbohe rese, oñatoi aipo ehi chupe:

—Pepüha; pesiquiyei rene —ehi.

⁸ Evocoyase omahe yuvireco sese, ahese ahe güeraño ospia imoha yuvireco.

⁹ Ipare yuvirogüeyi ivitri sui aipo ehi evocoi mbosapi güemimbohe upe:

—Ndapemombehui chietera que ñepei ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰ Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹ Evocoyase omboyevi güemimbohe upe aipo ehi:

—Elías rane ité niha oura opacatu mbahe moingatú ñgua curi. ¹² Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ëgüe ahe aveira niha cheparaísura ahe ava povrive vichico —ehi.

¹³ Evocoyase semimbohe osenducua ramo iñehe yuvireco. Ëgüe ehi Jesús oñehe Juan Oporoãpiramo vahe rese.

Jesús ombogüera chñivahe carugar rerecosar

¹⁴ Viroyepota Jesús güemimbohe ava rehaisave seraso. Aheve mbia oyemboya oso sese, oñenopiha sovai aipo ehi chupe:

¹⁵ —Che Yar, ereiparaísuerecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer oviapi tatave, ive avei no. ¹⁶ Sese aru tēi nde remimbohe upe. Nombogüera catui rumo yuvireco —ehi.

¹⁷ —¡Too, ndapeyeroya tupri viteí eté che rese! ¡Co coti tēi vite pe pihañemoñetasa! ¡Mbovi rupi rutei vo aico vitera pe pãhuve che ñemosasa pipe! Peru evocoi chñivahe cheu —ehi.

¹⁸ Ahese oñehe pírata carugar upe chñivahe sui imose. Aheseve ocuera tupri voi eté.

¹⁹ Ip̄are semimbohe oporandu co cotimi yuvireco chupe:

—¿Mahera p̄ha ndoromose catui eté carugar ichui? —ehi yuvireco.

²⁰ —Esepia, ndapeyeroya tuprii Tũpa rese. Supi eté sese pe yeroyasa, yepe ndoyavii chira mostaza r̄hii tahimi vahe viña, aipo peyera co ivitri upe: ‘Esiri, eso coi coti’ peyera. Evocoyase ivitri osiriño itera. Ahese ndapemboavaimi chira mbahe. ²¹ Evocoi nungar carugar imosesa yayerurese yande yecuacusa pipe —ehi.

Jesús omombehu iri omano água

²² Jesús oguata viteseve Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotarẽhimbar povrive. ²³ Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai t̄i yuvireco.

Jesús omondo guarepochi tũparo uve nara oyeupe oporandu vahe upe

²⁴ Oyepotase Jesús güemimbohe reseve tecua Capernaum ve, aheve guarepochi rerocuar tũparo upe nara yuviraso Pedro upe, oporandu yuvireco chupe:

—¿Supi eté pe rereciar ndomondoi guarepochi tũparo upe nara? —ehi.

²⁵ —Omboepi niha —ehi Pedro chupe.

Evocoyase oiquese Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo virocua guarepochi mborereciar guaso co ivi pipe yepi? ¿Omu sui p̄ha, ambuae ava sui tie? —ehi.

²⁶ Pedro evocoyase omboeyevi chupe:

—Ambuae ava sui —ehi.

—¡Taa! —ehi—. Evocoyase mborereciar povri pendar nomboepi chira yuvireco —ehi—. ²⁷ Guarepochi rerocuar moñemoiroẽhi água rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepe guarepochi. Ahe eraso chupe. Ipipe iyacatura imboepi água yandeu —ehi Jesús Pedro upe.

18

¿Ava vo seco ivate catu vahe?

¹ Ahe ari pipeve semimbohe oyemboya Jesús rese yuvireco mbahe rese oporandu água chupe:

—¿Uma vo seco ivate catu vahe Tũpa mborerecuasa pipendar? —ehi.

² Evocoyase Jesús: “Erio” ehi ñepeí chĩhivahemi upe, omondo güemimbohe pãhuve imoha, ³ aipo ehi:

—Supi eté, acoi ndapeñecuñaroise iyavei ndapeicoise chĩhivahemi nungar, ahese ndapeiquei chira Tũpa mborerecuasa pipe. ⁴ Acoi oñemomini vahe rumo inungar co chĩhivahemi, evocoi nungar seco ivate catura Tũpa mborerecuasave. ⁵ Acoi ava oipisi vahe co chĩhivahemi nungar che rer pipe sereco, che ité che pisi yuvireco —ehi.

Iparaisu itera ava oporomboangaipa uca vahe

⁶ “Acoi que ava rumo omboangaipa uca vahe co chĩhivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo ãgua. ⁷ ¡Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroãtoisa yepi, jahe imboangaipa ucasar rumo iparaisu itera!

⁸ “Sese inungar pe po, anise que pe pi avei pemboangaipa uca vahe, peyasía, pemombora amombri peyesui viña. Esepia, aviye catu peiquera tecove apirẽhisave ñepeí pe pi, pe po rese, peso rãgüer sui tata guasu apirẽhisave ñuvirío pe po, que ñuvirío pe pi reseve. ⁹ Iyavei pe resa pe mboangaipa ucase, penose, pemombo amombri peyesui. Esepia niha, aviye catu peiquera ñepeimi pe resa rese tecove apirẽhisave, ñuvirío pe resa rese tata guasu apirẽhisave pe reique rãgüer sui.

Porombohesa ovesa ocañi tẽi vahe resendar

¹⁰ “Peroĩroi rene que ñepeí chĩhivahemi che reroyasar. Esepia, ivave sembiguai che Ru pirindar ité yuvirecoi yepi” ehi.

¹¹ “Che niha, Ava Riquehir, ayu ava ocañi tẽi vahe pĩsiro ãgua.

¹² “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepeí ichui viña, evocoyase oseyá ranera noventa y nueve tẽi vahe ovesa ivitri rese. Oyevira ocañi vahe reca oso. ¹³ Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui. ¹⁴ Ëgüe ehi avei che Ru ivave secoi vahe, ndoipotai eté que ñepeí ava che reroyasar chĩhivahemi nungar cañi ãgua” ehi.

Porombohesa yande ñero ãgua rese

¹⁵ “Acoi nde mboetasa Tũpa reroyasar oyapose que mbahe tẽi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute. ¹⁶ Nande reroyaise rumo, ahese ereñehera ñepeí, anise ñuvirío ava upe nde pĩtivii ãgua rese. Ahe avei tosendu pe ñehe. Ahe oimera que ñuvirío, anise mbosapi sendusar. ¹⁷ Acoi

ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tūpa ndoicuai vahe nungar pereco iyavei inungar mbahe-mbahe tēi aposar, ēgüe peye sereco” ehi.

¹⁸ “Supi eté acoi, ‘Ayiye’ peyese que mbahe upe co ivi pipe; ēgüe ehi aveira ivave. Iyavei co ivi pipe, ‘Aní’ peyese que mbahe upe, ēgüe ehi aveira ivave.

¹⁹ “Iyavei co amombehu potami avei pēu: Acoi ñuvirío co ivi pipe pe pihañemoñetasa oyoya tuprise que mbahe rese peporandu āgua pe yeruresa pipe, evocoyase che Ru iva pendar omondora pe porandusa pēu. ²⁰ Esepia, acoi ava ñuvirío, que mbosapi oñemonuhase che rer pipe yuvireco, aheve che aico ipāhuve” ehi.

²¹ Ipare Pedro oyemboya sese oporandu:

—Che Yar, ¿imbovi rupi vo che ñerora che mboetasa mbahe tēi cheu oyapose? ¿Siete yupagüer rupi piha? —ehi.

²² —¡Aní! —ehi—. ¡Setenta rupi siete oyupagüer! —ehi Pedro upe.

Yembohesa ava niñero potai vahe resendar

²³ “Tūpa mborerecuasa inungar mborerecuar guasu omoingatu pota vahe güembiguai revesa chupe. ²⁴ Evocoyase omboipi imoingatu āgua, ahese ipitiviisar güeru ireve ati catu vahe guarepochi rese chupe. ²⁵ Ahe rumo ndovirecoi imboepi āgua. Sese co mborerecuar oyocuai opitiviisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa āgua cheu’ ehi. ²⁶ Evocoyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tēi cheu. Opara niha amboepi ndeu’ ehi chupe. ²⁷ Ahese oiparaisuereco, opoi irevesa sui.

²⁸ “Aheseve voi rumo sembiguai osēse, osepia ambuae ondugüer oyeupe ndaseta tuprii vahe ireve. Ahe chupe aipo ehi iyesho pisi: ‘¡Emboepipa acoi nde revesa cheu!’ ehi. ²⁹ ‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi. ³⁰ Niñero potai eté rumo. ‘Tomboepipa rane ité orevesa cheu’ ehi soquenda uca. ³¹ Osepia rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuer yuvireco. ³² Evocoyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu. ³³ ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi. ³⁴ Ichui serecuar oñemoirosave oyocuai imombaraisu āgua ‘tomboepipa rane ité orevesa cheu’ oyapave.

³⁵ “Indó, evocoyase ãgüe ehi aveira che Ru iva pendar pëu ndapeñeroise ité peyeupe” ehi Jesús güemimbohe upe.

19

Jesús oporombohe mendasa sui poiëhi ãgua

¹ Ipare Jesús osë Galilea sui, oso Judea ivi rupi ari sësä coti ïai Jordán rovai. ² Ava rehi yuviraso saquicuei. Aheve setä imbaheasi vahe ombogüera.

³ Evocoyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye pïha opoi cuimbahe güembireco sui que mbahe tëi oyapose? —aipo ehi yuvireco chupe.

⁴ Ahe rumo omboyevi fariseo upe:

—¿Ndapesenducuími vo ñehesa icuachiapri pipe peyerquoise: ‘Yipindar yande Aposar oyapo cuimbahe, cuña avei’ ehi? ⁵ Iyavei aipo ehi: ‘Sese niha cuimbahe omendase, oyepëpïra oyesupa sui güembireco rese ité yuvirecoi ãgua. Evocoyase ñuvirío yuvirecoira ñepëi ava nungar’ ehi. ⁶ Sese ndahe iri ñuvirío, ñepëi vahe ité yuvirecoira. Evocoyase ava Tüpa omomenda vahe oyese, ndiyai ava tëi omboyepëpi yuvireco oyesui —ehi.

⁷ Evocoyase fariseo oporandu yuvireco chupe:

—¿Mahera ru oyocuai Moisés cuimbahe omondo vaherã güembireco upe cuachiar poisa resendar opoi ãgua ichui? —ehi.

⁸ —Pe poreroyaëhisa pipe niha Moisés ãgüe ehi pëu. Yipisuive ité rumo Tüpa ndoipotai oyesui opoi ãgua yuvireco. ⁹ Esepia, acoi opoi vahe güembireco mbahe ndoyavii vahe sui omendase ambuae cuña rese, ahe oyemboaguasa tëi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ëgüe ehise cuimbahe güembireco rese, evocoyase aviye catu ndayamendai chira —ehi.

¹¹ —Ndahei chira rumo opacatu osenducua che aipo ahe vahe yuvireco. Tüpa ombou vahe sembiaporã, ahe güeraño osenducua yuvireco —ehi güemimbohe upe—. ¹² Esepia, oime pïhañemoñetasa ava mendaëhi ãgua: amove ohasa suive ndatahi vahe, ambuae nomboahi ucai ava yuvireco, ambuae evocoyase nimendasei. Esepia, ahe oporaviqui pota Tüpa mborerecuasa reseño ité. Acoi oicatu vahe co ñehesa reroya ãgua, toviroyaño —ehi.

Jesús osovasa chïhivahe

¹³ Ipape ahe pendar güeru moviro chihivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tēi chihivahe?” ehiño serusar upe yuvireco. ¹⁴ Jesús rumo aipo ehi:

—¡Mahera ndapeipotai iyu āgua! Toyugüeruño chihivahe cheu. Esepia, co chihivahe nungar ava yuviroiquera che Ru povrive —ehi.

¹⁵ Ipape omondo opo chihivahe harive osovasa. Ichui osē oso.

Mbia chihivahe imbahe eta vahe omoñeta Jesús

¹⁶ Mbia chihivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco āgua? —ehi.

¹⁷ —¡Mahera ereporandu cheu mbahe aviye vahe rese! —ehi—. Ñepeño ité aviye vahe oime. Erereco potase rumo tecovesa apirēhi vahe, emboyeroya mborocuaita —ehi.

¹⁸ —¿Uma vo aipo mborocuaita? —ehi.

Ahese omboyevi chupe:

—‘Ndereporoyucái chira, nandeaguasai chira, nandemondai chira, nanderemirai chiaveira ambuae ava rese, ¹⁹ eremboyeroyara nde ru, nde si avei, eresaísura ambuae ava nde yeaisu nungar eico’ ehi icuachiapri pipe —ehi mbahe yar upe.

²⁰ —Co rumo mborocuaita opacatu amboaviye ité yepi. ¿Mbahe vo evocoyase ipane vite che ayapo vaheerā? —ehi.

²¹ —Ereipotase mbahe tupri pipe nde reco āgua, emondopa rane nde mbahe; ahe sepri evocoyase eremondora ava iparaisu vahe upe. Ichui ererecora mbahe aviye vahe ivave. Ipape ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui oviharēhisave oso. Esepia, mbahe yar ité secoi.

²³ Evocoyase aipo ehi güemimbohe upe:

—Supi eté yavai eteanga imbahe eta vahe upe oiique vaheerā che Ru mborerecuasave. ²⁴ Aipo ahe iri: Yavai rai camello upe yucuar rupi seique āgua; ava imbahe eta vahe upe rumo yavai catu che Ru mborerecuasave seique āgua —ehi.

²⁵ Aipo iñehesa renduse, semimbohe oyepihamondi aipo ehi:

—¡Ava angahu pīha evocoyase oñepisirora yuvireco viña! —ehi yuvireco.

²⁶ Omahe güemimbohe rese, aipo ehi:

—Ava tēi upe yavai aipo nungar mbahe apo. Tūpa upe rumo mbahe opacatu ndayavaimi eté —ehi.

²⁷ Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata ãgua. ¿Mbahe evocoyase oimera oreu? —ehi.

²⁸ —Oime itera niha mbahe pẽu. Esepia, acoi ari oye-
potase opacatu mbahe recuñaro ãgua, ahese che, Ava Riquehĩr,
aguapĩra che rendave che mborerecua guasusave. Pe avei,
che rupindar, peguapĩra doce tenda harive. Ahese opacatu
judío acoi doce imar Israel suindar recocuer rese peporan-
dura curi. ²⁹ Acoi opacatu ava oseya vahe güëta, anise que
viquehĩr, anise vivri, güeindri, que vu, anise osi, guahĩr, que
oivi avei che raisusa pipe, ahe oipisira omahera cien yupagüer
rupi mbahe oseya vahe iyavei virecora tecovesa apirẽhi vahe.
³⁰ Seta vai rumo cūrítei yipindar vahe, ipa tẽira yuvirecoi; setá
aveira cūrítei ipa tẽi vahe, yipindar yuvirecoira curi —ehi.

20

Yembohesa oporaviqui vahe resendar

¹ “Tũpa mborerecuasa inungar acoi ava ivi yar osẽ añihiveive
oyeupe nara oporaviqui vahe reca ‘toporaviqui che uva tive
yuvireco’ oyapave. ² Oyosuse ava, ahese omoingatu oyeupe
oporaviqui vaherã upe ñepeí ari mboraviqui repri imboepi
ãgua. Ahese opa omondo ocove imboporaviqui. ³ Ipare
osẽ, oso añihivei, arivate catumi osepia ocarusu pipe ambuae
ava oporaviquisa ndovirecoi vahe, ⁴ aipo ehi chupe: ‘Peso,
tapeporaviqui che uva tive. Amboepi tuprira niha pẽu’ ehi.
Ahe evocoyase yuviraso oporaviqui ãgua icove. ⁵ Ipare oso
iri mbiter ari rupi oyeupe oporaviqui vahe reca, ãgüe ehi
tupri avei caharuse, las tres rupi. ⁶ Ipa osẽ iri las cinco
pipe, aheve avei osepia ambuae ava ndovirecoi vahe opo-
raviquisa yuvinoha. Chupe aipo ehi: ‘¿Mahera peyembohĩ tẽi
ari momba cohava pehã?’ ⁷ ‘¡Aní!’ ehi yuvireco, ‘Esepia,
ndipoi eté ava, tapeporaviquimi, ehi vahe oreu’ ehi. Evo-
coiyase, ‘Peso, pe avei peporaviqui tive’ ehi. ⁸ “Pĩtu ramose,
cove yar aipo ehi oporaviqui vahe rese yangarecuar upe:
‘Eñehépa ava oporaviqui vahe upe. Emboepi ipa yugüeru
vahe upe rane iporaviqui yuvireco chupe. Ipare tenonendar
uve’ ehi. ⁹ Evocoyase las cinco pipe yuviroique vahe opo-
raviqui, ahe rane tenonde yugüeru. Oyacatu ñepeí-peí ñepeí ari
rupindar oipisi guarepochi yuvireco. ¹⁰ Ipare tenonde catu
yuviroique vahe oporaviqui, ahe chupe ipa tẽi imboepisa.
Ahe ipihañemoñeta, ‘Yaipisi catura revo guarepochi’ ehi oye-
upe yuvireco viña. Ipare rumo ahe tupriño avei oipisi ñepeí ari
rupindar yuvireco. ¹¹ Guarepochi pisire rumo oñemoiro cove
yar upe yuvireco, ¹² aipo ehi: ‘Co ava yugüeru ipa tẽi vahe,
ñepeí horami tẽi oporaviqui yuvireco. Nde rumo eremboepi
oyoya tupriño ité oreu eremboepi vahe rese. Oroñemosañi tẽi

oroporaviqui ari momba sacucuer upe oroico' ehi. ¹³ Cove yar rumo aipo ehi ñepe ipãhu pendar upe: 'Mbori, ndahei mbahe tẽi ayapo ndeu. Esepia, amboepi guarepochi ñepe ari resendar ndeu acoi, Aviye, peye vahecuer rese cheu' ehi. ¹⁴ 'Evocoyase ndo co, eipisi nde guarepochi, eraso. Che rumo amondo pota co ava ipa tẽi oi que vahe upe inungar tupri ndeu amboepi. ¹⁵ Esepia, cheu iyacatu ite che remimbotar rupi mbahe ayapo che guarepochi rese. Nderecatẽhi tie ambuae ava mbahe rese che ayapose mbahe aviye vahe chupe' ehi.

¹⁶ "Indó, ãgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tẽi vaherã yuvireco curi" ehi güemimbohe upe.

Jesús omombehu iri omano ãgua

¹⁷ Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

¹⁸ —Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, "Tomano" ehira yuvireco cheu. ¹⁹ Ipare che mondora ava ndahei vahe yande mu upe marama tẽi che rereco ãgua che roiroso pipe. Ipipe che yucara curusu rese yuvireco. Imombosapisa ari pipe rumo acuerayevira —ehi.

Santiago, Juan si oporandu Jesús upe mbahe rese omembri upe nara

²⁰ Ipare Zebedeo rembireco ñuvirio omembri reseve, oyemboya Jesús rese yuvireco. Ahese oñenopiha sovai oporandu ãgua mbahe rese. ²¹ Evocoyase,

—¿Mbahe vo ereipotami? —aipo ehi ichi upe.

—Che aipota che membri eremboguapira ndeyepiri ñepe nde mbahe rese pocosa coti, ambuae nde mbahe rese pocoẽhisa coti nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura pĩha co mbahe-mbahe tẽi aiporara vaherã, inungar-ra que igua iro vahe aihu vaherã viña? —ehi.

—Taa, oroicatuño itera —ehi yuvireco.

²³ —Supi ete peiporarara mbahe-mbahe tẽi. Co rumo ndiyai cheu, che piri opomboguapi ãgua che mbahe rese pocosa coti, ambuae che mbahe rese pocoẽhisa coti avei. Che Ru rumo omoingatu güembiporavo upe nara uguapi vaherã che ipive —ehi.

²⁴ Aipo iñehesa renduse ore ambuae diez semimbohe, oroñemoiro Santiago, Juan upe avei. ²⁵ Evocoyase, “Perio” ehi oreu.

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe, iyavei acoi ivate catu vahe oyeecoapirasá omborerecuasa pipe yepi. ²⁶ Pe rumo ēgüe ndapeyei chira peico. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese. ²⁷ Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese. ²⁸ Esepia, che, Ava Riquehir, ayu ndahei ava che rese ihañeco āgua, che rumo ayu ava rese che hañeco āgua iyavei amano vaherā ava eta repirā Carugar povri sui senose āgua —ehi.

Jesús ombogüera ñuvirío ndasesapisoi vahe

²⁹ Ipare Jesús, güemimbohe reseve oñocuase tecua Jericó yuvireco, ahese ava rehii yuviraso saquicuei. ³⁰ Aheve peri popive ñuvirío ava ndasesapisoi vahe oguapi yuvinoi. Evocoyase osenduse Jesús ocuase supi, osapucái pĩrata yuvireco chupe aipo ehi:

—¡Ore Yar, mborerecuar guasu David suindar, ore paraisuerecomi tēi eve! —ehi yuvinoi.

³¹ Ahe ava oyaca-yacaño: “Quiriri” ehi yuvireco chupe. Ahe rumo osapucái pĩrata catuño ité yuvireco aipo ehi:

—¡Ore Yar, David suindar, ore paraisuerecomi tēira eve viña! —ehi iriño ité yuvireco.

³² Evocoyase osendu iñehe, opita, “Perio” ehi chupe. Ipare,

—¿Mbahe vo peipota ayapo vaherā pēu? —ehi.

³³ —¡Ore Yar, ore mbosarecomi tēi eve! —ehi.

³⁴ Evocoyase saiskusave opoco sesa rese. Ahe ramoseve ndasesapisoi vahe osareco tupri ai eté yuvireco. Ipare yuvirasoño ité supi.

21

Jesús oique Jerusalén pipe

¹ Acoi orovirovise Jerusalén, oroyepota tecuami Betfagé popive, ivitri Olivo serer vahe ñipiimi. Aheve omondo ñuvirío güemimbohe ² aipo ehi chupe:

—Peso co tecuami yande rovaindarve. Aheve pesepiara guaricu imembri reseve ñapichimbri imoha. Ahe peyorañora seru cheu. ³ Acoi que ava oporanduse yuvireco pēu sese, “Yar oiporu pota, ipare niha omboyevi voiñora” peyera chupe —ehi güemimbohe upe.

⁴ Co ēgüe ehi chupe aracahendar Tūpa ñehe mombehusar ñehengagüer mboaviye āgua, aipo ehi vahe:

⁵ “Pemombehu Sión pendar upe:

‘Pesepia, pe rerecuar guasu ou oico güeco mbegüesa pipe pëu guaricu harive imembrî reseve’ peyera” ehi.

⁶ Evocoiyase evocoi semimbohe yuviraso, oyapo ité ocuaise yuvireco. ⁷ Güeru guaricu imembrî reseve yuvireco chupe. Omondo oturucuar icupeao água yuvireco. Ipare Jesús oyeupi iharive. ⁸ Iyavei ava rehî oipîpira oturucuar peri rupi imboetei guasusa pipe. Ambuae evocoiyase oyasia pindo omondo peri rupi yuvireco saperã. ⁹ Ava rehî senonde, saquicuei avei oguata vahe osapucái yuvireco aipo ehi:

—¡Co mborecuar guasu David suindar, imboeteipri tasecoi! —ehi—. ¡Sovasapri secoi ou vahe yande Yar rer pipe! ¡Ivave imboeteipri tasecoi! —ehi yuvireco.

¹⁰ Oiquese Jerusalén pipe, opacatu co tecua pipendar oyepihamondî yuvireco. Iyavei setá oporandu-randu yuvireco:

—¿Ava pîha co mbia? —ehi tēi yuvireco.

¹¹ Ava rehî oguata vahe Jesús rupi aipo ehi yuvireco chupe:

—Co niha Jesús, Tûpa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepisar tûparo pipe sui

¹² Ipare Jesús oique judío tûparo guasu pipe. Ipipendar opa omombo ichui ava mbahe mondosar, mbahe rerocuasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo. ¹³ Ipare aipo ehi chupe:

—Icuachiapri aracadendar pipe aipo ehi: ‘Che rêta yeruresa rêtarã’ ehi. Pe rumo imonda rai vahe rêta nungar tēi pereco —ehi.

¹⁴ Aheve oyemboya Jesús rese yugüeru ava ndasesapisoi vahe, ipâri-pâri vahe avei. Ahe opa ombogüera. ¹⁵ Osepiase rumo pahi rerecuar guasu iyavei judío porocuita rese oporombohe vahe yuvireco mbahe ndayasepiai vahe sembiapo, iyavei tûparo pipe osenduse chîhivahe sapucaisa: “¡Imboeteipri David suindar tasecoi!” ehise, ahese oñemoiro yuvireco ¹⁶ aipo ehi chupe:

—¡Eresendu vo aipo ehi tēi vahe chîhivahe yuvireco! —ehi.

—Taa, asendu ité —ehi—. Pe no, ¿ndapeyeroqui vo sesendar ñehesa icuachiapri pipe:

‘Chîhivahemi, pîtanimi avei osapucaira nde mboeteisa pipe yuvireco’ ehi vahe? —ehi.

¹⁷ Ipare opaño oseya ava oso tecua Betania ve. Aheve ñepeipi pîtu oque.

Jesús omomara ivira higuera ndihai vahe oñehe pipe

¹⁸ Ahere ayihive añihiveive, oyevisse tecua Jerusalén ve, Jesús ndasiepoi oico. ¹⁹ Aheve peri popive osepia ivira higuera. Ahe sese oyemboya oso ‘¿iha pīha?’ oya viña. So güeraño tēi rumo osepia. Evocoyase ahe aipo ehi chupe:

—¡Co pipe suive nandehai chietera! —ehi.

Aheseve voi opa ipiru. ²⁰ Ahe mbahe repiase, ore,

—¡Too, mara ehi rutei pīha co cūriteimi opa voi ipiru! —orohe tēi chupe.

²¹ Ahese omboyeve oreu:

—Acoi peyeroyase ité Tūpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoyase osiriño itera.

²² Indó, acoi peyerurese mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

Jesús mborerecuasa

²³ Ichui Jesús oi que iri judío tūparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu? —ehi.

²⁴ Evocoyase ahe aipo ehi chupe:

—Che avei aporandura mbahe rese pēu. Pemboyevisse che porandusa, ahese che avei amombehura ava porocuita rupi eté pīha ayapo co mbahe vichico. ²⁵ ¿Ava vo Juan ombou ava āpiramo āgua? ¿Tūpa pīha, ava tēi tie? —ehi.

Evocoyase oñemoñeta aipo ehi oyeupe yuvireco: “ ‘Tūpa ombou’ yahese chupe, ahe evocoyase omboyeveira yandeu: ‘¿Mahera ru evocoyase ndaperoyai?’ ehira. ²⁶ Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tūpa suindar’ ehi eté yuvireco chupe” ehi. ²⁷ Sese,

—Ndroicuai eté Juan mbousar —ehiño yuvireco.

Ahese ahe aipo ehi:

—Evocoyase che avei, “Ahe iporocuita pipe co mbahe ayapo” ndahei chietera pēu —ehi mborerecuar guasu upe.

Ñuvirío ava rahir recocuer sui yembohesa

²⁸ Iyavei Jesús aipo ehi judío rerecuareta upe:

—¿Mara ehi pe pihañemoñetasa co rese? Oime mbia vireco vahe ñuvirío guahir. Ahe aipo ehi ocuacua catu vahe upe: ‘Che rahir, co pipe eresora, eporaviqui cove’ ehi. ²⁹ ‘¡Nachequerēhii!’ ehi voiño. Coiye rumo, ‘¿Mahera ēgüe ahe?’ ehi. Ipare osoño ité, oporaviqui. ³⁰ Ipare oso ambuae guahir upe: ‘Eresora, eporaviqui cove’ ehi tupri avei. Evocoyase, ‘Asora, che ru’

ehi angahu. Ipare rumo ndosoi eté. ³¹ ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui. ³² Esepia, Juan Oporoãpiramo vahe ou co tecocuer ihīvi vahe mboyecua ãgua pēu pe reco tupri ãgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroi pe recocuerai sui seroya ãgua —ehi mborerecuar guasu yuvirecoi vahe upe.

Ava mbahe tēi oporaviqui vahe recocuer sui yembohesa

³³ “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva rñavii ãgua; oyapo avei oi ivate vahe ahe sese mahemoha ãgua. Ipare oseya oivi ava oporaviqui vahe upe iporu ãgua. Ichui osē oso amombri vahesa rupi. ³⁴ Coiye oyepotase ari uva pohosa, ahese omondo güembiguai oporaviqui vahe upe imboporandu ãgua ‘taipisi uva pohopri cheundar cute’ oyapave viña. ³⁵ Ipare rumo oporaviqui vahe oipisi sembiguai yuvireco: amove oinupa-nupa yuvireco, amove oyuca, oyapi-yapi avei amove ita pipe yuvireco. ³⁶ Ipare rumo ivi yar setá catu omondo iri güembiguai. Oporaviqui vahe rumo mara-mara tēiño avei vireco yuvireco.

³⁷ “Coiye rumo guahir teieté omondo chupe cute. Ahe ipihañemoñeta: ‘Omboyeroya catura revo che rahir yuvireco’ ehi viña. ³⁸ Evocoiyase ahe ava tahir repiase, ‘Co aipo oipisira vu mbahe; yayucaño, evocoiyase co ivi opitara yandeu nara’ ehi oyeupe yuvireco. ³⁹ Evocoiyase oipisi, vinose miti pãhu sui, oyuca ité yuvireco” ehi.

⁴⁰ “Acoi ouse ivi yar, ¿mbahe vo oyapora oporaviqui vahe upe?” ehi oñehe rendusar upe.

⁴¹ Ahe evocoiyase,

—Opara revo oyuca saisuēhisa pipe ité co ava ndipihai vahe yuvireco. Ipare revo omondora oivi ambuae ava oporaviqui vahe uve iporu ãgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

⁴² Aipo ihe pare, aipo ehi oñehe rendusar upe:

—¿Ndapeyeroquii vo co aipo ehi vahe icuachiapri pipe?

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri ãgua.

Ēgüe ehi niha Yar yapo yande mohapisi ai eté’

ehi icuachiapri pipe. ⁴³ Sese che Ru Tũpa mborerecuasa serocuasara pe sui. Ambuae ava upe rumo imondosara. Ahe virasora che Ru mombaheesa chupe. ⁴⁴ Acoi que oviapi vahe evocoi ita harive, opa tẽira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

⁴⁵ Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco. ⁴⁶ Aheseve oipisi pota voi yuvireco viña. Osiquiyeño rumo ava rehii sui yuvireco. Esepia, opacatu ava ipihañemoñeta: “Co ité Tũpa pĩratasa pipe oñehe” ehi yuvireco chupe.

22

Jesús oporombohe carusa mendasa resendar rese

¹ Ipare Jesús oporombohe iri ambuae ava recocuer rese aipo ehi:

² “Tũpa omborerecuasave inungar mborerecuar guasu guahir mendase oyapo pieta. ³ Ipare oyocuai güembiguai eta ‘ava ichohopri upe toyugüeru cute’ oya. Ichohopri rumo niquerẽhi iri yugüeru aheve. ⁴ Ipare oyocuai iri ambuae güembiguai eta aipo ehi: ‘Aipo peyera ichohopri upe: ¡toyugüeruño ité! Esepia, opa ité oingatu tembihu iyavei ayuca uca tivi iyavei ambuae mbahe mimba iquira vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembiguai upe. ⁵ Ichohopri rumo ndoviroyai eté yuvireco. Evocoiyase ñepeí osoño ocove, ambuae oso ombahe movendesave, ⁶ ambuae rumo oipisi sembiguai mara-mara tẽi sereco ãgua. Ahe ipipe oyuca yuvireco. ⁷ Evocoiyase mborerecuar guasu oñemoiro etepisave omondo osundao eta co ava oporapichi vahe yuca ucapa ãgua, iyavei secua rapipa ãgua. ⁸ Ipare aipo ehi ambuae güembiguai eta upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vaheerã cohava. ⁹ Sese peso opacatu ava guata catusa rupi, peñehe mendasave yugüeru vaheerã opacatu pe rovaichisar upe’ ehi. ¹⁰ Evocoiyase sembiguai eta yuvinosepa yuviraso ocar rupi. Ahe osovaichi vahe setá omonuha yuvireco que seco tupri vahe, seco rai vahe avei; ãgüe ehi ava savapipo tupri oi guasu mendasave yuvireco.

¹¹ “Evocoiyase acoi mborerecuar oique ava ichohopri repia. Ipare omahecua tupri ñepeí ava ipãhu pendar rese. Ahe rumo ndomondei turucuar mendasa resendar. ¹² Evocoiyase aipo ehi chupe: ‘Che mboripar, ¿mara ere eique ave co turucuar mendasa resendar porẽhi?’ ehi. Ahe rumo noñeheño ité chupe. ¹³ Evocoiyase, ‘Peipisi co mbia, peñapichi ipi, ipo

avei, pemose ocarve p̄itumimisave. Aheve oyaseho t̄eira, s̄aitere-tere t̄eira mbaherasicuer rereco' ehi ichohopri rese hañecosar upe. ¹⁴ Esepia, setá t̄ei ichohopri, moviromi t̄ei rumo iporavopri ipãhu sui" ehi mborerecuareta uve.

Fariseo osecoãha iri t̄ei Jesús guarepochi rese yuvireco

¹⁵ Ipare fariseo oñemonuha, ipihañemoñeta yuvireco oyeupe Jesús ñehe yavi uca ãgua mborerecuar rovai imomara-mara t̄ei ãgua. ¹⁶ Ahe evocoyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei ereporombohe mbahe supi tupri vahe T̄upa recocuer rese. Nde niha ndereroyai vahe ava ñehesa t̄ei. Esepia, ava p̄ihañemoñeta rupi ndereicoi vahe; nde p̄ihañemoñeta rumo ñepei reseve erereco. ¹⁷ ¿Mara ehi nde p̄ihañemoñeta? ¿Aviyera p̄iha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁸ Oicua rumo fariseo p̄ihañemoñeta raisa. Sese aipo ehi chupe:

—Pe seco tupri angahu t̄ei vahe peico. ¡Mahera che moingue pota mbahe t̄ei pipe peye! ¹⁹ Pemboyecua ru ñepei guarepochi mborerecuar guasu upendar cheu —ehi.

Evocoyase güeru yuvireco chupe.

²⁰ —¿Ava rahanga vo co guarepochi rese chini iyavei ava rer vo co chini sese no? —ehi.

²¹ —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, T̄upa upendar mbahe evocoyase pemondora T̄upa upe —ehi fariseo upe.

²² Osenduse, oyep̄ihamondii t̄ei yuvireco. Evocoyase yuvinosé yuviraso ichui.

Saduceo oporandu Jesús upe cuerayevisa rese secoãhasave

²³ Ahe ari pipe saduceo “ndipoi eté cuerayevisa” ehi vahe yugüeru Jesús upe, oporandu t̄ei angahu yuvireco chupe:

²⁴ —Porombohesar, Moisés aipo ehi aracahe:

‘Que cuimbahe omanose guahiẽhiseve, ahese tivri omendara sembirecocuer rese ahe viquehir omano vahecuer upe nara tahirã oico' ehi —ehi yuvireco chupe—.

²⁵ Cohave, ore pãhuve, oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiẽhiseve. Evocoyase tivri omenda sembirecocuer rese.

²⁶ Ahe omano guahiẽhiseve avei no. Ëgüe ehi avei opacatu

ambuae tivri, omano avei guahiêhiseve yuvireco. ²⁷ Opacatu imano pare, cuña avei omano cute. ²⁸ Evocoiyase opase ocuerayevi yuvireco, ¿uma rese ité pîha opítara ahe cuña? Esepia, opacatu niha omenda yuvireco sese —ehi saduceo yuvireco chupe.

²⁹ —Pe pihañemoñetasa co coti tēi eté. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa pīratasa —ehi—. ³⁰ Esepia, acoi omano vahe ocuerayevise, chupe ndipo iri chira mendasa. Ahe rumo Tūpa rembiguai íva pendar nungar yuvirecoira ívave —ehi—. ³¹ Co cuerayevisa resendar rumo amombehura pēu. Aviye ndapeyeroquií anga vahe acoi Tūpa omombehu vahecuer rese. Supi eté ahe aipo ehi aracahe: ³² ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

³³ “¡Too!” ehi ava rehi. “¡Mara ehi rutei iporombohesa!” ehi tēi yuvireco.

Porocuita aviye catu vahe

³⁴ Ipare fariseo oyanduse yuvireco Jesús omonguiriri-pañose saduceo oyesui, ahese oñemonuha yuvireco. ³⁵ Ñepe ípāhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuita sui yandeu’ oyapave viña:

³⁶ —Porombohesar, ¿uma ité vo porocuita aviye catu vahe opacatu ambuae porocuita sui? —ehi.

³⁷ Evocoiyase ahe aipo ehi chupe:

—‘Eresaisura nde Yar Tūpa opacatu nde pihañemoñetasa pipe, opacatu nde recocuer pipe, nde yapisacasa pipe avei’ ehi. ³⁸ Co porocuita aviye catu vahe ambuae porocuita sui. ³⁹ Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi. ⁴⁰ Co ñuvirío porocuita rupi oguata opacatu Moisés porocuita icuachiapri, opacatu Tūpa ñehe mombehúsar rembicuachía avei —ehi.

¿Ava suindar pîha Poropîsirosar?

⁴¹ Fariseo ñemonuha vitesese, ⁴² Jesús oporandu chupe:

—¿Mara ehi pepihañemoñeta acoi Tūpa Rembiporavo ou vaheṛā ava pîsiro āgua rese? ¿Ava suindar-ra pîha secoi? —ehi.

—Ahe niha David suindar secoira —ehi fariseo yuvireco chupe.

⁴³ Ahese aipo ehi fariseo upe:

—¿Mahera pîha evocoiyase David oñehese Espíritu pīratasa pipe aracahe, “Che Yar” ehi chupe? Esepia, ahe aipo ehi:

⁴⁴ Yar aipo ehi che Yar upe:

Eguapí che acato coti acoi che amondose voi eté nde amotarêhimbar nde povrîve yuvîreco'

ehi David aracahe. ⁴⁵ Evocoiyase, çmahera ru: "Poropîsîrosar David suindar secoira" peye, David teieté, "Che Yar" ehise chupe? —ehi fariseo upe.

⁴⁶ Evocoiyase ndoicatu iri imboyevi âgua yuvîreco cute. Ahe ari pipe sui ndipo iri que ñepe iquerêhi vahe iñehe avi uca âgua oñehe pipe yuvîreco.

23

Jesús oicua uca fariseo iyavei Moisés porocuita rese oporombohe vahe recocuerai

¹ Ipare Jesús aipo ehi ava eta upe, oreu avei no: ² "Co Moisés porocuita rese oporombohe vahe iyavei fariseo eta, ahe icuita Moisés porocuita mombehu tupri âgua yuvîreco.

³ Sese iya peroyaño ité iyavei peyapo opacatu mbahe semi-mombehu; aní chira rumo peyapo mbahe sembiapo ai. Esepia, omombehu tupri tēi mbahe viña, ipare rumo co coti tēi mbahe oyapo yuvîreco. ⁴ Iyavei omondo porocuita inungar mbahe ndayasupi catui vahe ava upe 'tomboaviye opacatu ité yuvîreco' oya. Ahe ae rumo nomboaviyei eté que ñepe oporocuita yuvîreco no. ⁵ Oyapo angahu mbahe opacatu ava rembiepiave yuvîreco yepi 'tayande repia yuvîreco' oyapave tēi. Osiva rese, oyiva rese avei ipe guasu vahe vîreco-reco tēi oturucuar rese Tûpa Ñehengagüer cuachiapri yuvîreco. Iyavei ipi catu vahe oturucuar popi moaro âgua omondo yuvîreco.

⁶ Oipota carusa rupi güenara aviye catu vahe yuvîreco, oseca avei tenda porañete catu vahe güenara otûparo pipe yuvîreco no. ⁷ Oipota avei ava oyeupe 'avirave' apo âgua omboeteisave ocar rupi iyavei oipota, 'Porombohesar' oyeupe he yuvîreco.

⁸ "Pe rumo, 'Porombohesar' ndapembohe ucai chira ava peyeupe. Esepia, pe opacatu guasu peyeivri peico, iyavei ñepeño ité pereco pe Mbohesar. ⁹ Iyavei, 'Che ru' ndapeyei chira que ava co ivi pipendar tēi upe. Esepia, ñepeño ité pe Ru pereco, ahe niha iva pendar. ¹⁰ Ndiyai avei, 'Mborerecuar' pembohe uca ava peyeupe. Esepia, Poropîsîrosar güeraño ité pe rerecuar secoi. ¹¹ Acoi ava seco ivate catu vahe, ahe toporopîtivii güeco mbegüesa pipe. ¹² Esepia, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

¹³ "Ipeparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Pemombitaño ava Tûpa povrîve seique rägüer sui peico yepi. Pe avei eté ndapeiquei ipovrîve, iyavei acoi yuvîroique pota vahe pemombitaño seique rägüer sui.

14 “¡Peparaisu catu itera pe Moisés porocuaíta rese oporombohe vahe iyavei pe fariseo peico vahe, pe seco tupri angahu tēi vahe peico! Esepia, perocua-rocuano tēi cuña imer mano vahecuer rēta ichui, ipare peyeroqui tupri tēi angahu ava rembiepiave. Sese peipisira Tūpa ñemoirosa ipīrata catu vahe curi.

15 “¡Peparaisu catu itera pe Moisés porocuaíta rese oporombohe vahe, pe avei fariseo, pe guata tēi angahu vahe Tūpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tēi catu pe sui. Pe nungar carugar ratave nara tēi pereco uca.

16 “¡Peparaisu catu itera, pe ava mbohesar ndasesapisoi vahe nungar peico! Pe aipo peye tēi vahe: ‘Yamombehuse mbahe tūparo rer pipe yande ñehe mboaviye āgua, ēgüe yahe tēi eté; co rumo yamombehuse mbahe oro tūparo pendar rer pipe, ahese iya itera yamboaviye yepi’ aipo peye tēi. 17 ¡Pe ndapembahecua vahe nungar, ndasesapisoi vahe nungar avei peico! ¿Uma vo aviye catu vahe: oro pīha, anise tūparo tie? Tūparo pipe niha oro rovasasa yepi. 18 Iyavei co uve avei aipo peye tēi peico: ‘Yamombehuse mbahe seropovēhepri renda rer pipe yande ñehe mboaviye āgua, ēgüe yahe tēi eté; co rumo mbahe yamombehuse mbahe seropovēhepri renda hari pendar rer pipe yande ñehe mboaviye āgua, ahese iya ité yamboaviyera yande ñehe yepi’ aipo peye tēi. 19 ¡Pe ndasesapisoi vahe nungar peico yepi! ¿Uma vo aviye catu vahe? ¿Evocoi porerecosa seropovēhepri pīha, anise mbahe seropovēhepri renda tie? Ahe tenda harive niha porerecosa sovasasa yepi. 20 Sese acoi mbahe omombehu vahe mbahe seropovēhepri renda rer pipe oñehe mboaviye āgua, ndahei serer pipe güeraño, omombehu avei opacatu ihari pendar mbahe seropovēhepri rer pipe, 21 iyavei acoi ava omombehu vahe mbahe tūparo rer pipe oñehe mboaviye āgua, ahe omombehu ipipendar rer pipe avei. Ahe niha Tūpa secoi. 22 Iyavei acoi omombehu vahe mbahe que ambuae ava upe iva resendar rer pipe oñehe mboaviye āgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité secoi.

23 “¡Peparaisu catu itera, pe Moisés porocuaíta rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepepei diez pe remiti menta, anis, comino pereco vahe sui ñepepei Tūpa uve nara viña, pe rumo pepoi co porombohesa aviye catu vahe porocuaíta resendar sui. Ahe peyapora mbahe ihivi vahe, peporoparaisuerecora iyavei pemboaviye tuprira pe cuaita yepi. Iyacatu rumo ahe pemboaviye aveira viña. 24 ¡Pe ava mbohesar ndasesapisoi vahe nungar peico!

Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoyase. Ëgüe peye co mborocuaita upe.

²⁵ “¡Peparaisu itera pe Moisés porocuaita rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar igua riru iyavei tembihu riru icupe rupi tēi yoseipri. Ipipe rumo iquiha opitaño ité. Ëgüe ehi tēi pe recocuer pe monda raisave, mbahe pota-pota tēisave avei. ²⁶ ¡Pe fariseo peico vahe, ndapepihañemoñetai vahe mbahe pe rembiapo ai rese, pemoatiro rane pe piha pipe mbahe yavaeté vahe sui! Ahese ramo pe rembiapo icatupri ra cute.

²⁷ “¡Peparaisu catu itera, pe Moisés porocuaita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvipa imomorochimbrī tēi. Iharive tēi icatupri chupe. Ipipe rumo tehögüer cangüer iyavei opacatu mbahe yavaeté vahe ovireco oyese. ²⁸ Ëgüe peye: ava rembiepiave aviye pe reco ihivi vahe viña, pe piha pipe rumo oime pe porombopasa iyavei opacatu mbahe-mbahe tēi.

²⁹ “¡Peparaisu catu itera pe Moisés porocuaita rese oporombohe vahe, pe fariseo peico vahe, pe reco tupri angahu tēi vahe! Esepia, pemoingatu Tūpa ñehe mombehusar ruvipagüer peico sese pe yemomahenduha āgua iyavei pemoporañete ai tēi ava seco ihivi vahe ruvipagüer yepi viña. ³⁰ Ipare aipo: ‘Yande yaicose revo aracahe yande ramoi recose, ndayaipitivi chietera Tūpa ñehe mombehusar yuca āgua yuvireco viña’ peye tupri tēi. ³¹ Aipo peyese rumo, pemboyecua Tūpa ñehe mombehusarer yucasar suindar pe yesusa. ³² ¡Pemboyepi iriño evocoyase pe ramoi rembiapocuerai!

³³ “¡Pe mboi vai suindar tēi peico! Ndapesoyepi chira rumo Tūpa ñemoirosa sui, pesora rumo tata guasuve. ³⁴ Evocoyase che amboura pēu Tūpa ñehe mombehusar ava yaracua vahe iyavei ava pe mbohe āgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi. ³⁵ Sese pēuño ité oura Tūpa ñemoirosa opacatu ava aviye vahe yuca agüer rese co ivi pipe; Abel seco ivi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tūparo pipe mbahe seropovēhepri renda rovai. ³⁶ Supi eté opacatu co mbahe tēi oura pe recove viteseve” ehi.

Jesús oyaseho Jerusalén pendar rese

³⁷ “¡Too rutei, pe Jerusalén pendar, peyuca vahe Tūpa ñehe mombehusar, ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive! Ēgüe ahe pota tēi pe rereco viña, pe rumo ndapeipotai eté evocoi nungar pe rereco āgua. ³⁸ Sese seyapirā tēi peicora. ³⁹ Esepia, ndache repiai chira peye acoi, ‘¡Imboeteipri Yar remimbou tasecoi!’ peyese voi che repia irira peye” ehi Jesús ava eta upe.

24

Jesús omombehu judío tūparo guasu mocañi āgua

¹ Ipare Jesús osē judío tūparo pipe sui oso. Aheve ore semimbohe oroyemboya sese aipo orohe chupe: “¡Ore Yar, esepia co tūparo!” orohe. ² Ahe rumo:

—Supi eté amombehu pēu: co opacatu pesepia vahe, ndipoi chietera que ñepeí ita oyeha vite vahe. Opacatu ité imondurusara curi —ehi oreu.

Jesús omombehu mbahe oime vaherā arī cañi renonde

³ Ipare Jesús oso ivitri Olivo ve oguapí oī. Aheve ore güeraño tupri oroso chupe mbahe rese ore porandu āgua:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu āgua iyavei arī cañi āgua? —orohe chupe.

⁴ —Peicua catu, peyembopa ucai rene ambuae ava upe peico. ⁵ Esepia, setá ava yugüerura, ‘Che aico Tūpa remimbou ava pñsiro āgua’ ehi tēira ava eta mbopa yuvireco. ⁶ Iyavei pesendura ñehesa vavasa resendar cohava iyavei que rupi. Ndapeyembosiquiyei chira rumo ichui. Esepia, ēgüe ehi rane itera niha; ndehi vitei chira rumo arī cañisa. ⁷ Esepia, ñepeí ivi pipendar ovavara ambuae ivi pipendar rese oyeupe yuvireco. Aheve oimera tiavor, ivi rirīi opacatu-catu tēi tecua rupi. ⁸ Opacatu evocoi mbahe rumo omboipri ramomi vahe mbahe tēi porarasa.

⁹ “Aheve pe pisira yuvireco mara-mara tēi pe rereco āgua, pe yuca āgua avei. Iyavei opacatu ava-ava tēi ndape ambotai chira che recocuer sui tēi yuvireco. ¹⁰ Ahe arī rupi evocoiyase setá ava ndache reroya iri chira yuvireco. Ahe oyeamotarēhira iyavei omondora ambuae omboetasagüer yamotarēhimbar povrive yuvireco. ¹¹ Iyavei setá Tūpa ñehe mombehusar angahu tēi oimera, ahe ava ombopa-mbopa tēira yuvireco. ¹² Ombouvicha catura mbahe-mbahe tēi naporai vahe. Ipipe sui ndoyeaisu tupri iri chira ava yuvireco. ¹³ Acoi ava oyemoviracua vaheño rumo arī ipa vahe rupi, ipñsiropri yuvirecoira. ¹⁴ Iyavei co ñehesa icatupri vahe Tūpa

mborerecuasa resendar imombehusapa ranera opacatu ivi rupi icua uca ãgua. Ahese ramo oimera cañisa co ivi pipe” ehi oreu.

¹⁵ “Tũpa ñehe mombehusar Daniel oicuachía mbahe-mbahe tẽi aposa resendar oime vaherã tũparo guasu maranehi vahe pipe aracahe. Ahe pesepiase oi maranehi pipe — acoi oyerogui vahe, ahe tosenducua tupri yuvireco —, ¹⁶ evocoyase Judea ve yuvirecoi vahe toñemipa poyava ivitri rese yuvireco ichui; ¹⁷ iyavei acoi güëta harive yuvirecoi vahe ogüeyise, toi que iri eme güëtave ombahe reca; ¹⁸ iyavei acoi que rupi tẽi yuvirecoi vahe, toyevi iri eme güëtave que oyeaosa renose ãgua yuvireco. ¹⁹ ¡Iparaisu itera cuña ipuruha vahe, imembi pĩtani vahe avei yuvireco! ²⁰ Peporandu Tũpa upe pe recua pipe sui pe sãehi ãgua irohi pipe, mbĩtuhusa ari pipe avei. ²¹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar. ²² Iyavei nomombituhuse Tũpa co ari naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pipe omombituhura” ehi.

²³ “Iyavei que ava, ‘Esepia co Poropĩsirosar secoi’; anise, ‘Peve secoi’ ehise yuvireco pẽu, aní chira peroya aipo ehi vahe. ²⁴ Esepia, yugüerura ava ‘che Poropĩsirosar aico’ ehi tẽi vahe iyavei ‘che amombehu vahe Tũpa Ñhengagüer’ ehi angahu tẽi vahe; iyavei oyapora mbahe ava ndoyapoi vahe poromondisa güeco pĩratasa mboyecua ãgua yuvireco. Ipipe osecoãhara Tũpa rembiporavo imbopa ãgua yuvireco. ²⁵ Opa aipo co senondeve amombehu pẽu. ²⁶ Sese que ava pẽu: ‘Pesepia pe ivi iporupirẽhisave secoi’ ehise, pesoĩ rene aheve seroyasave, aní chiaveira peroya acoi ‘pesepia co secoi oi pipe’ ehi vahe yuvireco. ²⁷ Che rumo inungar overa vahe sendi añihivei sui caharu coti ocua iva rese, ãgüe ahera che, Ava Riquehir, opacatu ava rembiepiave ayevi irise vitu curi. ²⁸ Esepia, mbahe rehögüer reimesave, uruvu oñemonuha ati yuvireco yepi” ehi güemimbohe eta upe.

Jesús yevi ãgua resendar

²⁹ “Ahe ari pipe mbahe-mbahe tẽi pare cũriteimi ndoyecua iri chira ari, yasi avei ndosesape iri chira, yasi tata avei opara ovĩapi iva sui iyavei iva resendar mbahe oririira yuvireco. ³⁰ Ahese oimera iva rese iporẽhi vahe che, Ava Riquehir, yu ãgua resendar. Evocoyase opacatu ava-ava tẽi co ivi pipendar oyaseho tẽira osiquiyepave yuvireco. Che repia aveira yuvireco agüeyise iva quĩha rese che pĩratasa rendigüer porañetesa pipe. ³¹ Iyavei amboura che rembiguai eta iva pendar. Ahe evocoyase güemimbi omoñehe pĩratara opacatu

che rembiporavo co ivi rupindar que amombri rupi yuvirecoi vahe monuha ãgua” ehi.

32 “Peyembohera ivira higuera recocuer sui: Co ivira soqui ramose, yaicua cõimi ari sacu vahe yepota ãgua yandeu yepi. 33 Na ehi aveira pẽu che ñehe rupi tupri mbahe pesepiase, sese peicuara cõimi eté che yevi ãgua. 34 Supi eté yuvirecove vitera ava osepia vahe co mbahe opase yaviye. 35 Iva, ivi opara ocañi, che ñehengagüer rumo imboaviyesa rane itera.

36 “Ndipoi eté rumo ava oicua vahe ari iyavei hora che yevi ãgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

37 “Inungar ava Noé recose yuvirecoi aracahe, ãgüe ehi tupri aveira che, Ava Riquehir, yevi ãgua renonde. 38 Yipive amarusu renonde, ahese ava ocaru, oihu; guahir, guayri avei omomendaño yuvireco. Noé arca pipe seiquese, ãgüe ehi vite yuvireco. 39 Nomohai eté rumo amarusu viapi ãgua yuvireco oyeupe viña, ãgüe ehi rumo aviyeteramo tẽi amar oviapi imocañipa. ãgüe ahe aveira che, Ava Riquehir, ayevi aviyeteramo tẽi. 40 Evocoi ari pipe oimera ñuvirío ava amombri güecua sui yuvirecoi vahe: ñepe serasosara, indugüer rumo opitara. 41 ãgüe ehi aveira ñuvirío cuña ohicho vahe upe: ñepe serasosara, indugüer rumo opitara.

42 “Sese pemahemoha yepi. Esepia, ndapeicuai mbahe ari pipe che, pe Yar, ayevira iva sui. 43 Iyavei peyapisaca tupri co rese: inungar acoi oi yar oicuase revo que hora pĩtu pipe imonda vahe yepota ãgua, ahese imahemohara sese güeta pipe seiqueẽhi ãgua viña. 44 ãgüe peye aveira peyemoingatu che yevi ãgua rese. Esepia niha, che, Ava Riquehir, aporoepiha tẽira vitu curi” ehi.

Mbiguai omboaviye vahe ocuaita, nomboaviyei vahe avei

45 “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güeta pipendar rese hañeco ãgua ‘tembihu tomondo che rẽta pipendar upe che porocuita rupi’ ohesave. 46 Acoi omboaviyese ocuaita, ahese oviharetera güerecuar yevise. 47 Supi eté niha serecuar oyocuaiira opacatu ombahe rese hañeco ãgua. 48 Ahe mbiguai rumo ndipihaise ‘ndoyepota vitei chira revo che rerecuar’ oya, 49 omboetasa omboipi mara-mara tẽi sereco iyavei oyemboya caguar tẽi rese ipiri ocaru iyavei oihu tẽi ãgua. 50 Ipare rumo serecuar oyepotara imahemohaẽhiseve. 51 Ahese omombaraisu catura, ‘Tinupasa, ava seco tupri ai angahu tẽi vahe nupasa nungar pipe’ ehira chupe. Ahese oyaseho tẽira, oyemoaitere-tere tẽi aveira” ehi güemimbohe upe.

25

Diez cuñatai ndaseco marai vahe resendar ñehesa

¹ “Evocoi ari pipe Tūpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi āgua yuvireco. ² Ipāhuve yuvirecove cinco ndipihañemoñetai vahe, ambuae cinco rumo ipihañemoñetai tupri vahe yuvireco. ³ Ipare ndipihañemoñetai vahe oipisi guataendirā yuvireco, ndovirasoi rumo yandi guataendi riru mboapipo iri āgua yuvireco; ⁴ evocoi ipihañemoñetai tupri vahe rumo viraso yandi siru pipe guataendi reseve yuvireco. ⁵ Acoi ndoyepota apihaise cuña mevi, ahese sopesii tēi yuvireco. Coiye opaño yuviroque yuvireco ichui. ⁶ Pītu mbiter senise rumo, osendu ñehesa aipo ehi vahe yuvireco: ‘¡Coi imevi turil! ¡Pesē ipisi āgua cute!’ ehi. ⁷ Evocoiyase opacatu evocoi cuñatai oñarapuha voi iyavei omoingatu guataendi yuvireco. ⁸ Ahese nimahemohai vahe aipo ehi ambuae imahemoha vahe upe yuvireco: ‘Pemboumi tēi chīhi pe yandi oreu. Esepia, ogüe pota ité ore rataendi’ ehi tēi yuvireco. ⁹ ‘Aní, ndiyai chira revo oromondo vaherā pēu. Iyacatu revo peso imboepisave serocua peyeupe nara’ ehi. ¹⁰ Imboepi yuvirasoi vitesese, ou cuña mevi cute. Oyemoingatu vahe rumo yuviroique supi mendasave. Evocoiyase saquicuerive voi omboya oquenda rārosar. ¹¹ Ipare oyepotase ambuae cinco cuñatai yugüeru aipo ehi yuvireco oi yar upe: ‘¡Emboimi tēi oreu!’ ehi tēi yuvinoha. ¹² ‘Aní, ndopocuai vahe ité’ ehiño chupe.

¹³ “Pe evocoiyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevira” ehi Jesús oreu.

Ñehesa guarepochi mondana resendar

¹⁴ “Iyavei Tūpa omborerecuasave inungar-ra ava mbahe yar oso āgua renonde ivi amombrisave omonuha güembiguai oguarepochi rāro āgua viña. ¹⁵ Yipindar ñepepe upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepepepepe upe seco etegüer rupi-rupi. Ipare voi oso cute. ¹⁶ Evocoiyase evocoi mbiguai oipisi vahe cinco mil guarepochi, ahe oporaviquico guarepochi rese. Ipipe sui coiye oipisi catu iri ambuae cinco. ¹⁷ Inungar avei ambuae oipisi vahe dos mil, ichui oipisi catu iri ambuae dos mil. ¹⁸ Ambuae oipisi vahe rumo ñepepe guarepochi, ahe oyoho ivicuar. Aheve oñoti güerecuar guarepochi.

¹⁹ “Ipare coiye oyeveise serecuar, ahese oñeha güembiguai upe oguarepochi retacuer cua āgua. ²⁰ Yipindar cinco mil guarepochi oipisi vahe ranengatu oyemboya güerecuar rese

aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi. ²¹ ‘Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese’ ehi chupe. ²² Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: ‘Ndo co erembou vahe dos mil cheu. Ipipe sui co ambuae aipisi irimi dos mil avei ndeu’ ehi. ²³ ‘Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese’ ehi avei chupe.

²⁴ “Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: ‘Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovepírer tēi avei ereipisi ndeyeupe nara. ²⁵ Sese che siquiyesa pipe añomi ivivrive nde guarepochi. Ndo co nde mbahe’ ehi chupe. ²⁶ ‘Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañoti vahe sui. ²⁷ Ereyapocatumira che guarepochi guarepochi apocatusave cuese rahe viña che yevise voi senose ãgua cheu imboyevi catumi ãgua viña’ ehi. ²⁸ Ipare aipo ehi: ‘Perocua guarepochi ichui, pemonдора evocoi diez rupi guarepochi omboeta vahe upe’ ehi. ²⁹ ‘Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui. ³⁰ Sese pemose co mbiguai ěgüe ehi tēi vahe ocarve pītumimbisave. Aheve toyaseho, tasãitere tēi oī’ ehira serecuar chupe” ehi Jesús oreu.

Jesús oura opacatu ava recocuer rese porandu ãgua

³¹ “Che, Ava Riquehir, ayevisse, opacatu che Ru rembiguai i va pendar reseve che reco ivategüer pipe, ahese aguapira che renda porañete vahesave ava recocuer rese porandu ãgua. ³² Evocoyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rãrosar oipeha vahe ovesa cavara sui. ³³ Che evocoyase ovesa aipehara mbahe rese che pocosa coti, cavara mbahe rese che pocoñhisa coti. ³⁴ Ahese che mborerecuar ivate catu vahe aipo ahera che acato cotindar upe: ‘Perio pe opacatu che Ru sui sovasapri peico vahe, peique che Ru mborerecuasa pipe; ahe acoi yipive ivi apo ramo suive imoingatupri pēu nara. ³⁵ Esepia, ndacheriepoise, pe evocoyase pembou mbahe che remihura; iyavei che huseise, pe evocoyase pembou taihu;

che aguata tẽise pe recua rupi vichico, pe avei oi pembou che que ãgua. ³⁶Turucuar cheu ipanese, pe avei pembou che turucuarã; chembaheasise, peso avei che piri; che roquendasave peso avei che repia no' ehi. ³⁷Evocoyase evocoi seco catupri vahe aipo ehira yuvireco cheu: 'Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu? ³⁸¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarã, ore aipo evocoyase oromondo ndeu? ³⁹Iyavei, ¿mbahese vo aipo nde repiasa nembahesise, anise que nde roquendasave, aheve aipo oroso nde repia yepi?' ehira yuvireco cheu. ⁴⁰Evocoyase che, mborerecuar ivate vahe, amboyevira yuvireco chupe aipo ahera: 'Supi eté, opacatu mbahe peyapose que ñepei seco mbegüemi vahe che reroyasar pãhu pendar upe viña, cheu rumo êgüe peye' ahera.

⁴¹ "Ahese aipo ahera cute che mbahe rese pocoẽhisa cotindar upe: 'Pesiri che sui. Esepia, pe peico Tũpa ñemoirosavri pendar. Pesopa tata guasu apirẽhisave, evocoi imoingatupri opacatu caruguar upe nara serecuar reseve. ⁴²Esepia, ndacheriepoise, pe evocoyase: Yamondomi icaru ãgua, ndapeyei eté cheu; che huseise, ahese, Yamondomi toihu, ndapeyei avei cheu; ⁴³ambuae tecua pipe aguata tẽise vichico, ahese, Eique che rõtave che piri, ndapeyei eté cheu. Ipanese che turucuarã, pe rumo ndapemboui cheu, chembaheasise vichico, iyavei che roquendasave, Yasomi tẽi sepia, ndapeyei eté cheu' ahera. ⁴⁴'Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarã ndeu no, nembahesise, anise nde roquendasave, marase vo mbahe rese nande pĩtiviisai?' ehi tẽira yuvireco cheu. ⁴⁵'Supi eté acoi amove mbahe ndapeyapoise que seco mbegüemi vahe upe viña. Ipipe rumo cheu avei mbahe ndapeyapoi eté' ahera. ⁴⁶Ahe ava yuvirasora Tũpa ñemoirosa apirẽhi vahesave. Seco ñvi vahe rumo teco ori opaẽhisave yuvirasora" ehi Jesús oreu.

26

Jesús yamotarẽhimbar omboguai yuca ãgua yuvireco

¹ Ipare Jesús aipo ehi oreu:

²—Pe peicua ñuvirío ari tẽi ipane vite co Pascua pieta yepota ãgua yandeu. Ahese che, Ava Riquehir, imondopri aicora che atica ãgua curusu rese yuvireco —ehi.

³ Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate

catu vahe Caifás rētave. ⁴ Aheve oñemoñeta: ‘Yambopa ipisi yuca ãgua’ ehi yuvireco oyeupe. ⁵ Ahe rumo:

—Ndiyai pieta pipe ité yaipisi ava rehii yemondii guasuēhi ãgua yandeu —ehi.

Cuñã oipiyere Jesús ãca rese mbahe sñacuá vahe

⁶ Jesús tecua Betania ve secoi, Simón lepra vireco vahecuer rētave. ⁷ Aheve mesave chiniseve, cuñã vireco vahe mbahe sñacuá vahe siru reseve viroyepota chupe. Ahe oipiyere Jesús ãca rese. ⁸ Orosepiase rumo oroñemoiro aipo orohe oreyeupe:

—¡Mahera vo co omocañi tēi! ⁹ Omondo vahe ité tie co setá guarepochi rupi ava iparaisu vahe pñivii ãgua viña —orohe tēi chupe.

¹⁰ Jesús rumo oicua ore pihañemoñetasa. Sese aipo ehi oreu: —¡Mahera vo co cuñã pemañeco tēi! Esepia, co mbahe oyapo vahe aviyē ité cheu. ¹¹ Ava iparaisu vahe niha yuvirecoiño itera pe pãhuve. Che rumo ãgüe ndahe viteñoi chira vichico pe pãhuve. ¹² Esepia, co cuñã oipiyere mbahe sñacuá vahe che rese che tñ ãgua renondeve. ¹³ Supi eté aipo ahe pēu: co ñehesa pñirosa resendar mombehuse opacatu tecua rupi, imombehusa aveira co cuñã rembiapo sese mahenduha ãgua —ehi.

Judas Iscariote oyemoingatu Jesús mondo ãgua yamotarēhimbar povrive

¹⁴ Ipare ñepe ore pãhu pendar, Judas Iscariote, oso, oñehe pahi eta rerecuar yuvirecoi vahe upe ¹⁵ aipo ehi:

—¿Mbovi rupi vo pemboepira cheu amondose Jesús pēu viña? —ehi.

“Treinta guarepochi rupi” ehi yuvireco chupe. ¹⁶ Ahesa reseve voi oseca Jesús mondo ãgua yamotarēhimbar upe.

Jesús caru agüer ipa vahe güemimbohe rese

¹⁷ Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

¹⁸ Evocoiyase,

—Peso tecua guasuve che cua vahe rētave aipo peyera chupe: ‘Ore Mbohesar aipo ehi: Cõimi che mano ãgua, sese ayapo potami sētave Pascua pieta che remimbohe reseve, ehi ndeu’ peyera chupe —ehi.

¹⁹ Evocoiyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

²⁰ Pñu ramomise, opacatu oroguapi mesave Jesús pñi ore caru ãgua. ²¹ Ore carusave aipo ehi oreu:

—Supi eté aipo ahe p̄eu: ñepei pe p̄ahu pendar che mondora che amotar̄hisar upe —ehi.

²²—Che Yar, ¿che p̄iha? —orohe-rohe t̄ei ñepei-peí ore yacatu ore vihar̄hisa pipe chupe.

²³—Omondo vahe opo che caro pipe, ahe che mondora che amotar̄hisar upe —ehi—. ²⁴ Imboaviyesa itera che, Ava Riqueh̄ir, rese ñehesa icuachiapri. ¡Iparaisu catura rumo acoi mbia che mondosar! Aviye catura ndoyesuisse viña —ehi.

²⁵ Ahese Judas imondosavi oporandu:

—Ore Mbohesar, ¿che tie? —ehi.

—Taa, ¡nde ité niha ěgüe erera! —ehi chupe.

²⁶ Ore caru viteseve, Jesús oip̄isi pan, “Aviye ndeu” ehi Vu upe. Aipo ohe pare, ombohi-mbohí oreu imondo, aipo ehi:

—Ndo co, pehu co che rete —ehi.

²⁷ Ipare oip̄isi igua riru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui. ²⁸ Esepia, co che ruvi, ahe omoimera che Ru remimbotar ip̄iasu vahe p̄eu, ahe oyep̄iyerera ava reh̄i angaipa rese ñero āgua. ²⁹ Ndaihu iri chira uva ricuer cheu ari oyepotase voi che Ru mborerecuasave aihura pe rese ambuae uva ricuer ip̄iasu vahe —ehi oreu.

Jesús, “ ‘Ndaicuai vahe ité aipo mbia’ erera cheu” ehi Pedro upe

³⁰ Ore sapucaire, oroso iv̄itri Olivo ve. ³¹ Evocoiyase Jesús aipo ehi oreu:

—Opara pemocañi che rese yeroyasa peyesui co p̄itu pipe. Esepia, acoi icuachiapri pipe aipo ehi: ‘Ayucara ovesa r̄ārosar, ahese oñemosai t̄eira ovesa opacatu rupi yuv̄ireco’ ehi vahe.

³² Che cuerayev̄ire rumo, aso voi etera pe renonera Galilea ve —ehi.

³³ Pedro rumo,

—Yepe ambuae opacatu nande reroya iri chira yuv̄ireco, che rumo ndayep̄ep̄i chietera nde sui —ehi chupe.

³⁴—Che rumo supi eté aipo ahe ndeu: co p̄itu pipeve voi eté tacura ñehe renondeve, “Ndaicuai vahe ité aipo mbia” erera mbosap̄i oyupaḡuer rupi cheu —ehi Pedro upe.

³⁵ Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe p̄ave tupri t̄ei chupe.

Jesús oyeriqui Getsemaní ve

³⁶ Ipare Jesús rupi orosoño Getsemaní ve. Aheve aipo ehi oreu:

—Peguapí cohave; che aso ranera peve catumi, ayeroquí —ehi.

³⁷ Aheve víraso Pedro oyeupi iyavei ñuvirío Zebedeo rahír. Ahese oyandu ovíharêhisa oico. ³⁸ Evocoiyase ahe aipo ehi chupe:

—Ndavíhai eté. Esepia, che hã oyandu ité manosa. Pepíta rane cohave iyavei pemahemohara pe yeroquí pipe che rese —ehi.

³⁹ Evocoiyase oso tenonde catumi. Aheve oñenopíha ovapí iví rese oyeróquí Vu upe aipo ehi: “Che Ru, iyase ndeu che renose mbahe-mbahe tēi sui eve; tayapo eme ru che remimbotar tēi, nde remimbotar rupi catu tayapo” ehi.

⁴⁰ Ipare oyeví güemimbohe upe. Ahe rumo opaño yuvíroque yuvíroqua. Ahese aipo ehi Pedro upe:

—¡Ndapeñemosai eté vo pe ropesí upe che rãro ãgua que ñepeí hora che mondugüe ãgua peye! ⁴¹ Pemahemoha, peyeróquí mbahe tēi pipe pe víapíehi ãgua. Supí eté pequerēhi ité viña, pe retecuer tēi niha nipirataí pēu —ehi.

⁴² Ichui imoñuvíríosa rupi oso iri oyeróquí aipo ehi: “Che Ru, ereipotase che reique ãgua co mbahe tēi pipe, eyapo nde remimbotar che rese” ehi.

⁴³ Ipare oyevíse, osesapíha iri iqueseve ou. Esepia, sopesí nomboyeroyai eté yuvíreco. ⁴⁴ Evocoiyase oseyapa iri oso oyeróquí ãgua imombosapísa rupi. Aipo ehi tupríño aveí oyeróquí Vu upe. ⁴⁵ Ipare oyeví iri güemimbohe upe aipo ehi chupe no:

—¡Pequeño vite vo peyu! Osupítí che, Ava Riquehír, mondo ãgua ava yangaipa vahe povríve. ⁴⁶ Pepūha, yaso. Esepia, cōimi eté che amotarēhísar upe che mondo vaherã secoi —ehi.

Jesús oipísí yuvíreco

⁴⁷ Jesús ñehe víteseve, Judas oyepota oso chupe. Ahe ñepeí semimbohe ore pãhu pendar, iyavei setá iteanga ava yugüeru quise pucu, ivíra reseve-seve supí. Ahe pahí eta rerecuar yuvírecoí vahe judío rerecuareta porocuaíta rupi oyapo yuvíreco. ⁴⁸ Yípíndar rumo imondosar Judas aipo ehi: “Asovaupíte, ahese peicuara; ahe peipísíra” ehi. ⁴⁹ Ipare oyemboya voi oso sese.

—¡Avírave, Porombohesar! —ehi sovaupíte.

⁵⁰ —Che mborípar —ehi Jesús—, eyapoño mbahe nde remimbotar cheu —ehi.

Aheseve voi oipísí yuvíreco.

⁵¹ Evocoiyase semimbohe secoi vahe supí vínose oquise pucu, oyasia pahí rerecuar ívate catu vahe rembiguai nambi.

⁵² —¡Aní! —ehi güemimbohe upe—. Emoingue síru pipe nde quise pucu. Esepia, acoi ava opacatu ovava vahe oquise

pipe yuvireco, ipipe avei opara yucasa yuvireco. ⁵³ ¿Ndereicuai vo aporanduse che Ru uve viña, ahe evocoiyase cūrítei voi omboura doce mil sui setá catu vahe güembiguaí che repí ãgua viña? ⁵⁴ Êgüe ehise rumo Tũpa Ñehengagüer icuachiapri ndayaviyei chietera viña, ahe co cūrítei osupiti —ehi.

⁵⁵ Ahese aipo ehi ava rehii upe:

—Pe quise pucu, ivira reseve-seve rutei co peyu che ropeña che pisi ãgua imonda rai vahe nungar che rereco peye. Che ari yacatu rupi aguapise pe pãhuve pe mbohe ãgua tũparo pipe, ndapeyapoi eté co nungar cheu. ⁵⁶ Co rumo opacatu êgüe peye Tũpa ñehe mombehúsar rembicuachiagüer mboaviye ãgua cute —ehi ava rehii upe.

Ahese voi opacatu oroñemosai pa, oroseya ahe aetemi Jesús ava rehii upe imoha.

Jesús serasosa pahi rerecuar ivate catu vahe rovai

⁵⁷ Ahese Jesús p̄is̄isar v̄iraso Caifás r̄etave yuvireco, ahe pahi rerecuar ivate catu vahe secói. Aheve oñemonuha Moisés porocuaíta rese oporombohe vahe, judío rerecuar yuvirecoi vahe avei no. ⁵⁸ Pedro rumo amombri rupive t̄ei osaquicue moña oso. Êgüe ehi oyepota pahi rerecuar ivate catu vahe r̄eta rocar ãchisave. Aheve oi que ipipe, iyavei oguapi oĩ sundao pãhuve ‘¿mara ehi etera p̄i ha sereco yuvireco?’ oya.

⁵⁹ Ahese pahi eta rerecuar iyavei opacatu porandusa ivate catu vahe pendar, ahe oñehengapo-ngapo uca t̄ei ava Jesús amotar̄eh̄isave yuca uca ãgua yuvireco, ⁶⁰ yepe oyemboyecua setá iteanga yamotar̄eh̄isar semira-mira t̄ei vahe yuvireco viña, ndoyosui eté rumo mbahe sembiapo naporai vahe yuca uca ãgua yuvireco. Aheseve yugüeru ñuvirío yamotar̄eh̄isar oporombopa-mbopa t̄ei vahe yuvireco cute.

⁶¹ —Co mbia aipo ehi: ‘Che aicatu co tũparo monduru; aicatu aveira imopuha iri mbosapi ari rupi’ ehi —ehi t̄ei yuvireco chupe.

⁶² Ahese pahi rerecuar ivate catu vahe opũha, oporandu Jesús upe:

—¿Mahera vo nderemboyevii eté iñehe yuvireco chupe? ¿Mbahe ehi vo aipo nde amotar̄eh̄isar nde rese oñehe? —ehi.

⁶³ Noñehei eté rumo. Ahese,

—Che orocuai Tũpa supi eté vahe rer pipe emombehu oreu: ¿Porop̄is̄irosar ité nde ereico, Tũpa Rahir? —ehi pahi rerecuar ivate catu vahe chupe.

⁶⁴ —Taa, supi eté niha aipo aipo ere cheu, co catu amombehura p̄eu, che repiara niha peye che, Ava Riquehir, aguapise Tũpa mbahe mboavaisar̄eh̄i acato coti, ayevisave avei i va quiha rese curi —ehi.

⁶⁵ Evocoiyase pahi rerecuar ivate catu vahe imboasipave omondoro oturucuar aipo ehi:

—¡Indó, mbahe tēi eté iñehe Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñehe-ñehe tēisa cūrteí. ⁶⁶ ¿Mara ehi aipo pe pihave? —ehi.

—Supi eté, oyavi mbahe. ¡Tomanoño ité! —ehiño ivoya eta yuvireco chupe.

⁶⁷ Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete, ⁶⁸ aipo ehi yuvireco chupe:

—Nde niha aipo ereico Tūpa remimbou Poropĩsirosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbia” ehi Jesús upe

⁶⁹ Pedro evocoiyase oguapi sãro ocarve ñachimbrí pipe oĩ. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

⁷² —¡Aní! —ehi iri ahe cuña upe—. ¡Tūpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pãrigüer rese nde cuasaño —ehi yuvireco.

⁷⁴ Ahe evocoiyase,

¡Tūpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pëu! —ehi angahu tēi chupe.

Aipo iheseve, tacura oñehe. ⁷⁵ Ahese Pedro oyemomahenduha Jesús oyeupe, ‘Acoi tacura ñehe renondeve mbosapi oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osē, oyasehó iteanga oso.

27

Jesús serasosa Pilato rovai

¹ Cõhe ramosa, ahese opacatu pahi eta rerecuar, judío rerecuar avei oñemonuha ati oyemboyoya guasu ‘Jesús tayucasa ité’ oyapave yuvireco. ² Ipare oipocua-pocua seraso mborerecuar guasu Pilato upe yuvireco.

Judas yeyuca agüer

³ Judas, acoi Jesús omondo vahe yamotarêhisar uve oicua, “Jesús tayucasa cute” ehise, ahese tasí iteanga chupe. Evocoyase oso voi tēi tūparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyevi āgua aipo ehi:

⁴ —Che ayemboangaipa tiēte vichico. Esepia, amondoño tēi mbia seco catupri vahe pēu yuca uca āgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoyase opaño guarepochi omombó tūparo pipe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pipe. Esepia, ava yucapirā repri tēi —ehi yuvireco.

⁷ Ipare oyoya guasu ipihañemoñeta yuvireco co guarepochi rese ñaihu rese oporaviqui vahe ivi rerocua āgua ‘toime ava secua ambuae vahe rehōgüer tī āgua’ oyapave yuvireco.

⁸ Sese cūrtei co ivi upe, “Ava ruvi repri tēi” ehi yuvireco yepi. ⁹ Ēgüe ehi co imboaviye ité Tūpa ñehe mombehusar Jeremías remimombehugüer aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoi mbia pisi āgua. ¹⁰ Ipipe vīrocua ñaihu rese oporaviqui vahe ivi yuvireco. Cheu che Yar omombehu vahecuer rupi tupri ité oyapo yuvireco” ehi Tūpa ñehe mombehusar aracahendar.

Jesús serasosa mborerecuar Pilato rovai

¹¹ Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyevi Pilato upe.

¹² Evocoyase acoi pahi eta rerecuar iyavei judío rerecuareta oñemonuha vahe eipeve oiñehengapo-ngapo tēi yuvireco. Nomboyevi eté rumo iñehe chupe oyeepe āgua.

¹³ Evocoyase:

—¿Nderesendui vo aipo co opacatu ndeu ñehe-ñehe tēisa? —ehi Pilato chupe.

¹⁴ Nomboyevi eté rumo que ñepe angara ñehesa chupe viña. “¡Too, mara ehi rutei vo co!” ehi-ehi tēi mborerecuar chupe.

“¡Tayaticasa!” ehi Jesús upe ava yuvireco

15 Mborerecuar guasu recosa ité ñepei ava soquendapri renose ãgua Pascua pieta pĩpe ava rehi remimbotar rupi yepi. 16 Aheve oime soquendapri mbia icuapri vahe ité Barrabás serer vahe; 17 evocoyase ava rehi oñemonuha atise, Pilato oporandu chupe yuvireco:

—¿Uma peipota che amose ucara p̃eu: Barrabás pĩha, anise Jesús “Porop̃isiosar” ehi vahe yuvireco chupe tie? —ehi.

18 Esepia, ahe oicuaño ité ava rese yemoecat̃ehisa pĩpe sui imondopri secoise.

19 Pilato güendave chini viteseve, sembireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe t̃ei eté sesendar” ehi.

20 Evocoi pahi eta rerecuar iyavei judío rerecuareta rumo ava rehi omonguer̃ehi, “Barrabás tosẽ; Jesús evocoyase tomano” he ãgua yuvireco. 21 Evocoyase Pilato oporandu iri ava rehi upe:

—¿Uma peipota catu co ñuvirío yuvirecoi vahe sui amose vaherã p̃eu? —ehi.

—¡Barrabás tosẽ! —ehi yuvireco.

22 —¿Mbahe vo evocoyase che ayapora Jesús rese chupe acoi ava, “Porop̃isiosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

23 —¿Mbahe ité vo oyapo naporai vahe? —ehi t̃ei ava rehi upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

24 Evocoyase Pilato: “Ndaicatui mbahe moingatu sepi ãgua” ehi t̃ei oyeupe. Sese ava yaivu guasu catu-catu irise, ogüeru uca i. Ip̃ipe oyepoi opacatu ava rehi rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

25 —¡Ore rese ité, ore rahir rese avei toviapi que mbahe t̃ei co mbia mano sui! —ehi atiño ité yuvireco.

26 Ahese Pilato omose uca Barrabás; Jesús rumo oinupá iteanga uca tucumbo tupeicha nungar pĩpe imondo curusu rese yatica ãgua.

27 Evocoyase mborerecuar sundao viroique Jesús ambuae oi pĩpe. Aheve opacatu omboetasa omboyere tupri uca sese yuvireco. 28 Ahese osequiipa iturucuar ichui. Ip̃are omunde turucuar pĩra vahe yuvireco sese 29 iyavei omunde ñaca rese yu pĩapri, omondo avei ñepei tacuarmi mbahe rese ipocosa coti ipove yuvireco. Ip̃are oñenopiha angahu sovai yuvireco aipo ehi:

—¡Imboeteipri judío rerecuar tasecoi! —ehi angahu sese oguayi tēisa pipe yuvireco.

³⁰ Iyavei ondivi-ndivi yuvireco sese. Ipare yuvirocua-rocua ipo pendar tacuarmi pipe ñaca rese yuvireco. ³¹ Ĕgüe ehi yoyai catu-catu yuvireco. Ipare vırocua-se turucuar pıra vahe ichui, ahese omonde iturucuar ité yuvireco sese. Ichui vıraso curusu rese yatica āgua yuvireco cute.

Jesús yaticasa curusu rese

³² Acoi yuvinosese yuvıraso, osepia mbıa Cirene pendar, Simón serer vahe. Ahe chupe, “Erio, terevosıi co curusu Jesús vıreco vahe rese” ehi voiño tēi yuvireco.

³³ Oyepotase yuvıraso Gólgota serer vahesave, ahe ‘ava ācagüer’ oya aipo ehi chupe, ³⁴ aheve uva ricuer imboyese-hapri mbahe pihaupiar rese omondo tēi yuvireco Jesús toiĥu. Osāha tēi, ndoiĥu potai rumo.

³⁵ Ipare oyatica curusu rese yuvireco. Ahese sundao iguayıño oyeupe iturucuar mboyaho-yaho āgua rese. ³⁶ Ipare aheve oguapi yuvınoi sāro. ³⁷ Iyavei omombehu ivate curusu rese ñaca harıve mbahe sui oyuca yuvireco: “Co Jesús judío rerecuar guasu” ehi icuachiapri oĩ.

³⁸ Ñuvırió imonda rai vahe yaticasa avei curusu rese supive yuvireco, ñepeı mbahe rese ipocosa cotı, ambuae evocoiyase mbahe rese ipocoēhısa cotı yuvireco. ³⁹ Acoi ava ñocuasar iñehe-ñehe tēi, oñeaca mbovava, ⁴⁰ aipo ehi yuvireco chupe:

—Nde acoi, “Opara tũparo amonduru. Ipare mbosapı ari rupı opa irira amopuha” ere acoi cuese. ¡Eñepısiro ru nde ae cute! ¡Tũpa Rahır nde recose, egüeyı curusu sui! —ehi tēi yuvireco chupe.

⁴¹ Aipo ehi avei pahi eta rerecuar, Moisés porocuaıta rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

⁴² —Oıpısiro ambuae, ahe ae rumo ndoıcatui oñepısiro. Israel rerecuar guasu secoıse, itogüeyı curusu sui cūrıteı, ahese voi seroyasara! ⁴³ Ahe oyeroya Tũpa rese, Tũpa evocoiyase oıpotase, toıpısiro cūrıteı. Esepia, ahe, “Che Tũpa Rahır aıco” ehi yandeu cuese —ehi yuvireco.

⁴⁴ Imonda rai vahe avei rumo acoi yaticapri supive, ahe avei mara ehi-ehi tēi chupe.

Jesús mano agüer

⁴⁵ Ahese mbıter ari pipe, opa tuprı pıtu ivı rupı. Ĕgüe ehi las tres rupı. ⁴⁶ Ahese tuprı avei Jesús oñehe pırata aipo ehi: “Elı, Elı, ¿lema sabactanı?” ehi, (ahe ‘che Ru Tũpa, che Ru Tũpa, ¿mahera vo che reya eve?’ oyapave aipo ehi).

47 Ava aheve yuvirecoi vahe osenduse ñehe, aipo ehi yuvireco:

—Esendu co mbia, Tūpa ñehe mombehusar Elías upe oñehe —ehi yuvireco chupe.

48 Aheseve voi imboetasa oña, oso mbahe saviyu vahe reca, omoaquí vinagre pipe imondo ivira apri rese chupe ‘toihu’ oya. 49 Ambuae rumo aipo ehiño yuvireco:

—Ēgüe tehiño rane, ¿oura pīha Elías ipĩsiro ãgua? —ehi yuvireco.

50 Ahese Jesús sãse pĩrata iri, omano. 51 Ahe pipeve voi tūparo guasu turucuar ivate coti sui ovo tupri. Aheseve avei ivi oriri iyavei ita guasu-guasu oyeca. 52 Tehögüer ruvipa ita apopri avei oyemboi yuvireco iyavei setá Tūpa reroyasar omano vahecuer, ahe avei opa ocuerayevi yuvireco. 53 Ēgüe ehi Jesús cuerayevire, ahe opa yuvinose tehögüer ruvipa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

54 Evocoyase co sundao rerecuar iyavei Jesús rãrosareta, ahe oyanduse ivi riri yuvireco iyavei ambuae mbahe ěgüe ehi vahecuer repiase, ahese oyembosiquiye guasu aipo ehi yuvireco:

—¡Supi eté catu co mbia Tūpa Rahir ité secoi! —ehi tēi yuvireco.

55 Iyavei setá cuña aheve amombrive osepia catu yuvinoha, ahe acoi Galilea sui yugüeru vahecuer Jesús rupi iyavei setá rupi oipitivi yuvireco yepi. 56 Ahe ipãhuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

Jesús apocatu agüer tuvipa pipe

57 Pitu potase, ou mbia mbahe yar José serer vahe, ahe Jesús reroyasar tecua Arimatea pendar. 58 Evocoyase ahe oso Pilato upe oporandu Jesús rehögüer rese. Evocoyase Pilato aipo ehi: “Aviye, timondosaño chupe” ehi. 59 José evocoyase viraso sehögüer. Ipare oimama tupri turucuar secose vahe ndiquihai vahe pipe. 60 Ichui omoingue ombahe tuvipa ipiasu vahe, ita oyoho uca vahe pipe. Ipare osovapi ita guasu yapayere vahe pipe oso. 61 Aheve María Magdalena ambuae María rese suvipa rovai uguapi yuvinoi.

Jesús ruvipa osãro sundao yuvireco

62 Ahere ayihive mbĩtuhusa ari pipe, yuviraso pahi eta rerecuar iyavei fariseo Pilato upe mbahe rese oporandu ãgua 63 aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevira mbosapi ari pare omano vahe pãhu sui” ehi acoi cuese oicove vitesse —ehi

yuvireco —. ⁶⁴ Sese emondo sundao sehōgüer ruvîpa rãro tupri ãgua mbosapi ari rupi semimbohe ñomiêhi ãgua pĩtu pipe yuvireco. Aviyeteramo, “Ocuera yevi omano vahe pãhu sui” aipo ehi tupri tẽi tiẽtera ava upe yuvireco. Aipo ehise yuvireco, yipindar semira tẽi vahe sui ivate catura serecosa —ehi yuvireco.

⁶⁵ Pilato evocoyase aipo ehi chupe yuvireco:

—Aviye —ehi—. Amondora sundao pẽu. Peraso, pemoviracua tupri ité sãro ãgua —ehi.

⁶⁶ Evocoyase yuviraso tehōgüer ruvîpa rãro tupri ãgua yuvireco. Ahese omondo tehōgüer rovapisa ita guasu rese mbahe imomiisa cua ãgua yuvireco. Ipare oseya aheve sundao sãro ãgua yuvireco cute.

28

Jesús ocuera yevi

¹ Cõhe ramomise, domingu pipe, María Magdalena iyavei ambuae María yuviraso tehōgüer ruvîpa repia yuvireco.

² Aviyeteramo tẽi orirĩ pĩratá ivi Tũpa rembiguai iva sui igüeyise. Ëgüe ehi oyepota tehōgüer ruvîpave ou, ahe virocua itape guasu sovapisa ichui. Ipare iharive oguapi oĩ. ³ Ëgüe ehi sendí iteanga aviye acoi overa vahe. Iturucuar evocoyase morochí eté. ⁴ Osepiase sundao, orirĩ eteanga osiquiyepave yuvireco ichui, opa oyuca pucu-pucu tẽi yuvireco. ⁵ Tũpa rembiguai rumo aipo ehi voi eté cuña upe:

—Pesiquiyei rene. Esepia, che aicua pe peseca Jesús yaticapirer. ⁶ Ndipoi eté cohave. Esepia, ahe ocuera yevi güemimombehu rupi eté. Tapesepia ru supagüer —ehi.

Ipare aipo ehi:

⁷ —Peso poyava voi, tapemombehu semimbohe eta upe: ‘Ocuera yevi omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu ãgua pẽu —ehi Tũpa rembiguai cuña upe.

⁸ Evocoyase cuña yuviraso poyava voi suvîpa sui, osiquiyepãhuve rumo ovihãño yuvireco; Ëgüe ehi yuvinoñá iteanga imombehu yugüeru oreu. ⁹ Ahese Jesús oyemboyecua cuña upe cute omboavirave. Ahe cuña evocoyase oyemboya sese oñenopiha ipicuhaguã imboeteisave yuvireco. ¹⁰ Evocoyase ahe aipo ehi chupe:

—Pesiquiyei rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

¹¹ Cuña yuviraso vitesese, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepia vahecuer yuvireco. ¹² Evocoyase pahi rerecuareta oñemoñeta judío rerecuar rese opihañemoñeta mboyoya ãgua. Ichui omondo setá guarepochi sundao upe yuvireco, ¹³ aipo ehiño yuvireco chupe:

—Aipo peyera ava uve: “Oroque vitesese pĩtu pipe, ahese revo Jesús remimbohe yugüeru sehögüer ñomi ãgua ore sui” peyera —ehi mborerecuar yuvireco chupe—. ¹⁴ Acoi oyanduse rumo mborerecuar guasu curi, ahese opoviroya ucara chupe. Evocoyase ndipoi chira mbahe pe rese —ehiño pahi eta rerecuar sundao upe yuvireco.

¹⁵ Evocoyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ëgüe ehi vite cūrítei judío Jesús cuerayevisa reroyaëhi yuvireco yepi.

Jesús omondo güemimbohe ivi yacatu rupi oñehengagüer mombehu ãgua

¹⁶ Evocoyase ëgüe orohe oroso semimbohe once oroico vahe Jesús remimombehu ivi Galilea pendar ivitrive. ¹⁷ Acoi orosepiase rumo Jesús, ahese oromboetei oroico, yepe moviro tēi ore pãhu pendar ndoviroya tupri vitei yuvireco viña. ¹⁸ Evocoyase ahe oyemboya ore rese aipo ehi oreu:

—Tũpa che mbou mborerecuar ivate catu vahe che reco ãgua ivave, ivive nara avei no —ehi—. ¹⁹ Peso ava upe opacatú ivi rupi iyavei pembohe che recocuer rupi eté yuvirecoi va-herã; peñapiramo avei che Ru rer pipe, che rer pipe, Espiritu Santo rer pipe avei no. ²⁰ Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve arí yacatu rupi yepi, acoi arí ipa vahe rupi —ehi Jesús oreu.

Aviye, aipo rupive.

MARCOS REMBICUACHIA JESUS RECOCUER RESENDAR San Marcos

Juan Oporoãpiramo vahe ivi iporupirêhisa rupi secoi

¹ Co yipindar aviye vahe ñehesa Jesucristo, Tûpa Rahir, recocuer resendar amombehu potami pëu. ² Yipiindar Tûpa aipo ehi imombehu oñehe mombehusar Isaías rembicuachía pipe aracahe:

“Amondora che ñehe mombehusar nde renonera, ndeu peri moatiro ãgua” ehi.

³ “Oyeendu ñehesa ipĩrata vahe ava porêhise: ‘Pemoingatu yande Yar raperã; pemohivi tupri avei’ ehi” ehi aracahe.

⁴ Êgüe ehi Juan ou ava ãpiramo ivi iporupirêhisa rupi oico, aipo ehi: “Pemboasi pe angaipa, peyevi Tûpa upe, ahese opoãpiramora Tûpa pëu ñero ãgua pe angaipa rese” ehi ava upe.

⁵ Opacatu ava oyugüeru iñehe rendu ãgua ivi Judea rupindar, iyavei tecua Jerusalén pendar oangaipagüer mombehu ãgua. Ahese Juan oñapiramo iai Jordán pipe.

⁶ Juan turucuar camello ragüer apopri, sumbicuasa mbahe pিরer, sembihu evocoyase tucru, eiri caha pipendar avei.

⁷ Ahe aipo ehi oñehe ava upe oico: “Che raquicuei oura seco pĩrata catu vahe che sui, sese cheu ndiyai chira ayeaivi ipitaquisã yora ãgua. ⁸ Che supi eté opoãpiramo i pipe tēi; ahe rumo pe ãpiramora Espiritu Santo pipe” ehi.

Jesús ãpiramo agüer

⁹ Ipare Jesús osẽ tecua Nazaret sui oso Galilea rupi. Aheve Juan oñapiramo iai Jordán pipe. ¹⁰ Osẽ ramoseve i sui, Jesús os-epia iva oyemboi tupri, ahese Espiritu ogüeyi iharive apicasu nungar. ¹¹ Ahese oyeendu ñehesa iva sui aipo ehi: “Nde che Rahir ereico, che rembiaisu, aviha etepri nde rese” ehi vahe.

Jesús recoãhasa

¹² Ipare voi, Espiritu Santo viroguata Jesús ava porêhisa rupi. ¹³ Aheve Jesús secoi cuarenta ari mbahe mimba vai pãhuve. Aheve avei Carugar osecoãha; Tûpa rembiguai iva pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico ¹⁵ aipo ehi: “Oyepota ari iyavei cõimi eté Tûpa mborerecuasa yandeu. Sese, pemboasi pe angaipa, peyevi

Tũpa upe, iyavei peroya co ñehesa aviye vahe Tũpa suindar” ehi.

Jesús, “Perio che rupi” ehi irungatu pira mbohasar upe

¹⁶Ñepei ari Jesús uguata ipa Galilea ivii. Ahese osepia Simón, tivri Andrés avei, ahe pira omboha yuvireco. ¹⁷Ahese Jesús aipo ehi chupe:

—Pe pira recasar peico, perio che rupi, na peye aveira ava reca água cheu nara —ehi.

¹⁸Aipo he ramoseve voi, opoi opira mbohasa sui yuvireco, yuviraso supi.

¹⁹Ipare chñhi uguata irimise, ahese osepia Santiago, Zebedeo rahir, tivri Juan reseve carite pipe omoingatu opira mbohasa yuvinoi vu piri. ²⁰Ahe chupe avei: “Perio che rupi” ehi, evocoyase vu oseya carite pipe ipitivisar reseve, yuviraso supi.

Mbia carugar vireco vahe oyese

²¹Oyepotase tecua Capernaum ve yuvireco mbituhusa ari pipe, Jesús oi que oporombohe tũparove. ²²Evocoyase ava osenduse iporombohesa, “¿Mara ehi rutei?” ehi tẽi yuvireco chupe. Esepia, ahe oporombohe güeco pĩratasa pipe, ndahei Moisés porocuita rese oporombohe vahe nungar. ²³Aheve mbia ahe tecua pendar vireco vahe carugar oyese, oñhe pĩrata chupe aipo ehi:

²⁴—¿Mahera vo ereyuño tẽi cohava oreu, Jesús Nazaret pendar? ¿Ereyu vo ore mocañi água tẽi? Che orocua ité, nde Tũpa suindar ndaseco marai vahe ereico —ehi chupe.

²⁵Oñhe pĩrata rumo carugar upe aipo ehi: —¡Quiriri, esẽ co mbia sui! —ehi chupe.

²⁶Evocoyase carugar mbia rese seci vahe omoehoha seiti ivive, sãse, osẽ oso ichui. ²⁷Opacatu ava ombosiquiye, ichui oporandu-randu oyeupe yuvireco aipo ehi:

—¿Mbahe pĩha co? ¡Iporombohesa ipiasu vahe ité! ¡Co mbia vireco ité omborerecuasa! ¡Carugar avei eté omboyeroya oyeupe ñehese! —ehi tẽi ava yuvireco.

²⁸Cũriteimi voi yandusa serãcua opacatu ivi Galilea rupi.

Jesús ombogüera Pedro rembireco si

²⁹Jesús yuvinosese tũparo sui, yuviraso Santiago, Juan rese Simón, Andrés rõtave. ³⁰Aheve Simón rembireco si sohí iteanga vupave ou. Evocoyase omombehu Jesús upe imbaherasisa yuvireco. ³¹Ahese oso chupe oipisi ipo rese imopuha, ahe ramoseve, sohí opituhu ichui. Ipare voi ahe cuña ihañeco semihura rese.

Jesús setá ombogüera ava imbaheasi vahe

³² Pĩtu ramose opacatu imbaheasi vahe iyavei carugar vireco vahe viraso yuvireco chupe imbogüera ãgua. ³³ Opacatu ava ahe tecua pendar oñemonuha oquendipive yuvireco. ³⁴ Evocoyase setá ombogüera mbaherasi-rasi tẽi vireco vahe, iyavei omboyepipi setá carugar ava sui. Ndoipotai rumo carugar ñehe. Esepia, ahe oicua ité evocoyase seco yuvireco.

Jesús Vu Tũpa Ñehengagüer omombehu judío tũparo rupi

³⁵ Ayihiteve Jesús oñarapuha oso ava porẽhisave oyerokuĩ ãgua. ³⁶ Evocoyase Simón ondugüer reseve yuviraso seca. ³⁷ Osepiase,

—Opacatu ava nde reca tẽi yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tũpa Ñehengagüer mombehu ãgua aheve; evocoi nungar apo ãgua niha che ayu —ehi.

³⁹ Ëgüe ehi oguata opacatu Galilea ivi rupi, omombehu Vu Tũpa Ñehengagüer judío tũparo yacatu rupi oico, iyavei setá omose carugar ava sui.

Jesús ombogüera mbia lepra vireco vahe

⁴⁰ Ñepeĩ mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

⁴¹ Iparaisuerecosave opoco sese.

—Aipota. ¡Erecuerara cũritei! —ehi chupe.

⁴² Aipo ihe ramoseve, ocuera voi eté. ⁴³ Ahese aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosave nde cuerasa resendar Moisés porocuita rupi. Evocoyase toicua opacatu ava yuvireco nde cuerasa —ehi chupe viña.

⁴⁵ Ahe mbia rumo oso omombehu-mbehu opacatu ava upe. Sese Jesús ndoicatu iri güeique ãgua güecocuer mombehuse tecua rupi; secoiño tẽi tecua popi rupi ava porẽhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

¹ Ñepeĩ ari pipe Jesús oyeveĩ ou tecua Capernaum ve, ahese opacatu oyandu ñepeĩ oive secoise yuvireco. ² Cũriteimi voi eté setá ava oñemonuha yuvireco secosave. Sese ndipoi eté ava reique iri ãgua oi pipe oquendipi rupi. Ahe rumo omombehuño ité Vu Ñehengagüer. ³ Aheseve irungatu mbia viroyepota

ndoguatai vahe yuvireco chupe. ⁴ Ahe rumo ndiyai seroi que ãgua Jesús uve ava rehüsave yuvireco. Sese viroyeupi oi harive seraso yuvireco. Aheve teca virocua oi sui yuvireco; supi viroyi supa reseve imondo Jesús rovai tupri yuvireco. ⁵ Ahe oicuase co mbia yuvirecoi vahe oyese yeroya, aipo ehi imbaheasi vahe upe:

—Che rahir, che ñero nde angaipa rese ndeu —ehi.

⁶ Moisés porocuita rese oporombohe vahe rumo ipihañemoñeta aheve yuvinoi: ⁷ “¿Mahera co mbia aipo ehiño tēi oñehe? Ahe oyemboivate ai tēi vahe Tūpa ñehe nungar pipe tēi oñehe. Tūpaño ité niha oicatu ava angaipa upe oñeroi ãgua” ehi. ⁸ Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese? ⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pñha, anise: “Eñarapuha, esupi nde rupa, eguata” hesa tie? ¹⁰ Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua —ehi.

Evocoyase aipo ehi imbaheasi vahe upe:

¹¹ —Eñarapuha, esupi nde rupa, eso nde rētave —ehi.

¹² Imbaheasi vahe aipo ihe ramoseve, oñarapuha, osupi vupagüer, osē oso ichui opacatu ava rembiepiave. Sese opacatu oyepihamondii yuvireco, omboetei Tūpa yuvireco aipo ehi:

—Yipisuve ndayasepiai vahe ité co nungar mbahe —ehi tēi yuvireco.

Jesús oñehe mbia Leví serer vahe upe

¹³ Ipare Jesús oso iri ipa ivii. Aheve oporombohe oyese ava rehii yemboyase. ¹⁴ Ichui uguata vitesse, osepia Leví, Alfeo rahir, guarepochi rerocuasave chinise, aipo ehi chupe:

—Erio che rupi —ehi.

Evocoyase Leví opñha, oso voi supi.

¹⁵ Ipare ocaru Leví rētave güemimbohe reseve yuvireco, ava sui guarepochi rerocuasar iyavei ava yangaipa vahe pñhuve. Esepia, setá ava osaquicue moñaña ité yuvireco. ¹⁶ Evocoyase Jesús ocaruse ipñhuve, fariseo eta, oporombohe vahe Moisés porocuita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuasar iyavei yangaipa guasu vahe pñhuve tēi? —ehi.

¹⁷ Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

¹⁸ Ñepeí ari pipe Juan Oporoãpiramo vahe remimbohe oye-
cuacu yuvireco, fariseo eta avei oyecuacu yuvireco no. Evo-
coiyase moviro mbia ipãhu pendar yuviraso, oporandu Jesús
upe:

—¿Mahera ru nde remimbohe ndoyecuacui eté yuvireco?
Esepia, Juan remimbohe iyavei fariseo eta oyecuacu yuvireco
yepi —ehi yuvireco chupe.

¹⁹ Evocoiyase omboyevi ahe ava upe:

—¡Ndiyai eté ichohopri mendasave iyecuacu ãgua imer
oicove vïtese ipãhuve! ²⁰ Oimera rumo ari imer reraso ãgua
ichui curi, ahese ramo oyecuacura yuvireco cute —ehi.

²¹ “Ndiyai yayapete turucuar cuacua turucuar ipiasu vahe
pipe. Esepia niha, ipiasu vahe oichohó turucuar cuacua
imondoro iri ãgua, ichorosa evocoiyase tuvicha catu-catuño
ité. ²² Iyavei uva ricuer ipiasu vahe ndiyai iñasa mbahe pìrer
cuacua pipe. Esepia, uva ricuer ipiasu vahe osose mbahe
pìrer cuacua vahe pipe, ombopuñora, uva ricuer evocoiyase
ocañipa tẽira, iyavei mbahe pìrer ocañi tẽi aveira. Sese uva
ricuer ipiasu vahe ñoñasara mbahe pìrer ipiasu vahe pipe
yepi” ehi.

Jesús remimbohe oipoho trigo mbituhusa ari pipe yuvireco

²³ Ñepeí mbituhusa ari pipe, Jesús oguata güemimbohe rese
trigo pãhu rupi fariseo rembiepiave yuvireco. Ahese semim-
bohe oipoho-poho sãhi yuvireco. ²⁴ Evocoiyase fariseo aipo
ehi:

—¡Mahera nde remimbohe mbituhusa ari pipe oporaviquiño
yuvireco! —ehi yuvireco chupe.

²⁵ Ahe rumo aipo ehi:

—Peyeroqui niha icuachiapri aracahendar pipe mborere-
cuar guasu David rembiapogüer rese acoi ndasiëpoise on-
dugüer reseve yuvireco aracahe. ²⁶ Pahi rerecuar ivate catu
vahe Abiatar serer vahe recose, ahese David oi que Tũpa rëta
pipe pan imboeteipri Tũpa upendar reca ondugüer reseve
yuvirohu ãgua. Ahe chupe acoi ndipotasai ihu ãgua yuvireco
viña; judío pahi yuvirecoi vahe upeño ité niha ipotasa ihu ãgua
yepi. Ahe rumo ohuño, omondo avei ava oyeupindar tohu
aracahe —ehi.

²⁷ Iyavei aipo ehi:

—Mbituhusa ari yaposa ava upe nara, ndahei ava yaposa
mbituhusa ari upe nara. ²⁸ Sese Ava Riquehir mbituhusa ari
rerecuar secoi —ehi Jesús fariseo upe.

3

Mbia ipo nomii vahe Jesús ombogüera

¹ Jesús oique iri judío tūparove. Aheve oime mbia ipo co cotigüer nomii vahe. ² Aheve avei fariseo ‘¿ombogüerara pïha mbituhusa ari pipe?’ oya omahengatu yuvireco sese ‘yaiñhengapo angahu’ oyapave tēi. ³ Evocoyase Jesús aipo ehi co mbia ipo nomii vahe upe:

—Epūha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe pïha, mbahe naporai vahe tie? ¿Yaipĩsiro pïha ava recocuer, yamocañi uca tēi tie? —ehi chupe.

Ahe rumo opaño iquiriri tupri yuvireco. ⁵ Evocoyase omahe ava oyese oyere tupri vahe rese voriehise iyavei ndovihai ava ndosenducua catuise yuvireco. Sese aipo ehi ipo nomii vahe uve:

—Eichoho nde yiva —ehi.

Evocoyase oichoho oyiva, ocuera tupri ité. ⁶ Ahese fariseo opa yuvinose yuviraso oyemoingatu Herodes rupindar rese Jesús yuca ãgua yuvireco.

Ava rehii ipa popi rupi yuvirecoi

⁷ Ipare Jesús yuviraso güemimbohe reseve ipa popi rupi, ava rehii avei ivi Galilea rupindar yuviraso supi. ⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, ïai Jordán cotindar avei, opacatu ava Tiro, Sidón pendar yugüeru sepia ãgua. ⁹ Sese oyocuai güemimbohe vireco voi vaherã ñepe carite yuvireco ava omboti etepriēhi ãgua yuvireco. ¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuviraso chupe sese opoco ãgua.

¹¹ Iyavei ava carugar vireco vahe sepiase, oñenopiha sovai, oñehe pucu-pucu yuvireco:

—¡Nde Tūpa Rahir ereico! —ehi.

¹² Jesús rumo oñehe pĩrata chupe: “Che mombehui rene ava rovaque peye” ehiño imondo.

Jesús oiporavo doce tupri güemimboherã

¹³ Ipare Jesús oyeupi ivitri rese oso. Aheve ava viroyasar upe oñehe iporavo ãgua güemimbotar rupi. Ichui oyugüeru yuvireco chupe. ¹⁴ Ahe ipāhu pendar osenoi doce tupri güemimboherã ‘toguataño che rupi, tomombehu Tūpa Ñehengagüer opacatu ivi rupi’ oya. Ahe osero “apóstol” ¹⁵ ‘toipisi avei mborerecuasa carugar ava sui imboyepipi ãgua yuvireco’ oyapave. ¹⁶ Evocoi doce yuvirecoi vahe, ahe: Simón (sererguã acoi omondo Pedro), ¹⁷ Santiago iyavei tivri Juan Zebedeo rahir, ahe avei omondo sererguã Boanerges (‘osunu vahe rahir’ oya aipo ehi); ¹⁸ iyavei Andrés, Felipe,

Bartolomé, Mateo, Tomás, Santiago Alfeo rahir; Tadeo, Simón, ava güecua rese secatēhi vahe pāhu pendarer; ¹⁹ iyavei Judas Iscariote, ahe omondo vaherã Jesús yamotarēhisar upe.

“Jesús carugar pīratasa vireco oyese” ehi tēi ava yuvireco

²⁰ Ipare Jesús oi que oi pipe güemimbohe reseve. Aheve oñemonuha ati irise ava yuvireco sese, ndiyai icaru āgua yuvireco. ²¹ Oyanduse imu secocuer yuvireco, oyugüeru seraso āgua ‘ndayaracua iri revo’ oya.

²² Iyavei oporombohe vahe Moisés porocuita rese oyugüeru vahe Jerusalén sui aipo ehi: “Co mbia carugar rerecuar Beelzebú oyocuai vahe, ipīratasa pipe tēi omboyepipi carugar ava sui” ehi yuvireco.

²³ Evocoyase Jesús omombehu carugar recocuer aipo ehi: “¿Mara ehira aipo carugar ahe ae oyeenose ava sui viña? ²⁴ Acoi mborerecuar guasu povri pendar, ahe ovava-vavase oyeupe; evocoi nungar mborerecuar pīratasa ocañi tēira. ²⁵ Acoi oñemu oyese ae oyeamotarēhise, oyemboyahose yuvireco viña, ahe ndipocopi chiaveira yuvireco. ²⁶ Acoi carugar oyemboyahose ovava āgua oyeupe ae yuvireco, ndipocopi chiaveira yuvireco, ahe evocoyase secocuer ocañi tēi vaherã ité yuvireco.

²⁷ “Ndipoi eté niha ava oi que vahe que ava ipīrata etepri vahe rēta pipe imbahe rerocuapa āgua ichui; oñapichi rane itera. Ipare voi opara imbahe virocua ichui.

²⁸ “Supi eté aipo ahe pēu: Acoi ava yangaipa vahe upe Tūpa iñerora opacatu yangaipa rese, iñehe-ñehe tēisa rese avei. ²⁹ Acoi iñehe-ñehe tēi vahe rumo Espíritu Santo rese, ahe chupe ndipo iri chietera ñerosa apirēhi vaherã ité” ehi.

³⁰ Aipo ehi Jesús imboyevi ava upe. Esepia, “Carugar tēi erereco” ehiño ava yuvireco chupe.

Jesús si, tivireta avei

³¹ Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichē āgua. ³² Yivii yuvinoi vahe oñehe yuvireco chupe:

—Nde si, nde rivireta, nde reindri reseve ocarve nde reca tēi yuvireco —ehi.

³³ Ahe rumo,

—¿Ava pīha che si; ava pīha che rivireta yuvirecoi? —ehi.

³⁴ Evocoyase omahe ava oivirindar yuvinoi vahe rese aipo ehi iri chupe:

—Co che si eta; co che rivireta. ³⁵ Esepia, acoi Tūpa remimbotar oyapo vahe yuvireco, ahe che rivri, che reindri, che si avei yuvirecoi —ehi.

4

Mbahe miti sui yembohesa

¹ Jesús oporombohe iri ipa popi rupi. Aheve ava rehi oyemboya yuvireco sese. Ipare oha carite imbehive tui vahe pipe. Aheve uguapi oi ñehe. Ava rumo opacatu ivi ãtasa rupi opitaño yuvireco. ² Evocoyase ava mbohe ãgua omboyoya tecocuer mbahe tisa rese aipo ehi:

³ “Pesendu co ñehesa: Ñepe mbia osẽ omaheti. ⁴ Ahe otiaپی-اپیسه mbahe rãhi oso, moviro oviapi peri rupi. Vĩrai yugüeruse rumo, opaño yuvirohu. ⁵ Iyavei moviro oiti ivi nayanai vahesave, ita pãhuve. Sese cũriteimi sori. ⁶ Ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rãhi oiti yu pãhuve; ahe yu rumo sori poyava catu. Sese opaño oyopi. Evocoyase ahe miti ndihai eté. ⁸ Ambuae mbahe rãhi oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri ité oha vireco” ehi.

⁹ Evocoyase, “Acoi osendu pota vahe che ñehe, toyapisacaño sese” ehi Jesús ava rehi upe.

¿Mahera pãha co yembohesa imboyoyasa ambuae mbahe rese?

¹⁰ Ipare Jesús opita ahe ae. Ava opita vite vahe semimbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe. ¹¹ Ahe aipo ehi: “Pẽu niha Tũpa oicua uca mbahe ndicuasai vahe omborerecuasa resendar. Ndache reroya potai vahe upe rumo imboyoyasa mbahe ambuae mbahe rese yepi. ¹² Yepe osepia tẽira, ndosepiacuai chietera rumo yuvireco. Iyavei yepe osendu tẽira, ahe rumo ndosenducuai chietera yuvireco, Tũpa upe oyevi potaẽhisave, ipipe sui ndipoi chira ñeroisa yuvireco chupe” ehi.

Jesús omombehu tupri yembohesa mbahe tisa resendar

¹³ Iyavei aipo ehi: “¿Ndapesenducuai mi vo aipo porombohesa? ¿Mara peyera ru opacatu ambuae che porombohesa cua tupri ãgua? ¹⁴ Evocoi mbahe rãhi oñoti vahe, Tũpa Ñehengagüer mombehusar nungar. ¹⁵ Amove ava recocuer inungar co mbahe rãhi seitipri peri rupi: osendu angahu Tũpa Ñehengagüer. Sendu pare rumo, ou Carugar ovirocuapaño oique vahe ipiha pipe ichui. ¹⁶ Ambuae ava recocuer inungar mbahe rãhi seitipri ita pãhu rupi: osendu Tũpa Ñehengagüer, oipisi tupri angahu oyeupe nara vorivetesã pipe; ¹⁷ ndovirecoi rumo guapo oyese opirata ãgua. Evocoyase yuvirecoise mbahe-mbahe tẽi pipe Tũpa Ñehengagüer sui tẽi, cũriteimi

seroyaẽhisave, ‘Apoira ichui’ ehi yuvireco. ¹⁸ Ambuae ava recocuer inungar mbahe rãhii ñotimbri yu pãhu rupi: osenduse ñehesa Tũpa suindar, ¹⁹ ahe rumo ipihañemoñeta catu opacatu ombahe eta co ivi pipendar rese saisusave. Oyembopa uca rumo ombahe eta upe. ‘Opacatu ité mbahe tareco’ ehi tiẽte viña. Ipipe sui omocañi tẽi Tũpa Ñehengagüer. Ndoyapo ucai avei mbahe eta aviye vahe evocoi nungar ava upe. ²⁰ Ambuae ava rumo osendu vahe Tũpa Ñehengagüer seroyasa pipe, oyapoño ité mbahe aviye vahe. Ahe inungar mbahe rãhii ñotimbri ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

²¹ Iyavei aipo ehi: “¿Serecosa vo tataendi mbahe riruvrive nara tẽi iyavei yande rupavrive nara tẽi no? Aní, tataendi imondosa ivate poroesape ãgua. ²² Ndipoi chietera mbahe ñomipri ndayasepiai vaheerã curi. ²³ Acoi osendu pota vahe che ñehe, toyapisacaño yuvireco sese” ehi.

²⁴ Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pẽu. Iharive amondo iri catura pẽu. ²⁵ Vireco tupri vahe upe, imondosa catura. Acoi ndovireco tupri vahe sui, serocuasañora” ehi.

Yembohesa mbahe rãhii rorisã resendar

²⁶ Aipo ehi iri avei Jesús: “Tũpa mborerecuasa co ivi pipe inungar que ava oñoti vahe mbahe rãhii. ²⁷ Omaheti pare, oso oque. Ipare coiye catu oñarapuha. Ahe oñocua pĩtu, ari avei, evocoiyase mbahe rãhii sorĩ poyava yuvireco. Itĩsar rumo ndoicuai mara ehi vorĩ. ²⁸ Ivi rese niha oyesu miti: yipĩndar sorĩ, ipare iha, ipare sãhii yuvinosẽ sese. ²⁹ Evocoiyase co mbia mbahe ha yaviyese, oipoho. Esepia, oyepota ari ipoho ãgua chupe” ehi.

Yembohesa mostaza rãhii suindar

³⁰ Iyavei aipo ehi: “¿Mara ehi vo Tũpa povri pendar co ivi pipe pẽu; mbahe rese pĩha iyacatu imboyoyasa icua ãgua?

³¹ Ahe oyoya tupri mostaza rãhii rese. Ahe tahimi catu opacatu ambuae mbahe rãhii sui. ³² Ñoti pare rumo, sorĩ, ocuacuase tuvichá catu ambuae mbahe miti sui. Sãca tuvichá ité, sese vĩrai oyemboaiti sovri rupi yuvireco” ehi.

Jesús omboyoya ambuae mbahe rese oporombohe yepi

³³ Ëgüe ehi Jesús oporombohe Tũpa Ñehengagüer rese, omboyoya-yoya ñepeĩ mbahe ambuae mbahe rese ava mbahecuagüer rupi. ³⁴ Nomombehui eté mbahe ambuae mbahe rese imboyoyaẽhi pipe. Ahe rumo omombehu tupri güemimbohe upe ahe aemi yuvirecoise.

Jesús omombituhu i ohitu vahe, ivitu ai reseve

³⁵ Ahe ari pipe pĩtu ramomise, aipo ehi güemimbohe upe:

—Yaso ipa rovai —ehi.

³⁶ Evocoiyase ava sui osiri yuvireco, yuviraso carite pipe. Ambuae carite pipendar avei yuviraso supi. ³⁷ Oyepotase rumo ivitu ai ipĩrata vahe, i ohitu vahe oha guasu-guasú carite pipe, omboapipo seni yuvireco chupe. ³⁸ Jesús rumo oyeatocoño, oque ou supita coti. Evocoiyase omomahe voi yuvireco, aipo ehi chupe:

—¡Porombohesar! ¿Nandemahemohaimi rutei vo yande rese? ¡Opara moco yaso ipive! —ehi.

³⁹ Evocoiyase aipo hese, omahe, oñehe pĩrata ivitu ai upe, ipa upe avei:

—¡Pepituhu! —ehi.

Aheseve voi opituhu tupri. ⁴⁰ Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroya vitei vo che rese? —ehi.

⁴¹ Ahe rumo osiquiyepave oporandu-randu oyeupe yuvireco:

—¿Ava pĩha co mbia secoi? Esepia niha, ivitu ai, ipa avei omboyeroya —ehi tēi yuvireco chupe.

5

Mbia Gerasa iguar vireco vahe carugar oyese

¹ Jesús güemimbohe reseve oyepota ipa rovai Gerasa ivi rese yuviraso. ² Yuvinose pare carite pipe sui, ahese mbia carugar rerecosar tuvipa pãhu rupi secoi vahe oso Jesús upe. ³ Co mbia tuvipa pãhu rupi secoi vahe yepi. Ndipoi eté ava secopisar, carena avei eté opa-opaño omondoso. ⁴ Setá yupagüer rupi tēi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe. ⁵ Ari, pĩtu rupi oguata, osapucái oico ivitri mahugüer rupi, tuvipa mahugüer rupi avei; ocua-ocua ita pipe oyese yepi. ⁶ Amombrí Jesús repia ramoseve, oña senonde oñenopiha voi sovai, ⁷ oñehe pĩrata chupe:

—¡Eyepipi che sui Jesús, Tũpa seco ivate catu vahe Rahir! ¡Aporandu Tũpa rer pipe che mombaraisuēhi ãgua eve! —ehi.

⁸ Aipo ehi, esepia, yipindar Jesús aipo ehi chupe:

—¡Carugar mbahe tēi vahe, esē co mbia sui! —ehi chupe.

⁹ Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legión. Esepia, ore rehí eté —ehi.

¹⁰ Oporanduño chupe omondopaëhi ãgua co ivi sui. ¹¹ Ichui namombriimi setá cuchi ocaru vahe ivitri rese yuvireco.

¹² Sese carugar oporandu yuvireco chupe:

—Ore mondopaño cuchi aviterve eve —ehi yuvireco.

¹³ Evocoyase Jesús omondo carugar sē ãgua ahe mbia sui. Ahe opa yuviroique cuchi aviterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

¹⁴ Evocoyase cuchi rãrosar yuvinoña osiquiyepave yuviraso imombehu ãgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pñha?’ oya yuvireco. ¹⁵ Oyepotase Jesús recosave, aheve osepia mbia carugar vireco vahecuer yuvireco oyemonde tuprise oĩ, yaracua tuprise avei. Ahese oyembosiquiye tēi yuvireco.

¹⁶ Mbahe oime vahe carugar vireco vahe rese, cuchi rese avei, ahe sepiasar omombehupa ambuae ava upe yuvireco.

¹⁷ Evocoyase ava Jesús upe: “Esē cohave sui” ehi yuvireco.

¹⁸ Oha irise Jesús carite pipe, co mbia carugar rerecosarer oporandu chupe supi oso ãgua. ¹⁹ Ahe rumo,

—Esoño nde rētave, nde mu piri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

²⁰ Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi tēi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyevise Jesús carite pipe ipa rovai oso, aheve oñemonuha ati ava yuvireco chupe. Ahe evocoyase opitaño ipa popive.

²² Evocoyase oyepota mbia mborerecuar tũparo pendar, ahe serer Jairo. Jesús repiase, oñenopiha sovai, ²³ aipo ehi chupe:

—Che rayri omano pota. Yaso, teremondomi tēi nde po iharive imbogüera ãgua —ehi.

²⁴ Evocoyase oso supi. Ava rehi avei yuviraso supi.

²⁵ Ipãhuve avei oime cuña doce araviter rupi suvi yepiyereyere vahe. ²⁶ Iparaisú iteanga, setá oporoposano vahe ndoicatu imbogüera yuvireco omomandaivete catu iposanosa pipe yuvireco. Opa tupri tēi omondo mbahe vireco vahe, ivate catuño rumo imbaherasisa chupe. ²⁷ Co cuña osenduse Jesús rese ñehesa, oguata saquicuei oso ava rehi pãhuve, iturucuar rese opoco. ²⁸ Aipo ehi oyeupe oico: “Iturucuar rese apocose rumo, acuerara” ehi. ²⁹ Ahe ramoseve voi ndasuvi yepiyere iri. Ipare oyandu güetecuer yemoingatu tupri, ocuerase ombaherasisa sui. ³⁰ Jesús rumo oyandu osēse opĩratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

³¹ Semimbohe omboyevi yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

³² Ahe rumo omaheño vite ité ava oivindar rese ‘¿uma ité pñha opoco che turucuar rese?’ oya. ³³ Evocoiyase co cuña oicuase mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe. ³⁴ Evocoiyase Jesús aipo ehi chupe:

—Che rayri, erecuera cūrítei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

³⁵ Ñehe viteseve, oyepota moviro Jairo rēta pendar tayri mano mombehu yuvireco:

—Omano ité nde rayri. Aní eremañeco tēi vite Porombohesar —ehi yuvireco chupe.

³⁶ Ahe rumo Jairo upe aipo ehi:

—Aní eresiquiye. Eyeroya catuño —ehi.

³⁷ Ndoipotai rumo ambuae ava oyeupi icho ãgua; Pedro, Santiago, Juan güeraño oipota. ³⁸ Oyepotase Jairo rētave, osepia ava yemondii oyaseho vahe. ³⁹ Ichui oiquese oi pipe, aipo ehi:

—¿Mahera vo perãse guasu tēi peyaseho peyu? Co cuñatai nomanoi, oque tēi ou —ehi ava upe.

⁴⁰ Ava rumo opucaete-eteño seroyaēhisave yuvireco. Evocoiyase omose opacatu ava. Ipare omoingue iyepupa, ichi, oyeupindar reseve cuñatai rehögüersave. ⁴¹ Ipare oipopisi aipo ehi:

—Talita, cum —ehi chupe (‘cuñatai, eñarapuha, ahe ndeu’ ohesave aipo ehi).

⁴² Ahe ramoseve voi cuñatai doce araviter vahe oñarapuha, ipare oguata. Sepiase ava, oyembosiquiye guasu yuvireco.

⁴³ Jesús rumo oyocuai imombehuēhi ãgua ambuae ava upe. Ipare,

—Pembocarú co cuñatai —ehi.

6

Jesús Nazaret ve secoi

¹ Jesús osē co tecua sui oso güecuave; semimbohe avei yuviraso supi. ² Oyepotase mbítuhusa ari, ahese oporombohe tūparo pipe. Setá ava ñehe rendusar oyepihamondiisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pñha vinose co mbahecuasa co poromondiisa apo ãgua? —ehi yuvireco oyeupe—. ³ Co niha carpintero, María membri;

Santiago, José, Judas iyavei Simón ríquehi; seindri avei yuvirecove yande pãhuve —ehi.

Sese ndoviroyai yuvireco. ⁴ Jesús rumo aipo ehi ahe ava eta upe:

—Tũpa ñehe mombehusar avei niha ava omboetei opacatu rupi yuvireco yepi, imu sêta pipendar ae rumo nombotei yuvireco —ehi.

⁵ Ndoicatu mbahe oporomondi vahe apo ãgua ava viroyaêhisa pipe, sese moviro tẽi imbaheasi vahe harive omondo opo imbogüera ãgua. ⁶ Ndoyembovıhai ava viroyaêhisa rese.

Jesús oyocuai güemimbohe Tũpa mborerecuasa mombehu ãgua

Ipare Jesús oso, oguata tecua-tecuami namombrii vahe rupi oporombohe oico.

⁷ Evocoyase, “Perio” ehi güemimbohe doce vahe upe. Ipare oyocuai ñuvirıo-rıo, iyavei omondo güeco pıratasa carugar mboyepepi ãgua chupe.

⁸ —Ndaperasoi chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe rıru, pan, guarepochi avei. ⁹ Iyavei pemondera pıtaqui güeraño. Ndapemondugüei chiaveira pe camisa seraso.

¹⁰ —Que pesosave peiquese oi pipe, pepitaño ipipe, ichuive tupriño ité pesëra pecua. ¹¹ Acoi ambuae tecua pendar ndape pısi potaise, ndosendu potaise avei pe ñehe yuvireco, peyepepiñora ichui. Peipıpeteño aveira pe pi ivi rãtachigüer sui. Êgüe pe hesa omboyecuar cañisa apirẽhi yuvireco chupe —ehi.

¹² Evocoyase semimbohe eta yuvıraso, “Pemboasi pe angaipa, peyevi Tũpa upe” ohe ãgua yuvireco. ¹³ Iyavei setá omboyepepi carugar ava sui, setá avei omondo mbahe quira ava imbaheasi vahe rese imbogüera ãgua yuvireco.

Juan Oporoãpiramo vahe mano agüer

¹⁴ Mborerecuar guasu Herodes oyandu ñehesa Jesús re-sendar, iyavei opacatu rupi oicua yuvireco. Sese Herodes aipo ehi:

—Juan Oporoãpiramo vahe revo ocuerayevi. Sese oyapo poromondiisa ipırata vahe —ehi.

¹⁵ Ambuae rumo,

—Tũpa ñehe mombehusar Elías mo evocoi —ehi yuvireco.

Ambuae evocoyase,

—Tũpa ñehe mombehusar aracahendar mo evocoi —ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cūritei ocuerayevi —ehi.

¹⁷ Herodías recocuer sui tēi niha Herodes Juan oñapichi uca carena pipe soquenda. Esepia, co cuña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese. ¹⁸ Juan aipo ehi Herodes upe: “Ndiyai eté nde ererecora nde rivri rembireco” ehi.

¹⁹ Herodías evocoyase oyuca pota Juan yamotarēhisave; ndoicatui rumo yuca. ²⁰ Esepia, Herodes osiquiyeño ichui oicuase co mbia reco tupri aisa iyavei seco maranehise. Sese osepí ité; yepe ndoyembohe catui osenduse iñehe viña, ahe rumo osendu pota raiño ité. ²¹ Coiye rumo osupiti ari Herodías remimbotar apo ãgua, ahese Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei. ²² Herodías membrí cuñatai oi que carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoyase amondora ndeu —ehi.

²³ Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboya-hora ndeu” ehi. ²⁴ Ahe cuñatai osē oso, osi upe oporandu:

—¿Mbahe rese pīha aporandura chupe? —ehi.

Ichí aipo ehi chupe:

—Eporandu Juan Oporoãpiramo vahe ãca rese —ehi chupe.

²⁵ Ipare cuñatai oña, oi que oso mborerecuar guapisave, aipo ehi chupe:

—Che aipota co pipeve voi eremboura Juan Oporoãpiramo vahe ãca poratu pipe cheu —ehi.

²⁶ Mborerecuar rumo ndoyembovihai tēi. Esepia, ava ichohopri rovaque ité yipindar oñehe. Sese ndoicatui, “Aní” ohe ãgua. ²⁷ Evocoyase ipare voi mborerecuar oyocuai sundao Juan ãca reru ãgua. ²⁸ Sundao oso soquendasave, oyasía Juan ãca, seru poratu pipe. Mborerecuar omondo co cuñatai upe, evocoyase cuñatai omondo osi upe.

²⁹ Oyanduse Juan remimbohe, yuviraso setecuer reca. Ipare viraso yuvireco tuvipave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús piri yuvireco. Ipare omombehu mbahe güembiapogüer, oporombohe agüer avei yuvireco chupe. ³¹ Ahese aipo ehi oapóstol upe:

—Perio cohave, yaso, yapituhumi rane co coti —ehi.

Esepia, oyepindecuaño ité ava yugüeru chupe, sese ndiyai icaru ãgua yuvireco. ³² Evocoyase ahe güeraño apóstol reseve

yuviraso carite pipe co coti ava sui. ³³ Setá rumo ava osepia ichose. Ichui opacatu ava tecua rupindar osaquicue moñño; ahe ranengatu oyepotapa yuvireco ichui. ³⁴ Ogüeyise rumo carite pipe sui, osepia ava rehi, ahese iparaisu ava eta chupe, inungar ovesa ndovirecoi vahe guãrosar. Ipare ombohe opacatu mbahe rese. ³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe. ³⁶ ¿Ndiyai vo eremondopa ava tecua-tecuami cõi vahesa rupi? Aheve tovirocua ocaru ãgua yuvireco —ehi yuvireco chupe.

³⁷ Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pîha oreu dosciento denario pan repirã ava mbocaru ãgua? —ehi.

³⁸ Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoyase omboyaho-yaho ava imboguapi capihi hari rupi. ⁴⁰ Cincuenta, cien rupi-rupi oyemboyaho yuvireco.

⁴¹ Ichui Jesús oipisi poyandepo pan, ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehi upe imondo ãgua yuvireco. Pira ñuvirío vahe avei omboyaho-yaho opacatu ava upe. ⁴² Evocoyase opacatu ava ocaru vahe ihitaropa tõi yuvireco. ⁴³ Ipare semimbohe omboapipopa doce tupri iruova pan iyavei pira rumbirer yuvireco. ⁴⁴ Cuimbahe ocaru vahe retacuer cinco mil tupri.

Jesús oguata i hari rupi

⁴⁵ Ipare Jesús, “Peha pe rane carite pipe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe. ⁴⁶ “Aviye” ohe pare ava upe, oyeupi oso ivitri rese oyerogui ãgua. ⁴⁷ Pîtuse carite ipa mbiterve ité secoi. Jesús rumo ahe ae opitaño ivive. ⁴⁸ Ahese omahe güemimbohe rese iyeapicui catuêhise. Esepia, ivitu ipirata vahe osovaichi yuvireco. Cõhe potase, oguata i hari rupi güemimbohe coti oso. Aviye ité acoi oñocuaño vaherã oso. ⁴⁹ Sepiase rumo ‘hãgüer tõi revo’ oya, sãse pucu-pucu i hari rupi iguatase semimbohe yuvireco. ⁵⁰ Esepia, opacatu osepiase osiquiye yuvireco ichui. Ahe rumo aipo ehi:

—¡Peyemoviracuaño, che tõi! ¡Pesiquire eme che sui! —ehi güemimbohe upe.

⁵¹ Ahe ohasé carite pipe, opituhu voi ivitu. Evocoyase, “¡Mara ehi rutei!” ehi tēi yuvireco. ⁵² Esepia, ndoicua vitei eté pan apo ati agüer yuvireco, yavai vite seroya ñgua yuvireco chupe.

Jesús ombogüera ava imbaheasi vahe Genesaret pendar

⁵³ Osasase ipa, oyepota Genesaret ivi rese yuviraso, ahe imbehive oñapichiño carite yuvireco. ⁵⁴ Yuvinozepa ramomiseve, ava oicua voi Jesús yuvireco. ⁵⁵ Ichui opacatu ahe ivi pipendar güeru imbaheasi vahe Jesús upe yuvireco. ⁵⁶ Oyepotase que tecuamive, anise tecua guasuve, caha pipe oi-oimi rupi, ahe supi imbaheasi vahe ocar rupi vinozepa voi yuvireco. “Topocomi tēi nde turucuar popi rese” ehi yuvireco chupe. Evocoyase opacatu sese opoco vahe, ocuerapa voi eté yuvireco.

7

Mbahe omonguiha vahe ava recocuer

¹ Evocoyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco. ² Ahese ahe osepia Jesús remimbohe ocaru ñgua iye-poiēhise porocuita mboaviyeēhise yuvireco, sese oñemoiro yuvireco chupe. ³ (Esepia, fariseo iyavei opacatu judío eta aracahendar recocuer sui ndipoisai eté yuvireco, sese oye-poiēhise ndocarui eté yuvireco yepi. ⁴ Mbahe rerocuasa sui oyevisé, ndocarui oyepoiēhi viteséve yuvireco. Iyavei tecocuer aracahendar tēi oyapo vite yuvireco inungar ñgua riru piisa, mbahe riru guarepochi apopri iyavei vupa moatiro tuprisa.) ⁵ Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi aracahendar recocuer ndoviroya iri yuvireco? Esepia ru, ahe ocaruño opoquiha reseve yuvireco —ehi.

⁶ Jesús rumo aipo ehi chupe:

—Pe Tūpa reroyasar angahu tēi peico vahe, supi tupri ité Tūpa ñehe mombehusar Isaías rembicuachía aracahendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

⁷ Oyerure tupri tēi yuvireco cheu.

Esepia, iporombohesa ava porocuita tēi’ ehi.

⁸ Ëgüe peye pepoipa Tūpa porocuita sui ava recocuer aracahendar rupi tēi pe guata ñgua —ehi.

⁹ Iyavei aipo ehi iri chupe:

—Pe ramoi recocuer aracahendar pipe tēi peseyaño co coti Tūpa porocuita. ¹⁰ Esepia, Moisés aipo ehi: ‘Pemboyeroyara

iyavei peipitivira pe ru, pe si avei no. Acoi iñehe mara vahe oyesupa upe ahe, Tomanofño, ehi' ehi aracahe. ¹¹ Pe rumo aipo peye tēi: 'Acoi ava aipo ehi vahe vu upe, osi upe avei no: Ndiyai chira mbahe mondo ãgua pēu. Esepia, che opacatu mbahe areco vahe Tūpa upe imondopri, ahe Corbán, ehi' peye; ¹² pe evocoyase, aipo ehi vahe upe, 'Ndiyai eté oyesupa pitivii ãgua' peye. ¹³ Co nungar apo pipe Tūpa porocuaita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.

¹⁴ Ipare, "Perio" ehi iri ava rehi upe.

—Peyapisaca, pesenducua tupri che ñehe: ¹⁵ Ndahei ocar sui tēi ou ava recocuer monguiha ãgua. Ahe rumo osē ipiha sui. ¹⁶ Acoi osendu pota vahe che ñehe, toyapisacaño sese —ehi.

¹⁷ Ipare oseyapase ava, oique oi pipe. Aheve semimbohe eta oporandu yuvireco co porombohesa omombehu vahe rese chupe. ¹⁸ Ahe evocoyase aipo ehi güemimbohe upe:

—Evocoyase pe avei no, ¿ndapesenducuai? ¿Ndapeicuai vo acoi ocar sui oique vahe ava aviterve nomboangaipai eté? ¹⁹ Esepia niha, ndahei ipihave oso, ahe rumo oso yaviterve. Ipare osē ichui —ehi 'opacatu tembihu aviyeño ité' oyapave aipo ehi.

²⁰ Ipare aipo ehi:

—Ava piha sui osē vahe rumo mbahe, ahe omonguiha ava recocuer. ²¹ Esepia, ava pihañemoñetasa sui osē pihañemoñeta raisa, yemboaguasasa, mondasa, porapichisa, ²² mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasa nihivi vahe. ²³ Co mbahe opacatu naporai vahe yuvinose ava sui imboangaipa uca ãgua —ehi.

Cuña ndahei vahe judía viroya Jesús

²⁴ Ichui Jesús osē oso tecua Tiro coti. Aheve oique oi pipe, ndoyecua uca potai ava upe viña; ndoicatu rumo ava sui ofñemi. ²⁵ Oime cuña vireco vahe omembri cuñatai, ahe vireco carugar oyese; ahe cuña oicuase Jesús recosa, oso voi sovai ofñenopiha. ²⁶ Ahe rumo ndahei judía, sirofenicia iguar ité. Ahe aipo ehi Jesús upe: "Enose che membri sui carugar" ehi. ²⁷ Jesús rumo aipo ehi chupe:

—Tahir judío rane toipisi mbahe yuvireco. Esepia, naporai yarocua pan tahir sui cave tohu imondo ãgua —ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahir mesavri pendar —ehi.

²⁹ Aipo ihese, aipo ehi:

—Aviye ité nde ñehe. Eyevi eso. Carugar osẽ nde membri sui —ehi chupe.

³⁰ Co cuña oyepotase güëtave, osepia omembri supave; yipive rumo osẽ carugar ichui.

Jesús ombogüera mbia ndayapisai, iñehe ipiti-piti vahe

³¹ Jesús oyevi oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve. ³² Aheve mbia ndayapisai, iñehe ipiti-piti vahe rerasosar: “Emondomi tẽi nde po iharive” ehi yuvireco chupe. ³³ Ichui Jesús viraso coi cotimi ava sui. Aheve ocuã omonde yapisa pipe. Ipare omondo güendi ñapecu rese. ³⁴ Ipare omahe iva rese, ipituhe pucu aipo ehi: “¡Efata!” ehi (“timboisa” ohesave aipo ehi).

³⁵ Ahe pipeve voi yapisa tupri, oñehe tupri avei. ³⁶ “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco. ³⁷ Evocoyase ava oyembovaha guasusave, aipo ehi yuvireco: “Aviye ité rumo mbahe sembiapo. ¡Esepia, ndayapisai vahe omboapisa, iñehe ipiti-piti vahe avei omoñhengatu tupri!” ehi yuvireco.

8

Jesús oyopoi cuatro mil cuimbahe

¹ Ñepai ari pipe setá ava oyemboya iri Jesús rese yuvireco. Ndipoi rumo mbahe icaru água. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esepia, mbosapi ari yuvirecoi yande piri, iyavei ndipoi eté mbahe semihura. ³ Amondopase sètave sieporẽhi reseve, viroviapi-api tiẽtera tieporẽhi peri rupi yuvireco viña. Esepia, setami ava yugüeru amombri sui —ehi.

⁴ Semibohe aipo ehi yuvireco chupe:

—¿Mara yahera vo ava tohu mbahe mondo cohava ava porẽhisave? —ehi.

⁵ Ahe oporandu:

—¿Mbovi vo pan pereco? —ehi.

—Orovireco siete pan —ehi semimbohe yuvireco chupe.

⁶ Evocoyase, “Peguapi ivi harive” ehi ava rehii upe. Ahese oipisi siete pan, “Aviye ndeu” ehi Tũpa upe. Ichui omboyahoyaho pan imondo güemimbohe upe, semimbohe evocoyase omondo ava rehii upe yuvireco. ⁷ Iyavei vireco moviro pirami yuvireco, sese avei, “Aviye ndeu” ehi iri Tũpa upe. Ichui güemimbohe upe, “Pemboyahoyaho ava upe” ehi. ⁸ Opacatu ité ava ocaru vahe ihitaro yuvireco. Ipare rumo semimbohe omboapipo iri rane sumbirer siete iruova yuvireco. ⁹ Ava

rehi ocaru vahe retacuer cuatro mil tupri. Ipare Jesús, “Aviye, peso tupri” ehi ava upe. ¹⁰ Ipare voi eté yuviraso güemimbohe eta reseve carite pipe Dalmanuta ivi rese.

Fariseo eta oporandu poromondiisa rese yuvireco

¹¹ Ipare fariseo eta oyepota Jesús ñehe poepi-epi ägua yuvireco. Jesús recoäha ägua, oporandu iva pendar poromondiisa rese ‘¿Tüpa sui eté pñha ou?’ oya yuvireco chupe. ¹² Sese Jesús ipñtuhe pucu, aipo ehi:

—¿Mahera vo co ava oipota iva pendar poromondiisa che recocuer cua ägua yuvireco! Namboyecuai chietera rumo que ñepe evocoi nungar mbahe pñu —ehi.

¹³ Ipare oseyapaño ava. Ichui yuviroha iri carite pipe, osasapa ipa yuviraso sovai.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeimi tñi pan viraso güemihura yuvireco. ¹⁵ Evocoyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: “Pan ndayaruisse revo aipo ehi yandeu” ehi-ehi tñi oyeupe yuvireco.

¹⁷ Ahe rumo oicua güemimbohe pñhañemoñetasa, aipo ehi:

—¿Mahera, “Pan ndayarui” peye? ¿Ndapeicua vitei vo che rembiapo? ¿Yavai vite tie seroya ägua pñu? ¹⁸ Oime tñi pe resa, ndapesepiai rumo; oime tñi pe nambi, ndapesendui rumo mbahe. ¿Ndapeyemomahenduha iri vo ¹⁹ acoi amboyaho-yahose cinco pan sui ava cinco mil vahe tohu? ¿Mbovi iruova vo acoi sumbirer pemonuha iri? —ehi.

—Doce iruova —ehi yuvireco chupe.

²⁰ —Iyavei acoi amboyaho-yahose siete pan sui ava cuatro mil vahe tohu, ¿mbovi iruova vo acoi pemonuha sumbirer no? —ehi.

—Siete iruova —ehi yuvireco chupe.

²¹ Ipare aipo ehi:

—¿Ndapesenducua vitei vo? —ehi güemimbohe upe.

Jesús ombogüera ava ndasesapiso vahe tecua Betsaida ve

²² Oyepotase Jesús tecua Betsaida ve, ahe ramoseve voi ogüeru ndasesapiso vahe yuvireco chupe ‘epocomi tñi sese’ oya yuvireco. ²³ Evocoyase oipopisi ndasesapiso vahe seraso co cotimi tecua sui. Aheve omondo güendi sesa rese, omondo avei opo iharive. Ipare oporandu chupe: “¿Eresepia vo mbahe?” ehi. ²⁴ Ndasesapiso vahe omahese, aipo ehi:

—Asepia ava inungar ivira oguata vahe yuvireco —ehi.

²⁵ Evocoyase omondo iri opo sesa rese. Ipare co mbaia omahe tupri ité cute, ocuera ité, opacatu mbahe osepia tupri.

²⁶ Ichui Jesús omondo sētave aipo ehi chupe:

—Ereyevi iri eme tecuave —ehi.

Pedro oicua uca Jesús Tūpa Rembiporavo seco rese

²⁷ Ipare yuviraso Jesús güemimbohe reseve ivi Galilea sui tecua Cesarea coti, Filipino ivi rese. Peri rupi oporandu güemimbohe upe:

—¿Mara ehi vo ava oñehe yuvireco che rese? —ehi.

²⁸ Semimbohe evocoyase omboyevi yuvireco chupe:

—Amove ava, “Juan Oporoãpiramo vahe” ehi yuvireco ndeu; ambuae evocoyase, “Elías” ehi; ambuae, “Tūpa ñehe mombehúsar mboetasa” ehi yuvireco ndeu —ehi.

²⁹ Evocoyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoyase aipo ehi chupe:

—Nde niha Tūpa Rembiporavo Poropĩsĩrosar ereico —ehi.

³⁰ Jesús rumo, “Pemombehui rene que ñepepe ava upe” ehi.

Jesús omombehu omano ãgua

³¹ Evocoyase Jesús omboipi oporombohe: “Che, Ava Riquehir, che paraisu itera, iyavei opacatu judío rerecuareta, pahĩ rerecuar ivate catu vahe iyavei Moisés porocuita rese oporombohe vahe remiamotarēhi aicora. Ahe avei che yuca ucara yuvireco. Acuerayevira rumo mbosapi ari rupi” ehi.

³² Ahe omboyecua tupri ité chupe. Evocoyase Pedro viraso co cotimi chupe oñhengata ãgua. ³³ Oyemboyere rumo, omahe güemimbohe eta rese, oñhengata Pedro upe aipo ehi:

—¡Esiri che sui, Carugar! Esepia, nde nandepihañemoñetai mbahe Tūpa upendar rese; ava nungar tēi nde pihañemoñeta eico —ehi.

³⁴ Evocoyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosira viña, toyemoingatu voi che recocuer rese oparaisu ãgua iyavei toguata tupri che rupi. ³⁵ Esepia, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisirosa sui avei, ahe oñepisirora. ³⁶ ¿Aviye ai angahu pĩha ava upe opacatu mbahe ivi pipendar pisi ãgua tēi, ahe ae tēi omocañi güecocuer yuvireco viña? ³⁷ ¿Mbovi pĩha omondora ava güecocuer repirã viña? ³⁸ Esepia, acoi ava yuvinochi ai vahe che sui iyavei che ñehengagüer sui ava angaipa viyar ndaseco tuprii vahe rovai, che avei, Ava Riquehir, egüe ahera acoi

ayevise che Ru reco pĩrata porañetesa pĩpe, sembiguai rehi iva pendar maranehi reseve curi —ehi.

9

¹ Ipare Jesús aipo ehi iri:

—Supi eté, oimera amove cohava ava nomano vıteı chiva-herã, osepia rane itera ouse Tũpa mborerecuasa ipĩratasa pĩpe yuvireco curi —ehi.

Jesús ñecuñaro agüer

² Seis arı pare, Jesús vıraso Pedro, Santiago, Juan reseve ivıtri ivate vahesave oyeupi. Aheve avıyeteramo tẽi oñecuñaro güemimbohe rovai. ³ Iturucuar sendı, morochı eteanga. Ndipoi eté que ava co nungar co ivı pĩpe turucuar oyosei vahe. ⁴ Iyaveı avıyeteramo tẽi oyemboyecua Elías, Moisés reseve Jesús rese oñemoñeta yuvinoha. ⁵ Ipare Pedro aipo ehi chupe:

—Ore mbohesar, javıye ai eté cohava yaico! Toroyapo mbosapı teyupami: ñepeı ndeu nara, ambuae Moisés upe, ambuae evocoiyase Elías upe nara —ehi.

⁶ Osıquıye tẽi semimbohe yuvireco. Sese Pedro ndoicuaıse oñehe ãgua, aipo ehiño tẽi. ⁷ Ahe ramoseve aveı ogüeyı iva quiha iharıve, oyopıpa tuprı yuvireco. Ahe ipãhuve oy-eendu ñehesa aipo ehi vahe: “Co che Rahır, che rembiaısu; peyapısaca catu iñehe rese” ehi vahe. ⁸ Ahe ramoseve aveı omahese oıvıı yuvireco, ndosepıai eté que ambuae ava, Jesús güeraño tuprı ité osepia opãhuve yuvireco.

⁹ Ipare ogüeyı ivıtri sui yuvireco, aipo ehi güemimbohe upe ou: “Ndapemombehui chıetera que ñepeı ava upe co mbahe pesepıa vahe, pemombehura rumo acoı che, Ava Rıquehır, acuerayevıse voi” ehi. ¹⁰ Oyeupeñomi tẽi vıreco aipo ñehesa yuvireco, ahe rumo oporandu-randu oyeupe: “¿Mara oya pıha aipo, ‘Acuerayevıra’ ehıse?” ehi tẽi yuvireco. ¹¹ Evocoiyase semimbohe oporandu chupe:

—¿Mahera ru Moisés porocuaıta rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹² Evocoiyase aipo ehi chupe:

—Elías rane ité niha oura opacatu mbahe moıngatu ãgua. ¿Mahera aracahendar icuachiaprı pĩpe aipo ehi: “Ava Rıquehır oıporarara mbahe, yamotarẽhimbrı aveı secoıra” ehi? ¹³ Che niha aipo ahe pẽu: Elías rumo ou ité, ava evocoiyase opacatu güemimbotar tẽi oyapo yuvireco sese. Ëgüe ehi opacatu yavıye aracahendar icuachiapırer sese —ehi.

Jesús ombogüera chĩhıvahe caruguar rerecosar

¹⁴ Ipare oyevi yuvireco güemimbohe recosave. Aheve osepia ava rehi oyere guasuse yuvireco sese, iyavei oime aheve Moisés porocuaita rese oporombohe vahe oiñehopepi-epi semimbohe yuvireco. ¹⁵ Ichui Jesús repiase, opacatu yuvinoña yuviraso chupe “avirave” apo. ¹⁶ Evocoyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepei ipãhu pendar omboyeve chupe:

—Porombohesar, co aru che rahir ndeu, vireco vahe carugar oyese, nomoñehengatu ucai vahe yepi. ¹⁸ Iyavei que iguatasu rupi co carugar aviyeteramo tēi opocose sese, oiti voi ivive iyavei sendiriyuiyusu, sāitere-tere avei; sese cūrtei nipirata iri eté. “Penosemi carugar ichui” ahe tēi nde remimbohe eta upe. Ahe rumo ndoicatu eté yuvireco —ehi.

¹⁹ Jesús omboyeve chupe:

—¡Too, ndapeyeroya tupri vitei eté che rese! ¿Mbovi rupi rutei vo aico vitera pe pãhuve che ñemosasa pipe? Peru evocoi chihivahe cheu —ehi.

²⁰ Evocoyase ogüeru yuvireco chupe. Osepia carugar Jesús, oiti uca iri chihivahe ivive. Omboapayere-yere iyavei sendiriyui guasu-guasú. ²¹ Sese oporandu tu upe:

—¿Mbahese vo na ehi chupe? —ehi.

Tu evocoyase aipo ehi:

—Ichihivahemi suive ité. ²² Amove co carugar oiti uca tatave, ive avei yuca pota uca água yepi. Sese ereicatusé, ore p̃itiviiñomi tēi catu eve ore paraisuerecosave —ehi.

²³ Jesús aipo ehi chupe:

—¡Mahera, “Ereicatusé” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¡Oroviroya niha, che p̃itivii ru eve nde reroya catu ãgual —ehi p̃irata chupe.

²⁵ Osepia Jesús ava rehi, oyemboyase sese, oñehe p̃irata carugar upe aipo ehi:

—Carugar noñehi vahe, ndayapisai vahe, che orocuai, epoi co chihivahe sui, ereique iri eme secocuer rese —ehi.

²⁶ Carugar sãse pucu chihivahe yuca tupri oso. “Omano ité co chihivahe” ehi ambuae ava yuvireco. ²⁷ Jesús rumo oipopisi imopuha; evocoyase chihivahe opũha tupri voi eté.

²⁸ Ichui oique oi pipe. Aheve semimbohe ahe aemi oporandu yuvireco chupe:

—¿Mahera p̃iha ndoromose catu eté carugar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar caruguar yaicatu imombo —ehi.

Jesús omombehu iri omano ãgua

³⁰ Ichui yuvínosepase, yuvíraso ivi Galilea rupi. Jesús rumo ndoyemboyecua uca potai eté que ambuae ava upe. ³¹ Esepia, güemimbohe güeraño ité ombohe aipo ehi:

—Che, Ava Riquehir, imondopri aicora che amotarẽhimbar povrive, che yuca aveira yuvireco, mbosapi ari rupi rumo acuerayevira —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu ãgua yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuviroiquese oi pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

³⁴ Ahe rumo noñehi tupri yuvireco chupe. Esepia, peri rupi, “¿Ava pĩha ivate catu vahe?” ehi asi-asi oyeupe yuvireco.

³⁵ Evocoyase oguapisave, “Periopa” ehi güemimbohe upe, aipo ehi avei:

—Oimese pe pãhu pendar oyemboivate ai vahe, ahe rumo seco ivi coti catura opacatu sui ava eta pĩtivi ãgua —ehi.

³⁶ Ipare oipisi chĩhivahe güemimbohe pãhuve senoha aipo ehi:

³⁷ —Acoi ava oipisi vahe co chĩhivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

Acoi ndahei vahe yande amotarẽhimbar, ahe yande mboyoyasar secoi

³⁸ Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe caruguar. Ahe rumo ndoguatai cũritei ore rupi; ore ité ndoroipotai chupe —ehi.

³⁹ Jesús rumo,

—Aní egüe peye —ehi—. Esepia, ndipoi eté que ambuae oyapo vahe poromondiisa che rer pipe, oicatu vaherã oñehi rai che rese. ⁴⁰ Sese ndayande amotarẽhi vahe, ahe yande mboyoyasar secoi. ⁴¹ Acoi que omondo vahe i vaso pipe che rupi pe recosa pipe pẽu, evocoi nungar oipisi itera porerecosa oyeupe nara —ehi.

Yaicua catura mbahe tẽi apoẽhi ãgua

⁴² “Acoi que ava omboangaipa uca vahe co chĩhivahemi nungar che reroyasar, iyacatu evocoi nungar ñapichisa ita mbahe mbocuhisa iyesiho rese para guasu pipe imombo ãgua. ⁴³ Sese pe po pe mboangaipa uca vahe peyasia ité peyesui. Esepia,

aviye catu peiquera tecove apirēhisave ñepeí pe po rese, peso rāgüer sui que ñuvirío pe po rese tata guasu apirēhisave. ⁴⁴ Aheve acoi uru nomanoi vahe, tata ndogüei vahe avei. ⁴⁵ Pe pí pe mboangaipa ucase, peyasia avei peyesui. Esepia, aviye catu ndape pindugüei peique tecovesave, que ñuvirío pe pí rese peique rāgüer sui tata guasu ndopai vahesave. ⁴⁶ Aheve acoi uru nomanoi vahe, tata ndogüei vahe avei. ⁴⁷ Pe resa avei pe mboangaipa ucase, penose ité peyesui. Esepia, aviye catu peique ñepeí pe resa rese Tūpa mborerecuasave que ñuvirío pe resa rese tata guasu apirēhisave pe reique rāgüer sui. ⁴⁸ Aheve acoi uru nomanoi vahe, tata ndogüei vahe avei.

⁴⁹ “Esepia, opacatu ava imoehesara tata nungar pípe. ⁵⁰ Sese yucrí aviye aí eté. Nasehe irise rumo, ndayaicatui chira imoehe iri āgua. Peico catu yucrí nungar mbahe tuprí pípe peyeupe nara” ehi.

10

Jesús oporombohe mendasa sui poiēhi āgua

¹ Ipare Jesús osē tecua Capernaum sui, oso Judea ivi rupi iai Jordán rovai ari sēsa coti. Aheve ava rehi oñemonuha iri yuvireco sese. Iyavei ombohe iri ava güecocuer rupi tuprí. ² Evocoyase fariseo oyemboya seco rāha āgua tēi yuvireco sese, “¿Aviye pīha cuimbahe omenda vahe opoi güembireco sui?” ehi yuvireco chupe. ³ Ahe rumo omboyeví chupe:

—¿Mara ehi vo acoi Moisés porocuita pípe? —ehi.

⁴ Ahe evocoyase omboyeví yuvireco chupe:

—Moisés remimombehu aipo ehi: “Pemondora pe rembireco upe cuachiar poisa resendar pe poi āgua pe rembireco sui” ehi —ehi fariseo yuvireco chupe.

⁵ Evocoyase fariseo upe aipo ehi:

—Moisés omondo co porocuita pe poreroyaēhisa pípe sui pēu. ⁶ Yipisuive ité niha, “Tūpa oyapo opacatu mbahe, oyapo avei cuimbahe, cuña reseve. ⁷ Sese niha cuimbahe omendase, oyepépíra oyesupa sui güembireco rese ité yuvirecoi āgua. ⁸ Evocoyase ñuvirío yuvirecoira ñepeí ava nungar.” Sese ndahe iri ñuvirío, ñepeí nungar ité yuvirecoira. ⁹ Evocoyase ava Tūpa omomenda vahe oyese, ndiyai ava tēi omboyepépi yuvireco oyesui —ehi.

¹⁰ Oíve yuvirecoi vitesé, semimbohe oporandu iri co mbahe rese yuvireco chupe. ¹¹ Evocoyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tēi vahe güembireco sui. ¹² Acoi cuña opoise omer sui omendase ambuae cuimbahe rese, ahe oyemboaguasa tēi vahe avei —ehi güemimbohe upe.

Jesús osovasa ch̄hivahe

¹³ Ip̄are oḡüeru ch̄hivahe Jesús upe yuv̄ireco sese ipoco ãgua. Semimbohe rumo, “¿Mahera vo peruño t̄ei ch̄hivahe?” ehi op̄iha v̄iracuasa pipe serusar upe yuv̄ireco. ¹⁴ Evocoyase Jesús osepiase, ndasorii güemimbohe upe aipo ehi:

—¡Mahera ndapeipotai iyu ãgua! Toyuḡüeruño ch̄hivahe cheu. Esepia, co ch̄hivahe nungar ava yuv̄iroiquera che Ru T̄üpa mborerecuasave. ¹⁵ Supi eté, acoi ndoip̄isi vahe che Ru T̄üpa mborerecuasa ch̄hivahe nungar yuv̄ireco, ahe evocoyase ndoyuv̄iroiquei chietera ipipe —ehi.

¹⁶ Evocoyase oip̄isi, omondo opo ihar̄ive osovasa.

Ñep̄ei mb̄ia ch̄hivahe imbahe eta vahe oñhe Jesús upe

¹⁷ Oguata v̄itese Jesús yuv̄ireco, aheseve mb̄ia ch̄hivahe oña oso sovai, oñenop̄iha, oporandu chupe:

—Porombohesar av̄iye vahe, ¿mbahe vo ayapora tecovesa ap̄ir̄ehi vahe rereco ãgua? —ehi.

¹⁸ Jesús evocoyase aipo ehi ahe mb̄ia upe:

—¿Mahera vo, “Av̄iye vahe” ere cheu? Oime rumo ñep̄ei av̄iye vahe ité, ahe T̄üpa secoi. ¹⁹ Ereicua niha T̄üpa porocuaita: ‘Ndereporoyucaí chira, nandeaguasai chira, nandemondai chira, nanderemirai chira ambuae ava rese, ndereporombopai chira, eremboyeroyara nde ru, nde si avei’ ehi vahe —ehi.

²⁰ Ahe mb̄ia rumo,

—Porombohesar, che aipo nungar opacatu amboav̄iye ité che ch̄hivahe suive —ehi.

²¹ Evocoyase omahe saisusave sese, aipo ehi chupe:

—Ñep̄ei mbahe rumo ipane v̄ite ndeu: eso, emondopa rane nde mbahe; ahe sepr̄i evocoyase emondo ava iparaisu vahe upe. Ichui ererectora mbahe av̄iye vahe ivave. Ip̄are ereguatara che rupi —ehi chupe.

²² Aipo oyeupe hese rumo, ahe mb̄ia oyep̄ep̄iño ichui ov̄ihar̄ehisave oso. Esepia, ahe mbahe yar ité secoi.

²³ Evocoyase omahe oiv̄iindar güemimbohe rese, aipo ehi:

—¡Yavai eté rumo ava mbahe yar reique ãgua che Ru T̄üpa mborerecuasave! —ehi.

²⁴ Semimbohe evocoyase, “¡Mara ehi rutei!” ehi t̄ei iñhehe renduse yuv̄ireco. Ahe rumo omombehu iri:

—Che rahireta, ¡yavai eté T̄üpa mborerecuasave imbahe eta vahe reique ãgua ombahe eta rese t̄ei ip̄ihañemoñeta vahe upe! ²⁵ Yavai rai camello upe yucuar rupi seique ãgua, ava imbahe eta vahe upe rumo yavai catu che Ru mborerecuasave seique ãgua —ehi.

²⁶ Aipo nungar renduse oyepihamondii guasu yuvireco. Oporandu-randu tēi oyeupe yuvireco: “¿Ava angahu piha oñepisiora yuvireco viña?” ehi.

²⁷ Evocoiyase omahe güemimbohe rese aipo ehi:

—Ava tēi upe rumo yavai aipo nungar mbahe apo ãgua; Tūpa upe rumo ndayavaimi eté. Esepia, Tūpa opacatu mbahe mboavaisarēhi secoi —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata ãgua —ehi chupe.

²⁹ Omboyevi rumo Pedro upe:

—Supi eté co aipo ahe pēu: acoi che raisusa pipe iyavei ñehesa ñepisirosa raisusa pipe oseyapa vahe güeta, viquehir, vivri, güeindri, vu, osi, guahir iyavei oivi, ³⁰ ahe oipisira omahera co ivi pipe cien yupagüer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi. ³¹ Setá vai rumo cūrtei yipindar vahe; ipa tēira yuvirecoi. Setá aveira cūrtei ipa tēi vahe, yipindar yuvirecoira curi —ehi.

Jesús omombehu imombosapisa rupi omano ãgua

³² Yuvirasose Jerusalén ve, Jesús tenonde secoi güemimbohe upe. Semimbohe rumo ndoyembovihal iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime ãgua chupe aipo ehi: ³³ “Peicua niha, yasora tecua Jerusalén ve, aheve rumo che, Ava Riquehir, che pisira che mondo pahi eta rereciar iyavei Moisés porocuita rese oporombohe vahe povrive yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco. ³⁴ Mara ehi-ehi tēira yuvireco cheu, ondivi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuerayevira” ehi güemimbohe upe.

Mbahe aviye vahe rese oporandu Santiago, Juan reseve yuvireco

³⁵ Ipare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe aviye vahe oreu —ehi.

³⁶ Ahe evocoiyase,

—¿Mbahe vo peipota ayapo vahe rã pēu? —ehi chupe.

³⁷ —Ore oroipota nde mborecua porañetesave ore mboguapira ndeyepiri eve, ñepi nde mbahe rese pocosa

coti, ambuae nde mbahe rese pocoẽhisa coti —ehi yuvireco chupe.

³⁸ Evocoiyase omboyevi:

—Pe ndapeicuai mbahe rese pe porandu. ¿Peiporara catura pĩha che co mbahe-mbahe tẽi aiporara vaheřã, inungar-ra que igua iro vahe aihu vaheřã viña? Iyavei, ¿peicatura pĩha che ãpiramosa aipisi vaheřã pisi? —ehi.

³⁹ —Taa, oroicatuño itera —ehi yuvireco.

Evocoiyase ahe aipo ehi chupe:

—Supi eté peihura co mbahe iro vahe, peipisi aveira ãpiramosa che aipisi vaheřã nungar. ⁴⁰ Co rumo ndiyai cheu che piri pe guapi ãgua, che mbahe rese pocosa coti, ambuae che mbahe rese pocoẽhisa coti. Che Ru Tũpa omoingatu güembiporavo upe nara oguapi vaheřã che ipive —ehi.

⁴¹ Evocoiyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco. ⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tũpa cuaparẽhi oporocuai oporoyuca ai tẽisa pipe. Iyavei acoi ivate catu vahe oyeecoapirasá iteanga omborerecuasa pipe yepi.

⁴³ Pe rumo ãgüe ndapeyei chira pe yeereco. Iyacatu rumo acoi ava oipota vahe ivate catu güeco ãgua pe pãhuve, ihañeco rane itera opacatu ambuae ava rese. ⁴⁴ Iyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese. ⁴⁵ Aherã niha che, Ava Riquehĩr, ayu ndahei ava che rese ihañeco ãgua; che rumo ayu ava rese che hañeco ãgua, iyavei amondo vaheřã che recocuer manosave ava eta repirã Carugar povri sui senose ãgua —ehi.

Jesús ombogüera Bartimeo sesapisoẽhisa sui

⁴⁶ Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehi avei, aheve peri popive mbia ndasesapisoĩ vahe Bartimeo serer vahe, Timoteo rahĩr, oguapi oĩ. ⁴⁷ Osenduse, “Jesús Nazaret pendar” hesa, osapucaĩ pĩrata:

—¡Jesús, David suindar, che paraisuerecomi tẽi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo,

—¡David suindar, che paraisuerecomi tẽi eve! —ehi pĩrataño ité chupe.

⁴⁹ Evocoiyase osenduse iñehe, opĩta,

—Peñehe chupe —ehi.

Ichui oñehe yuvireco chupe:

—Eyemonguerẽhi, epũha. Esepia, oñehe aipo ndeu —ehi.

⁵⁰ Aipo oyeupe he ramosëve, omomboño oturucuar guasu, opũha yesapiha oso chupe. ⁵¹ Evocoyase oporandu ndasapisoi vahe upe:

—¿Mbahe vo ereipota ayapo vaherã ndeu? —ehi.

Ahe evocoyase,

—Porombohesar, che mbosarecomi tẽira eve viña —ehi.

⁵² Evocoyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramosëve ndasapisoi vahe osareco tupri ité. Ipare osoño ité Jesús raquicuei peri rupi.

11

Jesús oique Jerusalén pipe

¹ Ovirovise tecua Jerusalén yuviraso, serovicave oime ñuvirío tecuami: Betfagé, Betania avei ivitri Olivo ñipiimi. Aheve Jesús omondo ñuvirío güemimbohe, ² aipo ehi chupe:

—Peso evocoi tecuami yande rovaingarve. Peyepotase aheve, pesepiara guaricu ñapichimbri imoha, ava ndoyeupi vitei vahe yuvireco sese, ahe peyorañora seru. ³ Acoi que ava: “¿Mahera vo ãgüe peye?” ehise pẽu, “Ore Yar oiporu pota, ipare niha omboyeví voiñora” peyera chupe —ehi.

⁴ Evocoyase ahe yuviraso peri rupi. Aheve guaricu ñapichimbri osepiara imoha yuvireco oquendipive. Ichui oyoraño seru yuvireco.

⁵ Evocoyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohesa rupi tupri ité omboyeví yuvireco chupe. Evocoyase, “Tovirasoño” ehi yuvireco chupe. ⁷ Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive. ⁸ Setá ava oipipira oturucuar peri rupi, ambuae ava evocoyase oyasia pindo omondo peri rupi saperã yuvireco. ⁹ Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pĩrata yuvireco chupe —. ¹⁰ ¡Sovasapri yande ramoi David mborerecuasa tasecoi ou vahe oico! ¡hvave imboeteipri tasecoi! —ehi yuvireco chupe.

¹¹ Ëgüe ehi Jesús oiquese Jerusalén ve. Ipare oique tũparo pipe. Aheve opacatu rupi mbahe osepiara. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

¹² Ahere ayihive, yuvinosese Jesús tecua Betania sui, ndasiepoi oico. ¹³ Osepiase amombri ivira higuera so ati

vahe, oso chupe ‘¿iha pīha?’ oyapave. Ahe rumo osepia so pãve tēi sese. Esepia, ahe ivira upe ndosupiti vitei iha ãgua.

¹⁴ Evocoiyase aipo ehi ahe ivira upe:

—iCo pipe suive ndipo iri chira ava nde ha yuvirohu vaherã!
—ehi.

Semimbohe osendu iñehe yuvireco.

Jesús omombopa ava mbahe mboepisar tũparo pipe sui

¹⁵ Ipare oyepota Jerusalén ve yuvireco. Aheve Jesús oiquese judío tũparo guasu pipe, omboipi ava mbahe mondosar, mbahe rerocuasar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei omboviapi imondo. ¹⁶ Ndoipotai eté que ambuae mbahe seroiquepirã tũparo pipe. ¹⁷ Ipare oporombohe aipo ehi:

—Icuachiapri aracahendar pipe aipo ehi: ‘Co che rēta yeruresa rētarã opacatu ava ivi pipendar uve nara’ ehi. Pe rumo imonda rai vahe rēta nungar tēi pereco —ehi.

¹⁸ Pahi eta rerecuar iyavei oporombohe vahe Moisés porocuaita rese osenduse, “¿Mara yahera pīha sereco yuca uca ãgua?” ehi voi yuvireco chupe. Osiquiye rumo opacatu ava sui. Esepia, ahe ndoyembovihal iporombohesa rese yuvireco. ¹⁹ Pitu ramomise, Jesús yuvinose güemimbohe eta reseve yuvirasos ahe tecua sui.

Ivira higuera ndihai vahe ipiru

²⁰ Ahere ayihive, añihiveive yuvirasose, osepia ivira higuera sapo suive ipirupa vahe yuvireco. ²¹ Evocoiyase Pedro oye-momahenduha voi iñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

²² Jesús evocoiyase,

—Peyeroya Tũpa rese —ehi—. ²³ Supi eté aipo ahe pēu: acoi que ava ivitri upe: ‘Esiri ave sui, eso para guasu pipe’ ehi vahe oyeroya tuprise ité aipo hesa rese, ãgüe ehi etera chupe. ²⁴ Sese aipo ahe pēu: opacatu que mbahe rese peporanduse pe yeroquisa pipe, peyeroya itera mbahe oime vaherã rese pēu, ahese peipisi itera. ²⁵ Acoi peyerouise, yipindar peñero rane que pe amotarēhimbar upe, ahese ãgüe ehi aveira pe Ru iva pendar iñero pe angaipa rese pēu. ²⁶ ãgüe ndapeyeise, pe Ru iva pendar avei niñeroi chira pe angaipa rese pēu —ehi.

Jesús mborerecuasa

²⁷ Ipare oyevi Jerusalén ve yuvireco. Aheve Jesús secoise judío tũparo guasu pipe, pahi eta rerecuar, Moisés porocuaita rese oporombohe vahe, ava rerecuar guasu avei oyemboya yuvireco sese. ²⁸ Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu co nungar apo ãgua? —ehi yuvireco chupe.

29-30 Evocoyase omboyeví chupe:

—Che avei aporandura mbahe rese pëu: ¿Ava vo Juan ombou ava ãpiramo ãgua; Tũpa pĩha, ava tẽi tie? Pemboyevise cheu, ahese che avei amombehura pëu ava porocuita rupi eté pĩha ayapo co mbahe vichico —ehi.

31 Evocoyase oñemoñeta aipo ehi oyeupe yuvireco: “ ‘Tũpa ombou’ yahese chupe viña, ahe evocoyase: ‘¿Mahera ru ndaperoyai?’ ehira yandeu. 32 ‘Ava tẽi remimbou’ ndayahei chiveira chupe” ehi. Ahe osiquiye tẽi ambuae ava sui yuvireco. Esepia, opacatu ité oicua Juan oñehe Tũpa suindar ñehesa rese yepi. 33 Evocoyase omboyeví chupe yuvireco:

—Ndroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pëu —ehi mborerecuar guasu upe.

12

Ava mbahe tẽi oporaviqui vahe recocuer sui yembohesa

1 Evocoyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose ãgua. Oyapo avei oivate vahe opacatu mbahe moha ãgua. Ipare oseya oivi ava oporaviqui vahe upe iporu ãgua. Ichui osẽ, oso amombri vahesa rupi. 2 Oyepotase ari uva pohosa, ahese omondo güembiguai oporaviqui vahe upe imboporandu ‘tomboumi uva pohopri cheundar cheu cute’ oyapave viña. 3 Ahe rumo oipisiño, inupa-nupa imboyeví tupri tẽi yuvireco. 4 Evocoyase ahe ivi yar omondo iri ambuae güembiguai. Ahe oyapicha-pichaño ñaca rupi, iñehe mara-mara tẽiño avei yuvireco chupe. 5 Ipare omondo iri ambuae. Ahe oyucaño yuvireco. Ichui omondo ati iri tẽi. Ahe ipãhu pendar rese yuvirocua-rocuano yuvireco, oyucaño avei ambuae yuvireco.

6 “Iyavei ñepeí opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña. 7 Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pãve topita co ivi’ ehi yuvireco. 8 Ichui oipisi, oyucaño yuvireco. Ipare ovinose sehõgüer ahe miti sui co coti yuvireco.

9 “¿Mbahe vo evocoyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

10 “¿Ndapeyeroqui vo pe co icuachiapri pipe? Aipo ehi niha acoi:

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri água.

11 Ëgüe ehi niha yande Yar yapo.

¡Mara ehi rutei revo!’ ehi icuachiapri pipe” ehi.

12 Evocoyase oviraso pota voi Jesús soquenda água yuvireco. Esepia, ahe osenducua ité oyesendar iprombohesa yuvireco. Ava sui osiquiyepave rumo opoiño yuvireco ichui.

Fariseo osecoãha iri tõi Jesús guarepochi rese yuvireco

13 Ipore mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehe’ oya yuvireco chupe. 14 Ahe yuvirasó chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tõi. Esepia, “Ëgüe ehi co mbia” nderei eté ava upe iyavei ereporombohe mbahe supi tupri vahe Tũpa remimbotar apo água rese. ¿Aviyera pĩha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

15 Oicua ité rumo fariseo pĩhaẽhisa, sese aipo ehi voi chupe:

—¿Mahera che moingue pota mbahe tõi pipe peye? Peru evocoyase ñepe guarepochi cheu, tasepia —ehi.

16 Ipore fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

17 Evocoyase aipo ehi fariseo upe:

—Pemondora mborerecuar upe mbahe chupendar; Tũpa upendar mbahe evocoyase pemondora Tũpa upe —ehi.

Evocoyase oyepihamondii tõi aipo oyeupe hese yuvireco.

Saduceo oporandu Jesús upe cuerayevisa rese secoãhasave

18 Evocoyase saduceo “ndipoi eté cuerayevisa” ehi vahe yugüeru Jesús upe. Oporandu tõi angahu yuvireco chupe:

19 —Porombohesar, Moisés niha oseya güembicuachiagüer yandeu aipo ehi: “Que cuimbahe omenda vahe omanose guahiẽhiseve, tivri evocoyase omendara sembirecocuer rese ahe viquehir omano vahecuer upe nara tahira oico.” 20 Oime siete tupri oyesuindar pãve yuvirecoi vahe. Yipindar vahe omenda. Ichui omanoño, ndatahi eté rumo. 21 Ipore tivri omenda viquehir rembirecocuer rese. Ahe rumo omanoño,

ndatahii avei rumo. Ëgüe ehi tupri avei tivri imombosapisa.
 22 Ëgüe ehi co siete tupri omenda ahe cuña rese, ndatahii
 eté rumo yuvireco. Coiye rumo cuña omano avei no.
 23 Evocoyase opase ocuerayevi yuvireco, ¿uma rembireco
 itera pïha? Esepia niha, siete tupri ité omenda tēi yuvireco
 sese —ehi yuvireco chupe.

24 Evocoyase Jesús omboyevi chupe:

—Pe pïhañemoñeta pipe peyavi. Esepia, ndapeicuai eté
 Tūpa ñehe icuachiapri aracahendar, ndapeicuai avei Tūpa
 pïratasa. 25 Supi eté omano vahe ocuerayevise, chupe ndipo
 iri chira mendasa. Ahe rumo Tūpa rembiguai ìva pendar
 nungar yuvirecoira ìvave. 26 Co cuerayevisa resendar rumo
 amombehura pēu: aviye ndapeyeroquii anga vahe Moisés
 rembicuachiagüer pipe, acoi caha rese sendi guasu vahe
 aviterve Tūpa aipo ehise chupe: ‘Che Abraham, Isaac, iyavei
 Jacob Tūpa aico’ ehi vahe. 27 ¡Tūpa ndahei omano vahe-
 cuer Tūpa! ¡Ahe rumo oicove vahe Tūpa secoi! Sese pe
 pïhañemoñeta pipe peyavi —ehi saduceo yuvirecoi vahe upe.

Porocuita aviye catu vahe

28 Ñepeí Moisés porocuita rese oporombohe vahe osendu
 ñehe pïratase oyeupe yuvireco, oicua avei Jesús omboyevi
 tuprise ñehe yuvireco chupe, evocoyase oyemboya sese opo-
 randu chupe:

—¿Uma vo porocuita aviye catu vahe opacatu sui? —ehi.

29 Jesús omboyevi chupe:

—Yipindar mborocuita aviye catu vahe aipo ehi: ‘Pe-
 sendu Israel: yande Yar Tūpa aheño ité ñepeí yande Yar
 secoi. 30 Eresaisura nde Yar Tūpa opacatu nde pihá pipe,
 opacatu nde recocuer pipe, opacatu nde yapisacasa pipe
 iyavei opacatu nde pïratasa pipe’ ehi. 31 Iyavei imoñuviriosa
 porocuita ahe co: ‘Eresaisura ambuae ava nde yeaisu nun-
 gar’ ehi. Ndipo iri ambuae porocuita aviye catu vahe co sui
 —ehi.

32 Evocoyase porocuita rese oporombohe vahe aipo ehi
 chupe:

—Aviye tupri ité aipo nde ñehe, Porombohesar. Supi
 eté aipo ere oime ñepeí Tūpa iyavei ndipoi eté ambuae.
 33 Iyavei yasaisura Tūpa opacatu yande pihá pipe, opacatu
 yande yapisacasa pipe, opacatu yande pïratasa pipe, iyavei
 yasaisura ava yande yeaisu nungar. Ahe ité aviye catu mbahe
 seropovēhepri sui iyavei opacatu porerecosa sapipri tēi sui —
 ehi.

34 Evocoyase Jesús icuase co ava pïhañemoñeta tuprisa,
 aipo ehi chupe:

—Namombriimi ereico Tūpa mborerecuasa sui —ehi.

Ipore ndipo iri oyemonguerēhi vahe oporandu vaheṛā mbahe rese yuvireco chupe.

¿Ava suindar pīha Poropīsīrosar?

³⁵ Jesús oporombohese tūparo pipe aipo ehi:

—¿Mahera ru Moisés porocuita rese oporombohe vahe: “Poropīsīrosar David suindar ité” ehi yuvireco? ³⁶ Esepia, David ité aipo ehi Espíritu Santo pīratasa pipe:

‘Yar aipo ehi che Yar upe:

Eguapi che acato coti, acoi che amondose voi eté nde amotarēhimbar nde povrīve yuvireco’

ehi David aracahe. ³⁷ ¿Mahera ru, “Poropīsīrosar David suindar secoira” peye, David teieté, “Che Yar” ehise chupe? —ehi.

Ava rehī oquerēhisave ité osendu Jesús ñehe yuvireco.

Jesús oicua uca Moisés porocuita rese oporombohe vahe recocuerai

³⁸ Jesús aipo ehi oporombohesave: “Peicua catu Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo āgua ocar rupi omboeteisa pipe yuvireco. ³⁹ Oseca avei tenda porañete catu vahe güenara otūparo pipe yuvireco yepi, iyavei carusave tenda aviye catu vahesave uguapi yuvireco yepi no. ⁴⁰ Iyavei cuña imer mano vahecuer rēta virocua-rocuā tēi ichui. Oarondaguā tēi avei oyerōqui pucu-pucu yuvireco. Ahe rumo oipisira Tūpa ñemoirosa ipīrata catu vahe yuvireco curi” ehi.

Cuña imer mano vahecuer porerecosa

⁴¹ Ñepeī ari Jesús uguapi oī porerecosa rīru rovai ava repia āgua mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco. ⁴² Ahe pipeve oyepota cuña imer mano vahecuer iparaisu vahe. Ahe avei omondo ñuviriomi guarepochi oporerecosa ipipe. ⁴³ Evocoiyase Jesús oñehe güemimbohe upe aipo ehi:

—Supi eté che aipo ahe pēu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi rīru pipe. ⁴⁴ Ambuae ava eta rumo uguarepochi rumbirermi tēi omondo oporereco āgua yuvireco; co cuña rumo oparaisusa pipe opa ité omondo uguarepochi —ehi güemimbohe upe.

13

“Imondurusara tūparo guasu” ehi Jesús

¹ Jesús osēse tūparo guasu pipe sui, ahese ñepeī semimbohe aipo ehi chupe:

—Ore mbohesar, jesepia oi ita imopuhapri, icatupri ai! — ehi.

² Jesús rumo omboyeve chupe:

—¿Pesepia co oi tuvichá vahe ité? Ndipoi chietera rumo que ñepeí ita oyeha vite vahe; opacatu ité imondurusara curi — ehi.

Cañi renonde mbahe oime vaheṛã

³ Evocoyase Jesús yuviraso ivitri Olivo ve, ahe ivitri tũparo guasu rovai tupri. Aheve Jesús oguapise oĩ, Pedro, Santiago, Juan iyavei Andrés oporandu co cotimi mbahe rese yuvireco chupe: ⁴ “¿Mbahese vo aipo mbahe yaviyera? ¿Mbahe poromondiisa rese rane vo icuasara?” ehi.

⁵ Jesús rumo omboyeve chupe: “Peicua catu, peyembopa ucai rene ambuae ava upe. ⁶ Esepia, setá ava yugüerura, ‘Che niha Poropĩsirosar aico’ ehi tẽira ava eta mbopa yuvireco.

⁷ “Pesenduse rumo ñehesa vavasa resendar cohove, iyavei que rupi, ndapeyembosiquiyei chietera. Esepia niha, ěgũe ehi rane itera; ndehi vitei chira rumo ari cañi. ⁸ Esepia, ñepeí ivi pipendar ovavara ambuae ivi pipendar rese oyeupe yuvireco; iyavei oimera ivi riri opacatu-catu tẽi tecua rupi, tiavor avei. Co rumo omboipi ramomira mbahe tẽi porarasa.

⁹ “Peñearo catu. Esepia, pe rerasora mborerecuar rovai yuvireco, iyavei pe nupara tũparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tẽi yuvireco. Ěgũe peyera peñehe che recocuer rese chupe. ¹⁰ Cañi renonde rumo co ñehesa pĩsirosa resendar opacatu rane ité ava upe icuaucasara ivi rupi. ¹¹ Iyavei, ‘¿Mbahe pĩha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyeuara Tũpa pe ñehe água pẽu. Esepia, ndahei chira peyesui tẽi peñehe, Espĩritu Santo ité oñehera. ¹² Ipare rumo ava omondoñora vivri yamotarẽhisar upe ‘toyuca yuvireco’ oya. Ěgũe ehi aveira ava guahir upe; tahir avei oyamotarẽhiñora oyesupa yuca uca água yuvireco che recocuer rese. ¹³ Opacatu avei ava ndape ambotai chira che recocuer sui tẽi yuvireco. Acoi ava oyemoviracua vaheño rumo ari ipa vahe rupi, ahe ipĩsiropri yuvirecoira.

¹⁴ “Tũparo guasu maranehi pipe pesepiase mbahe-mbahe tẽi aposa —acoi oyerogui vahe, ahe tosenducua tupri yuvireco —, evocoyase acoi yuvirecoi vahe ivi Judea rupi, toñemipa poyava ivitri rese yuvireco. ¹⁵ Acoi güẽta harive secói vahe, ahe ari toi que iri eme güẽtave mbahe renose água. ¹⁶ Acoi que rupi tẽi secói vahe, toyeve eme avei güẽtave oyeaosa renose água. ¹⁷ ¡paraisu itera cuña ipuruha vahe ahe ari pipe, imembi pĩtani vahe avei! ¹⁸ Peoporandu Tũpa upe,

toime eme co nungar mbahe sōhisa vahe pipe pēu. ¹⁹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui; ipare ndipo iri chietera evocoi nungar. ²⁰ Iyavei yande Yar nomombituhise ari naporai vahe, ndipoi chietera oñepisiro vahe yuvireco viña; ahe rumo güembiporavo raisusa pipe omombituhura.

²¹ “Que oimese aipo ehi vahe: ‘Esepia, co Poropĩsirosar secoi’ ehi, anise, ‘Peve secoi’ ehise yuvireco pēu, aní chira peroya aipo ehi vahe. ²² Esepia, yugüerura ava, ‘Che Poropĩsirosar aico’ ehi tēi vahe, iyavei, ‘Che amombehu vahe Tūpa Ñehengagüer’ ehi angahu tēi vahe, iyavei oyapora mbahe ava ndoyapoi vahe poromondiisa güeco pĩratasa mboyecua āgua yuvireco. Aviyeteramo ombopa aveira ava Tūpa reroyasar. ²³ ¡Peicua catura! opa aipo co senondeve amombehu pēu” ehi.

Mara ehira Tūpa Rahir oyevisse

²⁴ “Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira, ²⁵ yasitata avei opara oviapi iva sui, iyavei iva resendar mbahe oririira yuvireco. ²⁶ Ahese che, Ava Riquehir, iva quiha rese ayecua itera vitu che pĩratasa pipe che rendigüer porañetesa pipe avei. ²⁷ Ipare amboura che rembiguai eta iva pendar. Ahe evocoyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que iva rese yuvirecoi vahe avei.

²⁸ “Peyembohera ivira higuera recocuer sui: co ivira soqui ramose, yaicua cōimi ari sacu vahe yepota āgua yandeu yepi. ²⁹ Na ehi aveira niha pēu che ñehe rupi tupri mbahe pesepiase. Sese peicuara che, Ava Riquehir, cōimi eté che yevi āgua. ³⁰ Supi eté yuvirecove vitera ava osepia vahe, co mbahe opase yaviye. ³¹ Iva, ivi opara ocañi; che ñehengagüer rumo imboaviyesa rane itera.

³² “Ndipoi eté rumo ava oicua vahe ari iyavei hora che yevi āgua yuvireco, che Ru rembiguai iva pendar avei ndoicuai yuvireco, che avei ndaicuai eté. Che Ru güeraño ité rumo oicua.

³³ “Sese niha pemahemohara yepi, che rārora peye. Esepia niha, ndicuasai che yevi āgua. ³⁴ Inungar que mbia amombri oso pota āgua renonde, güembiguai oseyapa güēta rāro āgua, omondo avei ñepeipei upe iporaviqui āgua, iyavei omondo güēta roquendipi rāro āgua. ³⁵ Pe evocoyase pemahemohara. Esepia, ndapeicuai marase che oi yar ayevira pēu, aviyeteramo pĩtu ramose, pĩtu mbiter, tacura ñehese, anise añihivei. ³⁶ Ndaipotai pemahemohaēhiseve tēi ayevira. ³⁷ Che

aipo ahe p̄eu, opacatu upe avei: ¡Pemahemohaño ité yepi!” ehi güemimbohe eta upe.

14

Oyemomborandu Jesús yuca ãgua rese yuvireco

¹ Ipare ñuvirío ari judío Pascua pieta ãgua ipane, ahe pieta pipe yuvirohu pan ndayapepoi vahe yepi, pahí rerecuareta, Moisés porocuaita rese oporombohe vahe avei oyemomborandu: “¿Mara yahera Jesús mbopa ipisi yuca ãgua?” ehi yuvireco. ² Ambuae rumo aipo ehi yuvireco:

—Ndiyai pieta pipe ité yaipisi ava rehí yemondiēhi ãgua yandeu —ehi.

Cuña Jesús rese mbahe s̄iacua vahe oipiyere

³ Ahese Jesús secoi Betania ve Simón lepra vireco vahecuer r̄etave. Aheve mesave chiniseve, cuña güeru mbahe s̄iacua vahe siru reseve sepí iteanga vahe. Ahe osovapisa rerocua, ipare oipiyere Jesús ãca rese. ⁴ Ambuae ava aheve yuvinoi vahe rumo oñemoiro t̄ei aipo ehi yuvireco oyeupe:

—¿Mahera vo co omocañi t̄ei mbahe s̄iacua vahe? ⁵ Omondo vahe ité tie co tresciento ari rupindar mboraviqui repri rupi ava iparaisu vahe p̄itiví ãgua viña —ehi yuvireco.

Omañeco t̄ei avei ahe cuña yuvireco.

⁶ Jesús rumo aipo ehi ahe ava upe:

—Teheni, ěgüe tehiño, ¿mahera vo pemañeco t̄ei? Co mbahe oyapo vahe rumo cheu avíye ité. ⁷ Ava iparaisu vahe niha yuvirecoiño itera pe p̄ahuve, iyavei peyapoño itera mbahe avíye vahe peyapo potase chupe; che rumo ěgüe ndahe viteñoi chira vichico pe p̄ahuve. ⁸ Iyavei co cuña oyapo mbahe ocatugüer rupi; opa voi omoiacua che rete che manoēhi viteseve. ⁹ Supi eté aipo ahe p̄eu: ñehesa p̄sirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas oyemoingatu Jesús mondo ãgua yamotarēhimbar upe

¹⁰ Evocoyase Judas Iscariote, semimbohe doce vahe p̄ahu pendar, oso pahí eta rerecuar upe imoñeta Jesús mondo ãgua. ¹¹ Senduse, oyembovharete: “Yamondo guarepochi chupe” ehi voi eté yuvireco. Evocoyase Judas oseca voi Jesús mondo ãgua yamotarēhimbar upe.

Jesús caru agüer ipa vahe güemimbohe rese

¹² Yipindar ari pan ndayapepoi vahe husa pipe, ahese avei ovesa Pascua resendar yucapri seropovēhesa yepi, ahe ari pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pesora, ¹⁴ seiquesave aipo peyera sêta vahe upe: ‘Ore mbohesar oporandu: ¿Uma oi pipe vo Pascua pieta resendar orohura che remimbohe reseve? ehi’ peyera. ¹⁵ Evocoyase ahe omboyecuara oi guasu ivatendar imoin-gatupri pëu. Aheve pemoingatu mbahe yahu vaherã —ehi güemimbohe upe.

¹⁶ Evocoyase semimbohe yuviraso tecuave. Aheve semimombehu rupi tupri osepia mbahe yuvireco. Ichui omoin-gatu carusa Pascua pieta resendar yuvireco.

¹⁷ Pïtu ramomise, Jesús doce güemimbohe rese aheve oyepota yuviraso. ¹⁸ Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pëu: ñepei pe pãhu pendar yande piri ocaru vahe che mondora che amotarëhimbar upe —ehi.

¹⁹ Evocoyase semimbohe ndoyembovïhai tēi yuvireco, iyavei oporandu-randu tēi ñepei-pe chupe yuvireco:

—¿Che pïha? —ehi yuvireco.

²⁰ Omboyevï rumo güemimbohe upe:

—Ñepei eté pe pãhu pendar ahe co omoaqui pan che caro pipe. ²¹ Supi eté che, Ava Riquehïr, amboavïyera icuachiapri; jiparaisu catura rumo acoi mbia che mondosar! Aviye catura ahe mbia ndoyesuisse viña —ehi.

²² Yuvirocaru vïteseve, Jesús oipïsi pan, “Aviye ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peipïsi; co che rete —ehi.

²³ Ipare oipïsi igua rïru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuviroihu. ²⁴ Ahese aipo ehi:

—Co che ruvi, ahe che Ru remimbotar ipïasu vahe pëu nara. Oyepïyerera ava rehïi recocuer rese nara. ²⁵ Supi eté aipo ahe pëu: ndaïhu iri chietera uva ricuer cheu arï oyepotase voi che Ru Tüpa mborerecuasave aihura uva ricuer ipïasu vahe —ehi.

“Pedro, ‘Ndaicuai vahe evocoi mbia’ erera cheu” ehi Jesús Pedro upe

²⁶ Osapucaire, opa yuviraso ivitri Olivo ve. ²⁷ Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiapri pipe aipo ehi: ‘Ayucara ovesa rãrosar, ahese

oñemosai tẽira ovesa opacatu rupi yuvireco' ehi. ²⁸ Che cuer-ayevire rumo aso voi etera pe renonera Galilea ve —ehi.

²⁹ Evocoiyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ěgũe ndahei chietera —ehi.

³⁰ Aipo ehi rumo Pedro upe:

—Che rumo supi eté aipo ahe ndeu: co pĩtu pipeve voi eté tacura ñehe yupagũe renondeve, “Ndaicuai vahe evocoi mbia” erera mbosapĩ oyupagũer rupi cheu —ehi.

³¹ Ahe rumo,

—Yepe che amano tẽira nde rupi viña, che rumo, “Ndaicuai vahe evocoi mbia” ndahei chietera —ehi-ehi catuño ité chupe.

Ambuae opacatu aipo ehi tuprĩ tẽi avei yuvireco chupe.

Jesús oyeruqui Getsemaní ve

³² Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapĩ cohava, che aso ranera ayeroqui peve —ehi.

³³ Aheve viraso Pedro, Santiago, Juan oyeupĩ. Ahese ndoyepĩhambovĩhai eté oico ³⁴ aipo ehi:

—Che cũritei ndavĩhai eté. Esepia, che hã oyandu ité manosa. Pepĩta rane cohava, iyavei pemahemohara pe yeroqui pipe —ehi güemimbohe viraso vahe upe.

³⁵ Evocoiyase oso tenonde catumi. Aheve oyaivĩ ivi rese oso, oporandu Tũpa upe mbahe tasi vahe reimeẽhi ģgua oyeupe.

³⁶ Oyeruqui pipe aipo ehi: “Che Ru, che rembiaisu, ndeu niha mbahe ndayavai vahe ité: che renose co mbahe-mbahe tẽi sui eve; tayapo eme che remimbotar tẽi, nde remimbotar rupi catu tayapo” ehi.

³⁷ Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepei hora nde ropesii upe? ³⁸ Pemahemoha, peyeruqui mbahe tẽi pipe pe viapiẽhi ģgua. Pe niha pequerẽhi ité viña, pe retecuer tẽi rumo nipiratai pẽu —ehi.

³⁹ Ichui oso iri oyeruqui, aipo ehi tuprĩ avei oñehe. ⁴⁰ Ipare oyevisẽ, osesapĩha iri iqueseseve tẽi avei. Esepia, sopesii nomboyeroyai eté yuvireco, ahese ndoicatui eté iñehe mboyevi yuvireco. ⁴¹ Imombosapĩsa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehir, mondo ģgua ava yangaipa vahe povrive.

⁴² Pepũha, yaso. Esepia, cõimi eté che amotarẽhisar upe che mondo vaherã secoi —ehi.

Jesús ipisisa

⁴³ Jesús oñehe viteseve ohã, Judas oyepota oso chupe, ahe doce pãhu pendar semimbohe, iyavei setá ava yugüeru quise pucu, ivira reseve-seve supí. Ahe pahi eta rerecuar, Moisés porocuita rese oporombohe vahe, judío rerecuareta porocuita rupi oyapo yuvireco. ⁴⁴ Yipindar rumo imondosar Judas aipo ehi: “Asovaupite vahe rese peicuara. Ahe peipisi tupri itera seraso” ehi. ⁴⁵ Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

⁴⁶ Ahese oipisi Jesús yuvireco.

⁴⁷ Semimbohe secoi vahe supí ovinose oquise pucu. Ipipe oyasia pahi rerecuar ivate catu vahe rembiguai nambi.

⁴⁸ Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi ãgua. Imonda rai vahe nungar che rereco peye. ⁴⁹ Ari yacatu rupi niha pe pãhuve aporombohese tũparove vichico, na ndapeyei eté cheu. Co rumo ãgüe peye icuachiapri mboaviye ãgua cute —ehi.

⁵⁰ Ahese semimbohe oñemosaipe oseyá Jesús ahe ae tupri imoha yuvireco. ⁵¹ Mbia chĩhivahe rumo turucuar pipe güerañomi oñemama vahe supive secoi viña; ⁵² ahe avei oipisi yuvireco. Oipoequiño rumo oturucuar reya oso nani tupri.

Jesús serasosa pahi rerecuar ivate catu vahe rovai

⁵³ Evocoyase Jesús vıraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuita rese oporombohe vahe avei no. ⁵⁴ Pedro avei amombri rupive tẽi oi que ité oso pahi rerecuar ivate catu vahe rẽta ãchisa pipe. Aheve oguapiño mbia sundao pãhuve tata ipive oyephe oĩ.

⁵⁵ Pahi eta rerecuar rumo iyavei opacatu porandusa ivate catu vahe pendar oseca-seca tẽi ava oñehe-ñehe tẽi vajerã Jesús rese yamotarẽhisave yuca uca ãgua yuvireco; ndoicatui eté rumo yuvireco. ⁵⁶ Iyavei setá iteanga tẽi semira yuvireco sese; oyeecopi-copi tẽi rumo güemira pipe. ⁵⁷ Amove aipo ehi tẽi yuvireco seco momara ãgua:

⁵⁸ —Ore orosendu iñehe aipo ehise: ‘Che opara amonduru co tũparo ava tẽi rembiapo. Ipare rumo mbosapi ari rupi opara amopuha. Ndahe iri chira evocoyase ava tẽi rembiapo’ ehi —ehi tẽi yuvireco chupe.

⁵⁹ Ndahoyoyai rumo ambuae imombehusa rese.

⁶⁰ Ahese pahi rerecuar ivate catu vahe opũha oporandu Jesús upe:

—¿Nderemboyevii chira vo iñehe yuvireco chupe? ¿Mbahe vo aipo nde amotarẽhimbar oñehe nde rese? —ehi chupe.

⁶¹ Noñhehiño ité rumo chupe. Pahi rerecuar ivate catu vahe rumo oporandu iri chupe:

—¿Poropĩsirosar ité vo nde ereico, Tũpa imboeteipri Rahir? —ehi.

⁶²—Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavaisarēhi acato coti; ayeveise avei iva quiha rese curi —ehi chupe.

⁶³ Evocoyase pahi rerecuar ivate catu vahe omondo oturucuar aipo ehi:

—¿Mbahe iri vo yande yaipota vite yaico? ⁶⁴Yasendupa niha aipo Tũpa upe iñehe-ñehe tẽisa, ¿mara ehi aipo evocoyase pe pihave? —ehi.

Ipare opacatu guasu ava, “¡Tomanoño ité!” ehi yuvireco chupe.

⁶⁵ Ahe se amove ava ondivi-ndivi sese iyavei osesacua, ipare yuvirocua-rocua sese aipo ehi yuvireco:

—¡Eicua ité ru, ava evocoi ocua nde rese! —ehi-ehi yuvireco chupe.

Sundao tũparo rãrosar avei osovapete-pete yuvireco.

Pedro, “Ndaicuai vahe evocoi mbia” ehi Jesús upe

⁶⁶ Pedro ivive ñachimbri pipe secoi. Aheve cuña oyepota ou pahi mborerecuar ivate catu vahe rembiguai chupe.

⁶⁷ Osepiase Pedro iyepese tata ipive, omahengatu ohã sese aipo ehi chupe:

—Nde avei acoi Jesús Nazaret pendar rupindar ereico —ehi.

⁶⁸ Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osẽse oquendipive ohã, ahe se oñehe tacura. ⁶⁹ Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

⁷⁰ Pedro rumo, “Ndahei eté che” ehiño. Iparemi tẽi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

⁷¹ Pedro evocoyase,

—¡Tũpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñehe imoñuviriosa rupi. Ahe se Pedro oyemomahenduha, “Tacura ñehe yupagüesa renondeve, mbosapĩ oyupagüer rupi, ‘Ndaicuai vahe evocoi mbia’ erera cheu” ihe agüer rese. Sese oyasehó iteanga.

15

Jesús serasosa Pilato rovai

¹ Cõhe potase, pahi eta rerecuar, judío rerecuar, Moisés porocuaita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco. ² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu tēi mbahe sembiaviēhi yuvireco chupe. ⁴ Evocoyase Pilato oporandu iri chupe aipo ehi:

—¿Mahera vo ndereñehei eté? Esepia, setá mbahe nde rembiavi omombehu yuvireco —ehi.

⁵ Nomboyevii eté rumo Pilato upe. Evocoyase, “¿Mara ehi rutei pñha?” ehi tēi.

“¡Tayaticasa!” ehi ava Jesús upe yuvireco

⁶ Mborererecuar guasu recosa ité ñepi ava soquendapri renose ãgua Pascua pieta pipe ava rehii porandusa rupi yepi.

⁷ Mbia Barrabás serer vahe, ahe pipeve avei soquendasa yuvireco ambuae oporapichi vahe reseve. ⁸ Ava yugüeru Pilato upe ‘tayaposa pieta pipe yaposa vahe yepi’ oyapave yuvireco. ⁹ Pilato rumo aipo ehi:

—¿Peipota amose vaherã judío rerecuar? —ehi.

¹⁰ Esepia, Pilato oicuaño ité ava rese yemoecatēhisa pipe sui pahi eta rerecuar remimondo secoise. ¹¹ Pahi eta rerecuar rumo ‘Barrabás tosē’ ombohe ati-ati uca ava yuvireco. ¹² Evocoyase Pilato oporandu ahe ava upe:

—¿Mbahe vo peipota ayapora co mbia chupe acoi, ‘Judío rerecuar’ peye vahe rese? —ehi.

¹³ Ahe rumo omboyevii Pilato upe:

—¡Tayaticasa curusu rese! —ehi ati-atiño yuvireco.

¹⁴ Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-ati iriño yuvireco.

¹⁵ Evocoyase Pilato, mbahe tupri opita ãgua ava rese, omose uca Barrabás. Ipare oinupá iteanga uca Jesús tucumbo tupeicha nungar pipe, imondo curusu rese yatica ãgua.

¹⁶ Ahese sundao viraso mborererecuar rēta sui ambuae oi pipe, aheve opacatu omboetasa omonuha yuvireco. ¹⁷ Aheve omboyemonde turucuar pñraumbi vahe pipe yuvireco, ipare yu piapri omunde ñaca rese. ¹⁸ Sãse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

¹⁹ Iyavei yuvirocua-rocua ivira pipe ñaca rupi yuvireco sese, ondivi-ndivi avei oñenopiha-piha avei sovai yuvireco imboeteisave angahu. ²⁰ Mara-mara tēi sereco pare, ovirocua iturucuar pīraumbi vahe yuvireco ichui, ahese omonde iturucuar ité yuvireco sese. Ichui vinose ocarve yatica āgua yuvireco.

Jesús yaticasa curusu rese

²¹ Ñepeí mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Erio, terevosii curusu co Jesús vireco vahe rese” ehi voiño tēi yuvireco chupe.

²² Jesús oviraso Gólgota serer vahesave yuvireco (‘Ava Āca Cangüer’ oyapave aipo ehi). ²³ Iyavei uva ricuer oyeseha vahe mirra rese omondo tēi yuvireco chupe. Ahe rumo ndoihui eté. ²⁴ Evocoiyase oyatica yuvireco. Ipare sundao iguayíño Jesús turucuar rese ‘¿uma pīha virasora oyeupe’ oyapave yuvireco.

²⁵ Ahe oyatica añihivei la nueve rupi yuvireco. ²⁶ Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oĩ. ²⁷ Supive avei yaticasa ñuvirío imonda rai vahe ñepeí mbahe rese ipocosa coti, ambuae mbahe rese ipocoēhisa coti. ²⁸ Ēgüe ehi imboaviye icuachiapri aipo ehi vahe: “Ava mbahe-mbahe tēi aposar nungar ipāhuve serecosa” ehi.

²⁹ Acoi ava ñocuasar iñehe-ñehe tēi, oñeaca mbovava aipo ehi yuvireco chupe:

—Nde acoi, “Opara tūparo amonduru. Ipare mbosapi ari rupi opa irira amopuha” ere acoi cuese. ³⁰ ¡Eñepisiro ru nde ae cute; egüeyi curusu sui! —ehi yuvireco chupe.

³¹ Ēgüe ehi avei pahi eta rerecuar, oporombohe vahe avei Moisés porocuita rese iñehe mara-mara tēi yuvireco chupe, aipo ehi yuvireco oyeupe:

—Oipisiro ambuae. Ahe ae rumo ndoicatui oñepisiro. ³² ¡Poropisirosar Israel rerecuar guasu, toyeeroyi ahe ae curusu sui cūritei, ahese voi seroyasara —ehi.

Iyavei supive yaticapri mara ehi-ehi tēi avei chupe.

Jesús mano agüer

³³ Osupitise rumo mbiter ari, opa tupri pītu ivi rupi. Ēgüe ehi las tres rupi. ³⁴ Ahese tupri avei Jesús oñehe pīrata aipo ehi: “Eloi, Eloi, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tūpa ñehe mombehusar Elías upe oñehe —ehi yuvireco chupe.

³⁶ Evocoyase ñepei imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe 'toiñu' oya:

—Ēgüe tehiño rane, ¿oura pñha Elías seroyi ãgua curusu sui? —ehi.

³⁷ Ahese Jesús sãse pñrata. Ipare omano. ³⁸ Aheseve tũparo asiasa turucuar ivate coti sui ovo tupri. ³⁹ Iyavei sundao rerecuar Roma iguar, ahe Jesús rehögüer rese omahengatu ohã. Osenduse Jesús rãse iyavei osepiase imano, aipo ehi:

—Supi eté catu, co mbia Tũpa Rahir ité —ehi.

⁴⁰ Iyavei cuña aheve amombrive osepia catu yuvinoha; ahe yuvirecoi María Magdalena, José si María, ahe avei Santiago chñhivahe catu vahe si iyavei ambuae cuña Salomé. ⁴¹ Co cuña eta yuvirecoiño vahe ité Jesús rupi, oipñtivii vahe avei Galilea ve yuvirecoise. Setá avei ambuae ava supi yugüeru vahe Jerusalén ve yuvirecoi.

Jesús apocatu agüer tuvipa pipe

⁴² Pñtu ramose, ahe ari pipe oyemoingatu ava yuvireco ari mbituhusa upe nara yepi, ⁴³ ahese José, tecua Arimatea pendar, porandusa ivate catu vahe pendar, acoi Tũpa mborerecuasa osãro vahe oico, oquerẽhisa pipe ité oiñque oso Pilato upe oporandu ãgua Jesús rehögüer rese. ⁴⁴ Pilato rumo oyepñhamondii tẽi, "Omano" hese. Oñehe sundao rerecuar upe oporandu ãgua '¿marase vo ãgüe ehi?' ⁴⁵ Sundao rerecuar omombehuse chupe, ahese omondo sehögüer José upe.

⁴⁶ Evocoyase José virocua turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pipe. Ichui ita yapayere vahe pipe osovapi. ⁴⁷ María Magdalena iyavei María, José si, osepiãño yapocatuse yuvireco.

16

Jesús ocuerayevi

¹ Mbituhusa ari pare, María Magdalena, María, Santiago si, Salomé avei, ahe virocua mbahe siacua vahe Jesús rehögüer rese nara yuvireco. ² Iyavei añihiveive, yipñdar ari semana pipe, oyepota Jesús ruvipave icatu ramose yuviraso. ³ Aheve aipo ehi oyeupe yuvireco:

—¿Ava pñha co tehögüer rovapisa virocua yuvireco yandeu? —ehi.

⁴ Osepiase rumo ita guasu yuvireco, ndahe irise güendave ihã, ⁵ yuviroiquese tehögüer ruvipave yuvireco, aheve osepia omaha rese pocosa coti mbia chñhivahe, iturucuar pucu morochi vahe oguapise oĩ. Ahese cuña oyembosiquiye yuvireco.

⁶ Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohave. Pesepia ru supagüer. ⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesepiara mbahe che remimombehu rupi tupri’ peyera —ehi.

⁸ Evocoiyase ahe cuña yuvinosese tuvipa sui, yuvinoña yuviraso, oririi avei osiquiyepave. Iyavei nomombehui eté ambuae ava upe osiquiyepave yuvireco.

Jesús oyemboyecua María Magdalena upe

⁹ Jesús ocuerayevire añihiveive domingo pipe, oyemboyecua yipindar María Magdalena upe, ahe ichui acoi siete tupri carugar opa omboyepipi. ¹⁰ Ahe oso imombehu supindar upe. Ahe rumo oyaseho vite oviharēhisave yuvireco. ¹¹ Osenduse cuña ñehe: “Jesús ocuerayevi, che ité asepia” ehise, ndoviroyai eté yuvireco.

Jesús oyemboyecua ñuvirío güemimbohe upe

¹² Ipare Jesús oyemboyecua iri ñuvirío güemimbohe upe ambuae güepiaca pipe peri rupi. ¹³ Ahe avei yuviraso omboetasa upe imombehu; ndoviroya viteño avei rumo yuvireco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñhengata ahe oyese yeroyaēhisa rese chupe, iyavei ocuerayevisa mombehusar reroyaēhi rese avei. ¹⁵ Ipare aipo ehi güemimbohe upe: “Peso opacatu ivi rupi, pemombehu co ñehesa p̄sirosa resendar peico. ¹⁶ Acoi viroya vahe, iyavei oñeapiramo vahe, ahe oñepisirora yuvireco; acoi ndoviroyai vahe rumo, ahe imocañipirā tēi yuvirecoira. ¹⁷ Co mbahe poromondiisa omboyecuara che reroyasar yuvireco: Che rer pipe omboyepipira carugar ava sui. Oñehe aveira ñehesa ndicuasai vahe pipe yuvireco. ¹⁸ Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

Jesús oso ivave

¹⁹ Oñehe pare, yande Yar Jesús oso ivave. Aheve oguapi Vu Tūpa acato coti oñ. ²⁰ Semimbohe evocoiyase opa yuviraso opacatu ivi rupi ñehesa p̄sirosa resendar mombehu. Yande Yar avei oipit̄ivii, iyavei mbahe poromondiisa pipe omboyecua uca ité ñehesa p̄sirosa resendar supi eté vahe. Aipo rupive.

LUCAS REMBICUACHIA JESUS RECOCUER RESENDAR SAN LUCAS

Lucas oicuachía Teófilo upe

¹⁻² Imboeteipri Teófilo, setá ava oicuachía yuvireco opacatu aracahendar mbahe imombehupri mboaviyesa cūrítei yande pãhuve co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu. ³ Sese che avei opa aseca tupri yipisuive opacatu co mbahe cua tupri ãgua, Teófilo. Ichui che amoingatu tupri pota icuachiapri sesendar ndeu nara avei sereco. ⁴ Evocoyase nde ereicua tupri ra co porombohesa supi eté vahe acoi nde mbohe agüer.

Tūpa rembiguai omombehu Juan Oporoãpiramo vahe ha ãgua

⁵ Yipindar Jesús ha renondeve, Herodes mborerecuar ivi Judea rupindar recose aracahe, ahese aipo judío pahí secoi Zacarías serer vahe. Ahe pahí Abías rupindar secoi. Sembireco aipo pahí Aarón suindar, ahe serer Isabel. ⁶ Co ñuvirío secocuer aviye tupri Tūpa upe; viroya tupri opacatu Yar porocuaíta yuvireco. Evocoyase ndipoi eté que ava “mara” ehi vahe yuvireco chupe. ⁷ Zacarías rumo yipisuive ndatahi vahe. Esepia, sembireco ndimembii vahe ité, iyavei oyoya ité ocuacua-cuacuami yuvireco.

⁸ Ñepei ari aipo osupiti icuaita tūparo pipe imboetasa reseve iporaviqui ãgua Tūpa rovaque yuvireco. ⁹ Pahí recosa ité ãgüe ehi aracahe suive, ahese iporavosa Zacarías yipindar yasiapri tūparo maranehi pipe oi que vahe ã itaisi rapí ãgua. ¹⁰ Itaisi rapí viteseve aipo, opacatu ava oyerure yuvireco ocarve. ¹¹ Aheseve aipo oyemboyecua yande Yar rembiguai itaisi renda maranehi ique coti chupe. ¹² Tūpa rembiguai repiase aipo, oyembosiquiyé iteanga. ¹³ Tūpa rembiguai rumo aipo ehiño chupe:

—Zacarías —ehi—, eresiquiye eme. Tūpa osendu nde yeruresa. Sese nde rembireco Isabel imembira ndeu. Ahe nde rahir rer-ra Juan. ¹⁴ Ereviharetera sese, iyavei oyemboviharetera opacatu ava yuvireco nde rahir ohase. ¹⁵ Esepia niha, nde rahir secocuer tuvichara oico Tūpa rovaque. Ndoi hui chietera uva ricuer sai vahe, iyavei que ambuae mbahe sai vahe; secoira rumo Espíritu Santo rese ohaēhi viteseve. ¹⁶ Ëgüe ehira omonguerēhi setá ava judío Yar Tūpa reroya iri ãgua oico. ¹⁷ Ahe virecora espíritu

pĩratasa oyese oyoyara Tũpa ñehe mombehúsar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracuasa mboyeroya ãgua rese’ oyapave. Ëgũe ehira ava mbohe imoin-gatu yande Yar pĩsi ãgua sereco —ehi chupe.

¹⁸ Evocoyase,

—¿Mara ahera pĩha aipo reroya? Che rumo acuacuami eté vichico, iyavei che rembireco ocuacuami avei no —ehi Tũpa rembiguai upe.

¹⁹ —Aní —ehi chupe—. Che aico Tũpa rembiguai Gabriel, Tũpa rovaingar. Ahe niha che mbou ndeu che ñehe ãgua iyavei co ñehesa aviye vahe mombehu ãgua. ²⁰ Nde rumo ndereroyai acoi amombehu vahe ndeu. Sese co pĩpe suive ité nandehengatui chira eico. Osupitise voi che remimombe-hugũer, acoi ohasa nde rahir, ahese ramo ndehengatura —ehi aipo Tũpa rembiguai chupe.

²¹ Osãro pucu tẽi aipo ocarve ambuae imboetasa eta yuvireco. “¿Mahera pĩha nose vitei tũparo pĩpe sui?” ehi tẽi yuvireco chupe. ²² Osẽse aipo tũparo pĩpe sui, niñehengatui voi eté. “Ñaro osepia mbahe tũparo pĩpe” ehiño ité aipo imboetasa eta yuvireco chupe. Ipo ãta-ãta tẽi aipo oñehengatuẽhise mbahe mombehu oico.

²³ Ipare omboaviyese ocuaita tũparo pĩpe, oyevi oso güetave. ²⁴ Coiye aipo sembireco Isabel ipuruha oico. Judío porocuita mboyeroyasave nose iri eté ambuae ava piri poyandepo yasi rupi. Ipihañemoñeta: ²⁵ “Yar Tũpa ité Ëgũe ehi cheu ava che rese ñeheẽhi iri ãgua yuvireco” ehi vorivetesa pĩpe aracahe.

Tũpa rembiguai Jesús yesu ãgua omombehu

²⁶ Coiye seis yasi pĩpe Tũpa omondo güembigui Gabriel tecua Nazaret ve ivi Galilea rupi ²⁷ cuñatai ndaseco marai vahe upe iñehe ãgua; ahe serer María. Ahe omenda pota vahe cuimbahe mborerecuar guasu David suingar José serer vahe rese. ²⁸ Tũpa rembiguai oi que co cuña rõtave aipo ehi chupe:

—¡María, Tũpa nde rovása, erereco mbahe icatupri vahe pĩtiviisa Yar Tũpa suingar! Tũpa nde rese ité secoi; nde rovása catu opacatu cuña sui —ehi chupe.

²⁹ Tũpa rembiguai repiase, “¿Mara oya pĩha co aipo ehi cheu?” ehi tẽi osiquiyepave opihañemoñeta rereco. ³⁰ Evocoyase Tũpa rembiguai aipo ehi chupe:

—María, eresiquiye eme. Esepia niha, Tũpa ité nde poravo nde rovása ãgua. ³¹ Cũritei voira rumo ndemembira: ererectora nde membri; ahe serer-ra Jesús. ³² Ahe niha secouvicha catu vaherã secoira; “Tũpa seco ivate vahe Rahir secoi” ehira yuvireco chupe. Iyavei niha Yar Tũpa ité omoinguera

mborerecuar guasu seco ãgua inungar tamoi David aracahe.
³³ Mborerecuar guasu secoira judío recua rupi apirẽhi vaherã; imborerecuasa niha apirẽhi vaherã ité secoira —ehi.

³⁴ Evocoyase ahe aipo ehi:

—¿Mara ahera vo aipo che membi viña? Esepia niha, ndaico vitei vahe cuimbahe rese —ehi Tũpa rembiguai upe.

³⁵ —Espíritu Santo ogüeyira nde harive iva quiha nungar; Tũpa güeco pĩratasa pipe nde momembira. Sese acoi ohasa nde membrĩ seco maranehi vahe, “Tũpa Rahir” hesara chupe.

³⁶ Cũritei nde mu Isabel avei ocuacuami pipe imembi oico; ahe niha ndimembĩ vahe yipĩndar viña, cũritei rumo vireco seis yasi omembri vie pipe. ³⁷ Esepia niha, Tũpa upe ndipoi eté mbahe yavai vahe —ehi.

³⁸ Evocoyase María aipo ehi:

—Che Yar rembiguai aico, tayaviye ayase Tũpa remimbotar cheu nde ñehe rupi —ehi.

Aipo ihe pare, Tũpa rembiguai oyepipi oso ichui.

María oso omu Isabel piri

³⁹ Ahese María oso voi eté ivitri rupi tecua ivi Judea ve.

⁴⁰ Aheve aipo Zacarías rēta pipe oiquese oso, oyapo “avirave” omu Isabel upe. ⁴¹ Evocoyase Isabel rie pipe omĩ imembri iñehe renduse. Ahese Espíritu Santo oi que Isabel aviterve.

⁴² Ipare osapucaĩ pĩrata aipo ehi chupe vorivetesave:

—¿Tũpa nde rovasa cuña opacatu sui, iyavei osovasa nde membrĩ! ⁴³ Noromohai eté che piri ereyu vaherã viña, che Yar si. ⁴⁴ Esepia, cheu “avirave” ereyapose, che membrĩ omĩ voi vorivetesave che rie pipe. ⁴⁵ ¿Sovasapri ereico! Esepia, ereroya ité ñehesa ndeundar. Iyavei Tũpa omboaviyera güemimombehu nde rese —ehi Isabel chupe.

⁴⁶ Evocoyase aipo ihese,

“Che niha amboetei che Yar vichico;

⁴⁷ cheroriveté Tũpa che Pĩsirosar rese.

⁴⁸ Esepia, ahe omahe che rese che reco yemominisa pipe seroyasar che recosave.

Co pipe suive, ‘Sovasapri secoi’ ehira opacatu ava yuvireco cheu.

⁴⁹ Esepia niha, Tũpa mbahe mboavaisarẽhi, oyapo mbahe tuvichá vahe cheu.

¿Tũpa imboeteipri catu tasecoi yepi!

⁵⁰ Ahe oiparaisuereco opacatu omboeteisar yepi.

⁵¹ Nomboavai eté mbahe yapo.

Osecoreroyi ava oyemboivate ai tēi vahe.

⁵² Viroyi mborerecuar seco pĩrata vahe pĩratasa sui; ava seco mbegüemi vahe rumo osecomboivate.

53 Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

54 Oipĩtĩvĩ niha opacatu viroyasareta judío yuvirecoi vahe.

Esepia, ndasesarai eté poroparaisuerecosa mondo ãgua
55 güemimombehugüer rupi yande ramoi aracahendar
Abraham upe, ichuindar upe avei yepi no” ehi vorivetesave pipe omu

Isabel upe.

56 Ipare María opita Isabel pĩri mbosapĩ yasi rupi. Ichui oyeve oso güetave.

Juan Oporoãpiramo vahe haragüer

57 Osupitise ari Isabel upe, imembira. Ahe imembri cuimbahemi. 58 Imu iyavei icotindar oyanduse Tũpa rembiapo mbahe aviye vahe, aipo ehi yuvireco chupe: “Aviye ai catu Yar Tũpa seci co cuña rese” ehi vorivetesave yuvireco.

59 Ocho ari pipe aipo, ahe pĩtani ombocircuncida yuvireco judío porocuaíta mboyeroyasa pipe. Ipare aipo omondo pota iyesupa Zacarías rer yuvireco sese viña, 60 ichi rumo,

—Aní—ehiño—. Juan itera rumo serer —ehi.

61 —¿Mahera vo? Ndipoi eté rumo nde mu rer aipo nungar —ehi yuvireco chupe.

62 Evocoyase aipo omahe pĩtani yesupa rese yuvireco ‘¿mbahe pĩha ahe omondo pota sererguã viña?’ oyapave yuvireco. 63 Evocoyase aipo iyesupa oporandu ivirapemi rese sese serer oicuachía vaherã. Ahe serer oicuachía: ‘Juan sererguã’ ehi imoi. Ahese aipo opacatu ava: “¿Mara ehi rutei pĩha co?” ehi tẽi oyeupe yuvireco. 64 Ahese ramo Zacarías iñhengatu, omboipĩ Tũpa upe osapucaĩ oico. 65 Opacatu aipo sêta cotindar oyembosiquiye tẽi yuvireco, iyavei aipo opacatu Judea recua rupi omombehu-mbehu mbahe osepia vahecuer yuvireco. 66 Mbahe osendu vahecuer rese avei aipo oporandu-randu oyeupe yuvireco: “¿Mbahe pĩha aipo pĩtani oyapora curi?” ehi. Esepia niha, supĩ eté Tũpa osovasa.

Zacarías sapucaĩ agüer

67 Zacarías, Espĩritu Santo pĩratasa pipe, oñehe Tũpa oyeupe ñehesa pipe aipo ehi:

68 “¡Yande Yar Tũpa imboeteipri tasecoi!

¡Esepia niha, ahe ou yande judío yaico vahe pĩsĩro ãgua!

69 Ombou niha Poropĩsĩrosar güembiguai David suindar yandeu.

70 Ëgüe ehi imombehu opacatu oñhengagüer mombehusar seco maranehi vahe upe aracahe.

71 Ahe yande pĩsĩrora yande amotarẽhimbar sui.

72 Ëgüe ehi Tūpa imbou oporoparaisuerecosa yande ramoi aracahendar upe, iyavei iyemomahenduha āgua güemimbotar maranehi mombehu agüer rese.

73 Evocoiyase, ‘Che supi eté ayapora evocoi mbahe’ ehi yande ramoi Abraham upe aracahe

74 yande renose āgua yande amotarēhimbar povri sui ‘tache mboetei osiquiyeēhisa pipe yuvireco’ oya;

75 ‘toyuvirecoi che rembiepiave güeco ñvisa pipe iyavei güeco maranehisa pipe ari yacatu rupi’ oyapave.

76 Nde, che rahir, ‘Co Tūpa ivate vahe ñehe mombehusar secoi’ ehira ava yuvireco ndeu.

Esepia, nde eremoingatura ava recocuer Yar pisi āgua senon-deve eico.

77 Supi eté nde niha eremboyecuaru opacatu ava Tūpa upendar yuvirecoi vahe upe angaipa sui ñeroisa pisi āgua iñepisiro āgua.

78 Esepia, yande Ru Tūpa, oporoparaisuerecosa pipe ombou oporoesapesa iva pendar yandeu yande reco mbopiasu āgua

79 iyavei ava Tūpa cuaparēhi resape āgua ‘toyuvirecoi mbahe tupri pipe’ oyapave.

Esepia, ahe inungar ava pītumimbisave yuvirecoi vahe, ocañi tēi vaherā yuvireco”

ehi Zacarías.

⁸⁰ Ichui pītani ocuacua iyavei vireco pīratasa Espíritu suindar oyese. Ipare rumo oso oyemboerecua ivi iporupirēhi rupi. Coiye oyemboyecua omu Israel pendar upe oico.

2

Jesús yesu agüer

¹ Yipindar mborerecuar gasu Augusto oporocuai oico, “Tayecuachiasa opacatu tecua rupi” ehi. ² Ahe yipindar yecuachiasa mborerecuar Cirenio, Siria pendar rēise. ³ Opacatu ava yuviraso güecua yacatu rupi oyecuachía āgua yuvireco.

⁴ Sese José avei osē Nazaret, Galilea ivi rupi sui oso ivi Judea rupindar tecua Belén ve. Esepia niha, aracahendar mborerecuar gasu David aheve oha vahecuer, iyavei José ichuindar avei secoi. ⁵ Ëgüe ehi oyoya yuviraso güembirecovi María rese oyecuachía āgua. María rumo imembira pota ité oico. ⁶ Aheve oyepota ramose, osupiti ari imembira āgua. ⁷ Aheve oha imembrí yipindar vahe cuimbahemi. Aheve María oyao omembrí turucuar pipe, Ëgüe ehi imoñeno imondo mbahe mimba rembihi riru pipe. Esepia niha, ndoyosui eté oque āgua aheve yuvireco.

Tūpa rembiguai eta omombehu Jesús haragüer ovesa rãrosar upe yuvireco

⁸ Namombriimi Belén sui ovesa rãrosar yuvirecoi. Aheve osãro ovesa pĩtu pipe yuvireco. ⁹ Aviyeteramo tēi oyemboyecua Tūpa rembiguai iva pendar chupe. Tūpa porañetesa avei sendi yivii chupe yuvireco. Ahe sepiase, oyembosiquiyé iteanga tēi yuvireco ichui. ¹⁰ Ahe rumo aipo ehi chupe: “Pesiquire eme. Esepia, che ayu mbahe icatupri vahe mombehu ãgua pēu pe mboviharere ãgua iyavei opacatu ava mboviharere ãgua avei no. ¹¹ Co pipe oha David recua Belén ve Poropĩsirosar pēu nara. Ahe niha Tūpa Rembiporavo, pe Yarguã secoci. ¹² Icuia ãgua peyosura pĩtani yaopri tuprimi vahe tui mbahe mimba rembihi riru pipe” ehi.

¹³ Aviyeteramo tēi oyemboyecua ambuae setá Tūpa rembiguai iva pendar yivii yuvireco. Tūpa upe osapucaí yuvireco aipo ehi:

¹⁴ “¡Imboeteipri tasecoi Tūpa ivave!
¡vive ava Tūpa rembiaisu toyuvirecoi tupri oyeaisusa pipe!”
ehi osapucaí yuvireco.

¹⁵ Opase oyevi Tūpa rembiguai ivave yuviraso, ahese ovesa rãrosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

¹⁶ Evocoyase ipoyava yuviraso. Ipare osepia María, José, Jesús pĩtani avei yuvireco cute. Ahe pĩtani omoñenomi mbahe mimba rembihi riru pipe ino. ¹⁷ Ipare yuvinose omombehu-mbehu ambuae ava upe Tūpa rembiguai remimombehugüer pĩtani resendar ñehesa yuvireco. ¹⁸ Evocoyase opacatu ava oyepihamondii co ñehesa renduse yuvireco. ¹⁹ María rumo opacatu co mbahe rese oyapisacaño; ahe ehiño ité ipihañemoñetasa. ²⁰ Oyevise ovesa rãrosar yuviraso, omboetei iyavei osapucaí Tūpa upe yuvireco. Esepia niha, opacatu mbahe osendu vahe, osepia vahecuer yuvireco imombehupri rupi tupri ité.

Jesús pĩtani seropovēhesa Tūpa upe tūparo pipe

²¹ Ocho ari pipe ahe pĩtani ombocircuncida yuvireco; omondo sererguã Jesús yuvireco, ahe terer tupri avei acoi Tūpa rembiguai omombehu María upe imembieñi viteseve.

²² Ipare omboaviyese ohari güetave oñemoatiro ãgua, ahe aipo ãgüe ehi Moisés porocuita rupi yuvireco yepi, ahese vinose pĩtani seraso tecua guasu Jerusalén tūparo pipe seropovēhe ãgua Yar upe yuvireco. ²³ ãgüe ehi yuvireco. Esepia, Yar porocuita aipo ehi icuachiapri pipe aracahe: “Opacatu yipindar pĩtani cuimbahe mini yuviroha vahe

ipehasara Tūpa upe nara yepi” ehi. ²⁴ Yuviraso oporerere-cosa reropovêhe âgua yuvireco yande Yar porocuaita rupi: “Ñepei oyovaichor reseve picuhi, anise ñuvirío apicasu per-opovêhera” ehi vahe.

²⁵ Ahe pipe mbia Jerusalén ve secoi Simeón serer vahe. Ahe mbia aviye etepri vahe. Oyerure vahe Tūpa upe, osãro vahe avei Israel recua pendar Pīsīrosar imombehupri. Ahe secoi vahe ité Espíritu Santo rese. ²⁶ Ahe chupe Espíritu Santo opa uca oicua “eresepia rane itera Poropīsīrosar Tūpa remimbou nde mano renondeve” ehi vahe. ²⁷ Ahe ari pipe Espíritu Santo viroguata tūparove. Oyepotase José, María reseve yuvireco tūparove Jesús pītani reropovêhe âgua Tūpa porocuaita rupi tupri, ²⁸ ahese Simeón oyemboya oso sese, osupi ichi sui, viroyeroqui Tūpa upe señoa aipo ehi:

²⁹ “Che Yar, cūrítei che, nde rembiguai, amano tupriño itera. Esepia niha, nde remimombehugüer eremboaviye ité cheu.

³⁰ Asepia ité niha Poropīsīrosar vichico cute.

³¹ Nde niha erembou opacatu ava rembiepiave.

³² Ahe niha poroesapesa ité secoi.

Esepia, omboyecuaa mbahe supi eté vahe ava ndahei vahe judío yuvirecoi vahe upe, iyavei omondara poromboeteisa nde recua Israel pendar judío yuvirecoi vahe upe” ehi oyeruqui.

³³ José iyavei María ndoyembovihai tēi yuvireco pītani rese Simeón yeroqui renduse. ³⁴ Evocoyase Simeón osovasa ahe pītani iyésupa reseve. Ipare aipo ehi ichi María upe:

—Esendu, co pītani reroyaêhisa pipe setá yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboyecuaa mbahe ava upe. Amove rumo viroñoroñora yuvireco. ³⁵ Ipipe sui ava pihañemoñetasa icuasara curi. Iyavei co opacatu mbahe tasira nde piha pipe inungar quise pucu osasara nde piha viña —ehi chupe.

³⁶ Aheve avei cuña cuacuami yaracua vahe secoi, ahe serer Ana, Fanuel rayri, Aser suindar. Ocuñatamiseve rumo omenda, iyavei secoi raimi tēi omer rese siete araviter rupive.

³⁷ Cūrítei secoi omer mano pare ochenta y cuatro araviter. Nosei eté tūparo pipe sui oico. Ëgüe ehi yande Yar mboetei pītu, ari rupi oyecuacusa pipe iyavei oyeruresa pipe avei oico no. ³⁸ Ahe evocoyase ahesa reseve avei ou pītani upe, “Aviye ndeu” ehi Tūpa upe. Ipare oñehe secocuer rese opacatu ava Jerusalén pendar osãro vahe güecua pīsīro âgua upe oico.

Jesús pītani reroyevi agüer Nazaret ve

³⁹ Evocoyase opacatu Moisés porocuita mboaviyere, opa oyevi Galilea pendar güecua Nazaret ve yuvireco. ⁴⁰ Ahese pĩtani ocuacua catumi imbahecua-ecua irimi eté oico iyavei ipĩrata catu irimi. Esepia, Tũpa osovasa ité sereco no.

Jesús chĩhivahe tũparo pipe secoi

⁴¹ Iyesupa yuviraso araviter yacatu Jerusalén ve Pascua pieta repia yepi. ⁴² Jesús doce araviter virecose, ahese viraso iyesupa Jerusalén ve oyeupi pieta repia yuvireco. Esepia, ěgüe ehi eté judío recocuer pietase yuvireco yepi. ⁴³ Ahe pieta pare voi, oyevise yuvireco güecosave, ahese Jesús opitaño Jerusalén ve; ichi rumo iyavei tu José ndoicuai eté ipitase yuvireco. ⁴⁴ “Ouño revo ava pãhu rupi” ehi yuvireco chupe viña; aipo ehiño ité ñepi ari pipe yuvireco chupe. Oseca tẽise rumo omu pãhu rupi, iyavei omboripar pãhu rupi avei no, ⁴⁵ ndoyosui eté yuvireco. Ahese oyevi iri tẽi Jerusalén ve seca yuvireco.

⁴⁶ Imombosapisa ari pipe oyosu ramo tũparo pipe yuvireco. Aheve uguapi ava Tũpa porocuita rese oporombohe vahe pãhuve oĩ; oyapisaca iñehe rese iyavei oporandu-randu ahe ava upe Tũpa Ñehengagüer rese oĩ. ⁴⁷ Evocoyase opacatu ava ndoyembovichai tẽi imbahecua vaisa rese yuvireco. Esepia, oporanduse mbahe rese yuvireco chupe, omboyevi tupri voi-voiño ité ñehesa. ⁴⁸ Oyosuse iyesupa, oyepihamondĩ yuvireco. Ahese ichi aipo ehi chupe:

—Che membri, ¿mahera vo ěgüe ere eico oreu? Nde recasa tẽi opacatu rupi, ore mopihañemoñeta ati uca eve —ehi.

⁴⁹ Evocoyase,

—¿Mahera vo che reca co coti rupi tẽi peye peico? ¿Ndapeicuai vo che Ru rēta pipe aico vaherã? —ehi osi upe.

⁵⁰ Iyesupa rumo ndosenducuai eté aipo oyeupe hesa yuvireco.

⁵¹ Evocoyase oyevi Nazaret ve oso supi. Aheve omboyeroñaño ité oyesupa. Ichi niha opacatu co mbahe rese oyapisacaño ité. ⁵² Ahese Jesús ocuacua-cuacua iri, iyetei catu avei imbahecua catu iri avei oico no. Secoi tupri ai eté Tũpa upe iyavei ava eta upe avei no.

3

Juan Oporoãpiramo vahe secoi ivi iporupirẽhisa rupi

¹ Quince araviter pipe mborereciar guasu Tiberio recose, Poncio Pilato evocoyase mborereciar secoi Judea rupi, Herodes avei mborereciar secoi Galilea ve, tivri Felipe evocoyase mborereciar secoi Iturea ve iyavei Traconite ve, Lisantias avei mborereciar secoi Abilinia ve. ² Anás iyavei Caifás ahe pahĩ rereciar ivate catu vahe yuvirecoi. Ahese

Tūpa, “Emombehu che ñehe ava upe cute” ehi Zacarías rahir Juan upe oico ivi iporupirēhisave. ³ Juan evocoiyase oso opacatu iai Jordán ivi oico, supi aipo ehi ava upe: “Pembosi pe angaipa, peyevi Tūpa upe, ahese opoāpiramora Tūpa pēu ñero āgua pe angaipa rese” ehi. ⁴ Co yaviye ité Tūpa ñehe mombehusar Isaías rembicuachiagüer pipendar aipo ehi vahe:

“Sendusa ivi iporupirēhisave ava sapucaisa aipo ehi vahe: ‘Pemoingatu yande Yar raperã, pemohivi tupri avei’ ehi.

⁵ ‘Evocoiyase opacatu ivisocuer opara imboapiposa chupe, opacatu ivitri ivate vahe iyavei ivitri mini opara imboyasa tupri no.

Acoi peri ipãri vahe, ahe imohivisapara; peri ipicucu ati vahe opara imboapiposa tupri chupe.

⁶ Iyavei opacatu ava osendura ñehesa pīsirosa resendar Tūpa remimbou yuvireco cute’ ehi vahe” ehi.

⁷ Ava rehii yuvinosesepa chupe ‘tayande āpiramo’ oyapave yuvireco viña. Ahe rumo aipo ehi: “¡Pe mboi mboetasa tēi peico! ¿Ava vo, ‘Pesēra Tūpa ñemoirosa ou vaherã sui’ ehi tupri tēi pēu? ⁸ Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tēi peñepisiro āgua. Esepia, Tūpa oicatuño ité co ita sui Abraham suindar nungar tupri apo āgua oyeupe nara yepi. ⁹ Hacha niha imoingatusa voi eté opacatu ivira iha naporai vahe sapo rupi yasia āgua yepi. Yasiapri evocoiyase imondosapara tatave” ehi.

¹⁰ —¿Mbahe pñha evocoiyase oroyapora ore recocuer recuñaro āgua oroico? —ehi ava rehii oporandu yuvireco chupe.

¹¹ —Pe pereco vahe ñuvirío pe camisa, ñepeí pemondo ava ndovirecoi vahe upe; iyavei pe pereco vahe tembihu, pemboyahomi tēi ambuae ava ndovirecoi vahe upe —ehi imboyevi ava upe.

¹² Yugüeru avei moviro ava sui guarepochi rerocuar ‘tayande āpiramo’ oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tūpa rupi ore guata āgua oroico? —ehi yuvireco chupe.

¹³ Evocoiyase aipo ehi ahe ava yuvirecoi vahe upe:

—Aní perocua catu iri guarepochi pēu imombehusa sui —ehi.

¹⁴ Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe tēi chira ava upe sembiapoēhi rese, iyavei peyembovihañora pe poraviqui repri rese —ehi sundao upe.

¹⁵ Ava rumo, “¿Ndahei pīha co Poropīsirosar sãrombri secoi?” ehi tēi Juan upe yuvireco. ¹⁶ Juan rumo aipo ehi opacatu ava upe: “Che opoãpiramo i pipe tēi; oura rumo ambuae che raquicuei, ahe pe ãpiramora Espíritu Santo tata nungar pipe. Ahe seco pīrata catu vahe secoi che sui. Sese cheu ndiyai eté ahe ipitaquisã yora ãgua ichui” ehi. ¹⁷ “Ahe güeru trigo mbovevesa ihigüer sui ipeha ãgua. Sãhi evocoiyase yapocatusa, ihigüer rumo imondosa tata apirēhi vahesave” ehi ava upe.

¹⁸ Omombehu-mbehu vite ñehesa aviye vahe ava upe ‘toye-monguerēhi güecocuer recuñaro ãgua yuvireco’ oya. ¹⁹ Ipare rumo Juan oñehe pīrata mborerecuar Herodes upe secocuerai rese. Esepia, vivri Felipe rembireco Herodías rese secoi, iyavei setá ambuae mbahe naporai vahe sembiapo. ²⁰ Sese Herodes oyapoño ambuae mbahe tēi: seroyaēhisa pipe osoquenda ucaño Juan sereco.

Jesús ãpiramosa

²¹ Yipindar rumo voquenda viteēhiseve Juan oñapiramo setá ava oico, aheseve avei oñapiramo Jesús. Jesús yerure viteseve, aviyeteramo tēi oyemboi tupri iva. ²² Ipare Espíritu Santo ogüeyi ou iharive apicasu nungar, iyavei oyeendu ñehesa iva sui aipo ehi vahe:

—Nde che Rahir ereico, che rembiaisu; sese aviha ité nde rese —ehi.

Ava eta oyesu vahe Jesucristo yesu renondeve

²³ Jesús virecose treinta araviter, ahese ramo omboipi oporombohe. Ahe icuapri vahe ité José rahir secose viña. José Elí rahir secoi, ²⁴ Elí evocoiyase Matat rahir, ahe Matat evocoiyase Leví rahir, Leví evocoiyase Melqui rahir, ahe Melqui evocoiyase Jana rahir, Jana evocoiyase José rahir, ²⁵ ahe José Matatías rahir, Matatías evocoiyase Amós rahir, ahe Amós evocoiyase Nahúm rahir, Nahúm evocoiyase Esli rahir, ahe Esli Nagai rahir, ²⁶ Nagai evocoiyase Maat rahir, ahe Maat Matatías rahir, Matatías evocoiyase Semei rahir, ahe Semei evocoiyase Josc rahir, Josc evocoiyase Judá rahir, ²⁷ ahe Judá Joanán rahir, Joanán evocoiyase Resa rahir, ahe Resa evocoiyase Zorobabel rahir, Zorobabel evocoiyase Salatiel rahir, ahe Salatiel Neri rahir, ²⁸ Neri evocoiyase Melqui rahir, ahe Melqui Adi rahir, Adi evocoiyase Cosam rahir, Cosam evocoiyase Elmadam rahir, Elmadam evocoiyase Er rahir, ²⁹ ahe Er Jesús rahir, Jesús evocoiyase Eliezer rahir, ahe Eliezer Jorim rahir, Jorim evocoiyase Matat rahir, ³⁰ ahe Matat Leví rahir, Leví evocoiyase Simeón rahir, ahe Simeón evocoiyase Judá rahir, Judá evocoiyase José rahir, ahe José

Jonam rahir, Jonam evocoyase Eliaquim rahir, ³¹ Eliaquim Melea rahir, ahe Melea Mena rahir, Mena evocoyase Matata rahir, ahe Matata evocoyase Natán rahir, ³² Natán David rahir, ahe David evocoyase Isaí rahir, Isaí Obed rahir, ahe Obed evocoyase Booz rahir, Booz Sala rahir, ahe Sala evocoyase Naasón rahir, ³³ Naasón Aminadab rahir, ahe Aminadab evocoyase Admin rahir, Admin evocoyase Arni rahir, Arni evocoyase Esrom rahir, ahe Esrom evocoyase Fares rahir, Fares evocoyase Judá rahir, ³⁴ ahe Judá Jacob rahir, Jacob evocoyase Isaac rahir, ahe Isaac Abraham rahir, Abraham evocoyase Taré rahir, Taré evocoyase Nacor rahir, ³⁵ ahe Nacor Serug rahir, Serug evocoyase Ragau rahir, ahe Ragau evocoyase Peleg rahir, Peleg Heber rahir, ahe Heber evocoyase Sala rahir, ³⁶ Sala Cainán rahir, ahe Cainán evocoyase Arfaxad rahir, Arfaxad evocoyase Sem rahir, ahe Sem evocoyase Noé rahir, Noé evocoyase Lamec rahir, ³⁷ ahe Lamec Matusalén rahir, Matusalén evocoyase Enoc rahir, Enoc evocoyase Jared rahir, ahe Jared Mahalaleel rahir, Mahalaleel evocoyase Cainán rahir, ³⁸ ahe Cainán evocoyase Enós rahir, Enós evocoyase Set rahir, ahe Set Adán rahir, Adán evocoyase Tūpa rahir.

4

Jesús recoãhasa

¹ Jesús Espíritu Santo rese ité secoi. Ahe osẽ iai Jordán sui oso. Ipare Espíritu viroguata ivi iporupirẽhisa rupi. ² Aheve cuarenta ari secoise Carugar osecoãha. Ndocarui avei oico. Sese ndasiepoi eté. ³ Carugar evocoyase aipo ehi chupe:

—Tūpa Rahir ité nde recose, co ita sui eyapo pan cūritei — ehi.

⁴ Evocoyase Jesús omboyevi chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvirecovera’ ehi — ehi Carugar upe.

⁵ Ipare Carugar viraso ivate vahesave. Aheve ñepeí reseve opacatu ava-ava tẽi mborerecuasa ivi pipendar omboyecua chupe. ⁶ Ipare aipo ehi chupe:

—Che amondora opacatu ivi rupindar mborerecuar pĩratasa iyavei mbahe porañete vahe nde povrive. Esepia niha, co opacatu cheu imboupri; iya ité amondo vaheřã ava upe che remimbotar rupi. ⁷ Acoi ereñenopiřase cheu che mboetei ãgua, ahesẽ opacatu co mbahe ereipiřisira nde mahera — ehi tẽi Carugar chupe.

⁸ —Icuachiapri pipe rumo: ‘Emboetei nde Yar Tūpa, ahe güeraño tupri avei eremboyeroyara’ ehi — ehi Carugar upe.

⁹ Ipare Carugar viraso oyeupi tecua guasu Jerusalén ve. Aheve ovíroyeupi tũparo apíterve. Aheve Carugar aipo ehi chupe:

—Tũpa Rahír ité nde recose, eviapi cohava sui. ¹⁰ Esepia niha, icuachiapri pipe:

‘Tũpa oyocuaíra güembiguaí eta nde rãro ãgua.

¹¹ Ahe nde mopuhara yuvíreco que ñepei ita nde momara rãgüer sui’ ehi —ehi Carugar chupe.

¹² Evocoiyase omboyeví Carugar upe:

—¡Aní! Icuachiapri pipe niha aipo ehi avei: ‘Ndereseoãhai chira nde Yar Tũpa’ ehi —ehi chupe.

¹³ Ahese Carugar ndoicatu iri eté Jesús recoãha ãgua oico. Ipare oyepepiño raimi tēi oso ichui.

Jesús omboipi oporombohe Galilea rupi

¹⁴ Jesús, Espíritu Santo reco pĩratasa pipe, oyeví oso Galilea ve. Ipare serãcua oguata opacatu tecua-tecuami rupi.

¹⁵ Esepia, ahe oporombohe judío tũparo pipe oico. Ahese opacatu ava omboetei yuvíreco.

Jesús oyeví Nazaret ve

¹⁶ Ichui Jesús oyeví Nazaret ve ocuacua agüerve. Aheve judío mbituhusa ari pipe oique tũparove inungar oyapo yepi.

Ahese opũha ‘tayeroqui icuachiapri maranehi pipe’ oya.

¹⁷ Evocoiyase tũparo rese ñangarecuar pĩtívĩisar omondo Tũpa ñehe mombehusar Isaías rembicuachía chupe. Oyorase ahe cuachiar, oyeruqui icuachiapri aipo ehi vahe pipe ohã:

¹⁸ —“Yar Espíritu secoi che rese.

Esepia niha, ahe ombou che cuaitarã cheu co ñehesa aviye vahe mombehu ãgua ava iparaisu vahe upe.

Che cuaita avei ava mbahe-mbahe tēivriye yuvírecoi vahe senose ãgua ichui, iyavei ava ndasesapisoí vahe ambosarecora; iyavei che cuaita ava mbahe-mbahe tēi rasicuer oiporara vahe sui senose ãgua,

¹⁹ iyavei ‘cūritei Yar oyemoingatu oporovasasa mondo ãgua pēu’ he ãgua” ehi icuachiapri pipe

—ehi oyeruqui.

²⁰ Sese oyeruqui pare, oyapoapipa cuachiar imondo tũparo rese ñangarecuar pĩtívĩisar upe. Ipare oguapi oĩ ava rembiepiave. Ahese opacatu tũparo pipendar omahe ati yuvíreco sese.

²¹ Evocoiyase ahe oñehe aipo ehi:

—Cūritei yaviye co icuachiapri pipendar opacatu pe rovaque —ehi.

²² Opacatu ava oñehe tupriño ité yuvíreco sese. Ndoyembovíhai tēi iñehe tupri renduse yuvíreco. Oporandu-randu rumo yuvíreco oyeupe:

—¿Ndahei vo acoi co José rahir tēi? —ehi yuvireco chupe.

²³ Ahe rumo aipo ehi ava upe:

—Pe aipo peyera cheu: ‘Oporombogüera vahe, eñeposano nde ae eico’ peyera. Ipape aipo peyera cheu: ‘Acoi orosendu vahe nde rembiapogüer Capernaum pipe, Ëgüe ere avei eyapo cohawe nde recua pipe ité’ peyera cheu —ehi.

²⁴ —Supi eté, ndipoi eté niha que ñepei yepe Tüpa ñehe mombehusar oipisi tupri vahe güecua pipe yuvireco yepi. ²⁵ Supi tupri ité Tüpa ñehe mombehusar Elías recose, ñehe rupi tupri ndoquii eté mbosapi araviter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña, ²⁶ Tüpa rumo nomondoi Elías cuña imer mano vahecuer Israel pendar upe ipitivi ñgua. Ëgüe ehi rumo omondo cuña ndahei vahe Israel pendar ipitivi ñgua. Ahe cuña tecua Sarepta pendar, ahe Sarepta Sidón ipimindar. ²⁷ Iyavei setá ava oime Israel recua pipendar imbaheasi vahe lepra rerecosar yuvireco evocoi Tüpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepei ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

²⁸ Ahese opacatu ava judío tüparo pipendar oñemoiró iteanga yuvireco sese aipo mbahe renduse. ²⁹ Sese opa voi eté opüha Jesús reraso ñgua tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña. ³⁰ Jesús rumo ipãhu sui osé tupriño oso.

Jesús ombogüera mbia carugar vireco vahe oyese

³¹ Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pipe. ³² Ipape opacatu ava, “¡Mara ehi rutei!” ehi tēi iporombohesa renduse yuvireco. Esepia niha, ahe oñehe güeco pīratasa pipe.

³³ Aheve judío tüparo pipe oime mbia vireco vahe carugar oyese, ahe oñehe pīrata Jesús upe:

³⁴ —¡Ore mañeco tēi eme eve! ¡Mahera ereyuño tēi cohawe oreu, nde, Jesús Nazaret pendar! ¿Ereyu vo ore mocañi ñgua tēi? Che orocua ité. Nde niha seco maranehi vahe ereico Tüpa suindar —ehi chupe.

³⁵ Evocoiyase,

—¡Quiriri, esé co mbia sui! —ehi oñehe pīrata carugar upe.

Ahese carugar omboviapi ahe mbia ava rovai, osé ocua ichui; nomomarai eté rumo. ³⁶ Opacatu ava oyembosiquiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbia opīratasa pipe oyocuai carugar ava sui imose ñgua! —ehi yuvireco.

³⁷ Sese Jesús rerãcua oyandu opacatu tecua-tecuami ivirindar yuvireco.

Jesús ombogüera Simón Pedro rembireco si

³⁸ Evocoyase Jesús osẽ judío tũparo pipe sui oso, oi que Simón Pedro rêtave. Simón rembireco si sohí iteanga ou. Evocoyase oñehe ahe pendar sese Jesús upe ‘tombogüerami tẽi’ oyapave yuvireco. ³⁹ Evocoyase Jesús oyeaivi oso chupe sohí sui imbogüera ãgua. Ocuera pare voi ahe cuña oñarapuha; ohañeco ahe ava yuvirecoi vahe rese.

Jesús ombogüera setá ava imbaheasi vahe

⁴⁰ Ari so ramomise opacatu ava imbaherasisa ambuae tẽi vahe güeru Jesús upe yuvireco. Ahe evocoyase opo omondo iyacatu iharive ñepe-pe imbogüera. ⁴¹ Iyavei setá ava sui opa omoose carugar. Evocoyase carugar osapucaí tẽi aipo ehi yuvireco:

—¡Nde acoi Tũpa Rahir ité ereico! —ehi.

Ahe rumo oñehe pĩrata carugar upe, nomoñehe iri. Esepia niha, carugar oicua ité ahe Tũpa Rembiporavo seco rese yuvireco.

Jesús oporombohe judío tũparo rupi oico

⁴² Ahere ayihive cõhe ramomise, Jesús osẽ tecua pipe sui, oso ivi iporupirẽhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoẽhi ãgua ité yuvireco vinã. ⁴³ Ahe rumo aipo ehi ava eta upe:

—Tamombehu rane catu ambuae tecuave avei ñehesa aviye vahe Tũpa mborerecuasa resendar ava upe. Esepia, aherã niha che mbousa —ehi.

⁴⁴ Ëgüe ehi Jesús oguata oporombohe Judea tũparo rupi oico.

5

Pira mboha ati agüer

¹ Ñepeí ari Jesús secoi ipa Genesaret popi rupi. Aheve ava rehí oyepota yuvireco chupe, oyere ati yuvireco sese. Esepia niha, ahe osendu pota ité Tũpa Ñhengagüer yuvireco. ² Aheve oime ñuvirío carite imbehí popive. Ahe ava pira mbohasar opa yuvínose evocoi carite pipe sui yuvireco. Ipare opira mbohasa oyosei yuvinoi. ³ Evocoyase Jesús osepiase, oha Simón carite pipe iyavei aipo ehi chupe: “Tosirí catumi tẽi chĩhi coi coti iaí popi sui” ehi. Ipare oguapí oĩ carite pipe. Aheve ombohe ava cute. ⁴ Oñehe pare aipo ehi Simón upe:

—Yaso ipa tipí catu vahesave. Aheve erembohara pira —ehi.

⁵ Simón rumo omboyevi chupe:

—Porombohesar, orosãha tēi niha pītu momba pira mboha oroico. Nde porocuita pīpe rumo amondo irira pira mbohasa ive —ehi.

⁶ Ēgüe ehise, pira rehii omondoromi ombohasa yuvireco. ⁷ Ahese oyaiti yuvireco omboetasa evocoi ambuae carite pīpe yuvirecoi vahe upe ‘toyugüerumi yande pītivii’ oyapave yuvireco chupe. Ahe yugüeru chupe. Ipare opa ñuvirío carite omboapīpo tupri yuvireco; seni iri rumo omondo ipive. ⁸ Co mbahe repiase, Simón Pedro oñenopiha oso sovai aipo ehi chupe:

—¡Eyepepimi tēi che sui, che Yar! ¡Esepia, che yangaipa vahe tēi aico! —ehi.

⁹ Esepia, Simón iyavei opacatu ava yuvirecoi vahe supi osiquiyé iteanga co pira rehii repiase yuvireco. ¹⁰ Iyavei Simón mboetasa ambuae carite pīpendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pīpe suive inungar pira eremboha, ěgüe ere aveira ava reca cheu nara —ehi.

¹¹ Evocoiyase opa vinose carite ivi ātasave yuvireco, oseya-paño opacatu mbahe. Ipare yuviraso supi.

Jesús ombogüera ava lepra rerecosar

¹² Ñepeí ari Jesús secoise tecua pīpe, aheve oime mbia lepra vireco vahe opacatu güetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereipotase, iya nde che mbogüerami eve —ehi chupe.

¹³ Evocoiyase, opocose sese,

—Aipota. ¡Erecuerara cūritei! —ehi chupe.

Aipo ihe ramoseve voi eté ocuera. ¹⁴ Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipare eicuavēhe nde porerecosa nde cuerasa resendar Moisés porocuita rupi. Ipīpe sui toicua opacatu ava nde cuerasa yuvireco —ehi chupe.

¹⁵ Jesús rerācua rumo oyembouvicha catu-catu iri eté. Evocoiyase setá ava oyemboya yuvireco sese iñehe rendu āgua ‘tayande mbogüerami tēi yande mbaherasisa sui’ oyapave yuvireco. ¹⁶ Ava rehii sui rumo amove Jesús oyepepiño ahe aemi oyerure āgua yepi.

Jesús ombogüera ava ndoguatai vahe

¹⁷ Ñepeí ari Jesús oporombohe oico. Yar Tūpa pīratasa vireco oyese ava mbogüera āgua. Aheve avei uguapi yuvinoi fariseo, Moisés porocuita rese oporombohe vahe avei ipiri yuvireco. Ahe yugüeru opacatu Galilea tecua-tecuami rupi sui

yuvireco. Ivi Judea rupi sui, tecua Jerusalén sui avei yugüeru no. ¹⁸ Ahese ava ndoguatai vahe güeru supa pipe yuvireco. Viroique pota oi pipe sovai eté seroyi ñgua yuvireco viña; ¹⁹ ndoicatui eté rumo seroique yuvireco ava rehi pãhu rupi. Evocoyase viroyeupi yeupisa rupi ahe oi ipe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai. ²⁰ Ahe oicuaase co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

²¹ Ichui oporombohe vahe Moisés porocuaite rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tūpa ñehe nungar pipe tēi; Tūpaño ité niha oicatu ava angaipa upe oñero ñgua” ehi tēi oyeupe yuvireco.

²² Ahe rumo oicuaño ité ahe ava pihañemoñetasa. Evocoyase aipo ehi chupe:

—¡Mahera vo pepihañemoñeta rai tēi che rese! ²³ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pãha, anise: ‘Epũha, eguata’ hesa tie? ²⁴ Tapeicua ru che, Ava Riquehir, areco ité mborerecuasa co ivi pipe ava angaipa upe che ñero ñgua —ehi.

Evocoyase,

—Eñarapuha, esupi nde rupa, eso nde rētave —ehi imbaheasi vahe upe.

²⁵ Ahese opũha voi ava rovaque, osupi vupagüer. Ipare osapucái oso güetave Tūpa upe. ²⁶ Ahese opacatu tupri ité ava, “¡Too! ¿Mara ehi rutei pãha co?” ehi tēi imboeteisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepiái vahe ité —ehi.

Jesús oñehe Leví upe

²⁷ Ichui osēse Jesús, osepia mbia Roma ve nara guarepochi rerocuasar Leví serer vahe, ahe guarepochi rerocuasave chini. Sepiase,

—Erio che rupi —ehi chupe.

²⁸ Evocoyase Leví opũha. Oseyapa oporaviquisa, oso supi.

²⁹ Ipare Leví oyapo pieta guasu chupe nara güetave. Aheve iyemboisave setá imboetasa ava guarepochi rerocuasar iyavei ambuae ava ocaru yuvinoi ipiri. ³⁰ Pieta repiasar fariseo yuvirecoi vahe rumo iyavei ipãhu pendar Moisés porocuaite rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¡Mahera ru pecaru iyavei pecahu guarepochi rerocuasar rese iyavei ambuae ava yangaipa guasu vahe rese tēi avei no! —ehi.

³¹ Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco. ³² Esepia, che ndayui ava seco catupri vahe reca; che rumo ayu ava yangaipa vahe reca Tüpa uve iyevi ãgua yuvireco —ehi.

Yecuacusa rese ñehesa

³³ Ipare ava oporandu yuvireco chupe:

—¿Mahera vo oyecuacu serai iyavei oyerure Juan Oporoãpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

³⁴ Ahe rumo omboyevi chupe aipo ehi:

—Ndiyai eté ichohopri mboyecuacu mendasave imer oicove viteseve ipãhuvé. ³⁵ Oimera rumo ari imer reraso ãgua ichui, ahese ramo oyecuacura yuvireco cute —ehi.

³⁶ Iyavei ambuae mbahe rese oporombohe imboyevi ãgua:

—Ndiyai eté ava upe virocua vaheñã turucuar ipiasu vahe sui ambuae turucuar cuacuami vahe apete ãgua. Esepia niha, ãgüe ehise evocoyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—. ³⁷ Iyavei no, ndiyai eté ñoñasa uva ricuer piasu mbahe pিরer cuacua pipe no. Esepia niha, ãgüe ehise, uva ricuer piasu evocoyase opara ombopu mbahe pিরer cuacua viña, ãgüe ehira oyepiyerepa, mbahe pিরer avei evocoyase ocañi tẽira viña. ³⁸ Uva ricuer piasu rumo yamondora mbahe pিরer piasu pipe. ³⁹ Iyavei ndipoi eté que ava oihu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

6

Jesús remimbohe oipoho trigo mbituhusa ari pipe yuvireco

¹ Ñepeí mbituhusa ari pipe Jesús viroguata güemimbohe mbahe miti pãhu rupi. Semimbohe evocoyase oipoho-poho yuviraso trigo rãhií. Ipare oyequii opo pipe sãhií yuvireco igua. ² Evocoyase fariseo osepiase, aipo ehi yuvireco semimbohe eta upe:

—¡Mahera peporaviquiño tẽi co mbituhusa ari pipe peico! —ehi.

³ Jesús rumo omboyevi chupe:

—Peicua tẽi niha icuachiapri arachendar mborerecuar guasu David rembiapogüer resendar ñehesa ondugüer reseve ndasiempoise yuvireco. ⁴ Ahe niha oique ité Tüpa rẽta pipe, opoco pan imboeteipri Tüpa upendar rese evocoi pahí upe

güeraño ipotasa vahe ihu ägua yepi. Ahe rumo ohu, ondugüer tohu avei omondo —ehi.

⁵ Iyavei aipo ehi chupe:

—Ava Riquehir mbituhusa ari rerecuar ité secoi —ehi fariseo upe.

Jesús ombogüera mbia ipo nomii vahe

⁶ Ambuae mbituhusa ari pipe, Jesús oi que judío tũparo pipe oporombohe oico. Aheve mbia yasu coti ipo nomii vahe secoi. ⁷ Moisés porocuita rese oporombohe vahe, fariseo avei omahengatu Jesús rese yuvireco ‘¿ombogüerara pïha co mbia mbituhusa ari pipe?’ oya; ‘yaiñhengapo angahu’ oya-pave tēi yuvireco. ⁸ Ahe rumo oicuaño ité ipihañemoñetasa oico. Ipare aipo ehi evocoi mbia ipo nomii vahe upe:

—Epũha cohava terehã ava pãhuve —ehi.

Ahe mbia evocoyase opũha, opita aheve ohã ⁹ Ahesé Jesús oporandu ahe ava upe:

—Aporandura mbahe rese pẽu —ehi—. ¿Mbahe vo yaposara mbituhusa ari pipe yepi, mbahe tupri pïha, anise mbahe naporai vahe tie? ¿Yaipĩsiro pïha ava recocuer; yamocañi uca tēi tie? —ehi.

¹⁰ Evocoyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yiva —ehi.

Ahe mbia evocoyase oichoho oyiva; evocoyase ipo ocuera tupri ité. ¹¹ Evocoyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pïha imomara ägua?’ oya.

Jesús oiporavo doce tupri güemimboherã

¹² Ahe ari rupi Jesús oso ivitri ve, oyerure pĩtu momba tupri Vu upe oico. ¹³ Cõhese, “Periõ” ehi güemimbohe eta upe. Ipãhu sui oiporavo doce tupri, ahe chupe, “Apõstol” ehi. ¹⁴ Co ahe yuvirecoi: Simõn, ahe acoi Pedro avei serer; Andrés Simõn rivri; Santiago, Juan, Felipe, iyavei Bartolomé; ¹⁵ Mateo, Tomás, Santiago Alfeo rahir; Simõn, ava güecua rese secatēhi vahe pãhu pendarer; ¹⁶ Judas Santiago rivri; iyavei Judas Iscariote, ahe omondo vahe Jesús yamotarēhimbar uve.

Jesús ombohe ava rehii

¹⁷ Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava egüe ehi iñehe rendu potasave yuvireco ‘tayande mbogüerami tēi yande mbaherasisa sui’ oyapave

yuvireco. ¹⁸ Acoi espíritu naporai vahe remimombaraisu avei ocuera tupri yuvireco. ¹⁹ Evocoyase opacatu ava opoco pota ité sese yuvireco. Esepia niha, ahe oporombogüera opacatu güeco pĩratasa pipe oico.

Ava sorivete vahe iyavei ava ndoyembovihal vahe

²⁰ Ipare omahe Jesús güemimbohe rese aipo ehi chupe:

“Perorivete catu pe iparaisu vahe. Esepia niha, Tũpa mborerecuasa pũu nara ité secoi.

²¹ “Perorivete catu cũriteindar ndasiepoi vahe. Esepia niha, pehĩtarora peico curi.

“Perorivete catu pe acoi ava cũritei oyaseho vahe. Esepia niha, peviharetera coiye peico.

²² “Perorivete catu pe acoi ava pe amotarẽhise, pe mboyepepiñose avei oyesui yuvireco, iñehe-ñehe tẽise yuvireco pũu pe amotarẽhisave, iyavei acoi viroĩrose pe rer mbahe tẽi pipe che, Ava Riquehir, recocuer sui tẽi yuvireco. ²³ Peyembovĩaño iyavei perorivete catuñora ahe arĩ pipe peico. Esepia niha, ipare peipisira porerecosa tuvichá vahe ivave. Ēgũe ehi tupri avei evocoi ava ramoĩ aracadendar mara-mara tẽi Tũpa ñehe mombehusar sereco yuvireco” ehi.

²⁴ “¡Peparaisu catu rumo cũritei mbahe yar peico vahe! ¡Esepia niha, pemboaviye pe rorivetesa peico!

²⁵ “¡Peparaisu catu acoi pe ihĩtaro vahe cũritei! ¡Esepia niha, ndaperiepoi chira peico coiye!

“¡Peparaisu catu acoi peviha vahe pe pietase cũritei! ¡Esepia, peyasehora pe viharẽhisa pipe peico coiye!

²⁶ “¡Peparaisu catu acoi peipisi vahe pe mboeteisa opacatu co ivi pipendar ava tẽi sui! ¡Esepia niha, Ēgũe ehi tupri tamoi Tũpa ñehe mombehusar angahu tẽi vahe upe yuvireco aracahe!” ehi.

Iyacatu yasaisu yande amotarẽhimbar

²⁷ “Pe che ñehe rese peyapisaca vahe upe rumo aipo ahe: Pesaisu ava pe amotarẽhimbar; peyapo tupri mbahe aviye vahe ava nape ambotai vahe upe. ²⁸ Peporandu Tũpa porovasasa rese ava pũu iñehe-ñehe tẽi vahe upe nara; peyerure Tũpa upe pũu mbahe tẽi oyapo vahe recocuer rese. ²⁹ Acoi que pe amotarẽhimbar pe rovapetese, co cotindar avei pemoporẽhiñora chupe. Iyavei acoi que ava virocuaño tẽise pe yeasa pe sui, toviraso avei pe yemondesa güemimbotar rupi” ehi. ³⁰ “Acoi oporanduse que pe mbahe rese yuvireco pũu, pemondoño avei chupe. Iyavei acoi que ava virocuaño tẽise pe mbahe pe sui, ndapeporandui chira pũu imboyevi água rese. ³¹ Acoi mbahe peipota vahe ambuae ava oyapo vaherã pũu, ahe tupri avei peyapora chupe.

³² “Acoi ava pe raisupar güeraño pesaisu catu tēise, ndipoi eté mbahe aviye vahe ipipe. Esepia niha, ava naporai vahe ěgüe ehi yuvireco yepi. ³³ Anise, acoi ava mbahe tupri ai oyapo vahe pēu, chupe güeraño mbahe tupri peyapose, ¿mbahe vo evocoyase oime aviye vahe ipipe? Esepia niha, ava angaipa viyar avei ěgüe ehi yuvireco yepi. ³⁴ Acoi pemondoño tēise mbahe ava upe ‘tomboyevi mbahe cheu’ pe hesave, ¿mbahe vo evocoyase oime aviye vahe ipipe? Esepia niha, ava angaipa viyar ěgüe ehi avei yuvireco. ³⁵ Pe rumo pesaisu catura ava pe amotarēhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasãroño rane mbahe cheu imboyevi ãgua vichico’ ndapeyei chietera. Ahese oimera porerecosa aviye catu vahe pēu. Pe evocoyase Tūpa seco ivate catu vahe rahir peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei. ³⁶ Pe peporoparisuereco inungar pe Ru Tūpa oporoparisuereco yepi” ehi.

Ndiyai ambuae ava seroĩrosa

³⁷ “Ndiyai, ‘Oyavi ité mbahe’ peye voiño tēi ambuae ava upe. Evocoyase Tūpa, ‘Oyavi mbahe’ ndehi chira pēu. Pemocañi uca tēi eme ambuae ava. Evocoyase Tūpa ndape mocañi tēi chira. Peñeroño catu ambuae ava upe, ahese Tūpa iñero itera pēu. ³⁸ Pemondose mbahe ava upe, evocoyase Tūpa omondoño itera mbahe aviye vahe pēu inungar-ra omondo pe mbahe riru pipe pēu sãhambri tupri aviye vahe viña. ěgüe ehira mbahe imondo pēu. Tūpa oicua tupri itera pēu inungar pe mbahe pemondo ambuae ava upe” ehi.

³⁹ Ipare Jesús omombehu co ambuae porombohesa: “¿Oicatu pĩha ñepe ndasesapĩsoi vahe ambuae ndasesapĩsoi vahe reroguata? ¡Aní eté! Esepia, oyoya voi oviapira que ivicuar pipe yuvireco viña. ⁴⁰ Ñepe yepi niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar” ehi.

⁴¹ “¿Mahera ambuae ava rembiavimi rese tēi pemahe? Iya rumo peyese rane mbahe tuvicha catu vahe pesepiara. ⁴² Ndiyai pēu, ‘Che toropĩtivi mbahe nde rembiavi rese’ peye vaherã chupe. Esepia, pe peyavi guasu catu mbahe. ¡Pe Tūpa reroyasar angahu tēi peico vahe! Penose uca rane pe rembiavi tuvicha catu vahe peyesui, ahese ramo ambuae ava rembiavi tahimi vahe moingatu peicatura” ehi oporombohe.

Ava recocuer icuasa sembiapo rese

⁴³⁻⁴⁴ “Ivira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira sãchi ati vahe sui higuera ha,

iyavei ndahipohosai uva, yu pãhu sui. ⁴⁵ Ēgüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri opiha pipe yepi. Iyavei acoi ava ndaseco põrai vahe oyapo mbahe tõi. Esepia niha, ahe vireco mbahe tõi eté opiha pipe yepi. Esepia niha, pe piha pipe sui tõi osẽ pe ñehe ãgua” ehi.

Ava oyemoviracua vahe iyavei ndoyemoviracuai vahe Jesús reroysave

⁴⁶ “¿Mahera vo, ‘Che Yar, che Yar’ peye tõi peico cheu; ipare ndapeyapoi eté mbahe che remimombehu? ⁴⁷ Amombehura rumo mbahe pẽu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu: ⁴⁸ ahe inungar tupri ité acoi ava oyapo vahe güõtara ita harive yepi. Yipindar rumo oyoho picucu rane ité ita harive imopuha ãgua. Yepe ahe oi upe oyepota tõi ivitu ai, amarusu reseve oinupa pĩrata tõi, nomboyerocuai eté rumo. Esepia niha, vireco ité ovĩracuasa. ⁴⁹ Acoi ava che ñehengagüer rese ndoyapisacai vahe rumo, ahe ndoyavii acoi ava oyapo vahe güõtara ivi cuhi harive tõi, ndovirecoi eté ovĩracuasa. Ipare amar, ivitu ai reseve oinupa pĩratá, opaño omonduru; ocañi tõi eté evocoiyase” ehi Jesús ava mbohe.

7

Jesús ombogüera chĩhivahe sundao rerecuar Roma iguar remimboacua

¹ Jesús oñehepase ava upe oico, oso Capernaum ve. ² Ahe tecua pipe sundao rerecuar ndahei vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité. ³ Jesús rerãcua anduse rumo, oyocuai moviro tõi omboripar judío imboeteipri chupe iñehe ãgua ‘toumi tõi che remimboacua mbogüera’ oyapave. ⁴ Ahe judío evocoiyase oyemboya Jesús rese yuvireco iyavei oporandu yuvireco chupe aipo ehi:

—Ore mboripar sundao rerecuar oipota nde ereyapomi tẽira mbahe icatupri vahe chupe viña. ⁵ Esepia niha, ore raisu iyavei ahe teieté oyapo uca tũparo oreu nara —ehi yuvireco chupe.

⁶ Evocoiyase oso ahe yuvirecoi vahe rupi. Virovise rumo sẽta yuvireco, ahese sundao rerecuar omondo ambuae omboripar chupe. Imboripar evocoiyase omombehu iñehe aipo ehi vahe: “ ‘Che Yar, ereyemañecoi rene. Esepia niha, ndiyai eté che rẽta pipe nde reique ãgua. ⁷ Sese niha che teieté ndaso nde reca. Nde ñehe pipe tõi rumo che remimboacua erembogüerara. ⁸ Esepia, che avei niha areco che cuaita. Iyavei areco sundao che voya. Eso peve, ahese ñepeu upe, ahe

evocoyase oso voi eté; ambuae upe: Erio, ahese, ou voiño ité cheu. Ipape, Ereyapora co mbahe, ahese che rembiguai upe, ahe evocoyase che reroyaño voi' ehi ore mboripar" ehi Jesús upe yuvireco.

⁹ Aipo oyeupe hese Jesús, "¡Too!" ehi. Ipape aipo ehi vupindareta upe:

—Supi eté ndasepiai vahe ité co mbia che reroya tupri vahe nungar judío eta pãhuve —ehi.

¹⁰ Yuviroyevipase sundao rereciar mboripar sêtave yuvireco, aheve osepia evocoi semimboacua yuvireco ocuera tuprise.

Jesús ombogüerayevi cuña imer mano vahecuer membri cuimbahe

¹¹ Ipape voi Jesús oso tecua Naín ve, iyavei semimbohe yuvirasoño ité supi ava rehi reseve avei no. ¹² Virovise tecua oso, osepia tehögüer ava virocuase yuvireco ñoti água. Ahe cuña imer mano vahecuer membri ñepe vahe ité viña. Tecua pipendar setá iteanga ava yuviraso supi. ¹³ Cuña repiase rumo, oiparaisuereco. Ipape aipo ehi chupe:

—Ereyaseho eme —ehi.

¹⁴ Evocoyase oyemboya oso, opoco tehögüer riru rese. Sese ovosi vahe evocoyase viropitaño yuvireco chupe. Ipape aipo ehi tehögüer upe:

—Mbia chíhivahe, che aipo ahe ndeu: ¡Eñarapuha! —ehi.

¹⁵ Evocoyase omano vahecuer oñarapuha oĩ iyavei oñehe no. Ichui Jesús omondo ichi upe. ¹⁶ Opatatu tupri ité ava oyembosiquiye sepiase yuvireco:

—Cūrítei oyemboyecua Tūpa ñehe mombehusar seco ivate vahe yande pãhuve cute —ehi yuvireco.

Iyavei,

—Tūpa niha ou güecua p̃itívii água oico —ehi avei yuvireco.

¹⁷ Ipape co Jesús rerãcua yandusa opacatu Judea rupi, yivirindar rupi avei no.

Juan Oporoãpiramo vahe omondo vupindar Jesús recocuer cua uca água

¹⁸ Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe. ¹⁹ Evocoyase omondo ñuvirío vupindar Jesús upe mbahe rese porandu água '¿nde ité vo Tūpa Rembiporavo aipo sãrombri ereico, anise oime tie ambuae orosãro vaheerã?' oyapave. ²⁰ Evocoyase oyepota yuviraso Jesús upe aipo ehi yuvireco chupe:

—Juan Oporoãpiramo vahe ore mbou ndeu co mbahe rese porandu ãgua: ¿Nde ité vo Tũpa Rembiporavo ereico imombe-hupri ereyu vaheřã, anise ambuae pĩha orosãrora oroico? — ehi yuvireco chupe.

²¹ Ahe arĩ pipeve voi Jesús ombogüera setá ava imbaherasisa sui oico, ava carugar rerecosar sui avei no. Iyavei ava ndasesapisoi vahe setá ombogüera. ²² Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndasesapisoi vahe osareco tupri cũritei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pĩsirosa resendar ñehesa” peyera chupe. ²³ ¡Oviharetera acoi ava oyeroyaño vahe che rese! — ehi Juan rupindar upe.

²⁴ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porẽhisave, capihiata ivitu ombova-mbova vahe nungar pĩha? ²⁵ Anise, ¿pesepia tie iturucuar porañete ai vahe iyemboeteise? Ëgüe ehi vahe rumo secoi mborerecuar guasu guapisave yepi. ²⁶ ¿‘Mara ehi secocuer’ peye vo chupe? ¿Tũpa ñehe mombehusar ité pĩha? Ahe ité, iyavei evocoi niha ivate catu vahe Tũpa ñehe mombehusar sui. ²⁷ Ahe chupe ité Tũpa icuachiapri aracahendar pipe aipo ehi:

‘Amondora che ñehe mombehusar nde renondeve nde raperã moingatu ãgua’ ehi.

²⁸ Aracahe suive ndipoi eté ivate catu vahe Juan sui. Yepe ahe ivate catu vahe viña, Tũpa mborerecuasave rumo ava seco mbegüemi catu vahe ivate catu ichui.

²⁹ “Co ñehe renduse opacatu ava, opacatu guarepochi rerocuar yuvirecoi vahe avei oñeapiramo uca vahecuer Juan upe yuvireco: ‘Supi eté Tũpa aviye vahe ité’ ehi eté yuvireco cute. ³⁰ Fariseo eta rumo iyavei Moisés porocuita rese oporombohe vahe ahe noñeapiramo uca potai vahe Juan upe yuvireco, ahe viroiño Tũpa remimbotar oyeupendar yuvireco.

³¹ “¿Mbahe rese pĩha amboyoyara ava recocuer cũriteindar? ¿Mara ehi pĩha secocuer? ³² Ahe inungar chĩhivahe iguayi tẽi vahe ocar rupi. Ipare oñehe pucu-pucu omboripar upe yuvireco aipo ehi: ‘Oromoñehe tẽi mimbĩ pẽu, ndapepivoi eté rumo; iyavei orosapucái tẽi sapucaisa viharẽhisa resendar pẽu, ndapeyasehoi avei’ ehi. ³³ Esepia, ou Juan Oporoãpiramo vahe oico. Ahe ndohui vahe pan iyavei ndoihui vahe uva ricuer. Pe evocoyase, ‘Co mbia carugar vireco vahe’ peye

tupri tēi chupe no. ³⁴ Coiye che ayu, Ava Riquehix, acaru iyavei aihu tupri avei. Ipare, ‘Co mbia icaru guasu ai vahe secoi, iihu guasu ai vahe avei no’ peye cheu; ‘Ava angaipa viyar mboripar tēi iyavei ava guarepochi rerocuasar mboripar tēi’ peye avei cheu. ³⁵ Ava Tūpa mbahecuasa vireco vahe rumo icuasara sembiapo rese” ehi.

Fariseo Simón serer vahe rētave Jesús secoi

³⁶ Fariseo Simón serer vahe oñehe Jesús upe: “Terecarumi che piri” ehi. Jesús evocoyase oso sētave oguapi oñ mesave. ³⁷ Ahese cuña angaipa viyar evocoi tecua pendar secoi vahe oyandu ichose Simón rētave icaru āgua. Sese viroyepota aheve mbahe sīacua vahe siru pipe seraso sepirusu vahe chupe. ³⁸ Aheve oyasehó ite oñenopiha Jesús pive iyavei güesai pipe opa tupri omoaqui ipi. Ipare opaño omombiru oha aprí pipe ichui, iyavei oipirupite, oipiyere avei mbahe sīacua vahe ipi rese. ³⁹ Sepiase fariseo, ipihañemoñeta tēi: “Co mbia Tūpa ñehe mombehúsar itese, oicuaño itera co cuña opoco vahe oyese ndipihai vahe viña” ehi tēi fariseo chupe. ⁴⁰ Evocoyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

⁴¹ Evocoyase Jesús aipo ehi chupe:

—Ñuvirío mbia oime vīrocua guarepochi mbia guarepochi mondosar sui yuvireco. Ñepi vīrocua guarepochi quiniento tupri mboraviqui repirã ichui. Ambuae evocoyase cincuenta rupive vīrocua. ⁴² Ipare ndoicatu irise ité imboyevi āgua yuvireco chupe, evocoi mbia guarepochi mondosar iñeroño chupe yuvireco —ehi—. Esãha, emombehu cheu, ¿uma evocoyase osaisu catura mbia guarepochi mondosar? —ehi fariseo upe.

⁴³ —Cheu ndoyavii guarepochi vīrocua catu vahe ichui —ehi Simón.

—Taa, supi eté aipo ere —ehi Simón upe.

⁴⁴ Evocoyase omahe cuña rese aipo ehi Simón upe:

—¡Emahe co cuña rese! Aique se acoi nde rēta pipe, nde nderembouimi eté i che pisei āgua cheu; co cuña rumo güesai pipe oyosei che pi. Ipare omombiru oha aprí pipe ae no. ⁴⁵ Iyavei nde ndache rovarupitei eve; co cuña rumo, acoi nde rēta pipe che reique ramomiseve che pirupite voi eté.

⁴⁶ “Nde nderemondoi mbahe sīacua vahe che ãca rese; co cuña rumo opa tupri voi oipichi mbahe sīacua vahe che pi rese. ⁴⁷ Sese co cuña opa oipisi ñerosa oangaipa guasu rese. Esepia, che raisú iteanga. Acoi ava upe nañerosa tupri vahe rumo, ahe ndoporoaisu tupri avei” ehi.

⁴⁸ Ahese aipo ehi cuña upe:

—Oime nde angaipa upe ñerosa ndeu —ehi.

⁴⁹ Evocoiyase ambuae ava ichohopri oguapi vahe yuvinoi aheve, ahe aipo ehi oyeupe yuvireco:

—¡Uma pñha co mbia iñero vahe ité angaipa upe! —ehi.

⁵⁰ Jesús rumo aipo ehiño cuña upe:

—Nde yeroyasa pipe ereipisi písirosa. Sese eso tupriño eico —ehi.

8

Cuña oipitivi vahe Jesús yuvireco

¹ Ipare Jesús oguata opacatu tecua rupi, omombehu ñehesa aviye vahe Tūpa mborerecuasa resendar oico. Doce vahe apóstol supive yuvirecoi. ² Cuña avei yuviraso supi, ahe ombogüera vahecuer carugar rerecosa sui imbaherasisa sui avei no. Ahe ipāhuve avei María secoi, Magdalena serer yoapisa vahe, ahe ichui osē vahecuer siete tupri carugar; ³ iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipitivi mbahe güembireco pipe yuvireco.

Yembohesa mbahe miti rese tecocuer mboyoyasa

⁴ Setá ava yuvinose tecua yacatu rupi pipe sui Jesús repia āgua yuvireco. Ipare oñemonuha guasuse yuvireco, ahese Jesús setá mbahe rese omboyoya-yoya oporombohe aipo ehi: ⁵ “Ñepe mbia osē omaheti oico. Ahe otiapi-apiise mbahe rāhii oso, moviro oiti peri rupi. Ahe opa tēi oicambe yuvireco, iyavei vīrai opa tēi yuvirohu. ⁶ Iyavei moviro tēi oiti ivi nayanai vahesave ita pāhuve. Sese cūrutei sori; opaño rumo ipiru. Esepia niha, ivi nañaquii chupe. ⁷ Iyavei ambuae oiti yu pāhuve. Ipare oyoya tupri sori yuvireco; yu rumo opaño oyopi. ⁸ Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tupri ité ñepeipei mbahe miti sui osē” ehi.

Aipo ohe pare, Jesús oñehe pñratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

¿Mahera pñha co yembohesa imboyoyasa ambuae mbahe rese?

⁹ Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi. ¹⁰ Evocoiyase omboyevi chupe: “Pēu Tūpa oicua uca ité mbahe ndicuasai vahe omborerecuasa resendar; ambuae ava rumo ambohe tēi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

Jesús omombehu tupri yembohesa mbahe tisa resendar

¹¹ “Co yembohesa resendar aipo oyapave aipo ehi: Mbahe rāhii ahe inungar Tūpa Ñehengagüer; ¹² iyavei mbahe rāhii peri rupi seitipri, ahe inungar acoi ava osendu tēi vahe Tūpa Ñehengagüer yuvireco oyapave. Ipare rumo ou vīrai chupe, ahe inungar caruguar ou vahe chupe opaño oyaracua mocañi Tūpa Ñehengagüer sui ‘toviroya eme iyavei toñepisiro eme yuvireco’ oyapave tēi. ¹³ Acoi mbahe rāhii seitipri ita mahugüer rupi, ahe inungar acoi ava osendu tēi vahe Tūpa Ñehengagüer yuvireco iyavei oipisi tupri oviharetesa pipe yuvireco viña no. Ahe rumo inungar co mbahe miti ndovirecoi vahe guapo ovīracua āgua; viroya raimi tēi yuvireco. Oyepotase rumo mbahe tēi chupe, oyepepi voiño yuvireco ichui. ¹⁴ Acoi mbahe rāhii seitipri yu pāhu rupi, ahe inungar acoi osendu tēi vahe. Ipare rumo oyemboyepepi uca mbegüeño ambuae mbahe rese opihañemoñetá iteangasa pipe tēi, ombahe eta rese iyavei güemimbotarai mbahe tēi potasa pipe avei. Ēgüe ehi ahe ava inungar mbahe miti ndihai vahe ité. ¹⁵ Acoi mbahe rāhii seitipri rumo ivi aviye vahesave, ahe inungar ava vireco vahe opihañemoñetasa aviye vahe iyavei oyemoingatu voi Tūpa Ñehengagüer rese oyapisaca āgua yepi; viroya tupri ité no; yuvirecoiño ité sese. Ēgüe ehise, oyapo mbahe aviye vahe yuvireco” ehi.

Yembohesa tataendi resendar

¹⁶ “Ndiyai eté ava upe guataendi omoendise omoha vahe que mbahe pipe, ‘Tamondo che rupavrive’ ndehi eté chupe; osupiño ivate imoi opacatu oi pipe yuviroique vahe resape āgua. ¹⁷ Esepia, ndipoi eté mbahe ñomipri, ndayasepiai vaherā curi. Iyavei yaposa vahe imombehupirēhi, icuasaño itera curi.

¹⁸ “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocuasaño itera” ehi oporombohe.

Jesús si, tivireta avei

¹⁹ Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vaherā yuvireco ava rehii sui. ²⁰ Oime rumo ambuae ava imombehusar chupe,

—Nde si, nde rivireta reseve nde repia pota tēi ocarve yuvireco —ehi chupe.

²¹ Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe avei, ahe che si, che rivri yuvirecoi —ehiño Jesús chupe.

Jesús omombituhu i ohitu vahe, ivitu ai reseve

²² Ñepeí ari Jesús oha carite pipe güemimbohe eta reseve. Ipare aipo ehi:

—Yaso peve ipa rovai —ehi.

Evocoyase ahe yuviraso. ²³ Yuviroguata viteseve, oqueño Jesús ou. Ahese ipa pipe aviyeteramo tēi ivitu ai omboha guasu-guasu carite pipe i, omondo pota ité ipive viña.

²⁴ Evocoyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare oñehe pĩrata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri.

²⁵ Evocoyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyeño, ndoyembovichaiño iyavei oporandurandu tēi oyeupe yuvireco:

—¡Mara ehi vahe pĩha co mbia! Esepia niha, ivitu ai, para guasu avei omboyeroa —ehi tēi oyeupe yuvireco.

Mbia Gerasa iguar vireco vahe carugar oyese

²⁶ Coiye oyepota yuviraso Gerasa ivi rese cute, ahe anbuae ipa coti ivi Galilea rovai. ²⁷⁻²⁹ Aheve mbia tecua iguar carugar vireco vahe secoi. Aracahe suive nani tupri ité secoi iyavei ndopitai vahe ité oi pipe yepi; ěgüe ehi rumo ahe tehögüer ruvipa rupindar tēi secoi. Setá rupi carugar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme carugar’ oyapave yuvireco chupe viña, ahe rumo ombosando-sandoño ité iyavei carugar omoñemi ucaño ava porēhisa rupi sereco. Evocoyase Jesús osēse carite pipe sui, osovañchi ahe mbia. Sepiase rumo, ahe mbia oñenopĩha voi oso sovai oñehe pĩrata chupe:

—¡Eyepepi che sui, Jesús, Tũpa seco ivate catu vahe Rahir! ¡Che mombaraisui rene eve! —ehi. Esepia, Jesús opa oyocuai carugar sereco ‘tosē ichui’ oyapave.

³⁰ —¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri carugar yuviroique yaviterve. ³¹⁻³² Oimese rumo cuchi setá ocaru vahe ivitri ruambesave, carugar evocoyase oporandu chupe aipo ehi: “Toroiqueñomi tēi co cuchi aviterve” ehi yuvireco chupe ‘tayande mondo eme cañi tēisa apirēhi vahe pipe’ oyapave viña. “Peiqueño sese” ehi carugar upe. ³³ Ahese opa yuvinose mbia sui yuviroique cuchi aviterve cute. Aheseve voi cuchi opa yuvinoña yuviraso ivivate sui ipa pipe. Aheve ipive opa tēi eté ocañi yuvireco.

³⁴ Cuchi rãrosar osepiase ahe mbahe yuvireco, opa yuvinoña yuviraso co mbahe mombehu tecua pipe ava upe, cove rupi avei no. ³⁵ Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osepia ahe mbia carugar rerecosarer oguapi oñ ñipiimi, oymonde tupri, yaracua tupri avei oico. Ahese oyembosiquiye tẽi yuvireco. ³⁶ Acoi ava osepia vahecuer, ahe opa mbahe omombehu yuvireco co mbia carugar rerecosar cuera agüer. ³⁷ Ahese opacatu ava Gerasa pendar, yivirindar avei Jesús upe, “Esiri cohave sui” ehi yuvireco. Esepia niha, osiquiyé iteanga yuvireco ichui. Evocoyase oha carite pipe. Ipare osoño. ³⁸ Yipindar rumo evocoi mbia carugar vireco vahecuer, “Tasomi tẽi nde rupi” ehi viña. Ahe rumo, “Epitaño” ehi. ³⁹ —Eyevi nde rõtave, emombehupa opacatu mbahe Tupa oyapo vahecuer nde rese —ehi.

Ahe mbia evocoyase oso opacatu tecua rupi, Jesús oyeupe mbahe apo agüer mombehu.

Jesús ombogüera Jairo rayri iyavei cuña iturucuar rese opoco vahe

⁴⁰ Oyevisẽ Jesús ipa rovai oso, aheve ava rehii oviharetesa pipe oipisi tupri yuvireco. Esepia niha, ava opacatu ité osãro yuvireco. ⁴¹ Ahese Jairo serer vahe oyepota oso Jesús upe, evocoi judío tũparo rese yangarecuar secoi vahe. Ahe mbia oñenopiha sovai oso, oporandu chupe ‘tosomi tẽi che rõtave che rayri mbogüera’ oyapave. ⁴² Esepia niha, vireco guayri ñepeimi vahe ité, doce araviter vireco vahe. Ahe omano potami eté ou.

Osose Jairo rõtave, aheve peri rupi ava rehii yuvirasoño supi; oyemboti tupri ité yuvireco. ⁴³ Ahe ipãhu rupi oime cuña doce araviter rupi suvi yepiyere-yere vahe. Opa-opa tẽi omondo ombahe ocuera ãgua repirã yepi; ndocuerai eté rumo. ⁴⁴ Ahe cuña evocoyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui. ⁴⁵ Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Porombohesar, ava rehii mo oyemboya nde rese iyavei nde moañi-añii yuvireco opacatu rupi —ehi.

⁴⁶ —Che rumo aicua oime ava opoco vahe che turucuar rese. Esepia, ayandu che pĩratasa osẽse che sui —ehi Pedro upe.

⁴⁷ Ahe cuña ndoicatuĩ oñemi. Sese oririĩ oñenopiha sovai. Oyemombehu chupe opacatu ava rovaque: “Che opoco nde

turucuar rese. Esepia, ‘Acuera tuprira apocose iturucuar rese’ ahe ndeu” ehi. ⁴⁸ Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

⁴⁹ Jesús ñehe viteseve, ahese oyepota aheve mbia Jairo rēta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar —ehiño Jairo upe.

⁵⁰ Evocoyase iñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

⁵¹ Oyepotase Jairo rētave oso, aheve ndomoiñgue uca potai eté ava oyeupi. Pedro, Santiago, Juan iyavei cuñatai yesupa upeño oipota seique ãgua. ⁵² Aheseve opacatu ava oyaseho ati, ndoyembovihai tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

⁵³ Ava rumo opuca ete-eteño seroyañhisave yuvireco. Esepia niha, ahe oicua ité imanose yuvireco viña. ⁵⁴ Evocoyase oipopiñsi cuñatai. Ipare aipo ehi chupe:

—¡Cuñatai, eñarapuha! —ehi.

⁵⁵ Ahe evocoyase oñarapuha voi eté ocuerayevi. Ipare Jesús, “Pembocarú” ehi iyepota upe. ⁵⁶ Iyepota evocoyase, “¿Mara ehi rutei pñha co?” ehi tēi yuvireco chupe. Jesús rumo omombehu chupe: “Ndapemombehui chietera que ñepei ava upe” ehi.

9

Jesús doce güemimbohe omondo Vu Tūpa mborerecuasa resendar mombehu ãgua

¹ Jesús opa omonuha güemimbohe doce vahe oyeupe. Ipare omondo opĩratasa opacatu upe caruguar ambuae-ae tēi vahe imboyepepi ãgua ava sui iyavei ava mbogüera ãgua imbahehasisa sui. ² Opa omondo Vu Tūpa mborerecuasa resendar mombehu ãgua, ava imbaheasi vahe mbogüera ãgua avei. ³ Yipindar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe riru, tembihu, que guarepochi avei no. Perasora rumo ñepei güeraño pe turucuar; ndahei chira ñuvirio peraso.

⁴ Pepitami ranera ñepei oi pipe güeraño tecua yacatu peico.

⁵ Acoi ava ndape moingue uca potaise güeta pipe yuvireco, peyepipiñora ichui iyavei peipipetera pe pi sui ivi cuhi ‘toicua Tūpa ñemoirosa oyeupendar yuvireco’ pe hesave —ehi güemimbohe eta mondo.

⁶ Evocoyase opa yuvinose yuviraso, iyavei oñemosai opacatu tecua rupi omombehu Tūpa Ñehengagüer piñsirosa

resendar yuvireco iyavei ombogüera-güera ité ava imbaherasisa sui opacatu uguatasa rupi yuvireco.

Herodes, “¿Mara ehi pïha?” ehi Jesús upe

⁷ Co mborerecuar guasu Herodes oyandu opacatu mbahe Jesús rembiapo. Evocoyase, “¿Mara ahera pïha?” ehi tēi. Esepia niha, aipo, “Juan ocuerayevi” ehi yuvireco chupe. ⁸ Ambuae aipo ehi: “Tūpa ñehe mombehusar Elías, ahe tēi oñemoporēhi iri” ehi yuvireco. Ambuae aipo ehi: “Que ñepe Tūpa ñehe mombehusar aracahendar revo, ahe tēi ocuerayevi” ehi yuvireco viña. ⁹ Herodes rumo aipo ehi:

—Che niha ayasia uca Juan ãca —ehi—. ¿Uma rerãcua pïha evocoyase ayandu? —ehi tēi.

Sese Herodes osepia pota ité Jesús.

Jesús oyopoi cinco mil cuimbahe

¹⁰ Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepipi ava rehi sui, viraso ivi iporupirēhisave tecua Betsaida cotive. ¹¹ Ahe ava rehi rumo oyanduse yuvireco, yuvirasoño saquicuei. Evocoyase, “Perioño” ehi chupe. Ipare oñehe Vu Tūpa mborerecuasa rese ava upe iyavei ombogüerapa ava imbaherasisa sui.

¹² Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cōi vahesa rupi? Esepia niha, cohava ndipoi eté mbahe —ehi yuvireco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviriomi tēi avei pira, toroso ayase co ava opacatu remihura rerocua —ehi yuvireco chupe.

¹⁴ Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

¹⁵ Ëgüe ehi semimbohe yuvireco chupe. Ipare uguapi opacatu ava yuvireco. ¹⁶ Evocoyase oipisi poyandepo pan iyavei ñuvirio pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehi upe imondo ãgua yuvireco. ¹⁷ Evocoyase opacatu ava ocaru vahe ihtaropa tēi yuvireco. Ipare semimbohe omboapipopa doce tupri iruova sembihu rumbirer yuvireco.

Pedro, “Jesús, Tūpa Rembiporavo Poropisirosar secoi” ehi

18 Ñepeí ari pipe Jesús oyeróqui ahe ae güemimbohe pãhuve. Ahe se oporandu güemimbohe upe:

—¿Mara ehi vo ava oñehe yuvireco che rese? —ehi.

19 —Amove ava, “Juan Oporoãpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tũpa ñehe mombehúsar araca-hendar ocuerayevi” ehi yuvireco ndeu —ehi.

20 Evocoyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tũpa Rembiporavo Poropĩsĩrosar ereico —ehi Pedro imboyeví chupe.

Jesús omombehu omano ãgua

21 Ahe rumo aipo ehi güemimbohe eta upe: “Pemombehui rene Tũpa Rembiporavo che recosa ava upe” ehi. 22 Iyavei aipo ehi chupe:

—Che, Ava Riquehir, che paraĩsu itera, iyavei opacatu judío rerecuareta, pahĩ rerecuar ivate catu vahe iyavei Moisés porocuaíta rese oporombohe vahe remiamotarẽhi aicora. Ahe avei che yuca ucara yuvireco; mbosapĩ ari rupi rumo acuerayevira —ehi.

23 Ipare aipo ehi opacatu upe:

—Acoi oguata pota vahe che rupi, topoi mbahe güemimbotar tẽi aposa sui iyavei inungar-ra curusu rese ovosiira viña, toyemoingatu voi che recocuer rese oparaĩsu ãgua ari yacatu rupi iyavei toguata tupri che rupi. 24 Esepia, acoi ava güetecuer tẽi raisupar ocañi tẽi itera; acoi ava omocañi tẽi vahe rumo güetecuer che recocuer rese, ahe oñepisĩrora. 25 Esepia, ¿aviye ai angahu pĩha ava upe opacatu mbahe co ivi pipendar pisi ãgua tẽi, ahe ae tẽi omocañise güecocuer yuvireco viña? 26 Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, ãgüe ahera ichui acoi ayevise che reco pĩratasa pipe, che Ru reco pĩrata porañetesa pipe avei sembiguai rehĩ iva pendar maranehi reseve curi. 27 Supi eté, oimera amove cohava ava nomano vitei chivaherã, osepia rane itera ouse Tũpa mborerecuasa yuvireco curi —ehi.

Jesús ñecuñaro agüer

28 Ocho ari pare Jesús oyeupi ivitri rese oso oyerure ãgua. Pedro, Santiago iyavei Juan ahe viraso oyeupi. 29 Oyerure viteseve, oñecuñaro sepiaca. Iturucuar evocoyase sendi, morochí eteanga. 30 Ahe se ñuvirío ava oyemboyecua yivii imoñeta yuvinocha. Evocoi ava yuvirecoi vahe ahe Moisés, Elías avei. 31 Oyere tupri sendigüer iporañetesa yuvireco sese, iyavei co ñuvirío mbia oñehe imano ãgua rese yuvireco chupe:

“Nde niha ereyemomborarara nde mano ãgua Jerusalén pipe eico” ehi yuvireco chupe. ³² Yepe Pedro, ondugüer reseve sopesí eteanga yuvireco viña. Aviyeteramo tēi opa sopesii yuvireco ichui. Ahese osepia Jesús porañetesa yuvireco iyavei co ñuvirío mbia yuvinoha vahe yivii no. ³³ Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teyupami: ñepeí ndeu nara, ambuae Moisés upe, ambuae evocoiyase Elías upe nara —ehi.

Pedro rumo ndoicuai eté aipo ohesa. ³⁴ Iyavei iñehe viteseve, aviyeteramo tēi iporēhi iva quiha, oyopipa tupri ité. Evocoiyase osiquiye tēi yuvireco. ³⁵ Ipãhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu iñehe rese” ehi.

³⁶ Opase osendu co ñehesa yuvireco, ahese osepia Jesús, ahe ae ihãise yuvireco. Semimbohe rumo oyeupe tēi ovireco yuvireco; ndomombehu vitei eté ava upe mbahe osepia vahecuer yuvireco.

Jesús ombogüera chñivahe caruguar rerecosar

³⁷ Ahere ayihive, ogüeyise ivitri sui yuvireco, setá ava oyugüeru Jesús rovañchi yuvireco. ³⁸ Ahese mbia ava pãhuve aipo ehi pĩrata voi eté:

—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité; ³⁹ caruguar rumo opoco sese, omoase pucu-pucu uca yepi iyavei omoeõha-õha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui. ⁴⁰ Amombehu tēi niha nde remimbohe upe ‘tomboyepemimi tēi caruguar ichui’ che yapave viña; nomboyepemii eté rumo ichui yuvireco —ehi.

⁴¹ Ahe omboyevi:

—¡Too, ndapeyeroya tupri vitei eté che rese, co coti tēi vite pe pihañemoñetasa! ¿Mbovi rupi rutei vo aico vitera pe pãhuve che ñemosasa pipe? Eru nde rahir cohava cheu —ehi ahe mbia upe.

⁴² Chñivahe oyemboyase rumo sese, caruguar omboviapi voi imondo ivive, imoeõha iri. Jesús rumo oñehe pĩrata caruguar upe imose ãgua chñivahe sui. Ahese chñivahe ocuera tupri ité. Ipare omboyevi tu upe. ⁴³ Ahese opacatu ava, “¡Mara ehi rutei!” ehi tēi yuvireco Tũpa pĩratasa rembiapo aviye vahe repiase.

Jesús omombehu iri omano ãgua

Opacatu ava ndoyembovihal viteseve yuvireco, ahese aipo ehi güemimbohe upe:

44 —Pesendu tupri che ñehe; peresarai eme ichui: che, Ava Riquehir, imondopri aicora che amotarẽhimbar povrive —ehi.

45 Semimbohe rumo ndosenducuai eté oyeupe ñehesa yuvireco. Esepia niha, Tũpa ndoipotai eté senducua ãgua chupe; osiquiye chupe oporandu ãgua yuvireco yepi.

¿Ava vo seco ivate catu vahe?

46 Coiye semimbohe eta omboipi oyeecopi-copi yuvireco ‘¿ava ité pĩha ivate catu vaheã curi?’ oyapave. 47 Jesús rumo oicuaño ipihañemoñetasa yuvireco. Evocoyase oipisi chĩhivahemi seru oipive imoha. 48 Ipare aipo ehi güemimbohe eta upe:

—Acoi ava oipisi vahe co chĩhivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pãhu pendar, ahe aviye catu vahe —ehi.

Acoi yande mboyoyasar, ahe ndahei yande amotarẽhisar

49 Evocoyase Juan aipo ehi chupe:

—Ore mbohesar, orosepia niha mbia ombogüera vahe carugar pĩratasa sui ava nde rer pipe oico; ore rumo ndoroipotai chupe evocoyase seco ãgua. Esepia niha, ndahei yande rupindar secoi —ehi.

50 Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarẽhisar; ahe rumo yande mboyoyasar —ehi güemimbohe eta upe.

Jesús oñehengata Santiago upe, Juan upe avei

51 Virovise rumo ari ivave Jesús so ãgua, ahese ahe aipo ehi: “Yaso ru Jerusalén ve cūrítei” ehi. 52 Evocoyase omondo ava güenonera. Ahe yuviraso tecua Samaria ivi rupi ipituhu ãgua moingatu viña; 53 Samaria iguar rumo nomoingue potai eté güetave yuvireco. Esepia, oicua Jerusalén ve ichose yuvireco. 54 Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava mocañi ãgua —ehi yuvireco chupe viña.

55 “¡Aní!” ehi oyemboyere chupe. 56 Ipare yuviraso ambuae tecuave.

Oguata pota vahe Jesús rupi

57 Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

58 Ahe rumo aipo ehi:

—Aguara vireco güëtara, vĩrai avei vireco guaiti; che rumo, Ava Riquehir, ndarecoi que che rēta che pĩtuhu ãgua —ehi chupe.

⁵⁹ Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

⁶⁰ —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tũpa mborerecuasa resendar ava upe —ehi.

⁶¹ Evocoyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rētave mbahe moingatu che so ãgua —ehi.

⁶² —¡Aní! —ehi ahe mbia upe—. Esepia, inungar acoi oipĩsi vahe ivi mboyeresa imohivi tupri ãgua, omahese rumo guaquicuei coti, evocoi nungar naporai Tũpa mborerecuasave yuviroique vaherã —ehi.

10

Jesús oyocuai setenta y dos tupri güemimbohe

¹ Ipare yande Yar oiporavo setenta y dos ava ñepeipei tecua rupi ñuvirío-río güenonera.

² Yipindar rumo aipo ehi: “Supi eté mbahe imonuhapirã setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha ãgua” ehi. ³ “Peso, opomondo ovesami nungar ava mbahe mimba oñaro vahe nungar pãhuve. ⁴ Perasoí rene mbahe riru iyavei guarepochi siru reseve. Ndapemondugüei chiaveira pe pitaqui; iyavei aní pepita ‘avirave’ apo ava upe peri rupi. ⁵ Acoi peiquese que oi pipe, yipindar rumo peyapo ranera: ‘Avirave. Tũpa tape rovasa’ peyera. ⁶ Acoi aheve oimese ava aviye vahe, ahe oipisira Tũpa porovasasa; anise evocoyase ndipoi chira porovasasa chupe nara. ⁷ Acoi pe pisise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rēta rupi-rupi tēi. Ñepeí oi pipe güeraño pepitañora. ⁸ Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui. ⁹ Ahe pendar imbaheasi vahe evocoyase pembogüerara, iyavei aipo peyera chupe: ‘Tũpa mborerecuasa namombriimi pe sui’ peyera. ¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera: ¹¹ ‘¡Co pe recua pipendar ivi chimborer oya vahe ore pi rese oroipipete oreyesuí, peicua catu, ore hesa pipe. Peicua tupri rumo Tũpa

mborerecuasa namombriimi pe sui' peyera chupe. ¹² Supi eté acoi arí cañi oyepotase, oimera Tũpa ñemoirosa ahe tecua pendar upe ivate catu vahe ava tecua Sodoma pendar sui" ehi güemimbohe eta upe.

Opacatu tecua ndiporeroyai vahe

¹³ "¡Peparaísu ava tecua Corazín pendar, pe avei peparaísu tecua Betsaida pendar! Esepia, acoi poromondiisa pe pãhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharêhisa re-sendar, tanimbu avei omondora oãca rese oangaipa mboasisa pipe yuvireco viña no. ¹⁴ Pe rumo peipisira ivate catu vahe Tũpa ñemoirosa ava Tiro, Sidón pendar sui arí cañi pipe coiye. ¹⁵ Pe avei no tecua Capernaum pendar, ipemoha co ivave pe reco âgua viña! ¡Pe mombosapara rumo ivicuar ipicucu catu vahesave!

¹⁶ "Acoi ava oyapisaca vahe pe ñehe rese yuvireco, ahe evocoiyase oyapisaca avei che ñehe rese. Iyavei acoi ava pe mboyepepiño vahe oyesui, ahe evocoiyase che avei che mboyepepi oyesui yuvireco. Acoi ava rumo che mboyepepiño vahe oyesui, ahe evocoiyase che mbousar avei omboyepepiño oyesui" ehi güemimbohe upe.

Oyevipa iri ava setenta y dos vahe

¹⁷ Oyevipase ava setenta y dos vahe, oviharetésave aipo ehi yuvireco chupe:

—¡Ore Yar, carugar avei eté niha ore mboyeroya etepri yuvireco nde rer pipe! —ehi.

¹⁸ Evocoiyase aipo ehi güemimbohe eta upe:

—Taa, asepia ité niha carugar rerecuar ovipise íva sui overa vahe nungar. ¹⁹ Che niha amondo pĩratasa pẽu peguata vaheã mboi iyavei mbahe rumbiquiãpe hari rupi opacatu pe amotarêhisar pĩratasa reroyi âgua, que mbahe pe momaraẽhi âgua avei. ²⁰ Peyemboviharetei rene carugareta pe mboyeroiyase. Iya rumo peyemboviha pe rer íva pendar icuachiapri rese —ehi güemimbohe eta upe.

Jesús oviharete

²¹ Ahe pipeve voi Jesús, Espíritu Santo rese, vorivetesa pipe aipo ehi: "Che Ru, che oromboetei. Nde niha íva Yar, ivi Yar avei no. Esepia niha, ereñomi co mbahe ava oyesui tẽi mbahe oicua vahe sui iyavei co ivi pipendar ava imbahecua vai vahe sui avei no. Eremboyecua rumo co mbahe ava ndoyembohe tuprii vahe upe nde rese oyeroyase. Ahe niha ereipota ité, che Ru" ehi.

²² "Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che

cua. Ndipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

²³ Evocoyase omahe güemimbohe eta rese, chupe güeraño aipo ehi: “Perorivete catu co mbahe pesepia vahe rese.

²⁴ Esepia niha, setá etepri ava Tüpa ñehe mombehusar yuvirecoi vahe iyavei mborerecuar guasu eta aracadendar osepia pota tēi mbahe pe rembiepia; ndosepiai eté rumo yuvireco. Osendu pota tēi co pe remiendu yuvireco; ahe rumo ndosendui avei yuvireco” ehi güemimbohe upe.

Jesús porombohesa Samaria iguar recocuer sui

²⁵ Iyavei no Tüpa porocuita rese oporombohe vahe oso Jesús upe secoãha ãgua, mbahe rese oporandu:

—Porombohesar, ¿mara ahera vo vichico teco apirēhi vahe rereco ãgua? —ehi chupe.

²⁶ Ahe omboyevi:

—¿Mara ehi vo Moisés porocuita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

²⁷ Evocoyase oporombohe vahe omboyevi:

—“Eresaisura nde Yar Tüpa opacatu nde pihá pipe, opacatu nde recocuer pipe, opacatu nde pĩratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuita —ehi chupe.

²⁸ —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahesererecora tecovesa apirēhi vahe —ehi co mbia upe.

²⁹ Co mbia rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

³⁰ Evocoyase omboyevi chupe:

—Oime mbia Jerusalén sui oso vahe Jericó ve. Ahe peri rupi yuvinose ava ndipihai vahe yuvireco chupe. Ahe vırocuapa imbahe yuvireco ichui, iturucuar opacatu reseve; iyavei yuvırocuaro-cuaro yuvireco sese. Ipare oyuca seni seya peri rupi yuvıraso. ³¹ Ahesererecora pahi ou ahe peri rupi. Evocoi mbia repiase rumo, co coti rupi oñacuasaño oso. ³² Ëgüe ehi tupri avei ambuae mbia pahi pĩtiviisar levita, osepiase, oñacuasa tupriño avei oso no. ³³ Ipare rumo mbia sepia potapirēhi Samaria iguar oso ahe peri rupi avei. Ahe osepiase, oiparisuereco. ³⁴ Evocoyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, vıraso ava quesave. Aheve ihañeco sese. ³⁵ Aherererecora Samaria iguar oso, omondo guarepochi ahe pendar oi yar upe. Ipare aipo ehi chupe: “Esãro tuprimi tēi co ava cheu. Acoi ndehañeco catuse sese,

amboepi catu irira che yevise ndeu” ehi sêta vahe upe. ³⁶ Indó, ¿uma vo co evocoyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

³⁷ Evocoyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuita rese oporombohe vahe upe.

Jesús oso Marta iyavei María rêtave

³⁸ Ipare Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güêta pipe. ³⁹ Icupihir evocoyase María serer. Ahe uguapi Jesús pive iñehe rendu oĩ. ⁴⁰ Marta rumo oyembopihaviracua opacatu mbahe rese oico. Ipare oyemboya oso Jesús rese opihaviracuasa pipe aipo ehi chupe:

—Che Yar, ¿aviye ai vo evocoi che cupihir chini tēi nde piri che poraviqui viteseve? Emombehu chupe, tou, tache pītivii rane —ehi chupe.

⁴¹ Omboyevi rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo água eico? ⁴² Iya rumo ñepe mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava virocua vaherã ichui —ehi Jesús Marta upe.

11

Jesús ombohe güemimbohe eta yerure água rese

¹ Ñepe ari Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure água rese eve inungar Juan ombohe güemimbohe eta sereco yepi —ehi chupe.

² —Aviye —ehi—. Peyeroquise, aipo peyera:

‘Ore Ru Tūpa, ivave ereico vahe, imboeteipri nde rer tasecoi. Tou nde mborerecuasa oreu.

Tayaposa nde remimbotar co ivi pipe, iva pendar nungar.

³ Embou ore rembihi ari yacatundar oreu.

⁴ Iyavei ndeñero ore angaipa rese oreu.

Esepia niha, ore oreñero opacatu ore amotarēhimbar upe.

Ore mboangaipa ucai rene eve, ore renose catu mbahe tēi sui eve’ peyera —ehi

⁵ Iyavei aipo ehi no:

—Inungar co perecoa pe mboripar viña. Ipare pesora ahe sêtave pītu mbit̄er rupi aipo peyera chupe: ‘Che mboripar, emboumi tēi mbosapi pan cheu tamboyeve ndeu. ⁶ Esepia, ambuae che mboripar oyepota ou che rêtave; ndarecoi eté

rumo mbahe amondomi vaheṛã chupe' peyera chupe. ⁷ Ipare ahe, 'Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu' ehiñora pēu viña. ⁸ Supi eté, yepe nopuhai chietera mbahe mondo pēu pe mboripar secose viña, opūhaño itera rumo 'tache mañeco iri eme' oyapave. Ipare omondoño itera opacatu mbahe pe porandusa pēu. ⁹ Sese aipo ahe pēu: Peporandura mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ěgüe peyera peyeroquisa pipe Tūpa upe, ahese imboisara mbahe mbou āgua pēu. ¹⁰ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeoquisa pipe omota vahe oquenda Tūpa upe, chupe imboisara.

¹¹ "Oimese tahi vahe pe pāhuve, tahir oporanduse pira rese vu upe, ¿omondora pīha mboi tēi guahir upe viña? ¹² anise, ¿omondora pīha oporanduse mbahe rupiha rese, mbahe rumbiquiāpe tēi chupe viña? ¹³ ¡Aní! Esepia, pe yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar omondo catura Espiritu Santo acoi ava oyeupe porandusar upe!" ehi güemimbohe eta upe.

"Jesús vireco carugar pīratasa oyese" ehi tupri tēi ava yuvireco

¹⁴ Ambuae ari pipe, Jesús osepia mbia carugar nomoñehengatui vahe. Evocoyase omose carugar ichui. Aheseve voi iñehengatu. Ipare ava rehi sepiase, ndoyembovīhai tēi yuvireco. ¹⁵ Amove rumo ava aipo ehi tēi yuvireco: "Beelzebú, carugar rereciar pīratasa pipe revo omboyepēpi carugar oico" ehi tēi yuvireco chupe.

¹⁶ Ambuae ava secoãhasa pipe oporandu yuvireco chupe: "Eyapo ru mbahe nde rembiapo iva pendar nde recocuer cua āgua" ehi tēi. ¹⁷ Ahe rumo oicuaño ipihañemoñetasa. Evocoyase aipo ehi chupe:

"Que mborereciar guasu povri pendar ovava-vavase oyeupe oyeamotarēhisave yuvireco, ahese evocoi mborereciar pīratasa ocañi tēira. Iyavei ava omu rese ae oyeamotarēhi vahe, oyemocañi aveira yuvireco no. ¹⁸ ěgüe ehi avei niha carugar. Esepia, sereciar omboyepēpise opovri pendar, ovavara oyeupe yuvireco viña. Ahese oyemocañi tēira yuvireco. Co ñehesa aipo ahe pēu. Esepia pe, 'Beelzebú pīratasa pipe tēi opa omose carugar ava sui oico' peye tēi cheu. ¹⁹ ěgüe ahese rumo viña, ¿ava pīratasa pipe ru evocoyase pe voya omboyepēpi carugar ava sui? Pe voya ae omboyecuar pe ñehe pe rembiavi yuvireco pēu. ²⁰ Che rumo Tūpa pīratasa

pipe carugar amboyepipi ava sui. Sese cūrítei Tūpa mborerecuasa oyepota ité pēu.

²¹ “Inungar oime ava ipīrata etepri vahe, iyavei vireco oyeroyasa. Ipipe osāro güēta opacatu mbahe ipipendar avei icañiēhi āgua. ²² Acoi ouse rumo ambuae ipīrata catu vahe chupe, ahe osecoreroyise, opa virocua iyeroyasa ichui. Evo-coiyase güembierocua ahe opa viraso oyeupe.

²³ “Acoi ava ndache mboyoyai vahe, ahe che amotarēhimbar yuvirecoi; iyavei acoi ava ndosecai vahe ava cheu, ahe omosai tēi yuvireco che sui” ehi.

Carugar oyevi iri güeco agüerve

²⁴ “Acoi osēse carugar ava sui, oguata tēi ivi ipiru vahe rupi opituhu āgua reca. Ipare rumo ndoyosuise, ipihañemoñeta oyeupe, ‘Ayevi irira che reco agüerve vicho’ ehi. ²⁵ Aheve oyeveise, osepia iri secocuer inungar oi sahuvapri tupri. ²⁶ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui” ehi Jesús ava rehii upe.

Tūpa Ñehengagüer viroya vahe sovasapri secoira

²⁷ Oñehe viteseve aipo mbahe rese, cuña ava rehii pāhu pendar oñehe pīrata aipo ehi:

—¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

²⁸ Ahe rumo aipo ehi:

—¡Acoi osendu vahe ité che Ru Tūpa Ñehengagüer iyavei viroya vahe ité, ahe sovasapri secoira che Ru Tūpa rovaque! —ehi ahe cuña upe.

Ava eta ndaseco pōrai vahe oporandu poromondiisa rese yuvireco

²⁹ Ava rehii oyere ati vitesese Jesús rese yuvireco, ahe aipo ehi: “Pe cūríteindar ava ndaseco pōrai vahe, peporandu tēi poromondiisa che recocuer cua āgua rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara. ³⁰ Inungar Jonás poromondiisa secoi ava Nínive pendar upe, ēgüe ehi aveira niha Ava Riquehir reco pipe oimera poromondiisa ava cūríteindar upe. ³¹ Acoi arí cañi pipe cuña mborerecuar guasu irohi coti secua vahe porandusave omombehura co ava cūríteindar cañipa āgua. Esepia, ahe ou amombri ivi sui Salomón mbahecuasa rendu āgua; cūrítei rumo oime ivate catu vahe cohava Salomón sui. ³² Iyavei arí cañi pipe ava tecua Nínive pendar porandusave omombehura ava cūríteindar cañipa āgua. Esepia niha, omboasise oangaipa, oyevi Tūpa upe

yuvireco Jonás omombehuse Tũpa Ñehengagũer chupe; cũritei rumo oime ivate catu vahe Jonás sui pe pãhuve” ehi.

Tesapesa yande retecuer resendar

³³ “Ndayañomi chira tataendi que imoendi imoi; ndayamondo chiaveira que mbahevriive. Iyacatu rumo yamondora ivate tataendi rendave ‘tosape opacatu ava oi que vahe oi pipe’ yande yapave. ³⁴ Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pĩtumimbi vahe nungar tẽi. ³⁵ Sese peicua catu co poroesapesa pereco vahe, tape rereco eme pĩtumimbi vahe nungar. ³⁶ Co supi eté vahe osesape tuprise opacatu pe pihave, ndipoise que pĩtumimbisa nungar mbahe ipipe, evocoyase ahẽ inungar tataendi osesape vahe opacatu pe recocuer pipe. Ahese ndipoi que pĩtu vahe pẽu” ehi.

Jesús omombehu fariseo iyavei Moisés porocuita rese oporombohe vahe recocuerai

³⁷ Opase oñehe Jesús, fariseo viraso güetave imbocarú. Oiquese sètave oso, uguapi mesave oĩ. ³⁸ Ocaru renondeve ndoyepoise rumo, ahese fariseo ndoyembovihal tẽi nomboaviyese judío porocuita. ³⁹ Ahe rumo aipo ehi fariseo upe:

—Inungar igua rĩru iyavei tembihu rĩru icupe rupi tẽi yoseipri, ipipe rumo iquihã opitaño ité, ãgũe ehi tupri avei pe recocuer pe monda raisave mbahe-mbahe tẽi pe reco pipe. ⁴⁰ ¡Pe ndayaracuai vahe peico! ¿Ndapeicuai vo pe rete aposar, pe pihã aposar avei? ⁴¹ Sese pemondo porerecosa ava iparaisu vahe upe pe recatẽhiẽhisa pipe. Evocoyase ipipe sui opacatu imoatirombri peicora.

⁴² “¡Peparaisu pe fariseo! Esepia, yepe pe remiti sui pemondo peyacatu ñepi-pei diez vahe sui Tũpa upe viña, pe rumo ndaperoyai teco ñvisa iyavei peseyaño tẽi Tũpa poroaisusa. Iyacatu rumo peyapora evocoi mbahe pe porerecosa sui pe poiẽhisa pipe viña.

⁴³ “¡Peparaisu pe fariseo! Esepia, peipota pe renda porañete catu vahe pe guapi ãgua tũparo pipe, iyavei peipota pẽu opacatu ‘avirave’ oyapora ava pe mboetisave ocar rupi yuvireco.

⁴⁴ “¡Peparaisu! Esepia, pe recocuerai inungar tehõgũer ruvipa icuaẽhise ava uguata ihari rupi yuvireco” ehi chupe.

⁴⁵ Evocoyase Moisés porocuita rese oporombohe vahe, —Porombohesar —ehi—, aipo eromombehu vahe pipe niha ava ore amotarẽhiño yuvireco —ehi.

⁴⁶ Ahe rumo aipo ehi:

—¡Peparaisu avei pe Moisés porocuita rese oporombohe vahe! Esepia, pemondo porocuita yavai vahe ava upe; pe rumo evocoyase ndapeipitiviimi eté ahe ava imboaviye ãgua rese yuvireco.

⁴⁷ “¡Peparaisu! Esepia, pemoingatu Tũpa ñehe mombehusar ruvipagüer peico Tũpa mboeteisa angahu pipe tēi. Pe ramoi teieté rumo oyuca yuvireco. ⁴⁸ Evocoyase pemboyecua co pe ramoi eta pihañemoñeta agüer secocuer moña pipe peico. Esepia, ahe oyuca Tũpa ñehe mombehusar yuvireco. Pe evocoyase cūrítei pemoingatu vite suvipagüer peico.

⁴⁹ “Sese Tũpa ombahecuaa pipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ipāhu pendar oyucara yuvireco. Iyavei ambuae mara-mara tēi virecora yuvireco’ ehi. ⁵⁰ Esepia, ava ndiporeroyai vahe cūríteindar upe ité omondora oñemoirosa opacatu oñehe mombehusar yucagüer rese aracahe suive, cūríteindar avei oyucase yuvireco. ⁵¹ Abel yuca agüer suive oyepotara Zacarías yuca agüerve oso. Ahe oyuca tũparo maranehi rocar mbahe reropovēhesa rovai. Supi eté aipo ahe pēu: Tũpa opara omondo oñemoirosa ahe yuca agüer rese ava ndiporeroyai vahe cūríteindar upe curi.

⁵² “¡Peparaisu pe Moisés porocuita rese oporombohe tēi vahe! Esepia, pe mbahecuaa aviye soquendapri pereco ava sui. Pe niha ndaperoyai, iyavei ambuae ava upe ndapeipotai seroya ãgua” ehi chupe.

⁵³ Ipares Jesús osē oso ichui. Ahese Moisés porocuita rese oporombohe vahe iyavei fariseo eta oñemoiró iteanga yuvireco sese. Ahe omañeco tēi, oporandu-randu mbahe rese yuvireco chupe, ⁵⁴ osecóãha-ãha tēi mbahe pipe ‘toyavi angahu oñehe yandeu’ ohesa pipe yuvireco.

12

Fariseo recocuer rese Jesús oñehe

¹ Ahe pipeve avei ava oñemonuha atí iteanga oyemboti tupri oyemombo guasu-guasú yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavi supi tupri vahe viña; ndahei eté rumo. ² Esepia, yaposa vahe imombe-hupirēhi cūrítei icuasaño itera curi. Iyavei mbahe ñomipri icuasaño aveira no. ³ Supi eté opacatu mbahe pemombehu vahe pītumimbisave, ahe sendusa tuprira ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucáisara oi harive opacatu ava rovaque” ehi.

¿Uma sui p̄iha siquiyesara?

⁴ “Iyavei aipo ahe p̄eu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo āgua p̄eu. ⁵ Che rumo amombehura p̄eu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera.

⁶ “Pe pemondo poyandepo v̄irai ñuvirío guarepochi rupivemi t̄ei yepi. T̄upa rumo ndasesarai eté que ñepe sui. ⁷ T̄upa niha oicua ñepe-pe yande ha retacuer. Sese, pesiquiye eme; pe niha ivate catu vahe ité peico opacatu v̄irai sui” ehi.

“Che aroya ité Jesucristo” ehi vahe opacatu ava rovaque

⁸ “Acoi ava ‘che aroya Jesús’ ehi vahe opacatu ava rovaque, che avei, Ava Riquehir, ‘Co che reroyasar secoi’ aipo ahera che Ru upe sembuguai rovaque. ⁹ Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoyase, ‘Co ndahei che reroyasar secoi’ ahe aveira che Ru T̄upa upe sembuguai rovaque” ehi.

¹⁰ “Iyavei opacatu oñehe-ñehe t̄ei vahe che, Ava Riquehir, rese, ahe chupe oimeño ñeroisa. Acoi que ava iñehe-ñehe t̄ei vahe rumo Espiritu Santo amotar̄hisave, ahe chupe ndipoi chietera ñeroisa” ehi.

¹¹ “Acoi pe amotar̄hisar che recocuer sui t̄ei pe rerasose porandusave pe recoāha āgua yuvireco, anise mborerecuar mbahe moingatusar rovai, que ambuae mborerecuareta upe avei no, ‘¿Mbahe p̄iha amombehura?’ ndapeyei chira. ¹² Esepia niha, ahe pipeve voi Espiritu Santo pe mbohera aviyeteramo t̄ei mbahe mombehu āgua rese” ehi güemimbohe eta upe.

Ñearosa mbahe pota raisa sui

¹³ Ñepe sui mbia ava rehii p̄ahu pendar aipo ehi Jesús upe: —Porombohesar, emombehumi che riquehir upe, tomboyahomi t̄ei mbahe che mombahesa cheu —ehi.

¹⁴ Ahe rumo omboyev̄i chupe:

—Che mboripar, che ndachecucuitai mbahe moingatu āgua, mbahe mboyaho-yaho āgua avei —ehi ahe mbia upe.

¹⁵ Ipare aipo ehi:

—Peñearo tupri opacatu mbahe pota raisa sui. Esepia niha, ndahei mbahe rereco ati āgua pe recocuer —ehi.

¹⁶ Ipare omboyoya ambuae mbahe rese imbohe: “Oime mbia mbahe yar, iha tupri ai eté semiti. ¹⁷ Ahese ipihañemoñeta oico oyeupe: ‘¿Mara ahera p̄iha che rembipoho rereco?’ ehi t̄ei. ‘Ndareco iri eté yapocatu āgua’ ehi. ¹⁸ Ipare ipihañemoñeta cute: ‘Aicua mbahe che rembiaporā. Opara aroyi tembihu r̄eta. Ichui ayapo irira ambuae tuvichá catu

vahe. Aheve ayapocatura che remiti rãhii opacatu mbahe areco vahe avei no. ¹⁹ Evocoiyase aipo ahera cheyeupe: Che mboripar, oime setá mbahe cheu araviter momba-momba ãgua; sese cūritei apituhura vichico, acarura, aachura iyavei ayemboviharera no, ahera' ehi. ²⁰ Tūpa rumo aipo ehira chupe: 'Mbia, nandearacuai eté eico, co pĩtu pipeve voi eté eremanora. Co mbahe nde rembiapocatu, ¿ava mahera pĩha evocoiyase?' ehira chupe. ²¹ Ēgüe ehi eté niha que ava oyeupeñomi tēi mbahe omonuha ati vahe, iparaisu rumo Tūpa rovaque" ehi ahe mbia upe.

Tūpa osãro opacatu guahir

²² Ipare aipo ehi Jesús güemimbohe upe: "Co amombehura pēu: Ndapeyemomahenduha guasu ai chira pe remihura rese pe recove ãgua, pe turucuarã rese tēi avei no. ²³ Yande recovesa rumo aviye catu vahe tembihu sui; yande retecuer avei aviye catu turucuar sui no. ²⁴ Pesepia vĩrai: nomahetii vahe, nomonuhai vahe avei, ndovirecoi vahe avei mbahe rãhii rēta yuvireco. Tūpa rumo omoime mbahe itohu. ¡Pe rumo ivate catu vahe ité peico vĩrai sui! ²⁵ Ndipoi eté que ñepepe pe pãhu pendar oicatu vahe opihañemoñetá iteangasa pipe tēi güecocuer mbosasaviño ãgua. ²⁶ Supi eté ndapeicatuise yapo, ndiyai peyemomahenduha guasu ai mbahe rese.

²⁷ "Pemahecua ru mbahe potri caha pipendar rese: ndoporaviqui eté iyavei ndoipiã oturucuarã. Iyavei no yepe mborerecuar guasu Salomón vireco setá mbahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. ²⁸ Tūpa niha omboporañete raimi tēi mbahe potri caha pipendar. Ichui sapisapaño horno pipe. ¡Ahe rumo omondo catura turucuar pēu, pe ava mbahe reroya tuprii vahe! ²⁹ Sese, '¿Mbahe pĩha yahura, mbahe pĩha yamondera?' ndapeyei chira pe yemomahenduha guasu aisa pipe. ³⁰ Esepia, ava Tūpa reroyasarēhi co ivi pipendar aipo nungar mbahe reseño tēi ipihañemoñeta yuvireco yepi. Pe Ru Tūpa rumo oicua ité pēu mbahe ipane vahe. ³¹ Aviye catu rumo pesecara pe Yar Tūpa povrive pe reco ãgua, ahes omboura que mbahe ipane vahe pēu" ehi.

Ivave mbahe eta oime vahe yandeu

³² "Aní pesiquiye, che ovesa nungar, yepe pe moviromi tēi peico viña, pe Ru rumo oporoaisusa pipe oipota opovrive pe rereco ãgua. ³³ Pemondopa mbahe pereco vahe ava oipota vahe upe. Ipare pemondo sepri avei iparaisu vahe upe. Ahe yapocatusa ivave mbahe riru ndituyui vahe nungar pipe. Aheve ava imonda rai vahe ndoiqueei chira ñomi ãgua pe sui iyavei mbahe rasoí nomomaraí chiaveira. ³⁴ Esepia,

pe mbahe pe rembiereco setá catu vahesa rupi-rupi pe pihañemoñeta yepi” ehi.

Peyemoingatu Tūpa Rahir yevi āgua

³⁵ “Peyemoingatu tupri che yevi āgua. Inungar tataendi ndogüei vahe, pemboyecua tupriño ité che recocuer pe recocuer pipe ava upe. ³⁶ Peico imboacuapri güerecuar osāro vahe nungar mendasa sui iyevise, oquenda imotase, omboi voi vahe yuvireco chupe. ³⁷ Aviye itera serecuar upe osepiase iyemoingatu voi; evocoyase serecuar ae niha ihañecora sese, omboguapira mesave imbocarú. ³⁸ Yepe serecuar oyepotara pītu mbiter ou viña, anise añihiveive, ahe rumo osāroño itera chupe imboi āgua yuvireco. Evocoyase serecuar aviye ai etera chupe. ³⁹ Peyapisaca tupri co rese: acoi oi yar oicuase mbahe hora imonda vahe yepota āgua, ahese opitara imonda vahe rāro güēta pipe sui mbahe renoseēhi āgua. ⁴⁰ Ēgüe peye aveira peyemoingatu che yevi āgua. Esepia niha, che, Ava Riquehir, aporoesapiha tēira vitu curi” ehi Jesús viroyasareta upe.

Mbiguai omboaviye vahe ocuaita iyavei nomboaviyei vahe

⁴¹ Evocoyase Pedro oporandu Jesús upe aipo ehi:

—Che Yar, ¿oreuñomi pīha eremombehu co porombohesa eremboyoya vahe ambuae mbahe rese, opacatu upe tie? — ehi.

⁴² Evocoyase omboyevi Pedro upe aipo ehi: “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarā güēta pipendar rese hañeco āgua ‘tembihu tomondo che rēta pipendar upe che porocuita rupi’ ohesave. ⁴³ Acoi omboaviyese ocuaita, ahese oviharetera güerecuar yevise. ⁴⁴ Supi eté niha, serecuar oyocuirā opacatu ombahe rese hañeco āgua. ⁴⁵ Ahe mbiguai rumo ‘ndoyepota vitei chira revo che rerecuar’ oya omboetasa cuimbahe iyavei cuña omboipi mara-mara tēi sereco iyavei ocaru, oihu tēi osavaipo-ipoño avei oico. ⁴⁶ Ipare rumo serecuar oyepotara imahemohaēhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

⁴⁷ “Acoi mbiguai oicua tēise mbahe güerecuar remimbotar, noyemoingatuise rumo iyavei ndoviroyaise oico, ahe evocoyase serecuar oinupara. ⁴⁸ Acoi mbiguai nomboaviyei vahe ocuaita icua tupriēhisa pipe, nañemoirosa rutei chira chupe. Esepia niha, acoi imondosa catu vahe icuaitarā, porandusa catura chupe. Acoi oyeroya catu vahe, oporandu catu aveira sese” ehi.

Jesús reroyasa pipe sui oimera yeamotarēhisa

49 “Che ayu tata nungar yavai vahe reru ãgua co ivi pipendar upe ‘joyandu tarahu yuvireco cute viña!’ viya. 50 Aique ranera rumo mbahe tēi che recoãhasa pipe, jēgüe ahera che paraisú itera imboaviye ãgua! 51 ‘Mbahe tupri ai revo güeru co ivi pipe’ ndapeyei chira cheu. Ēgüe ehi rumo che ayu che sui ava yeamotarēhi ãgua. 52 Esepia niha, co pipe suive ité que poyandepo tupri revo oñemu yuvirecoi vahe amove oyeamotarēhira yuvireco che recocuer sui: mbosapi oyamotarēhira ñuvirío vahe, ñuvirío vahe evocoyase oyamotarēhira mbosapi vahe yuvireco. 53 Que ava oyamotarēhira guahir, anise tahir evocoyase oyamotarēhira vu; cuña oyamotarēhira omembri, imembri evocoyase oyamotarēhira osi; sovayar oyamotarēhira vovayar” ehi güemimbohe upe.

Iva pendar poromondisa mboyecuasa

54 Ipare Jesús aipo ehi ava rehii upe: “Pe pesepiase mbahe pĩtu ari sosa coti sui opũhase, ahese, ‘Oquira’ peye. Ēgüe ehi eté oqui. 55 Iyavei acoi ivitu oipecoyase irohí coti sui, ahese, ‘Sacú iteangara’ peye. Ipare ēgüe ehi eté. 56 ¡Pe Tũpa reroyasar angahu tēi peico vahe! Pe niha peicua mbahe iva rese oyecua vahe tēi iyavei ivi rese mbahe oyecua vahe tēi mombehu, ¡mahera ru ndapeicuai peyeupe mbahe cūrítei oime vaherā mombehu peico!” ehi.

Peñero pe amotarēhimbar upe

57 “¿Mahera napesãha ranei pe ae ité co mbahe supi eté vahe? 58 Acoi que ava nde amotarēhisar nde soho ucase nde mondo ãgua mborerecuar rovai, emoingatu tupri voi mbahe eico chupe tenondeve nde rerasoēhi ãgua sovai; anise, mborerecuar nde mondora ava naporai vahe rarõsar upe. Ahe evocoyase nde roquendara. 59 Supi eté nderesēi chietera acoi eremboepipase voi eté eresēra ichui” ehi ava rehii upe.

13

Aviye catu ité yañecuñaro

1 Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovēhese mbahe mimba yucapri yuvireco chupe. Ahe suvi oyeseha mbahe mimba ruvi rese.

2 Ipare Jesús aipo ehi chupe: “Pemoha co pe: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui ēgüe ehi mbahe chupe viña. 3 ¡Aní rumo! Acoi ndapemboasiise pe angaipa Tũpa upe pe yevi ãgua, pe avei opara pecañi tēi. 4 Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae

ava Jerusalén pipendar sui' peye viña no. ⁵ Aní rumo; acoi ndapemboasiise pe angaipa Tūpa upe peyevi āgua, pe avei opara pecañi tēi" ehi.

Yembohesa ivira higuera ndihai vahe resendar

⁶ Evocoyase Jesús omombehu mbahe omboyoya oporombohe ambuae mbahe rese aipo ehi: "Oime mbia vireco vahe ivira higuera oco pipe. Setá ari ahe oso sepia '¿iha pīha?' oyapave. Ndosecai eté rumo iha sese. ⁷ Ahese aipo ehi mbia oco rārosar upe: 'Esendu, che ayu pīhi tēi higuera ha reca mbosapi araviter rupi. Ndasepiai eté rumo que ñepe iha sese yepi' ehi. 'Eyasiapa; ndiyai ihāi tupri tēi cohave' ehi. ⁸ Ico rarōsar rumo omboyevi chupe aipo ehi: 'Che rerecuar, ēgüe tehiño vite tēi rane co araviter; amonguhira ivi chupe. Ipare amondora ivi sū vahe mbahe repochi resendar sese. ⁹ Ahese revo ambuae araviter ihara cute; anise ité rumo, ereyasia ucaño itera' ehi ico rārosar güerecuar upe" ehi Jesús ava mbohe.

Jesús ombogüera cuña oyecuhapami vahe mbituhusa ari pipe

¹⁰ Ñepe mbituhusa ari pipe Jesús oporombohe judío tūparo pipe. ¹¹ Aheve oime cuña imbaheasi vahe, dieciocho araviter rupi ahe mbaherasisa vireco, carugar tēi omboyepami uca sereco. Sese ndoicatu opūha tupri uguata. ¹² Osepiase rumo Jesús, "Erio" ehi chupe.

—Cuña, cūrítei nanembaheasi iri eico cute —ehi.

¹³ Evocoyase omondose opo sese, aheseve voi cuña oye-mohivi. Ipare omboetei Tūpa oico. ¹⁴ Judío tūparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mboraviqui āgua; ahe ari pipe peyura peposano āgua, ndahei chira mbituhusa ari pipe —ehi.

¹⁵ Evocoyase ahe mbia upe omboyevi aipo ehi:

—Pe Tūpa reroyasar angahu tēi peico vahe, ¿nombohui vo pe pāhu pendar acoi güeimba tivi iyavei guaricu mbituhusa ari pipe yuvireco yepi no? ¹⁶ Co rumo cuña, Abraham suindar Carugar omombaheasi vahe dieciocho araviter suive sereco, ¿ndiyai eté pīha evocoyase imbogüerasa mbituhusa ari pipe? —ehi tūparo pendar rerecuar upe.

¹⁷ Aipo ehise, opacatu yamotarēhisar yuvinochi tēi yuvireco ichui. Ambuae ava rumo oyembovihaño opacatu Jesús rembiapo osepiase yuvireco.

Yembohesa mostaza rāhi suindar

¹⁸ Evocoyase Jesús aipo ehi avei: "¿Mbahe nungar pīha Tūpa povri pendar, iyavei mbahe rese vo amboyoyara? ¹⁹ Oyoya tupri ité mostaza rāhi rese, inungar acoi mbia oñoti vahe oco

pipe. Ichui ocuacua, tuvichá iteanga. Ahe sãca rese vĩrai rehiu oyapo guaitirã” ehi oporombohe.

Yembohesa pan mboapeposa sui

²⁰ Evocoiyase Jesús aipo ehi iri: “¿Mbahe rese pĩha amboyoyara Tũpa povri pendar? ²¹ Oyoya tupri co pan mboapeposa rese, acoi cuña omboyeseha tupri vahe mbosapi sãhambri trigo cuhi rese opacatu imboapepo ãgua yepi” ehi oporombohe.

Jesús peri icãhimi vahe nungar

²² Ipare Jesús osoño Jerusalén ve, opita-pita tecua yacatu rupi oporombohe oico. ²³ Ahe supi ichose, ñepe mbia oporandu chupe aipo ehi:

—Che Yar, ¿supi eté pĩha moviromi tẽi ava oñepisirora yuvireco? —ehi.

Ahe evocoiyase omboyevi chupe:

²⁴ —Peyemoviracua tupri catu peique ãgua oquendipi cãhimi rupi. Esepia niha, supi eté setá ava osãha tẽira yuviroique vaherã ahe oquenda rupi yuvireco viña, ndoyuviroique catui chira rumo yuvireco. ²⁵ Supi eté ahe inungar oi yar ouse oquenda mboya viña. Amove ava evocoiyase ocarve yuvirecoi vite vahe omota tẽira oquenda, ‘Ore yar, emboimi tẽi oreu’ ehi tẽira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe. ²⁶ Evocoiyase ahe aipo ehi tẽira yuvireco: ‘Ore niha orocarua vahe, oroihu vahe nde piri, iyavei ore mbohe ore rocar rupi eve yepi’ ehi tẽira yuvireco chupe. ²⁷ Ahe rumo aipo ehira: ‘Ñepe reseve niha acoi, Ndopocuai vahe, ahe pẽu. ¡Pesiri che sui, pe opacatu mbahe-mbahe tẽi aposar!’ ehiñora chupe. ²⁸ Pe rumo imombopriira pe recocuer Tũpa povri sui, sese peyaseho tẽira, peyemoaitere tẽira peico pesepiase Abraham, Isaac, Jacob iyavei opacatu Tũpa ñehe mombehusareta yuvirecoise Tũpa povri ve ivave. ²⁹ Iyavei ava yuguerura añihivei coti sui, caharu coti sui, norte coti sui iyavei irohi coti sui, ahe evocoiyase yuviroguapira ocaru Tũpa mborerecuasave ipiri yuvireco. ³⁰ Supi eté amove ava ndoyavii ipa tẽi vahe seique ãgua ivave Tũpa piri viña, ahe ranengatu rumo yuviroiqueño itera ipipe iyavei amove ava tenonde catu vahe ndoyavii ahe rane oique vaherã ivave viña. Ahe rumo ipa tẽi yuviroiquera —ehi Jesús ava rehiu upe.

Jesús oyaseho Jerusalén pendar rese

³¹ Ahe ari pipe oyepota moviro fariseo aipo ehi tẽi Jesús upe yuvireco:

—Eyepepiño ave sui. Esepia, Herodes niha nde yuca pota oico —ehi tẽi yuvireco chupe.

³² Ahe rumo,

—Peso, tapemombehu aipo mbia aguara nungar tēi upe: ‘Esepia, co pipe iyavei ayihive amboyepipiñora ava sui carugaretá vichico, ambogüerañora ava imbaherasisa sui, curi ayihive evocoyase amombara che cuaita’ peyera. ³³ Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tūpa ñehe mombehusar omano co coti tēi Jerusalén sui yuvireco — ehi.

³⁴ “¡Too rutei pe Jerusalén pendar, peyuca vahe Tūpa ñehe mombehusar, iyavei ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembrí opepovrive, ãgüe ahe pota tēi pe rereco viña, pe rumo ndapeipotai eté! ³⁵ Sese seyapirã tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

14

Jesús ombogüera mbia iruru sui

¹ Ñepeí mbituhusa ari pipe Jesús oso ocaru mborereciar fariseo rētave. Aheve ambuae fariseo eta oiviro yuvireco.

² Aheve avei mbia iruru vahe secoi. ³ Evocoyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera ãgua; aní tie? —ehi.

⁴ Ahe rumo noñeheiño yuvireco chupe. Ahese ahe opoco imbaheasi vahe rese, ombogüera. Ipare, “Eso tupriño” ehi chupe. ⁵ Fariseo eta upe evocoyase aipo ehi:

—¿Ava pñha pe pñhu pendar novinose voi chira güeimba guaricu, anise tiví oviapise ivicuar pipe mbituhusa ari pipe viña? —ehi.

⁶ Ahese nomboyevi catui eté iñehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imboyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸ —Acoi que yande soho ucase mendasa pietasave yuvireco, ndayaguapii chira ava imboeteipri catu vahe renda harive. Esepia, aviyeteramo que ambuae ava ichohopri oyepotara yande sui imboeteipri catu vahe yuvireco. ⁹ Ipare yande soho ucasar aipo ehira yandeu: ‘Epñha evocoi sui, co mbia toguapi eipeve’ ehira yandeu. Evocoyase yande yachĩ tēira yaso ipami tēi yaguapi. ¹⁰ Yande soho ucase rumo

yuvireco, yaguapira evocoyase ipa; yande soho ucasar ouse, aipo ehira yandeu: ‘Mbori, erio cohawe tenda imboeteipri catu vahesave ore piri’ ehira. Ëgüe yahera imboeteipri yaico acoi ava yuviroguapi vahe rovaque yande piri. ¹¹ Esepia niha, acoi ava oyemboivate ai vahe opara seco reroyisa; acoi ava seco mbegüe vahe rumo, ahe seco mboivate catusara curi —ehi.

¹² Ipare aipo ehi avei ichohosar upe:

—Ereyapo potase pieta, ndereichoho ucai chira nde mboripar, que nde rivri, que nde mu iyavei que nde rêta cotindar imbahe eta vahe. Esepia niha, ahe omboeyvira ndeu, nde soho ucara oyepiri yuvireco; ëgüe ehira evocoyase mbahe imboeyvira yuvireco ndeu. ¹³ Ereyapose rumo pieta, ereichoho ucara ava iparaisu vahe, ava ipo ichutu vahe, anise ipi chutu vahe, ipãri-pãri vahe, ndasesapisoi vahe avei. ¹⁴ Esepia niha, ahe ndoicatu mbahe mboeyvira yuvireco ndeu. Opase rumo ocuerayevi ava seco catupri vahe yuvireco, ahese ereviharera eico. Esepia, erepisira mbahe aviye vahe Tupa suindar —ehi.

Jesús oporombohe carusa rese

¹⁵ Ñehe renduse rumo, ñepe mbia yuviroguapi vahe mesave, ahe aipo ehi Jesús upe:

—iSovasapri catu ava Tupa piri ocaru vahe imborerecuasave! —ehi.

¹⁶ Evocoyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri. ¹⁷ Ipare oyepotase ari caru água, ahese aipo ehi güembiguai mondo: ‘Toyugüerupa che piri ichohopri. Esepia niha, mbahe opa oingatu cute’ ehi. ¹⁸ Opacatu rumo ava, ‘Eñemosañomi tēi cheu’ ehi pãve yuvireco. Yipindar mbia aipo ehi: ‘Che rumo arocuai ivi; iya ité aso sepia. Sese eñemosañomi cheu’ ehi chupe. ¹⁹ Ambuae mbia aipo ehi: ‘Che arocuai ramo diez tupri tivi, ahe asãha ranera. Sese eñemosañomi cheu’ ehi chupe. ²⁰ Ambuae aipo ehi no: ‘Che amenda ramomi vichico. Sese tēi ndasoi chira’ ehi. ²¹ Oyevise mbiguai, opa tupri omombehu mbahe güerecuar upe. Ahese serecuar aipo ehi oñemoirosa pipe güembiguai upe: ‘Eso voi evocoyase opacatu ocar rupi. Supi sui eru ava iparaisumi vahe, que ava ipo chutu vahe, anise ipi chutu vahe, que ndasesapisoi vahe, anise que ava ipãri-pãri vahe avei no’ ehi. ²² Coiye ava reru pare aipo ehi mbiguai güerecuar upe: ‘Che rerecuar, aroya ité nde che cuaita; ipane vite rumo ava’ ehi. ²³ Evocoyase aipo ehi güembiguai upe: ‘Eguata iri ambuae peri tecua ivirindar rupi avei toyugüerumi che rêtave yuvireco che piri, tomboapipopa ité che rêta yuvireco’ ehi. ²⁴ Esepia

niha, acoi yipindar ava aichoho uca vahe ndipoi chietera que ñepeí ocaru vaheerã che pirí' ehi güembiguai upe —ehi Jesús ahe mbia mbohe.

Yavai Cristo rupi guata água

²⁵ Ava rehii Jesús raquicuei oguata yuvireco. Sese ahe oyemboyere aipo ehi ava upe: ²⁶ “Acoi oimese que ava oipota vahe che rupi oguata água, tache raisu catu que ambuae ava sui, que oyesupa, osi, güembireco, guahireta, vivireta iyavei güeindireta sui, oyesui avei. Ëgüe ndehise, evocoyase ndiyai chupe che remimbohe seco água. ²⁷ Iyavei que ava noñemosañoi vahe mbahe-mbahe tēi upe oiporarase ari yacatu rupi inungar-ra ocurusu rese ovosii vahe viña che rupi oguata água, ahe chupe ndiyai che remimbohe seco água” ehi. ²⁸ “Que ava pe pãhu pendar omopuha potase oi, ¿ndoyapisaca ranei chira ‘¿amomba angara pãha?’ oyapave? ²⁹ Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroĩrora ³⁰ aipo ehira yuvireco: ‘Aye evocoi mbia omopuha pota tēi oi viña, ndoicatu eté rumo imboaviye’ ehira yuvireco chupe. ³¹ Iyavei que mborerecuar guasu diez mil sundao vireco vahe oyeepi potase ambuae mborerecuar veinte mil ava vireco vahe sui, oyapisaca ranera yipindar icua tupri água ‘¿yaicatura pãha setá catu vahe rese yavava?’ ohesave. ³² Esepia, ndoicatuise, evocoyase ambuae mborerecuar guasu amombri vite secoise, omondora mbahe mombehúsar mbahe tupri rese porandu água chupe. ³³ Ëgüe ehi avei pe recocuer ndapeseya potaise pe mbahe opacatu, Ëgüe ehi vahe ndahei eté che remimbohe” ehi.

Yande recocuer inungar yucrí

³⁴ “Yucrí aviye vahe ité yandeu; nasehe irise rumo, ndayaicatu chietera imoehe iri água. ³⁵ Naporai eté ivi upe nara; ndiyai avei ivi mbahe repochi resendar rese oyeseha vaheerã. Evocoyase ahe imombopri tēi vaheerã. Sese aipo ahe acoi ava oyapisaca pota vahe, toyapisacaño” ehi.

15

Porombohesa ovesa ocañi tēi vahe resendar

¹ Opacatu ava sui guarepochi rerocuasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu água yuvireco. ² Sese fariseo yuvirecoi vahe iyavei Moisés porocuita rese oporombohe vahe yuvireco, ahe oviroĩro tēi yuvireco aipo ehi:

—Co mbia ombori pota raí ava yangaipa guasu vahe tēi oico yepi, ocaru avei ipãhuve no —ehi.

³ Evocoyase Jesús omombehu ovesa resendar yembohesa:
⁴ “Que ñepei pe pãhuve virecose cien ovesa güeimba, ipare co ocañira ñepei ichui viña, oseya ranera evocoyase evocoi noventa y nueve tēi aviye vahesave seco ãgua. Ipare oyevira ocañi vahe reca oso, oyosu rane itera viña. ⁵ Oyosuse, osupira oachihive vorivetesá pipe. ⁶ Ipare oyepotase güëtave, omonuhara omboripareta, ocotindareta avei no. Ipare aipo ehira chupe: ‘Yayembovihara che piri. Esepia niha, ayosu ité ovesa ocañi vahecuer cute’ ehira. ⁷ Supi eté ãgüe ehi aveira oime torivetesá guasu catu ivave acoi ñepei ava yangaipa guasu vahe oñecuñarose güecocuera sui noventa y nueve yuvirecoi tupri vahe sui yuvireco” ehi.

Yembohesa guarepochi ocañi vahe resendar

⁸ “Acoi que cuña omocañise ñepei guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera. ⁹ Evocoyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha, ayosu guarepochi che sui ocañi vahecuer cute’ ehira. ¹⁰ Supi eté ãgüe ehi aveira oime torivetesá Tüpa rembiguai íva pendar rehi upe que ñepei ava yangaipa guasu vahe oñecuñarose güecocuera sui” ehi.

Yembohesa mbia rahir ocañi vahe resendar

¹¹ Aipo ehi avei oporombohe: “Oime mbia vireco vahe ñuvirío guahir. ¹² Chihivahe catu vahe aipo ehi oyesupa upe: ‘Che ru, embou mbahe che mombaesa cheu’ ehi. Iyesupa evocoyase omboyaho ombahe imondo chupe. ¹³ Ipare coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pipe. ¹⁴ Acoi oiporupa tēise rumo opacatu ombahe, ahese oime tiavor ahe ivi rupi. Ahe evocoyase ndasiepoi tēi oico. ¹⁵ Evocoyase oso mboraviqui reca mbia piri aheve. Ahe mbia evocoyase omondo ocove güeimba cuchi rãro ãgua. ¹⁶ Aheve oyemohitaro pota tēi cuchi rembihu pipe oico viña. Ndipoi eté rumo omondo vahe chupe. ¹⁷ Evocoyase oye-momahenduha tēi güëta pendar oporaviqui vahe rese: ‘¡Che ru rëtave oporaviqui vahe rumo co omoumbire guasu-guasú tēi güembihu yuvireco! ¡Che rumo che yuca pota tēi che rieporēhi che rereco cohavel ¹⁸ Sese ayevira che ru rëtave. Aipo ahera chupe: Ayemboangaipa Tüpa rese, nde rese avei no. ¹⁹ Ahese che ndahe iri chira nde rahir nungar aico; iyacatu revo ndeu, oporaviqui vahe nungar tēi che rerecoñora eve, ahera’ ehi. ²⁰ Evocoyase oyevi iri oso vu rëtave cute.

“Amombri vitemi tahir recose rumo iparaisu catu chupe, oña voi oso guahir rovaichi, oyaco osovaupite avei. ²¹ Ahese

tahir aipo ehi chupe: ‘Che ru, ayemboangaipa Tūpa rese, nde rese avei; ndiya iri nde rahir che reco āgua’ ehi. ²² Tu rumo aipo ehi güembiguaí upe: ‘Peso, taperumi aviye catu vahe turucuar pemboyemonde, pemonde avei cuā penda sese, pitaquí avei. ²³ Iyavei guaca iquíra catu vahe peyuca. ¡Yayapora pieta guasu!’ ehi. ²⁴ ‘Esepia, co che rahir aviye omano vahe secoi viña, cūrítei rumo oyeví iri cheu’ ehi. Ēgüe ehi opacatu sorivete yuvireco pieta apo.

²⁵ “Tahir cuacua catu vahe rumo ocove vite secoi. Oyevíse ou güēta rerovicave, osendu voi ípieta guasu vahe yuvireco. ²⁶ Evocoiyase oporandu mbiguai upe mbahe oime vahe rese. ²⁷ ‘Nde rivri mo co oyeví tupri iri ou. Sese nde ru oyuca uca guaca iquíra vahe iyevísa resendar’ ehiño. ²⁸ Evocoiyase tiqehir oñemoirosa pipe, ndoique potai oyesupa uve oi pipe; tu rumo osēño ité ocarve ‘eique’ oya chupe. ²⁹ Evocoiyase tahir omboyeví chupe aipo ehi: ‘Che niha setá araviter rupi oropitíví vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mboripar rese ore pieta āgua’ ehi vu upe. ³⁰ ‘Indó, cūrítei oyepota ndeu nde rahir, omocañi tēi vahe nde guarepochi cuña ndipihai vahe rese tēi. Ahe eremboetei catú che sui; ereyuca uca rutei guaca iquíra vahe chupe’ ehi.

³¹ “Evocoiyase tu: ‘Eyapísacaño, che rahir, nde niha nderesiríi vahe che sui. Opacatu che areco vahe rumo nde mbahe ité yepi. ³² Cūrítei rumo iyacatu ité yande rorivetesave yayapora pieta. Esepia, co nde rivri ocañi tēi vahecuer rese yamahe iri’ ehi guahir upe” ehi Jesús ava eta mbohe.

16

Mbahe yar mbahe rese ñangarecuar ndoyemboaracuai vahe resendar yembohesa

¹ Jesús aipo ehi avei güemimbohe eta upe: “Oime mbia imbahe eta vahe. Ahe víreco mbia ombahe eta rese ñangarecuar. Ahe chupe ava yugüeru mbahe mocañi tēi agüer mombehu. ² Evocoiyase serecuar ñepeí opitívíisar omondo seca, ahe güeruse, ‘¿Mbahe vo aipo ereyapo eico; ayandu cūrítei nde rerācua? Emoingatupa tupri voiño nde poravíquisa resendar cheu’ ehi, ‘Nandehañeco iri chira cohava mbahe rese cheu’ ehi, ‘Nandehañeco iri chira cohava mbahe rese cheu’ ehi chupe. ³ Evocoiyase mbahe rese ñangarecuar: ‘¿Mara ahera pīha co evocoiyase vichico imombopri che recose che poravíquisa sui? Ndareco iri rumo pīratasa cheyese ívi rese che poravíqui āgua. Achí eteanga aveira rumo mbahe rese che porandu āgua’ ehi tēi. ⁴ ‘Aicua rumo cute mara ahera vichico: che poravíquisa sui opa che momboise, oimera che

pisí tupri vaherã oyepiri' ehi. ⁵ Evocoyase oñehe ñepei-peí güerecuar sui mbahe vinose tẽi vahe rese chupe. Yipindar vahe upe oporandu: '¿Mbovi mbahe erenose tẽi yande rerecuar sui?' ehi. ⁶ 'Cien tupri chereve aceite siru tuvichagüe vahe rese' ehi. Evocoyase, 'Eguapi ru, co oime cuachiar sesendar nde yecuachía agüer. Emondoro, eyapo iri ambuae cincuenta rupindar año' ehi chupe. ⁷ Ichui ambuae mbahe vinose tẽi vahe upe oporandu no: '¿Mbovi mbahe vo erenose tẽi yande rerecuar sui?' 'Cuatro ciento quintar rupindar' ehi. Evocoyase, 'Co oime cuachiar sesendar. Yaicuachiara rumo tresciento veinte quintar rupindar' ehi. ⁸ Evocoyase serecuar oyanduse, 'Too, oicua ité mbahe apo' ehi ombopasa rese ombahe rese ñangarecuarer ndipihai vahe upe. Esepia, ahe oyemoingatu voi oyeupe mbahe moingatu ãgua. Supi eté ava ndoicuai vahe Tũpa oicua catu mbahe moingatu ãgua oyeupe Tũpa reroyasar sui.

⁹ "Sese che aipo ahe pẽu: peiporu pe guarepochi pereco vahe co ivi pipe pe mboripar reime ãgua. Ichui opa tẽise pe guarepochi, oimera pe pisí vaherã teco apirẽhisave.

¹⁰ "Acoi ava mbahe tupri chĩhi oyapo vahe, ahe oyapo tupri catura mbahe tuvichá vahe. Iyavei acoi ãgüe ndehi vahe chĩhi vahe rese, ãgüe ndehi chiaveira mbahe tuvichá vahe rese. ¹¹ Evocoyase ndapemboaviyeise co ivi pipendar pe cuaita guarepochi rese, ahese ndaperecoi chira ivave mbahe rese hañeco ãgua. ¹² Iyavei acoi ndapemboaviye tupriise pe cuaita ambuae ava mbahe rãro pipe, ¿ava pĩha evocoyase omondora pe mbahe ité pẽu viña?

¹³ "Iyavei ndipoi chietera ñepei mbiguai omboyeroya vahe ñuvirío güerecuar. Esepia, ñepei osaisu catura imboyeroya pipe, ambuae evocoyase ndoyambotai chira imboyeroya potaẽhisa pipe. Ëgüe peye avei ndapeicatui Tũpa mboyeroya guarepochi pota raisa pipe" ehi güemimbohe eta upe.

¹⁴ Aipo ñehesa renduse, fariseo yuvirecoi vahe oguarepochi raisusa pipe oviroiro yuvireco. ¹⁵ Evocoyase aipo ehi fariseo eta upe: "Pe co ava rembiepiave pe recocuer aviye angahu pe reco viña. Tũpa rumo oicua opacatu pe pĩhañemoñetasa. Esepia, yepe ava rovaque ndoyavi aviye ai vahe pe recocuer viña, Tũpa uve rumo mbahe tẽi eté" ehi.

Mborocuaita iyavei Tũpa mborerecuasa rese ñehesa

¹⁶ "Yipisuive Moisés porocuaita iyavei Tũpa ñehe mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tũpa mborerecuasa resendar, sese ava iquerẽhi catu cũritei aheve yuviroique vaherã.

17 “Yavai catura que ñepeí Tũpa porocuaíta mboaviyeẽhi ãgua co iva, ivi opa vaheĩ sui” ehi.

Jesús oporombohe mendasa sui poiẽhi ãgua

18 “Acoi opoi vahe güembireco sui, omendase ambuae cuña rese, ahe oyemboaguasa tẽi vahe. Iyavei acoi omendase cuña omenda vahecuer rese tẽi, oyemboaguasa tẽi vahe avei” ehi Jesús.

Ava mbahe yar iyavei Lázaro

19 “Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe. 20 Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive. 21 Co mbia iparaisu catu vahe aipo ehi oyeupe, ‘Tomboumi tẽi que güembihu rahicuer oviapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco. 22 Omanose co mbia iparaisu vahe, ahese Tũpa rembiguai eta oviraso yuvireco Abraham pirí ivave. Mbahe yar avei omano, opa oñoti yuvireco.

23 “Ahese oso Tũpa ñemoirosave. Aheve oparaisuse, omahe ivate coti, osepia amombri aracahendar Abraham Lázaro reseve. 24 Evocoyase osapucái pĩrata: ‘¡Che ramoi Abraham, che paraisuerecomi tẽi eve! Emboumi tẽi Lázaro che ãpecu morohisa ãgua ive ocuã pipe. Esepia, che paraisu etepri co tata pĩratagüer pipe vitu’ ehi. 25 Evocoyase Abraham ombovevi aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tẽi oico’ ehi. ‘Cũritei rumo Lázaro oviharete oico cohava, nde evocoyase nde paraisu eipeve eico. 26 Iyavei oime co ivicuar ipicucu vahe rasaẽhi ãgua oreu iyavei pẽu no’ ehi.

27 “Ahe mbia aipo ehi: ‘Che ramoi Abraham, emondomi tẽi Lázaro 28 che rivri poyandepo vahe upe, chupe iñehe ãgua. Ahe tosecuñaro güecocuer yugüeruẽhi ãgua co tecocuer mbahe tẽisave’ ehi. 29 Abraham rumo, ‘Vireco niha Moisés porocuaíta iyavei Tũpa ñehe mombehusar rembicuachiagüer yuvireco. ¡Ahe toviroya yuvireco!’ ehiño chupe. 30 Evocoyase, ‘Taa, che ramoi Abraham, que omano vahecuer pãhu pendar rumo yuvirasose chupe, ahe evocoyase omoingatura güecocuer yuvireco viña’ ehi. 31 Abraham rumo aipo ehi chupe: ‘Acoi ndoyapisaca potaise Moisés porocuaíta rese iyavei ambuae Tũpa ñehe mombehusar remimombehu rese no, ndoviroyai chiaveira que ava omano vahecuer ocuerayevise yuvireco’ ehi Abraham ava mbahe yar upe” ehi.

17

Iparaïsu itera ava oporomboangaipa uca vahe

¹ Jesús aipo ehi güemimbohe eta upe: “Oimeño itera poroãtoisa che reroyasar reiti ãgua. ¡Ahe imboangaipa ucasar rumo iparaïsu itera! ² Iyacatu evocoi nungar ava ñapichisa ita mbahe mbocuhisa iyesho rese para guasu pipe imombo ãgua chñihvahemi nungar mboangaipa uca rãgüer sui. ³ ¡Sese peñearo tupri!

“Acoi nde mboetasa Tũpa reroyasar oyemboangaipase, pemboaracuara. Omboasi pare oyevise güecocuer tupri pipe, ahese peñerora chupe. ⁴ Supi eté acoi que ambuae ava pe amotarẽhi viteso rumo siete yupagüer ñepe arĩ pipe, acoi ouse pẽu siete yupagüer avei, ‘Ëgüe ndahe iri chira’ ehise, peñero chupe” ehi Jesús güemimbohe upe.

Yayeroyase Tũpa rese oime pĩratasa

⁵ Co doce tupri apóstol aipo ehi chupe:

—Emboumi oreu Tũpa rese ore yeroya catu ãgua —ehi yuvireco chupe.

⁶ Evocoyase yande Yar omboyevi chupe:

—Supi eté, Tũpa rese pe yeroyasa, yepe ndoyavĩ chira mostaza rãhi tahimi vahe viña, co ivira tuvicha vahe upe rumo, ‘Eyeapoho ave sui. Eso eñeñeti para guasu aviterve’ peyese Tũpa rese pe yeroyasa pipe, ahe evocoyase pe mboyeroya itera —ehi.

Ambuae ava rese hañecasar cuaita

⁷ “Inungar que pe pãhu pendar virecora güembiguai oporaviqui vahe ivi mboyere cove, anise que guaca rãro yuvi rupi viña; ichui iyevise, ¿‘Eique, eguapi terecaru’ ehira pĩha sereciar chupe? ⁸ Aní eté, ahe rumo aipo ehiñora chupe: ‘Emoingatu voi mbahe che tohu, che toihurã avei. Ipare nde erecarura, ereihura’ ehira chupe. ⁹ ‘Aviye ndeu’ ndehi chietera icuai pare chupe. ¹⁰ Ëgüe peye avei mbiguai nungar pe opacatu Tũpa pe cuaitarã ombou vahe mboaviyere, ‘Yande niha mbiguai tẽi yaico. Esepia, yande cuaita mboaviyesar tẽi yaico’ peyeñora” ehi.

Jesús ombogüera diez tupri ava lepra pipe imbaheasi vahe

¹¹ Osose Jesús Jerusalén ve, oguata ivi Samaria iyavei ivi Galilea rupi. ¹² Oyepotase tecuamive oso, ahese yuvinose diez ava lepra pipe imbaheasi vahe yuvireco chupe. Amombrive rumo opitaño yuvireco ichui. ¹³ Osapucái yuvireco chupe aipo ehi:

—¡Jesús, Porombohesar, ore paraïsuerecomi tẽi eve! —ehi.

¹⁴ Sepiase aipo ehi lepra vireco vahe upe:

—Peyevi, peso, tapeyemboyecua pahi eta yuvirecoi vahe upe —ehi.

Oyevise rumo yuviraso, opa ocuera tupri ombaherasisa sui yuvireco. ¹⁵⁻¹⁶ Evocoyase ñepeí ipãhu pendar, Samaria pendar, osepiase ocuerasa, oyevi chupe osapucaí pírata Tūpa upe imboeteisave. Oñenopiha oso sovai, oyaivi, “Aviye ndeu” ehi Jesús upe. ¹⁷ Evocoyase ahe aipo ehi:

—¿Ndahei vo acoi diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe? ¹⁸ ¡Cobia ambuae ivi pendar güeraño rumo oyevi ‘aviye ndeu’ ohesave Tūpa uve! —ehi.

¹⁹ Evocoyase aipo ehi ahe mbia upe:

—Eñarapuha, eso tupriño. Nde poreroyasa pipe niha ercuera eico —ehi Jesús chupe.

Tūpa mborerecuasa yande pãhuve secoi

²⁰ Ñepeí arí pipe fariseo eta, “¿Marase vo aipo oura Tūpa omborerecuasa pipe mbahe moingatu ãgua?” ehi Jesús upe yuvireco. Ahe omboyevi chupe:

—Tūpa mborerecuasa ndahei acoi yasepia vahe. ²¹ ‘Co secoi, aheve secoi’ ndapeyei chira chupe. Esepia, ahe oicove ité pe pãhuve —ehi fariseo eta upe.

²² Ipare aipo ehi güemimbohe eta upe:

—Oimera arí pe peipota tẽira aico vahe rã pe píri que ñepeí arí rupi che, Ava Riquehír, che recosa pipe; ndache repiai chira rumo peye. ²³ Iyavei ava, ‘Co secoi, aheve aipo secoi’ ehi tẽira yuvireco cheu. Ndapesaquicue moñai chira rumo. ²⁴ Esepia, inungar acoi overa vahe osesape guasu iva rese ocua yepí, ãgüe ahera che, Ava Riquehír, vitu arí osupitise che yevi ãgua curi. ²⁵ Yipindar rumo co ivi pipe che paraisu ranera ava cūriteindar mara-mara tẽi che rerecose yuvireco che repia potaẽhisave. ²⁶ Inungar ava Noé recose yuvirecoi aracahe, ãgüe ehi tupri aveira che, Ava Riquehír, yevi ãgua renonde. ²⁷ Esepia, ocaru, oihu, omendaño avei yuvireco. Oyepotase rumo arí ipapapri amarusu viapi ãgua, ahese Noé yuviroique arca pipe. Ambuae ava rumo opa ocañi tẽi yuvireco. ²⁸ ãgüe ehi avei aracahe Lot recose, ava ocaru tẽi, oihu tẽi, virocua tẽi mbahe omahera yuvireco iyavei mbahe mondosar tẽi, mbahe tĩsar tẽi, oi aposar tẽi avei yuvirecoi oyapisacaẽhisa pipe. ²⁹ Osẽse rumo Lot tecua Sodoma sui, aviyeteramo tẽi oviapi tata amar nungar iva sui. Opa tupri oyuca ava rehii aracahe. ³⁰ ãgüe ahe aveira aviyeteramo tẽi che, Ava Riquehír, ayemboyecua curi.

³¹ “Ahe arí pipe acoi ava güeta harive secoi vahe, ahe toique iri eme güeta pipe ombahe renose. Iyavei ava que rupi tẽi

secoi vahe, toyevi iri eme güêtave. ³² Sese peyemomahenduha co aracahendar Lot rembireco rese. ³³ Opacatu güecocuer osaisu vahe, ahe ocañi tēira. Iyavei setecuer tēi ocañi vahe, ahe rumo oñepisirora” ehi.

³⁴ “Ahe p̄itu pipe oimera que ñuvirío ava vupave yuviroque vahe yugüeru: ñepei acoi che reroyasar serasosara, ambuae rumo opitara. ³⁵ Ahese avei ñuvirío cuña ohichora yuvireco: ñepei serasosara, indugüer rumo opitara. ³⁶ Êgüe ehi aveira ñuvirío ava amombri güecua sui yuvirecoi vahe: ñepei serasosara, indugüer rumo opitara” ehi.

³⁷ Aipo ñehesa renduse, oporandu yuvireco chupe:

—Ore Yar, ¿que vo aipo êgüe ehira mbahe curi? —ehi.

Ahe evocoiyase,

—Mbahe rehögüer reimesave uruvu oñemonuha atira yuvireco —ehi güemimbohe eta upe.

18

Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese

¹ Jesús omboyoya ambuae ava recocuer sui querêhisa pipe yerureño âgua ari yacatu rupi ² aipo ehi: “Ñepei tecuave oime mbia mborerecuar mbahe moingatusar ndosiquiyei vahe Tûpa sui, ambuae ava sui avei. ³ Ahe tecuave avei oime cuña imer mano vahecuer. Ahe oso co mborerecuar rêtave, ‘Oime ava oyapo mbahe tēi eté cheu, tomboepi cheu’ ehi chupe. ⁴ Yipindar rumo noipitivii potai. Coiye catu rumo cuña ombopihaviracua tēise, ipihañemoñeta iri: ‘Yepe che ndasiquiyei vahe Tûpa sui, ava sui avei ndasiquiyei vahe ité, ⁵ amoingatuñora rumo mbahe co cuña che mañeco tēisar upe. Ayapoñora semimbotar cheu iyu pihîhi âgua’ ehi opihañemoñetasave” ehi.

⁶ Ipare yande Yar aipo ehi: “Peyapisaca aipo mborerecuar naporai vahe ñehe rese. ⁷ Tûpa avei niha omoingatura mbahe güembiporavo oyeupe yeruresar ari, p̄itu rupindar upe yepi. Nosaro tēi chiranera op̄itivii âgua yuvireco. ⁸ Supi eté Tûpa omoingatu vaira mbahe aviye vahe yande porandusa pipe yandeu. Co rumo che, Ava Riquehir, ayevisé co ivi pipe vitu, oimera ava moviromi tēi oyeroya vite vahe che rese yuvireco” ehi Jesús.

Yembohesa fariseo sui iyavei guarepochi rerocuasar sui

⁹ Ichui Jesús oporombohe iri ambuae ava recocuer rese. Esepia, oime amove ava aviye ai angahu secoi oyeupe viña, iharive rumo viroïro ambuae ava. ¹⁰ “Ñuvirío ava yuviraso tûparove oyerogui. Ñepei ava fariseo, ambuae evocoiyase ava

sui guarepochi rerocuasar. ¹¹ Evocoiyase fariseo oso tenonde ava rembiepiave oyeruqui aipo ehi: ‘Tūpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tēi vahe. Iyavei ndahei eté che recocuer co mbia ava sui guarepochi rerocuasar nungar tēi aico no. ¹² Iyavei ñuvirío yupagüer ñepeí semana pipe ayecuacu ité nde recocuer rese, iyavei ñepeí-peí cien guarepochi che poraviqui repri aipisi vahe sui amboyaho diez che porerecosa ndeu’ ehi. ¹³ Ava sui guarepochi rerocuasar rumo opitaño amombri ichui. Aheve nomahei iva rese oyeruqui ñgua oangaipa mboasisa pipe. Oyepochihanupa-nupa aipo ehi: ‘¡Tūpa, che paraisuerecomi eve, che angaipa viyar aico!’ ehi oyeruqui” ehi. ¹⁴ “Sese aipo ahe pēu: co mbia ava sui guarepochi rerocuasar opa oipisi ñerosa Tūpa suindar güētave oso. Fariseo rumo aní eté. Esepia niha, opacatu acoi oyemboivate ai vahe, opara seco reroyisa. Acoi ava seco mbegüe vahe rumo seco mboivate catusara curi” ehi.

Jesús osovasa chñivahe eta

¹⁵ Iyavei chñivahe güeru Jesús uve yuvireco sovasapirã. Evocoiyase semimbohe osepiase yuvireco, “¿Mahera vo peruño tēi chñivahe?” ehi opihaviracuasa pipe serusar upe yuvireco. ¹⁶ Jesús rumo aipo ehi:

—¡Mahera ndapeipotai iyu ñgua! Toyugüeruño chñivahe cheu. Esepia, co chñivahe nungar ava yuviroiquera che Ru Tūpa povrive. ¹⁷ Supi eté acoi ndoipisii vahe che Ru Tūpa mborerecuasa chñivahe nungar yuvireco, ahe evocoiyase ndoyuviroiquei chietera ipipe —ehi.

Ñepeí mbia mborerecuar imbahe eta vahe omoñeta Jesús

¹⁸ Ñepeí mbia mborerecuar oporandu Jesús upe:

—Porombohesar aviye vahe, ¿mbahe vo ayapora tecovesa apirēhi vahe rereco ñgua? —ehi.

¹⁹ Jesús evocoiyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepeí aviye vahe ité, ahe Tūpa seci. ²⁰ Ereicua niha co porocuita aipo ehi vahe: ‘Nandeaguasai chira, ndereporoyucaí chira, nandemondai chira, nanderemirai chira ambuae ava rese, eremboyeroyara nde ru, nde si avei’ ehi vahe —ehi chupe.

²¹ Ahe mbia rumo,

—Che aipo nungar opacatu amboaviye ité che chñivahemi suive —ehiño chupe

²² Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe sepri evocoiyase eremondora ava iparaisu vahe

upe. Ichui ererecora mbahe aviye vahe ivave cute. Ipare ereguatara che rupi —ehi chupe.

²³ Aipo oyeupe hese rumo, ahe mbia ndoyembovihai tēi. Esepia niha, mbahe yar ité seci. ²⁴ Sese omahe aipo ehi:

—¡Yavai eté rumo ava mbahe yar reique āgua che Ru Tūpa mborerecuasave! —ehi—. ²⁵ Yavai rai camello upe yucuar rupi seique āgua; ava imbahe eta vahe upe rumo yavai catu che Ru mborerecuasave seique āgua —ehi.

²⁶ —¿Ava angahu pīha evocoyase oñepisirora yuvireco viña? —ehi sendusar chupe.

²⁷ Evocoyase ahe chupe aipo ehi:

—Ava tēi upe mbahe yavai eté, Tūpa upe rumo ndayavaimi eté —ehi.

²⁸ Evocoyase Pedro aipo ehi:

—Che Yar, ore rumo opa oroseya ore mbahe nde rupi ore guata āgua —ehi chupe.

²⁹ Evocoyase aipo ehi güemimbohe upe:

—Supi eté acoi oseya vahe que güēta, güembireco, viqueh̄ir, vivri, oyesupa, que guah̄ir Tūpa mborerecuasa rese, ³⁰ ahe setá iteanga catu oipisira mbahe aviye catu vahe co ivi pipe oseya vahe sui. Ipare rumo tecua ambuaeve oipisi aveira tecovesa apirēhi vahe curi —ehi.

Jesús omombehu iri omano āgua

³¹ Evocoyase yande Yar opa viraso co cotimi doce güemimbohe. Aheve aipo ehi: “Cūritei yasora tecua Jerusalén ve yaico, aheve omboaviyera co Tūpa ñehe mombehusar rembicuachiagüer co che, Ava Riqueh̄ir, resendar ñehesa.

³² Che imondopri aicora ndahei vahe yande mu upe marama tēi che rereco āgua. Che reroĩro-ĩrora iyavei ondivi-ndivira yuvireco che rese” ehi. ³³ “Iyavei che nupa-nupara. Ipare che yucara yuvireco. Imombosapisa ari pipe rumo acuerayevira omano vahe pāhu sui” ehi.

³⁴ Semimbohe rumo ndosenducuai eté iñehe yuvireco. Esepia niha, yavai eté senducua āgua yuvireco chupe.

Jesús ombogüera ñepe mbia ndasesapisoi vahe

³⁵ Evocoyase Jesús ovirovise tecua Jericó oso, aheve mbia ndasesapisoi vahe oguapi oĩ peri popive porerecosa oyeupe mondo āgua rese. ³⁶ Osenduse ahe ndasesapisoi vahe ava reh̄i piambu, ahese, “¿Mbahe vo pēu?” ehi ava upe. ³⁷ Ahe evocoyase, “Jesús, Nazaret pendar, ocuara co rupi” ehi yuvireco chupe. ³⁸ Evocoyase ahe güendapeve oñehe pĩrata:

—¡Jesús, David suindar, che paraисуerecomi tēi eve! —ehi chupe.

³⁹ Evocoyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,
—¡David suindar, che paraisuerecomi tēi eve! —ehi pĩrataño ité chupe.

⁴⁰ Evocoyase Jesús opitase aheve, oyocuai ava seru ãgua. Ovirovise seru yuvireco, aipo ehi ndasesapiso vahe upe:

⁴¹ —¿Mbahe vo ereipota ayapo vaheerã ndeu? —ehi.

—Che Yar, che mbosarecomi tēira eve viña —ehi chupe.

⁴² —¡Esareco, erecuera niha! Esepia, ereyeroya ité che rese —ehi chupe.

⁴³ Ahe ramosave ndasesapiso vahe, osareco tupri ité; osoño ité Jesús rupi imboetisave. Opacatu ava osepiã vahe avei omboetei Tũpa yuvireco.

19

Zaqueo osepiã pota Jesús

¹ Ichui Jesús oique tecua Jericó pipe oguata oico. ² Aheve mbia mbahe yar Zaqueo serer vahe secoi. Ahe ava sui guarepochi rerocuasar rerecuar. ³ Osepia pota tēi Jesús ‘taicua ité’ oya viña. Ndoicatui rumo opucuehise ava rehiã pãhuve sepia ãgua. ⁴ Evocoyase ahe oña tenonde oso ‘tasepiã ité’ oyapave, oyeupi ivira rese ivate oĩ senonera. ⁵ Evocoyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rētave nde piri —ehi.

⁶ Aipo oyeupe he ramosave, Zaqueo ogüeyi voi vorivetesa pipe oipisi. ⁷ Sepiase rumo opacatu ava, “Yangaipa guasu vahe rētave tēi oso” ehi yuvireco chupe. ⁸ Evocoyase Zaqueo opũha aipo ehi chupe:

—Che Yar, esendu rane, amboyaho tupriã che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboeyevi ãgua —ehi chupe.

⁹ —Co pipe Tũpa oipisiro ité co mbia. Esepia, ahe niha Abraham suindar avei secoi. ¹⁰ Esepia, che, Ava Riquehir, ayu co ivi pipe ava ocañi tēi vahe pĩsiro ãgua —ehi Jesús Zaqueo upe.

Guarepochi sui yembohesa

¹¹ Aipo ñehesa rendu viteseve, Jesús oporombohe ambuae tecocuer resendar rese. Esepia, virovi Jerusalén, “Oyepota voi etera revo Tũpa mborerecuasa” ehi ava yuvireco viña.

¹² Ahe rumo aipo ehi ava upe imbohe: “Oime mbia imboyeroyapri, ahe senoipri oso vaheerã amombri oivi pendareta rerecuarã oyevisse. ¹³ Oso ãgua renonde oichohopa uca diez tupri güembiguai. Ahese opa omondo ñepeipei upe

guarepochi sepirusu vahe, aipo ehi chupe: ‘Peporaviqui co guarepochi rese imboeta ãgua che yevise nara’ ehi. Ipare oso. ¹⁴ Setá ava rumo secua pendar saquicuei tēi viroiro yuvireco. Sese omondo moviro ava ‘tomombehu: Ore rumo ndoroipotai ore rerecuarã secoi ãgua, tehi yuvireco’ oya viña.

¹⁵ “Ahe rumo mborerecuar guasu güecosa pipe oyeví ou cute. Opa uca oichoho oguarepochi pisisarer ‘¿mbovi-mbovi pīha oipisi oyacatu yuvireco?’ oya. ¹⁶ Evocoiyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi. ¹⁷ Evocoiyase mborerecuar guasu omboeyeví chupe: ‘Mbiguai aviye vahe ereico, nde cuaita co nde poraviquisa chīhimi vahe eremboaviye ité. Sese ereicora diez tecua guasu pendar rese hañeco ãgua’ ehi chupe. ¹⁸ Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe. ¹⁹ Aipo ehi tupri avei ahe chupe: ‘Nde evocoiyase ereicora cinco tecua pendar rese hañeco ãgua’ ehi.

²⁰ “Ipare voi ambuae ou chupe, ‘Che rerecuar, ndo co nde guarepochi aipoqueño turucuar mi pipe sereco. ²¹ Esepia, che asiquiye nde sui. Nderecatēhi mete ai vahe mbahe rese. Ambuae ava poraviqui sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi’ ehi chupe. ²² Evocoiyase mborerecuar guasu aipo ehi chupe: ‘Nde mbiguai ndaseco pōrai vahe ereico. Nde ñehe sui aicuara nde recocuer. Ereicuase ēgüe che hesa viña, ²³ evocoiyase, ¿mahera ru ndereyapocatui che guarepochi guarepochi apocatusave che yevise voi senose ãgua cheu imboeyeví catumi ãgua viña?’ ehi. ²⁴ Evocoiyase, ‘Perocua guarepochi ichui. Pemondora acoi diez rupi guarepochi omboeta vahe upe’ ehi vupindar upe. ²⁵ Supindar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi tēi yuvireco chupe. ²⁶ Evocoiyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi. ²⁷ ‘Acoi ava che amotarēhimbar, ndache potai vahe mborerecuarã yuvireco, ahe opara peru cohava che rovai yucapa ãgua’ ehi” ehi Jesús ava eta upe.

Jesús oique Jerusalén pipe

²⁸ Jesús aipo ohe pare, oguata vite oso Jerusalén coti. ²⁹ Evocoiyase coiye catu tecua Betfagé iyavei Betania rerovicave, ivitri Olivo ñipiimi, aheve omondo ñuvirío güemimbohe ³⁰ aipo ehi chupe:

—Peso co tecuamive, yande rovaindarve. Peyepotase aheve, pesepiara guaricu ñapichimbri imoha ava ndoyeupi vitei vahe yuvireco sese. Ahe peyorañora seru. ³¹ Acoi,

‘¿Mahera vo peyora?’ ehise que ava pëu, ‘Yar oiporu pota’ peyeñora chupe —ehi güemimbohe upe.

³² Evocoiyase semimbohe yuviraso, semimombehu rupi tupri ité osepia mbahe yuvireco. ³³ Evocoiyase oyorase guaricu,

—¿Mahera vo peyora ore reimba? —ehi iyar yuvireco.

³⁴ —Yar oiporu pota —ehiño yuvireco chupe.

³⁵ Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso ñgua.

³⁶ Oyeupise oso guaricu harive, oipipira ava oturucuar peri rupi senonera imboetei guasusave yuvireco. ³⁷ Ovirovise ivitri Olivo sui ogüeyi ñgua oso, opacatu ava seroyasar supi oguata vahe omboipi osapucái yuvireco vorivetesave mbahe poromondiisa sembiapogüer rese Tüpa upe ³⁸ aipo ehi yuvireco:

—¡Sovasapri seci mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tüpa tasecoi! —ehi.

³⁹ Evocoiyase amove fariseo yuvirecoi vahe supi aipo ehi chupe:

—Porombohesar, eñehe nde rupi oguata vahe upe imonguiriri ñgua —ehi tēi yuvireco.

⁴⁰ Evocoiyase aipo ehi:

—Supi eté amombehu pëu: co ava iquiririse yuvireco, ita rumo evocoiyase osapucái pĩratara che mboeteisave —ehi.

⁴¹ Oyepota senimise tecua Jerusalén ve, ahe tecua repiase, oyaseho sese ⁴² aipo ehi: “¡Pesenducuará tarahu co co ari pipe teco tuprisa amondo pota vahe pëu viña, cūrítei rumo ocañi tupriño pe sui, ndapeicatui eté sepia!” ehi oyaseho.

⁴³ “Oimera rumo ari imombehupri naporai vahe pëu curi. Pe amotarēhimbar oñachi irira pe recua. Ipare oyere tuprisa yuvireco pe rese pëu ovava ñgua. ⁴⁴ Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepeí oya vahe ambuae rese. Esepia, ndapeicuai eté Tüpa ouse pëu pe pĩsiro ñgua” ehi Jerusalén pendar rese oyaseho.

Jesús omombopa ava mbahe rerecosar tüparo pipe sui

⁴⁵ Ichui Jesús oi que judío tüparo guasu pipe. Aheve omboipi ava mbahe mondosar mombopa tupri ocarve oico ⁴⁶ aipo ehi:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo, imonda rai vahe rēta nungar tēi pereco —ehi.

⁴⁷ Ichui ahe tüparo guasu pipe ari yacatu oporombohe oico. Aheve avei rumo pahi eta rerecuar yuvirecoi vahe, Moisés porocuaíta rese oporombohe vahe iyavei tecua rerecuar

guasu yuvirecoi vahe, ‘¿Mara yahera p̄ha yuca uca ãgua viña?’ ehi yuvireco chupe. ⁴⁸ Ndoicatui rumo yuvireco. Esepia, ava rehii oyapisaca iporombohesa rese yuvireco.

20

Jesús mborerecuasa

¹ Ñepeí ari Jesús judío tũparo guasu pipe güecose, ombohe ava eta, omombehu ñehesa p̄sirosa resendar oico. Ahese yugüeru pahí eta rerecuar guasu yuvireco iyavei Moisés porocuita rese oporombohe vahe, ava rerecuar guasu yuvirecoi vahe avei ² aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã? —ehi ahe ava yuvireco chupe.

³ Ahe omboyeví chupe:

—Che avei aporandura mbahe rese p̄u. Pemboyevira cheu —ehi—. ⁴ ¿Ava vo Juan ombou ava ãpiramo ãgua: Tũpa p̄ha, ava t̄i tie? —ehi ahe ava yuvirecoi vahe upe.

⁵ Ahese, “¿Mara yahera p̄ha?” ehi-ehi t̄i oyeupe yuvireco. “‘Tũpa’ yahese chupe, ‘¿Mahera ru ndaperoyai?’ ehira yandeu.

⁶ Anise, ‘Ava t̄i remimbou’ yahese chupe, opacatu seroyasar evocoyase yande api-apira ita pipe yuvireco. Esepia, ava, ‘Juan omombehu vahe ñehesa Tũpa suindar’ ehi eté yuvireco chupe” ehi t̄i oyeupe yuvireco. ⁷ Evocoyase ahe ava, “Ndoroicuái rumo Juan mbousar, que sui oporoãpiramo oico” ehiño yuvireco chupe. ⁸ Sese aipo ehi ahe ava upe:

—Sese che avei, ‘Ahe iporocuita pipe co mbahe ayapo’ ndahei chietera p̄u —ehi mborerecuar guasu upe.

Ava mbahe t̄i oporaviquí vahe recocuer sui yembohesa

⁹ Ipare Jesús oñehe ava eta upe ambuae ava recocuer rese aipo ehi: “Oime mbía oñoti vahe uva oiví pipe. Ipare oseya oiví ava oporaviquí vahe upe iporu ãgua. Ichuí oso pucu que amombri vahesa rupi. ¹⁰ Evocoyase oyepotase ari uva pohosa, ahese omondo ñepeí güembiguai oporaviquí vahe upe imboporandu ‘tomboumí uva pohopri cheundar cheu cute’ oyapave viña. Ahe rumo oinupa-nupaño imboyeví tupri t̄i yuvireco serecuar upe. ¹¹ Ipare ambuae güembiguai omondo iri no. Ahe oinupa-nupaño, iñehe mara-mara t̄i avei ipogüer t̄i imboyeví imondo yuvireco. ¹² Ichuí omondo iri t̄i imombosapisa rese ambuae güembiguai no. Ahe oyapicha-pichaño imosẽ imondo yuvireco.

¹³ “Coíye miti yar aipo ehi: ‘¿Mara ahera p̄ha? Amondora revo che rahír, che rembiaisu. Ahe tie revo, osepiase, omboyeroyara yuvireco’ ehi. ¹⁴ Evocoyase ahe ava tahír repiase, ‘Co aipo oipisira vu mbahe. Yayucaño. Yandeu nara p̄ave

topita co ivi' ehi oyeupe yuvireco. ¹⁵ Evocoyase ovinose miti pāhu sui, oyuca ité yuvireco.

“¿Mbahe vo evocoyase oyapora ivi yar ahe ava naporai vahe upe? ¹⁶ Oura evocoyase ahe ava mocañipa āgua, omondora ambuae ava upe oivi rese oporaviqui vaherā” ehi.

Aipo renduse,

—¡Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri āgua’ ehi.

¹⁸ Acoi que oviapi vahe evocoi ita harive, opa tēira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuareta upe.

¹⁹ Pahi eta rerecuar guasu iyavei oporombohe vahe Moisés porocuaite rese, ñehe viteseve, oipisi pota tēi Jesús yuvireco. Esepia, osenducua ité oyesendar iporombohesa yuvireco. Osiquiyēño rumo ava rehii sui yuvireco.

Judío rerecuar osecoñha iri tēi Jesús guarepochi rese yuvireco

²⁰ Ahe judío rerecuar evocoyase omondo ava ndaseco asiimi angahu vahe iviro, chupe ñehe āgua ‘toyavi angahu oñehe’ oya viraso vaherā mborerecuar Pilato rovai. ²¹ Ahe evocoyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboyoviratii vahe nde ñehe yepi. Nde rumo ereporombohe mbahe supi tupri vahe Tūpa recocuer rese. ²² ¿Aviyera pñha yamondo guarepochi Roma pendar mborerecuar ivate catu vahe upe viña? ¿Aní tie? —ehi yuvireco chupe.

²³ Opa rumo oicua ñehe porombopasa tēi. Sese,

²⁴ —Pemboyecua ru ñepeí guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

²⁵ —Taa, pemondo ru mborerecuar uve chupendar, iyavei Tūpa upendar pemondoño ité Tūpa upe —ehi ahe ava upe.

²⁶ Ndoyavi uca catui eté ñehe ava rovaque ipisi āgua yuvireco. Ahe rumo oyeupe imboyevise, iquiriripa tupriño oyepihamondiisa pipe yuvireco.

Porandusa cuerayevisa rese

²⁷ Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tēi angahu yuvireco chupe:

²⁸ —Porombohesar, Moisés niha oseyā güembicuachiagüer yandeu aipo ehi: ‘Que cuimbahe omenda vahe omanose

guahiẽhiseve, tivri evocoiyase omendara sembirecocuer rese. Ahe viquehir omano vahecuer upe nara tahira oico' ehi. ²⁹ Evocoiyase oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiẽhiseve. ³⁰ Ichui tivri omenda sese. Ahe omanoño avei guahiẽhiseve. ³¹ Ipare imombosapisa tivri omenda iri tẽi sese. Êgũe ehi tupriño avei chupe. Ambuae ichuindar êgũe ehi tupri avei omanopa yuvireco guahiẽhiseve. ³² Coiye cuña avei omano cute. ³³ Evocoiyase opase ocuerayevi yuvireco, ¿uma rembireco itera pĩha omendase opacatu siete yuvirecoi vahe rese? —ehi saduceo yuvireco chupe.

³⁴ Ahe rumo omboyeve chupe:

—Co ivi pipe cuimbahe iyavei cuña omenda vahe yuvireco yepi. ³⁵ Ocuerayevi pare oicatu vahe ivave yuviroique vaherã, chupe ndipo iri chira mendasa. ³⁶ Iyavei nomanoi chietera aheve. Esepia, yuvirecoira Tũpa rahir, Tũpa rembiguai eta ivapendar nungar yuvireco. ³⁷ Moisés rembicuachía agũer pipe niha caha pãhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi aracahendar Abraham, Isaac, Jacob Tũpa” ehi. ³⁸ ¡Tũpa ndahei omano vahe Tũpa! ¡Ahe rumo oicove vahe ité Tũpa secoi! Esepia, chupe opacatu yuvirecove vahe —ehi saduceo upe.

³⁹ Evocoiyase moviro Moisés porocuita rese oporombohe vahe aipo ehi:

—Supi eté aipo ere, Porombohesar —ehi yuvireco chupe.

⁴⁰ Sese niquerẽhi iri eté mbahe rese oporandu ãgua yuvireco chupe.

¿Ava suindar pĩha Poropĩsirosar?

⁴¹ Evocoiyase Jesús aipo ehi ahe ava upe:

—¿Mahera ru, “Poropĩsirosar David suindar ité” ehi yuvireco? ⁴² David teieté niha aipo ehi güembicuachía pipe: ‘Yar aipo ehi che Yar upe:

Eguapĩ che acato coti ⁴³ acoi che amondose voi eté nde amotarẽhimbar ñenopiha ãgua nde povrive yuvireco’ ehi David aracahe.

⁴⁴ ¿Mahera ru, “Poropĩsirosar David suindar secoira” peye? David teieté, “Che Yar” ehise chupe —ehi Jesús ahe ava upe.

Jesús oicua uca Moisés porocuita rese oporombohe vahe recocuerai

⁴⁵ Opacatu ava oñehe rendu viteseve, Jesús aipo ehi güemimbohe upe: ⁴⁶ “Peicua catu co Moisés porocuita rese oporombohe vahe sui. Esepia, ahe oturucuar ipucu vahe rese uguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco. Oseca avei

tenda porañete catu vahe güenara otũparo pipe, carusave avei oseca tenda aviye catu vahe yuvireco. ⁴⁷ Iyavei virocua-rocuano tẽi cuña imer mano vahecuer rẽta ichui. Oarondaguã tẽi avei oyerocu pucu-pucu yuvireco. Ahe rumo oipisira Tũpa ñemoirosa ipĩrata catu vahe yuvireco curi” ehi güemimbohe eta upe.

21

Cuña imer mano vahecuer iparaisu vahe porerecosa

¹ Ipare Jesús osepia ava imbahe eta vahe omondose oporerecosa guarepochi riru pipe yuvireco. ² Aheve avei cuña imer mano vahecuer iparaisu vahe, omondo ñuviriomi guarepochi oporerecosa. ³ Evocoiyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui. ⁴ Esepia, ava imbahe eta vahe, oguarepochi rumbirer tẽi omondo oporerecosa Tũpa upe yuvireco. Co cuña rumo oparaisusa pipe virecomi vahe guarepochi oyeupe, opacatu ité omondo oporereco ãgua Tũpa upe —ehi.

Jesús omombehu tũparo guasu monduru ãgua

⁵ Evocoiyase amove semimbohe oñehe yuvireco tũparo guasu recocuer rese: “Co tũparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

⁶—Oimera ari opacatu co mbahe cõritei pesepia vahe pipe ndipoi chietera que ñepei ita oyeha vite vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondiisa iva rese

⁷ Evocoiyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

⁸ Evocoiyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropisirosar aico, cõritei osupiti ari imombehupri yandeu’ ehi tẽira yuvireco. Ndaperoyai chira rumo ava aipo ehi vahe. ⁹ Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serãcua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

¹⁰ “Ñepei ivi pipendar ovavara ambuae ivi pipendar rese oyeupe yuvireco. ¹¹ Ahese avei oimera ivi ririñi tuvichá vahe, tiavor, mbaherasisa opacatu-catu tẽi tecua rupi. Iyavei pesepiara iva rese mbahe pe mbosiquiye vahe, poromondiisa tuvichá vahe avei curi.

12 “Co mbahe-mbahe tēi reime renondeve rumo pe pisira yuvireco che recocuer sui mara-mara tēi pe rereco āgua. Pe reraso aveira pēu porandu āgua tūparove, pe roquenda aveira, iyavei pe rerasora mborerecuar rovai, mborerecuar ivate catu vahe rovai avei yuvireco che recocuer sui tēi. 13 Ipīpe pemombehura che recocuer chupe yuvireco. 14 ‘Aipo ahera añehē’ ndapeyei chira pepihañemoñeta rereco pe yeepi āgua. 15 Esepia, che amondora che mbahecuasa pe ñehē āgua. Ndoicatuī chietera evocoyase pe amotarēhimbar imboyevi yuvireco pēu. 16 Pe amotarēhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe pāhu pendar yuvireco. 17 Opacatu ava ndape ambotai chira che recocuer sui tēi yuvireco. 18 Nocañiī chietera rumo que ñepeī pe ha pe āca sui. 19 ¡Peyemoviracua evocoi nungar mbahe upe pe ñepisiro āgual!

20 “Iyavei pesepiase ava Jerusalén rese sundao oyere tuprise, peicuara evocoyase mbahe-mbahe tēi reime āgua yuvireco chupe. 21 Evocoyase Judea ve yuvirecoī vahe toñemipa poyava voi ivitri rese yuvireco ichui; tecua Jerusalén pipe yuvirecoī vahe, ahe toyuvinose poyava avei ichui. Iyavei acoī que rupi yuvirecoī vahe, ahe toyevi iri eme yuvireco. 22 Esepia, ahe ari oimera Tūpa ñemoirosa. Ahe omboaviyera icuachiapri aracahendar pipe imombehupri. 23 ¡Iparaisu itera ahe ari pipe cuña ipuruha vahe, imembi pītani vahe avei! Esepia, oimera tecoasisa co ivi pipendar upe, ñemoirosa tuvichá vahe ahe ava recocuer rese. 24 Iyavei quise pucu pipe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoī vahe oiporu itera tecua Jerusalén acoī osupitise voi eté ari imombehupri yuvireco chupe” ehi.

Ava Riquehir yevisa

25 “Iva rese iporēhira poromondiisa, ari rese, yasi rese, yasitata rese; iyavei ivi pipe, opacatú tecua rupi ava ndayaracua iri chira yuvireco. Oyembosiquiye guasu-guasú tēi aveira yuvireco para guasu riapugüer renduse. 26 Ahese ava setá yaracua cañi tēira osiquiyepave yuvireco opihañemoñeta guasu aise co ivi pipe mbahe oime vaherã sui. Ahese avei iva resendar opacatu mbahe oririra. 27 Ahese ramo opacatu ava che, Ava Riquehir, che repiara yuvireco, agüeyise iva quiha rese che pīratasa rendigüer porañetesa pipe. 28 Omboipise evocoi nungar mbahe, peyemonguerēhi catura, peyemopoase pe querēhisa pipe. Esepia, pe renosesa pihaivira mbahe tēi sui” ehi.

²⁹ Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei. ³⁰ Co ivira soqui ramosa, yaicua cõimi ari sacu vahe yepota ãgua yandeu yepi. ³¹ Na ehi aveira pẽu che ñehe rupi tupri mbahe pesepiase. Sese peicuara Tũpa mborerecuasa cõimi eté sec-oise.

³² “Supi eté yuvirecove vitera ava osepia vahe co mbahe opase yaviye. ³³ İva, ivi opara ocañi, che ñehengagüer rumo imboaviyasa rane itera” ehi güemimbohe upe.

³⁴ “Peicua catu, anı pemboavai etepri pe mbahe reroya ãgua mbahe tẽi aposa pipe, pe caguar tẽisa pipe, co ivi pipendar tecocuer rese pe pihañemoñeta tẽisa pipe avei. Evocoiyase topoesapiha eme ³⁵ inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe. ³⁶ Sese peyemoingatu, peyeroqui ari rupi co mbahe tẽi sui pe yepipi ãgua, pe yemboyecua tupri ãgua che, Ava Riquehir, rovai” ehi güemimbohe eta upe.

³⁷ Ęgüe ehi Jesús oporombohe ari rupi tũparo guasu pipe. Pıtu pipe evocoiyase opita ivitri Olivo rese. ³⁸ Iyavei opacatu ava yuviraso añihiveive tũparo guasu pipe iñehe rendu ãgua yepi.

22

Yemomborandusa Jesús yuca ãgua

¹ Ovirovise Pascua pieta pan ndayapepoi vahe hu ãgua, ² ahese pahi rerecuareta, Moisés porocuaita rese oporombohe vahe avei ava sui osiquiyepave, oseca-seca tẽi Jesús yuca ãgua yuvireco.

³ Evocoiyase Carugar oi que Judas piha pipe, ahe acoi doce tupri semimbohe pãhu pendar Iscariote serer vahe. ⁴ Ahe oso pahi eta rerecuar yuvirecoi vahe upe, tũparo rãrosar yuvirecoi vahe upe avei imoñeta ãgua, “Tamondo Jesús pe povrive” ehi. ⁵ Ahe evocoiyase oyembovıharete yuvireco. “Yamondo guarepochi chupe” ehi voi eté yuvireco. ⁶ Judas evocoiyase, “Aviye” ehi. Oseca voi ava porẽhiseve Jesús mondo ãgua yamotarẽhimbar upe.

Yande Yar caru agüer ipa vahe

⁷ Oyepota ari yipindar vahe pan ndayapepoi vahe hu ãgua. Ahe pipeve avei ovesa Pascua pieta resendar yucapri seropovẽhesa yepi. ⁸ Evocoiyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru ãgua Pascua pieta resendar —ehi.

⁹ Semimbohe rumo,

—¿Que vo ereipota oromoingatura? —ehi yuvireco chupe.

10 Evocoiyase aipo ehi:

—Peyepotase tecua pīpe, aheve pesepiara mbia vireco vahe cambuchi pipe i. Pesora sētave supi. 11 Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera. 12 Evocoiyase ahe omboyecuara oi guasu, ivatendar pēu. Aheve pemoingatura yande caru ãgua —ehi güemimbohe upe.

13 Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

14 Osupitise icaru ãgua apóstol reseve yuviroguapi mesave.

15 Evocoiyase aipo ehi:

—¡Cueseve tēi eté niha aipota acarú vaheṛã pe piri Pascua pieta resendar rese che mano ãgua renonde! 16 Esepia niha, ndayapo iri chira pieta Pascua resendar acoi yaviyese voi eté Tūpa mborerecuasa pīpe —ehi.

17 Evocoiyase oipisi igua riru, “Aviye ndeu” ehi Vu upe, iyavei aipo ehi:

—Co amondora pēu, perova-rova peyacatu. 18 Esepia, co pipe suive ndaihu iri chira uva ricuer acoi ouse voi Tūpa mborerecuasa —ehi.

19 Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirã pe recocuer rese. Na peyera pe mahenduhasa pīpe che rese yepi —ehi.

20 Ēgüe ehi avei carusa pare yapo igua riru rese aipo ehi:

—Co igua riru pipendar omboyecua che Ru remimbotar ipiasu vahe pēu nara, ahe che ruvi ipiyerepirã pe recocuer rese nara. 21 Cūritei rumo oime mbia mesave yande piri che mondo vaheṛã che amotarēhimbar upe. 22 Supi eté imboaviyesa itera che, Ava Riquehir, rese ñehesa yipive imombehupri. ¡Iparaisu catura rumo acoi mbia che mondosar! —ehi.

23 Evocoiyase aipo ehise, semimbohe oporandu-randu tēi oyeupe: “¿Ava pīha ěgüe ehi?” ehi tēi yuvireco.

¿Ava vo ivate catu vahe?

24 Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco. 25 Evocoiyase Jesús aipo ehi: “Ava mborerecuar co ivi pipendar oyocuai pīrata ava yuvireco yepi. Ahe chupe rumo, ‘Mbahe tupri aposar’ ehi yuvireco. 26 Pe rumo ěgüe ndapeyei chira. Acoi oyemboivate pota vahe, toyemochihivaheño güeco mbegüesa pīpe. Acoi ava cuaisar, tihañeco catu ambuae ava rese. 27 ¿Uma pīha ivate catu vahe: co mesave uguapi vahe ocaru yuvireco? ¿Sese

ihañeco vahe tie? Acoi mesave oguapí vahe niha. Che rumo co aico pe pãhuve inungar pe rese ihañeco vahe.

²⁸ “Pe rumo peico vahe che rupi yepi opacatú che recoãhasa pipe. ²⁹ Sese che amondo pëu pe mborerecuasa inungar che Ru ombou cheu che mborerecuã água. ³⁰ Esepia, pecarura iyavei peihura che mborerecuasave che píri. Iyavei peguapíra opacatu judío recocuer rese porandu água” ehi güemimbohe upe.

Jesús, “ ‘Ndaicuai vahe evocoi mbia’ erera cheu” ehi Pedro upe

³¹ Aipo ehi avei yande Yar:

—Simón, Simón, esendu: Carugar oporandu pe recoãha água rese. ³² Che rumo aheroquí nde rese nde yeroyasa paneëhi água. Ereyevise cheu, emonguerëhi catu ambuae nde rivireta imoviracua uca água yuvireco oyese —ehi Pedro upe.

³³ —Che Yar, che rumo ayemoingatu voi eté nde rupi che so água nde roquendasave iyavei che mano água nde rupi —ehi Pedro chupe.

³⁴ —Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoi mbia” erera mbosapí oyupagüer rupi cheu —ehi.

Virovi ité Jesús recoãha água

³⁵ Evocoiyase Jesús oporandu güemimbohe eta upe:

—Opomondose acoi mbahe riru porëhi, guarepochi riru porëhi, ambuae pe pitaqui ndugüer rerasoëhise, ¿ipane vo acoi mbahe ahese pëu? —ehi.

—Aní eté —ehi yuvireco chupe.

³⁶ Evocoiyase,

—Cüritei, acoi mbahe riru vireco vahe, tovírecoveño, guarepochi riru vireco vahe, tovírecoveño avei; acoi ndovirecoi vahe quise pucu, tomondo oyeaosa quise repirã. ³⁷ Supi eté amombehu pëu: iyacatu ité imboaviye tuprí água co che rese ñehesa imombehuprí aipo ehi vahe: ‘Ava vireco ndaseco pōrai vahe nungar yuvireco’ ehi vahe. Supi eté yaviyera co icuachiapírer che resendar —ehi.

³⁸ Evocoiyase semimbohe aipo ehi yuvireco:

—Ore Yar, cohava oime ñuvirío quise pucu —ehi.

—Ahe güeraño ité aviye —ehi güemimbohe eta upe.

Jesús oyeroquí Getsemaní ve

³⁹ Ipare Jesús osë oso ivitri Olivo ve. Ahe ivitrive oso yepi, aheve semimbohe yuviraso yuvireco supi. ⁴⁰ Oyepotase aheve yuvireco, Jesús aipo ehi güemimbohe upe:

—Peyeroquí angaipa pe yapoëhi água —ehi.

⁴¹ Ipare oyepipi güemimbohe sui, inungar ita imombosa vahe amombrimi, aheve oñenopiha, oyeroci ⁴² aipo ehi: “Che Ru, ereipotase, che renose eve co mbahe tēi sui; tayapo eme che remimbotar tēi, nde remimbotar rupira rumo” ehi.

⁴³ Evocoiyase oyemboyecua Tūpa rembiguai chupe, seco momirata āgua. ⁴⁴ Mbahe-mbahe tēi porarasa pipe oyeroci catu. Aheve sacuvor inungar tuvi osē ichui otiqui ivive.

⁴⁵ Oñarapuhase oyerocuisa sui, oyeve oso güemimbohe uve. Ahe rumo opaño yuviroque yuvirocua oviharēhisa pipe.

⁴⁶ Evocoiyase,

—¡Mahera opaño peque! Peñarapuha, peyeroci catu pe viapiēhi āgua mbahe tēi pipe —ehi güemimbohe upe.

Jesús oipisi yuvireco

⁴⁷ Jesús ñehe viteseve, oyepota ati ava yuvireco chupe. Judas doce semimbohe pāhu pendar tenonde secoi. Ahe oyemboya oso sese sovaupite āgua. ⁴⁸ Evocoiyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotarēhimbar upe? —ehi.

⁴⁹ Semimbohe eta rumo, mbahe-mbahe tēi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

⁵⁰ Ñepe rumo supindar, pahi rerecuar ivate catu vahe rembiguai nambi yasu cotindar oyasia. ⁵¹ Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi. ⁵² Ichui aipo ehi güecasar opacatu pahi eta rerecuar upe, tūparo rārosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye? ⁵³ Aicose tūparo pipe pe pāhuve ari yacatu rupi, na ndapeyapoi eté co nungar cheu. Aviyēño rumo, oyepota ité niha pēu imombehupri Carugar pīratasa pipe mbahe-mbahe tēi apo āgua —ehi.

Pedro, “Ndaicuai vahe evocoi mbia” ehi Jesús upe

⁵⁴ Evocoiyase Jesús oipisi yuvireco, oviraso pahi eta rerecuar ivate catu vahe rētave yuvireco. Pedro rumo amombri rupive tēi osaquicue moñaño oso. ⁵⁵ Aheve ñachimbrí pipe oyatapi yuvireco, oyere tupri tata rese oyephe yuvinoi. Aheve avei Pedro ipāhuve chini. ⁵⁶ Evocoiyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

⁵⁷ Ahe rumo aipo ehiño:

—Cuña, ndaicuai vahe ité ahe mbia —ehi.

⁵⁸ Iparemi tēi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tēi, ndahei eté rumo che supindar aico —ehi.

⁵⁹ Ñepei hora paremi tēi, ambuae aipo ehi chupe:

—Supi eté rumo co ité supi secoi vahe. Esepia, Galilea iguar ité niha —ehi.

⁶⁰ Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe viteseve, oñehe tacura. ⁶¹ Evocoiyase yande Yar oyemboyere sese. Ahe ramoseve oyemomahenduha: “Co pipe tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese. ⁶² Ahese osē, oyasehó iteanga oso.

Sãrosar mara-mara tēi Jesús vireco yuvireco

⁶³ Evocoiyase ava Jesús rãrosar iguayī tēi yuvirocua-rocua yuvireco sese. ⁶⁴ Osesacua yuvireco. Ipare oporandu yuvireco chupe:

—¡Eicua ité ru, ava evocoi ocua nde rese! —ehi yuvireco chupe.

⁶⁵ Iyavei setá mbahe rese oñehe-ñehe tēi yuvireco chupe.

Jesús serasosa ava ñemonuhasa ivate catu vahesave

⁶⁶ Ahe ari pipe, cõhese, oñemonuha ava judío rerecuar, pahi eta rerecuar iyavei opacatu Moisés porocuaita rese oporombohe vahe yuvireco Jesús reraso uca ãgua ava ñemonuhasa ivate catu vahesave, oporandu mbahe rese yuvireco chupe:

⁶⁷ —¿Supi eté vo nde Poropĩsirosar ereico? Emombehu ru oreu —ehi yuvireco chupe.

—Amombehuse rumo pẽu, ndache reroyai chietera peye —ehi judío rerecuar upe—. ⁶⁸ Inungar che aporanduse mbahe rese pẽu, pe avei ndapemboyevii chietera cheu viña no. ⁶⁹ Co pipe suive rumo che, Ava Riquehir, aguapira Tũpa mbahe mboavaisarẽhi acato coti —ehi.

⁷⁰ Ichui opacatu ava oporandu yuvireco chupe:

—Evocoiyase, ¿nde ité ereico Tũpa Rahir? —ehi.

—Supi eté niha aipo aipo peye cheu —ehi mborerecuareta upe.

⁷¹ Evocoiyase ahe aipo ehi yuvireco:

—¡Indó! ¿Ava iri vo evocoiyase mbahe omombehura yandeu? Yasendu niha iñehe ité cute —ehi mborerecuar oyeupe yuvireco.

23

Jesús serasosa mborerecuar Pilato rovai

¹ Evocoiyase opacatu ava opũha yuvireco Jesús reraso ãgua mborerecuar Pilato rovai. ² Aheve oiñehengapo aipo ehi yuvireco:

—Orosepia co mbia oipihañemoñeta rerova ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropĩsirosar mborerecuar ivate catu vahe aico” ehi oico —ehi yuvireco Pilato upe.

³ Evocoiyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyevi Pilato upe.

⁴ Evocoiyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaherã —ehi

⁵ Ahe ava eta rumo,

—Supi eté opacatu ava oipihañemoñeta mboyeavirati uca opacatu tecua rupindar. Yipindar omboipi Galilea rupi oico. Cũritei co Judea ve ãgũe ehiño ité —ehi ava eta Pilato upe yuvireco.

Jesús imondosa mborerecuar Herodes rovai

⁶ Pilato osenduse aipo ñehesa oporandu, “¿Supi eté pĩha co mbia Galilea iguar?” ehi. ⁷ “Ahe pendar ité” ehise yuvireco chupe, ahese omondo Herodes upe, ahe acoi mborerecuar Galilea rupindar. Ahese avei secoi Jerusalén ve. ⁸ Herodes sorivete Jesús repiase. Esepia, setá ari osepia pota tẽi serãcua anduse yepi. Evocoiyase oipota ité poromondiisa oyapo vaherã oyeovaque viña. ⁹ Sese oporandu ati mbahe rese chupe. Nomboyevi eté rumo Herodes upe. ¹⁰ Aheve opacatú pahi eta rerecuar iyavei Moisés porocuaite rese oporombohe vahe eta seroĩrosave oñemoñeta-ñeta tẽi sese Herodes rovaque yuvireco. ¹¹ Evocoiyase Herodes osundao eta reseve iñhe mara-mara tẽi Jesús upe sese oguayi tẽisa pipe yuvireco. Omboyemonde avei turucuar iporañete vahe pipe yuvireco. ãgũe ehi imboyevi Herodes Pilato upe. ¹² Ahe ari pipe suive oyembori Pilato Herodes rese. Ndoyembotai vahe tie yipindar yuvireco viña.

“¡Tayaticasa!” ehi Jesús upe yuvireco

¹³ Evocoiyase Pilato opa uca omonuha opacatu pahi eta rerecuar, judío rerecuareta, opacatu ava eta avei. ¹⁴ Ipare aipo ehi chupe:

—Pe niha peru co mbia cohave cheu, ‘Omañeco tẽi ava secua rupi’ peye. Che rumo aporandu tẽi pe rovaque mbahe rese chupe. Ndipoi eté rumo mbahe sembiapo naporai vahe

pe remimombehu rupi. ¹⁵ Herodes avei, ‘Ndipoi mbahe sembiapo naporai vahe imano ãgua’ ehi. Sese omboyevĩño Jesús imbou cheu. ¹⁶ Ainupa ucara rumo. Ipare amoseñora —ehi Pilato.

¹⁷ Pascua pieta pipe iya ité Pilato ava upe ñepei soquendapri mose ãgua.

¹⁸ Opacatú guasu rumo ava oñehe pĩrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

¹⁹ Co mbia Barrabás tecua pipe mbahe tẽi mopuhasa sui iyavei oporapichisa sui oyeoquenda uca vahe. ²⁰ Pilato rumo omose pota Jesús viña. Sese oporandu iri ava upe imose ãgua.

²¹ Ahe rumo osapucái pĩrata catu yuvireco:

—¡Aní, tayaticasa! ¡Tayaticasa curusu rese! —ehi ati-atĩño yuvireco.

²² Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca ãgua, ainupa uca tẽira rumo. Ipare amoseñora —ehi.

²³⁻²⁴ Ava rehii rumo osapucái pĩratá catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoyase semimbotar yuvireco” ehiño Pilato ava eta upe.

²⁵ Ēgüe ehi imose co mbia Barrabás, acoi soquendapri mbahe-mbahe tẽi mopuhasa sui, iporapichisa sui avei ava remimbotar rupi. Ipare omondo Jesús sãrosar upe ava remimbotar apo ãgua sese.

Jesús yaticasa curusu rese

²⁶ Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yatica ãguave, ahe mbia upe, “Nde terevosii curusu rese Jesús raquicuei” ehi voiño tẽi yuvireco.

²⁷ Ava rehii yuviraso saquicuei. Cuña avei setá oyaseho oviharẽhisave yuvireco sese. ²⁸ Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membrĩ rese avei. ²⁹ Esepia, oura ari naporai vahe. Ahese aipo peye tẽira: ‘Aviye catu acoi cuña nimembii vahe iyavei ndoicuai vahe imocambu omembrĩ’ peye tẽira.

³⁰ Ahese avei ava ivitri uve aipo ehira yuvireco: ‘¡Toviapi ore harive!’ ehira osiquiyepave. Iyavei ivivate vahe upe: ‘¡Tore mi!’ ehi tẽira yuvireco. ³¹ Esepia, ěgüe ehise ivira yivive vitesse, ¿mara ehira vo catu oipise? —ehi cuña eta upe.

³² Iyavei viraso ñuvirío mbia ndaseco põrai vahe supive yaticapirã yuvireco. ³³ Oyepotase Ava Āca Cangüer serer vahesave, aheve oyatica curusu rese yuvireco. Iyavei oyatica

ñuvirío mbahe, ñepeí mbahe rese ipocosa coti, ambuae evocoyase mbahe rese ipocoëhisa coti. ³⁴ Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembiapo yuvireco —ehi.

Sundao evocoyase iguayíño Jesús turucuar rese oyeupe imboyaho-yaho água yuvireco. ³⁵ Ava rehíi osepia yuvireco; mborecuareta avei seroïrosave aipo ehi yuvireco chupe:

—Oipísiro ambuae ava, toñepisiro ru ahe ae ité cute Tüpa Rembiporavo Poropísirosar güecosa pipe —ehi yuvireco.

³⁶ Iyavei sundao seroïropare omondo vinagre itoihu yuvireco, ³⁷ iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepisiro ru nde ae ité! —ehi sundao eta yuvireco chupe.

³⁸ Curusu rese ñaca haríve icuachiapri aipo ehi oï: “Co judío rerecuar guasu” ehi.

³⁹ Evocoyase ndaseco pōrai vahe yaticapri iñehe mara tēi chupe aipo ehi:

—¡Nde Poropísirosar ereicose, eñepisiro ru nde ae, ore avei ru ore písiro eve! —ehi chupe.

⁴⁰ Ambuae evocoyase aipo ehi voi ondugüer uve:

—¿Nderesiquíyeimi rutei vo Tüpa sui? Nde avei niha ocañi tēi vaheñã. ⁴¹ Yande rumo co yande rembiapo sui tēi mara-mara tēi yande rereco yuvireco; co mbia rumo mbahe sembiapoëhi pipe sui tēi na ehi serecosa —ehi ondugüer upe.

⁴² Evocoyase aipo ehi iri:

—Jesús, che paraisuerecomi tēi eve nde eremboipise nde mborecuasa —ehi.

⁴³ Evocoyase omboyevi chupe:

—Supi eté co pipe ereicora tecua apirēhi vahesave che rupi —ehi Jesús ahe mbia upe.

Jesús mano agüer

⁴⁴ Osupitise rumo mbiter ari, opa tupri pïtu ivi rupi; las tres pipe rumo opa icatu. ⁴⁵ Ari avei ogüe tupri, turucuar guasu tüparo asiasa avei mbiter rupi tupri ovo. ⁴⁶ Evocoyase Jesús oñehe pïrata:

—¡Che Ru, amondo che espíritu ndeu! —ehi.

Aipo ohe pare voi omano.

⁴⁷ Evocoyase Roma iguar sundao rerecuar osepiase co mbahe poromondiisa Tüpa mboeteisa pipe aipo ehi:

—Supi eté co mbia ndaseco marai vahe —ehi.

⁴⁸ Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tēi oyepihamondiisa pipe yuvireco. ⁴⁹ Opacatu avei ava oicua vahe Jesús, ipãhuve

cuña Galilea sui yugüeru vahe, osepiaño tēi amombrive co nungar mbahe yuvireco.

Jesús apocatu agüer tuvipa pipe

⁵⁰⁻⁵¹ Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar secoi. Ahe mbia viroya vahe ité Tüpa ombou vahe rã omborerecuasa pipe mbahe moingatu água. Sese ndahei ipihañemoñeta rupi co mborerecuar oyapo vahe mbahe Jesús upe yuvireco. ⁵² Evocoyase ahe oso Pilato rētave oporandu água Jesús rehögüer rese. ⁵³ Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vitei vaheve yuvireco. ⁵⁴ Esepia, ahe ari omoingatu mbahe mbituhusa ari upe nara, ahe mbituhusa rumo osupiti pota ité.

⁵⁵ Cuña yugüeru vahe Jesús rupi Galilea sui, yuvirasoño ité suvipave, osepia sehögüer apocatuse yuvireco. ⁵⁶ Oyevise güētave yuvireco omoingatu mbahe siacua vahe tehögüer resendar ipichi água.

24

Jesús ocuerayevi

Ahe cuña opituhu mbituhusa ari pipe judío porocuita reroyasave yuvireco. ¹ Cõhe ramomise domingu pipe, oyevi yuviraso tuvipave mbahe siacua vahe reseve. ² Oyepotase yuvireco tuvipave, osepia soquendasa ita guasu ndipo irise güendagüerve. ³ Evocoyase yuviroique voi tuvipa pipe. Ndoyosui rumo yande Yar rehögüer yuvireco. ⁴ Ndoyembovihal tēi; ndoicatu iri. Ahese aviyeteramo tēi osepia ñuvirío mbia iturucuar sendi vahe oipive yuvireco. ⁵ Opaño ñaca iviso ivi coti yuvireco osiquiyepave. Evocoyase co mbia aipo ehi yuvireco chupe:

—¡Mahera peseca tuvipa pãhu rupi ava oicove vahe!
⁶ Ndipoi mo cohave; ocuerayevi mo ahe. Peyemomahenduha ñehengagüer ivi Galilea rupi omombehu vahecuer rese,
⁷ “Che, Ava Riquehir, imondoprira ava angaipa viyar povrive, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

⁸ Evocoyase cuña oyemomahenduha voi Jesús ñehengagüer rese yuvireco. ⁹ Oyevise tuvipa sui yuvireco, omombehu opacatu co once apóstol yuvirecoi vahe upe, opacatu ambuae upe avei. ¹⁰ Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no. ¹¹ Apóstol upe rumo

oyeupe mombehuse aviye aipo ehi tēi vahe; ndoviroyai eté yuvireco.

¹² Pedro rumo yandu ramoseve voi, osē, oña oso tuvipave. Omahese tuvipa pipe, turucuar güeraño osepia co cotimi tuisse. Evocoyase oyepihamondi tēi ‘¿mara ehi rutei pīha?’ oya oyeve oive oso.

Jesús oyemboyecua ñuvirío güemimbohe upe tecua Emaús piar rupi

¹³ Ahe ari pipeve caharuse, ñuvirío semimbohe yuviraso tecua Emaús ve. Ahe once kilómetro tecua Jerusalén sui. ¹⁴ Ahe peri rupi oñemoñeta yuviraso opacatu co mbahe oime vahecuer rese. ¹⁵ Oñemoñeta viteseve, Jesús teieté oyemboya sese, oguata supi. ¹⁶ Yepe osepia tēi, ahe rumo ndoyepiacua ucai eté chupe. ¹⁷ Evocoyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovi hai yuvino ha. ¹⁸ Ipāhu pendar Cleofas serer vahe omboyeve chupe:

—Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

¹⁹ Evocoyase,

—¿Mbahe vo oime yandeu? —ehi.

—Jesús mo Nazaret pendar, ahe Tūpa ñehe mombehusar seco pīrata vahe opacatu mbahe apo āgua, mbahe mombehu āgua avei Tūpa rovaque iyavei opacatu ava rovaque. ²⁰ Omondo pahi rerecuar iyavei yande rerecuareta yamotarēhisave yuca uca āgua curusu rese yuvireco. ²¹ Ore rumo oroyeroya ité sese. “Ahe yande pīsirora yande amotarēhimbar sui” orohe chupe viña. Cūritei rumo opa mbosapi ari yucare. ²² Ore pāhu pendar cuña ndore mbovi hai eté oyeveise suvipa sui yuvireco. Esepia, yipindar yuvirasose añihiveive tuvipave, ²³ ndoyosui eté sehögüer yuvireco. Ahese aipo osepia Tūpa rembiguai aipo ehi vahe yuvireco chupe: “Jesús mo oicove cūritei” ehi. Ahe evocoyase yugüeru imombehu oreu. ²⁴ Iyavei ambuae ore ndugüer yuvirasose tuvipave cuña remimombehu rupi tupri avei. Ndosepiai eté rumo Jesús yuvireco —ehi Cleofas chupe tupri ité.

²⁵ Evocoyase aipo ehi ahe ñuvirío mbia upe:

—¡Ndapeicuai eté rumo pe piha pipe seroya tupri āgua opacatu Tūpa ñehe mombehusar remimombehugüer!
²⁶ ¿Ndapeicuai vo Poropīsirosar iparaisu rane itera mbahe mbahe tēi virecosa pipe güecua porañetesave güeique āgua renondeve? —ehi.

²⁷ Ipare opa omombehu icuachiapri Moisés cuachiar pîpendar iyavei opacatu Tûpa ñehe mombehusar cuachiar pîpendar oyese ñehe agüer.

²⁸ Oyepotase ahe tecuave yuviraso, Jesús rumo aviye oguataño vite vaherã senonde. ²⁹ Co mbia rumo oñehe yuvireco chupe:

—Epitaño ore piri, caharu etepri. Pîtura moco ndeu —ehi yuvireco chupe.

Evocoyase oique, opitaño ipiri yuvireco. ³⁰ Oguapise yuvinoi mesave, oipisi pan, “Aviye ndeu” ehi Tûpa upe. Ipare ombohi co ñuvirío mbia upe imondo. ³¹ Ahese voi semimbohe omahecua ramo yuvireco sese, ahe rumo cûriteimi ndoyemboyecua iri sovai chupe. ³² Evocoyase aipo ehi oyeupe yuvireco:

—Yande mbopihañemoñeta pîratami eté peri rupi oñehese yandeu co tecocuer icuachiapri rese —ehi yuvireco.

³³ Ipare ndopita pucu iri; oyeviño voi yuviraso tecua Jerusalén ve. Aheve osepia once tupri vahe apóstol, omboetasa avei. ³⁴ Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepia, oyemboyecua ité Simón upe —ehi.

³⁵ Evocoyase ahe avei omombehu, “Oreu avei oyemboyecua oroguatase peri rupi. Ombohise pan ore piri, ahese ramo oroicua” ehi yuvireco omboetasa upe.

Jesús oyemboyecua güemimbohe eta upe

³⁶ Ahe oñehe vitesese yuvireco co tecocuer rese, ahese Jesús oyemboyecua chupe aipo ehi:

—Avirave, mbahe tupri pipe tapeico —ehi güemimbohe eta upe.

³⁷ Ahe rumo oyembosiquiye guasu yuvireco ‘hãgüer revo’ oyapave.

³⁸ —¡Mahera pesiquiye! ¡Mahera pereco vite pe poreroyaëhisa pe piha pipe! ³⁹ Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hã ndovirecoi voho iyavei ocangüer; che rumo areco ité —ehi güemimbohe eta upe.

⁴⁰ Aipo ohe vitesese omboyecuapa opo, opi avei chupe. ⁴¹ Ahe rumo vorivetesa pipe iyavei oyepihambosiquiye vitesa sui ndoviroya tupri vitei eté yuvireco. Evocoyase aipo ehi:

—¿Perecomi vo mbahe yande caru ãgua? —ehi güemimbohe upe.

⁴² Evocoyase omondo pira apiremi oyi vahe yuvireco chupe. ⁴³ Ipare oipisi, ohu opacatu güemimbohe rovaque.

⁴⁴ Ipare aipo ehi:

—Co rese acoi añehe vichico cuese pe rese aico vitesse che mano renondeve. Yaviye ranera opacatu ñehesa che resendar Moisés porocuita cuachiapri pipe, iyavei Tũpa ñehe mombehusar yuvirecoi vahe rembicuachiagüer pipe, Salmo pipe avei —ehi.

⁴⁵ Ëgüe ehi evocoyase opacatu osenducua uca aracadendar icuachiapirer güemimbohe upe ⁴⁶ aipo ehi:

—Co icuachiasa Poropĩsirosar iparaisura omano ãgua. Ipare mbosapi ari pare ocuerayevira. ⁴⁷ Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tũpa upe pẽu ñeroi ãgua” hesara. ⁴⁸ Pe niha peico opacatu co nungar mbahe repiasar imombehu ãgua. ⁴⁹ Che amboura che Ru remimombehu pe harive. Pepitañora rumo cohava tecua Jerusalén ve acoi peipisise voi pĩratasa iva suindar —ehi güemimbohe eta upe.

Ivave Jesús so agüer

⁵⁰ Evocoyase Jesús yuvinose tecua sui yuviraso tecua Betania popive. Aheve ñuvirio opo omopuha, osovasa mbahe tupri reime ãgua chupe. ⁵¹ Ipare oyepepi güemimbohe sui. Ahe ramoseve serasosa ivave. ⁵² Semimbohe evocoyase osapucái imboetisave. Ipare oyevi Jerusalén ve vorivetesa pipe yuvireco. ⁵³ Iyavei ahe ari yacatu rupi yuviraso tũparo guasu pipe osapucái Tũpa mboetisave yuvireco yepi. Aipo rupive.

JUAN REMBICUACHIA JESUS RECOUER RESENDAR SAN JUAN

Tūpa Ñehe oyeapo ava

¹⁻² Jesús yipisuive ité Tūpa Ñehe secoi. Ahe oicove mbahe apoēhi viteseve Tūpa rese. Esepia, ahe niha Tūpa secoi. ³ Ipípe avei Tūpa opacatu mbahe oime vahe oyapo; ndipoi eté mbahe sembiapoēhi. ⁴ Jesús niha vireco tecovesa apirēhi vahe oyese. Ahe tecovesa tesapesa nungar secoi opacatu ava upe. ⁵ Ahe tesapesa omboyecua tecocuer supi eté vahe pītumimbi nungar mbahe naporai vahe aposar pāhuve. Ahe mbahe tēi aposar rumo ndoicatui eté secopi yuvireco.

⁶ Oime mbia Tūpa remimbou. Ahe Juan serer vahe. ⁷ Ahe rumo ou co tesapesa cua uca āgua ‘toviroya opacatu ava yuvireco’ ohesave. ⁸ Ahe rumo ndahei eté tesapesa; imombehusar tēi rumo secoi. ⁹ Co tesapesa supi eté vahe osesape opacatu ava. Ahe ou ité co ivi pípe.

¹⁰ Yepe tie ipípe yapopri opacatu ava viña, sembiapo rumo ndoicuai co ivi pípe secoise yuvireco. ¹¹ Supi eté ouse güecuave, secua pendar ae rumo ndoipisii yuvireco. ¹² Opacatu rumo acoi oipisi vahe seroyasave yuvireco, ahe chupe omondo ñecuñarosa Tūpa rahir seco āgua yuvireco. ¹³ Ndahei rumo co ivi pípendar rahir nungar que oha vahe ambuae ava remimbotar pípe tēi. Ahe rumo Tūpa rahir ité yuvirecoi.

¹⁴ Ipare ahe Tūpa Ñehe, oyeapo ava, oicove yande pāhuve co ivi pípe oporoaisusave mbahe supi eté vahe aposa pípe. Iyavei orosepia ité seco porañetesa. Co seco porañetesa oipisi vahe Vu sui Tahir ñepe vahe güeco pípe. ¹⁵ Juan niha oñehe sese ava upe aipo ehi: “Co uve niha acoi aipo ahe vahe cuese: ‘Acoi ou vahe rā che raquicuei, ahe ivate catu vahe che sui. Esepia, yipive ité secoi che yesuēhi viteseve’ ahe” ehi.

¹⁶ Esepia, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi. ¹⁷ Mborocuaia yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu. ¹⁸ Ndipoi eté ava osepia vahe Tūpa; Tahir ñepe vahe, secoi vahe ité ipiri, ahe oicua uca yandeu.

Juan Oporoãpiramo vahe oñehe Jesucristo rese

¹⁹ Judío rerecuar guasu tecua Jerusalén pendar oyocuai pahí eta iyavei ipitiviisareta imondo Juan uve ‘¿Ava vo nde?’

tehi yuvireco chupe' oyapave icua āgua. ²⁰ Ahe rumo oye-mombehu ité aipo ehi:

—Che ndahei eté Poropĩsĩrosar aico —ehi.

²¹ Evocoyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acoi Tũpa ñehe mombehusar ou vaherã? —ehi yuvireco chupe.

—Aní eté —ehi.

²² —¿Ava rutei vo evocoyase nde? ¡Emombehu oreu ore oromombehu vaherã ore mbousar uve! ¿Mbahe ité vo eremombehura ndeyesuindar oreu? —ehi yuvireco chupe.

²³ —Che aico oñehe vahe ivi iporupirẽhisa rupi aipo ahe: ‘Pemoingatu pe recocuer yande Yar yepotase nara’ ahe pẽu. Ahe inungar acoi Tũpa ñehe mombehusar Isaías aipo ehi vahe aracahe —ehi.

²⁴ Ahe yuviraso vahe chupe, fariseo remimondo yuvirecoi, ²⁵ oporandu yuvireco chupe:

—Evocoyase ndahei niha aipo nde Poropĩsĩrosar, ndahei avei Elías, ndahei eté Tũpa ñehe mombehusar imombehupri ereico. ¿Mahera ru evocoyase ereporoãpiramo? —ehi yuvireco chupe.

²⁶ Evocoyase fariseo upe aipo ehi:

—Che rumo i pipe aporoãpiramo; oime rumo mbia pe pãhuve ndapeicuai vahe. ²⁷ Ahe co ivi pipe ou vaherã che raquicuei. Che rumo ndahei eté seco catupri vahe aico ipitaquisã yora āgua —ehi.

²⁸ Co opacatu mbahe yaposa tecua Betania ve, iai Jordán rovai añihivei coti. Aheve Juan oporoãpiramo yepi.

Tũpa remimbou Ovesa nungar opacatu ava angaipa repirã

²⁹ Ahere ayihive Juan osepia Jesús oyemboyase oyese aipo ehi: “¡Pesepia, co Tũpa remimbou Ovesa nungar seropovẽhepirã opacatu ava angaipa mocañi āgua! ³⁰ Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’ ahe acoi cuese. ³¹ Che rumo yipindar ndaicuai ahe yande remiaro ou vaherã. Sese niha aporoãpiramo i pipe vichico imboyecua āgua che mu judío yuvirecoi vahe upe” ehi.

³² “Che asepia Espiritu Santo ogüeyise iba sui inungar apicasu, opita tupri iharive” ehi. ³³ “Yipindar rumo ndaicuai eté. Tũpa che cuai vahe rumo che poroãpiramo āgua i pipe, aipo ehi cheu: ‘Acoi eresepiase Espiritu Santo ogüeyise, opitase mbia harive, ahe mbia oporoãpiramora Espiritu Santo pipe’

ehi. ³⁴ Che niha asepia ité. Sese, ‘Co Tūpa Rahir ité secoi’ ahe pēu” ehi.

Yipindar vahe Jesús remimbohe

³⁵ Ahere ayihive Juan secoi aheve avei ore ñuvirío mbia oroico vahe reseve. ³⁶ Jesús ore cuãse, Juan aipo ehi oreu:

—¡Pesepia, ndo co mbia Tūpa remimbou Ovesa nungar seropovēhepirã! —ehi oreu.

³⁷ Aipo ihe ramoseve, oroguata voi eté supi. ³⁸ Evocoiyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoiyase,

—Porombohesar, ¿que vo nde recosa? —orohe chupe.

³⁹ —Yaso, tapesepia ru —ehi oreu.

Evocoiyase oroso, oroyepota las cuatro pipe secosave. Aheve ore pĩtu ité ipiri.

⁴⁰ Simón Pedro rivri, Andrés, ahe che ndugüer ahese. ⁴¹ Ahe rane aipo oseca viquehir Simón aipo ehi chupe:

—Orosepia ité Poropĩsirosar —ehi (‘Cristo’ oyapave).

⁴² Ipare voi, viraso Simón Jesús uve. Osepiase, Jesús aipo ehi chupe:

—Nde Simón, Juan rahir, ndererguã rumo Cefas —ehi (‘Pedro’ oyapave).

Jesús oñhe Felipe upe, Natanael upe avei oyeupi iguata ãgua

⁴³ Ahere ayihive voi Jesús ipihañemoñeta oso ãgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

⁴⁴ “Aviye” ehi Felipe, ahe Pedro iyavei Andrés recua Bet-saida pendar secoi. ⁴⁵ Ipare oso Natanael reca, aipo ehi chupe:

—Orosepia Poropĩsirosar, sesendar acoi Moisés oicuachía cuachiar porocuita resendar pipe aracahe, oicuachía avei sesendar Tūpa ñehe mombehusareta yuvireco. Ahe Jesús, José rahir, tecua Nazaret pendar —ehi.

⁴⁶ Natanael rumo aipo ehi:

—¿Oime pĩha yuvinose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

⁴⁷ Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndoporombopai vahe —ehi.

⁴⁸ —¿Mara ere che cua eve? —ehi Natanael chupe.

—Che oroepia yipive Felipe nde reca renondeve ivira hiqueravrive ereicose —ehi Natanael upe.

49—Porombohesar, jnde niha Tūpa Rahir ereico, Israel iguar rerecuar guasu! —ehi Natanael chupe.

50—¡Che reroya voi eté acoi, “Oroepia iviravrive” che he sui tēi eve! Eresepiara rumo co mbahe sui aviye catu vahe —ehi.

51 Iyavei aipo ehi opacatu upe:

—Supi eté pesepiara iva oyemboi tuprise iyavei Tūpa rembiguai eta igüeyise che, Ava Riquehir, upe, iyevise avei ivave yuvireco —ehi.

2

Mendasa tecua Caná ve

1 Ipare imombosapisa ari pipe, oime mendasa tecua Caná ve, Galilea ivi rupi. Jesús si avei secoi aheve, ² iyavei Jesús ore semimbohe oroico vahe reseve ore soho avei yuvireco aheve.

3 Ëgüe ehi rumo opa tēi uva ricuer. Evocoyase Jesús si,

—Ndipo iri uva ricuer —ehi chupe.

4—Cuña, ¿mahera vo aipo ere cheu? Che remimbotar rumo ari ndoyepota vitei cheu —ehi osi upe.

5 Ichi rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

6 Aheve oime seis cambuchi guasu ita cuhi apopri, ñeppei cambuchi pipe oi que cincuenta litro, amove oi que setenta litro i ipipe. Ahe judío oiporu pietase oyepoi ãgua yuvireco Tūpa porocuita mboaviye ãgua yepi. ⁷ Evocoyase ahe ava igua rese ihañeco vahe upe aipo ehi:

—Pemboapipopa co cambuchi i pipe —ehi.

Omboapipopa tupri yuvireco. ⁸ Evocoyase aipo ehi ava ihañeco vahe upe:

—Penosemi chíhi, peraso pieta rese hañecosar uve —ehi.

Ëgüe ehi eté yuvireco. ⁹ Ihañeco vahe pieta rese osãha i oyeapo vahe uva ricuer. Ndoicuai eté que sui osē ahe uva ricuer; igua rese ihañeco vahe güeraño tupri oicua yuvireco. Evocoyase pieta rese hañecosar oñehe cuimbahe omenda vahe upe ¹⁰ aipo ehi chupe:

—Opacatu ava omondo uva ricuer aviye catu vahe yipindar. Ipare acoi ava hitaropase yuvireco, omondo ndasepii vahe. Nde rumo ereyapocatupaño aviye catu vahe, ahe cūrítei ramo erenose —ehi.

¹¹ Co yipindar vahe poromondiisa Jesús oyapo vahe aheve. Ipipe omboyecua güeco pīratasa. Sese semimbohe viroya ité yuvireco.

¹² Ipare oso tecua Capernaum ve, ichi avei, tivri reseve supive, iyavei ore semimbohe eta oroso supi. Aheve oroico moviro ari tēi.

Jesús omombopa ava mbahe rerecosar tūparo pipe sui

¹³ Ipare judío upendar Pascua pieta yepota senise, Jesús oso Jerusalén ve. ¹⁴ Aheve osepia tũparo guasu pipe corero ivipí rupi guarepochi rese mbahe mimba eta mondosar; guaca, ovesa iyavei apicasu. Aheve avei mbia guarepochi recuñarosar yuvinoi. ¹⁵ Co mbahe repiase rumo, Jesús oyapo tucumbo omombopa tuprí tũparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otiapí-apíi iguarepochi iví rupi, iyavei imesa opa omombo. ¹⁶ Apicasu mondosareta uve aipo ehi:

—¡Penosepa co mbahe cūrítei ave sui! —ehi—. ¡Aní che Ru rēta mbahe mondosa tēi pereco! —ehi.

¹⁷ Aipo hese, ore oroyemomahenduha ñehesa icuachiapri aracahendar aipo ehi vahe rese: “Nde rēta rese che recatēhisa sui che mocañira” ehi vahe.

¹⁸ Evocoyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporēhi ãgua oreu cūrítei? —ehi yuvireco chupe.

¹⁹ Evocoyase,

—Pemondurupa co tũparo, che evocoyase mbosapí arí rupive amopuha irira —ehi judío eta upe.

²⁰ Aipo hese, mborerecuar aipo ehi yuvireco chupe:

—Co tũparo rumo imopuhasa cuarenta y seis araviter rupi, ¿ereicatura pñha aipo nde imopuha iri mbosapí arí rupive? —ehi yuvireco chupe.

²¹ Oñehese Jesús tũparo rese, güete upe tēi rumo aipo ehi.

²² Ocuera yevise rumo manosa sui, ore oroyemomahenduha ñehese agüer rese. Sese oroviroya sesendar ñehesa icuachiapri pipe iyavei semimombehugüer.

Jesús oicua opacatu ava recocuer

²³ Jesús secoi vitese Jerusalén ve Pascua pieta pipe, setá ité ava viroya osepiase poromondiisa sembiapo yuvireco.

²⁴ Ndoyeroyai eté rumo ahe ava eta rese. Esepia, opacatu ité ava recocuer oicua. ²⁵ Ndipoi eté que ambuae ava pñhañemoñeta mombehu ãgua chupe. Esepia, ahe ité opa oicua.

3

Nicodemo omoñeta Jesús

¹ Oime mbia fariseo, Nicodemo serer vahe, ahe mbia mborerecuar judío pñhuve secoi vahe. ² Ahe oso Jesús piri pñtu pipe, aipo ehi chupe:

—Porombohesar, oroicua ité Tũpa nde mbose ore mbohe ãgua —ehi—. Esepia, ndipoi eté que ava oicatu vahe evocoi nungar poromondiisa apo Tũpa oyese secoēhise —ehi.

³ Evocoiyase,

—Supi eté aipo ahe ndeu: acoi ava ndoyesu piasu iri vahe, ndoiquei chietera Tũpa mborerecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyesu piasu iri ocuacua pipe viña? —ehi—. ¿Oicatu irira pĩha osi aviterve oique oyesu iri ãgua? —ehi Jesús upe.

⁵ Jesús omboyevi chupe:

—Supi eté aipo ahe ndeu: acoi ava i pipe iyavei Espiritu pipe ndoyesui vahe, evocoi nungar ndoyuviroiquei chira Tũpa mborerecuasave. ⁶ Acoi oyesu vahe co ivi pipendar oyesupa sui, inungar tupri avei ahe; Espiritu pipe oyesu vahe rumo, ahe espiritu. ⁷ Ereyepihamondii rene, ‘Peyesu piasu irira’ ahese ndeu. ⁸ Co rumo inungar ivitu oipeyu vahe güemimbotar rupi. Yepe sendusa siapu, ndicuasai rumo que sui turi, que oso no. Ëgüe ehi avei ava oyesu vahe Espiritu pipe —ehi Jesús chupe.

⁹ —¿Mara ehi pĩha aipo evocoiyase? —ehi Jesús upe.

¹⁰ —iNde niha porombohesar ivate vahe Israel pendar erico, nderesenducuai eté rumo co nungar mbahe! —ehi chupe—. ¹¹ Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu. ¹² Añehe tẽi niha mbahe co ivi pipendar rese pẽu; ndache reroyai eté rumo peye. Tahetru revo mbahe iva pendar amombehuse pẽu ndaperoyai chietera viña —ehi.

¹³ “Esepia, ndipoi eté ambuae ava ivave oyeupi vahe; che güeraño, Ava Riquehir, iva sui agüeyi vahe pẽu. ¹⁴ Inungar Moisés osupi ivate mboi rahanga ivi iporupirẽhisa rupi arac-ahe. Ëgüe ehi aveira che, Ava Riquehir, rerecosa ivate che rupira yuvireco ¹⁵ opacatu ava che reroyasar tecovesa apirẽhi rereco ãgua yuvireco” ehi Jesús Nicodemo upe.

Tũpa poroaisusa ava upe nara

¹⁶ “Supi eté Tũpa osaisú iteanga opacatu ava. Sese ombou Guahir ñepe vahe ‘tocañi tẽi eme che Rahir reroyasar yuvireco’ oya, ‘tovireco tecovesa apirẽhi vahe’ ohesave. ¹⁷ Esepia, nomboui Tũpa Guahir co ivi pipe ava mocañi tẽi ãgua; ahe rumo ombou ava pĩsiro ãgua.

¹⁸ “Ava viroya vahe Tũpa Rahir, ndahei eté ocañi tẽi vaherã; acoi ava ndoviroyai vahe rumo, oipisi itera cañisa yuvireco Tũpa Rahir ñepe vahe reroyaẽhisa pipe. ¹⁹ Ëgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota catu mbahe Carugar suindar pĩtumimbi vahesave güeco ãgua yuvireco. ²⁰ Supi eté acoi opacatu ava oyapo vahe angaipa, ndosepia potai tesapesa,

iyavei ndoyemboyai tesapesa rese yuvireco oangaipa mboye-cua potaēhisave. ²¹ Acoi ava yuvirecoi vahe rumo mbahe supi eté vahe aposa pipe, oyemboya tesapesa rese yuvireco mbahe Tūpa remimbotar oyapo vahe cua uca āgua opacatu ambuae ava upe —ehi.

Juan Oporoāpiramo vahe oñehe iri Jesús rese

²² Ipare Jesús oso güemimbohe eta rese ambuae tecua rupi-rupi ivi Judea ve. Aheve secói pucu raimi oporoāpiramo. ²³ Iyavei Juan oporoāpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca āgua. ²⁴ Co rumo mbahe yaposa Juan roquendaēhi viteseve.

²⁵ Evocoiyase Juan remimbohe omboipi ambuae omu judío rese oyecopi-copi vaherā i pipe ñeapiramosa resendar sui tēi yuvireco. ²⁶ Sese yuviraso Juan uve aipo ehi:

—Ore mbohesar, acoi secói vahe nde rese iai Jordán rovai, sese acoi ereñehe oreu, cūritei ahe oporoāpiramoño tēi iyavei opacatu yuviraso supi —ehi semimbohe yuvireco chupe.

²⁷ Evocoiyase aipo ehi güemimbohe upe:

—Ava ndoicatui mbahe apo Tūpa nombouise chupe. ²⁸ Pesendu tupri ité che ñehe cuese: “Che ndahei Poropīsrosar aico, che rumo senonde imboupri tēi aico” ahese pēu. ²⁹ Esepia, acoi mendasa oimese, vireco vahe güembirecovi ahe imevi, osenduse rumo imboripar ñehe yivii ohā, oyemboviharete sese. Ēgüe ahe avei che cūritei, ayemboviharete Jesús rese. ³⁰ Ahe niha seco ivate catu-catuño itera ari rupi oico; che rumo ivi coti catu aicora ichui —ehi Juan güemimbohe upe.

Iva suindar ou vahe

³¹ Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo iva sui, ivate catu ité opacatu sui. ³² Iyavei mbahe güembiepia osendu vahe reseño ité oñehe. Ndipoi eté rumo semimombehu viroya vahe yuvireco. ³³ Acoi ava viroya vahe rumo ñehe, “Supi tupri ité Tūpa omombehu mbahe” ehi. ³⁴ Co Tūpa remimbou niha omombehu Tūpa ñehe. Esepia, Tūpa omondo ité oEspíritu sese. ³⁵ Tūpa osaisu Guahir iyavei opacatu mbahe omondo ipove. ³⁶ Opacatu ava viroya vahe Tūpa Rahir, vireco ité tecovesa apirēhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tūpa ñemoirosa ipirata vahe ité yuvireco.

4

Jesús oñehe Samaria pendar cuña upe

¹ Fariseo eta oyandu yuvireco Jesús vireco catuse ava oye-upi oguata vahe iyavei oporoãpiramo catuse avei Juan sui ² (ndahei eté rumo Jesús oporoãpiramo; semimbohe tēi rumo ěgüe ehi yuvireco). ³⁻⁴ Jesús oicuase aipo nungar, osē Judea sui, oyevi iri ivi Samaria rupi, Galilea ve yuviraso.

⁵ Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe. ⁶ Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús oguapi mbiter ari potase ocueraise oĩ. ⁷⁻⁸ Semimbohe eta rumo opacatu yuviraso tecuave mbahe tembihu rerocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chĩhi nde i taihu —ehi.

⁹ Cuña, Samaria pendar, rumo omboyevi chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehi vahe ité ava Samaria pendar upe yuvireco yepi.)

¹⁰ Evocoyase omboyevi cuña upe:

—Ereicuase Tūpa porerecosa ndeundar viña iyavei ereicuase ahe ava ndeu i rese oporandu vahe, nde evocoyase ereporandura sese chupe. Ahe evocoyase omondora i ndopai vahe ndeu viña —ehi cuña upe.

¹¹—Ndererecoi rumo i renose āgua. Esepia, co igua ipicucú ité. ¿Que sui vo aipo evocoyase eremboura i ndopai vahe cheu viña? —ehi cuña chupe—. ¹² Esepia, co igua ore ramoi Jacob oseya oreu. Cohave suiño ité niha ahe oihu, tahir avei oihu yuvireco ichui iyavei opacatu seimba. ¿Nde pĩha ivate catu ereico ichui? —ehi cuña chupe.

¹³—Opacatu ava oihu vahe co i, ihuseiño itera yepi, —ehi cuña upe—. ¹⁴ Acoi ava oihu vahe rumo i che remimondo, ndihusei iri chietera. Esepia, che amondo vahe i ndopai vaherã ité. Ahe omboura tecovesa ndopai vahe ava upe —ehi cuña upe.

¹⁵—Nde ava, emboumi ahe i taihu che husei iriēhi āgua, tanose iri eme i cohava sui —ehi.

¹⁶—Eso rane nde mer reca, seseve peyu cohava —ehi cuña upe.

¹⁷—Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer. ¹⁸ Esepia, cinco tupri erereco nde mer iyavei cūritei erereco vahe nde resendar tēi. Supi eté aipo ere: “Ndarecoi che mer” ere cheu —ehi cuña upe.

¹⁹—Nde ava aviye moco Tūpa ñehe mombehusar ereico cheu —ehi—. ²⁰ Ore ramoi eta omboetei Tūpa co ivitri rese

yuvireco. Pe rumo, judío peico vahe, “Jerusalén ve yamboeteira Tūpa yepi” peye —ehi.

²¹ —Che reroya eve cuña, virovi ari pēu peso iriēhi āgua Tūpa mboetei co ivitri rese iyavei Jerusalén ve. ²² Pe Samaria pendar peico vahe pemboetei tēi pe rembiguaēhi. Ore rumo oroicua oromboetei vahe. Esepia, ñepisiroso ou judío sui. ²³ Oyepota rumo ari cute, ahe ité co cūrítei co pipe suive supí eté Tūpa omboetei vahe, Tūpa Espíritu pipe omboeteira yuvireco. Supi eté Tūpa, “Ēgüe tehi che mboetei yuvireco” ehi. ²⁴ Esepia, Tūpa niha Espíritu seci. Sese acoi omboetei vahe oyapora Espíritu pipe supi tupri vahe ité yuvireco —ehi cuña upe.

²⁵ Cuña evocoyase aipo ehi chupe:

—Che aicua Poropísiosar yu āgua (ahe ‘Cristo’). Acoi ahe ouse, omombehu tuprira opacatu mbahe yandeu —ehi cuña chupe.

²⁶ —Che niha ahe aico añehe vahe ndeu —ehi cuña upe.

²⁷ Aheseve semimbohe eta oyevi yuvireco, nombovihaipri güemimbohe cuña rese oñemoñetase. Ndipoi eté rumo que “¿mahahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe. ²⁸ Ahese cuña oseyá tupriño ocambuchi, oso güecuave aipo ehi ava eta upe:

²⁹ —Perio, tapesepia pe ava omombehupa tupri vahe che recocuer cheu. ¿Ndahei pīha ahe Poropísiosar? —ehi omu eta upe.

³⁰ Evocoyase ava rehii yuvínose tecua sui, yuviraso Jesús recosave sepia. ³¹ Ava yepotaēhi viteseve, semimbohe eta,

—Ore mbohesar, ecarumi —ehi tēi yuvireco chupe.

³² —Oimera rumo ambuae mbahe cheu che moviracua āgua. Ahe ndapeicuai vahe —ehi güemimbohe eta upe.

³³ Semimbohe aipo hese oporandu-randu tēi oyeupe yuvireco:

—¿Oime pīha que ava güeru vahe mbahe semihura? —ehi tēi yuvireco.

³⁴ Güemimbohe upe rumo aipo ehi:

—Che moviracuasa rumo che mbousar porocuita, ahe ayapora iyavei amboaviye rane itera iporaviqui —ehi—.

³⁵ Esepia, pe aipo peye: ‘Ipane vite irungatu yasi mbahe miti ha monuha āgua’ peye yepi; che rumo aipo ahe pēu: pemahe pe ivirindar ava eta rese. Opa ité opīha omoingatu yuvireco, ahe inungar mbahe miti ha yaviye vahe. ³⁶ Acoi oporaviqui vahe Tūpa upe ava hã pīsī āgua rese, ahe oipīsira sepri yuvireco iyavei semimonuha tecovesa ndopai vaheve nara ité yuvirecoira. Evocoyase ava upe oñehe vahe iyavei oipīsī vahe ava hã ivave nara, oyoya guasu oviharetera ipīsīpri rese yuvireco. ³⁷ Supi eté co ñehesa aipo ehi vahe: Ñepeí eté

omaheti vahe; imonuhasar rumo ambuae ité' ehi. ³⁸ Che opocuai ava hã pisi ãgua ambuae ava poraviquisave; yipindar rumo ambuae oporaviquí ité yuvireco sese. Pe evocoyase peique iporaviqui agüer rupi —ehi güemimbohe eta upe.

³⁹ Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui. ⁴⁰ Evocoyase ava rehi Samaria pendar yuviraso chupe ‘epitami ore piri’ oya. Evocoyase opita ipiri ñuvirío ari rupi. ⁴¹ Setá catu iri ava viroya yuvireco ñehe ité renduse. ⁴² Evocoyase ava eta aipo ehi cuña upe yuvireco:

—Cüritei oroviroya ité cute, ndahei nde ñehe suiño oroviroya. Esepia, ore ité orosendu ñehe cute, oroicua avei ahe supi eté opacatu ava pisirosar ou vahe —ehi ava eta cuña upe yuvireco.

Jesús ombogüera mborerecuar rahir

⁴³ Ñuvirío ari pare, Jesús osë ivi Samaria sui, osoño ivi Galilea ve. ⁴⁴ Ahe ae ité aipo ehi: “Tüpa ñehe mombehusar ndasaisusai ivi rese yuvireco yepi” ehi. ⁴⁵ Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

⁴⁶ Evocoyase oyevi iri tecua Caná ve Galilea ivi rese, aheve acoi i tēi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe. ⁴⁷ Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rēlave, tombogüerami che rahir omano pota vahe cheu’ oya. ⁴⁸ Evocoyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo —ehi.

⁴⁹ —Che Yar, eyu poyavañomi tēi che rahir mano viteēhiseve —ehi mborerecuar chupe.

⁵⁰ —Eyevi nde rēlave; nde rahir oicove —ehi mborerecuar upe.

Ahese viroya voi oyeupe ñehesa. Sese oyevi voi eté güētave. ⁵¹ Amombri seco vitesese, yuvinoña voi sovaichi sembiguai imombehu:

—¡Nde rahir oicove! —ehi yuvireco chupe.

⁵² Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

⁵³ Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoyase ahe iyavei opacatu imu eta viroya Jesús yuvireco.

⁵⁴ Co imoñuviriosa poromondiisa oyapo Jesús güecocuer cua uca ãgua ivi Judea sui oyeveise Galilea ve.

5

Jesús ombogüera ava ndoguatai vahe tecua Betzata pendar

¹ Ipare oime judío pieta guasu Jerusalén ve, aheve Jesús oso. ² Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe pãve. ³ Aheve ava eta imbaheasi vahe oñeno yugüeru ivi rupi: ndasesapisoi vahe, ndoguatai vahe, ndipindugüei vahe avei i ñemomiisa osãro yuvireco yepi. ⁴ Esepia, amove tēi Tūpa rembiguai ogüeyi ahe ivicuarve i momii ãgua, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe. ⁵ Aheve oime mbia ombaherasisa vireco vahe treinta y ocho araviter rupi. ⁶ Osepiase Jesús, oicua voi eté vireco pucuse ombaherasisa. Evocoyase oporandu chupe:

—¿Ereipota vo nde cuera ãgua? —ehi chupe.

⁷ Imbaheasi vahe omboyevi:

—Nde mbia, ndipoi eté que ava che mongui vaherã i pipe i ñemomiise. Asãha tēi ‘tacui’ viya. Ambuae rane-raneño rumo yuvirocui che sui yepi —ehi.

⁸ Evocoyase,

—Epũha, esupi nde rupa, eguata —ehi imbaheasi vahe upe.

⁹ Ahe ramoseve ahe mbia ocuera tupri, osupi vupa, uguata voi oico. Mbituhusa ari pipe tupri rumo egüe ehi.

¹⁰ Evocoyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosii ãgua —ehi yuvireco chupe.

¹¹ Ahe mbia evocoyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

¹² —¿Uma vo aipo ehi ndeu? —ehi judío yuvireco chupe.

¹³ Ahe mbia rumo ndoicua iri ombogüerasar. Sese ndoicatui imboyevi ãgua. Esepia, Jesús aviyeteramo tēi ndoyecua iri ava rehii pãhuve. ¹⁴ Coiye rumo Jesús osepiase iri tūparove ahe mbia, aipo ehi chupe:

—Ereicua co nde cuerasa cūritei, aní ereyemboangaipa iri mbahe tēi catu reime iri ãgua ndeu —ehi chupe.

¹⁵ Ahe mbia evocoyase oso voi eté judío eta rerecuar upe ‘Jesús che mbogüera’ oya. ¹⁶ Sese judío osaquicue moña iyavei oyuca pota yuvireco mbituhusa ari pipe iporombogüera rese tēi. ¹⁷ Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei —ehiño judío upe.

¹⁸ Aipo hese, judío, “Yayuca ité” ehi. “Esepia, ndahei mbituhusa ari güeraño nomboyeroyai, ahe rumo oyeapo Tūpa nungar, Tūpa uve ‘che Ru’ ohe angahu tēisa pipe” ehi yuvireco chupe.

Tūpa Rahir mborerecuasa

¹⁹ Evocoyase Jesús aipo ehi judío upe: “Supi eté aipo ahe: Tūpa Rahir ndoicatui eté mbahe apo oyesui tēi, Vu rembiapo mbahe oicua; aheño tupri avei oyapo yepi. ²⁰ Esepia, Tu Guahir raisupave omboyecua opacatu mbahe güembiapo chupe iyavei omboyecuaño vite itera mbahe poromondiisa tuvicha catu vahe sembiaporã, ‘¡Mara ehi rutei co!’ pehe tēi āgua chupe. ²¹ Esepia, che Ru ombogüerayevi omano vahe iyavei omondo tecovesa chupe. Ēgüe ehi avei Tahir omondo tecovesa ava upe güemimbotar rupi. ²² Iyavei Tu nomondo iri ava upe sembiapo repri. Esepia, ombou Guahir upe opacatu pĩratasa ava upe sembiapo repri mondo āgua. ²³ Ēgüe ehi Guahir upe opacatu ava imboetei āgua yuvireco inungar Tu imboeteipri. Acoi ava Tahir nombotei vahe, Tu imbousar avei nombotei yuvireco.

²⁴ “Supi eté aipo ahe pēu: acoi oyapisaca vahe che ñehe rese, viroya vahe avei che mbousar, ahe virecora tecovesa apirēhi vahe; ndahei chietera imocañipri. Esepia, osē manosa sui oipisi tecovesa. ²⁵ Supi eté aicua uca pēu: oura ari imombehupri, cūrutei eté co ari oyepota, ava eta omano vahecuer osendura Tūpa Rahir ñehe. Acoi osendu vahe, oicoveño itera. ²⁶ Esepia, Tu vireco tecovesa oyese. Ēgüe ehi avei Guahir upe imondo tecovesa rereco āgua. ²⁷ Ombou avei imborerecuā āgua chupe ava recocuer rese iporandu āgua. Esepia, ahe Ava Riquehir seci. ²⁸ Peyepihamondi rene aipo che hesa sui. Esepia, oyepotara ari imombehupri, ahese opacatu ava omano vahecuer osendura iñehe. ²⁹ Ahese yuvinosera vuvipa sui. Oyapo vahe mbahe tupri, ocuerayevira yuvireco tecovesa apirēhi rereco āgua; acoi oyapo vahe rumo mbahe naporai vahe, ocuerayevira yuvireco Tūpa ñemoirosa pisi āgua” ehi Jesús judío rereciar upe.

Jesús omboyecua tupri omborerecuasa

³⁰ “Che ndaicatui mbahe apo cheyesui tēi. Che, ‘Pe peyavi vahe mbahe, pepisira che Ru ñemoirosa’ ahe ava ndaseco pōrai vahe upe che cuaita rupi iyavei che amombehu vahe supi tupri ité. Esepia, che ndaipotai che remimbotar tēi mbahe apo āgua. Che Ru, che mbousar remimbotar rumo ayapo. ³¹ Que cheyese ae tēi añehese, ahese ndache reroyai

chira peye viña. ³² Oime rumo ambuae che mombehular. Ahe supí eté che mombehu pe seroya água; ahe Juan. ³³ Pe niha, pemondo ava chupe imboporandu mbahe rese. Ahe semimombehu niha supí tuprí vahe ité. ³⁴ Yepe ahe supí eté viña, che rumo ndayeroyai ava tēi che mombhusa rese. Che rumo aipota peñepisiro água. Sese aipo ahe pēu. ³⁵ Juan niha inungar tataendi, ēgüe ehi omboyecua mbahe supí eté vahe. Sese pe peyembovīha raimi tēi iporombohesa tesapesa nungar pipe peico. ³⁶ Che rumo areco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo água. Co mbahe ayapo vahe, ahe ité omboyecua che Ru Tūpa che mbousar. ³⁷ Iyavei che Ru avei eté che cua ucasar. Ahe ñehe rumo ndapesendui vahe ité, iyavei ahe ndapesepiai eté. ³⁸ Ñehengagüer icuachiapri avei ndoiquei eté pe rese. Ipipe niha ndache reroyai eté peye che Ru che mbose. ³⁹ Pe peicua tuprí pota icuachiapri ‘icuapa tuprí pipe revo tecovesa apirēhi yarecora’ peye viña. Co rumo cuachiar che mombehu vahe: ⁴⁰ pe rumo ndapeyu potai eté cheu co tecovesa apirēhi rereco água.

⁴¹ “Ndaipisii eté ava che mboeteisa tēi. ⁴² Iyavei opocua Tūpa ndapesaisuisse. ⁴³ Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tēi oñehe vahe, evocoi nungar tēi peroyara. ⁴⁴ Ndapeicatui eté che reroya água peye. Esepia, pe ae tēi peyemboetei; ndapesecai eté Tūpa ñepeí vahe suindar yemboeteisa. ⁴⁵ Ndapepīhañemoñetai chira che pe recocuer mombehu água rese che Ru rovai. Moisés peroya vahe ité niha oicuachía pe Tūpa reroyaēhisa chupe imombehu água. ⁴⁶ Peroyase rumo Moisés ñehe viña, che avei che reroyara peye viña. Esepia, Moisés niha oicuachía che resendar ñehesa. ⁴⁷ Ndaperoyaise ahe sembicuachía, evocoyase ndapeicatui chietera che remimombehu reroya água” ehi Jesús oamotarēhimbar upe.

6

Jesús oyopoi cinco mil ava

¹⁻⁴ Ipare Pascua pieta ñipimi aipo Jesús osasa ipa Galilea serer vahe oso, ahe serer avei Tiberias. Ava rehii avei yuviraso saquicuei. Esepia, osepia ité yuvireco oyapose mbahe poromondiisa guasu imbaheasi vahe mbogüerese. Oyepotase ivi rese yuviraso, evocoyase oyeupi ivitri rese. Aheve oguapi opacatu güemimbohe eta reseve yuvinoi. ⁵⁻⁶ Omahese ava rehii oyeupindar rese, ahese aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoãhasave.

Ahe rumo oicua ité mbahe güembiaporã. ⁷ Evocoiyase Felipe ombovevi chupe:

—Dosciento denario pan ndosupitii chietera que chĩhi-chĩhimi ava retacuer viña —ehi.

⁸ Aipo hese, ñepeí semimbohe pãhu pendar, Simón Pedro rivri, Andrés aipo ehi chupe:

⁹ —Co chĩhivahe viereco cinco pan, iyavei ñuvirío pira, ¿iyacatura vo co ava retacuer? —ehi.

¹⁰ Evocoiyase aipo ehi:

—Pemombehu opacatu upe toguapi yuvireco —ehi güemimbohe upe.

Capihi reimesave opa omboguapi yuvireco cinco mil ava. ¹¹ Evocoiyase oipisi cinco vahe pan, “Aviye ndeu” ohe pare Vu Tũpa upe, opa ombohi-mbohi imondo ava rehii upe. Ëgüe ehi avei pira upe, imondopa semimbotar rupi-rupi yuvireco.

¹² Opase ava ihĩtaro,

—Pemonuhapa sumbirer iyemombucaẽhi ãgua —ehi güemimbohe upe.

¹³ Evocoiyase omonuha doce iruova sumbirer yuvireco pan cincomi vahe sui. ¹⁴ Evocoiyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Oura Tũpa ñehe mombehusar ivi pipe” ehi icuachiapri aracahendar pipe —ehi yuvireco.

¹⁵ Jesús rumo oicuase ava opĩratasa pipe tẽi güeraso pota ãgua mborerecuar guasu viereco ãgua oyeupe nara yuvireco, ahese oyeupi iri oso ivate catu. Aheve ahe ae güeco ãgua.

Jesús oguata i hari rupi

¹⁶ Pĩtu ramose ogüeyi yuviraso Jesús remimbohe ipave, ¹⁷ yuviroha carite pipe sasa ãgua yuvireco tecua Capernaum ve yuviraso. Ahese pĩtu ité. Jesús rumo ndoyevi vitei eté.

¹⁸ Ahese oipeyu pĩrata ivitu, i avei ohitu pĩrata. ¹⁹ Yuviraso pucumi tẽi cinco, anise seis kilómetro rupi. Ahese osepia Jesús yuvireco osupiti senise carite. Ahe i hari rupi oguata oso chupe. Evocoiyase osiquiye ité yuvireco ichui. ²⁰ Ahe rumo aipo ehi güemimbohe upe:

—¡Che Jesús aico, pesiquiyei rene! —ehi.

²¹ Evocoiyase sorivete yuvireco carite pipe seroha. Iparemi tẽi oyepota yuviraso oyuvirasosave.

Ava eta oseca Jesús

²² Ahere ayihive ava rehii opita vahe sovai yuvireco, “Semimbohe año rumo yuviraso ñepeí vahe carite pipe. Jesús rumo ndosoi eté güemimbohe rupi” ehi tẽi yuvireco.

²³ Aheseve rumo ambuae carite viroyepota seru yuvireco

tecua Tiberias pendar, acoi Jesús ava remihura pan reroyeroqui agüer rerovicave. ²⁴ Evocoyase ava rehi oicuase Jesús semimbohe reseve iporêhise yuvireco, yuviroha yuviraso âgua co ambuae carite pipe tecua Capernaum ve seca.

Jesús, pan nungar, tecovesa apirêhi vahe secoi

²⁵ Oyepotase ava rehi ipa rovai, aheve osepia Jesús yuvireco.

—Ore mbohesar, ¿marase vo ereyepota cohave? —ehi yuvireco chupe.

²⁶ Evocoyase aipo ehi chupe:

—Supi eté aipo ahe pëu. Pe rumo che reca peye che pe mbocarusa rese têi, ndahei co che poromondiisa reroyasave ité peico pota che rupi. ²⁷ Pe poraviqui eme catu tembihu ndasecosei vahe rese; iyacatu rumo pe poraviqui tembihu secose vahe rese omondo vahe tecovesa apirêhi. Co tembihu che, Ava Riquehir, amondora pëu. Esepia, che Ru Tüpa omboyecua ité che ichuindar aicose —ehi.

²⁸ Aipo hese,

—¿Mbahe mboraviqui vo oroyapora Tüpa upe? —ehi yuvireco.

²⁹ —Tüpa oipota pe che reroyara peye che semimbou che recose —ehi ava eta upe.

³⁰ Evocoyase,

—¿Mbahe poromondiisa vo eremboyecua irimira oreu orosepia vahe rã nde reroya tupri catu âgua? ³¹ Esepia, aracahe ore ramoi eta yuvirohu ivi iporupirêhisa rupi. Icuachiapri aracahendar pipe omombehu: ‘Omondo pan iva pendar semihura’ ehi —ehi ava eta yuvireco chupe.

³² —Supi eté amombehu pëu: ndahei Moisés omondo pan iva pendar chupe, che Ru rumo omondo chupe. Cüritei che Ru ombou pëu pan supi eté vahe iva sui. ³³ Esepia, co pan ombou vahe Tüpa iva suindar ité. Ahe omondora tecovesa ivi pipendar upe —ehi ava eta upe.

³⁴ Evocoyase,

—Ore mbohesar, embouño catu co pipe suive aipo pan oreu —ehi yuvireco chupe.

³⁵ —Che ité ahe pan aico tecovesa mondo âgua. Acoi ou vahe cheu ndiyumbiasi iri chietera iyavei acoi che reroya vahe ndihusei chiaveira. ³⁶ Aipo ahe niha acoi pëu. Yepe pe che repia peye viña, pe rumo ndache reroyai eté peye. ³⁷ Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui. ³⁸ Esepia, ndayui iva sui mbahe che remimbotar apo âgua têi; ayu rumo che mbousar porocuita apo âgua. ³⁹ Che Ru che mbousar

ndoipotai que ñepeí ava ombou vahe cheu amocañira. Ahe semimbotar rumo che ambogüerayevira ahe arí ipa vahe pipe.
⁴⁰ Che Ru oipota avei opacatu ava oyeroya vaherã che, Tũpa Rahír, che recosa rese. Ipipe vireco aveira tecovesa apirẽhi vahe yuvireco. Supi eté ambogüerayevira arí ipa vahe pipe curi —ehi ava eta upe.

⁴¹ Evocoiyase judío eta oñehe-ñehe tẽi sese yuvireco, “Che pan aico, agüeyi vahe íva sui” ihesa rese ⁴² aipo ehi:

—Co niha acoi Jesús, José rahír. Yande yaicua ité tu, ichi avei. ¿Mahera ru, “Che agüeyi vahe íva sui” ehi no? —ehi yuvireco chupe.

⁴³ Evocoiyase judío eta upe aipo ehi:

—Pepoiño che reroĩrosa sui. ⁴⁴ Ndipoi chietera que oicatu vahe ou cheu, nomonguerẽhiise che Ru che mbousar; omonguerẽhi vahe rumo oicatu yugüeru cheu. Ahe ambogüerayevira arí ipa vahe pipe. ⁴⁵ Tũpa ñehe mombehusar cuachiar pipe aipo ehi: ‘Tũpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

⁴⁶ “Ndipoi eté que ñepeí ava osepia vahe che Ru; acoi ichui ou vaheño ité, ahe güeraño tupri ité osepia. ⁴⁷ Supi eté aipo ahe pẽu: acoi che reroya vahe vireco tecovesa apirẽhi. ⁴⁸ Che pan nungar aico amondo vahe tecovesa. ⁴⁹ Aracahe pe ramoí eta niha yuvirohu ité tembihu maná serer vahe ivi iporupirẽhisa rupi. Ahe rumo opa iriño ité omano yuvireco. ⁵⁰ Che rumo añehe pan íva sui ogüeyi vahe rese, acoi ava ohu vahe, nomanoi chietera. ⁵¹ Ahe pan oicove vahe niha che aico íva sui ogüeyi vahe; acoi ohu vahe co pan, oicovera apirẽhi vaherã ité. Co pan amondo vaherã, ahe che rete ité. Ahe amondora ava recocuer rese” ehi judío eta upe.

⁵² Aipo hese, judío rereciar oyecopi-copi yuvireco aipo ehi:

—¿Mara ehira vo aipo co imbou tẽi güete yande tohu viña? —ehi yuvireco.

⁵³ —Supi eté aipo ahe pẽu: ndapehuisse Ava Riquehir rete, ndapehuisse avei suvi, ndaperecoi chietera tecovesa. ⁵⁴ Acoi ohu vahe che rete, oihu vahe avei che ruvi, vireco tecovesa apirẽhi iyavei che ambogüerayevira arí ipa vahe pipe. ⁵⁵ Esepia, che rete supi eté vahe tembihu; che ruvi supi eté vahe avei igua. ⁵⁶ Acoi ohu vahe che rete, oihu vahe avei che ruvi, secoi che rese, che avei aico sese. ⁵⁷ Che Ru, che mbousar, vireco tecovesa. Ichui che aicove; ãgüe ehi aveira che husar che sui yuvirecovera. ⁵⁸ Añehe pan íva sui ogüeyi vahe rese. Co pan ndahei maná pe ramoí eta yuvirohu vahe nungar. Esepia, yande ramoí opaño ité omano yuvireco. Acoi

ohu vahe rumo co che rete, oicovera apirēhi vaheṛā ité —ehi ava eta upe.

⁵⁹ Jesús oporombohe co mbahe rese judío ñemonuhasave tecua Capernaum ve.

Ñehesa tecove apirēhisa resendar

⁶⁰ Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombohe yavai eté seroya āgua; ¿ava vo viroya tēira viña? —ehi yuvireco.

⁶¹ Jesús rumo oicua voi eté ñehe-ñehe tēise co mbahe rese yuvireco, evocoyase oporandu:

—¿Pemboasiño tie che ñehe? ⁶² ¿Mara peyera pīha che repiase peye che, Ava Riquehir, ayeupise che reco agüerve vicho viña?

⁶³ Espíritu ité niha omondo tecovesa; yande retecuer rumo ēgüe ehi tēi vahe. Co amombohe vahe pēu ahe espíritu iyavei tecovesa. ⁶⁴ Oime vite rumo amove pe pāhuve ndache reroyai vahe —ehi ava rehii upe.

Esepia, Jesús oicua ité yipisuive uma ndoviroyai chira, oicua avei uma ava omondora yamotarēhimbar upe ⁶⁵ aipo ehi:

—Sese niha acoi aipo ahe pēu: “Ndipoi chietera que ava ou vaheṛā cheu che Ru nomonguerēhiise imbou” ahe —ehi.

⁶⁶ Ichuive tupri Jesús rupi oguata vahe setá oseya yuvireco; ndoguata iri eté yuvireco supi. ⁶⁷ Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboyevi chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirēhi vahe. ⁶⁹ Ore nde reroyasar ité oroico iyavei oroicua nde ndaseco marai vahe, Tūpa supi eté vahe remimbou ereico —ehi Pedro chupe.

⁷⁰ —Che niha opoporavo doce peico vahe, ñepeí rumo pe pāhu pendar caruguar ité —ehi Simón upe.

⁷¹ Jesús oñehe Simón Iscariote rahir, Judas, rese. Yepe doce semimombohe pāhu pendar viña, ahe rumo omondora ava yamotarēhimbar upe.

7

Jesús ndoviroyai tivri yuvireco

¹ Ipare Jesús oguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco. ²⁻³ Virovise judío pieta guasu teyupa apo āgua yuvireco, ahese tivri aipo ehi yuvireco chupe:

—Erepita eme cohave. Eso ivi Judea ve; ahe pendar nde rupi oguata vahe avei tosepia poromondiisa nde rembiapo

yuvireco. ⁴ Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

⁵ Seroyaëhisave tēi avei tivri aipo ehi yuvireco chupe.

⁶ Evocoyase vivri upe aipo ehi:

—Ndehi vitei rumo ari che so ãgua. Pe guata ãgua rumo opacatu ariño tēi aviye. ⁷ Esepia, pe ndape amotarēhi eté ava co ivi pipendar; che rumo che amotarēhi ité yuvireco. Esepia, che amboyecua ité mbahe sembiapo naporai vahe chupe. ⁸ Pesoño pe pieta repia; che rumo ndaso vitei chira. Esepia, ndosupiti vitei ari cheundar —ehi vivri upe.

⁹ Evocoyase Jesús opitaño Galilea ve.

Jesús oso omu judío eta pietasave

¹⁰ Vivireta so pare, Jesús avei oso pietasave. Ndoyemboyecuai eté rumo ava upe. ¹¹ Judío eta oseca tēi yuvireco pietasave aipo ehi:

—¿Que pñha acoi mbia? —ehi tēi yuvireco.

¹² Ava rehii pñhuvé setá iteanga oñehe yuvireco sese. Amove aipo ehi yuvireco: “Ahe mbia aviye vahe”; ambuae rumo aipo ehi: “Ndahei aviye vahe; ahe rumo ombopa tēi vahe ava” ehi yuvireco.

¹³ Nomboyecuai eté rumo oñehe yuvireco sese güereciar sui osiquiyepave.

¹⁴ Pieta mbiterse, Jesús aviyeteramo tēi oi que ava pñhuvé tūparo pipe ava mbohe. ¹⁵ Judío eta rereciar evocoyase,

—¡Too, mara ehi rutei! —ehi tēi—. ¿Mara ehi vo co mbahecuá iteanga? ¡Ndoyembohei vahe niha yande yeroquisave! —ehi tēi yuvireco.

¹⁶ Judío rereciar upe rumo aipo ehi:

—Che porombohesa ndahei cheyesuindar tēi, ahe rumo che mbousar suindar —ehi—. ¹⁷ Que ñepei pe pñhu pendar oyapo potase Tūpa remimbotar, oicuará che porombohesa ndahei vahe che suindar, ahe Tūpa suindar ité. ¹⁸ Esepia, acoi ava oñehe vahe oyesui tēi, ahe ‘tache mboetei ava yuvireco’ ohesave tēi ãgüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

¹⁹ “Moisés niha omondo tēi mborocuita pñeu. Que ñepei pe pñhu pendar rumo ndipoi eté omboyeroa vahe. ¿Mahera ru che yuca pota peye?” ehi.

²⁰ —¡Nde ererere caruguar ndeyese! ¿Ava vo nde yuca pota? —ehiño ava eta yuvireco chupe.

²¹ Aipo ehi ava upe:

—Cuese acoi ayapose mbahe mb̄ituhusa ari p̄ipe, ahese, “¡Too, mahera ěgũe ehi!” peyeño acoi cheu. ²² Pe avei rumo amove peporav̄iqui mb̄ituhusa ari p̄ipe peporombocircuncidase porocuita Moisés omondo vahe reroyasave. (Ahe circuncisión rumo ndahei Moisés suindar, ahe rumo ȳip̄ive vahe pe ramoi suindar ité.) ²³ Oyepotase rumo ch̄ihivahe mbocircuncida āgua mb̄ituhusa ari p̄ipe tupri p̄ēu, peyapoño rane ité mborocuita mboaviye āgua. ¿Mahera ru cheuño pemboasi ñepe mb̄ia mb̄ituhusa ari p̄ipe ambogüera tupri vahe rese? ²⁴ “Oyavi evocoi” peye voi rene catu ava upe; peicua tupri rane ‘¿supi eté p̄iha?’ pe yapave —ehi Jesús ava eta upe.

Jesús oñhe güecocuer Tũpa suindar rese

²⁵ Evocoyase amove Jerusalén pendar mb̄ia aipo ehi oyeupe yuvireco:

—¿Ndahei vo acoi co oseca t̄ei yuca āgua yuvireco? —ehi—. ²⁶ Ahe ité co niha co ava p̄āhuve oñhe oico, ndipoi eté que mara ehi vahe yuvireco chupe. ¿Omoha p̄iha mborereciar co mb̄ia Porop̄isrosar seco āgua yuvireco? ²⁷ Yande rumo yaicua que sui turi. Acoi ouse rumo Porop̄isrosar ité coiye, ndipoi chietera que ava oicua vahe iyusa —ehi yuvireco.

²⁸ Evocoyase aipo renduse oporombohe v̄iteseve tũparove, oñhe p̄irata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui t̄ei. Oime rumo che mbousar, ahe seroyapri ité. Ahe pe ndapeicuai vahe. ²⁹ Che rumo aicua ité. Esepia, che ichui ayu iyavei ahe ité che mbou p̄ēu —ehi.

³⁰ Aipo ihese, oip̄isi pota yuvireco soquenda āgua viña. Aní eté rumo. Esepia, ndoyepota v̄itei ihari chupe. ³¹ Setá iteanga rumo ava v̄iroya iyavei aipo ehi yuvireco:

—Ouse Porop̄isrosar, ¿oyapo catura p̄iha mbahe poromond̄isa co mb̄ia sui? —ehi yuvireco.

Fariseo oyocuai sundao tũparo r̄ārosareta Jesús p̄isi āgua

³² Fariseo eta osendu ava ñehesa Jesús resendar yuvireco. Ahe ité iyavei pahi eta rereciar omondo sundao tũparo r̄ārosar Jesús p̄isi āgua yuvireco. ³³ Jesús rumo aipo ehi:

—Aicove v̄itemira pe rese ch̄ih̄i rupive. Ipare voi ayevira che mbousar p̄iri vicho —ehi—. ³⁴ Che reca t̄eira peye, ndapeicatui chietera rumo che reca. Esepia, ndapeicatui chaveira peso vahe r̄a che recosave —ehi ava eta upe.

³⁵ Evocoyase judío oporandu-randu oyeupe yuvireco:

—¿Que p̄iha aipo osora yande sui seca iriēhi āgua? ¿Osora tie que amombri yande mu oñemosai vahe p̄ahu rupi ambuae

ava ndahei vahe yande mu mbohe ãgua? ³⁶ ¿Mara oya pïha evocoyase aipo, ‘Che reca tẽira peye, ndapeicatui chietera rumo che reca. Esepia, ndapeicatui chiaveira peso vaheřa che recosave’ ehi yandeu? —ehi-ehi tẽi oyeupe yuvireco.

Espıritu iai ndopai vahe nungar

³⁷ Pieta ipa, ahe imboeteisa catu vahe, ahe ari pipe Jesús oñehe pırata ohã aipo ehi:

—Acoi que ava ihusei vahe, toyugüeru cheu. Che evocoyase tamboihu —ehi—. ³⁸ Esepia, inungar aipo ehi vahe icuachiapri pipe, che reroyasar pıha sui osẽra iai ndopai vahe nungar —ehi.

³⁹ ‘Che reroyasar oipısira Espıritu curi’ ohesave aipo ehi. Espıritu rumo ndou vitei ahese. Esepia, Jesús ahese ndoyevi vitei avei güecosa porañetesave.

Ava rehii oyemboyaho Jesús recocuer sui yuvireco

⁴⁰ Osenduse ava rehii aipo nungar, amove aipo ehi:

—Supi eté co mbıa Tũpa ñehe mombehusar imombehupri ou vahe —ehi yuvireco chupe.

⁴¹ Ambuae aipo ehi:

—Co Poropısirosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tẽi oura Poropısirosar viña? —ehi—. ⁴² Icuachiapri pipe rumo aipo ehi Poropısirosar oyesura mborerecuar guasu David sui iyavei ahera Belén pendar, David recua pendar itera —ehi.

⁴³ Evocoyase ava oyemboyaho-yaho yuvireco Jesús recocuer sui tẽi. ⁴⁴ Amove ava viraso pota tẽi yuvireco soquenda; ndipoi eté rumo ěgüe ehi vahe yuvireco chupe.

Judıo rerecuar ndoviroyai Jesús yuvireco

⁴⁵ Sundao tũparo rãrosar oyeve yuvireco Jesús recosa sui. Fariseo eta iyavei pahi eta rerecuar evocoyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

⁴⁶ Sundao tũparo rãrosar evocoyase aipo ehi:

—¡Ndipoi eté que ava oñehe vahe ahe mbıa nungar! —ehiño yuvireco.

⁴⁷ Fariseo eta iyavei mborerecuareta evocoyase aipo ehi yuvireco:

—¿Pe avei eté rumo peymbopa uca chupe? —ehi—.

⁴⁸ Ndipoi eté niha ore mboetasa mborerecuar iyavei fariseo viroya vahe yuvireco. ⁴⁹ Co ava rehii tẽi ěgüe ehi yuvireco. Ahe rumo ndoicuai vahe Tũpa porocuita yuvireco, sese iñemoirosavrive ité yuvirecoi —ehi sundao tũparo rãrosar upe yuvireco.

⁵⁰ Evocoyase Nicodemo, acoi oso vahe pĩtu pĩpe Jesús piri, ahe avei eté fariseo pãhuve secoi, ahe aipo ehi:

⁵¹ —Yandeundar porocuita mboaviye ãgua ndiyai, “Ereyavi mbahe” yahe voĩño tẽi que ava mbahe sembiapocuaẽhi viteseve —ehi.

⁵² Evocoyase ombovevi yuvireco:

—¿Nde avei tie ereico Galilea pendar? Eyembohe tupri icuachiapri pĩpe. Ipipe eresepiara ndipoi eté que ñepei ou vahe Galilea sui Tũpa ñehe mombehugar —ehi mborere-cuareta Nicodemo upe yuvireco.

Cuña oyemboaguasa tẽi vahe resendar

⁵³ Ipare opa yuviraso ñepei-peĩ güẽta rupi.

8

¹ Jesús rumo oso ivitri Olivo ve. ² Ahere ayihive cõhese, oyevi tũparove. Ahese opacatu ava oyemboya yuvireco sese. Ahe evocoyase oguapĩ oĩ oporombohe.

³ Evocoyase Moisés porocuita rese oporombohe vahe, fariseo eta avei güeru Jesús upe cuña oyemboaguasa tẽi vahe yuvireco ava rehii rovai, ⁴ aipo ehi yuvireco chupe:

—Pporombohesar, co cuña iyemboaguasase cuimbahe rese osesapiha ñepei ava. ⁵ Moisés porocuita rumo ore cuai co nungar cuña yuca ãgua ita pĩpe. ¿Mara ere vo catu nde co nungar upe? —ehi fariseo eta yuvireco chupe.

⁶ Ahe rumo secoãhasave tẽi aipo ehi yuvireco ‘toyavi angahu oñehe yandeu’ oya tẽi. Ahe rumo oyaivi, ombahecuachía ocuã pĩpe ivi rese. ⁷ Evocoyase oporandu vitese ava yuvireco, opũha aipo ehi:

—Que ñepei pe pãhu pendar ndoyemboangaipai vahe, ahe rane toyapĩ ita pĩpe —ehi.

⁸ Oyaivi iri, ombahecuachía ivi rese. ⁹ Osenduse rumo judío rerecuareta, omboipĩ ñepei-peĩ yuvinose yuvireco, cuacua catu vahe sui rane yuvinose. Opacatu yuvinosepase, Jesús güerañomi cuña rese opita yuvireco. ¹⁰ Evocoyase opũhase, ahese aipo ehi chupe:

—Cuña, ¿que que ru ava? ¿Ndipoi eté que ñepei opita vahe nde mocañi ãgua? —ehi

¹¹ —Aní eté, che Yar, ndipoi eté —ehi.

Evocoyase aipo ehi chupe:

—Che avei ndoromocañi tẽi potai. Sese cũritei eso, ereyapo iri eme angaipa —ehi cuña upe.

Jesús tesapesa ava upe secoi

¹² Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirẽhi vahe iyavei

ndaseco iri chietera pĩtumimbisa nungar mbahe-mbahe tẽi vahe pipe —ehi.

¹³ Evocoyase fariseo eta aipo ehi yuvireco:

—Nde ereñehe ndeyese ae tẽi. Sese nde ñehesa ndaseroy-aprii eté —ehi yuvireco chupe.

¹⁴ —Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté. ¹⁵ Pe peseca ava rembiapo cua tupri ãgua ava tẽi pihañemoñeta rupi. Che rumo ndayui evocoi nungar mbahe apo. ¹⁶ Asecase ava rembiapo cua tupri ãgua, ahe supi tupri vahe ité. Esepia, ndahei che ae tẽi egũe ahe, che Ru, che mbousar rumo secoi che rese. ¹⁷ Porocuita pẽu icuachiapri pipe aipo ehi: “Que oimese ñuvirio ava oyoya tupri omombehu vahe mbahe, ahese voi seroyasara” ehi. ¹⁸ Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

¹⁹ Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuara viña —ehi fariseo eta upe.

²⁰ Jesús aipo ehi tũparo pipe, guarepochi monuhapri riru ipive oporombohe ohã. Ndipoi eté rumo ahese osoquenda vaherã. Esepia, ndoyepota vitei eté ahese ihari chupe.

Jesús, “Che sosave pe ndapeicatui chira peso” ehi

²¹ Jesús aipo ehi iri:

—Che asose, che reca tẽira peye. Pe rumo opara pemanu pe angaipa reseve. Che sosave ndapeicatui chietera peso vaherã —ehi.

²² Aipo ihese, judio eta aipo ehi yuvireco:

—¿Oyeyucara pĩha ahe ae; ayeve pĩha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tẽi avei peico; che rumo ndahei eté co ivi pipendar aico. ²⁴ Sese niha acoi aipo ahe pẽu: “Pemanopaño itera pe angaipa reseve” ahe. Esepia, ndache reroyaise peye, pe angaipa reseve ité pemañora —ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuive niha acoi amombehu vichico pẽu. ²⁶ Setá iteanga areco che ñehe ãgua pẽu mbahe pe rembiavi rese. Che mbousar niha supi eté vahe. Ahe iñehe asendu vahe, amombehu opacatu ava upe —ehi fariseo eta upe.

²⁷ Ahe rumo ndosenducuai eté Vu rese iñehese yuvireco.
²⁸ Sese aipo ehi fariseo upe:

—Pesupise rumo Ava Riquehir ivira rese, ahese voi peicuara che recocuer, ahese avei peicuara cheyesui tēi mbahe ndayapoise; che rumo amombehu che Ru che mbohesa güeraño. ²⁹ Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

³⁰ Aipo ihese, setá iteanga ava viroya yuvireco.

Ava Tūpa rahir ité yuvirecoi vahe iyavei ava angaipa pipe tēi yuvirecoi vahe

³¹ Evocoyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe. ³² Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

³³ Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tēi. ¿Mahera ru aipo nde, “Pesēra mbiguai nungar pe recosa sui” ere oreu? —ehiño judío eta yuvireco chupe.

³⁴ Evocoyase aipo ehi:

—Supi eté aipo ahe pēu: acoi opacatu ava oyemboangaipa vahe, inungar mbiguai tēi, ñgüe ehi oangaipa rereco yuvireco.

³⁵ Mbiguai tēi ndahei güereciar rēta pipe nara ité; tahir rumo opitaño itera güēta pipe nara. ³⁶ Sese Tahir pe renosese mbiguai tēi pe recosa sui, supi eté ndapeico iri mbiguai nungar. ³⁷ Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe. ³⁸ Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

³⁹ —¡Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña. ⁴⁰ Che rumo, “Tūpa che mbohe mbahe supi eté vahe rese” ahe tēi pēu. Pe evocoyase che yuca potaño ité peye. ¡Abraham rumo ndoyapoi eté co nungar mbahe!

⁴¹ Esepia, pe peyapo mbahe peyesupa rembiapo tēi eté —ehi.

Evocoyase ava aipo ehi yuvireco:

—¡Ndahei rumo ore oyesu tēi vahe oroico; ore rumo orovireco ñepeño ité ore yesupa, ahe Tūpa! —ehiño yuvireco.

⁴² Evocoyase aipo ehi co judío eta upe:

—Tūpa ité pe yesupase rumo, che raisura peye viña. Esepia, che ayu Tūpa sui. Sese cūrítei cohava aico. Ndahei cheyesui tēi ayu, Tūpa rumo che mbou. ⁴³ ¿Mahera pīha ndapesenducua

catui eté mbahe che remimombehu? Esepia, ndapeyapísaca potai eté che ñehe rese. ⁴⁴ Peyesupa niha Caruguar ité, sese niha pe ahe tupri avei peico. Peyapo pota mbahe seminbotar tēi. Esepia, Caruguar yipisuive ité oporoyuca serai vahe. Ndoyapoi vahe ité mbahe supi tupri vahe, noñehei avei mbahe supi eté vahe rese. Semirasa iñehe ité. Esepia, semirañete ai vahe ité; ahe ité niha yipindar semira tēi vahe. ⁴⁵ Che rumo añehese mbahe supi tupri vahe rese, ndache reroyai eté peye. ⁴⁶ ¿Ava pīha pe pāhu pendar oicua mbahe che rembiavi? ¡Aní eté! Che añehe mbahe supi eté vahe rese pēu, ¿mahera ru evocoyase ndache reroyai eté peye? ⁴⁷ Acoi ava Tūpa suindar, ahe osendu pota rai iñehe; pe rumo ndahei eté Tūpa suindar peico. Sese ndapesendu potai eté iñehe —ehi Jesús judío eta upe.

Poropĩsirosar yipive catu vahe Abraham sui

⁴⁸ Evocoyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, caruguar ité erereco ndeyese —ehi yuvireco chupe.

⁴⁹ —Che ndarecoi eté caruguar cheyese. Che rumo che Ru amboetei; pe rumo ndache mboetei eté peye. ⁵⁰ Iyavei che ndasecai ava che mboetei āgua. Oime rumo ñepeí oipota vahe. Ahe niha omondora ava rembiapo repri chupe. ⁵¹ Supi eté aipo ahe pēu: acoi omboyeroya vahe che ñehe, nomanoi chietera yuvireco —ehi judío eta upe.

⁵² Evocoyase judío omboyeví yuvireco chupe aipo ehi:

—Cūritei oroicua ité cute nde ererecose caruguar ndeyese. Esepia, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere? ⁵³ ¿Nde tie ivate catu ereico ore ramoi Abraham sui? Esepia, ahe omano ité iyavei ambuae Tūpa ñehe mombehusar omanopa ité yuvireco. ¡Mbahe angahu vo co evocoyase eremoha ndeyese! —ehi yuvireco chupe.

⁵⁴ —Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye. ⁵⁵ Pe rumo ndapeicuai eté. Che rumo aicua. “Ndaicuai” ahese, evocoyase semirañete ai vahe aicora viña inungar pe peico. Che rumo supi eté aicua. Sese niha amboyeroya iñehe. ⁵⁶ Esepia, pe ramoi Abraham oyembovīha ‘asepiara ihari oyepotase’ oya cheu. Osepia ité niha. Sese oviharete ité —ehi judío eta upe.

⁵⁷ Evocoyase judío eta:

—¿Mara erera vo aipo Abraham repia ndererecomi vīteise cincuenta aravīter? —ehiño yuvireco chupe.

58 —Supi eté aipo ahe pëu: che aicove vahe Abraham yesuëhi vitesese —ehi.

59 Aipo ihese, oipisipa ita yuvireco yapi ãgua. Ahe rumo ahe ramoseve oñemi ava eta pâhuve, osëño ité oso tũparo sui.

9

Jesús ombogüera mbia ohasa suive ndasesapisoi vahe

¹ Jesús oguatase ocar rupi, osepia mbia ohasa suive ndasesapisoi vahe. ² Ore semimbohe oroico vahe, oroporandu chupe:

—Ore mbohesar, ¿mahera pñha co mbia ndasesapisoi eté oha? ¿Oyesupa angaipa sui pñha? ¿Oangaipa sui ae tie? —orohe chupe.

³ —Ndahei eté oangaipa sui, ndahei avei oyesupa angaipa sui; co rumo ëgüe ehi Tũpa mbahe sese mboyecua ãgua. ⁴ Sese oime vitesese ari yandeu che mbousar poraviquisa apo ãgua, iya ité ahe yayapo. Esepia, pñtura, ahese ndayaicatui chietera mbahe apo. ⁵ Co ivi pipe che recove vitesese rumo, che aico ava upe tesapesa nungar —ehi oreu.

⁶ Aipo ohe pare, ondivi ivive, güendi pipe omoaqui vahe ivi omondo ndasesapisoi vahe resa rese. ⁷ Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi).

Ndasesapisoi vahe evocoyase oso, oyovai. Oyevise ichui, omahe tupri ité. ⁸ Evocoyase sêta ivirindar iyavei ava oicua vahe sesapisoëhise oporanduse guarepochi rese aipo ehi yuvireco:

—¿Ndahei vo acoi co oguapi oñ guarepochi rese oporandu yepi? —ehi yuvireco.

⁹ Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Avíye tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

¹⁰ Evocoyase oporandu yuvireco chupe:

—¿Mara ere vo co esareco? —ehi.

¹¹ —Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoyase aso, ayovaise, ahese amahe tupri ité —ehi.

¹² —¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güeta cotindar uve.

Fariseo oporandu ndasesapisoi vahe cuera agüer rese yuvireco

13-14 Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera água. Sese viraso ndasesapisoi vahecuer fariseo eta rovai yuvireco. ¹⁵ Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqui vahe che resa rese. Ichui ayovai. Ipare voi asareco —ehi.

¹⁶ Evocoyase ambuae aipo ehi yuvireco chupe:

—Aipo mbia ndahei eté revo Tüpa suindar. Esepia niha, nomboeteci eté mbituhusa ari —ehi yuvireco.

Ambuae evocoyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyeavirati tēi ipihañemoñetasa. ¹⁷ Sese oporandu iri ndasesapisoi vahecuer upe yuvireco aipo ehi:

—Nde no, ¿mara ehi nde pihanemoñeta co mbia rese? —ehi.

Ahe evocoyase aipo ehi:

—Che amoha ité Tüpa ñehe mombehusar secose —ehi.

¹⁸ Ahe fariseo rumo ndoviroyai eté icuerasa yuvireco, oichoho uca rane ité iyesupa yuvireco. ¹⁹ Chupe oporandu aipo ehi:

—¿Pe rahir ité vo co? ¿Ndasesapisoi oha? ¿Mara ehi vo co cūrítei osareco no? —ehi iyesupa upe yuvireco.

²⁰ —Ore rahir ité niha co, ndasesapisoi oha. ²¹ ¿Mara ehi vo catu co cūrítei osareco? iyavei ¿ava vo catu ombogüera? ¡Ndroicuai eté! Peporandu chupe. Ocuacua niha; ahe ae oicua ucara pēu —ehiño iyesupa yuvireco fariseo upe.

²² Iyesupa rumo osiquiyepave tēi aipo ehiño yuvireco. Esepia, fariseo opa ité oyemoingatatu yuvireco ava “Jesús Poropīsirosar secói” ehi vahe oñemonuhasa sui ñepeí reseve imombo água. ²³ Sese niha iyesupa aipo ehiño yuvireco: “Peporandu chupe. Ocuacua niha” ehiño.

²⁴ Evocoyase fariseo güeru uca iri acoi mbia imbogüerapri yuvireco, aipo ehi yuvireco chupe:

—Emombehuño oreu Tüpa rovaque mbahe supi tupri vahe. Esepia, ore oroicua ité evocoi mbia angaipa viyar seco rese —ehi.

²⁵ Ahe evocoyase omboyevi chupe:

—Che ndaicuai eté angaipa viyar tie revo. Co güeraño catu che aicua: che ndacheresapisoi vahecuer aico; cūrítei rumo asareco —ehi.

²⁶ Evocoyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

27 —Amombehu niha acoi p̄u. Pe rumo ndache reroyai eté peye. ¿Mahera vo peipota amombehu vite vaheṛã p̄u? ¿Pe avei tie peguata pota supi? —ehi fariseo eta upe.

28 Aheſe oñehe rai t̄i yuvireco chupe:

—Nde ahe mb̄ia rupindar t̄i ereico. Ore rumo yande ramoi aracahendar Moisés rupi oroguata vahe. 29 Eſepia, oroicua ité T̄upa oñehese Moisés upe. Aipo mb̄ia rumo ndoroicuai eté que sui os̄e —ehi yuvireco chupe.

30 —¡Mara peye rutei pe ndapeicuai que suindar ahe! Che rumo che mbosareco. 31 Supi eté, yaicua T̄upa ndosendui eté ava angaipa viyar ñehe; ava omboeteisar iyavei viroyasar ñehe güeraño ité niha osendu. 32 Eſepia, ndipoi eté que avaño t̄i ava oyesu sui ndasesap̄isoi vahe ombogüera vahe. 33 Ahe rumo ndaheise T̄upa suindar ou vahe viña, ndoicatui chietera revo mbahe apo viña —ehi fariseo eta upe.

34 Evocoyase fariseo eta aipo ehi yuvireco chupe:

—¿Nde co oangaipa reseve oha vahe t̄i, ore mbohe pota mbahe rese eve? —ehi.

Ipare omose ñepeí reseve oñemonuhasa sui yuvireco.

Jesús reroyasar̄ehi ndasesap̄isoi vahe nungar t̄i

35 Jesús oicua ndasesap̄isoi vahecuer mombosa. Vupitise aipo ehi chupe:

—¿Ereyeroya nde Ava Riquehir rese? —ehi.

36 Mb̄ia evocoyase aipo ehi chupe:

—Che mbohesar, emombehumi cheu; tayeroya catu ru sese —ehi.

37 —Eremahe niha co sese; che ité ahe aico —ehi ndasesap̄isoi vahecuer upe.

38 Evocoyase mb̄ia oñenop̄iha sovai:

—Orov̄iroya, che Yar —ehi chupe.

39 Ichui aipo ehi:

—Che ayu co iv̄i pipe mbahe supi tupri vahe apo ãgua; ava ndasesap̄isoi vahe nungar upe mbahe supi eté vahe che Ru suindar mboyecua ãgua iyavei ava oicua t̄i vahe mbahe T̄upa suindar mboesap̄isōehi iri ãgua —ehi.

40 Evocoyase ambuae fariseo eta yuvirecoi vahe cõimi ichui osenduse aipo ñehesa, oporandu yuvireco chupe:

—¿Ore avei tie ndasesap̄isoi vahe nungar oroico? —ehi.

41 Evocoyase omboyev̄i ahe fariseo upe:

—Peicose ndasesap̄isoi vahe nungar viña, “Peyavi mbahe” ndehi chietera T̄upa pe angaipa rese p̄u viña. Pe rumo, “Ore oroicua tupri T̄upa suindar mbahe” peye t̄i. Sese T̄upa, “Peyavi mbahe” ehi eté p̄u —ehi Jesús fariseo eta upe.

10

Jesús ovesa rãrosar nungar

¹ “Supi eté aipo ahe pëu: acoi ava co coti rupi tēi yuviroique vahe ovesa rēta pipe, ahe imonda rai vahe tēi yuvirecoi. ² Oique vahe rumo oquendipi rupi eté, ahe sãrosar ité secoi. ³ Oquendipi rãrosar omboi chupe. Evocoiyase ovesa rãrosar oñhe serer rupi güeimba ovesa upe senose ãgua sēta sui. Ahe evocoiyase oicua iñhe yuvireco. ⁴ Güeimba ovesa renose pare oguata senonde; seimba ovesa evocoiyase oguata saquicuerive. Esepia, oicua ité iñhe yuvireco. ⁵ Ndoguatai eté rumo oyarēhi rupi yuvireco; yuvinoña-noñaño ichui. Esepia, ndoicuai eté iñhe” ehi ⁶ omboyoya güecocuer ovesa rãrosar rese. Ava rumo ndosenducuai eté yuvireco.

Jesús ava rãrosar aviye vahe

⁷ Evocoiyase Jesús aipo ehi iri: “Supi eté, aipo ahe pëu: che año ité oquendipi nungar aico ovesa upe. ⁸ Opatatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco. ⁹ Che rumo oquenda nungar aico. Acoi oique vahe che rupi, ahera ipisiropirã yuvirecoi. Iyavei inungar acoi ovesa oique vahe güeta pipe, ichui osē capihi reca ãgua igua yepi, ãgüe ehira che reroyasar yuvireco.

¹⁰ “Imonda rai vahe rumo omonda ãgua tēi ou, oporoyuca ãgua, mbahe mocañi ãgua tēi avei. Che rumo ayu ‘tovireco ava tecovesa ndopai vaherã ité yuvireco’ viya. ¹¹ Che ité ava rãrosar aviye vahe aico. Sese ayemoingatu tupri che recocuer mondo ãgua ava cheundar repirã; ¹² acoi guarepochi repirã tēi oporaviqui vahe rumo, osepiase mahembiar oñaro ai vahe, oseyapaño güemiaro, oña oso. Esepia niha, ovesa ndahei eté seimba, ndahei avei eté ahe sãrosar ité secoi. Evocoiyase mahembiar oñaro ai vahe omondi-mondii eté ipisi ãgua. ¹³ Evocoi mbia oñaño. Esepia, guarepochi repirã tēi oporaviqui. Sese niha ndosaisui eté güemiaro ovesa.

¹⁴⁻¹⁵ “Che rumo ava rãrosar aviye vahe ité aico; che Ru che cua ité. Che evocoiyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirã yuvireco. ¹⁶ Areco avei ambuae ité che reimba ovesa. Ahe avei aru pota che mboyeroya vaherã yuvireco. Ahese ñepi reseve guasu che remiaro yuvirecoira.

¹⁷ “Che Ru niha che raisu ité. Esepia, amondo itera che recocuer manosave. Ipare rumo acuerayevira. ¹⁸ Ndoicatu chira ava ahe ae tēi che yuca ãgua; che teieté rumo amondora che recocuer che remimbotar rupi eté. Che areco ité pĩratasa

imondo ãgua, che cuerayevi iri ãgua avei. Sese ité niha che Ru che cuai” ehi güemimbohe eta upe.

¹⁹ Osenduse judío eta aipo nungar ñehesa, opa ipihañemoñeta yoavirati yuvireco. ²⁰ Setá iteanga ipãhu pendar aipo ehi:

—¿Mahera vo co pemboyeroya? Vireco ité carugar oyese, ndayaracuai eté —ehi yuvireco chupe.

²¹ Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboesapiso tie carugar rerecosar ava? —ehi amove judío yuvireco Jesús upe.

Judío rerecuar ndoyambotai Jesús yuvireco

²² Ari sōhisa vahe pipe tecua Jerusalén ve tũparo rovasagüer pieta oyepota. ²³ Ahese Jesús oguata oico tũparo Salomón oyapo vahecuer rocupe ivii rupi. ²⁴ Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tupri ra Poropĩsiosar nde recosa oreu? Emombehu tupri catu ñepi reseve oreu —ehi yuvireco chupe.

²⁵ —Amombehu niha acoi pëu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropĩsiosar che recosa; ²⁶ pe rumo ndache reroyai eté peye. Esepia, pe ndahei eté che remiaro ovesa peico. ²⁷ Che remiaro ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco. ²⁸ Amondo avei tecovesa apirēhi yuvireco chupe icañiēhi ãgua; ndipoi chietera que ava virocua iri vaheñã che sui. ²⁹ Che Ru niha ombou cheu. Esepia, ahe ipĩrata catu opacatu ava sui. Ndipoi chietera que ñepi ava oicatu vahe serocua che Ru sui. ³⁰ Che Ru iyavei che oroico ñepiñõ ité —ehi judío rerecuareta upe.

³¹ Aipo ihese, judío rerecuareta osupipa iri ita yuvireco yapi ãgua. ³² Ahe chupe rumo aipo ehi:

—Setá mbahe poromondisa aviye vahe pe rovaque ayapo che Ru pĩratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

³³ Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo ãgüe orohera ndeu. Esepia, nde ereñehe rai tēi Tũpa rese. Nde moco ava tēi ereico. Nde rumo ereyeapo Tũpa ndeyeupe ae —ehi yuvireco chupe.

³⁴ Evocoyase aipo ehi ahe ava upe:

—Pëundar mborocuaita icuachiapri pipe niha aipo ehi: ‘Che aipo ahe pëu: pe tũpa pãve ité peico’ ehi. ³⁵ Yaicua niha icuachiapri pipendar ndiyai yayamotarēhi. Esepia, Tũpa aipo

ehi: ‘Pe tūpa pãve ité peico’ ehi evocoi ava oñehe pisisar upe.
³⁶ Che niha che Ru Rembiporavo aico. Ahe che mbou co ivi pipe. ¿Mahera ru evocoiyase, ‘Nde ereñehe rai tēi Tūpa rese’ peye cheu, ‘Che Tūpa Rahir aico’ ahese pēu? ³⁷ Esepia, acoi ndayapoise mbahe che Ru remimbotar, ahese ndache reroyai chietera peye viña. ³⁸ Yepe ndache reroyai chira che recocuer rese peye viña, mbahe ayapose rumo ahe tēi peroyara. Sese tapeicua ñepei reseve che Ru secoise che rese iyavei che sese che recosa —ehi oamotarēhimbareta upe.

³⁹ Osoquenda pota iri yuvireco viña; Jesús rumo osoño ipãhu sui.

⁴⁰ Oyevi iai Jordán rovai. Aheve acoi Juan yipindar oporoãpiramo. Aheve opita. ⁴¹ Ava rehii yuvirasos epia, aipo ehi yuvireco:

—Yepe Juan ndoyapoi mbahe poromondisa viña. Opacatu mbahe omombehu vahe rumo co mbia resendar supi eté —ehi yuvireco.

⁴² Setá iteanga ava Jesús viroya yuvireco aheve.

11

Lázaro mano agüer

¹ Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve.

² Ahe María, oipiyere vahe mbahe siacua vahe yande Yar pi rese. Ipare oiquiti oha pipe. ³ Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaherasisa rumo ndahei ahe imano ãgua ité. Ëgüe ehi rumo Tūpa reco porañetesa mboyecua ãgua iyavei Tahir reco porañetesa mboyecua ãgua avei —ehi.

⁵ Yepe osaisú iteanga Marta icupihir reseve iyavei iquivri Lázaro viña, ⁶ oyanduse rumo Lázaro mbaherasisa, opita viteño ité ñuvirío ari güecosave. ⁷ Ipare omombehu ore supi oroico vahe upe:

—Yavevi iri ivi Judea rupi —ehi.

⁸ Ore rumo aipo orohe chupe:

—Ore mbohesar, cuesemi tēi acoi judío rerecuareta ahe pendar nde yuca pota ita pipe yuvireco; ¿cūritei co ereso pota iri aheve? —orohe chupe.

⁹ Oreu rumo aipo ehi:

—Ñepei ari niha vireco doce hora. Supi eté acoi oguata vahe ari pipe ndoyepiapi eté. Esepia, osepia ité co ivi resapesa;

¹⁰acoi oguata vahe rumo pĩtu pĩpe, oyepiapi eté. Esepia, ipane tesapesa chupe —ehi oreu.

¹¹Ipare aipo ehi:

—Yande mboripar Lázaro oque tēi. Che rumo amomahera —ehi.

¹²Evocoyase ore aipo orohe chupe:

—Ore Yar, oque tēise, ocuerara —orohe.

¹³‘Omano ité’ oyapave tēi aipo ehi. Ore rumo orepihañemoñeta: “Oque tēi revo” orohe chupe viña. ¹⁴Ipare rumo omombehu tupri ité aipo ehi oreu:

—Lázaro omano ité. ¹⁵Aviharete che ndaicoise aheve. Esepia, ěgüe ehise ité aviye catura pēu pe che reroya āgua. Yaso ru catu sepia —ehi oreu.

¹⁶Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vaherã supi —ehi.

Jesús cuerayevisa secoi iyavei tecovesa

¹⁷⁻¹⁸Betania namombrĩmi Jerusalén sui, tres kilómetro tupri. Evocoyase ore oroyepota senise ahe tecuave, orosendu “cūrítei irungatu ari opa Lázaro tĩre” ehi vahe. ¹⁹Setá judío yuviraso Marta iyavei María piri iquivri mano agüer sui imboviha āgua. ²⁰Oicuase Marta Jesús yepota seni, oso voi eté sapeve; María rumo opitaño oi pĩpe. ²¹Evocoyase Marta aipo ehi voi chupe:

—Che Yar, ehi cohavẽ ereicose, nomanoi chietera revo ore quivri viña. ²²Che rumo aicua Tũpa omboura opacatu nde porandusa ndeu —ehi Marta chupe.

²³—Nde quivri rumo ocuerayevi irira —ehi Marta upe.

²⁴—Supi eté aicua niha ocuerayevira opacatu omano vahẽcuer reseve ari ipa vahe pĩpe —ehi Marta.

²⁵—Che niha cuerayevisa aico iyavei tecovesa. Acoi ava che reroya vahe, yepe omano tẽira viña, oicoveño itera rumo. ²⁶Acoi che reroya vahe güecoveseve, nomanoi chietera. ¿Ereroya aipo che hesa? —ehi Marta upe.

²⁷—Oroviroya ité, che Yar. Nde niha Poropĩsirosar ereico Tũpa Rahĩr, ore remiaro ereyu vaherã co ivi pĩpe oreu nara —ehi Marta Jesús upe.

Jesús oyaseho Lázaro ruvipa rovai

²⁸Aipo ohe pare, Marta oso ocupihĩr María reca, chupeñomi aipo ehi:

—Porombohesar oicove cohavẽ, “Tou” ehi ndeu —ehi chupe.

²⁹Evocoyase María oso voi eté sepia. ³⁰Jesús rumo ndoique vitei eté tecua pĩpe; Marta rese oyoepiasave viteño ité secoi.

³¹Osepiase María sē poyava, judío eta sētave yuvirecoi vahe

imboviharasar yuviraso voi saquicuerive, “Oquivri ruvipave revo osora oyaseho” ehi yuvireco viña.

³² Evocoyase María oyepotase chupe, oñenopiha sovai aipo ehi:

—Che Yar, ehi revo ereicoveño itese cohave, che quivri nomanoi chietera viña —ehi María chupe.

³³ Osepiase María yaseho iyavei judío eta yuviraso vahe supi, opiha pipe oyandu ité oviharēhisa. ³⁴ Evocoyase oporandu:

—¿Que vo peñoti? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

³⁵ Ahese Jesús oyaseho. ³⁶ Judío evocoyase aipo ehi yuvireco:

—¡Esepia, osaisu ité! —ehi oyeupe yuvireco.

³⁷ Ambuae rumo ipāhu pendar aipo ehi yuvireco:

—Co mbia omomahe vahe acoi mbia ndasesapisoi vahe, ¿ndoicatui chira pīha Lázaro manoēhi āgua mbahe apo cuese rahe viña? —ehi yuvireco.

Lázaro mbogüerayevi agüer

³⁸ Jesús oyemboya suvipave oviharēhisa pipe; ahe suvipa ita hopri, sovapisa ita avei.

³⁹ —Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

⁴⁰ —¿“Che reroyase eve, Tūpa pīratasa eresepiara” ndahei vo acoi ndeu? —ehi Marta upe.

⁴¹ Aipo ihe pare, virocua ita yuvireco ichui. Evocoyase omahe iva rese aipo ehi:

—Che Ru, “Aviye ndeu” ahe ndeu. Esepia, eresendu che ñehe. ⁴² Che aicua nde eresenduño ité che ñehe yepi, che rumo aipo ahe co ava eta rembiepiave ‘toviroya avei nde che mbousa co ivi pipe yuvireco’ che yapave —ehi.

⁴³ Aipo ohe pare, oñehe pīrata aipo ehi:

—¡Lázaro, esē eipeve sui! —ehi.

⁴⁴ Omano vahe evocoyase osē voi opacatu turucuar omamasa reseve. Jesús evocoyase aipo ehi ava upe:

—Peyorapa imamasa ichui, toguata —ehi.

Judío rerecuareta oyemborandu Jesús pisi āgua yuvireco

⁴⁵ Osepiase co poromondiisa, judío eta yuviraso vahe María rupi setá ité Jesús viroya yuvireco. ⁴⁶ Ipāhu pendar rumo moviro yuviraso voi ava fariseo rerecuareta uve sembiapo mombehu āgua. ⁴⁷ Evocoyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico. ⁴⁸ Ndayayapoise mbahe chupe, opacatu tiēte ava viroyara yuvireco viña iyavei aviyeteramo mborerecuar Roma iguar yanduse, yugüerura yande tūparo mondurupa iyavei omocañi tēi uca aveira yande recua yande sui —ehi oyeupe yuvireco.

⁴⁹ Ñepei rumo mbia ipāhu pendar Caifás serer vahe, ahe ité pahi eta rerecuar ivate catu vahe ahe araviter pipe, aipo ehi ava upe:

—Pe ndapeicuai eté mbahe, ⁵⁰ ndapesenducuai avei co tecocuer; aviye catura ñepei mbia omanose yande recocuer rese, ndahei que opacatu yande mocañi tēi āgua —ehi omboetasa eta upe.

⁵¹ Ahe rumo ndahei oyesui tēi aipo ehi; Tūpa ité aipo ombohe uca. Esepia, ahe ité mborerecuar guasu chini ahese. Sese aipo ehi: “Jesús omanora yande recocuer rese” ehi. ⁵² Iyavei ndahei chira ahe ava reseño, omanora opacatu ava Tūpa Rahir oñemosai tēi vahe ñepei reseve imonuha āgua. ⁵³ Ēgüe ehi ahe ari pipeve judío eta rerecuar oyemoingatupa voi yuca āgua yuvireco.

⁵⁴ Sese ndoguata iri ava judío eta pāhu rupi. Ahe rumo osē ivi Judea sui, oso ivi iporupirēhi vahe rerovicave, tecua Efraín ve. Aheve opacatu oropita supi.

⁵⁵ Virovise judío Pascua pieta apo āgua, setá iteanga ava ambuae tecua rupindar yuviraso tecua Jerusalén ve oyecocuer moatiro ahe pieta mboetei āgua renondeve. ⁵⁶ Oseca tēi Jesús yuvireco. Ipare tūparove yuviroiquese, oporandu-randu oyeupe yuvireco:

—¿Mara peye pe, oura pīha pieta repia, aní chira tie? —ehi ehi oyeupe yuvireco.

⁵⁷ Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi āgua” ehi yuvireco chupe.

12

Ñepei cuña omondo Jesús rese mbahe sīacua vahe

¹ Seis ari ipane vitese Pascua pieta āgua, Jesús oso tecua Betania ve, aheve acoi Lázaro ombogüerayevi. ² Eipeve ocaru yuvireco Jesús mboeteisave. Marta ihañeco sese; Lázaro evocoyase ocaru yuvinoi mesave ipiri. ³ Evocoyase María güeru medio litro mbahe sīacua vahe nardo, sepí iteanga vahe. Omondo ipi rese. Ipare oiqiti ohavapri pipe ichui. Sīacúa iteanga evocoyase opacatu oi pipe. ⁴ Evocoyase ore mboetasa Judas Iscariote, ahe acoi omondo vaheerā ava yamotarēhimbar uve, aipo ehi:

⁵ —¿Mahera vo ndimondosai co mbahe síacua vahe tresciento denario rupi ava iparaisu vahe pītīvīi āgua? —ehi.

⁶ Judas rumo ndahei ava iparaisu vahe raisupave aipo ehi. Ahe rumo imonda rai vahe tēi. Setá rupi guarepochi virocua güembiporugã tēi. ⁷ Evocoiyase Jesús aipo ehi:

—Toyapoño cheu. Esepia, ahe che mano āgua renonde ēgüe ehi cheu. ⁸ Yuvirecoveño itera ava iparaisu vahe pe pāhuve yepi; che rumo ndaico pucu iri chira pe pāhuve —ehi Judas upe.

Pahi rerecuar oyamotarēhi Lázaro yuvireco

⁹ Setá iteanga ava judío oyandu yuvireco Jesús rerācua Betania ve secoise. Sese yuviraso aheve; ndahei Jesús repia güeraño yuviraso, ēgüe ehi rumo imbogüerayevīpri Lázaro repia avei. ¹⁰ Evocoiyase pahi rerecuar, “Yayuca avei Lázaro” ehi yuvireco oyeupe. ¹¹ Esepia, ahe ichui tēi niha setá iteanga judío oyepepi pahi rerecuar sui Jesús reroya āgua yuvireco.

Jesús oi que Jerusalén pipe

¹² Ava rehī yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota āgua ahe tecuave yuvireco. ¹³ Ahese oyasia pindo yuvireco. Oyacatu viraso Jesús rovaīchi āgua, osapucaī yuvireco chupe:

—¡Imboeteipri, sovasapri secoi ou vahe yande Yar Tūpa rer pipe! ¡Tūpa tosovasa Israel rerecuar guasu! —ehi yuvireco.

¹⁴ Yīpīndar rumo opa Jesús oseca uca guaricumī. Ipare oyeupi sese icuachiapri aracahendar rupi tupri ité aipo ehi vahe:

¹⁵ “Pesiquiyei rene, Sión pendar; pesepia, pe rerecuar guasu guaricumī harīve ou pēu” ehi.

¹⁶ Yīpīndar, ore semimbohe eta, ndorosenducuai eté co aracahendar imombehupri. Ipare rumo oyevise güecosa porañetesave, ahese oremahenduha aracahendar sesendar icuachiapri rese, “Supi eté omombehu” orohe tēi sepiase.

¹⁷ Acoi ava yuvirecoi vahe Jesús rupi, Lázaro mbogüerayevīsa osepia vahecuer, ahe opa omombehu-mbehu ambuae ava upe yuvireco. ¹⁸ Sese ava eta yuvīnose voi sovaīchi ipīsi āgua. Esepia, oicua ité ahe mbahe poromondiisa guasu yapose yuvireco. ¹⁹ Evocoiyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, ¡opacatu guasu ité ava oguata cūrīteī yuvireco supī! —ehi yuvireco.

Oime griego oseca vahe Jesús yuvireco

²⁰ Griego oime ava rehī pāhuve yuviraso vahe pieta repia Tūpa mboeteī āgua tecua Jerusalén ve. ²¹ Ahe oyemboya

Felipe, Betsaida pendar rese, ahe tecua Galilea pipendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

²² Felipe evocoyase oso imombehu Andrés upe; ichui yuviraso ñuvirío voi Jesús upe imombehu. ²³ Evocoyase chupe aipo ehi:

—Oyepota ari cheundar che, Ava Riquehir, che yevi iri ãgua che recua porañetesave. ²⁴ Supi eté aipo ahe pëu: inungar acoi trigo rãhii nañotísaise, ahese ndihai chietera; ñotise rumo, ahese iha vaira. ²⁵ Acoi ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pipendar tēi che recocuer rese, evocoi nungar virecora tecovesa apirēhi. ²⁶ Acoi ava che mboyeroya pota vahe, toguata che rupi yuvireco. Esepia, acoi che mboyeroyasar yuvirecoi vahe, ahe avei yuvirecoira che piri ivave. Che Ru Tūpa evocoyase omboeteira ahe sereco —ehi chupe.

Jesús omombehu omano ãgua

²⁷ “¡Cūritei ayandu ité mbahe-mbahe tēi oime vaherã cheu! ‘¿Mara ahera pīha?’ ahe tēi. ¿Aipo ahera: ‘Che Ru, che pīsiro eve cūritei cheu oime vaherã mbahe tēi sui’ ahera viña? ¡Che rumo aicua evocoi nungarã ité ayu! ²⁸ Che Ru, emboyecua nde pīratasa nde rer porañetesa mboetei ãgua” ehi oyerogui.

Ichui oyeendu i va sui ñehesa aipo ehi vahe: “Ēgüe ahe niha amboyecua che pīratasa vichico, ěgüe ahe iri aveira” ehi.

²⁹ Aheve ava yuvirecoi vahe, “Osunu revo” ehi yuvireco viña; ambuae ava,

—Tūpa rembiguai revo oñehe Jesús upe —ehi yuvireco.

³⁰ Evocoyase aipo ehi ava eta upe:

—Ndaheí cheundar ñehesa pesendu, ahe rumo pëundar. ³¹ Cūritei oimera ñemoirosa co ivi pipendar ndache reroyai vahe upe, cūritei avei imombosara Carugar co ivi pipendar imborerecuasa sui. ³² Acoi che rupise ivate, opacatu ava arura cheyeupi —ehi.

³³ Aipo ñehesa pipe omboyecua tupri ité mara ehira omano.

³⁴ Aipo ihese ava eta aipo ehi:

—Ore rumo orosendu mborocuita icuachiapri pipe aipo ehi vahe: “Poropīsiosar apirēhi vaherã ité” ehi. ¿Mahera ru aipo nde: “Ava Riquehir osupira ivate yuvireco” ere no? ¿Uma ru aipo Ava Riquehir, ambuae tie? —ehi ava eta yuvireco chupe.

³⁵ Evocoyase aipo ehi ava upe:

—Pe pereco vitemira chíhi rupive tesapesa pe pãhuve. Peguata catu supi seime viteseve. Aviyeteramo pe resapiha tēira pītumimbi vahe. Esepia, acoi uguata vahe pītumimbisa

rupi, ndoicuai que güecosa. ³⁶ Peroya co tesapesa cūrítei pereco viteseve, ipipe ité pe reco ãgua —ehi.

Aipo ohe pare, Jesús osē ava rehii pãhu sui; ndoyemboyecua iri chupe.

Setá judío rerecuar ndoviroya vitei eté Jesús yuvireco

³⁷ Yepe Jesús setá iteanga oyapo mbahe poromondisa judío rerecuar rovaque viña, ahe rumo ndoviroyai eté yuvireco.

³⁸ Esepia, imboaviyesa rane itera Tũpa ñehe mombehusar Isaías rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pĩratasa eremboyecuase chupe” ehi.

³⁹ Co rese avei ava ndoicatui eté senducua yuvireco. Inungar oicuachía Isaías aipo ehi:

⁴⁰ “Tũpa nomboesapisoí ava iyavei nombopihañemoñeta tupri iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevi catui yuvireco chupe ombogüera ãgua” ehi.

⁴¹ Isaías aipo ehi. Esepia, osepia ité Jesús reco porañetesa. Evocoyase ahe oñehe sese.

⁴² Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepeí reseve yuvireco’ oya. ⁴³ Esepia, ahe oipota catu ava tēi suindar yemboeteisa Tũpa suindar yemboeteisa sui yuvireco.

Jesús ñehe reroyasa rese porandusara

⁴⁴ Yipindar rumo, Jesús oñehe vitesese ava rehii upe, oñehe pĩrata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco. ⁴⁵ Iyavei acoi che repia vahe, che mbousar avei osepia. ⁴⁶ Che tesapesa aico. Ayu co ivi pipe ava che reroyasar pĩtumimbisave yuvirecoiēhi ãgua. ⁴⁷ Acoi osendu vahe che ñehe, nomoinguei vahe rumo oyese, ndahei che amocañira.

Esepia, ndayui ava co ivi pipendar mocañi ãgua, che rumo ayu ipĩsiro ãgua. ⁴⁸ Acoi ava che roeroiro vahe, ndoviroyai vahe avei che ñehe, oime rumo imocañi ãgua: Co che ñehesa supi eté vahe reroyaēhisa pipe oyemocañi ucara ari ipa vahe pipe.

⁴⁹ Esepia, che nañehei eté cheyesui tēi; che Ru, che mbousar rumo che cuai che ñehe ãgua, che porombohe ãgua avei. ⁵⁰ Che aicua co cheundar porocuita güeru tecovesa apirēhi ava upe. Sese niha amombehu che Ru che cuaisa” ehi Jesús ava rehii upe.

13

Jesús oyosei güemimbohe pi

¹ Pascua pieta renonde Jesús oicua ité ohari yepota co ivi reya água oso vaherã Vu piri. Ahe osaisu vahe ité ava oyeupendar co ivi pipe yepi. Êgüe ehi saisu ari ipa vahe rupi.

²⁻⁴ Carugar oi que ité Simón rahir, Judas Iscariote, piha pipe imondo água yamotarêhimbar uve. Jesús rumo oicua ité Vu Tüpa sui ousa, oicua avei oyevi iri água Vu Tüpa piri iyavei Tu omondo opacatu omborerecuasa chupe. Sese ocaruse güemimbohe eta reseve, mesa sui opüha, osequi oturucuar yohasa. Ipare omonde ambuae turucuar vumbicuasa rese.

⁵ Evocoyase omondo i yepoisa riru pipe, oyosei güemimbohe pi, omombiru turucuar vumbicuasa rese vireco vahe pipe oico.

⁶ Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

⁷—Nde rumo nderesenducuai mbahe che rembiapo cūritei. Ipare rumo eresenducua —ehi Pedro upe.

⁸ Pedro rumo aipo ehi chupe:

—¿Che pi rumo ndereyosei chietera! —ehi.

—Ndayoseise rumo nde pi, ndahei chietera evocoyase che rupindar ereico —ehi Pedro upe.

⁹ Pedro evocoyase aipo ehi:

—¿Che Yar, aní catu che pi año ereyosei; eyosei che po, che rova avei! —ehi chupe.

¹⁰—Acoi oyasupa ramo vahe rumo, ahe ndiquihai eté. Sese ndiyai oyasu iri. Ipi güeraño rumo iya yoseisa. Êgüe peye ndipoi eté mbahe pe rese; ndaopacatui rumo êgüe peye —ehi.

¹¹ Ahe aipo ehi: “Ndaopacatui rumo êgüe peye” ehi. Esepia, oicua ité uma omondora yamotarêhimbar upe.

¹² Güemimbohe pi sei pare, omonde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pëu? —ehi—. ¹³ Pe niha, “Ore mbohesar, ore Yar” peye cheu. Supi eté niha. Esepia, ahe ité che aico. ¹⁴ Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepeipei peyacatu peyosei aveira pe pi. ¹⁵ Che niha ‘na tehi avei yuvireco’ viya opombohe pe rereco, êgüe ahe pëu. ¹⁶ Supi eté aipo ahe pëu: ava mbiguai tēi, ahe ndahei ivate catu güerecuar sui; êgüe ehi avei imbouprī ndahei ivate catu secoi ombousar sui. ¹⁷ Pesenducua se co nungar mbahe, peyapo tuprise, ahese peviharete catura peico —ehi.

¹⁸ “Che ñañehei opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarêhi’ ehi

vahe. ¹⁹ Senondeve amombehu pëu. Evocoiyase ëgüe ehise ité cheu, che reroyara peye che ité niha aipo ahe vahe vichico. ²⁰ Supi eté aipo ahe pëu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

Jesús omombehu: “Ñepei pe pãhu pendar che mondora che amotarëhimbar upe” ehi

²¹ Aipo ohe pare, Jesús ndoyembovihai eté iyavei mbahe oime vaheã omboyecua tupri ité,

—Supi eté aipo ahe pëu: ñepei pe pãhu pendar che mondora che amotarëhimbar upe —ehi.

²² Evocoiyase ore oromahe-mahe tēi oreyese, “¿Ava upe pãha aipo ehi?” orohe tēi oreyeupe. ²³ Che sembiaisu catu yípive acaru vîte. ²⁴ Ipare Pedro oyaiti-iti ‘¿Ava upe vo aipo ere? tehi chupe’ oyapave cheu. ²⁵ Evocoiyase che asiri catu irimi yípive, aporandu chupe:

—Che Yar, ¿ava ité vo? —ahe.

²⁶ Ahe aipo ehi cheu:

—Cūrítei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaqui pan rahicuer imondo Simón Iscariote rahir, Judas, upe. ²⁷ Judas oipisise pan, oguapi voi eté Carugar sese. Evocoiyase aipo ehi Judas upe:

—Evocoi ereyapo pota vahe, eyapo voiño ité ru —ehi chupe.

²⁸ Que ñepei rumo mesave orocarú vahe, ndorosenducuai eté aipo ihesa. ²⁹ Esepia, Judas guarepochi riru rãrosar secoi yepi. Sese amove ore pãhu pendar ipihañemoñeta: “‘Tererocua mbahe pietase nara’ anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

³⁰ Pan pisi pare, Judas osē voi eté oso pītuse.

Porocuita ipiasu vahe

³¹ Judas sē pare, Jesús aipo ehi:

—Cūrítei oyecuara che, Ava Riquehir, reco porañetesa. Che Ru Tūpa reco porañetesa avei oyecuara che rese. ³² Acoi amboyecuase che Ru Tūpa reco porañetesa, ahe avei omboyecuara che reco porañetesa, ëgüe ehira imboyecua pihai. ³³ Che rahireta, che rembiaisu, ndaico pucu iri chira pe rese. Che reca tēira peye; inungar acoi judío rerecuar upe aipo ahe: “Ndiyai chietera peso che sosave” ahe. ³⁴ Sese co amondo porocuita ipiasu vahe pëu ñepei-peí peyeaisu ãgua inungar che opoaisu. ³⁵ Peyeaisuse ñepei-peí, opacatu tupri ité ava oicuara yuvireco che remimbohe supi eté pe recosa —ehi.

Jesús, “‘Ndaicuai eté co mbia’ erera cheu” ehi Pedro upe

³⁶ Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyevi Pedro upe:

—Cūrítei ndiyai peso vaheerā che sosave che rupi; pesorera rumo che rupi curi —ehi.

³⁷ —Che Yar, ¿mahera ru cūrítei voi ndiyai nde rupi che so āgua? ¡Ayemoingatu ité amano vaheerā nde rese! —ehi Pedro chupe.

³⁸ —¿Supi eté pīha ereyemoingatu ité che rese nde mano āgua? Nde rumo cōhe potase tacura ñehe renondeve, mbosapi oyupagüer rupi, “Ndaicuai eté co mbia” erera cheu —ehi Pedro upe.

14

Jesús, Tūpa raper yandeu

¹ Ipare Jesús aipo ehi opacatu oreu: “Pepīhañemoñeta atii rene; peyeroya Tūpa rese, che rese avei peyeroya. ² Esepia, che Ru rētave setá oime pe reco āgua; ēgüe ndehise rumo, namombehui chira aipo pēu viña. Sese che asora pe recuarā moingatu. ³ Imoingatu pare ayevira pe reca che recosave pe reraso āgua cheyepiri. ⁴ Pe peicua que vo asora iyavei peicua mara peyera pe yepota āgua che recosave” ehi oreu.

⁵ Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so āgua? —ehi.

⁶ —Che niha peri aico supi eté vahe iyavei tecovesa. Che rupi güeraño ité peyepotara che Ru upe —ehi—. ⁷ Pe peicua tuprise ité che recocuer viña, peicua aveira che Ru viña no. Cūrítei suive rumo peicua, pesepia avei cute —ehi oreu.

⁸ Evocoyase Felipe aipo ehi chupe:

—Che Yar, torosepia ité ru aipo nde Ru. Ahese aviyera oreu —ehi.

⁹ —Felipe, setá ari aico pe rese, ¿ndapeicua vitei eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere vite cheu no? ¹⁰ ¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pēu, ndahei cheyesui tēi amombehu. Che Ru secoi vahe che rese, ahe ité oyapo güemimbotar che recocuer rese —ehi—. ¹¹ Che reroya peye che Ru rese che recose, ahe avei secoise che rese. Anise, che reroyañomi tēi catu peye mbahe che rembiapo rese —ehi—. ¹² Supi eté aipo ahe pēu: acoi ava che reroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri

—ehi—. ¹³ Acoi peporanduse que mbahe rese che rer pipe, che amondoño itera pẽu. Ipıpe che amboyecuara che Ru reco pĩratasa. ¹⁴ Che ayapora que mbahe che rer pipe pe porandusa —ehi oreu.

Jesús, “Che amboura Espíritu Santo pẽu” ehi viroyasar upe

¹⁵ “Che raisuse ité peye, pemboyeroya catu che porocuita. ¹⁶ Che aporandura che Ru upe ombou vaheã Espíritu supi eté vahe pe pĩtivii ãgua, ahe secoi vaheã ité pe rese. ¹⁷ Ava Tũpa ndoicuai vahe rumo, ndoicatui chietera ipısi. Esepia, ndosepiai, ndoicuai avei yuvireco. Pe rumo peicua ité. Esepia, ahe ité secoi pe rese. Ipare oique itera pe piha pipe.

¹⁸ “Ndopoeyai chira pe güeraño tẽi; ayevira niha pe rese aico vaheã. ¹⁹ Chĩhi tẽi oime vite ari che reroyasarẽhi che repia vite vaheã yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei. ²⁰ Ahe ari pipe peicuara che Ru rese che recosa, che rese pe recosa avei iyavei che aicose pe rese. ²¹ Acoi oicua vahe che porocuita, omboyeroya vahe avei, ahe omboyecua ité che raisusa yuvireco. Che Ru osaisura che raisusar; che avei asaisura, ayemboyecua aveira chupe” ehi.

²² Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboyecuara; mahera ru ndereyemboyecua iri chira ava nde reroyasarẽhi upe? —ehi chupe.

²³ Evocoiyase aipo ehi Judas upe:

—Acoi che raisu vahe, omboyeroya vahe che ñehe yuvireco, che Ru evocoiyase osaisura iyavei che Ru reseve oroyura oroico vaheã sese. ²⁴ Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui tẽi; ahe rumo che Ru, che mbousar suindar —ehi.

²⁵ “Pe rese che reco vıtese, opa co mbahe amombehu vichico pẽu. ²⁶ Espíritu Santo rumo, Poropĩtivıisar, che Ru ombou vahe che rer pipe, ahe pe mbohera opacatu mbahe avıye vahe rese. Pe momahenduha aveira opacatu pẽu che ñehe agüer rese.

²⁷ “Aseya teco tuprısa pẽu, ahe che reco tuprısa; ndahei rumo avaño tẽi rembiapo nungar amondo pẽu. Anı, ‘¿Mara yahera pĩha?’ peyera; anı chiaveira pesiquıye. ²⁸ Pesendupa niha acoi, ‘Asora, ipare ayevi irira pe rese aico vaheã’ che hesa. Supi eté che raisuse peye, peviharetera peicuse che Ru pıri che sosa. Esepia, ahe ivate catu vahe ité che sui. ²⁹ Sese amombehupa voi co mbahe tenondeve pẽu, egüe ehise ité, ahese peroyara.

³⁰ “Namombehu pucu iri chira mbahe pëu. Esepia, ou ité co ivi pipe oporocuai tēi vahe. Ahe rumo ndahei ivate catu vahe che sui ³¹ ‘toicua ava che reroyasarēhi che Ru raisusa yuvireco’ che hesa pipe. Ayapoño ité che Ru che cuaita.

“Pepūha. Yaso cohava sui” ehi güemimbohe eta upe.

15

Jesús uva hi nungar

¹ Ipare Jesús oñehe iri oreu aipo ehi: “Che aico inungar uva hi supi eté vahe; che Ru evocoyase inungar sese ihañeco vahe secoi. ² Ahe oyasia sãca ndihai vahe ichui yepi; iha vahe rumo omoatiro tupri iha catu ãgua. ³ Pe pe recocuer imoatiropri ité che pe mbohesa pipe. ⁴ Peicoño ité catu che rese inungar che aicoño ité avei pe rese. Uva rãca oise ohi sui, ndiha iri ahe ae tēi; pe avei ãgüe peyera peyepipse che sui” ehi oreu.

⁵ “Che niha uva hi nungar aico; pe evocoyase sãca nungar peico. Acoi secoi vahe che rese, che avei aico sese. Inungar mbahe miti iha ati vahe, ãgüe ehira ahe. Supi eté ndapeicatu chietera che porēhi mbahe apo. ⁶ Acoi ndasecoi vahe che rese, ahe imombosara inungar acoi uva rãca yipi vahe. Ipare imonuhasa sapi ãgua” ehi oreu.

⁷ “Pe peicoñose ité che rese ndaperesaraise avei che porombohesa sui, peporanduño mbahe pe remimbotar rese, ahese imondosara pëu” ehi. ⁸ “Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoyase che remimbohe supi tupri vahe pe recosa. ⁹ Che opoaisu ité, inungar che Ru che raisu. Sese peicoño ité catu che poroaisusa pipe. ¹⁰ Esepia, pemboyeroyase che porocuaita, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

¹¹ “Che aipo ahe pëu ‘tovireco che vihasa oyese yuvireco’ viya; ‘toyemboviharere catu yuvireco’ che hesa pipe. ¹² Co che porocuaita: Peyeaisu ñepeipei, inungar che opoaisu. ¹³ Ndipoi eté que poroaisusa ivate catu vahe co sui omondose que ava güecocuer omboripar rese nara. ¹⁴ Pe che mboyeroyase peye, ahese che mboripar peico. ¹⁵ ‘Pe mbiguai peico’ ndahe iri pëu. Esepia, mbiguai ndoicuai eté mbahe güerecuar pihañemoñetasa. Sese, ‘Che mboripar’ ahe pëu. Esepia, aicua ucapa ñehesa che Ru cheu omombehu vahe pëu. ¹⁶ Pe niha ndache poravoi peye. Che rumo opoporavo iyavei opocuai peporaviqui vahe rãcã ava reru ãgua cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe pëu. ¹⁷ Co rese opocuai: Peyeaisu catu ñepeipei peyacatu” ehi Jesús güemimbohe eta upe.

Jesús amotarēhimbar; supindar amotarēhimbar avei

¹⁸ “Acoi ava ndoicuai vahe Tūpa pe amotarēhise, peicuaño che rane che amotarēhi yuvireco yipindar. ¹⁹ Pe peico vitese ava Tūpa ndoicuai vahe pāhuve, evocoyase pe raisu aira yuvireco viña. Che rumo opoporavo ipāhu sui yuvireco. Sese tēi ndape ambota iri yuvireco. Esepia, pe ndahe iri ipāhu pendar peico. ²⁰ Peyemomahenduha pēu aipo che hesa rese: ‘Ndipoi eté que mbiguai ivate catu vahe güerecuar sui’ ahe. Che niha yipindar yamotarēhimbri aico, pe avei pe amotarēhira yuvireco. Acoi omboyeroya vahe rumo che porombohesa, pe porombohesa avei omboyero yuvireco. ²¹ Co opacatu mbahe che recocuer sui tēi ēgüe ehira pēu. Esepia, ndoicuai niha che mbousar yuvireco.

²²⁻²⁴ “Che ndayuisse ahe ava upe mbahe sembiavi mombehu viña, evocoyase, ‘Peyavi mbahe’ ndehi chira Tūpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipāhuve; ahe rumo yepe osepia co mbahe yuvireco viña, che amotarēhiño, che Ru avei oyamotarēhi yuvireco. Sese, ‘Pereco ité mbahe pe rembiavi peyese’ ehi Tūpa chupe. Esepia, acoi che amotarēhi vahe, che Ru avei oyamotarēhi yuvireco. ²⁵ Co rumo ēgüe ehi. Esepia, imboaviyesa rane itera ñehesa sesendar icuachiapri pipe aipo ehi vahe: ‘Mbahe apoēhi pipe sui tēi che amotarēhi yuvireco’ ehi vahe.

²⁶ “Acoi ambouse rumo Poropītiviisar, Espíritu supi eté vahe che Ru sui pēu, ahe omombehura che recocuer. ²⁷ Pe avei pemombehura che recocuer. Esepia, yipisuive ité peico che rupi” ehi.

16

¹⁻² “Pe mocañehi āgua che rese pe yeroyasa aipo ahe opacatu co mbahe imombehu pēu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, ‘Tūpa uve nara revo na yahe’ ehira yuvireco viña. ³ Evocoi rumo ēgüe ehira yuvireco che Ru cuaēhi pipe iyavei che cuaēhi pipe yuvireco. ⁴ Amombehu aipo pēu acoi ēgüe ehise, peyemomahenduhara che remimombehugüer rese.

Espíritu Santo rembiapo

“Yipisuive rumo namombehui co mbahe pēu. Esepia, aicoveño ité pe rese. ⁵ Cūrítei rumo asora che mbousar piri iyavei ndipoi que ñepepe pe pāhu pendar ‘¿que vo aipo eresora?’ ehi vahe cūrítei cheu. ⁶ Pe rumo ndapeyembovihaiño aipo mbahe amombehuse pēu. ⁷ Supi eté rumo aipo ahe pēu: aviye catura pēu che asose. Esepia, ndasoise viña, ndoui

chietera pe rese Poropĩtivĩisar. Asose rumo, che amboura pẽu. ⁸Ouse ahe, oicua ucara ava che cuaẽhisar upe yangaipa, oicua uca aveira tecocuer ĩvisa iyavei cañisa ndaseco põrai vahe upendar. ⁹Oicua ucara yangaipa chupe ndache reroyaise yuvireco; ¹⁰oicuara rumo che reco ihĩvi tupri vahe yuvireco. Esepia, asora che Ru recosave, ahese pe ndache repia iri chietera peye; ¹¹iyavei oicuara Tũpa poromocañisa. Esepia niha, Caruguar, ahe co ivi pĩpendar rerecuar oipisira che Ru Tũpa ñemoirosa.

¹²“Setá iteanga mbahe oime amombehu vaherã pẽu. Pe rumo ndapeicatuĩ chira cũritei senducua. ¹³Ouse rumo Espĩritu supi eté vahe, ahe pe mbohera mbahe supi eté vahe rese. Esepia, noñehi chira oyesui tẽi, ahe rumo omombehura mbahe osendu vahe güeraño, oicua uca aveira mbahe coiye oime vaherã. ¹⁴Ahe che mboeteira. Esepia, oicua ucara opacatu mbahe cheundar pẽu. ¹⁵Opacatu mbahe che Ru vireco vahe, che mbahe. Sese niha, ‘Espĩritu oipisira opacatu mbahe cheundar, oicua uca aveira pẽu’ ahe.

¹⁶“Aviyeteramo tẽi ndache repia iri chira peye. Ipare rumo coiye catumi che repia irira peye” ehi oreu.

Yepe semimbohe ndovihai chira viña, coiye catu rumo oviharetera yuvireco

¹⁷Evocoyase ore oroporandu-randu tẽi oreyeupe aipo orohe:

—¿Mara oya pĩha: ‘Aviyeteramo tẽi ndache repia iri chira peye’ ehi yandeu; ipare rumo aipo coiye catumi yasepĩara iyavei aipo osora Vu piri no? ¹⁸¿Mara oya vo aipo: ‘Aviyeteramo tẽi’ ehi? Ndayasenducuai mo aipo iñehesa —orohe oreyeupe.

¹⁹Ipare rumo ‘oporandura co mbahe rese yuvireco cheu’ oya aipo ehi voi oreu:

—¿‘Ipare rumo coiye catumi che repia irira peye’ che he agüer rese co pe porandu vite peyeupe? —ehi—. ²⁰Supi eté aipo ahe pẽu: peyasehora pe viharẽhisa pĩpe, ava angaipa viyar rumo ovihareteñora yuvireco. Yepe pe, ndapevihai chira viña, coiye catu rumo peviharetera. ²¹Inungar acoi que cuña imembira potase, tasi chupe oyepotase ari imembira ãgua; pĩtani oha pare rumo, nimahenduha iri tasícuer rese; soriveteño omembri rese. ²²Ëgüe peye avei; pe cũritei tasi avei pẽu, ayevi irira rumo pe repia ãgua, ahese peviharetera. Ahe viharetesa ndipoi chietera que ava virocua vaherã pe sui.

²³“Ahe ari pĩpe, ndapeporandu iri chietera mbahe rese cheu. Supi eté aipo ahe pẽu: che Ru omboura opacatu mbahe pẽu che rer pĩpe peporanduse. ²⁴Cũritei rumo ndapeporandu

vitei mbahe rese che rer pipe. Peporandu catu sese, ahese peipisira. Ipipe sui perorivete catura.

Jesucristo mbahe-mbahe tēi recopisar

²⁵ “Opacatu mbahe rese niha amboyoya tecocuer pēu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pēu che Ru recocuer resendar. ²⁶ Ahe ari pipe pe peporandura mbahe rese che rer pipe; che rumo, ‘Ayerquirira pe rese che Ru upe’ ndahei pēu. ²⁷ Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tūpa sui che yuse peye. ²⁸ Asē che Ru sui co ivi pipe vitu; cūritei rumo aseyara co ivi, ayevíra che Ru upe” ehi oreu.

²⁹ Evocoyase ore aipo orohe chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombehu oreu. ³⁰ Supi eté ereicua opacatu mbahe, ereicua avei ore porandusa. Evocoyase ndiya iri ore porandu āgua mbahe rese ndeu. Sese oroviroya Tūpa sui nde yusa —orohe chupe.

³¹ —¿Evocoyase che reroya ité peye? —ehi—. ³² Supi eté oyepota ari cute, co pipe ité peyemosaipara che sui; che reyara che aemi peye. Ndahei rumo che ae aico. Esepia, che Ru secói che rese. ³³ Amombehu co opacatu pēu che rese mbahe tupri pipe pe reco āgua. Peparaisu itera co ivi pipe; peyemonguerēhi catura rumo. Esepia, che opa ité asecoipi co ivi pipendar mbahe tēi —ehi.

17

Jesús oyeriqui güemimbohe rese

¹ Aipo ohe pare, Jesús omahe íva rese aipo ehi: “Che Ru, oyepota ari cute. Che mboetei eve, ipipe sui avei che nde Rahir toromboetei. ² Supi eté niha, nde erembou che mborerecua āgua opacatu ava ivi pipendar harive iyavei tecovesa apirēhi mondo āgua opacatu ava nde cheu erembou vahe upe. ³ Co niha tecovesa apirēhi, tande cua nde Tūpa ñepeí supi eté vahe nde recose yuvireco, tache cua avei nde che mbose yuvireco.

⁴ “Che niha oromboetei co ivi pipe, iyavei ayapo nde che cuaisa. ⁵ Sese che Ru, embou irimi cūritei che reco porañete āgua, inungar acoi yipindar areco vahe nde rese ivi apoēhiseve.

⁶ “Co nde rembiporavo ava co ivi pipendar pāhu sui erembou vahe cheu; orocua ucapa chupe. Yipindar ndeundar yuvirecoi. Ipare nde erembou cheu. Ahe viroya ité nde ñehe yuvireco. ⁷ Cūritei oicuapa opacatu mbahe nde suindar cheu erembou vahe yuvireco. ⁸ Esepia, amombehu ité nde ñehe

erembou vahe cheu; ahe viroya ité yuvireco, viroya avei nde che mbousa yuvireco.

⁹ “Che ayeroqui cheu nde remimbou rese ndeu. Esepia, ndeundar ité yuvirecoi; ndayeroqui rumo ambuae ava che reroyasarēhi rese. ¹⁰ Opacatu ava cheundar, ndeundar avei; ndeundar evocoyase cheundar. Ahe sese che reco porañetesa oyecua.

¹¹ “Che ndapitai chira co ivi pipe; ahe rumo opitara cohava yuvireco. Che evocoyase asora nde piri. Che Ru, seco maranehi vahe, esāro nde pīratasa pipe nde remimbou cheu oyese yuvirecoi tupri āgua inungar yande yaico. ¹² Aicose co ivi pipe, asāro tupri nde rer pīratasa cheu erembou vahe pipe; chemahemoha yuvireco sese mbahe tēi sui. Ndipoi eté que ñepi ocañi tēi vahe; acoi yipive ocañi vaheño ité rumo ocañi tēi; nde ñehe rupi tupri ité ēgüe ehi.

¹³ “Cūritei asora nde recosave. Co ivi pipe che reco vitese rumo, amombehu co mbahe chupe ‘tovireco che viharetesa yuvireco’ che yapave. ¹⁴ Che niha amombehu nde ñehe yuvireco chupe. Ava che reroyasarēhi rumo oyamotarēhiño yuvireco. Esepia niha, ndahe iri Carugar povri pendar yuvirecoi inungar che ndahei ipovri pendar aico. ¹⁵ ‘Enose ava Carugar povri pendar pāhu sui’ ndahei ndeu, che rumo aipota eresepira Carugar sui. ¹⁶ Inungar che ndahei Carugar povri pendar aico, ēgüe ehi avei ahe yuvireco. ¹⁷ Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité. ¹⁸ Inungar nde che mbou eve ava co ivi pipendar pāhuve, ēgüe ahe avei che imondo ava pāhuve yuvireco. ¹⁹ Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

²⁰ “Ndayeroqui co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vaherā rese. ²¹ Aporandu avei ndeu toyuvirecoi tupri ité yuvireco oyese inungar ñepi vahe, ēgüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco. ²² Che reco porañetesa nde erembou vahe cheu, ahe tupri avei amondo yuvireco chupe ñepi vahe nungar yuvirecoi āgua, inungar yande ñepi vahe yaico. ²³ Che aico yuvireco sese, nde evocoyase ereico che rese ahe yuvirecoi tupri āgua inungar ñepi vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

²⁴ “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia va-herã teco porañetesa cheu erembou vahe yuvireco. Nde niha yipive ité che raisu eve ivi apoẽhiseve. ²⁵ Che Ru, seco catupri vahe, ava co ivi pipendar tẽi nande cuai yuvireco; che rumo orocua ité, co avei oicua nde che mbousa yuvireco. ²⁶ Orocu uca chupe, orocua ucaño vite itera rumo. Evocoyase nde che raisusa tovireco avei yuvireco, che avei taico yuvireco sese” ehi Jesús oyerogui güemimbohe recocuer rese.

18

Jesús oipisi yuvireco

¹ Aipo ohe pare, Jesús ore renose ore reraso iembi Cedrón rovai. Aheve oime mbahe miti rẽta, ipipe Jesús ore reroique ore reraso. ² Iyavei Judas omondo vaherã yamotarẽhimbar upe oicua avei aheve secosa. Esepia, setá rupi Jesús rese oroñemonuha aheve yepi. ³ Sese Judas oyepotaño ité aheve sundao rehii reseve iyavei sundao tũparo rãrosar pahi rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuvirasos. ⁴ Yipive ité rumo oicua oyeupe mbahe oime vaherã. Sese osẽ voi eté yuvireco chupe oporandu:

—¿Ava vo peseca? —ehi.

⁵ Ahe ava rehii omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipãhuve secoi imondo ãgua yamotarẽhimbar upe.

⁶ “Che niha ahe aico” ehise ava upe; guaquicuei coti pãve opa oviapi yuvireco. ⁷ Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pẽu —ehi—. Che che recase peye, pepocoi rene catu co ambuae rese, toyuvirasopaño —ehi.

⁹ Co rumo iñehe mboaviye ãgua ãgüe ehi: “Acoi che Ru ombou vahe cheu, nocañii eté que ñepi che sui” ehi.

¹⁰ Evocoyase Simón Pedro vireco vahe quise, vinose, oyasia Malco serer vahe nambi yasu cotindar, ahe pahi rerecuar ivate catu vahe rembiguai. ¹¹ Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosañi itera chupe —ehi.

Jesús serasosa mborerecuar Anás rovai

¹² Evocoyase sundao rerecuar, osundao eta reseve iyavei judío tũparo rãrosar oipisi Jesús yuvireco, oipocua. ¹³ Yipindar

viraso Anás rētave yuvireco. Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe seci. ¹⁴ Caifás ité aipo ehi omboetasa upe: “Yandeu aviye catu itera que ñepi mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquicuei. Che rumo pahi eta rerecuar rēta pipendar opa ité che cua yuvireco. Sese aiqueño ité Jesús raquicuei mborerecuar rētave vicho. ¹⁶ Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoyase asē, aporandu oquendipi rārosar uve Pedro reique āgua rese. ¹⁷ Evocoyase oquendipi rārosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rārosar upe.

¹⁸ Sōhisá iteanga ahe pītu pipe. Evocoyase mborerecuar rembiguai iyavei sundao eta oyatapī yuvireco oyepehe āgua. Pedro avei aheve ipāhūve oyepehe tata ipīve ohā.

Pahi eta rerecuar ivate catu vahe oporandu Jesús upe secocuer rese

¹⁹ Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe. ²⁰ Jesús rumo aipo ehi chupe:

—Che niha añehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tūparo guasu pipe avei. Indó, che nañemi eté añehe vahe rā.

²¹ ¿Mahera vo evocoyase cheu tēi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

²² Aipo ihese, ñepi mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyevi? —ehi chupe.

²³ Evocoyase omboyevi ahe mbia upe:

—Añehese mbahe tēi rese, emombehu che ñehe raisa; che rumo añehe tupri ité, ¿mahera vo evocoyase che rovapete eve? —ehi.

²⁴ Evocoyase Anás omondo pahi eta rerecuar ivate catu vahe Caifás upe ipocuasa reseve.

Pedro, “Ndaicuai co mbia” ehi vite Jesús upe

²⁵ Ahese Pedro oyepeheño vite ohā tata ipīve. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

²⁶ Ipape mbia pahi rerecuar ivate catu vahe rembiguai, inambi asiapri mu aipo ehi chupe:

—¡Aviye acoi nde ité oroepia vahe mbahe miti rēta pīpe supi! —ehi chupe.

²⁷ Pedro rumo, “Aní, ndahei eté che” ehi iriño. Aipo iheseve, tacura oñehe.

Jesús serasosa Pilato rovai

²⁸ Evocoyase viraso Jesús Caifás rēta sui Roma pendar mborerecuar guasu recosave yuvireco. Cōhe potase ãgüe ehi. Judío rumo ndoyuviroiquei eté mborerecuar recosave oyemboangaipaẽhi ãgua. Esepia, ahe icuaita yuviroiquese, ndiyai chietera Pascua resendar ovesa roho hu ãgua yuvireco chupe viña. ²⁹ Sese Pilato osẽ ava upe aipo ehi:

—¿Mbahe vo sembiapo naporai vahe? —ehi.

³⁰ Ahe omboyevi yuvireco chupe:

—Seco catuprise, ndorogüerui chietera ndeu viña —ehi yuvireco chupe.

³¹ Evocoyase aipo ehi ava upe:

—Peraso, pe ae peyapo mbahe pẽundar ité porocuita rupi sese —ehi.

Judío rerecuar evocoyase omboyevi yuvireco:

—Ore judío oroico vahe upe rumo ndipotasai oroyuca va-herã que ava —ehi.

³² ãgüe ehi Jesús ñehe imano ãgua resendar yaviye. ³³ Ahese Pilato oique iri oi pīpe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

³⁴ —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

³⁵ —¡Che ndahei eté judío aico! Nde recua pendar ae niha pahí eta rerecuar nde reru yuvireco cheu. ¿Mbahe vo evocoyase ereyapo? —ehi Pilato chupe.

³⁶ —Che mborerecuasa rumo ndahei co ivi pīpendar. Co ivi pīpendarse viña, che rupindareta ovavara che amotarẽhimbar upe che repisave yuvireco viña. Che mborerecuasa rumo ndahei eté coha pendar —ehi.

³⁷ Ahese Pilato aipo ehi chupe:

—Evocoyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherã niha che aha co ivi pīpe mbahe supi eté vahe mombehu ãgua. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

³⁸ Pilato rumo,

—¿Mbahe vo aipo supi eté vahe? —ehi chupe.

“¡Tayaticasa!” ehi ava eta Jesús uve yuvireco

Aipo ohe pare, Pilato osẽ iri judío eta upe oñehe aipo ehi:

—Che ndayosui eté co mbia rese mbahe sembiavi. ³⁹ Pe rumo peicua amose ñepi ava soquendapri Pascua pieta pipe yepi; ¿peipota amose vaherã judío rerecuar? —ehi.

⁴⁰ Aipo ihese, opacatu osapucaí pĩratá yuvireco aipo ehi:

—¡Evocoi aní! ¡Barrabás catu emose! —ehiño yuvireco.

Barrabás rumo imonda rai vahe secoi.

19

¹ Evocoyase Pilato oporocuai Jesús nupa ãgua. ² Sundao eta omonde ñaca rese yu piapri iyavei omboyemonde turucuar pĩraumbi vahe pipe yuvireco. ³ Ipare oyemboya sese aipo ehi:

—¡Imboetepri judío Rerecuar tasecoi! —ehi angahu sovapete-pete yuvireco.

⁴ Pilato evocoyase osẽ iri ava upe aipo ehi:

—Pesepia, anose pẽu pe icua ãgua che ndayosui eté mbahe sembiavi —ehi.

⁵ Evocoyase vinose yu piapri oãca rese turucuar pĩraumbi vahe reseve senoha ava upe. Ahese Pilato aipo ehi:

—¡Ndo co aipo mbia cute! —ehi.

⁶ Osepiase pahi eta rerecuar, sundao rerecuar avei, omboipi osapucaí:

—¡Tayaticasa! ¡Tayaticasa! —ehi pãve voi yuvireco chupe.

Pilato evocoyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

⁷ Judío rerecuar rumo omboyevi yuvireco:

—Ore rumo orovireco mborocuaíta. Ipipe omanoño itera. Esepia, oyeapo tẽi Tũpa Rahir —ehi yuvireco.

⁸ Aipo ñehesa renduse, Pilato oyembosiquiyé catu.

⁹ Viroique iri oi pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyevi iri eté iñhe chupe. ¹⁰ Evocoyase Pilato aipo ehi chupe:

—¡Mahera ndereñehei eté cheu! ¿Ndereicuai vo che mborerecuar aico nde atica uca ãgua, mbahe tẽi sui nde renose ãgua avei? —ehi Pilato chupe.

¹¹ —¡Aní! Ndererecoi chietera nde mborerecuasa che harive Tũpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

¹² Ahe ramoseve, Pilato osãha iri tẽi Jesús renose ãgua; judío rerecuar rumo osapucaí voĩño yuvireco chupe:

—¡Acoi eremosese co mbia, ndahei chietera nde mborerecuar ivate catu vahe mboripar ereico! ¡Opacatu oyemomborecua tẽi vahe, ahe evocoyase mborerecuar ivate catu vahe amotarẽhimbar tẽi yuvirecoi! —ehiño yuvireco chupe.

¹³ Evocoyase Pilato osenduse aipo ihesa, vinose uca Jesús ocarve, oguapí mborerecuar guasu renda harive. Ahe mbahe rese porandusa rer hebreo ñehe pipe Gabata 'ita apopri' oya.

¹⁴ Mbiter ari Pascua pieta ãgua Pilato aipo ehi judío eta upe:

—¡Ndo co pe rerecuar cute! —ehi.

¹⁵ Ahe rumo osapucaí pĩratá aipo ehi yuvireco:

—¡Tomanol ¡Tomanol ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoyase ayatica ucara pe rerecuar? —ehi.

Pahi eta rerecuar rumo omboyeví yuvireco chupe:

—¡Ore ndorovireco iri ambuae mborerecuar, Roma pendar mborerecuar ivate catu vahe güeraño ité orovireco! —ehi yuvireco.

¹⁶ Ipare Pilato omondo sundao upe yatica uca ãgua. Ichui viraso yuvireco.

Jesús yaticasa curusu rese

¹⁷ Evocoyase Jesús vinose curusu seraso "Ava Ñcagüer" serer vahesave (ahe serer hebreo ñehe pipe Gólgota). ¹⁸ Aheve oyatica yuvireco. Seseve avei oyatica ñuvirío ava yuvireco, ñepeí-peí yique ivíi. ¹⁹ Pilato oicuachía uca omondo curusu rese aipo ehi vahe: "Co Jesús, Nazaret pendar, judío Rerecuar guasu" ehi. ²⁰ Setá iteanga ava oyeróqui co icuachiapri rese yuvireco. Esepia, icuachiasa hebreo, latín iyavei griego ñehe pipe. Iyavei yaticasa namombriimi eté tecua sui. ²¹ Sese pahi eta rerecuar aipo ehi Pilato upe yuvireco:

—Aní, 'Judío Rerecuar guasu' ere icuachía; iyacatu rumo, 'Oyeapo pota tēi vahe judío Rerecuar guasu' erera icuachía imoi —ehi yuvireco chupe.

²² Pilato rumo omboyeví:

—Co aicuachía vahe, ěgüe ehiño itera oĩ —ehi.

²³ Jesús atica pare evocoi irungatu sundao, omonuha iturucuar oyeupe imboyaho ãgua yuvireco. Oipisi avei iturucuar ivri pendar nimbovívísai vahe, ñepeí reseve pucuño tēi vahe.

²⁴ Sundao eta aipo ehi oyeupe yuvireco:

—Yamondoro eme; avíye catu yandeguayíño sese, ¿ava ité pĩha oipísira? —ehi yuvireco.

Ěgüe ehi icuachiapirer imboaviye yuvireco aipo ehi vahe: "Omboyaho-yaho ava che turucuar iyavei iguayí yuvireco sese" ehi vahe. Supi tupri ité ěgüe ehi sundao yuvireco.

²⁵ Curusu ivípive yuvirecoi ichi, ichi cupihir, María Cleofas rembireco, María Magdalena avei. ²⁶ Osepiase osi iyavei che repiase yípive, che güembiaisu, aipo ehi osi upe:

—Che sí, evocoi nde membirã ererecora —ehi chupe.

²⁷ Ipare voi aipo ehi cheu:

—Evocoi nde sí —ehi.

Ichuive tupri amoingue ichi che rētave asãro vaherã.

Jesús mano agüer

²⁸ Ipare Jesús oicua ité Vu remimbotar yaviyepa iyavei icuachiapirer mboaviye água aipo ehi:

—Che husei —ehi.

²⁹ Aheve oime mbahe riru. Ipipe savapipo vinagre oĩ. Co vinagre pipe omoaqui mbahe saviyu vahe yuvireco omondo ivira rese, osupi, imondo iyuruve yuvireco. ³⁰ Osupite pare aipo ehi:

—Opa yaviye cute —ehi.

Ipare voi ñaca iviso omano.

Sundao oñaruca cutu lanza pipe Jesús

³¹ Ñepeí ari Pascua pieta uve ipane vahe pipe aipo égüe ehi. Sese judío ndoipotai ava retecuer pita curusu rese mbituhusa ari pipe. Esepia, ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vaherã sundao curusu rese yaticapri rētima mope água ‘tomano’ oyapave curusu sui setecuer reroyipa água yuvireco.

³² Evocoyase sundao yuvirasopa ñuvirío mbia Jesús rese yaticasa vahe yuvireco. Ahe sētima rane opa omope yuvireco.

³³ Oyemboyase rumo Jesús rese, “Omano ité” ehiño yuvireco chupe. Sese nomopei sētima yuvireco.

³⁴ Ñepeí sundao rumo oicutu yiqueve lanza pipe. Ahe ramo-seve voi osē suvi, i reseve. ³⁵ Che asepia vahe ité; supi eté aipo ahe. Evocoyase amombehú pēu pe seroya água. ³⁶ Esepia, co mbahe égüe ehi icuachiapirer mboaviye água aipo ehi vahe: “Ndimopesai chietera que ñepeí icangüer” ehi vahe aracahe. ³⁷ Iyavei ambuae icuachiapri aipo ehi: “Osepiara ava eta icutupri yuvireco” ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehögüer reraso água rese. José aipo Jesús rupindar. Ndoyecua ucai rumo omboetasa judío eta upe pahí rerecuar sui osiquiyepave. Pilato evocoyase, “Aviye, eraso” ehi chupe. Evocoyase José oso viraso sehögüer. ³⁹ Nicodemo avei oipitivi, acoi oso vahe Jesús upe pituse. Ahe güeru mbahe siacua vahe mirra, áloe rese oyeseha vahe, treinta kilo, sehögüer rese nara. ⁴⁰ Égüe ehi José, Nicodemo reseve viraso sehögüer yuvireco iyavei oimama tupri turucuar secose vahe imoiacuapri pipe yuvireco. Égüe ehi judío oyapo ava omano vahe tí água yuvireco yepi. ⁴¹ Namombrii Jesús aticasa sui oime mbia remiti rēta. Aheve ité oime tuvipa ita hopri, ipiasu vahe iporupirēhi. ⁴² Ipipe omoingue Jesús rehögüer

yuvireco. Esepia, ahe tuvipa cõimi eté ichui iyavei virovì ité judío pituhusa ari.

20

Jesús cuerayevisa

¹ Domingu pipe María Magdalena oso tuvipave pĩtu vitemiseve. Ahe osepia ita tuvipa rovapisa ndahe irise güendave ihã. ² Evocoyase ahe cuña oña oso Simón Pedro upe, cheu avei aipo ehi:

—¡Viraso tuvipa sui yande Yar yuvireco! ¡Ndorocuai que vo catu omondo yuvireco! —ehi.

³ Evocoyase Pedro rese oroña oroso tuvipave. ⁴ Che rumo aña catu Pedro sui. Che rane evocoyase ayepota tuvipave. ⁵ Aiviro tõi, turucuar güeraño rumo asepia aheve. Ndaiquei rumo ipipe. ⁶ Ipare Pedro oyepota che raquicuei, oi que voi tuvipa pipe. Ahe avei osepia turucuar imama agüer tõi. ⁷ Iyavei osepia turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou. ⁸ Evocoyase che avei aique; asepia ëgüe ehi vahe. Ahese aroya voi eté. ⁹ Ore rumo ndorosenducua vitei eté icuachi-apri: “Ocuereyevira omano vahe pãhu sui” ehi vahe. ¹⁰ Ipare roreyvipa oroso ore rëtave.

Jesús oyemboyecua María Magdalena upe

¹¹ María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe, ¹² ahese osepia ñuvirío Tũpa rembiguai iturucuar morochí vahe oguapi yuvinoi sehõgüer rupagüerve. Ñepe i oguapi oĩ ñaca rupagüer coti, ambuae ipi rupagüer coti. ¹³ Ahe Tũpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehõgüer viraso yuvireco iyavei ndaicuai que vo catu omondo yuvireco —ehi.

¹⁴ Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe. ¹⁵ Evocoyase oporandu María upe:

—Cuña, ¿mahera vo ereyaseho? ¿Ava vo eresece? —ehi chupe.

Ahe omoha ‘co mbahe miti rëta rãrosar revo’ oya viña, aipo ehi chupe:

—Nde ererasose sehõgüer, emombehuñomi tõi cheu que vo eremondo. Aheve taso seca —ehi chupe.

¹⁶ Evocoyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi ('Porombohesar' ohesave).

¹⁷ Evocoyase María upe,

—Erepocoi rene che rese. Esepia, ndayeupi vitei che Ru recosave. Esoño, emombehu che reroyasar upe: “Jesús oye-upira Vu Tūpa recosave” erera chupe. Che Ru, pe Ru avei; che Tūpa, pe Tūpa avei —ehi.

¹⁸ Evocoyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

Jesús oyemboyecua güemimbohe upe

¹⁹ Ahe ari pipeve, domingo pipe, pĩtuse, ore ore ñemonuhasave oroyeoquenda tupri judío rerecuareta sui ore siquiyepave. Ahese Jesús oi que ore pãhuve. Ore mboavirave.

—¡Peico tupri! —ehi oreu.

²⁰ Aipo ohe pare, omboyecua opo, oi que avei oreu. Ahese ororerivete yande Yar repiase oroico. ²¹ Ipare aipo ehi iri:

—¡Peico tupri! Inungar che Ru che mbou, ãgüe ahe aveira co che pẽu —ehi oreu.

²² Ichui ore peyu:

—Peipisi Espiritu Santo —ehi—. ²³ Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoyase ndoipisii chira ñeroisa —ehi oreu.

Tomás osepia yande Yar icuerayevise

²⁴ Ñepeí ore mboetasa rumo Tomás icõí vahe, ndipoi eté ore pãhuve Jesús oyemboyecua oreu. ²⁵ Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pipe iyavei amoinguese che po yique cutu agüerve, ahese ramo aroyara —ehiño oreu.

²⁶ Ocho ari pare, ore oroñemonuha iri oi pipe oroico. Aheve ramo Tomás secoi ore pãhuve. Yepe oroyeoquenda tupri ité viña, Jesús rumo oi queño ité ou ore pãhuve, ore mboavirave aipo ehi:

—¡Peico tupri! —ehi oreu.

²⁷ Ipare aipo ehi Tomás upe:

—Esepia che po, emoingue nde cuã quiravo cuarerve; embou ave nde po, emoingue avei che i que cutu agüerve. “Tachequerẽhi eme seroya ãgua” nderei chira cheu; ¡che reroya eve! —ehi.

²⁸ Evocoyase Tomás aipo ehi:

—¡Che Yar Tūpa! —ehi chupe.

29 Ahese aipo ehi Tomás upe:

—¿Cũritei che reroya che repiase eve cute? ¡Aviye catu ava che repiaẽhi pĩpe che reroya vahe! —ehi chupe.

Co icuachiapri Jesús reroya ãgua

30 Jesús oyapo setá ambuae poromondiisa ore rovaque. Ahe rumo ndaicuachiai co cuachiar pĩpe. 31 Co rumo aicuachía ‘toviroya Jesús, Poropĩsirosar, Tũpa Rahir secosa; ipĩpe tovireco tecovesa yuvireco’ che yapave.

21

Jesús oyemboyecua siete güemimbohe upe

1 Ore sore ivi Galilea ve, Jesús oyemboyecua iri oreu ipa Tiberia ve. 2 Ahese oyeseve Simón Pedro yuvirecoi, Tomás ahe acoi icõi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe. 3 Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, oroha carite pĩpe. Ahe pĩtu pĩpe rumo ndorombhai eté pira. 4 Cõhe potase rumo, Jesús oyemboyecua imbehi ivi. Ore rumo ndoroicuai eté Jesús secose. 5 Evocoyase aipo ehi oreu:

—Mbía chĩhivahe, ¿ndapembohaimi eté pira? —ehi.

—Aní eté —orohe chupe.

6 Evocoyase aipo ehi:

—Pemondo pira mbohasa ive pe asu coti. Ahese pembohara —ehi.

Ëgüe orohe, ipare voi, “¡Too!” orohe, ndorovinose catui eté ipi sui pira mbohasa oroico. Esepia, savapĩpo tupri ité pira ipĩpe. 7 Evocoyase che, sembiaisu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturucuar. Esepia, yipindar nani secoi; opo ive oso chupe. 8 Ore evocoyase orovroyepota ité carite ndatĩpimisave, oroichoho pira rehi imbohasa pĩpe seraso, cien metro tẽi oroico imbehi sui. 9 Orovinosese ivi ãtasave, orosepia tãtapĩ harive pira, pan reseve.

10 —Peru moviro evocoi pira penose ramo vahe —ehi oreu.

11 Evocoyase Simón Pedro oha carite pĩpe, oichoho ndatĩpisave pira guasu rehi imbohasa pĩpe, ciento cincuenta y tres tupri; yepe setá viña, imbohasa rumo ndosoroí eté.

12 Evocoyase aipo ehi:

—Perio, tapecarumi rane —ehi oreu.

Ndipoi eté que ñepeí ore pãhuve “¿ava vo nde ereico?” ehi vahe chupe. Esepia, oroicuaño ité yande Yar secose. ¹³ Chupe ore sore, oipisi pan, ombou oreu, ãgüe ehi avei pira imbou oreu.

¹⁴ Co rese Jesús oyemboyecua mbosapí rupi oreu ocuer-ayevire.

Jesús osecoãha Pedro

¹⁵ Ore caru pare, Jesús oporandu Simón Pedro upe:

—Simón, Juan rahír, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tuprí ru catu che reroya ramomi vahe rese yuvireco —ehi.

¹⁶ Imoñuviriosa rupi oporandu iri chupe:

—Simón, Juan rahír, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoyase esãro tuprí che reroyasar yuvireco —ehi.

¹⁷ Imombosapísa rupi oporandu iri chupe:

—Simón, Juan rahír, ¿che raisu vo eve? —ehi.

Aipo oyeupe hese, Pedro ndoyembovíhai eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoyase ndehañeco tuprí catu che reroyasar rese —ehi—. ¹⁸ Supi eté aipo ahe ndeu: nde chíhivahe catu vitesé, ereyemondé vite nde ae, ereguata vite avei nde remimbotar rupi; nde cuacua catuse rumo, ereyeyivamoatara, ambuae evocoyase nde mboyemondera, nde reraso aveira nde so potaëhisave —ehi.

¹⁹ Jesús rumo omboyecua aipo ohe pípe mara ehira Pedro omano Tüpa mboetisave curi. Ipare,

—¡Erio che rupi! —ehi Pedro upe.

Jesús remimbohe saisuprí

²⁰ Che Jesús rembiaísu ité aico, che ité acoi carusa ipa vaheve yípive añ acoi aporandu chupe: “Che Yar, ¿ava vo nde mondora nde amotarëhimbar upe?” ahe acoi chupe. Aguatase Pedro raquicuei, oyemboyere che repia. ²¹ Ahese oporandu chupe:

—Che Yar, evocoi no, ¿mbahe oimera chupe? —ehi cheu.

²² Evocoyase omboyeví Pedro upe:

—Che aipotase secove vite ãgua che yevise nara, ¿mara vo nde ererecora viña? Nde catu, eguataño che rupi —ehi.

²³ Sese ambuae Jesús reroyasar ipihañemoñeta tẽi aipo che namanoi chivaherã ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vite ãgua che yevise nara, ¿mara vo nde ererecora viña?” ehi.

²⁴ Che ité amombehu co mbahe, che avei aicuachía iyavei yaicua supi tupri vahe ité che remimombehu.

²⁵ Oime avei ambuae mbahe setá Jesús rembiapo, que opacatú icuachiasase viña, ndiyai chietera revo ivi viña. Aipo rupive.

APOSTOL REMBIAPO LOS HECHOS

Tūpa omboura Espiritu Santo viroyasar upe

¹ Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer. ² Ocuerayevire, ivave oso renondeve, Jesús omombehu oporocuaíta Espiritu Santo pĩratasa pipe güembiporavo apóstol upe sembiaporã. ³ Oyemboyecua güembiporavo upe omanore. Setá rupi omboyecua tupri ocuerayevisa chupe. Semimbohe osepia yuvireco imanore cuarenta ari rupi. Ahese omombehu Tūpa mborerecuasa resendar güemimbohe upe.

⁴⁻⁵ Oicove vitesese yuvireco sese, aipo ehi chupe:

—Pesēi rene Jerusalén sui. Tomboaviye rane che Ru Tūpa güemimombehu, ahe acoi amombehu pēu. Juan niha pe āpiramo i pipe tēi; Tūpa rumo Espiritu Santo pipe pe āpiramora. Movíromi tēi ari ipane vite imondo āgua pēu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cūrítei Israel iguar upe pĩratasa iyeyecuai āgua? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe ari cua āgua pēu. Esepia, Tūpa año ité vireco omborerecuasa ahe mbahe apo āgua. ⁸ Peipisira rumo Tūpa pĩratasa oiquese Espiritu Santo pe piha pipe. Ahese pemombehu tuprira che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

⁹ Aipo ihe pare, omahe apóstol yuvireco sese, aheseve Tūpa viraso ivave. Ichui Jesús oi que iva quiha pāhuve. Evocoiyase ndosepia iri eté yuvireco cute. ¹⁰ Omahe viteseseve yuvinoha ivave ichosa rese, aviyeteramo tēi ñuvirío mbia, iturucuar morochí vahe, oyemboyecua apóstol ipive yuvinoha ¹¹ aipo ehi yuvireco chupe:

—Galilea iguar, ¿mahera vo pemahe vite iva rese pehã? Evocoi Jesús, inungar Tūpa viraso ivave pe sui, ēgüe ehi aveira niha ogüeyi ou co ivi pipe coiye —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoiyase apóstol oyevi yuviraso Jerusalén ve ivitri Olivo sui, ahe ihamombrigüer ñepeí kilómetro tēi. Supivemi

imombehusa judío guata ãgua mbituhusa ari pipe yepi. ¹³ Yuviroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi. ¹⁴ Co opacatu ari yacatu rupi oñemonuha oyoya guasu oyeruqui ãgua yuvireco yepi Jesús rivri, ichi, ambuae cuña reseve avei.

¹⁵ Evocoyase ñepeí ari pipe oñemonuha guasu ciento veinte ava yuvireco. Ipãhuve Pedro opũha aipo ehi ava upe: ¹⁶ “Che mu eta Jesucristo reroyasar, iya ité co imboaviyesa Tũpa Ñehengagũer Judas recocuer resendar. Ahe imombehupri David upe Espĩritu Santo pipe aracahe. Evocoi Judas viraso vahe Jesús amotarẽhimbar ipisi uca ãgua. ¹⁷ Ahe acoi secoi yande pãhuve co mboraviquisa rese yande pĩtĩvi ãgua avei viña. ¹⁸ Evocoi gãembiapo ai repri pipe omboepi ivi. Ipare ñaca iviso oviapi oso ivive, oyetiapiipa. ¹⁹ Opacatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñehe pipe ‘Ivi Tuvĩ resendar’ oyapave. ²⁰ Esepia, icuachiapri Salmo pipe aipo ehi: ‘Taseyasa sêta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rãgũer pisi ãgua’ ehi vahe.

²¹ “Evocoyase cohava oime ava yande Yar Jesús secoi vitese yande pãhuve ²² ñapiramosa suive yuvirecoiño vahe ité yande rupi iyavei ivave ichosa osepia vahe avei yuvireco. Ahe tiporavosa ñepeí ipãhu pendar yande rupi icuerayevi agũer mombehu ãgua” ehi omboetasa upe.

²³ Evocoyase oiporavo ñuvirio mbia yuvireco: ahe José Barsabás, serosa Justo; ambuae rer Matías. ²⁴ Ipare oyeruqui yuvireco aipo ehi: “Nde, ore Yar, opacatu ava piha ereicua. Emboyecua cohava nde rembiporavo oreu; ¿uma vo ereipota ²⁵ eremondo vaherã icuaitarã apóstol seco ãgua Judas recuñara? Ahe oangaipa pipe oyemocañi uca tẽi vahe oico” ehi Tũpa upe yuvireco.

²⁶ Evocoyase osãha iporavo yuvireco. Matías ité vinose iporavopri sui yuvireco. Ichui tupri ité oi que once apóstol pãhuve.

2

Espĩritu Santo gãeyi agũer

¹ Oyepotase Pentecostés pieta, opacatu Jesús reroyasar oñemonuha oi guasu pipe yuvireco. ² Aheve oi pipe aviyeteramo tẽi ivitu ipĩrata vahe nungar siapu guasu ou iva sui. Ahe siapugũer oyendupa tupri oi pipe. ³ Ahese oyecua

tata rendigüer nungar opacatu aheve yuvirecoi vahe harive. ⁴ Aheve avei Tüpa omoingue evocoi ava pïha pipe oEspíritu Santo. Ichui ahe Espiritu omoñehe uca ambuae ñehesa pipe yuvireco.

⁵ Ahe ari pipe setá iteanga judío yuvirecoi Jerusalén ve omboaviye vahe ocuaita Tüpa mboeteisa, ahe oñemonuha vahe opacatu ivi rupindar yuvireco. ⁶ Mbahe siapu guasu vahe renduse, oñemonuha ati tēi yuvireco oyese. Ndoyemboaracuai tēi yuvireco ambuae ava oñehe pipe ñehese. ⁷ “¡Too!” ehi tēi oyepihamondiisa pipe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco? ⁸ ¿Mahera pïha co ñepeipei oñehe yande ñehe pipe yuvireco? — ehi tēi oyeupe yuvireco—. ⁹ Esepia, cohava yuvirecoi vahe: Partias pendar, Media pendar, Élam pendar, Mesopotamia pendar, Judea pendar, Capadocia pendar, Ponto pendar, Asia pendar, ¹⁰ Frigia pendar, Panfilia pendar, Egipto pendar, Libia cotindar, ahe Cirene cōquivotindar. Iyavei Roma pendar, ¹¹ judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu iñehe yuvireco yande ñehe pipe Tüpa rembiapo icatupri vahe! —ehi.

¹² Opacatu oyepihamondi, ndoicuai opihañemoñeta ãgua yuvireco.

—¿Mara ehi pïha co na oya yuvireco? —ehi-ehi tēi yuvireco oyeupe.

¹³ Ambuae ava rumo seroïrosa pipe aipo ehiño yuvireco:

—¡Osavaipo mo evocoi yuvireco! —ehi.

Pedro oñehe ava upe

¹⁴ Evocoiyase Pedro opüha opacatu once vahe apóstol pãhuve, oñehe pïrata aipo ehi: “Che mu judío eta, opacatu Jerusalén pendar avei, peicua co mbahe amombehu vaherã pëu; peyapisaca tupri che ñehe rese: ¹⁵ ndosavaipoi moco co mbia yuvireco. ¿Ndapesepiai vo añihivei vite cūrítei? ¹⁶ Co niha Tüpa ñehe mombehusar Joel oicuachía vahe aracahe:

¹⁷ Tüpa aipo ehi:

Coiye, ari cañi renonde, amondora che Espiritu Santo opacatu ava upe.

Ipĩratasa pipe pe rahir, pe rayri oñehera yuvireco.

Mbia chĩhivahe osepiara oquer pendar nungar mbahe yuvireco.

Oime aveira queraisa supi eté vahe cuacua vahe upe.

¹⁸ Supi eté ahe ari pipe amondora che Espiritu che rembiguai cuimbahe upe, che rembiguai cuña upe avei.

Ipape oñehera yuvireco che rese ipĩratasa pipe.

¹⁹ Amboyecuará poromondiisa íva rese.

Ēgüe ahe aveira poromondiisa mboyecua ivi pipe:
tuvi, tata iyavei tātachi.

²⁰ Yande Yar ari tuvichá vahe imboeteipri renonde ohara pĩtu,
yasi oyeapora tuvi nungar.

²¹ Opacatu ava, che Yar che pĩtivi eve, ehi vahe, ahe
oñepisiora yuvireco' ehi Joel icuachía aracahe.

²² “Pe Israel suindar, pesendu che ñehe: Jesús, Nazaret
pendar, oyapo poromondiisa tuvichá vahe, mbahe yavai
vahe Tũpa pĩratasa pipe pe pãhuve güeco maranehi mboyecua
ãgua. Ahe niha peicua opacatu. ²³ Ipare rumo evocoi Jesús
imondosa pẽu yuca ãgua. Ahe rumo Tũpa remimbotar rupi.
Esepia, yipive ité Tũpa oicua pe peipisira yuca uca ãgua curusu
rese ava naporai vahe upe. ²⁴ Tũpa rumo ombogüerayevi
manosa sui. Esepia, manosa ndoicatui sereco ãgua. ²⁵ Supi eté
mborerecuar guasu David oñehe Jesús recocuer rese aracahe
aipo ehi:

‘Che aicua che Yar che rese secoi che acato coti mbahe tẽi pipe
che viapiẽhi ãgua yepi.

²⁶ Sese avihaño ité vichico, asapucai avei che rorivetesá pipe.
Iyavei che yeroya tuprisave asãrora mbahe aviye vahe che
recove iri ãgua.

²⁷ Esepia, nde ndereseyai chira che hã omano vahe pãhuve,
nderemonduyu ucai chiaveira nde rembiguai seco
maranehi vahe retecuer.

²⁸ Co tecovesa ereicua uca cheu.

Che mbovihara eve nde rese che recose' ehi David aracahe.

²⁹ “Che mu eta, supi eté yande ramoi David omano, ñotisa
ita hopri pipe aracahe. Ahe suvipa ouve vite cohava yande
pãhuve. ³⁰ David rumo Tũpa ñehe mombehusar, oicua Tũpa
oyeupe aipo ehi vahe: ‘Supi eté aipo ahe ndeu: nde suindar
oimera mborerecuar guasu nde recuñara’ ehi vahe. ³¹ Ahe
ndoyavii osepiá vahe ité Poropĩsirosar cuerayevisa. Evo-
coiyase aipo ehi oñehe sese: ‘Thã ndopitai chira omano
vahe pãhuve iyavei setecuer ndituyui chira’ ehi aracahe.

³² Evocoi Jesús, Tũpa remimbogüerayevi secoi. Ahe imombe-
husar opacatu ore oroico. ³³ Ipare Tũpa viraso oacato coti
imboguapi. Ahe oipisi imombepri Espĩritu Santo Vu sui.
Evocoyase ahe opa omondo co ava yuvirecoi vahe upe. Ahe
pesepia, pesendu avei cũritei peico. ³⁴ Esepia, evocoi oso vahe
ivave ndahei David. Ahe ae rumo aipo ehi aracahe:

‘Yar aipo ehi che Yar upe:

Eguapi cohava che acato coti che piri.

³⁵ Asecopipa uca ranera nde amotarẽhimbar ndeu, ehi Yar
che Yar upe’ ehi David aracahe.

³⁶ “Pe tapecuasapa, ticuasapa avei opacatu Israel recua
rupi, supi eté evocoi Jesús curusu rese peyatica vahecuer, ahe

Tūpa omoingo opacatu yande Yarā iyavei yande p̄isiro āgua” ehi Pedro ava rehi upe.

³⁷ Aipo renduse, tasí iteanga ipiha pipe yuvireco. Evocoyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoyase? —ehi.

³⁸ Evocoyase aipo ehi ahe ava upe:

—Pemboasi pe angaipa; peyevi Tūpa upe. Iyavei peñeapiramo opacatu Jesucristo rer pipe. Evocoyase Tūpa iñerora pe angaipa rese. Iyavei omondora Espiritu Santo p̄eu. ³⁹ Esepia, co ñehesa imombehupri, ahe p̄eu nara, pe suindar upe nara iyavei opacatu amombri Tūpa sui yuvirecoi vahe upe nara avei, ahe acoi opacatu yande Yar Tūpa oyeupe nara güeru pota vahe —ehi.

⁴⁰ Ēgüe ehi oñehe vite ava mboaracua aipo ehi:

—¡Peyepipi co ava secocuer co coti t̄ei vahe sui! —ehi chupe.

⁴¹ Acoi ava viroya vahe co ñehesa, oñeapiramo uca yuvireco. Ahe ari pipe oyemboeta iri tres mil ava yuvireco Jesús viroya vahe rese. ⁴² Opacatu viroya tupri ité apóstol porombohesa. Opacatu guasu avei oyeaisu tupri yuvireco, oyeruqui iyavei oñemonuha oyeupe pan mboyaho-yaho āgua yuvireco yepi.

Yipindar vahe Jesús reroyasar recocuer

⁴³ Opacatu oyembosiquiye imboeteisa pipe yuvireco. Esepia, apóstol oyapo setá poromondiisa ‘toicua Tūpa suindar yande porombohesa yuvireco’ oyapave. ⁴⁴ Opacatu Jesús reroyasar ipihañemoñeta tupri ité ombahe rese yuvireco güecocuer upe nara. ⁴⁵ Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi. ⁴⁶ Ari yacatu rupi judío tūparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho āgua. Ipare oyoya guasu ocaru yuvireco oyembovihasa pipe, opihañemoñeta tuprisa pipe avei. ⁴⁷ Osapucái yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoyase ari rupi omboeta catu ava iñepisiro āgua Jesucristo viroya vahe p̄ahuve.

3

Ndoguatai vahe cuerasa

¹ Ñepeí ari aipo, caharuse las tres pipe, Pedro, Juan reseve oyoya yuviraso judío tūparove. Ahe hora pipe judío oyeruqui yuvireco yepi. ² Ahe tūparo roquendipi rer Porañete. Aheve ari yacatu rupi viraso ñepeí ava oyesu suive ndoguatai vahe ‘tomondo guarepochi ava tūparove yuviroique vahe yuvireco chupe’ oyapave. ³ Ahe ndoguatai vahe omahe Pedro, Juan

rese tũparove sei que potase, oporandu guarepochi rese chupe. ⁴ Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

⁵ Evocoiyase ahe mbia omahengatu sese ‘omboura revo que mbahe cheu’ oya viña. ⁶ Aipo ehi rumo ndoguatai vahe upe:

—Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pipe epũha, eguata —ehi chupe.

⁷ Evocoiyase oipisi ipo yasu cotindar imopuha. Ahe ramo-seve opa tupri ipi, ipiñuha avei oviracua. ⁸ Evocoiyase opũha, opo, oguata; oique oso tũparove supi. Opo-opo vorivetesave iyavei osapucaĩ Tũpa upe. ⁹ Opacatu ava osepia yuvireco iguatase iyavei Tũpa upe isapucaise. ¹⁰ Omahecuase sese, “¡Too!” ehi tẽi yuvireco. Iyavei ndoyembovĩhai aviyeteramo tẽi icuerase yuvireco. Esepia, evocoi ava oicupapa tũparo roquendipi Porañete serer vahesave chinise mbahe rese iporanduse yuvireco yepi.

Pedro oñhe ava rehii upe tũparo Corero Salomón serer vahevrive

¹¹ Ndoguatai vahecuer ndoyepipi potai Pedro, Juan sui. Yuvinoña ati, oyepihamondii ava sepia tũparo Corero Salomón serer vaheve yuvirecoise. ¹² Pedro evocoiyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndojavii co ore pĩratasa pipe tẽi iyavei Tũpa rese ore pihañemoñeta tuprisa pipe tẽi orombogũera vahe co mbia pẽu viña. ¹³ Tũpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoi eta avei no, ahe niha omondo güeco pĩratasa tuvicha catu vahe Guahir Jesús upe. Pe rumo acoi pemondoño mborerecuar Pilato povrive. Acoi omose potase, pe evocoiyase ndapeipotaiño imose ãgua chupe. ¹⁴ Ahe seco maranehi vahe, seco ïvi vahe renose rãgũer pipe, peporandu: ‘Tosẽ oporapichi vahe’ peye. ¹⁵ Ëgũe peye acoi tecovesa ombou vahe yuca. Tũpa rumo ombogũerayevi omano vahe pãhu sui. Ahe niha ore oromombehu oroico pẽu. ¹⁶ Co Jesús rer rese yeroya pipe ité niha oipisi pĩratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe ité niha co pe rembiepiave ocuera tupri” ehi ava upe.

¹⁷ “Che mu eta, che aicua acoi pe peipĩtivii vahe pe rerecuar Jesús yuca uca ãgua pe icua tupriẽhi pipe cuese. ¹⁸ Ëgũe ehi Tũpa imboaviye aracahendar opacatu oñhe mombehugar upe güemimombehugũer: ‘Che Rembiporavo Poropĩsirosar oiporarara mbahe-mbahe tẽi rasicuer omano’ ehi vahe.

19 Sese pemboasi pe angaipa; peyevi Tūpa upe. Ipipe sui tomocañi pe angaipa pe sui. Aviyeteramo co sui omboura yande Yar pe reco morohisa āgua, 20 ombou aveira Jesús, ahe yipisuive iporavopri pe pīsiro āgua. 21 Cūritei rumo Jesucristo ivave vite secoi acoi Tūpa opase voi omoingatu opacatu mbahe iyevi āgua. Aipo ehi acoi imoñehe uca aracahendar oñehe mombehusar ndaseco marai vahe. 22 Moisés yande ramoi yuvirecoi vahe upe aipo ehi imombehu aracahe: ‘Yande Yar Tūpa omopuhara ñepi oñehe mombehusar pe pāhuve che nungar. Ahe iñehe pesendura, pemboyeroya catu aveira. 23 Opacatu ndoviroyai vahe iñehe Tūpa omocañira güembiporavo pāhu sui’ ehi.

24 “Ēgüe ehi opacatu Tūpa ñehe mombehusar Samuel suive aracahe omombehu avei co ari cūritei yasepia vahe yuvireco. 25 Pëu nara niha Tūpa ñehe mombehusar remimombehugüer aracahendar. Pëu nara avei acoi Tūpa omombehu vahe güemimbotar yande ramoi eta upe. Esepia, aipo ehi Abraham upe aracahe: ‘Opacatu ava co ivi pipendar ahe sovasapri yuvirecoira nde suindar sui’ ehi. 26 Acoi Tūpa Guahir ombogüerayevise, pëu rane ombou pe rovasa āgua ‘toseyapa ñepi-pe güecocueraí yuvireco’ oya” ehi Pedro ava rehi upe.

4

Pedro, Juan serasosa mborerecuar rovai

1-2 Pedro, Juan reseve oñehe viteseve ava rehi upe, ahese oñemoirosa pipe pahi eta, tūparo rārosar sundao rerecuar, saduceo avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pāhu sui” ehi. 3 Ichui oipisi seraso soquenda yuvireco ‘ayihive voi yanosera mbahe rese porandu āgua’ ohesa pipe. Esepia, caharuse tēi osoquenda yuvireco. 4 Setá rumo ava iñehesa osendu vahe viroya yuvireco. Ahe cuimbahe seroyasar retacuer güeraño seni cinco mil.

5 Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuita rese oporombohe vahe, 6 pahi rerecuar ivate catu vahe Anás, Caifás, Juan, Alejandro, opacatu omu reseve. 7 Evocoyase güeru ucase Pedro iyavei Juan opāhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

8 Evocoyase Pedro, Espíritu Santo pīratasa pipe, aipo ehi chupe:

—Pe, mborerecuareta co tecua p̄ipendar, pe avei pahi rerecuar: ⁹peporandu niha co ava imbaheasi vahe ndoguata catui vahe mbogüera agüer rese oreu —ehi chupe—. ¹⁰Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer curusu rese. Tüpa rumo ombogüerayevi iri omano vahe p̄ahu sui. ¹¹Co Jesús pe remieroïro, ahe rumo yande v̄iracuasa. Pe evocoyase inungar oi mopuhasar omomboño vahe ita aviye catu vahe oi mov̄iracuasa r̄ägüer yepi. ¹²Ndipoi que ambuae ava sui porop̄isiro, Jesús güeraño ité oicatu oporop̄isiro. Esepia, Tüpa nomboui ambuae ava t̄ei co ivi pipe yande p̄isiro ägua —ehi.

¹³Mborerecuar osepiase iyembosiquiyeēhisa yuvireco, “¿Mara ehi p̄iha co mbia? ¡Ava t̄ei, ndoyembohei vahe niha!” ehi t̄ei yuvireco chupe. Ichui oicua Jesús remimbohegüer secose yuvireco. ¹⁴Iyavei acoi ava semimbogüeragüer supive ité secoise, sese ndoicatu chupe oñehe mara ägua yuvireco. ¹⁵Ip̄are, “Pesē ocarve” ehi mborerecuareta yuvireco chupe. Ahe güeraño evocoyase op̄ita oi pipe oñemoñeta yuvireco sese ¹⁶aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Ēgüe ndehi” yahe chupe. ¹⁷Yambosiquiye ava upe Jesús rer rese iñehe iriēhi ägua yuvireco. Ip̄ipe sui ava tosendu iri eme Jesús resendar ñehesa yuvireco —ehi.

¹⁸Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe. ¹⁹Omboyeviño rumo oñehe yuvireco chupe:

—¿Mara ehi pe pihave? ¿Uma p̄iha aviye catu Tüpa rovai? ¡Pe porocuaite tie oroviroya catura Tüpa ore cuaisa sui! ²⁰Ndiyai rumo mbahe ore rembiepia, mbahe orosendu vahe avei mombehuēhi ägua oreu —ehi.

²¹Aipo ihese, mborerecuar ombosiquiye catu t̄ei yuvireco. Ichui rumo omose tupriño. Esepia, ava omboetei guasu Tüpa yuvireco co imbaheasi vahe mbogüera repiase. Sese ndoicatu eté mbahe apo yuvireco chupe. ²²Evocoi ava oip̄isi vahe Tüpa poromondiisa ocuera ägua, ahe oñaro catu cuarenta araviter vireco vahe sui.

Jesús reroyasar oporandu Tüpa upe siquiyeēhisa rese yuvireco

²³ Yuvinosese Pedro, Juan avei, oyevi yuviraso omboetasa piri. Aheve oñemonuhasave opa omombehu pahi rerecuar oyeupe ñehe mara-mara tẽisa yuvireco. ²⁴ Aipo rendu pare, oyoya guasu oyerogui yuvireco Tũpa upe aipo ehi: “Ore Yar, nde niha Tũpa opacatu iva, ivi, para guasu, opacatu ipor reseve aposar ereico. ²⁵ Nde Espiritu Santo pipe aipo eremombehu uca nde rembiguai mborerecuar David upe aracahe:

‘¿Mahera vo co ava ndahei vahe judío oyamotarẽhi yuvireco? ¿Mahera vo ipihañemoñeta rai tẽi yuvireco?’

²⁶ Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tũpa iyavei sembiporavo amotarẽhi ãgua’ ehi aracahe.

²⁷ “Ëgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropĩsirosar Jesús, seco maranehi vahe, amotarẽhi ãgua. ²⁸ Ëgüe ehi yapo opacatu nde pihañemoñeta aracahendar rupi tupri ité yuvireco. ²⁹ Iyavei cūritei, ore Yar, emahe ore amotarẽhisar rese. Embou nde pĩratasa nde rembiguai oroico vahe upe siquiyeẽhisa pipe nde ñhengagüer mombehu vite ãgua. ³⁰ Ipare, nde pĩratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pipe” ehi yuvireco oyerogui.

³¹ Iyeroqui pare, Tũpa omboriri opacatu mbahe iñemonuhasave yuvireco chupe. Ahese Espiritu Santo opa oi que yuvireco sese. Sese osiquiyeẽhisa pipe omombehu tupri Tũpa Ñhengagüer yuvireco.

Jesús reroyasar ombahe opacatu oyeupe nara vireco yuvireco

³² Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe. ³³ Jesucristo apóstol omombehu vite ipĩratasa pipe icuerayevi agüer yuvireco. Ipipe Tũpa osovasa catu vite opacatu yuvireco. ³⁴ Ndipoi eté ipãhu pendar mbahe ndovirecoi vahe. Esepia, opacatu ivi vireco vahe iyavei oi omondo, ³⁵ ahe sepri omondo apóstol upe yuvireco yepi. Ahe evocoyase omboyaho-yaho opacatu upe mbahe ipane vahe rupi-rupi yuvireco. ³⁶ Ëgüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovihasar’ oya aipo ehi), ³⁷ ahe mbia omondo oivi, güeru sepri apóstol upe.

5

Ananías iyavei Safira yemboangaipa agüer

¹ Ambuae ava rumo, Ananías serer vahe, güembireco Safira reseve omondo ivi yuvireco. ² Ahe mbia rumo omboyaho seprí, ñepeí iyahocuer vireco oyeupe nara, ambuae iyahocuer viraso apóstol upe, sembireco avei oicua tēi opacatu.

³ Evocoyase Pedro aipo ehi chupe:

—Ananías, ¡mahera ereroya Carugar nde piha pipe Espíritu Santo mbopa água, eremboyahoño tēi nde ivi reprí guarepochi ndeyeupe nara! ⁴ ¿Ndahei vo nde mbahe ité ivi viña? Eremondo ité niha, evocoyase nde mbahe ité guarepochi. ¡Mahera ereyapo co nungar! Ndahei ava upe nde remira, Tūpa upe ité rumo nde remira —ehi chupe.

⁵ Osenduse Pedro ñehesa, oviapi sehögüer oso sovai. Ahese opacatu oyandu vahe osiquiye tēi yuvireco. ⁶ Ipore mbia chihivahe yugüeru, osupi sehögüer, oipoque seraso yuvireco ñoti água.

⁷ Mbosapi hora pare, sembireco Safira serer vahe oique oi pipe. Ndoicua vitei rumo omer mano. ⁸ Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

⁹ Evocoyase aipo ehi ahe cuña upe:

—¡Mahera peyemboyoya pe pihañemoñetasa rese pe secoãha água yande Yar Espíritu! Coi yugüeru nde mer tísarer. Nde avei nde reraso água yuvireco eipeve —ehi chupe.

¹⁰ Ahe ramoseve avei oviapi sehögüer Pedro rovai. Mbí chihivahe yuviroique, oipoque voiño ité sehögüer seraso imer ivi ñoti água yuvireco. ¹¹ Opacatu Jesús reroyasar, ambuae ava avei oyembosiquiye guasu yuvireco yanduse.

Setá poromondiisa yaposa

¹² Evocoyase apóstol pipe Tūpa omboyecua uca setá poromondiisa ava pãhuve yuvireco. Opacatu Jesús reroyasar oñemonuha judío tūparo ique, Salomón serer vahesave yuvireco. ¹³ Opacatu ambuae ndoyemboyai yuvireco sese osiquiyepave. Ava rehi rumo, omboetei eteanga apóstol yuvirecoi vahe yuvireco. ¹⁴ Oyemboeta catu yande Yar reroyasar setá cuimbahe, setá avei cuña. ¹⁵ Iyavei ava rehi vinose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihägüer. Ahese revo ombogüerara” ehi yuvireco oyeupe. ¹⁶ Ava Jerusalén ivirindar avei güeru omonuha setá imbaheasi vahe,

carugar rese yuvirecoi vahe apóstol upe imbogüerapirã. Ahe evocoiyase opacatu ombogüera yuvireco.

Apóstol yamotarēhipri yuvirecoi

¹⁷ Ichui tēi pahi rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatēhisave.

¹⁸ Sese oipisi osoquendapa uca yuvireco. ¹⁹ Ipare rumo, pĩtu pipe, Tũpa rembiguai iva pendar ou omboi oquenda, vinose ichui, aipo ehi chupe: ²⁰ “Peso tũparo guasuve, pemombehu avei ava upe co ñehesa tecocuer piasu resendar” ehi chupe.

²¹ Co mbahe rendu pare, supi tupri ité oyapo yuvireco. Cõhe ramoseve yuviraso judío tũparo guasuve ava mbohe ãgua.

Aheseve pahi rerecuar ivate catu vahe, supindar avei osenoi opacatu tecua pipendar mborerecuar ñemonuha ãgua ivate catu vahesave; omondo yuvireco güembiguai apóstol reru ãgua soquendasa sui aheve nara viña. ²² Oyepotase rumo sembiguai yuvireco, oseca tēi soquendapri. Ichui oyevi tēi yuvireco imombehu ²³ aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sãrosar osãro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

²⁴ Osenduse, pahi rerecuar ivate catu vahe, tũparo rãrosar rerecuar, pahi rerecuareta avei yuvireco, ipihañemoñeta tēi: “¿Que rupi vo opoira co mbahe sui yuvireco?” ehi tēi yuvireco oyeupe. ²⁵ Aheseve ñepeí mbia oyepota imombehu:

—Evocoi pesoquenda vahecuer, ahe mbia cūrítei oporombohe tũparove yuvireco —ehi chupe.

²⁶ Evocoiyase tũparo rãrosar rerecuar, sembiguai avei yuviraso seru ãgua mbahe tupri pipe, “Aviyeteramo yande api-api tiētera ava yuvireco yaru raise” ehi yuvireco.

²⁷ Viroyepotase yuvireco ñemonuhasa ivate catu vahesave, ahese evocoi pahi rerecuar ivate catu vahe aipo ehi chupe:

²⁸ —Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehii upe ore mborerecuar oroyuca uca evocoi mbia —ehi pahi rerecuar chupe.

²⁹ Pedro, omboetasa reseve, omboyevi pahi rerecuar ivate catu vahe upe yuvireco:

—Ore cuaita ité Tũpa mboyeroya, ndahei chira rumo ava tēi rane oromboyeroya —ehi yuvireco chupe—. ³⁰ Yepe peyatica, peyuca uca Jesús curusu rese viña, yande Ru Tũpa rumo acoi yande ramoí eta viroya vahe, ahe ité ombogüerayevi. ³¹ Ipare osecomboivate ivave oacato coti imboguapi imoi. Ahe niha Mborerecuar guasu, Poropĩsirosar

avei 'tomboasi oangaipa, toyevî cheu, toipîsi angaipa re-sendar ñeroisa yuvîreco' oya Tûpa Israel suindar upe. ³² Ore Tûpa rembiapo repiasarer imombehu âgua oroico, Espîritu Santo avei oñehe ore ñehe rupi ava upe, ahe acoi Tûpa ombou vahe viroyasar upe —ehi.

³³ Osenduse mborerecuar aipo ñehesa, oñemoiró iteanga yuvîreco. Oyucapa pota opacatu apóstol yuvîreco viña. ³⁴ Mborerecuar pâhu pendar rumo oime mbîa fariseo, Gamaliel serer vahe, ahe Moisés porocuita rese oporombohe vahe iyavei imboeteiprî catu vahe. Ahe opûha oporocuai, "Toyuvînose raimi ocarve apóstol" ehi. ³⁵ Ipape aipo ehi ambuae mborerecuareta upe:

—Che mu, judío, peicua catu, yandepihañemoñeta tuprî rane mbahe apo âgua renondeve co mbîa upe yuvîreco —ehi—. ³⁶ Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrociento ava oyeupi aracaco. Ipape acoi oyuca yuvîreco. Ahese supindar opa oñemosai tîi yuvîreco. Ahe peve secocuer opa. ³⁷ Coiye catu, omombehuse mborerecuar Roma pendar ava retacuer cua âgua, ahese Judas, Galilea pendar, oyemomborerecu. Setá avei ava oguata yuvîreco supî. Ahe avei rumo oyuca yuvîreco, opa tuprîño avei supindar oñemosai tîi yuvîreco —ehi—. ³⁸ Sese cûritei peyapoi rene mbahe co ava upe. Yaseyaño. Esepia, evocoi mbahe sembiapo ndipocopiî chira oyapose opîratasa pipe tîi yuvîreco. ³⁹ Tûpa suindarse rumo ndapemombîtuhu catui chietera. Peicua catu, aní chira yayamotarêhi Tûpa ipipe —ehi omboetasa upe.

Aipo ihese, opacatu imboetasa viroya yuvîreco. ⁴⁰ Ichui rumo güeru iri apóstol inupa uca âgua iñehe iriêhi âgua Jesucristo rese yuvîreco. Inupa pare opa omose yuvîreco. ⁴¹ Ipipe apóstol ovihareté iteanga yuvîreco. Esepia, Tûpa ombou chupe iparaisu âgua yuvîreco Jesús rer rese iyeroyasa sui tîi. ⁴² Ipape ndopoi eté arî yacatu Poropîsirosar Jesús recocuer mombehusa sui yuvîreco. Omombehuño ité tûparo pipe iyavei opacatu ava rêta rupi yuvîreco.

6

Siete iporavosa iparaisu vahe pîtivîi âgua yuvîreco

¹ Ahe araviter pipe aipo oyemboetase Jesús reroyasar yuvîreco, griego pipe oñehe vahe oñehe rai oyeupe hebreo pipe oñehe vahe rese yuvîreco: "Nihañeco tuprîi ore mu imer mano vahecuer rese arî yacatu mbahe poropîtiviisa imondosase chupe" ehi oñehe yuvîreco. ² Evocoiyase doce apóstol omonuhapa uca opacatu Jesús reroyasar. Aheve aipo ehi yuvîreco chupe:

—Ndiyai rumo ore oropoi tēi Tūpa Ñehengagüer momba-husa sui mbahe poropitiviisa mondo ñgua rese tēi —ehi yuvireco—. ³ Sese ore rivireta, peiporavo siete mbia seco aviye vahe pe pāhu sui, yaracua vahe iyavei Espiritu Santo viroya vahe ité opiha pipe. Ahe mbia tihañeco co mboraviquisa rese yuvireco. ⁴ Ore evocoyase, oroyerureñora iyavei oroporomboheño itera Tūpa Ñehengagüer rese —ehi yuvireco.

⁵ Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espiritu Santo opiha pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuasa. ⁶ Ichui virasopa apóstol upe yuvireco. Ahe omondo opo iharive oyeroqui yuvireco sese.

⁷ Ahese Tūpa Ñehengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahi viroya iñehengagüer yuvireco.

Esteban písisa

⁸ Co mbia, Esteban, vireco ité Tūpa pīratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pāhuve. ⁹ Evocoyase Jerusalén ve oime judío tūparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oiñhepoepi-epi Esteban yuvireco. ¹⁰ Ndoicatu rumo iñehe recopi ñgua yuvireco. Esepia, ahe oñehe mbahecua Espiritu Santo omondo vahe pipe. ¹¹ Evocoyase yamotarēhimbar omboepi ambuae ava upe semira tēi ñgua sese yuvireco. “ ‘Ore orosendu co mbia oñehese mbahe naporai vahe rese Moisés amotarēhisave, Tūpa amotarēhisave avei’ aipo peyera peñehe” ehi yuvireco chupe. ¹² Evocoyase ahe ava oyamotarēhi uca opacatu ava mborerecuar reseve iyavei judío porocuaita rese oporombohe vahe upe avei yuvireco. Ichui oipisi yesapiha Esteban seraso mborerecuar uve porandusa ivate catu vahesave yuvireco. ¹³ Iyavei oseca mbia semira tēi vahe oñehe vaheñã sese yuvireco. Ahe aipo ehi:

—Co mbia oñehe-ñehe tēi yande tūparo guasu imaranehi vahe amotarēhisave, Moisés porocuaita amotarēhisave avei. ¹⁴ Ore orosendu iñehe: “Jesús Nazaret pendar omocañira tūparo guasu iyavei Moisés yande mbohese avei aipo osecañarora” ehi —ehi yuvireco chupe.

¹⁵ Ahese opacatu mborerecuar oñemonuha vahe yuvinoi aheve omahe Esteban rese yuvireco. Omahese aipo yuvireco sese, ndoyavi sepiaca Tũpa rembiguai i va pendar rova.

7

Esteban oñehe oyeepisa pipe

¹ Evocoyase pahĩ rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe. ² Ahese omboyevĩ chupe: “Che mu eta, peyapisaca che ñehe rese: Tũpa imboeteipri oyemboyecua yande ramoĩ Abraham upe aracahe. Mesopotamia ve secoi vitese, icho renondeve Harán ve seco ãgua, ³ aipo ehi chupe: ‘Eso nde recua sui; eseyapa nde mu; eso evocoi tecuave che amboyecua ndeu’ ehi Tũpa chupe. ⁴ Evocoyase osẽ Caldea ivi sui oso tecua Harán ve güeco ãgua. Omano pare tu Harán ve, Tũpa ombou cohava yande recosave. ⁵ Yepe oyepota tẽi cohava aracahe, Tũpa rumo nomondoimi eté que chĩhi ivi chupendar chupe. ‘Co ivi amondora ndeu nde mano pare nde suindar upe nara’ ehi Tũpa chupe (ahe rumo ndatahi vitei ahese). ⁶ Tũpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguirã semi-mombaraisuguã tẽi avei yuvirecoira cuatrociento araviter rupi’ ehi. ⁷ Tũpa rumo aipo ehi avei Abraham upe: ‘Che rumo, aicuara evocoi ava nde suindar mombaraisusar upe yuvireco. Ipare yuvinosera ipovri sui che mboetei iri ãgua cohava yuvireco’ ehi Tũpa chupe aracahe. ⁸ Tũpa oyocuai güemimbotar pipe Abraham guahĩr mbocircuncida ãgua rese. Sese Abraham ombocircuncida guahĩr Isaac iha pare ocho arĩ pipe. Isaac ãgüe ehi avei guahĩr Jacob upe. Jacob ãgüe ehi avei guahĩreta upe, ahe doce vahe Israel suindar” ehi.

⁹ “Ipare yuvirecoi vahe yande ramoĩ Jacob rahĩr omondo vivri guarepochi repirã yamotarẽhisa pipe yuvireco. Ahe tivri rer José omondo vahe Egipto pendar upe yuvireco. Tũpa rumo secoiño ité sese. ¹⁰ Ichui vinose opacatu iparaisusa sui. Omondo ombahecuasa chupe iyavei seco avĩye tupri ãgua Egipto pendar mborerecuar guasu faraón upe. Evocoyase faraón ipotasa pipe omoingue mborerecuar seco ãgua opacatu ava ivi Egipto pendar cui ãgua iyavei güeta pipendar cui ãgua avei.

¹¹ “Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoĩ ndoyosui mbahe güemihura yuvireco. ¹² Oyanduse rumo Jacob Egipto ve oime vitese trigo, ahese omondo guahĩr aheve seca, ahe yande ramoĩ yuvirecoi vahe. Ahe yipĩndar ichosa Egipto ve yuvireco. ¹³ Ichui yuviraso yupagüe irise Egipto ve, ahese

José oyecua uca viquehir upe. Ëgüe ehi faraón upe oicua uca uma sui oyesu. ¹⁴ Evocoyase José güeru uca oyesupa Jacob iyavei opacatu omu, ahe imu retacuer setenta y cinco tupri. ¹⁵ Ëgüe ehi Jacob yuviraso Egipto ve yuvirecoi ãgua opacatu guahir reseve. Aheve omano iyavei opacatu yande ramoi eta omano yuvireco aracahe. ¹⁶ Imano pare rumo, suminogüer viraso icangüer yuvireco tecua Siquem ve. Aheve oñoti yuvireco. Aheve acoi Abraham vırocua tuvıpa Hamor rahır sui aracahe” ehi mborerecuar upe.

¹⁷ “Ipare, virovise arı ipapapri Tüpa Ñhengagüer Abraham upendar, ahese yande ramoi setá catu-catu iri oyesu Egipto ve yuvireco aracahe. ¹⁸ Ipare oporocuai ambuae mborerecuar guasu Egipto ve. Ahe ndoicuai vahe ité yande ramoi José. ¹⁹ Evocoi mborerecuar guasu ombopa yande ramoi eta aracahe. Omombaraisu avei oyucapa uca israelita rahır cuimbahe pıtani. Ahe oyocuai iyesupa aipo ehi: ‘Peseya pe rahır oha ramomi vahe, tomanoño’ ehi yande ramoi upe aracahe. ²⁰ Aheseve avei aipo Moisés oha. Ahe pıtani aviye ité Tüpa uve. Ihare, iyesupa mbosapı yasimi rupive vıreco oyese güetave yuvireco. ²¹ Oseyase rumo iyesupa ive yuvireco, ahese faraón rayrı oseca ahe i rupi sui. Ichui vınose seraso güetave, omboacua omembri nungar ité sereco. ²² Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoyase Moisés ipırata ité oñehese iyavei oyapose mbahe.

²³ “Vırecose rumo Moisés cuarenta aravıter, ipıhañemoñeta: ‘Tasepia rane che mu israelita cohava yuvirecoi vahe’ ehi. ²⁴ Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu repıcave. ²⁵ Ahe rumo, ‘Oicua revo che mu Tüpa vınose uca ãgua Egipto sui yuvireco cheu’ ehi viña. Imu rumo nomohai eté Moisés vınose ãgua yuvireco evocoi ava po sui. ²⁶ Ahere ayihive oso omu pãhıve. Aheve osepia ñuvırıo mbıa ovavase oyeupe yuvireco. Ahe rumo oipota tēi iñero ãgua oyeupe yuvireco viña, aipo ehi chupe: ‘Che mu, oñemu mo peico, ¿mahera vo pevava peyese ae?’ ehi tēi chupe. ²⁷ Oyemovıracua catu vahe rumo omombo oyesui. Ichui ahe aipo ehi chupe: ‘¿Ava vo nde moingue ore pãhıve ore rerecuarã ore recocuer moingatu ãgua?’ ehi chupe. ²⁸ ‘¿Che yuca pota avei tie eve inungar ereyuca evocoi Egipto pendar irapıpe!’ ehi chupe. ²⁹ Osenduse rumo co iñehe, oñemi voi eté oso Egipto sui ambuae ivı Madián ve. Aheve opıta pucu. Ahe ivı rumo ndahei secua ité. Aheve oyesu ñuvırıo tahir.

³⁰ “Omboavıyese cuarenta aravıter Madián ve, Tüpa rembiguai oyemboyecua ivıtrı Sinaı rerovicave ivı

iporupirēhisave caha rese tata rendigüer pãhuve chupe.
³¹ Osepiase mbahe sendi vahe oyepihamondi, oyemboya
 catu sese sepia tupri ãgua viña. Ahese osendu Yar ñehe
 aipo ehi vahe: ³² ‘Che nde ramoi Tũpa aico. Nde ramoi
 Abraham, Isaac iyavei Jacob che reroya vahecuer yuvireco’
 ehi. Evocoyase Moisés oririi osiquiyesa pipe nomahe pota
 iri sese. ³³ Evocoyase Yar aipo ehi chupe: ‘Esequii nde
 pitaqui. Esepia, ivi nimarai vahesave ereico’ ehi chupe.
³⁴ ‘Che asepia tupri ité Egipto ve nde mu che rembiporavo
 paraisuse; asendu avei ipoãse tẽisa yuvireco yepi. Sese agüeyi
 ndeu nde oromondora aheve senosepa ãgua’ ehi Tũpa Moisés
 upe aracahe.

³⁵ ‘Yepe yande ramoi ndoviroya potaiño ité yuvireco, ‘¿Ava
 vo nde moingue ore rerecuarã ore recocuer moingatu ãgua?’
 ehiño yuvireco chupe, Tũpa ité rumo oyocuai güembiguai im-
 bogüeyi tata rendigüer pãhuve imoñehe Moisés upe iporocuai
 ãgua, ava renosepa ãgua avei ivi Egipto pendar mborere-
 cuar povri sui. ³⁶ Ipare ahe ité vinose yande ramoi eta
 Egipto sui, oyapo avei mbahe poromondiisa aheve ‘toicua
 Tũpa yuvireco’ oya, para guasu Pĩra vaheve avei oyapo
 poromondiisa iyavei ivi iporupirēhisa rupi avei cuarenta
 araviter rupi. ³⁷ Ahe avei aipo ehi israelita upe: ‘Tũpa
 vinosera pe pãhu sui ñepei oñehe mombehusar che nungar’
 ehi. ³⁸ Ahe avei acoi ivi iporupirēhisa rupi ava pãhu rupi secoi.
 Chupe avei oñehe Tũpa rembiguai ivitri Sinaí ve yande ramoi
 rese; ahe avei oipisi ñehesa tecovesa resendar yandeu imbou
 ãgua.

³⁹ ‘Yande ramoi eta rumo nomboyeroya potai eté Moisés
 yuvireco. Ipihañemoñetaño ité Egipto ve oyevi ãgua rese
 yuvireco. ⁴⁰ Evocoyase aipo ehi Aarón upe yuvireco:
 ‘Eyapomi catu ava tũpa rahanga oreu ore reroguata ãgua’
 ehi yuvireco chupe. ‘¿Que vo catu Moisés, ore renosesarer
 Egipto sui, secoi? Omano tie revo’ ehi tẽi israelita yuvireco
 aracahe. ⁴¹ Ipare oyapo uca mbahe rahanga guaca repiaca
 nungar oyeupe yuvireco. Oyuca mbahe mimba ahe mbahe
 rahanga upe viropovēhe vaherã yuvireco iyavei oyembovha
 pieta apo yuvireco güembiapo ucagüer rese tẽi. ⁴² Sese Tũpa
 opoiño ahe ava sui, ‘Toyerure evocoyase yasi, yasitata upe
 yuvireco’ ehiño chupe. Aipo ehi niha oñehe mombehusar
 icuachiapri pipe:

‘Pe peico vahe israelita, ndahei cheu peyuca mbahe
 mimba seropovēhe ãgua cuarenta araviter pipe ivi
 iporupirēhisa rupi.

⁴³ Pe rumo che mboeteiēhisa pipe peraso tũpa rahanga Moloc
 rēta iyavei yasitata rahanga Refán pe ae tẽi peyapo

vahe pe tūpaguã.

Sese che opovinosera pe recua sui pe mondo Babilonia cupe coi coti' ehi Tūpa chupe aracahe.

44 “Ivi iporupirēhisa rupi yande ramoi eta vireco Tūpa porocuita rēta oyeupive yuvireco aracahe mbahe mimba pির apopri. ‘Na peyera yapo’ ehi Moisés upe. Evocoyase iñehe rupi tupri oyapo uca. 45 Ahese coiye catu yande ramoi eta vireco co oi Tūpa rēta mbahe pির apopri yuvireco iyavei Josué rupi yugüeru vahe güeruño ité avei yuvireco, omosepase Tūpa ambuae ava co yande recuavi sui. Ēgüe ehiño vite ité ahe sereco yuvireco mborerecuar guasu, David, secoise aracahe. 46 Ahe David aviye ité Tūpa upe, oyapo pota setarã ‘toime tūparoguã yande ramoi Jacob rembieroya upe’ oya. 47 Tahir Salomón rumo omopuha ité ahe tūparo. 48 Tūpa rumo, seco ivate vahe, ndasecoi vahe tūparo ava tēi rembiapo pipe. Inungar acoi omombehu vahe Tūpa ñehe mombehusar aracahe aipo ehi:

49 ‘Iva che renda iyavei ivi che pirunga.

¿Mbahe nungar oi vo peyapora cheu? ehi yande Yar.

¿Que vo evocoyase che pituhu ãgua?

50 Che niha opacatu co mbahe aposar aico’ ehi Tūpa icuachi-apri pipe” ehi mborerecuar upe Esteban.

51 Ichui aipo ehi chupe: “Pe rumo ndapeyapisaca potai vahe ité peico. Oime tēi pe nambi, pe piha avei, ipipe rumo ndapeicuai eté Tūpa. Peico Espiritu Santo amotarēhimbar tēi inungar pe ramoi aracahe yuvirecoi. 52 ¡Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cūritei ou ndaseco marai vahe cute. Pe avei evocoyase ahe yuca uca ãgua peporocuai. 53 Pe pereco tēi Tūpa porocuita acoi Tūpa rembiguai güeru vahe yuvireco; ahe rumo ndaperoyaiño ité peico” ehi Esteban opacatu mborerecuar upe.

Esteban mano agüer

54 Osendupase mborerecuar iñehe, omboasí iteanga yuvireco; oñeaimboterepri ité yamotarēhisave yuvireco. 55 Esteban rumo vireco ité Espiritu Santo oyese. Evocoyase iva rese omahese, osepia Tūpa porañetesá. Osepia avei Jesús opūha ohã Tūpa acato coti. 56 Evocoyase aipo ehi:

—¡Pesepia! Asepia inungar iva imboipri. Aheve asepiá Ava Riquehir Vu acato coti ihã —ehi.

57 Mborerecuareta rumo osapucái pĩrata, oyopiño oapisacuar yuvireco ichui. Ahese yuvinoña guasu yuvireco chupe. 58 Viraso güecua ivi yuvireco. Aheve oseya oyeaosa

Saulo pive ‘tosãro’ oya yuvireco chupe. Ipare oyapi-yapi ita pipe yuca yuvireco.

⁵⁹ Oapi-apiseve, Esteban oyerure Tũpa upe: “Che Yar Jesús, eipisi che hã” ehi. ⁶⁰ Ipare oñenopiha, oñehe pĩrata Tũpa upe: “¡Che Yar, ndeñero co ava che amotarẽhisar angaipa upe!” ehi. Aipo ohe pare, omano.

8

¹ Iyavei Saulo, “Peyuca ité” ehi catu-catu aheve ohã.

Saulo oseca Jesús reroyasar mocañipa ãgua oico

Ahe ari pipeve omboipi Jesús amotarẽhimbar seroyasar reca mara-mara tẽi catu sereco ãgua yuvireco Jerusalén ve. Evocoiyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco. ² Oime ava Tũpa mboeteisar yuvirecoi vahe, ahe víraso Esteban rehögüer ñoti yuvireco. Itĩ pare, oyasehó iteanga yuvireco sese. ³ Ahe pipeve avei aipo Saulo omombaraisu ava Jesús reroyasar yuvirecoi vahe seroya ucaẽhi ãgua viña. Yuviroique-iqueño tẽi aipo sêta rupi cuimbahe, cuña mbotiriri senose soquenda ãgua yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vahecuer rumo Jerusalén sui omombehuño ité ñehesa pĩsirosa resendar que yuvirasosa rupi yuvireco. ⁵ Felipe oso Samaria rupi. Aheve omombehu ava upe: “Evocoi Jesús Tũpa Rembiporavo ava pĩsiro ãgua” ehi. ⁶ Ahese ava rehii oñemonuha Felipe ñehe rendu ãgua yuvireco. Oyapisaca tupri iñehe rese yuvireco. Esepia, osepia mbahe sembiapo poromondiisa. ⁷ Iyavei setá ava carugar rerecosar sui omose carugar. Osêse ava sui, sãse yuvireco. Iyavei setá ava nomii vahe, ndoguatai vahe avei ombogüera. ⁸ Evocoiyase oviharete ahe tecua pipendar yuvireco.

⁹ Aheve rumo mbia, Simón serer vahe, yipive ipaye ai oico, ombosiquiye-quiye ava Samaria pendar. “Che seco ivate vahe aico” ehi angahu ava mbopa. ¹⁰ Evocoiyase opacatu ava, cuacua vahe iyavei chĩhivahe catu vahe oyapisaca tupri iñehe rese, aipo ehi yuvireco: “Co niha Tũpa pĩratasa tuvicha vahe” ehi oyeupe yuvireco.

¹¹ Omboyeroya pucu ité yuvireco. Esepia, opayesa pipe ava ombosiquiye etepri oico yepi. ¹² Oyepotase rumo Felipe Samaria ve omombehu ñehesa aviye vahe Tũpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipare oñeapiramo ité yuvireco cuimbahe, cuña avei. ¹³ Ahe Simón avei viroya. Oñeapiramo

pare, oso Felipe rupi. Co mbahe poromondiisa iyavei Tūpa suindar ndayasepiai vahe rese oyepihamondi.

¹⁴ Jerusalén ve apóstol yuvirecoi vahe oyandu Samaria ve setá ava oipisise Tūpa Ñehengagüer yuvireco. Evocoyase omondo aheve omboetasa Pedro iyavei Juan yuvireco.

¹⁵ Oyepotase aheve yuvireco, oyerure opacatu ava Jesús reroyasar rese ‘Espíritu Santo toipisi yuvireco’ oya. ¹⁶ Esepia, Espíritu Santo ndogüeyi vitei yuvireco sese; oñeapiramoño tēi vite yande Yar Jesús rer pipe yuvireco. ¹⁷ Pedro iyavei Juan oyerurese, omondo opo iharive yuvireco. Ahese Espíritu Santo ogüeyi yuvireco sese.

¹⁸ Ahe osepiase, Simón omondo pota guarepochi chupe, ¹⁹ aipo ehi:

—Cheu avei pemboumi tēi evocoi pĩratasa, amondose che po que ava harive, togüeyi avei Espíritu Santo sese yuvireco —ehi Simón.

²⁰ Omboyevi rumo Simón upe:

—¡Tocañipa nde guarepochi nde reseve! Esepia, ndepihañemoñeta co Tūpa ombou vahe oreu, ererocua vahe rã nde guarepochi pipe viña —ehi chupe—. ²¹ Ndeu ndiyai co nungar mbahe apo água. Esepia, nde pihañemoñetasa ndahei ihivi vahe Tūpa rovaque. ²² Sese epoi nde pihañemoñeta raisa sui, eyerure Tūpa upe. Aviyeteramo iñerora ndeu —ehi—. ²³ Aicua nde pihã naporai vite iyavei nde pihañemoñeta raisa pipe vite ereico —ehi chupe.

²⁴ Evocoyase Simón omboyevi chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

²⁵ Yande Yar ñehesa mombehu pare ahe tecua pendar upe, apóstol omombehu-mbehu co ñehesa pĩsirosa resendar Samaria pĩpendar tecua rupi yuvireco. Êgüe ehi oyepota yuviroyevi Jerusalén ve yugüeru.

Felipe omombehu Jesucristo recocuer Etiopía pendar upe

²⁶ Ipate Tūpa rembiguai oyemboyecua Felipe upe aipo ehi chupe: “Epũha, eso irohĩ coti nde yepota água evocoi peri ogüeyi vahe oso Jerusalén sui, Gaza ve” ehi. Evocoi Gaza piar osasa ivi iporupirēhi rupi oso. ²⁷ Evocoyase opũha oso peri rupi. Aheve osovaichi ñepepe ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mbia oso vahe Jerusalén ve Tūpa mboetei água. ²⁸ Oyevise ocãreto pipe, oyeroqui Tūpa ñehe mombehusar Isaías rembicuachiagüer rese ou.

²⁹ Evocoyase Espíritu aipo ehi Felipe upe: “Eyemboya cãretomi rese” ehi. ³⁰ Evocoyase virovise ahe ava, osendu

iyeroqui Isaías rembicuachiagüer pipe oĩ. Ahese oporandu chupe:

—¿Eresenducua aipo Tũpa Ñehengagüer nde yeroquisa eĩ? —ehi chupe.

³¹ Etiopía pendar mbia omboyevi chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguapi cohava che piri” ehi Etiopía pendar chupe. ³² Ahe Isaías rembicuachía oyerogui vahe pipe aipo ehi:

“Inungar ava viraso ovesa yuca ãgua, ãgüe ehi avei ahe mbia seraso yuca ãgua yuvireco.

Iyavei inungar ovesa nasasei eté guagüer rerocuase, ãgüe ehi avei ahe mbia noñehi eté.

³³ Osecomomini yuvireco, ndipoi ava sepisar.

Ndipoi ichuindar.

Esepia, omocañi co ivi sui yuvireco” ehi Isaías rembicuachía pipe.

³⁴ Oyerogui pare ahe Etiopía pendar oporandu chupe:

—Emombehumí cheu: ¿Ava rese pĩha aipo Isaías oñehi: oyese ae pĩha, ambuae ava rese tie? —ehi.

³⁵ Evocoyase co ñehesa sui omombehu ñehesa aviye vahe Jesús recocuer resendar Etiopía pendar upe. ³⁶ Ipare oguata catuse yuvireco, Etiopía pendar osepia i. Aheve ahe aipo ehi chupe:

—Esepia co i tui. ¿Ndiyái vo cohava che ãpiramomi tẽi eve viña? —ehi.

³⁷ Ahese omboyevi chupe:

—Ereroya itese opacatu nde pĩha pipe, iya ité ndeu —ehi.

—Aroya ité niha Jesucristo ahe Tũpa Rahir secoi —ehi.

³⁸ Evocoyase omombita uca ocãreto, ichui ogüeyi ive yuviraso. Aheve Etiopía pendar Felipe oñapiramo.

³⁹ Yuvinosese i sui, yande Yar Espiritu viraso ahe Etiopía pendar sui. Ahese ndosepia iri; ãgüe ehiño vorivete oso peri rupi. ⁴⁰ Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. ãgüe ehi oyepota Cesarea ve oso.

9

Saulo ñecuñaro agüer

¹ Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecuar ivate catu vahe upe, ² oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi.

“Taipiſipa seru cohawe nde rer piſe” ehi, “evocoiyase eremombehura cuachiar piſe Damasco pendar tũparo rerecuar upe” ehi pahi rerecuar ivate catu vahe upe. ³ Ēgüe ehi yuvinoſe Jerusalén sui, yuviraſo Damasco ve ambuae ava reſeve. Virovi potaſe rumo Damasco yuviraſo, aviyeteramo tēi oſeſape guaſu iſa sui chuſe. ⁴ Evocoiyase oviapi oſo ivive. Oſendu iſa pendar ñeheſa aipo ehi vahe: “Saulo, Saulo, ¿mahera vo che moña-moña eve?” ehi chuſe.

⁵ Evocoiyase oporandu chuſe: “¿Ava vo nde ereico, nde mbia?” ehi. “Che Jeſús, che niha co che moña che rereco eve” ehi chuſe. ⁶ “Epũha, eiſe Damasco ve. Aheve amombehu ucara mbahe nde rembiapoguã ndeu” ehi chuſe.

⁷ Ava rumo, yuviraſo vahe ſupi, oſiquiyé iteanga oſenduse ñeheſa iſa ſuindar yuvireco. Eſepia, ndoſepiai eté ivate oñehe vahe yuvireco. ⁸ Ipare Saulo opũha, omahe tēi; ndoicatui rumo mbahe repia. Ichui ſupindar oipiſi iyiva reſe ſeraſo Damasco ve yuvireco. ⁹ Aheve mbosapi ari ndaſeſapiſoi, ndocarui, ndoihui avei oico.

¹⁰ Aheve mbia Jeſucristo reroyaraſa Ananías ſerer vahe ſecoi. Ahe iquer nungarve oyemboyecua yande Yar aipo ehi chuſe: “¿Ananías!” ehi. “Co aico, che Yar” ehi imboyevi chuſe.

¹¹ Evocoiyase yande Yar aipo ehi chuſe: “Epũha, eſo calle Ihívi ſerer vahe rupi. Eporandu Judas rētave Saulo, tecua Tarſo pendar, reſe. Ahe oyerocuĩ cūrutei. ¹² Oquerve angahu oſepia mbia Ananías ſerer vahe omondose opo iharive ombesapiſo iri” ehi.

¹³ Evocoiyase omboyevi chuſe: “¿Too! Che Yar, ſetá rumo evocoi mbia recocuier ombombehu yuvireco cheu. Mbahe tēi oyapo vahe nde reroyaraſa reco maranehi upe Jerusalén ve. ¹⁴ Cūrutei ou rutei ahe mbia pahi rerecuar porocuaita rupi opacatu nde rer reſe oyeroya vahe roquendapa ãgua” ehi.

¹⁵ Yande Yar rumo aipo ehi chuſe: “Eſo. Eſepia, aiporavo evocoi mbia che recocuier reſe oñehe vaheſã ava ndaheſi vahe juđío upe iyaveſi ſerecuar guaſu yuvirecoſi vahe upe, juđío upe avei. ¹⁶ Che ae amboyecuara ſetá mbahe tēi chuſe oiporara vaheſã che remimbotar mboaviye ãgua” ehi yande Yar chuſe.

¹⁷ Evocoiyase oſo ſecoſave. Oiqueſe ahe oi piſe, oſo, omondo opo Saulo reſe aipo ehi chuſe:

—Che rivi, Saulo, yande Yar Jeſús oyemboyecua vahe ndeu peri rupi nde yuſe, ahe che mbou ndeu nde ombesapiſo iri ãgua. Toique avei catu Eſpíritu Santo nde reſe —ehi Saulo upe.

¹⁸ Aheſe voi eté pira piraſe nungar mbahe oviapipa ſeſa sui. Aheſe voi ſeſapiſo iri. Ichui opũha. Ipare voi Ananías oñapiramo. ¹⁹ Ipare Saulo ocaſe, ipirata catu iri. Moviro ari tēi opita iri Jeſús reroyaraſa piri Damasco ve.

Saulo omombehu Jesús recocuer Damasco ve

²⁰ Ipare voi oso oñehe judío tũparo yacatu rupi Damasco ve aipo ehi: “Jesús Tũpa Rahir ité secoi” ehi ahe pendar ava upe.

²¹ Ava opacatu osendu vahe iñehe,

—¿Mara ehi pĩha co? —ehi tẽi yuvireco—. ¿Ndahei vo acoi co mbĩa Jerusalén ve Jesús reroyasar mara-mara tẽi vireco vahe? ¿Ndahei vo acoi co avei ou cohava ava Jesús reroyasar ha pendar pĩsi ãgua serasopa ãgua avei Jerusalén ve pahi rerecuar upe viña? —ehi yuvireco chupe.

²² Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tũpa Rembiporavo ava pĩsiro ãgua secosa. Sese ndoicatu judío iñehe mboyevi yuvireco.

Saulo oñemi omu sui oamotarẽhise

²³ Setá arĩ pare judío ahe pendar omboguai yuca ãgua Saulo yuvireco viña. ²⁴ Ahe rumo oyandu omboguaisa judío osãrose tecua ãchisa roquendipive arĩ, pĩtu momba yuvireco yuca ãgua viña. ²⁵ Jesús reroyasar rumo pĩtu pipe tecua tapia ãchisa oyere tupri vahe tecua rese, icupe rupi ombogüeyi iruova guasu pipe imoñemi imondo yuvireco.

Saulo Jerusalén ve secoi

²⁶ Coiye Saulo oyepota Jerusalén ve. Aheve oyemboya pota tẽi Jesucristo reroyasar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tẽira yandeu” ehiño oyeupe yuvireco. ²⁷ Ipare rumo Bernabé viraso Saulo apóstol yuvirecoi vahe upe. Aheve Bernabé omombehupa chupe aipo ehi: “Co mbĩa Saulo osepia yande Yar peri rupi iyavei yande Yar oñehe chupe. Ichui co oñehe osiquiyeẽhisa pipe Damasco ve Jesús recocuer rese” ehi. ²⁸ Evocoiyase Saulo opĩta aheve ipiri. Arĩ yacatu rupi apóstol rupi oguata yepi, iyavei omombehu yande Yar recocuer osiquiyeẽhisave. ²⁹ Oiñehopepi avei secocuer rese judío griego pipe oñehe vahe yuvireco. Ichui rumo oyuca potaño yuvireco. ³⁰ Oicuase rumo Jesucristo reroyasar yuvireco, viraso voi eté Saulo Cesarea ve. Ichui omondo Tarso ve yuvireco.

³¹ Evocoiyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemoviracua tupri catu yuvireco yande Yar mboeteisa pipe, Espiritu Santo oipĩtivii iyemboeta catu ãgua yuvireco.

Eneas mbogüera agüer

³² Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar.

³³ Aheve osepia mbia Eneas serer vahe, ahe ndoguatai vahe. Vupave tēi tui vahe ocho araviter rupi. ³⁴ Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoyase oñarapuha voi. ³⁵ Osepiase opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

Dorcac cuerayevi agüer

³⁶ Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporopitivii yepi. ³⁷ Imbaheasi guasu rumo. Coiye omano. Ipare ava sehögüer oyosei yuvireco. Ichui viroyeupi oi ivate vahesave seraso yuvireco. ³⁸ Jope namombriimi Lida sui. Evocoyase oyanduse Jesús reroyasar Jope pendar Pedro Lida ve secoise, ahese omondo ñuvirío mbia seru poyava ñgua Jope ve yuvireco.

³⁹ Evocoyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivii yuvireco. Omboyecua avei oturucuar ihari pendar reseve Dorcas rembiapogüer yuvireco chupe. ⁴⁰ Ipare Pedro omosepa rane opacatu ava ocarve. Ahese ahe ae oñenopiha, oyerure Tüpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oĩ. ⁴¹ Ahese oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe. ⁴² Serãcua oyanduse opacatu Jope rupi yuvireco, setá ava yande Yar viroya yuvireco. ⁴³ Evocoyase Pedro opita setá ari aheve, mbia mbahe pirer mopitasar, Simón serer vahe, piri.

10

Pedro iyavei Cornelio

¹ Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar. ² Ahe mbia omboetei Tüpa opacatu guahar, güembireco reseve yepi. Iyavei omondoño ité judío pñivii ñgua guarepochi, oyerogui avei Tüpa upe yepi. ³ Ñepeí ari, caharuse las tres rupi, osepia oquer nungar pipe Tüpa rembiguai güecosave aipo ehi chupe: “¡Cornelio!” ehi. ⁴ Omahengatuse sese, “¿Mbahe, che Yar?” ehi osiquiyepave. Tüpa rembiguai rumo

omboyeví chupe: “Tūpa oipisi nde yeruresa; osepia avei nde poroparaisuerecosa” ehi chupe. ⁵ “Emondo mbia Jope ve Simón reca. Ahe serer avei acoi Pedro. ⁶ Ahe seci ambuae Simón, mbahe pírer mopítasar píri. Ahe sēta para guasu popíve chini” ehi chupe.

⁷ Osose Tūpa rembiguai ichui, Cornelio oñehe ñuvirío güembiguai upe iyavei ñepei sundao Tūpa mboeteisar upe, sese acoi oyeroya vahe yepi. ⁸ Opacatu Tūpa rembiguai ñehe mombehu pare, omondo Jope ve.

⁹ Ahere ayihive vírovise Jope yuviraso, Pedro oyeupi oi ipe vahe harive mbíter ari senise oyerogui ãgua. ¹⁰ Vieporēhise ocaru pota viña. Omoingatu viteseve rumo semihura yuvireco, aviyeteramo tēi osepia mbahe oquer pendar nungar: ¹¹ ahese osepia íva oyemboise, ahe ichui turucuar tuvicha vahe pípe ogüeyi mbahe, ñapichimbri ipopi yacatu ou chupe. ¹² Ahe turucuar pípe, osepia opacatu mahembiar vai, mboi, vírai vai tēi avei. ¹³ Ahese osendu ñehesa aipo ehi vahe: “Pedro, epūha, eyuca, ichui ehui” ehi chupe.

¹⁴ Pedro rumo omboyeví chupe: “Aní, che Yar, che rumo ndahui vahe ité co mbahe roho ava remimbotarēhi ndihusai vahe yepi” ehi chupe. ¹⁵ Osendu iri ñehesa aipo ehi vahe chupe: “Tūpa remimbocatupri upe, ‘Ava remimbotarēhi, ndihusai vahe’ nderei chira” ehi.

¹⁶ Ēgüe ehi mbosapi oyupagüer rupi chupe. Ipare turucuar oyeve ívave oso. ¹⁷ Pedro ipihañemoñeta vitesese mbahe osepia vahecuer rese oquer nungar pípe: “¿Mbahe rese píha co oyemboyecua cheu?” ehi vite oico. Aheseve Cornelio remimondo oporandu-randu pare yuvireco, oyepota Simón rēta roquendipive yuvireco. ¹⁸ Oñehe pucu oi pípendar upe yuvinoha: “¿Ave vo Simón, ahe Pedro serer vahe, seci?” ehi yuvireco.

¹⁹ Ipihañemoñeta vitesese Pedro mbahe oyemboyecua vahecuer rese, Espiritu Santo aipo ehi chupe: “Pedro, esendu rane, pe mbosapi mbia nde reca yuvireco. ²⁰ Eyemoingatu, egüeyi chupe, eso supi. ‘¿Asora píha?’ erei rene. Esepia, che ambou evocoi mbia nde reca” ehi Espiritu Santo Pedro upe.

²¹ Evocoiyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

²² Ahe evocoiyase omboyeví ñehe yuvireco chupe:

—Ore oroyu sundao rerecurar Cornelio ore cuaisa pípe, ahe mbia seco ívi vahe, Tūpa mboeteisar opacatu judío osaisu, oipota rai yuvireco. Tūpa rembiguai oyocuai nde rese ereso vaheerã sētave, ahe osendu vaheerã nde ñehesa —ehi yuvireco Pedro upe.

²³ Evocoiyase omoinguepa, omombitapa oyepiri ñepeí pítu. Ahere ayihive oso supí, moviro Jesús reroyasar Jope pendar yuviraso avei supí Cesarea ve yuvireco.

²⁴ Ahere ayihive oyepotase Cesarea ve, yuviraso sêtave. Cornelio rumo osãro opacatu omu eta rese yuvireco iyavei omboriparete güembisoho reseve avei. ²⁵ Oyepotase sêtave oso, Cornelio rane osê voi, osovaïchi, oñenopiha sovai imboeteisa pípe. ²⁶ Pedro rumo aipo ehi chupe:

—Epũha, che niha nde nungar avei aico —ehi chupe.

²⁷ Evocoiyase ahe omoñeta seroique seraso oi pípe. Aheve ava oñemonuha vahe setá osepia yuvireco. ²⁸ Ahe ava upe aipo ehi:

—Pe peicua judío porocuaíta aipo ehi vahe: “Peiquei rene ndahei vahe judío píri. Aní chiaveira pembori evocoi ava peico” ehi acoi —ehi Cornelio rêta pípendar upe—. Tũpa rumo omombehu cheu che quer nungar pípe: “‘Ava remimbotarêhi peico’ erei rene ambuae ava upe” ehi cheu. ²⁹ Pe pemondo ava che reca. Che evocoiyase nacheatêhi che yu ãgua pẽu. Sese che aicua pota, ¿mahera vo che reru uca peye? —ehi.

³⁰ Evocoiyase Cornelio aipo ehi chupe:

—Opa co irungatu ari, caharuse co hora rupi tupri avei, che cohava che rêtave aicose, ndacarui eté che yerure ãgua Tũpa upe. Aheseve oyemboyecua mbia Tũpa rembiguai iturucuar rendí iteanga vahe cheu. ³¹ Ahe aipo ehi cheu: “Cornelio, Tũpa osendu nde yeruresa iyavei oicua avei nde poroparaisuerecosa. ³² Emondo nde rembiguai Jope ve Simón Pedro serer vahe reca. Ahe oicove ambuae Simón rêtave, ahe mbahe pírer mopítasar. Ahe sêta para guasu popive chini” ehi cheu. ³³ Sese amondo voi eté nde reca ãgua. Aviye nde ereyu cohava. Cũritei co opacatu yaico cohava Tũpa rovaque. Orosendu pota opacatu nde ñehe yande Yar nde cuai vahe nde ñehe ãgua oreu —ehi Cornelio chupe.

Pedro oñehe Cornelio rêtave

³⁴ Evocoiyase Pedro aipo ehi chupe:

—Aicua cute, supí eté Tũpa nombayahoi yande raisu.

³⁵ Sese ambuae ivi pípendar omboetei vahe Tũpa, oyapo vahe avei mbahe tupri yuvireco, ahe oipisira Tũpa. ³⁶ Aracahe Tũpa oñehe avei Israel suindar upe, omombehu ñehesa tupri yeamotarêhiêhisa resendar Jesucristo rembiaporã sui, ahe opacatu ava co ivi pípendar yuvirecoi vahe Yar. ³⁷ Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare. ³⁸ Peicua revo Tũpa omondo Jesús Nazaret pendar upe opiratasa, oEspíritu Santo avei. Ipare Jesús oguata opacatu rupi mbahe tupri apo oico. Ombogüera avei opacatu ava iparaisu vahe

carugar povrive yuvirecoi vahe. Esepia, Tūpa secoi sese. ³⁹ Ore orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco. ⁴⁰ Tūpa rumo ombogüerayevi imombosapisa ari pipe. Ipare omboyecua iri oreu. ⁴¹ Nomboyecuai rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oihu avei ocuerayevi pare. ⁴² Iyavei ahe ore cuai: “Pemombehu ava upe. Co che Jesucristo, Tūpa Rembiporavo, aico opacatu ava recocuer rese porandu āgua oicove vite vahe, omano vahe avei” ehi oreu. ⁴³ Ahe secocuer avei opacatu Tūpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tūpa ñeroisa serer pipe angaipa rese yuvireco” ehi —ehi Pedro Cornelio rēta pipe yuvinoi vahe upe.

Espíritu Santo oique ava ndahei vahe judío pīha pipe

⁴⁴ Pedro oñehe vitesese, Espiritu Santo ogüeyi opacatu ava osendu vahe rese. ⁴⁵ “¡Too! Evocoyase ndahei vahe judío upe avei Tūpa omondo Espiritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco. ⁴⁶ Esepia, osendu ahe oñehese ñehesa ndicuasai vahe pipe yuvireco Tūpa upe. ⁴⁷ Evocoyase aipo ehi vupindar upe:

—¿Oime pīha ndoipotai vahe co ava ñeapiramo āgua yande pāhu pendar? Esepia, co oipisi Espiritu Santo yuvireco inungar yande —ehi vupindar upe.

⁴⁸ Sese,

—Yañapiramopa Jesucristo rer pipe yuvireco —ehi.

Ipare Cornelio rēta pipe yuvinoi vahe aipo ehi: “Epita vitemi moviro ari ore piri” ehi yuvireco chupe.

11

Pedro remimombehu Jerusalén pendar Jesús reroyasar upe

¹ Evocoyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tūpa Ñhengagüer yuvireco. ² Oyevise rumo Pedro Jerusalén ve oso, ahese setá judío Jesucristo reroyasar viroïro sovai eté yuvireco, ³ aipo ehi:

—¡Mahera eresoño tēi eté ndahei vahe judío piri! Iyavei nde erecaruño tēi eté ipāhuve yuvireco no —ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵ —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi yacatu ñapichisa vahe ogüeyi ou che rovai iva sui. ⁶ Asepia ipipe

opacatu mahembiar ihupirēhi, mbahe mīmba, mboi, vīrai vai tēi avei —ehi—. ⁷ Iyavei ahese asendu ñehesa aipo ehi cheu: “Pedro, epūha, eyuca, ehū” ehi cheu. ⁸ Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe. ⁹ Ichui asendu iri ñehesa: “Tūpa remimbocatupri upe, ‘Ava remimbotarēhi’ erei rene” ehi cheu. ¹⁰ Ēgüe ehi mbosapi oyupagüer rupi cheu. Ipare opacatu oyevi iri ivave oso. ¹¹ Aheseve avei mbosapi mbia imboupri Cesarea sui oyepota yuvireco che recosave che reca. ¹² Espiritu Santo che cuai che so āgua che atēhiēhisa pipe supi yuvireco. Co seis mbia Tūpa reroyasar, yande mu, yuviraso avei che rupi. Ipare aheve oroyepotase oroso, oroique Cornelio rētave. ¹³ Ahe omombehu oreu osepia vahecuer güētave Tūpa rembiguai oyemboyecua vahe sovai iyavei aipo ehi vahe chupe: “Emondo mbia tecua Jope ve Simón Pedro reru āgua. ¹⁴ Ahe omombehura ndeu nde ñepisiro āgua iyavei opacatu nde rēta pendar ñepisiro āgua avei” ehi Tūpa rembiguai Cornelio upe —ehi—. ¹⁵ Añehe ramoseve chupe, Espiritu Santo ou sese yuvireco inungar yande rese ou aracaco. ¹⁶ Evocoyase che chemahenduha voi eté yande Yar ñehengagüer rese aipo ehi vahecuer: “Supi eté i pipe Juan oporoāpiramo, pe rumo Espiritu Santo pipe peñeapiramora” ehi vahe. ¹⁷ Tūpa Espiritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tūpa ayamotarēhira —ehi Pedro omu upe.

¹⁸ Osenduse rumo co Pedro ñehe, imu noñehe iri sese yuvireco. Ahe rumo,

—¡Too, evocoyase Tūpa ombou avei ndahei vahe judío upe secocuer recuñaro āgua, tecovesa apirēhi vahe rereco āgua! — ehi Tūpa mboeteisa pipe yuvireco.

Ava Jesús reroyasar Antioquía ve

¹⁹ Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarēhimbar oyamotarēhi catu yuvireco. Evocoyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco. ²⁰ Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco. ²¹ Yande Yar pīratasa vireco yuvireco. Evocoyase setá ava viroya; oseyá ité yipindar güembieroya yuvireco yande Yar reroya āgua.

²² Serācua oyepotase Jesús reroyasar upe Jerusalén ve, ahese omondo Bernabé yuvireco Antioquía ve. ²³ Oyepotase

aheve, osepia Tūpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco. ²⁴ Bernabé aviye etepri vahe, viroya ité Espíritu Santo iyavei oyeroya ité yande Yar rese. Evocoyase setá ava oyemboya yande Yar rese yuvireco.

²⁵ Ipare oso Tarso ve Saulo reca. ²⁶ Oyosuse, güeru Antioquía ve. Aheve oyemboya yuvireco ambuae viroya vahe rese imbohe água ñepei araviter rupi. Setá ava oyembohe ipiri yuvireco. Ahese Jesús reroyasar Antioquía pendar upe yipindar, “Cristo reroyasar” ehi yuvireco.

²⁷ Aheseve Tūpa ñehe mombehusar yugüeru Antioquía ve Jerusalén sui. ²⁸ Ñepei ipãhu pendar, Agabo serer vahe, opūha aipo ehi Espíritu Santo pīratasa pipe chupe: “Oura tiavor guasu opacatu ivi rupi” ehi, (ahe tiavor oyepota mborerecuar guasu Claudio recose). ²⁹ Evocoyase Jesús reroyasar Antioquía pendar omondo pota voi guarepochi Jesús reroyasar Judea pendar pītivi água yuvireco ocatugüer rupi. ³⁰ Ēgüe ehi yande Yar reroyasar rārosar Judea pendar upe porerecosa mondo. Bernabé, Saulo ahe porerecosa viraso yuvireco.

12

Santiago mano agüer iyavei Pedro roquenda agüer

¹ Ahe araviter pipe avei mborerecuar guasu Herodes omboipi Jesús reroyasar mombaraisu. ² Ahese oyuca uca quise pucu pipe Santiago, ahe Juan riquehir. ³ Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi. ⁴ Pedro roquenda pare omondo irungatu imar sui irungatungatu sundao omondo sãro água yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña. ⁵ Evocoyase Pedro opita voquendasave sãrombri tupri chini. Jesús reroyasar rumo oyerogui pīrata Tūpa upe yuvireco sese.

Tūpa omose uca Pedro soquendasa sui

⁶ Ahe ari vinose potase Herodes Pedro soquendasa sui, ahe pītu pipe Pedro oque ñuvirío sundao guãrosar rese. Ñapichisa ñuvirío carena pipe ou, ñuvinohambe avei sãrosar soquendasa roquendipive. ⁷ Aviyeteramo tēi Tūpa rembiguai oyemboyecua ique vitesevu chupe. Ahese sendi guasú iteanga soquendasa pipe. Ahe oñatoi Pedro iqueve imomahe: “¡Epūha poyava!” ehi chupe. Ipūhase, opa voi oyera carena ipo sui. ⁸ Ahese Tūpa rembiguai aipo ehi chupe: “Eyemonde, emonde

nde pitaqui” ehi. Evocoyase Pedro omonde. Ipape aipo ehi iri: “Emonde avei nde yeasa, eyu che raquicuei” ehi chupe.

⁹ Ēgüe ehi oso saquicuei. Ahe rumo ndoicuai Tūpa rembiguai oyeupe ēgüe ehise. Ndojavii iquerve tēi ēgüe ehi vahe chupe. ¹⁰ Ichui yuvinose, oñocua yipindar guãrosar yuvireco. Ipape yuviraso catumi ambuae imoñuviriosa guãrosar oñocua avei. Oyepota oquenda guasu guarepochi apoprive ocarve yuvinose āgua yuvireco. Ahe oquenda oyemboi ahe ae ité chupe yuvireco. Ipape yuvinose yuviraso pucumi ocarusu rupi. Aviyeteramo tēi Tūpa rembiguai ndoyecua iri chupe.

¹¹ Evocoyase Pedro aipo ehi oyeupe: “¡Too! Supi eté Tūpa ombou cheu güembiguai che renose āgua Herodes povri sui. Tūpa che pĩsĩro judío rerecuar che yuca rāgüer sui” ehi oyeupe.

¹² Oyese opihañemoñeta pare, oso, oyepota Juan Marcos si María rētave oso. Aheve setá ava oñemonuha oyeroku yuvireco sese. ¹³ Oñehese Pedro oquenda ocar cotindarve, cuñatai, Rode serer vahe, osē imboi āgua chupe. ¹⁴ Osenduse rumo Pedro ñehe, oquenda omboi rāgüer sui, oña oi que oi pipe vorivetesave, omombehu: “Pe Pedro ihāi oquendipive” ehi oi pipendar upe. ¹⁵ Ahe rumo,

—¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tūpa rembiguai mo aipo sãrosar —ehiño yuvireco chupe.

¹⁶ Aheseve Pedro oñehe viteño ité oquendipive ohã. Ichui omboise oquenda yuvireco chupe cute, oyembosiquiye iriño tēi sepiase yuvireco. ¹⁷ Pedro rumo opo omopuha imonguiriri āgua. Ichui opa omombehu yande Yar opĩsĩro agüer voquendasa sui chupe yuvireco. Ipape aipo ehi chupe:

—Pemombehupa Santiago upe iyavei ambuae Jesús reroyasar upe —ehi.

Ichui oseño, ambuaeve oso.

¹⁸ Cõhese sundao oyepihamondii eteanga yuvireco. “¿Que pĩha Pedro?” ehi tēi oyeupe yuvireco. ¹⁹ Ipape Herodes omondo sundao Pedro reca. Ndoyosui eté rumo yuvireco. Evocoyase Herodes porocuita rupi oporandu tupri sãrosar upe: “¿Que vo secoi?” ehi tēi chupe. Sese oyocuai ambuae sundao opacatu ahe sãrosar yucapa āgua. Ipape Herodes osē Judea sui oso Cesarea ve oyemboerecua.

Herodes mano agüer

²⁰ Yipindar rumo Herodes ndasorii eté ava Tiro pendar upe, Sidón pendar upe avei. Evocoyase ahe pendar oyoya ipihañemoñeta yuviraso vahe rã mborerecuar rovai.

Ahe evocoiyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca ãgua rese yuvireco. Esepia, Herodes porocuita sui oipisi mbahe güemihura yuvireco. ²¹ Herodes evocoiyase omombehu ari oñehe vahe rã chupe. Osupitise ahe ari, omonde sese iturucuar mborerecuar secosa resendar yivirindar yuvireco. Ipare güenda imboeteipri harive oguapi oĩ. Aheve oñehe ava rehii upe. ²² Evocoiyase ava rehii osapucái pĩrata yuvireco aipo ehi: “¡Co mbia oñehe vahe ndahei ava tẽi, Tũpa ité!” ehi yuvireco Herodes upe imboeteisave. ²³ Ava aipo iheseve voi, ñepei Tũpa rembiguai oyapo mbaherasi guasu chupe. Ichui mbahe rasoi ocaru yaviter rupi yuvireco. Esepia, nomboetei eté Tũpa. Sese omano.

²⁴ Tũpa Ñehengagüer rumo imombehusa catu opacatu rupi.

²⁵ Iyavei Bernabé, Saulo ocuita mboaviye pare, viroyevi Juan Marcos seraso yuvireco.

13

Tũpa oiporavo Bernabé, Saulo oyeupe mboraviqui apo ãgua

¹ Evocoiyase Jesús reroyasar Antioquía pendar pãhuve oime Tũpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avaũ” ehi yuvireco), Lucio evocoi Cirene pendar, Manaén (ahe mbia oyoya ocuacua mborerecuar Herodes, Galilea pendar reseve) iyavei Saulo. ² Ñepei ari opacatu Jesús reroyasar oñemonuhase yande Yar mboetei ãgua, oyecuacu avei, ahese Espĩritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo ãgua” ehi Espĩritu Santo yuvireco chupe.

³ Evocoiyase oyeroqui pare, omondo opo yuvireco iporavopri ãca harive sovasa ãgua. Ipare omondo yuvireco ambuae tecua rupi Jesús recocuer mombehu ãgua.

Apóstol yuvirecoi Chipre rupi

⁴ Evocoiyase Bernabé, Saulo Espĩritu Santo remimondo yuviraso Seleucia ve. Ichui yuviraso carite pipe caha pãhu Chipre ve. ⁵ Oyepota yemboyasa Salamina ve yuviraso. Aheve omombehu Tũpa Ñehengagüer judío tũparo rupi yuvireco. Juan avei oso supi ipĩtivii ãgua.

⁶ Opase ité oguata caha pãhu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tẽi: “Che añehe Tũpa Ñehengagüer rese” ehi tupri tẽi vahe. ⁷ Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar yaracua

vahe. Ahe güeru uca Bernabé, Saulo avei Tüpa Ñehengagüer rendu potasave oyeupe. ⁸ Ipaye vahe rer griego ñehe pipe Elimas. Ahe ndoviroya ucai güerecuar upe ñehesa supí eté vahe. ⁹ Evocoiyase Saulo, Pablo serer vahe, vireco ité vahe Espíritu Santo opiha pipe, omahe tupri sese. ¹⁰ Ipare aipo ehi chupe:

—¡Nde iporombopa serai vahe ereico! ¡Ndipihai vahe, Carugar rahir tēi ereico! Opacatu mbahe aviye vahe amotarēhisar tēi avei ereico no. ¡Mahera nderepoi potai yande Yar porombohesa supi eté vahe reroñrosa sui. ¹¹ Eyapisaca, cūritei yande Yar nde mombaraisura. Nande mboesapisoi chira moviro ari rupi. Ichui ndereicatu iri chietera ari rendigüer repia āgua —ehi Pablo chupe.

Aipo ehi ramoseve voi, opacatu pītumimbi chupe. Oñehe tēi ava güeraso āgua upe. ¹² Ahe mbahe repiase, mborerecuar viroya yande Yar. Oyepihamondi iporombohesa yande Yar resendar renduse.

Pablo, Bernabé reseve yuvirecoi Antioquía ve Pisidia ivi pipe

¹³ Evocoiyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseya oyevi Jerusalén ve oso. ¹⁴ Perge sui yuviraso Antioquía ve, ahe namombrii Pisidia sui. Aheve, mbituhusa ari pipe, yuviroique judío tūparove oguapi yuvinoi. ¹⁵ Oyeroqui pare Tüpa porocuita resendar cuachiar pipe, Tüpa ñehe mombehusar cuachiar pipe avei, tūparo pendar rerecuar omondo oñehe Pablo upe:

—Ore mu, perecose mbahe pemombehu vaheerā co ava monguerēhi āgua, pemombehumi yandeu cūritei —ehi.

¹⁶ Evocoiyase Pablo opūha ohā. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tüpa mboeteisar, pesendu che ñehe —ehi—. ¹⁷ Israel iguar Tüpa oiporavo yande ramoí oyeupe nara, ahe Egipto ivi pipe omboeta secua ambuae vahe secosa pipe. Ipare opíratasa pipe vīnosepa ahe ivi sui aracahe. ¹⁸ Ipare Tüpa oñemosañō yande ramoí reco ai upe cuarenta araviter rupi, oguatase yuvireco ivi iporupirēhisa rupi. ¹⁹ Ipare omocañi ava eta Canaán pipendar siete tupri yuvirecoi vahe serecuar reseve-seve. Ipare omondo Canaán ivi yande ramoí upe nara. ²⁰ Ëgüe ehi cuatrocientos cincuenta araviter rupi yapo yuvireco —ehi.

“Ipare Tüpa ombou ava recocuer moingatusar oporocuai vaheerā. Ipa vahe ipāhu pendar serer Samuel aracahe. Ahe Tüpa ñehe mombehusar avei. ²¹ Ahese yande ramoí eta oporandu yuvireco Tüpa upe mborerecuar guasu rese.

Evocoyase Tūpa omondo Saúl chupe, ahe Cis rahir, ahe yande ramoi Benjamín suindar secoi. Oporocuai cuarenta araviter rupi oico. ²² Ipare Tūpa virocua imborerecuasa ichui; omondo David upe yande ramoi cuai āgua. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboaviyera che porocuita’ ehi Tūpa. ²³ Ahe David suindar sui, Tūpa ombou Jesús Israel iguar pĩsiro āgua. Aracaheve Tūpa omombehu co yande ramoi upe. ²⁴ Yande Yar yu renondeve, Juan omombehu opacatu Israel iguar upe: ‘Pemboasi pe angaipa, peyevi Tūpa upe pe ñeapiramo āgua’ ehi chupe. ²⁵ Juan omboaviye senimise ocuita, aipo ehi ava upe imombehu: ‘Pepihañemoñeta revo: co ité yande pĩsirora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisā yora āgua ipi sui’ ehi Juan” ehi judío tūparo pendar upe imombehu.

²⁶ “Che mu eta, pe Abraham suindar iyavei ndahei vahe Abraham suindar Tūpa mboeteisar, opacatu yandeu nara ombou Tūpa co ñehesa pĩsiosa resendar. ²⁷ Jerusalén pendar rerecuar avei ndoicuai evocoi Jesús Tūpa remimbou secoise yuvireco. Iyavei ndosenducuai Tūpa ñehe mombehusar cuachiar pipe oyerouise mbituhusa ari yacatu yuvireco. Ichui ahe ae oyuca uca yuvireco. Ēgüe ehi imboaviye Jesús rese Tūpa ñehe mombehusar rembicuachiagüer pipendar yuvireco. ²⁸ Yepe ndoyosui mbahe sembiapo rai yuca uca āgua yuvireco viña, ahe rumo oporanduño Pilato upe yuca uca āgua rese yuvireco” ehi. ²⁹ “Ichui omboaviyese opacatu icuachiapri pipendar yuvireco, oviroyi uca curusu sui ñoti āgua yuvireco. ³⁰ Tūpa rumo ombogüerayevi iri. ³¹ Setá ari rupi oyemboyecua oyeupi uguata vahe upe, evocoi ava yugüeru vahe supi Galilea sui, Jerusalén ve. Cūritei ahe ava ité omombehu Jesús recocuer ava upe yuvireco” ehi tūparo pendar upe.

³² “Sese che mu eta, cūritei oromombehu pëu evocoi ñehesa aviye vahe Tūpa omondo vahe yande ramoi upe aracahe. ³³ Tūpa omboaviye ramo güemimombegüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuviriosa pipe aipo ehi: ‘Co pipe nde che Rahir ereico; che nde Ru aico’ ehi Tūpa chupe. ³⁴ Tūpa omombehu avei güemimbogüerayevi sete tuyuehi āgua icuachiapri pipe aracahe aipo ehi: ‘Che niha oroovasara acoi David upe che ñehe maranehi supi tupri vahe mboaviye āgua’ ehi. ³⁵ Sese omombehu avei ambuae icuachiapri pipe: ‘Nde, Tūpa, ndereseyai chira nde rembiguai Ava seco maranehi vahe rete ituyupa āgua’ ehi. ³⁶ Supi eté, David omboaviye ocuita ava rese ohañecosa pipe yepi. Ipare

omano. Evocoyase oyapocatu tuvipave imu pãhuve yuvireco. Ahe setecuer rumo opaño ité ituyu” ehi. ³⁷ “Acoi Tũpa ombogüerayevi vahe retecuer rumo ndituyui eté” ehi tũparo pendar upe imombehu. ³⁸ “Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumi pẽu. Moisés porocuaita sui ndipoi ñeroisa angaipa rese yande reco mohivi ãgua. ³⁹ Jesús recocuer sui rumo oime ñeroisa ñepei-pei viroya vahe upe” ehi. ⁴⁰ “Peicua catu co mbahe sui, toviapi eme pe harive acoi Tũpa ñehe mombehusar rembicuachiagüer pipe aipo ehi vahe:

⁴¹ ‘Esepia, pe seroĩrosar peico vahe. Peyepihamondii, ipare pecañi tẽira. Esepia, che ayapora mbahe pe recovesese. Yepe ambuae omombehu tupri itera pẽu che rembiaporã viña, pe rumo ndaperoyai chietera’ ehi Tũpa” ehi Pablo tũparo pendar upe.

⁴² Yuvinose potase tũparo sui, omombita Pablo yuvireco: “Teremombehu irimi eremombehu vahe ñehesa ambuae mbituhusa ari pipe oreu” ehi yuvireco chupe. ⁴³ Yuvinosese ava rehi tũparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tũpa pe rovasasa pipe” ehi ava upe yuvireco.

⁴⁴ Ambuae mbituhusa ari pipe seni opacatu ava ahe pendar oñemonuha yuvireco Tũpa Ñehengagüer rendu ãgua. ⁴⁵ Osepiase ava rehi, judío rerecuar oñemoiró iteanga Pablo upe, supindar upe avei yuvireco. Viroĩro Pablo ñehe ava upe yuvireco. ⁴⁶ Evocoyase Pablo, Bernabé reseve oñehe yuvireco judío upe osiquiyeehisave:

—Tũpa ore cui pẽu rane ore ñehe ãgua. Pe rumo ndapeyapisaca potai iñehengagüer rese. Ipipe sui ndiyai peipisi tecovesa apirẽhi vahe. Evocoyase orosora, oroñehe ava ndahei vahe judío upe. ⁴⁷ Esepia, yande Yar ombou ore cuaitarã co ñehesa rese aracahendar aipo ehi vahe:

‘Che oroporavo tataendi nungar nde reco ãgua ndahei vahe judío yuvirecoi vahe upe pĩsirosa reroguata ãgua opacatu ivi rupi’ ehi.

⁴⁸ Ava ndahei vahe judío osenduse co ñehesa, oviharete yuvireco, omboetei avei Tũpa Ñehengagüer. Opacatu ava iporavopri tecovesa apirẽhi vahe pisi ãgua, ahe viroya yuvireco. ⁴⁹ Evocoyase Tũpa Ñehengagüer omombehu opacatu ahe ivi rupi yuvireco. ⁵⁰ Judío rumo omonguerẽhi cuña imboyeroyapri Tũpa mboeteisar iyavei mbia seco ivate vahe Pablo, Bernabé mose uca ãgua güecua sui yuvireco yamotarẽhisave. ⁵¹ Ahese Pablo, Bernabé oipipete opitaqui ivi sui yuvireco ‘Tũpa toicua mbahe sembiapo ai rese yuvireco chupe’ oya.

Ichui yuviraso Iconio ve. ⁵² Jesús reroyasar rumo oviharete yuvireco, vireco ité Espíritu Santo oyese yuvireco.

14

Pablo, Bernabé reseve omombehu Tūpa Ñehengagüer Iconio ve yuvireco

¹ Pablo, Bernabé oyepota Iconio ve yuviraso. Aheve yuviroique judío tūparo pipe, omombehu tupri yande Yar recocuer yuvireco. Sese setá ava viroya ñehesa yuvireco judío, ndahei vahe avei judío. ² Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarēhi āgua. ³ Ahe rumo opita pucu yuvireco Iconio ve, omombehuño yande Yar recocuer osiquiyeēhisave yuvireco. Aheve Tūpa ombou opīratasa mbahe yavai vahe apo āgua chupe ‘ichui toicua yuvireco Pablo, Bernabé che poroaisusa mombehuse’ oya-pave. ⁴ Ahe tecua pendar rumo ipihañemoñeta yovi yuvireco: ñepeí judío pihañemoñetasa rupindar; ambuae evocoiyase apóstol pihañemoñetasa rupindar yuvireco. ⁵ Oime judío iyavei ndahei vahe judío oyemboyoya mborerecuar rese mara-mara tēi sereco āgua yuvireco, “Ita pipe avei yayapi-yapi” ehi yuvireco chupe viña. ⁶ Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei. ⁷ Supi omombehu ñehesa aviye vahe Jesús resendar yuvireco.

Pablo yapi-yapisa ita pipe Listra ve

⁸ Listra ve yuvirecoise, oime mbia oha ramomi suive ndoguatai vahe. Ahe mbia uguapi oī ⁹ oyapisaca Pablo ñehese. Ahese Pablo omahengatuse sese, oicua ndoguatai vahe oyeroya ité Tūpa rese ocuera āgua. ¹⁰ Evocoiyase aipo ehi pīrata chupe:

—¡Epūha! —ehi.

Ahese opo, opūha, uguata voi. ¹¹ Osepiase ava rehi mbahe sembiapo yuvireco, osapucái pīrata Licaonia ñehese pipe yuvireco:

—¡Tūpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

¹² Ipihñemoñeta yuvireco Bernabé ahe tūpa Zeus iyavei Pablo ahe tūpa Hermes viña. Esepia, Pablo oñehese vahe. ¹³ Ahese co tūpa Zeus pahí güeru tiví, mbahe potri avei. Ahe tecua tapia roquendave, ahe Zeus tūparo tecua pipe ava reiquesa rupi chini. Oyuca pota tiví Pablo, Bernabé mboetei āgua yuvireco viña. ¹⁴ Oicuase rumo Bernabé, Pablo, ahese omondo oturucuar yuvinoña ava pāhuve; oñehese pīrata yuvireco:

¹⁵ —Mbia, ¿mahera ěgüe peye oreu? —ehi—. Ore rumo ava tēi pe nungar avei oroico. Oromombehu: “Pepoi co mbahe ěgüe ehi tēi vahe mboeteisa sui; peroya Tūpa supi eté vahe” orohe pēu. Ahe oyapo vahe iva, ivi, para guasu, opacatu ipor reseve. ¹⁶ Aracahe rumo Tūpa, “Ěgüe tehi oguata ndahei vahe judío opihañemoñetasa rupi yuvireco” ehi viña. ¹⁷ Tūpa rumo ndasesarai ava upe mbahe tupri apo āgua sui. Ahe ombou amar pēu mbahe miti ha aviye āgua yepi. Ěgüe ehi mbahe tembihu imbou iyavei viharetasa pēu —ehi ava upe yuvireco.

¹⁸ Yepe aipo omombehu yuvireco chupe, ava rehi rumo seniño ité tiví oyuca yuvireco chupe imboetei āgua viña.

¹⁹ Ahese oyepota moviro judío Antioquía sui, Iconio sui avei. Oipihañemoñeta rerova ava rehi yuvireco. Ichui oyapiyapi ita pipe Pablo yuvireco. Ipare ombotiriri seraso yuvireco tecua ivii. Ipihñemoñeta: “Yayuca ité” ehi yuvireco chupe viña. ²⁰ Oyere tupri Pablo rese Jesús reroyasar yuvireco. Ahe rumo oñarapuha, oique iri oso tecua pipe. Ahere ayihive yuvinose oyevi yuviraso Bernabé reseve Derbe ve.

²¹ Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyevi yugüeru Listra rupi, Iconio rupi avei, oyepota Antioquía ve yuvireco. ²² Ahe supi omonguerēhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe tēi pipe yande recose Tūpa mborerecuasave yande reique āgua” ehi yuvireco Jesús reroyasar upe. ²³ Ipare oiporavo ava Jesús reroyasar rāro āgua ñepepepe ñemonuhasa rupi. Oyeroqui iyavei oyecuacu. Ipare viropovēhe yande Yar upe iporaviqui āgua yuvireco.

Pablo, Bernabé oyevi yuvireco Antioquía ve Siria ivi rese

²⁴ Ipare yuviraso Pisidia rupi, oyepota Panfilia ivi rese. ²⁵ Omombehu Tūpa Ñhengagüer yuvireco Perge ve. Ipare yuviraso Atalia ve. ²⁶ Ahe ichui yuviraso carite pipe Antioquía ve, ahe tecua pipe yipindar imondopri Tūpa upe sovasapri yuvirecoi mboraviqui apo āgua. Aheve tupri avei imboaviye pare oyevi yuvireco. ²⁷ Oyepotase Antioquía ve yugüeru, omonuha opacatu Jesús reroyasar yuvireco. Aheve omombehu opacatu Tūpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya āgua yuvireco” ehi yuvireco omboetasa upe. ²⁸ Aheve Pablo, Bernabé opita pucu yuvireco ipiri.

15

Jesús reroyasar oñemonuha Jerusalén ve yuvireco

¹ Evocoiyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahe Tüpa oyocuai Moisés yande ramoi cuai água: ‘Pembocircuncida opacatu pe mu cuimbahe cheu nara’ ehi Tüpa aracahe” ehi yuvireco. “Cüritei acoi égüe ndapeyeise Jesús reroyasar upe, noñepisiroi chietera yuvireco” ehi Antioquía pendar upe yuvireco. ² Pablo, Bernabé reseve rumo oñehe pĩrata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rãrosar upe aipo mbahe moingatu água yuvireco.

³ Égüe ehi Jesús reroyasar Antioquía pendar yocuai imondo yuvireco. Oñocuase Fenicia, Samaria avei yuviraso, oguatasa rupi omombehu-mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseyá aracahendar aracuasa Tüpa rupi oguata água yuvireco” ehi. Ahese opacatu Jesús reroyasar oyembovĩharete yuvireco senduse.

⁴ Yuviroyepotase Jerusalén ve, apóstol, Jesús reroyasar rãrosar iyavei ambuae Jesús reroyasareta oipisi tupri yuvireco. Aheve omombehu Tüpa mbahe oyapo vahe oyese yuvireco. ⁵ Osenduse rumo, moviro Jesús reroyasar fariseo opũha voi aipo ehi yuvireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuaíta mboaviye água yuvireco —ehiño ité yuvireco.

⁶ Ahese apóstol, Jesús reroyasar rãrosar avei oñemonuha oyemomborandu água aipo mbahe rese yuvireco. ⁷ Yemomborandu viteseve, Pedro opũha ipãhuve aipo ehi:

—Che mu, peicua niha aracaco Tüpa che poravo pe pãhu sui co ñehesa poropĩsirosa resendar mombehu água ava ndahei vahe judío upe ‘toviroya yuvireco’ oyapave. ⁸ Tüpa oicua ité opacatu ava pĩhañemoñetasa. Chupe avei omondo Espiritu Santo inungar yandeu. Ipipe sui yaicua Tüpa oipisi avei ahe ava oyeupe nara —ehi—. ⁹ Evocoiyase, “Judío aviye catu vahe ava ndahei vahe judío sui” ndehei Tüpa. Esepia, opacatu oyoya pãve Tüpa upe yaico. Sese omoatiro ipĩhañemoñeta rai sui oyese yeroyasa pipe. ¹⁰ ¡Pe tie pesecoãha pota Tüpa! ¡Mahera peyocuai uca pota co Jesús reroyasar mbahe yavai rai vahe apo água! Aní rumo. Esepia, yande ramoi ndoicatui Tüpa porocuaíta mboaviye água yuvireco, yande avei égüe yahe

—ehi—. ¹¹ Co rumo, yaroyase yande Yar Jesucristo, yande p̄sirora oporoaisusa pipe, inungar co ava ndahei vahe judío yuvirecoi —ehi Pedro.

¹² Evocoyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evocoyase omombehu ndayasepiai vahe poromondiisa Tūpa oyapo uca ava ndahei vahe judío p̄huve yuvireco chupe.

¹³ Osendupase ñehese yuvireco, ahese Santiago aipo ehi:

—Che mu, Jesús reroyasar, peyap̄isacami che ñehese rese: ¹⁴ Simón omombehu yandeu Tūpa osaisi avei ava ndahei vahe judío. Sese oiporavo ahe ava oyeupe nara —ehi—

. ¹⁵ Oyoya tupri Tūpa ñehese mombehusar rembicuachiagüer rese. Ñepe i p̄hu pendar oicuachía aracahe aipo ehi:

¹⁶ ‘Coiye catu ayevira vitu. Ahese ayapo p̄iasu irira che rēta David oyapo uca vahecuer, ahe oi imocañipirer. Ambopiasu irira oitipa vahecuer yuvireco.

¹⁷ Ēgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reseve.

¹⁸ Evocoi yande Yar rembiaporã icuapri aracahe suive’ ehi Tūpa ñehese mombehusar aracahe.

¹⁹ “Sese chep̄ihañemoñeta iya ndayayocuai chira Moisés porocuita rupi oñecuñaro vahe rã ndahei vahe judío Tūpa rupi uguata āgua yuvireco” ehi. ²⁰ “Aviye rumo yaicuachias chupe co mbahe resendar güeraño: Pehui rene mbahe mimba yucapri mbahe rahanga tēi upe seropovēhepri iyavei ndapeaguasai chira, pehui rene mbahe mimba yucapri suvi renosepirēhi, mbahe ruvi avei” ehi. ²¹ “Esepia, opacatu tecua rupi yuvirecoi ava omombehu vahe Moisés porocuita ñepeipei mbituhusa ari pipe judío tūparo pipe aracahe suive. Aipo rupive” ehi Santiago.

Icuachiapri ndahei vahe judío upe nara

²² Ahese apóstol, Jesús reroyasar rãrosar, ambuae Jesús reroyasar avei omondo pota op̄hu pendar Pablo, Bernabé rupi Antioquía ve yuvireco. Oiporavo yuvireco ñuvirío mbia, ahe Judas Barsabás iyavei Silas. Ahe imboyeroyapri omboetasa p̄huve yuvireco. ²³ Ahe supi aipo ehi icuachía imondo yuvireco:

“Ore apóstol, Jesús reroyasar rãrosar, pe mboetasa oroico vahe. Pe mboaviravesa, ndapemarai revo pe ndahei vahe judío Antioquía pendar, Siria pendar, Cilicia pendar avei. ²⁴ Oroyandu amove ava ore p̄hu pendar pe mañeco tēi aipo oporombohesa pipe yuvireco. Ahe ava ndahei ore ocuaita pipe yuviraso p̄eu pe p̄ihañemoñeta rerova. ²⁵ Sese oyoya

orepíhañemoñeta oroiporavo ñuvirío mbia ore rembiaisu ore rivri Bernabé, Pablo rupi imondo eipeve pëu. ²⁶ Ahe acoi oyemondo vahe mbahe-mbahe tēi povrive yande Yar Jesu-cristo recocuer rese yuvireco. ²⁷ Oromondo Judas, Silas avei pëu: ahe teieté omombehura opacatu cuachiar pipendar pëu yuvireco. ²⁸ Aviye Espíritu Santo upe, oreu avei co porocuaíta güeraño oromondo vahe rese pëu. Ndape cuaisa pota iri rumo ambuae mborocuaíta rese. ²⁹ Pehui rene mbahe mímba yucapri seropovēhepri mbahe rahanga tēi upendar, ndapehui chiaveira mbahe ruvi, mbahe mímba yucapri suvi renosepirēhi vahe iyavei ndapeaguasai chira. Pepoise evocoi mbahe naporai vahe sui, oimera mbahe tupri pëu. Aipo rupive. Peico tupri” ehi.

³⁰ “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omondo cuachiar yuvireco chupe. ³¹ Ahe cuachiar rese oyerouise, oyemboviharete yuvireco. ³² Judas, Silas Tūpa suindar ñehesa mombehusar avei yuvirecoi. Sese omboviharete catu iyavei omonguerēhi catu avei ahe ava yuvireco oñehe pipe. ³³ Opitase moviro ari aheve, Jesús reroyasar Antioquía pendar aipo ehi: “Aviye. Peyevi tupri pe mbousar upe” ehi yuvireco chupe. ³⁴ Silas rumo opita potaño ité aheve. ³⁵ Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite āgua yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu āgua

³⁶ Coiye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pīha ahe yuvireco? —ehi.

³⁷ Ahese Bernabé viraso pota Juan Marcos oyeupi viña. ³⁸ Nomboyoyai rumo Pablo ipíhañemoñeta rese. Esepia, cuese Juan Marcos oseyaña oyepotase yuvireco Panfilia ve. “Taipitiviñño iporaviquisa rese” ndehi chupe. ³⁹ Nomingatuisse mbahe oyeupe yuvireco, oyepepiño yuvireco oyesui. Ahese Bernabé viraso Marcos oyeupi carite pipe Chipre ve. ⁴⁰ Pablo rumo oiporavo Silas oyeupi icho āgua. Yuvinose āgua Antioquía sui, Jesús reroyasar ahe pendar aipo ehi yuvireco chupe: “Tape rovasa Tūpa oporoaisusa pipe” ehi yuvireco imondo. ⁴¹ Ipare yuviraso Siria, Cilicia rupi Jesús reroyasar monguerēhi catu āgua yuvireco.

16

Timoteo oso Silas ndugüerã Pablo rupi

¹ Pablo ondugüer reseve yuviraso Derbe ve, Listra ve avei. Aheve osepia Jesús reroyasar, Timoteo serer vahe, judía, Jesús reroyasar membri. Iyesupa rumbo griego. ² “Evocoi Timoteo aviye etepri” ehi Jesús reroyasar Listra pendar, Iconio pendar avei yuvireco chupe. ³ Pablo viroguata potaño ité Timoteo oyeupi. Sese seroguata renondeve, ombocircuncida uca seroïroëhi água judío yuvirecoi vahe upe. Esepia, opacatu oicua Timoteo ru griego secose yuvireco. ⁴ Evocoiyase opacatu tecua iguatagüer rupi omombehu ahe mborocuaite apóstol, Jesús reroyasar rãrosar Jerusalén pendar ombou vahe yuvireco chupe. ⁵ Sese Jesús reroyasar ahe tecua rupindar oyemoviracua catu yuvireco Jesús reroyasa pipe iyavei oyemboeta catu yuvireco ari rupi.

Tüpa omondo uca Pablo Macedonia ve iquer nungar pipe

⁶ Espíritu Santo ndoipotai Asia rupi yuviraso vaherã Tüpa Ñhengagüer mombehu água. Sese oyahuva yuviraso Frigia rupi, Galacia rupi avei. ⁷ Ëgüe ehi oyepota Misia popive yuvireco. Ichui yuviraso pota tēi Bitinia ve. Jesús Espíritu rumbo ndoipotai icho água supi. ⁸ Ahese osasaviño yuviraso Misia sui carite guasu yemboyasa Troas ve oyepota água yuvireco. ⁹ Oyepotase aheve, ahe pïtu pipe Pablo oquer nungar pipe osepia mbia, Macedonia pendar, “Ereyumira Macedonia ve ore pïtivi água viña” ehi ohã chupe. ¹⁰ Ipare ore oroyemoingatu voi eté Macedonia ve ore so água. Esepia, ore oroicua ité Tüpa aheve ore mondora ñehesa pïsirosa resendar mombehu água.

Pablo, Silas Filipino ve yuvirecoi

¹¹ Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve. ¹² Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oyocuai avei opacatu tecua ivirindar ava yuvireco. Aheve moviro ari tēi oroico. ¹³ Mbïtuhusa ari pipe orosē evocoi tecua sui iai popive. “Aheve oñemonuhara judío oyerogui água” orohe. Aheseve cuña oñemonuha yugüeru. Aheve oroyepota chupe, oroguapi ipãhuve. Ipare oromombehu co ñehesa pïsirosa resendar yuvireco chupe. ¹⁴ Ñepeï imboetasa, Lidia serer vahe, Tiatira pendar, oyapisaca ore ñehese rese oï. Ahe Tüpa mboeteisar secoi, turucuar suendi vahe mbovendesar avei secoi. Yande Yar omohivi ipihañemoñetasa iyapisaca água Pablo remimombehu rese. ¹⁵ Sese ñapiramosa, opacatu sēta pendar reseve. Ipare ore mombita pota güetave.

—Che reroyase peye yande Yar reroyasar che recose, pepitara che rēteve —ehi oreu.

Ēgüe ehi ore monguerēhi. Sese oropita sētave ipiri.

¹⁶ Ipare ambuae ari oroso irise oroyeroqui āgua, cuñatai ore rovañchi, ahe cuñatai caruguar pīratasa pipe mbahe mombehusar. Oicatu ava upe mbahe oime vaheṛā mombehu. Omombehuse mbahe, setá oipisi sepri guarepochi güerecuar yuvirecoi vahe upe nara yepi. ¹⁷ Ahe cuñatai ou ore raquicuei,

—¡Co ava Tūpa ivate catu vahe upendar oporaviqui yuvireco omombehu: “Na ehira Tūpa yande pīsiro” ehi yuvireco! —ehi pucu-pucu ore mombehu ava upe.

¹⁸ Setá ari ēgüe ehi oico oreu. Omañeco tēise rumo Pablo, oyemboyere chupe cute, aipo ehi icaruguar upe:

—Che orocuai Jesucristo rer pipe: esē co cuñatai sui —ehi.

Aheseve voi caruguar osē ichui.

¹⁹ Evocoiyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco.

²⁰ Ipare mborerecuar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío tēi yuvirecoi. Ayeve omboaiṽu guasu tēi yuvireco yande recua pipe.

²¹ Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña āgua —ehi yuvireco mborerecuar upe.

²² Evocoiyase ava eta oyamotarēhi Pablo iyavei Silas yuvireco iyavei mborerecuar, “Pesequi iturucuar ichui. Ipare peinupara ivira pipe” ehi. ²³ Inupá iteanga pare, osoquenda yuvireco. Oyocuai pīrata soquendapri rārosar yuvireco, “Esāro tupri” ehi yuvireco chupe. ²⁴ Aipo oyeupe he ramoseve, soquendapri rārosar omoingue Pablo, Silas oi ava nose catui vahesa pipe. Aheve omopaha cepo pipe.

²⁵ Ahe pītu mbiter rupi rumo Pablo, Silas oyerocui, osapucaí Tūpa mboeteisave yuvireco. Ambuae ava soquendapri evocoiyase osenduño tēi yuvireco isapucaí. ²⁶ Ahese aviyeteramo tēi ivi oriri eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui. ²⁷ Ahese soquendapri rārosar omahe yesapiha. Osepiase oquenda imboipri, ahese vinose oquise pucu siru sui oyeyuca āgua viña. Esepia niha, “Opacatu ité revó soquendapri yuviraso” ehi viña. ²⁸ Pablo rumo,

—¡Ereyapoi rene mbahe tēi ndeyeupe! ¡Esepia, opacatu orocoveño cohave! —ehi pucu soquendapri rārosar upe.

²⁹ Evocoiyase soquendapri rārosar, “Emboumi tataendi” ehi ondugüer upe. Ichui oña oique, oriri, osiquiyepave oñenopiha

Pablo, Silas rovai oso. ³⁰ Vinose pare soquendasa sui oporandu chupe:

—Mbia, ¿mara ahera vo che ñepisiro ãgua vichico? —ehi chupe.

³¹—Eroya yande Yar Jesucristo. Ichui ahe nde pĩsirora, nde rēta pendar avei —ehi yuvireco chupe.

³² Ahese omombehu yuvireco Tũpa Ñehengagüer soquendapri rãrosar upe, opacatu sēta pendar upe avei. ³³ Ahe pĩtu pipeve avei soquendapri rãrosar viraso oyeupi, yapichasa oyoseipa chupe. Ahese Pablo, Silas oñapiramo guãrosarer, sēta pendar avei yuvireco. ³⁴ Viraso pare sãrosar güētave, ombocarú. Ahe sēta pendar avei oviharete ité yuvireco Tũpa reroyasa rese.

³⁵ Cōhese mborerecuareta omondo sundao ava rese icuaipri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi. ³⁶ Ahese soquendapri rãrosar omombehu co ñehesa Pablo upe:

—Mborerecuar ombou yuvireco ñehesa cheu pe mose ãgua. Peso tupriño peico —ehi chupe.

³⁷ Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voiño tēi yuvireco. Ipare aipo ava rembiepiaēhive tēi ore mosepa uca pota viña. ¡Aní eté rumo! Ahe teieté ru toyugüeru ore mose ãgua —ehi soquendapri rãrosar upe.

³⁸ Ipare sundao ava rese icuaipri omombehu güerecuareta upe Pablo ñehe. Oyanduse Pablo, Silas romano secose, osiquiyé iteanga yuvireco. ³⁹ Ahese ahe teieté yuviraso Pablo, Silas oyeupe ñero ãgua rese yuvireco: “Peso tupriño ore recua sui” ehi yuvireco chupe. ⁴⁰ Pablo, Silas yuvinosese voquendasa sui, yuviraso iri Lidia rētave. Oñemonuha irise ambuae Jesús reroyasar pãhuve, omonguerēhi catu yuvireco. Ipare yuviraso ichui.

17

Ava yaivu guasu tēi Tesalónica ve yuvireco

¹ Oguatase Pablo iyavei Silas, oñocua Anfípólís iyavei Apolonia rupi yuviraso. Ēgüe ehi oyepota tecua Tesalónica ve yuvireco. Aheve oime judío tũparo. ² Secocuer rupi eté mbituhusa ari pipe Pablo oique judío tũparove, oñemoñeta ava eta upe mbosapi mbituhusa ari rupi Tũpa Ñehengagüer rese. ³ Omboyecua tupri imombehu Tũpa Rembiporavo ava pĩsiro ãgua iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acoi amombehu vahe p̄eu, ahe ité niha Tūpa Rem-poravo ava p̄siro āgua —ehi.

⁴ Amove ip̄ahu pendar seroyasa pipe oyemboya sese yuvireco. Setá avei ava griego yuvirecoi vahe, Tūpa mboeteisar judío aracuasa reroyasar avei. Ip̄ahuve setá avei cuña oyemboetei vahe oyemboya sese yuvireco. ⁵ Judío rumo ndoviroyai vahe oñemoĩrombave secatēhi ava rese yuvireco. Sese omonuha ava yuvireco tēi vahe, ndipihai vahe yuvireco. Imonuha pare, ahe omboaīvu guasu uca tēi ahe ava upe opacatu güecua pipe yuvireco. Yuviraso Jasón rētave Pablo, Silas reca, vinose pota ava reh̄i p̄ahuve yuvireco viña. ⁶ Ndoyosuisse rumo aheve yuvireco, virasoño Jasón, ambuae Jesús reroyasar avei güecua rerecuar rovai yuvireco. Viroāse guasu sereco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cūr̄itei oyepotapa yuvireco cohave! ⁷ Co Jasón omombituhu güētave. ¡Opacatu co yuvirecoi vahe ndoviroyai Cesar porocuaíta yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

⁸ Aipo ñehesa renduse, oyep̄ihamond̄i guasu ava eta, mborerecuar avei tecua p̄ipendar yuvireco. ⁹ Mborerecuar rumo oip̄isipase guarepochi Jasón sui, ambuae Jesús reroyasar sui avei, ahese opa omose.

Pablo, Silas omombehu Tūpa Ñehengagüer Berea ve yuvireco

¹⁰ Ahe p̄itu p̄ipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tūparo p̄ipe. ¹¹ Berea pendar ava aviye catu ava Tesalónica pendar sui. Ēgüe ehi ip̄isi oh̄āp̄isiēhisa pipe ñehesa yuvireco iyavei ari yacatu rupi oseca Tūpa Ñehengagüer p̄ipe ‘¿supi eté p̄iha Pablo ñehesa?’ oyapave yuvireco. ¹² Evocoiyase setá avei Pablo ñehereoyasar iyavei setá griego viroya yuvireco, ndahei cuimbahe güeraño, cuña oyemboetei vahe avei. ¹³ Judío Tesalónica pendar rumo oyandu yuvireco Pablo porombohesa Tūpa Ñehengagüer rese Berea ve. Sese yuviraso aheve imboaīvu guasu tēi uca āgua ava upe yuvireco. ¹⁴ Evocoiyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo op̄ita viteño aheve yuvireco. ¹⁵ Evocoiyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñehereoyasar upe iyavei Timoteo upe avei yuvireco yuviraso voi āgua Pablo p̄iri ahe tecuave yuvireco.

Pablo Atenas ve secoi

¹⁶ Pablo osãro viteseve Silas iyavei Timoteo Atenas ve oico, ndoyembovïhai osepiase opacatu rupi tũpa rahanga-anga tẽi. ¹⁷ Sese judío tũparo pipe omombehu Jesús recocuer judío eta upe iyavei ambuae Tũpa mboeteisar upe avei. Iyavei ari yacatu omoñeta ava osepia vahe ocarusu rupi ava ñemonuhasave ahe tecua pipe. ¹⁸ Evocoyase amove mbïa oyembohe vahe epicúreo aracuasa rese iyavei mbïa oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroĩrosave:

—¿Mbahe rese angahu pïha co mbïa iñehe papa rai ava upe oico? —ehi.

Ambuae aipo ehi yuvireco:

—Ndoyavïi co mbïa oñehe vahe ambuae ava Tũpa rese tẽi —ehi yuvireco.

Esepia, omombehu Jesús recocuer iyavei cuerayevisa re-sendar. ¹⁹ Evocoyase ahe oyembohe vahe viroyeupi Pablo Areópago serer vahesave seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piasu resendar oreu viña? ²⁰ Supi eté niha eremombehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

²¹ Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

²²⁻²³ Evocoyase Pablo opũha ahe ava pãhuve aipo ehi:

“Pesendu rane Atenas iguar. Aguatase ocar rupi asepia pe tũpa eta pemboetei vahe. Ahese asepia ñepei tũpa upe seropovẽhepri renda. Sese asepia icuachiapri aipo ehi oĩ: ‘Tũpa ndicuasai vahe upendar’ ehi. Evocoi Tũpa ndapeicua vitei vahe, ahe secocuer niha amombehu pẽu” ehi.

²⁴ “Evocoi Tũpa oyapo vahe co ivi, opacatu mbahe ipor avei. Ahe niha ivi, iva Yar secoi. Sese ndasecoi tũparo ava tẽi rembiapo pipe. ²⁵ Ndahei ava rembiapo pipe sui tẽi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pĩtuhesa iyavei opacatu mbahe oime vahe ivi, ivave” ehi.

²⁶ “Tũpa oyapo opacatu-catu tẽi ava ñepei ava sui ava yesu ãgua opacatu ivi rupi. Omondo ivi ava yemboerecua ãgua ñepei-pei upe. Ari avei omondo co ivi pipe iyemboerecua ãgua yuvireco chupe. ²⁷ Ëgüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ëgüe ehi rumo Tũpa yande resevemi eté. ²⁸ Esepia niha, Tũpa sui yaicove, ipĩratasa pipe yayembovava, ichui avei yareco

yande recovesa, inungar oicuachía amove pe recua pendar yuvireco, aipo ehi: ‘Yaico ité Tūpa suindar’ ehi yuvireco. ²⁹ Sese yande Tūpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tūpa’ ndayahei chira. Esepia, mbahe rahanga ava rembiapo tēi, ndahei Tūpa” ehi. ³⁰ “Pe ramoi ndoicua tupriise yuvireco aracahe, Tūpa oñemosañõ mbahe sembiapo rese chupe. Cūritei rumo oyocuai opacatu ava co ivi pipendar ‘tomboasi oangaipa, toyevi yuvireco cheu’ oya. ³¹ Esepia, ahe oiporavo ari opacatu ava recocuer rese porandu uca ãgua güecocuer ñvi tupriisa pipe ñepegi güembiporavo upe. Ahe ombogüerayevi güembiporavo omano vahe pãhu sui ‘toicua opacatu ava güecocuer rese iporandu ãgua’ oya” ehi Atenas pendar upe.

³² Osenduse yuvireco cuerayevisa resendar, ahese oime ava oyoyai catu yuvireco seroñrosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

³³ Sese Pablo osẽ ipãhu sui oso. ³⁴ Moviro rumo mbia oyemboya sese, viroya ité vahe ñehesa yuvireco. Ahe ipãhuve secõi mbia Dionisio serer vahe, ahe Areópago pãhu pendar iyavei cuña Dámaris serer vahe. Ambuae oime vite yuvireco seroyasar.

18

Pablo Corinto ve secõi

¹ Coiye catu Pablo osẽ Atenas sui, oso Corinto ve. ² Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvinose ñepegi tecua Italia rupindar Roma sui oyocuaise mborerecuar guasu Claudio: “Toyuvinose ité opacatu judío Roma sui” ehise. Pablo oso, ³ opita Aquila piri oporaviqui ãgua. Esepia, Pablo, Aquila avei ahe mbahe pìrer mbovivisar pãve yuvirecoi. ⁴ Mbituhusa ari yacatu rupi Pablo omombehu Jesucristo recocuer ava upe judío tūparo pipe ‘toviroya Jesús judío iyavei ndahei vahe judío yuvireco’ oyapave.

⁵ Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu ãgua rese güeraño judío eta upe aipo ehi: “Jesús niha Tūpa Rembiporavo ava pĩsiro ãgua secõi” ehi. ⁶ Ñehẽ-ñehẽ tēi rumo seroñrosave yuvireco chupe. Sese Pablo oipipete oturucuar sovaque ‘oimera mbahe tēi pēu’ oya, iyavei aipo ehi chupe yuvireco:

—Pe ae niha peseca Tūpa ñemoirosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pēu. Che rumo, co pipe suive, amombehu

catuño itera co ñehesa ava ndahei vahe judío upe vichico — ehi Pablo judío upe.

⁷ Evocoyase Pablo osẽ judío tũparo sui, oique mbia Ticio Justo serer vahe rêtave, ahe Tũpa mboeteisar avei secoi. Ahe sêta judío tũparo iqueve. ⁸ Crispo, ahe judío tũparo rerecuar viroya avei yande Yar, opacatu sêta pendar avei viroya yuvireco. Setá ambuae Corinto pendar avei viroya osenduse ñehesa yuvireco. Seroya pare, oñeapiramopa uca yuvireco. ⁹ Ñepe pĩtu pipe yande Yar oñehe Pablo upe iquer nungarve: “Eresiquiyei rene, ereñehe ava upe, che mombehuño eve, erepoi rene che mombehusa sui. ¹⁰ Esepia, che nde reseve aico. Sese ndiyai ava upe nde momara uca ãgua. Supi eté che areco setá che rahirã co tecua pipe” ehi yande Yar chupe. ¹¹ Evocoyase opita ñepe araviter yemombitesa rupi Corinto ve oico. Aheve ombohe Tũpa Ñhengagüer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotarẽhisave. Ichui viraso ahe mborerecuar upe porandusa ivate catusave yuvireco, ¹³ aipo ehi yuvireco chupe:

—Co mbia oipihãñemoñeta rerova tẽi ava oTũpa mboetei ãgua. Ndahei rumo Roma pendar porocuita rupi egüe ehi yuvireco — ehi yuvireco seroĩrosave chupe.

¹⁴ Oñehe pota tẽi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerẽhira che yapisaca ãgua pe remimombehu rese viña. ¹⁵ Pe rumo peporandu cheu mbahe pe yembohesa resendar, pe Tũpa rer resendar iyavei pe Tũpa porocuita resendar rese tẽi. Pemoingatu pe ae pe recocuer; ndaipotai aipo nungar mbahe moingatu ãgua — ehi Galión ahe ava upe.

¹⁶ Ipare opa omboyepipi porandusa sui. ¹⁷ Ahese opacatu griego oipisi judío tũparo rerecuar Sóstenes yuvireco. Ipare yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

Pablo yevi irisa Antioquía ve

¹⁸ Pablo secoi pucu vite pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu popive, aheve Pablo oñeapipa tupri oñehe mboaviye ãgua. Ipare yuviraso carite pipe Siria ve. ¹⁹ Siria piar rupi yuviraso Efeso ve. Aheve opita Aquila, Priscila yuvireco. Ichui Pablo oique judío tũparo pipe Jesús resendar ñehesa mombehu ãgua chupe yuvireco. ²⁰ Ahe pendar omombita pota vite tẽi yuvireco viña, Pablo rumo ndopita potai aheve. ²¹ Evocoyase, “Aviye, taso

rane” ehiño chupe yuvireco. “Tũpa oipotase cheu, ayevi irira vitu pe piri” ehi.

Ipare oso Efeso sui carite pipe. ²² Oyepotase Cesarea ve, oso Jerusalén ve “avirave” apo ãgua Jesús reroyasar upe. Ipare oso Antioquia ve. ²³ Opita pucu pare aheve, osẽ, oguata iri Galacia rupi, Frigia rupi opacatu Jesús reroyasar monguerẽhi catu ãgua.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandria iguar. Oñehe tupri ai vahe, oicua tupri avei Tũpa Ñehengagüer. ²⁵ Ahe oyembohe vahe avei yande Yar recocuer rese. Omombehu oquerẽhisa pipe secocuer ava upe, oporombohe tupri ai avei sese. Ahe rumo oicua Juan oãpiramo agüer güeraño tẽi. ²⁶ Ahe osiquiyeẽhisave judío tũparo pipe omombehu Tũpa Ñehengagüer. Osenduse Aquila, Priscila ñehesa, omombita yuvireco oyepiri. Ahese omombehu tupri catu Tũpa recocuer chupe yuvireco. ²⁷ Oso potase Apolos Acaya coti, ahese Jesús reroyasar Efeso pendar omonguerẽhi catu. Oyapo cuachiar Acaya pendar upe imondo yuvireco sese hañeco tupri ãgua. Ipare oyepota oso Acaya ve. Aheve oime ava Tũpa guaisusa pipe sui viroya vahe Jesús yuvireco. Ahe ava Apolos oipitivi seroya tupri catu ãgua yuvireco. ²⁸ Omboyecua opacatu rovaque judío pihañemoñetasa co coti tẽi vahe. Ahese opa osecopi oñehe pipe ahe ava. Esepia, Tũpa Ñehengagüer pipe omboyecua ité: “Jesús Tũpa Rembiporavo ava piñero ãgua secoi” ehi eté judío eta upe.

19

Pablo omombehu Jesús recocuer Efeso ve

¹ Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar. ² Evocoyase oporandu ahe ava upe:

—¿Peipisi vo Espíritu Santo pe piha pipe peroyase Jesús? — ehi chupe.

—Ore ndorosendui eté aipo Espíritu Santo resendar ñehesa — ehiño yuvireco chupe.

³ Ichui oporandu iri chupe:

—Evocoyase, ¿mbahe nungar vo ãpiramosa peipisi? — ehi.

—Juan poroãpiramosa oroipisi — ehi ahe ava yuvireco chupe.

⁴ Evocoyase aipo ehi ahe ava upe:

—Juan niha oñapiramo acoi omboasi vahe oangaipa oyevisẽ Tũpa upe. Ipare rumo omombehu ava upe: “Peroya ahe eté

vahe ou vaheřã che raquicuei” ehi. Ahe ou vaheřã, “Jesús upe” aipo ehi —ehi Pablo chupe.

⁵ Osenduse Pablo ñehe, opacatu oñeapiramo uca Jesucristo rer pipe yuvireco. ⁶ Omondose Pablo opo iharive yuvireco, ahese ogüeyi Espiritu Santo, oi que ipiha pipe yuvireco. Ipare avieteramo tēi oñehe ambuae ñehesa pipe iyavei omombehu Tūpa suindar ñehesa yuvireco. ⁷ Ēgüe ehi Tūpa ahe doce mbia yuvirecoi vahe upe.

⁸ Mbosapi yasi rupi Pablo oi que omombehu Tūpa Ñehengagüer judío upe osiquiyeehisave itūparo pipe ipihañemoñeta rerova āgua Tūpa mborerecuasa resendar reroya āgua rese. ⁹ Amove rumo judío ipihaviracua ite seroyaēhi āgua yuvireco. Ipipe ñehe-ñehe tēiño co tecocuer ipiasu vahe mombehusa rese yuvireco ava rehi rovaque. Evocoyase Pablo oyepipi ichui, vinosepa oyepi Jesús reroyasar yeroquisa Tirano serer vahesave seraso. Aheve ari yacatu rupi oñehe yepi. ¹⁰ Ēgüe ehi ñuvirío araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer. ¹¹ Tūpa omondo güeco pīratasa Pablo upe poromondiisa apo āgua. ¹² Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera āgua. Carugar avei opa yuvinose yuvireco ichui.

¹³ Amove oime judío oguata vahe ocar rupi carugar mose āgua ava sui. Sese nara oiporu pota yande Yar Jesús rer yuvireco.

¹⁴ Evocoyase aipo ehi carugar upe: “Pablo Jesús recocuer omombehu vahe rer pipe, ‘Peyepipi co mbia sui’ ahe pēu” ehi. Ēgüe ehi pota avei siete Esceva rahir mbahe apo yuvireco viña. Ahe iyesupa judío pahi rerecuar seci. ¹⁵ Carugar rumo omboyevi chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño carugar chupe.

¹⁶ Aheseve ahe cuimbahe carugar vireco vahe opo ipāhuve oso. Opacatu opīratasa pipe opa ite osecopi siete mbia yuvirecoi vahe. Omomara-mara tēi uguayihisa pipe imonapipri imondo. ¹⁷ Co mbahe sembiapo rēracua opa oye-pota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

¹⁸ Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco ¹⁹ iyavei setá ipaye vahe Jesucristo viroyase, omonuhapa ocuachiar ombopayesa resendar sapi āgua opacatu ava rovaque yuvireco. Sapi pare, opa ahe cuachiar repri vinose yuvireco. Ahe sepri

cincuenta mil tupri ari mboraviqui repri. ²⁰ Ēgüe ehi Tūpa opīratasa pīpe ombouvicha oñehengagüer iyavei ñehe pīratasa oyecua catu ava rese.

²¹ Ipape Pablo ipihañemoñeta Jerusalén ve oso āgua ivi Macedonia, Acaya rupi. “Coiye catu aheve che reco viteseve, ichuive che asora Roma ve” ehi. ²² Evocoiyase omondo ñuvirío opītivisar Timoteo, Erasto Macedonia ve güenonera. Ahe rumo opita vitemi Asia rupi oico.

Ava Efeso pendar yaivu guasu yuvireco

²³ Ahe ari pīpe Efeso pendar yaivu guasu yuvireco co tecocuer ipiasu vahe rese. ²⁴ Aheve mbia Demetrio serer vahe secoi. Ahe oyapo Artemisa rēta rahanga guarepochi apopri guarepochi pisi āgua. Ambuae ava mbahe rahanga aposar oipisi tupri avei oporaviqui repri ipiri yuvireco. ²⁵ Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboaivu guasu uca āgua. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe. ²⁶ “Peicua avei Pablo opa ovirova ava eta piha Artemisa mboeteisa sui ‘ndahei Tūpa ité’ ohesa pīpe yande rembiapo uve. Ndahei rumo cohapeño ēgüe ehi, opacatu Asia rupi ēgüe ehi avei imombehu. ²⁷ Aviyeteramo mbahe tēi oimera yandeu yande poraviquisa mocañi tēi āgua, tūparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nombotei iri chira, iyavei viroñora yande rembiapo catuprisa yuvireco” ehi.

²⁸ Osenduse aipo ihe ava yuvireco, oñemoirosa pīpe virosapucái aipo ehi yuvireco: “¡Imboeteipri catu Artemisa yande recua pendar tasecoi!” ehi yuvireco.

²⁹ Opacatu Efeso rupi ava yaivu guasu tēi. Osapucái vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave. ³⁰ Pablo oi que pota tēi ava rehii pāhuve, ambuae Jesús reroyasar rumo nomoingue uca potai yuvireco. ³¹ Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe. ³² Ñemonuhasave amove ava osapucái pīrata ñepe mbahe rese, amove osapucái ambuae mbahe rese. Esepia, yaivu tēi yuvireco. “¿Mahera vo evocoiyase yañemonuha?” ehi tēi setá ipāhu pendar yuvireco. ³³ Amove rumo ava rehii pāhuve yuvirecoi vahe judío, ahe ombohe-mbohe imoañiña imondo Alejandro mbahe mombehu āgua ava rehii

rovaque yuvireco. Alejandro evocoyase omopuha tēi opo ava monguiriri āgua viña. Osepi pota omu judío ava rehii rovaque viña. ³⁴ Ava rehii rumo oicuae Alejandro judío secose yuvireco. Opacatu guasu osapucaí pĩrata yuvireco. “¡Imboetepri catu Artemisa yande recua pendar tasecoi!” ehi pucu-pucu yuvireco. Ēgüe ehi ahe osapucaí ñuvirío hora rupi rutei yuvireco.

³⁵ Evocoyase tecua pipendar mbahe cuachiasar oicatusé ava monguiriri āgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tũparo rese yande hañecosa iyavei sahanga iva sui oviapi vahe rese avei hañecosa. ³⁶ Ndipoi niha ava, ‘Aní’ ehi vaherā che remimombehu rese. Sese peyemonguiririño, peyapoi rene mbahe pe yapisacaēhisave. ³⁷ Peruño tēi eté co ñuvirío mbia cohavé, ndoyapoi rumo mbahe tēi Artemisa upe yuvireco. Nimondai mbahe rese itũparove, ndoviroĩroi avei serer yuvireco. ³⁸ Sese Demetrio iyavei oporaviqui vahe supi ahe oñemoirose que ava upe, toyuvirasó rane ava recocuer moingatusar upe yuvireco; aheve tomoin-gatu güecocuer yuvireco. ³⁹ Pemoingatu potase que ambuae mbahe, peso ranera yemomborandusave imoingatu āgua. ⁴⁰ Mborerecuar revo oyandura yande rembiapo co pipe, ‘¿Maha-hera peaiyu guasu tēi? ¿Che amotarēhimbave tie ēgüe peye?’ ehi tiētera yandeu. Oporanduse yandeu, ndayaicatui chitiētera imboyevi āgua iñehe chupe. Esepia niha, co yañemonuha yande remimbotar tēi cohavé” ehi chupe. ⁴¹ Aipo ihe pare, omomba aheve oñemonuhasa yuvireco.

20

Pablo guata agüer Macedonia, Grecia rupi

¹ Ava aivu guasu pare, Pablo, “Toyugüeru” ehi ava Jesús reroyasar upe. Ahese omboaracua ahe ava. Chupe, “Aviye” ohe pare, oso Macedonia ve. ² Oguatase Macedonia rupi, omonguerēhi-rēhi avei ambuae Jesucristo reroyasar yuvirecoi vahe tecua-tecua rupi. Ipare oyepota Grecia ve oso. ³ Aheve opita mbosapi yasi. Oso potase Siria ve carite pipe, judío ipihañemoñeta mara sereco āgua rese yuvireco. Oyanduse, carite pipe oso rāgüer sui, oyevi iri oso Macedonia ve ivi rupi. ⁴ Yuvirasó moviro mbia supi, ipāhuve ñepeí Berea pendar, Pirro rahir Sópater; ñuvirío Tesalónica pendar, Aristarco, Segundo; ñepeí Derbe pendar, Gayo; ñuvirío Asia pendar, Tíquico, Trófimo. Timoteo oso avei supi. ⁵ Evocoi mbia yuvirasó Pablo renondeve sãro āgua Troas ve. ⁶ Pieta pan dayapepoi vahe hu pare, orosē tecua Filipo sui carite pipe,

cinco ari rupi oroyepota Troas ve. Ahe tecuave oropita siete ari rupi.

Pablo Troas ve secoi

⁷ Domingu pipe, ore oroñemonuha pan hu ãgua. Ahese Pablo oporombohe oico pĩtu mbiter rupi. Esepia, ahe osẽ pota ahere ayihive voi ichui. ⁸ Ahe oi ivate vahesave ñemonuhasa pipe setá tataendi. ⁹ Mbĩa chĩhivahe, Eutico serer vahe, metanave uguapi oĩ. Pablo rumo oñehe pucú iteanga. Evocoiyase omboopesi ahe chĩhivahe. Ipare oquẽ; aviyeteramo tẽi oviapi oi ivate vahe mbosapisa sui. Ahese ava ogüeyi sehögüer rupi ivi sui yuvireco. ¹⁰ Evocoiyase Pablo ogüeyi ou chupe, oñeno oso sese icuhaguã. Ipare aipo ehi Jesús reroyasar upe:

—Pesiqüiyeyi rene; nomanoi moco —ehi.

¹¹ Ipare oyeupi iri oso ombohi pan igua. Ichui oñehe pucu vite. Omomba cõhe senise; ipare oso cute. ¹² Evocoiyase co mbĩa chĩhivahe viroyevise secosave, opacatu oyembovĩa guasu catu yuvireco. Esepia, nomanoi eté.

Pablo yuviraso Troas sui Mileto ve

¹³ Pablo oso pota ivi rupi, ore ranengatu rumo oroso carite pipe Aso ve. Aheve oroyepota Pablo reraso ãgua semimbotar rupi. ¹⁴ Oroyoepiase aheve, oha carite pipe ore piri. Ichui oroso cute Mitilene ve. ¹⁵ Ahere ayihive carite pipe oroñocua Quío oroso. Ambuae ari rese oroyepota Samos ve. Ichui oroso no oroyepota Mileto ve. ¹⁶ Pablo ipoyava. Esepia, oipota Jerusalén ve Pentecostés pieta pipe tupri güeco ãgua. Sese Efeso oroñacuasaño oroso.

Pablo ñehesa Jesús reroyasar rãrosareta Efeso pendar upe

¹⁷ Mileto ve ore recose, Pablo omondo oñehe Efeso ve ‘toyugüeru Jesús reroyasar rãrosar cheu’ oya. ¹⁸ Oyepotase yuvireco chupe, aipo ehi: “Peicua niha che recocuer aviye ité yipisuive ari che reique ramosa resendar co Asia ve. ¹⁹ Ari yacatu rupi aporaviqui yande Yar upe pe pãhuve vichico che reco asiẽhisave che yasehosa pipe. Yepe judío che mboguai etepri che recoãhasave pe recuave yuvireco viña, ²⁰ che rumo ndaicatui ñehesa aviye vahe mombehuẽhi pẽu mbahe aviye ãgua yepi. Che opombohe ava rehi rovaque, opombohe avei ñepi-pepi pe rẽta rupi yepi” ehi. ²¹ “Amombehu ñehesa judío upe, ava ndahei vahe judío upe avei aipo ahe: ‘Pemboasi pe angaipa; peyevi Tũpa upe, peroya avei yande Yar Jesús’ ahe” ehi. ²² “Cũritei asora Jerusalén ve vichico. Aheve che so ãgua Espĩritu che cuai che piha pipe. ‘¿Mara ehira piha yuvireco peve cheu?’ aipo ahe. ²³ Co güeraño che aicua: opacatu tecua che sosa rupi Espĩritu Santo aipo ehi cheu che roquenda ãgua iyavei che mombaraisu ãgua yuvireco yepi”

ehi. ²⁴ “Ndacherecatēhii rumo cheyese che mano āgua. Che rumo amboaviye potaño ité che poraviquisa Tūpa upe, ahe yande Yar Jesucristo che cuai vahe co ñehesa icatupri vahe mombehu āgua. Co Tūpa oporoaisusa pipe ombou ñepei vahe Guahir ava pisiro āgua” ehi.

²⁵ “Opa niha Tūpa mborerecuasa amombehu pēu. Che rumo aicua ndache repia iri chira peye. ²⁶ Sese tapeicua cūritei: ndayavii eté che cuaita mboaviye āgua co tecocuer aviye vahe mombehu pipe pēu. ²⁷ Esepia, ndaicuacui eté Tūpa Ñhengagüer mombehu; che rumo amombehuño ité opacatu Tūpa recocuer pēu. ²⁸ Sese peñearo tupri, pesāro avei opacatu Jesús reroyasar Espiritu Santo porocuita rupi. Inungar ovesa rārosar, ēgüe peye tupri sāro. Ahe Tūpa remimboepi yuvirecoi. Esepia, Jesús oipiyere vuvi opacatu ava angaipa repirā. ²⁹ Aicua che opoeyare, oyugüerura ambuae ava mahembiar oñaro ai vahe nungar pe pāhuve opacatu Jesús reroyasar mocañipa pota āgua. ³⁰ Oime aveira que ava pe pāhu pendar pe mbopa pota aveira yuvireco pe reraso āgua oyeupi. ³¹ Sese pemahemoha tupri peyese. Pemahenduha acoi opomboaracua tuprise mbosapi araviter rupi, pītu, ari yacatu rupi avei che yasehosa pipe pe rereco” ehi.

³² “Sese, che rivireta, opoeyara Tūpa povrive iyavei ñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pēu opacatu ambuae güembiporavo reseve. ³³ Ndahei pe guarepochi, que oro iyavei pe turucuar pota raisa pipe aso pe pāhuve. ³⁴ Peicua niha acoi che po pipe ité aporaviqui che recove āgua, che rupindar recove āgua avei. ³⁵ Ēgüe ahe amboyecua che recocuer pēu. Supi avei ēgüe peyera; yaporaviqui tupri iparaisu vahe rese hañeco āgua. Pepihañemoñeta acoi yande Yar Jesús remimombehu rese: ‘Sorivete catu ava iporereco vahe, mbahe oipisi vahe sui’ ehi aracahe” ehi Efeso pendar Jesús reroyasar rārosar upe.

³⁶ Oñehe pare, oñenopiha oyerure āgua opacatu omboripar reseve. ³⁷⁻³⁸ Ndoyembovihai eté, “Ndache repia iri chira peye” oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri tēi avei yuvireco saisupave. Ipare yuvirasño ité yuvireco supi carite yemboyasave.

21

Pablo so agüer Jerusalén ve

¹ Evocoiyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso. ² Aheve orosepia carite oso

vaherã Fenicia ve, ahe ipipe oroha, oroso. ³ Orosasase para guasu oroso, orosepia caha pãhu guasu Chipre serer vahe. Ahe oroñocua yande mbahe rese pocoẽhisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya ãgua. ⁴ Aheve orosepia Jesús reroyasar yuvirecoi vahe. Ahese oropita siete ari ipiri. Yepe ahe Jesús reroyasar aipo ehi Pablo upe yuvireco: “Espíritu Santo oñehe oreu. Evocoyase eresoi rene Jerusalén ve” ehi yuvireco chupe viña, ⁵ siete ari pare rumo, orosoño ité para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve oroñenopihapa ore yerure ãgua. ⁶ “Aviye, toroso rane” ore he pare chupe yuvireco, oroha carite pipe. Ahe evocoyase oyevi yuviraso güetave.

⁷ Tiro sui oroso Tolemaida ve. Oroyepotase, oroso Jesús reroyasar repia ãgua. Aheve oropita ñepeí ari. ⁸ Ahere ayihive oroso Cesarea ve. Aheve oroi que, oropita Felipe rêta ve, ahe oguata vahe Jesús recocuer mombehu. Ahe mbia iporavopri seci aracaco ambuae seis yuvirecoi vahe pãhuve. ⁹ Evocoi Felipe vireco irungatu guayri ndomendai vahe. Tayri Tüpa ñehe mombehusar pãve yuvirecoi. ¹⁰ Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tüpa ñehe mombehusar seci. ¹¹ Ouse ore pãhuve, virocua Pablo rumbicuasa ichui. Ipipe oñapichi opi, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar ãpichi yuvireco iyavei omondora ava ndahei vahe judío upe —ehi Agabo imombehu oreu.

¹² Orosenduse aipo ihe, ore, evocoi Cesarea pendar avei, oromombehu Pablo upe: “Eresoi rene Jerusalén ve” orohe tẽi chupe. ¹³ Omboyevi rumo oreu:

—¡Mahera peyaseho che rese, ndache mbovihal peye! Che rumo ayemoingatu voi che ãpichi uca ãgua, che mano ãgua rese avei Jerusalén ve yande Yar Jesús recocuer rese —ehi oreu.

¹⁴ Ndorocatuise ipihañemoñetasa rerova ãgua, oropoiño ichui aipo orohe:

—Tayaposa ayase yande Yar remimbotar —oroheño chupe.

¹⁵ Ipare cute oroyemoingatu ore so ãgua Jerusalén ve. ¹⁶ Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rêtave. Ahe ore moingue oyepiri. Ahe yipive ité viroya yande Yar oico.

Pablo ombori Santiago

¹⁷ Oroyepotase Jerusalén ve, ahe pendar Jesús reroyasar nihapisií ore pisi yuvireco. ¹⁸ Ahere ayihive Pablo, ore avei oroso Santiago repia. Aheve yuvirecove avei opacatu

Jesús reroyasar rãrosar Jerusalén pendar. ¹⁹ Pablo, “Avirave” ehi opacatu oñemonuha vahe upe. Ipare omombehu tupri yipisuipe oyeupe Tũpa mbahe oyapo uca vahe ava ndahei vahe judío pãhu rupi. ²⁰ Osenduse, omboetei guasu Tũpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoi ava iquerẽhi vahe Moisés porocuita aracahendar mboaviye ãgua yuvireco —ehi—. ²¹ Osendu tẽi nde rembiapo yuvireco. Omombehu tẽi avei aipo nde he yande mu ambuae tecua rupindar yuvirecoi vahe upe: “ ‘Peseya Moisés porocuita. Pembocircuncida iri rene pe rahir. Peico iri rene yande recocuer aracahendar pipe’ aipo ehi tẽi oico” ehi nde mombehu yuvireco —ehi Pablo upe yuvireco—. ²² ¿Mara yahera vo? Esepia, oyandura nde yepotasa cohava yuvireco. ²³ Aviye catu ereyapora ore porocuita oromombehu vahe ndeu. Oime irungatu mbia ore pãhuve. Ahe mbia omboaviyera güemimombehu Tũpa upe yuvireco. ²⁴ Eraso co mbia ndeyepi, eñemoatiro supi eso, emboepi avei mbahe Tũpa upe icuavẽhepri. Ahese ahe mbia oicatura oñeapi yuvireco. Eremboaviyese evocoi mborocuita, opacatu judío nde reroyara, oicua ava semira tẽise mbahe nde rembiapo rese yuvireco. Oicua aveira, nde ereroya vite Moisés suindar mborocuita —ehi yuvireco chupe—. ²⁵ Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mimba yucapri mbahe rahanga tẽi upendar seropovẽhepri, pehui rene mbahe ruvi, pehui rene mbahe mimba yucapri suvi renosepirẽhi vahe iyavei peaguasai rene” orohe chupe —ehi yuvireco.

Judío oipisi Pablo tũparo guasu pipe yuvireco

²⁶ Evocoiyase Pablo viroso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tũparo guasu pipe, omombehu yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatirosa. Ahese oromondo pota ndeu porerecosa Tũpa porocuita rupi icuavẽhepirã” ehi yuvireco pahi upe.

²⁷ Opa potase evocoi siete ari, judío Asia pendar osepia Pablo tũparo pipe yuvireco. Ahese omoñemoiro uca opacatu ava rehii tũparo pendar. Ipare ipisise, ²⁸ sãse yuvireco: “¡Ore mu, ore pĩtívii peye co mbia oroipisi vahe rese! Esepia, oguata opacatu rupi. Oñehe tẽi yande rese, Moisés porocuita rese, yande tũparo rese avei iyavei viroique ava ndahei vahe

judío yande tũparo pipe. Sese omonguiha tẽi yande tũparo maranehi” ehi yuvireco chupe.

²⁹ Co rese aipo ehi. Esepia, cuese osepia Pablo viroguatase Trófimo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tũparo pipe’ oya yuvireco viña.

³⁰ Opacatu Jerusalén pendar ndasorii yuvireco. Cũriteimi ava yuvinoña guasu tũparove. Oipisi Pablo ombotiriri senose tũparo pipe sui yuvireco. Ahese omboya voi guaquicuei tũparo roquenda yuvireco. ³¹ Oyuca potase yuvireco, ahese yaivu rẽracua oyepota sundao rerecuar guasu upe. ³² Cũriteimi serecuar viraso sundao, yuvinoña yaivu vahe upe yuviraso. Osepiaase ava sundao rerecuar guasu, isundao avei yuvireco, ndoyuvirocua iri Pablo rese yuvireco. ³³ Ahese ahe sundao rerecuar guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuvirio carena pipe” ehi. Evocoyase oporandu ava upe: “¿Ava vo co mbia? ¿Mbahe vo oyapo pẽu?” ehi judío eta upe. ³⁴ Ahese amove ava ñepe mbahe rese oñehe, ambuae, ambuae mbahe rese tẽi yuvireco. Evocoyase sundao rerecuar ndoicatu supi eté vahe mbahe rendu ãgua yaivu guasu vahe pãhuve. Sese, “Peraso cuartelve” ehi. ³⁵ Viroyepotase yeupisave, ichui osupi sundao oachihive seraso yuvireco ava rehii ñemoiró iteangasa sui. ³⁶ Ava rehii rumo yuvirasoño ité saquicuei, “¡Tomano!” ehi pucu-pucu yuvireco chupe.

Pablo oyoepi ava rehii rovaque

³⁷ Omoingue potase Pablo cuartel pipe yuvireco, aipo ehi sundao rerecuar guasu upe:

—¿Iyacatu vo yañemoñeta raimi? —ehi.

Evocoyase, omboyevi mborerecuar chupe:

—¿Ereicua vo griego ñehe? —ehi—. ³⁸ ¿Ndahei vo nde Egipto pendar, vavasa oyapo vahecuer ereico? Nde revo acoi ereraso oporoyuca vahe pãve cuatro mil tupri ivi iporupirẽhisa rupi —ehi sundao rerecuar chupe.

³⁹ Evocoyase,

—Che judío, tecua Tarso pendar aico. Ahe tecua Cilicia pipendar imboeteipri vahe secoi. Eyapomi mbahe icatupri vahe cheu, tañehemi rane catu ava upe —ehi.

⁴⁰ Evocoyase mborerecuar, “Aviye” ehi chupe. Ipare opũha yeupisa harive, omopuha opo ava eta monguiriri ãgua. Ahese oyapisaca tupri ava rehii yuvireco. Ahe ava upe oñehe hebreo ñehe pipe aipo ehi:

22

¹ “Che mu eta, peyapisaca, che añehemira che yoepi ãgua pẽu cũritei” ehi.

² Oñehe hebreo ñehe pipe. Sese osenduse, oyapisaca tupri catu yuvireco.

³ “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyerquisave. Aheve ayembohe tupri yande ramoi porocuita rese. Ahe che mbohesa pipe avei ayembohe Tũpa mboetei ãgua rese vichico inungar pe peico cũritei. ⁴ Che yipindar aseca-seca catu ava co Tecocuer Piasu rupi oguata vahe yamotarẽhisave. Supitisave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco. ⁵ Pahi rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vaherã yande mu tũparo rerecuar Damasco pendar upe, ‘Taso Damasco ve pahi rerecuar rer pipe ava Jesús reroyasar pisi ãgua. Ichui tarupa cohava imombaraisu ãgua’ ahe viña.

Pablo omombehu oñecuñaro agüer

⁶ “Evocoyase aso Damasco ve. Ahe ipiar rupi arovisave vicho mbiter ari rupi, aviyeteramo tẽi osesape guasu iva sui oreu. ⁷ Ahese aviapi ivive. Asendu avei ñehesa: ‘Saulo, Saulo, ¿mahera vo che amotarẽhi etepri eve?’ ehi vahe cheu. ⁸ Ahese aporandu: ‘¿Ava vo nde ereico, Mbĩa?’ ahe chupe. ‘Che Jesús, Nazaret pendar aico. Che niha che amotarẽhi etepri che rereco eve’ ehi cheu. ⁹ Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco. ¹⁰ Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epũha, eso Damasco ve. Aheve ava opara omombehu mbahe nde rembiaporã’ ehi cheu. ¹¹ Sendi iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

¹² “Aheve mbĩa, Ananías serer vahe, ou cheu. Ahe Tũpa mboyeroyasar ite, viroya tupri vahe avei iporocuita; sese opacatu judío secua pendar: ‘Co mbĩa aviye vahe ite’ ehi yuvireco chupe. ¹³ Oyepotase, aipo ehi: ‘Che rivri, Saulo, esareco iri’ ehi. Aheseve iporẽhi iri mbahe cheu. ¹⁴ Ipare aipo ehi: ‘Yande ramoi rembieroya, yande Ru Tũpa, nde poravo güemimbotar cua ãgua. Oipota avei eresepia vaherã ichuindar ava seco ivi vahe, eresendu aveira iñehe’ ehi. ¹⁵ ‘Nde evocoyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu. ¹⁶ ‘Evocoyase, cũritei ndiya iri eresãro’ ehi. ‘Epũha, toroãpiramo. Eporandu yande Yar upe nde reco moatiro ãgua nde angaipa sui’ ehi Ananías cheu.

“Tũpa che mondo ava ndahei vahe judío upe” ehi Pablo

¹⁷“Coiye catu, ayevi irise Jerusalén ve, ayerure tũparo guasu pipe. Ahese che quer nungarve asepia mbahe. ¹⁸ Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu. ¹⁹ Che aipo ahe chupe: ‘Che Yar, opacatu che cua nde reroyasar roquenda-quendase, ainupa-nupa ucase avei aguatase judío tũparo yacatu rupi’ ahe. ²⁰ Aipo ahe avei chupe: ‘Oyucase Esteban yuvireco, ahe nde recocuer mombehugar, che ahese asepia. Chepihañemoñeta rupi aviyeño oyucase yuvireco. Sese asãro yucasar yeaosa vihã’ ahe chupe. ²¹ Che Yar rumo omboyeve cheu: ‘Eso, oromondora coi rupi ava ndahei vahe judío pãhuve’ ehi che Yar cheu” ehi Pablo ava rehii upe.

Pablo sundao rereciar guasu povrive secoi

²² Aipo rupi osendu ñehe yuvireco. Ahese rumo osapucai pĩrata yuvireco chupe: “¡Tomano co mbia! ¡Toicove vite iri eme co ivi pipe!” ehi yuvireco chupe. ²³ Osapucai-pucái, osequiipa oyeaosa oñemoĩrombave yuvireco iyavei omombo-mombo ivi cuhi ivate coti yuvireco yamotarẽhimbave. ²⁴ Ahese sundao rereciar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sãse ati yamotarẽhimbave ava yuvireco chupe” ehi osundao upe. ²⁵ Oñapichise rumo inupa ãgua yuvireco, Pablo omombehu ñepeĩ sundao rereciar upe:

—Yepe che judío, che rumo romano avei aico. ¿Iyacatu pĩha peinupara romano chupe mbahe rese poranduẽhiseve? —ehi mborereciar upe.

²⁶ Osenduse ñehe, oso voi omombehu güereciar upe.

—Eicua catu, aipo mbia romano secoi —ehi.

²⁷ Evocoyase sundao rereciar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

²⁸ Ahese sundao rereciar guasu aipo ehi chupe:

—Che rumo setá guarepochi amondo romano che reco ãgua —ehi.

—Che rumo che ha ramo suive, romano aico —ehiño sundao rereciar upe.

²⁹ Ahese oinupa pota vahe osiquiyepave oyepipi yuvireco ichui; sundao rereciar guasu avei oicuase Pablo romano secosa rese, osiquiye ñapichi ucase.

Pablo oyoepi judío porandusa ivate catu vahesave

³⁰ Ahere ayihive sundao rereciar guasu oicua tupri pota: ¿Mbahe sui pĩha judío oyamotarẽhi Pablo yuvireco? Evocoyase oyora. Ahese oyocuai porandusa pendar ivate catu

vahe ahe opacatu judío pahi rerecuar, opacatu ambuae judío rerecuar iñemonuha ãgua yuvireco. Ahese oviraso uca Pablo yuvireco chupe.

23

¹ Aheve Pablo omahengatu ava oñemonuha vahe rese ohã aipo ehi chupe:

—Che mu, che rembiapo mbahe tupri Tũpa rovaque areco yepi che pihañemoñeta tuprisa pipe —ehi.

² Ahese Ananías, ahe pahi rerecuar ivate catu vahe, yipi pendar uve, “Peiyurupete” ehi. ³ Ahese Pablo omboyevi chupe:

—¡Tũpa nde nupara, nde aviye tupri tẽi angahu vahe erico! Nde mbahe rese porandu ãgua cheu porocuita rupi ereĩ. Evocoyase, ¿mahera ereporocuai che yurupete ãgua mborocuita mboyeroaẽhisa pipe? —ehi chupe.

⁴ Yivirindar aipo ehi yuvireco chupe:

—¡Ereñehe rai rutei seroĩrosa pipe co Tũpa rembiporavo, co yande pahi rerecuar ivate catu vahe upe! —ehi yuvireco.

⁵ Ahese omboyevi chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

⁶ Ahese oicuae oñemonuha vahe pãhuve amove oime saduceo, amove fariseo. Ahese oñehe pĩrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi vaherã curi. Sese revo co imboasipave oporandu mbahe rese yuvireco cheu —ehi.

⁷ Aipo he ramoseve voi, fariseo, saduceo oñeñehepoepi-epi yuvireco. Sese oyemboyaho yuvireco. ⁸ Esepia, saduceo ndoviroyai vahe cuerayevisa iyavei “ndipoi Tũpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco. ⁹ Sese sãse guasu yuvireco. Ahese oime amove opũha vahe Moisés porocuita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tẽi. Aviyeteramo espíritu que Tũpa rembiguai revo oyemboyecua mbahe mombehu ãgua chupe —ehi yuvireco.

¹⁰ Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pãhu sui, pemoingue iri cuartel pipe” ehi.

¹¹ Ahe pĩtu pipe, yande Yar oyemboyecua chupe aipo ehi: “Eyemonguerẽhi catu, Pablo, inungar che mombehu nde

siquiyeēhisa pipe cohave Jerusalén ve, ěgüe ere aveira che mombehu Roma ve” ehi.

Omboguai Pablo yuca āgua yuvireco

¹² Ahere ayihive setá judío oñemonuha, omboguai Pablo yuca āgua yuvireco: “Tūpa rovaque ndayayucaise Pablo, ndayacarui chira, ndayaĩhui chiaveira; yayucase voi, yacarura, yaĩhura” ehi yuvireco. ¹³ Ahe ava aipo ehi vahe retacuer setá catu cuarenta sui. ¹⁴ Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tūpa rovaque Pablo; ndorocarui chira ndoroyucaise —ehi yuvireco chupe—. ¹⁵ Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe semiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

¹⁶ Pablo rihir rumo oyanduse sēracua, oso cuartelve chupe imombehu. ¹⁷ Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chĩhivahe sundao rerecuar guasu upe. Omombehu pota mbahe chupe —ehi.

¹⁸ Evocoyase mborerecuar viraso ahe chĩhivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chĩhivahe sundao rerecuar guasu upe” ehi. Co chĩhivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, viroyepēpi ambuae sui, oporandu chupe:

—¿Mbahe vo eremombehu pota cheu? —ehi.

²⁰ Evocoyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri āgua ñemonuhasa ivate catu vahesave ayihive yuvireco. “Oporandu pota iri Pablo upe semiapo rese” aipo ehi tēira yuvireco ndeu —ehi—. ²¹ Ndereroyai chira ahe iporandusa yuvireco. Esepia, cuarenta sui setá catu ava oquētiro vaheṛā yuvireco sese. Omboguai eté yuca āgua yuvireco. Ndocarui, ndoihui chira aipo ndoyucaise yuvireco. Cūritei oyemoingatu, osāro viteño nde porocuita yuvireco —ehi mbia chĩhivahe chupe.

²² Ipore sundao rerecuar guasu omboyevĩ imondo, aipo ehi chupe: “Eremombehui rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirío opovri pendar sundao rerecuar upe aipo ehi yocuai: “Pemoingatu dosciento sundao Cesarea ve yuviraso vaheã opi rese, ambuae setenta sundao cavayu harive iyavei doscientos tupri toguata lanza resendar yuvireco. Ipare pesopara pĩtuse las nueve pipe” ehi. ²⁴ “Pemoingatu uca avei cavayu Pablo yeupi ãgua. Ēgũe peye pesãro tuprira seraso yande rerecuar Félix upe” ehi. ²⁵ Evocoyase sundao rerecuar guasu oicuachía Félix upe imondo. Aipo ehi chupe:

²⁶ “Imboeteipri ore rerecuar Félix. Che, Claudio Lisias, amondo che mahenduhasa ndeu. ²⁷ Iyavei co amombehu pota ndeu: judío oipisi co mbia yuvireco yuca ãgua viña. Che rumo aicua romano seco rese, ahese araso sundao sepi ãgua judío eta sui ²⁸ ‘¿mbahe rese pĩha ndoyambotai yuvireco?’ viya. Sese araso judío porandusa ivate catu vahe pendar upe iñemonuhase yuvireco. ²⁹ Ahese aicua yamotarẽhisa judío porocuita sui tẽi iyavei ndoyapoi mbahe tẽi oreu. Sese ndiyai yuca ãgua oreu, soquenda ãgua avei. ³⁰ Ayanduse rumo judío oquẽtiro sese yuvireco, amondo voi evocoi mbia ndeu. Ipare amombehu yamotarẽhisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

³¹ Evocoyase ahe pĩtu pipe sundao viroguata Pablo ocuita rupi yuvireco, viraso Antipatris ve yuvireco. ³² Ahere ayihive sundao yuviraso vahe opi rese oyevi yugũeru cuartelve. Sundao cavayu ari pendar gũeraño rumo yuvirasoño vite. ³³ Viroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe. ³⁴ Oyeroqui pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

³⁵ —Oyepotase nde amotarẽhisar yuvireco, asendura nde yoepisa —ehi Félix chupe.

Evocoyase oyocuai opĩtiviisar Pablo rãro ãgua gũetave Herodes rembiapogũer pipe.

24

Pablo oyoepi mborerecuar Félix rovai

¹ Cinco ari pare, Ananías, ahe pahi rerecuar ivate catu vahe, tecua pipendar rerecuar avei yugũeru Cesarea ve. Ou avei mbia ava mbahe aposar pĩtiviisar oñehe vaheã Pablo amotarẽhi uca ãgua, ahe serer Tértulo. Ahe yugũeru Pablo recocuer mombehu ãgua mborerecuar Félix upe. ² Evocoyase Félix gũeru uca Pablo. Ahese Tértulo omboipi sese oñehe aipo ehi Félix upe:

—Nde imboyeroyapri ereico. Aviye ndeu nde porocuai tupri rese. Esepia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe. ³ Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix. ⁴ Ndoromombita pucu potai rumo che ñehe pipe. Sese eyapisaca raimi tēi catu che ñehe rese —ehi—. ⁵ Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca āgua, ahe Jesús, Nazaret pendar, reroyasar rerecuar —ehi—. ⁶ Viroique avei ava ndahei vahe judío ore tūparo pipe. Ēgüe ehi ore tūparo momara. Sese co oroipisi —ehi—. ⁷ Evocoi sundao rerecuar guasu Lisias rumo oyepota ore pāhuve. Ahe opīratasa pipe vinose ore po sui, ⁸ aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo ēgüe orohe chupe —ehi Tértulo.

⁹ Aipo ehi tupri avei ambuae judío yugüeru vahe yuvireco supi. ¹⁰ Ipare Félix oyaiti Pablo upe ‘toñehe’ oyapave. Ahese oñehe:

—Aicua nde ereporocuai setá araviter ore recua rupi. Sese ayoepera nde rovaque che rorivetesá pipe —ehi Félix upe—. ¹¹ Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tūpa mboetei āgua. ¹² Co judío oicua yuvireco nañehengatai ava upe tūparo guasu pipe, namboaiyu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—. ¹³ Co mbia ndoicatui eté mbahe che rembiavi mombehu seroya tupri āgua yuvireco ndeu. ¹⁴ Co rumo amombehu vahe ndeu: che amboetei Tūpa, ore ramoi rembieroya Tecocuer Piasu pihañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuita pipendar iyavei Tūpa ñehe mombehusar rembicuachiagüer avei —ehi—. ¹⁵ Inungar co mbia, ēgüe ahe tupri avei aicua Tūpa ombogüerayevira ava omano vahecuer seco aviye vahe, ndaseco pōrai vahe avei coiye. ¹⁶ Sese ayemoviracua tupri che pihañemoñetasa rereco tupri catu āgua yepi Tūpa rovaque, ava rovaque avei.

¹⁷ “Setá araviter pare ayevi che recua Jerusalén ve ava iparaisu vahe upe porerecosa mondo āgua. Ahese avei mbahe mimba ayuca uca Tūpa upe seropovēhe āgua. ¹⁸⁻¹⁹ Evocoiyase moviro judío Asia pendar che repia yuvireco Jerusalén ve tūparo pipe judío porocuita rupi che ñemoatiro pare. Ndipoi ahese ava rehii che rupi, namboaiyu guasu ucai avei ava. Ahe che repia vahe rumo iya yugüeru ndeu che mombehu,

que virecose che amotarēhisa yuvireco viña. ²⁰ Anise, aviyeteramo co oyepota vahe cohave yugüeru, omombehura ndeu que mbahe che rembiavi yuvireco pahi rerecuar guasu ñemonuhasave che reiquesendar” ehi. ²¹ “Co rese revo oñemoiro yuvireco cheu aipo ahe pīratase ipāhuve: ‘Che aroya ava ocuerayevira coiye. Sese che reraso pe rovai co pipe che recoāha āgua yuvireco’ ahese” ehi Félix upe.

²² Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo —ehi Félix ava upe.

²³ Evocoyase oyocuai sundao rerecuar Pablo rāro āgua: “Er- emondomira rumo que mbahe semimbotar apo āgua chupe iyavei imboripar yugüeruse, tihañecoño yuvireco sese. Ēgüe ere sāro” ehi Félix sārosar upe.

²⁴ Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñhe Jesucristo reroyasa resendar yuvireco. ²⁵ Pablo rumo omombehuse chupe teco ñvisa resendar, teco ñearosa resendar avei iyavei aipo ehise: “Tūpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri āgua, orogüeru uca irira —ehiño.

²⁶ Félix ipihañemoñeta yepi ‘Pablo revo omboura guarepochi cheu osē āgua’ oya viña. Sese osāro pucu tēi. Iyavei setá oyupagüer güeru uca oyeupe oñemoñeta āgua sese. ²⁷ Ñuvirío araviter pare rumo, Porcio Festo oique Félix recuñara. Ahese Félix judío mboviha āgua, oseya Pablo soquendasave.

25

Festo rovai Pablo imondosa

¹ Mbosapi ari oyepotare Festo osē Cesarea sui, oso Jerusalén ve. ² Aheve oyepotase, pahi rerecuareta, judío rerecuareta avei omombehu Pablo recocuer yuvireco chupe. ³ Ipare oporandu chupe: “Emboumi uca Pablo cohave oreu” ehi yuvireco ‘yayuca peri rupive’ oyapave yuvireco viña. ⁴ Festo rumo aipo ehi chupe: “Aní. Esepia, Pablo Cesarea ve soquendasada oico iyavei che ayevi piaivira vicho aheve” ehi.

⁵ —Sese pemondo pe rerecuar che rupi. Naporaise co mbia rembiapo, aheve tomombehu yuvireco cheu sembiapocuerai sereco mara āgua —ehi Festo chupe.

⁶ Evocoyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive uguapi güendave ava reco moingatu āgua oī. Ahese oyocuai

Pablo reru ãgua. ⁷ Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehu-mbehu tēi Festo upe Pablo rembiapo yuvireco, ndoicatui eté rumo seroya uca ãgua yuvireco. ⁸ Esepia, Pablo aipo ehi oyoeþisave:

—Ndayemboangaipai judío porocuita rese, judío tūþaro rese, yande rerecuar guasu Roma pendar Cesar rese avei —ehi.

⁹ Festo rumo omboviha pota judío, sese oporandu Pablo upe:

—¿Ndequerēhi vo Jerusalén ve ereso vaherã? Aheve co mbahe nde rembiapo rese aporandura ndeu —ehi chupe.

¹⁰ Ahe rumo omboyeþi chupe:

—Cūritei aico cohove romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tēi ayapo judío amotarēhisave —ehi—. ¹¹ Ayapose que mbahe naporai vahe, aviyeño che yuca uca ãgua eve; ndayapoise rumo co judío omombehu vahe yuvireco ndeu, ndiyai che mondo ãgua evocoi ava povriþe eve. Che rumo aso pota mborerecuar Cesar ivate catu vahe upe cheu mbahe rese porandu ãgua —ehi.

¹² Ahese Festo oñemoñeta opitiviisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoyase —ehi chupe.

Pablo mborerecuar Agripa rovai

¹³ Evocoyase moviro ari pare, evocoi mborerecuar guasu Agripa, cuña Berenice rese, oyepota Cesarea ve “avirave” apo ãgua Festo upe yuvireco. ¹⁴ Opitase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepeþi mbia soquendapri oseya vahe Félix cheu —ehi—. ¹⁵ Arose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—.

¹⁶ Ahese aipo ahe yuvireco chupe: “Ndiyai eté romano mborerecuar omondo vaherã que ava uve sese oñemoñeta vahe rese mbahe moingatuēhi renondeve. Toyoeþi rane omombehusar rovai, tomombehu tupri rane opacatu güecocuer” ahe judío upe —ehi—. ¹⁷ Sese yugüeruse cohove yuvireco, aporandu voi pota secocuer rese chupe. Evocoyase ñepeþi ari pare aguapþi che rendave porandusave. Ahese ayocuai che pitiiviisar evocoi mbia reru ãgua —ehi—. ¹⁸ Evocoyase opūha sese oñemoñeta vahe sembiapo ai mombehu ãgua. Asendu renondeve che pihañemoñeta: “Oyapo revo mbahe naporai

vahe” ahe viña. Ndipoi eté rumo mbahe sembiapo —ehi—. ¹⁹ Mbahe sembieroya tēi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi. ²⁰ “¿Mara ahera pīha co sembiapo moingatu?” ahe tēi. Sese aporandu chupe: “¿Ndequerēhi vo Jerusalén ve mbahe nde rembiapo rese porandu āgua ndeu?” ahe chupe —ehi—. ²¹ Pablo rumo oporandu cheu Cesar upe oso āgua. Oipota mborerecuar ivate catu vahe oyeupe mbahe güembiapo rese porandu āgua. Sese asoquenda ucaño vite sereco imondo āgua Cesar upe —ehi Agripa upe.

²² Evocoiyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

²³ Ahere ayihive, Agripa oyepota, Berenice rese yugüeru chupe inungar opivondi vahe, ēgüe ehi yuviroique mborerecuar ñemoñetasave sundao rerecuar iyavei opacatu tecua pīpendar ava seco ivate catu vahe reseve. Ahese Festo oyocuai opitiviisar Pablo reru āgua yuvireco, ²⁴ aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tēi yuvireco Jerusalén ve iyavei cohava Cesarea ve. Osapucái pīrata tēi yuvireco ‘¡tomano ité evocoi!’ oya yuvireco cheu —ehi—. ²⁵ Ndayosui rumo mbahe sembiapo yuca uca āgua iyavei oporandu oso āgua mborerecuar ivate catu vahe Cesar upe. Sese che ayemoingatu ité imondo āgua chupe. ²⁶ Ndarecoi rumo mbahe naporai vahe aicuachía vaherā imondo āgua chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirā sesendar Cesar upe nara —ehi—. ²⁷ Chepīhañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

26

Pablo omombehu güecocuer Agripa rovai

¹ Evocoiyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe āgua aipo ehi: ² “Ore rerecuar Agripa, ayoepira che rorivetesave judío che rese ñemoñeta-ñeta tēisa sui mbahe che rembiapoēhi rese nde rovai. ³ Esepia, ereicua tupri opacatu judío recocuer, ipihañemoñetasa avei. Sese eyapisacami nde reco mbegüesa pipe che ñehe rese” ehi.

Pablo omombehura güecocuer oñecuñaro viteēhisendar

4 “Opacatu judío che cua vahe yuvireco, oicua tupri che recocuer che chĩhivahe suive che recuave iyavei Jerusalén ve aicose yuvireco. 5 Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña. 6 Sese cūritei che reru nde rovai yuvireco che recocuer rese nde porandu āgua. Esepia, aroya Tūpa remimombehugüer ore ramoi uve omombehu vahe aracahe” ehi. 7 “Doce ore ramoi suindar opacatu judío yuvirecoi, osāro vite evocoi Tūpa remimombehugüer aviye vahe yuvireco. Sese yuviroique tūparove ari, pĩtu pipe avei Tūpa mboetei āgua yuvireco. Ore rerecuar Agripa, eyapisaca tupri che ñehe rese. Evocoi Tūpa remimombehugüer reroyasa sui judío eta semira-mira tēi che amotarēhisave che rese yuvireco” ehi. 8 “Iyavei opacatu pe, ¿mahera pe avei ndaperoyai Tūpa porombogüerayevisa?” ehi.

Pablo omombehu yipindar Jesús reroyasar amotarēhi agüer

9 “Yipindar che avei che pihañemoñeta rai aracaco mbahe tēi apo āgua rese ava Jesús, Nazaret pendar, rer amotarēhisave. 10 Ēgüe ahe Jerusalén ve. Ombouse pahi rerecuar oporocuaíta cheu, ahese serer pipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voiño ité che” ehi. 11 “Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa pipe tēi. Ēgüe ahe aguata opacatu tūparo rupi, ambuae tecua rupi avei yamotarēhisa pipe” ehi.

Pablo omombehu güeco recuñaro agüer

12 “Evocoyase aso avei Damasco ve Jesús reroyasar mombaraisu āgua, pahi rerecuar ombouse oporocuaíta apo āgua cheu” ehi. 13 “Mbiter ari rupi rumo, aguatase Damasco piar rupi, asepia mbahe sendí vahe iva sui. Ari sui osesape catu cheu, che rupindar upe avei. 14 Orovipipase ivive, asendu ñehesa aipo ehi vahe hebreo ñehe pipe cheu: ‘Saulo, Saulo, ¿mahera vo ereyapo mbahe-mbahe tēi cheu? Ereyapose evocoi mbahe tēi, nde ae ereyemombaraisu’ ehi cheu. 15 Evocoyase amboyevi: ‘¿Ava vo nde ereico, mbia?’ ahe chupe. Omboyevi cheu: ‘Che Jesús aico, che niha co che amotarēhi eve. 16 Epūha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaherā chupe curi, viya ndeu’ ehi. 17 ‘Oropĩsirora judío sui iyavei oromondora ava ndahei vahe judío upe. Ereguatase ipāhuve, oropĩsiro aveira’ ehi cheu. 18 ‘Oromondora, tache cua yuvireco, che yapave iyavei toguata iri eme pĩtumimbi vahe nungar rupi; toguata catu tesapesa rupi yuvireco. Ipipe

sui toyuvireco iri eme carugar povrive yuvireco; toguata catu Tūpa rupi; ěgüe tehi che reroya yuvireco. Ahese oipisira ñeroisa oangaipa rese yuvireco iyavei oipisira Tūpa porerocosa oime vaherã opacatu che rembipeha rupive' ehi Jesús cheu" ehi Agripa upe.

Pablo viroya mbahe güembiepia

19 "Evocoyase, che rereciar Agripa, che quer nungarve asepia vahe iva pendar, aroya ité. 20 Aipo ahe ava upe: 'Pemboasi pe angaipa; peyevi Tūpa upe. Peicove tupri, ipipe sui toicua ava yuvireco pe ñecuñarosa' ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe. 21 Sese tēi judío che pisi tūparo pipe che yuca pota yuvireco" ehi. 22 "Tūpa che pīiviisa pipe rumo aicoveño ité supi, amombehu-mbehu vite Tūpa recocuer opacatu ava seco ivi coti catu vahe upe, seco ivate catu vahe upe avei. Namombehui eté que mbahe co coti tēi Tūpa ñehe mombehusar iyavei Moisés, 'Oimera mbahe aviye vahe' ihe agüer sui. 23 Aracahe omombehu yuvireco: 'Tūpa Rembiporavo Poropisirosar omano ranera' ehi. Ahe rumo yipindar ocueravevi vaherã omano vahe pãhu sui. Omombehu aveira tesapesa ñepisirosa resendar ore mu judío yuvirecoi vahe upe iyavei ava ndahei vahe judío upe avei" ehi Agripa upe.

Pablo osecuñaro pota tēi Agripa recocuer

24 Aipo ehise Pablo oñehe oyoepisave, Festo oñehengataño chupe aipo ehi:

—¡Nande mboaracuai moco nde mbahecua vaisa! —ehiño chupe.

25 Ahe rumo omboyevi chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuaēhisave —ehi Festo upe—. 26 Co mborereciar revo oicua tupri avei che remimombehu. Sese ndasiquiyei opacatu co mbahe mombehu āgua chupe. Esepia, opacatu co mbahe yaposa vahe ndahei ñomipri tēi. 27 Ore rereciar Agripa, ¿ereroya vo evocoi Tūpa ñehe mombehusar rembicuachía? Che aicua ereroya ité —ehi Agripa upe.

28 Ahese Agripa omboyevi chupe:

—Moviro tēi ñehesa ipane cheu Jesús reroya āgua —ehi chupe.

29 Ahe omboyevi Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ěgüe ehi tarahu Tūpa

pëu viña che nungar pe reco ãgua. Ndahei chira rumo soquendapirã peico —ehi.

³⁰ Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opüha yuvireco. ³¹ Oyepepi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirã; ndiyai avei soquendapirã viña —ehi yuvireco oyeupe.

³² Ahese Agripa aipo ehi:

—Ahe ndoporanduisse Cesar upe oso ãgua rese, yamoseño itera niha viña —ehi Festo upe.

27

Pablo imondosa Roma ve

¹ Evocoiyase mborerecuar opihañemoñeta omboyoya yuvireco ore mondo ãgua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehi rerecuar secoi, ahe yuvirecoi vahe rer Mborerecuar upendar. ² Oroha carite pipe, ahe Adramitio sui yuviraso pota vahe Asia ve. Mbia Tesalónica pendar, Aristarco serer vahe, oha avei ore rupi, ahe secua Macedonia ivi rupi. ³ Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rêta rupi nde rese ihañeco tupri ãgua yuvireco” ehi chupe. ⁴ Sidón sui orosirise, oroso Chipre ivi rupi ivitu sui ore ñemoha ãgua. Oroso pota tēi ari sosa coti rupi, ndoroicatui rumo. Esepia, oipeyu pĩrata ivitu icoti sui. ⁵ Evocoiyase oroguata para guasu pipe Cilicia, Panfilia ivi rupi. Ipare oroyepota tecua Mira yemboyasave, ahe Mira, Licia ivi pipe.

⁶ Aheve sundao rerecuar oyosu carite ou vahe Alejandría sui, oso vaherã Italia ve. Evocoiyase ahe ipipe opa voi ore mboha. ⁷ Ichui oroguata mbegüe setá ari. Oroporaviquí iteanga oroyepota ãgua Gnido rovai. Ivitu oipeyu pĩrata vite. Sese oroyahuva Creta coti, oroñocua tecua Salmón rovai rupi. Ēgüe orohe oroso Creta cupe rupi. ⁸ Supi yavai rai ore guata ãgua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

⁹ Ore yepota ãgua aheve, setá ari oromocañi. Ahese ivitu naporai catu oreu cute. Esepia, virovi ari naporai catu vahe. Sese Pablo aipo ehi carite pipendar upe:

¹⁰ —Mbia, naporai iri chira revo yande guata vite ãgua. Yaguata vitese, yamocañira carite, ivosiita reseve, yande avei eté aviyeteramo yacañi tēira —ehi.

¹¹ Sundao rerecuar rumo nomboyeroyai iñehe, ahe omboyeroya catu carite reroguatasar, carite yar avei. ¹² Ahe yemboyasa naporai ivitu ai rãro ãgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasãro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

Ivitu ai para guasu pipe

¹³ Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota ãgua” ehi yuvireco viña. Ahese orosirise ore yemboyasa sui, oroso Creta ivii rupi. ¹⁴ Coiyemi tẽi rumo oyepota ivitu ai oreu Creta coti sui. Ahe ivitu ai ou norte ique coti sui. ¹⁵ Oyepotase oreu, ndoroicatu iri eté sovañchi. Evocoiyase, “Tayande rerasoño” orohe chupe. ¹⁶ Oroñocua caha pãhumi serer Cauda. Ahe oroñocuasave oroviroha sãi ore caritemi ore carite guasu pipe. ¹⁷ Orosupire, ahe oicuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tiẽtera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore reroguataño. ¹⁸ Ivitu rumo ombohítu iteanga para guasu. Sese ahere ayihive oporaviqui vahe omboipi carite vosiita mombo yuvireco. ¹⁹ Imombosapisa ari pipe, omombo vite mbahe carite resendar yuvireco. ²⁰ Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore pihañemoñeta mocañi, “Yacañi tẽi etera para guasu pipe” orohe viña.

²¹ Setá ari ore caruẽhi pare, Pablo opũha aipo ehi carite pipendar upe:

—Mbia, ehi acoi che reroya voira peye viña, nayasẽise Creta sui, ahese ndipoi chira co mbahe yandeu cũritei viña —ehi—.

²² Cũritei, peyemonguerẽhi catuño. Esepia, ndipoi chira yande pãhu pendar omano vahe, carite güeraño rumo ocañi tẽira.

²³ Ayihi pisa oyemoporẽhi cheu Tũpa rembiguai semimbou, chupendar che aico, chupe avei aporaviqui. ²⁴ Ahe aipo ehi cheu: “Pablo, eresiquiyei rene. Ereyepotaño itera Cesar upe. Tũpa oipĩsiro aveira opacatu nde rupindar carite pipendar” ehi cheu.

²⁵ Mbia, ayeroya Tũpa rese. Esepia, ahe omboaviye itera oñehesa cheu. Sese peyemonguerẽhiño —ehi—. ²⁶ Yande mohañira rumo imbehĩ coti caha pãhumi rese yande mondo —ehi.

²⁷ Ñuvirío semana ivitu ore reroguata pare ahe pĩtu mbiter pipe para guasu Adriático rupi oroicose, carite pipe oporaviqui vahe ipihañemoñeta yuvireco ‘yarovi revo ivi yaico’ oya. ²⁸ Sese osãha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve

osãha iri, tipigüer veintisiete metros tēi. Ahese oicua, “Yarovi ivi” ehi yuvireco. ²⁹ Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tūpa yandeu viña!” orohe tēi. ³⁰ Oñemi potase oporaviqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco. ³¹ Pablo rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

³² Ahese sundao eta oyasia caritemi sã oiti ive imondo yuvireco.

³³ Cõhe ramosé Pablo aipo ehi opacatu upe:

—Cūrítei ñuvirío semana pemomba pecaruēhi peico ‘¿mara yahera pñha co yaico?’ pe hesa pipe. ³⁴ Evocoyase pehuñomi mbahe cute pe ñepisiro ãgua. Acoi ocañise carite, yande rumo nayacañi chira iyavei que ñepepe ha nocañi chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tūpa upe ihu ãgua. Ahe imbohi pare, ohu. ³⁶ Evocoyase opacatu ava oye-monguerēhi yuvireco ocaru ãgua. ³⁷ Ore retacuer doscientos setenta y seis tupri. ³⁸ Ore caru pare, oporaviqui vahe opa omombo trigo carite vosiita para guasu pipe iposiiēhi ãgua yuvireco.

Carite ocañi

³⁹ Cõhese, osepiase ivi, “¿Que pñha yaico?” ehi tēi yuvireco. Oyosuse rumo yãcua vahe, ipipe oime ivi cuhi ipiru vahe. Aheve yuviroique pota tēi yuvireco viña. ⁴⁰ Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguatasa yuvireco. Evocoyase oroique oroso yãcua vahe pipe. ⁴¹ Oroguatase rumo, oroyapi ivi cuhi. Aheve carite opãha ité sese. Ndoicatui eté seroyevi yuvireco iyavei carite rupita i ohitu vahe opa tupri oyoca.

⁴² Ahese sundao eta, “Aviyeteramo soquendapri ohita tiētera, oñemi yuvireco. Sese yayucapa” ehi yuvireco chupe viña. ⁴³ Sundao rerecuar rumo ndoipotai Pablo mano ãgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi. ⁴⁴ “Ambuae evocoyase ivirape, carite yecacuer rese toyasecoño yuvinose ãgua ivi rese” ehi. Ëgüe orohe orosēpa ivi rese oroso.

28

Caha pãhu Malta ve Pablo secoi

¹ Ore ñepisiropare, ahese ramo oroicua caha pãhu rer Malta revo rahe. ² Ahe pendar ava nihapisi ore repiase yuvireco. Oquí iteanga, sōhisa avei. Ahese oyatapi guasu yuvireco, “Perio, tapeyephehi” ehi yuvireco oreu. ³ Evocoyase Pablo omonuha yepaha seru, omondo potase rumo tatave, ahese osē aviyeteramo tēi sacucuer sui mboi ahe eté vahe chupe, oipomama ichuhu. ⁴ Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tūpa rumo oichuhu uca mboi upe ‘tomano’ oya” ehi yuvireco viña.

⁵ Ahe rumo omomboño mboi tatave imondo oyesui. Ipare nomomaraiño ité. ⁶ Ahe pendar opacatu osãro tēi yuvireco, “Irirura chupe, ahese oviapira, omanora revo” ehi yuvireco chupe viña. Osãro pucu tēi yuvireco, Pablo rumo nimaraiño ité. Ahese, “Ndahei vo co mbia tūpa ité co secoi” ehi tēi yuvireco chupe.

⁷ Evocoyase mbia Publio serer vahe, ahe opacatu caha pãhu Malta pendar ava rereciar secoi. Ivi namombriimi ichui. Ahe nihapisi ore repia güetave iyavei ihañeco tupri ai ore rese mbosapi ari rupi. ⁸ Aheve ore recoseve Publio yesupa sohí iteanga ou, sepochiuvi avei. Evocoyase Pablo oi que chupe. Ahese oyeroqui Tūpa upe sese, omondo opo iharive. Ēgüe ehi imbogüera. ⁹ Oyanduse ahe icuera yuvireco, ahese ambuae imbaheasi vahe evocoi caha pãhu pendar yugüeru chupe, ahe ombogüerapa avei. ¹⁰ Ahe pendar oyemboava etepri yuvireco oreu. Ipare ore ha āgua ambuae carite pipe, opacatu mbahe ore guatasa rupi ipaneēhi āgua ogüeru yuvireco oreu.

Pablo oyepota Roma ve

¹¹ Co carite mbosapi yasi osãro vahe ari mbahe tēi vahe pituhu āgua. Ipipe oroso. Ahe carite yugüeru Alejandría sui. Ahe ichi rese ñuvirío itūpa rahanga yuvireco: ñepi rer Cástor, ambuae evocoyase Pólux. ¹² Ahese oroso oroyepota yemboyasa Siracusa ve. Aheve oropita mbosapi ari. ¹³ Ichui orosē oroso oroyepota Regio ve. Ahere ayihive ivitu oipeyu irohi coti sui. Sese oroyepota Puteoli ve ambuae ari pipeve. ¹⁴ Aheve orosepia ambuae Jesús reroyasar. Ore mombita güetave yuvireco ñepi semana. Ipare oroso Roma ve ivi rupi. ¹⁵ Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda āgua yuvireco. Sepiase, Pablo, “Aviye ndeu” ehi Tūpa upe. ¹⁶ Oroyepotase Roma ve, sundao

rerecuar co coti omondo Pablo ñepeí sundao upe sãro uca ãgua.

Pablo omombehu Roma ve Tũpa Ñehengagũer

¹⁷ Mbosapí ari pare Pablo omonuha opacatu judío rerecuar Roma pendar. Ahese oñehe chupe:

—Che mu eta, ndayapoi mbahe tẽi judío Jerusalén pendar upe, naroĩroi avei yande ramoí recocuer viña. Che roquenda rumo iyavei imondopri aico Romano sundao rerecuar povrive. ¹⁸ Ahe mborerecuar oporandu che recocuer rese yuvireco. Oicuase che recocuer, opoi pota tẽi che sui yuvireco viña. Esepia, ndoyosui eté mbahe che rembiapo che yuca ãgua yuvireco. ¹⁹ Evocoi judío rumo ndoipotaiño ité chupe. Ahese ayu pota cohabe Cesar upe che yoepi ãgua. Nayamotarẽhi uca potai rumo che mu Jerusalén pendar Cesar upe —ehi—. ²⁰ Che yoepi ãgua oposoho uca. Opomoñeta pota yande remiaro rese. Co Tũpa Rembiporavo ava pĩsiro ãgua resendar reroyasa rese carena pĩpe ñapichimbri aico —ehi.

²¹ Ahese ahe ava omboyevi yuvireco chupe:

—Ndroipisii eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—. ²² Opacatu rupi ava viroĩro pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

²³ Oiporavo ari iñehe ãgua yuvireco. Osupitise ari chupe, setá catu ava oñemonuha yuvireco secosave. Ahese omombehu Tũpa mborerecuasa resendar iyavei Jesús recocuer Moisés porocuaíta icuachiapri pĩpe sui iyavei Tũpa ñehe mombehusar rembicuachía pĩpe avei ‘toviroya yuvireco’ oyapave. Ëgũe ehi imombehu ari momba. ²⁴ Amove osendu vahe viroya yuvireco, ambuae rumo ndoviroyai eté yuvireco. ²⁵ Opihãñemoñetasa nomboyoyaise yuvireco, yuvínosepa pota. Ahese aipo ehi ahe ava upe:

—Supi eté Isaías omombehu Espiritu remimombehu pe recocuer resendar pe ramoí upe aracahe aipo ehi:

²⁶ “Eso nde mu pãhuve.

Emombehu aipo ere:

‘Yepe pesendu tẽira mbahe viña,

ndapesenducuai chira rumo.

Iyavei pesepia tẽira mbahe viña,

ndapemahecuai chira rumo sese’ ere chupe.

²⁷ Esepia, co ava ipiharátá iteanga seroyaẽhisave.

Ndoyemboapisaiño yuvireco.

Iyavei osapĩvi tupriño mbahe sui, ndosepia potai mbahe aviye vahe yuvireco.

Ndosenducua catui eté avei ñehesa supi eté vahe.

Evocoiyase ndoyevi potai cheu güecocuer moingatu yuvireco” ehi Espíritu Santo

remimombehu chupe aracahe —ehi—. ²⁸ Sese tapeicua co pipe suive Tũpa omboyecua ucara oporopĩsirosa ava ndahei vahe judío upe. Ahe niha oyapisacara imombehusa rese yuvireco —ehi chupe.

²⁹ Aipo ihe pare, judío yuvinose iñehe rese oyecopi-copi yuvirašo.

³⁰ Ipare Pablo opita ambuae ava rētave ñuvirío araviter rupi omboepi oque ãgua oico. Aheve nihapisi opacatu ava rese oyepiri oyepotase yepi. ³¹ Omombehu Tũpa mborerecuasa resendar iyavei oporombohe opacatu yande Yar Jesucristo recocuer resendar osiquiyeñhisa pipe. Ndipoi eté que ava omombituhu vahe Pablo ñehese.

PABLO REMBICUACHIA ROMA PENDAR UPE ROMANOS

Pablo mahenduhasa Roma pendar Jesús reroyasar upe

¹ Che Pablo, Jesucristo rembiguai, aicuachía co che ñehhe pëu. Tüpa che poravo apóstol che reco água ñehesa poropĩsirosa resendar mombehu água.

² Tüpa niha yipisuive omombehu uca co ñehesa ava oñehhe mombehusar upe icuachiapri maranehi pipe aracahe. ³ Ahe ñehesa Tüpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui; ⁴ ocuerayevise oespíritu maranehi pipe, ahese opĩratasa pipe omboyecua tupri ité Tüpa Rahir güecosa. Ahe niha yande Yar Jesucristo.

⁵ Ahe ichui Tüpa ombou cheu oporopĩtiviisa apóstol che reco água, che cuai avei ava ndahei vahe judío upe Guahir recocuer mombehu água opacatu ivi rupi sese yeroya uca água 'ipipe sui toviroya che Rahir yuvireco' oya. ⁶⁻⁷ Pe Roma pendar peico vahe, pe avei senoipri ipãhuve peico Jesucristo rese peico vaherã. Pe niha Tüpa rembiaisu peico. Oipota avei pe reco catupri água oyeupe nara. Peipisi catu porovasasa, teco tuprisa yande Ru Tüpa suindar, yande Yar Jesucristo suindar avei.

Pablo oso pota Jesús reroyasar repia Roma ve

⁸ Che yipindar yande Yar Jesucristo rer pipe, "Aviye ndeu" ahe Tüpa upe pe rese. Esepia, opacatu ivi rupi icuapri sese pe yeroyasa. ⁹ Iyavei Tüpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahir resendar ñehesa aviye vahe vichico. ¹⁰ Aporanduño ité semimbotar rupi pe piri che so água rese chupe yepi. ¹¹ Esepia, che aso pota ité Espiritu suindar mbahecuasa mondo pëu pe pĩtivií água 'toyemoviracua tupri catu Cristo rese yuvireco' che yapave. ¹² Che aipota ité yande ñepeipei yañepitivií catu água Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota tẽisa pe piri yepi. Cũritei rumo ndaicatuiño vite ité. Che rumo aipota, "Toime que che poraviquisa sui Cristo rese oyemoviracua catu vahe yuvireco ipãhuve" ahe pëu, inungar opacatu ambuae ivi rupi êgüe ahe ava ndahei vahe judío upe vichico. ¹⁴ Che cuaita ité niha opacatu ava upe che ñehhe água, tecua pipendar yuvirecoi vahe upe iyavei ndayaracua vitei

vahe upe, imbahecua vahe upe, nimbahecuai vahe upe avei no. ¹⁵ Sese pe Roma ve peico vahe upe avei ayemonguerēhi voi eté co ñehesa pĩsirosa resendar mombehu āgua.

Ñehesa pĩsirosa resendar pĩratasa

¹⁶ Che nachĩ eté co ñehesa pĩsirosa resendar aviye vahe sui. Esepia, ahe Tũpa pĩratasa opacatu viroyasar pĩsiro āgua, judío rane yipindar, ipare opacatu ambuae ava-ava tēi avei. ¹⁷ Supi eté co ñehesa omboyecua Tũpa ava reco mbocatuprisa. Oyese yande yeroyasa pipeño ité ěgüe ehi yandeu. Esepia, icuachiapri aracahendar aipo ehi: “Acoi ava seco catupri vahe Tũpa rese oyeroyasa pipe sui oicoveño itera apirēhi” ehi.

Opacatu ava rembiavi resendar

¹⁸ Supi eté niha yande Aposar oñemoirosa ipĩrata vahe ombou itera iva sui opacatu ava viroyasarēhi upe, ndaseco pōrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco. ¹⁹ Ahe oicua tupri tēi mbahe Tũpa suindar yuvireco. Esepia, Tũpa ité niha omboyecua chupe. ²⁰ ěgüe ehi eté Tũpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tũpa ité secoi iyavei ipĩratasa apirēhi vahe. Sese ava angaipa viyar ndiyai, “Eñemosañño tēi rane oreu” ehi vaherã yuvireco chupe. ²¹ Esepia, yepe ahe oicua tēi Tũpa yuvireco viña, nombotei rumo Tũpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe ěgüe ehi tēi vahe rese. Ipipe sui mbahe ndosenducua catu iri eté yuvireco. ²² Yepe, “Ore mbahecua vai” ehi tēi viña, ndoicuai eté rumo mbahe ipipe yuvireco. ²³ Esepia, ahe Tũpa nomanoi vahe seco porañete vahe mboetei rãgüer sui, omboetei ava ocañi tēi vaherã rahanga yuvireco iyavei vĩrai, opacatu mbahe mĩmba, mboi tēi avei omboetei yuvireco.

²⁴ Sese Tũpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiēhisa pipe yuvireco. ²⁵ Esepia, mbahe supi vahe reroya rãgüer sui temira tēi viroya catu yuvireco. Iyavei Tũpa ité mboyeroya rãgüer sui omboetei catu mbahe sembiapocuer tēi yuvireco. Yaposar ité ru timboeteisa catu yepi.

²⁶ Sese Tũpa opoi eté ichui, “Toyapoño poromochisa mbahe tēi güemimbotarai pipe yuvireco” ehi chupe. Evocoiyase cuña avei cuimbahe rese güeco rãgüer sui yuvirecoi oyese ae. ²⁷ Cuimbahe avei cuña rese güeco rãgüer sui yuvirecoiño avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

28 Iyavei, “Tũpa supi eté vahe” ndehise seroyaẽhisa pipe yuvireco, Tũpa evocoiyase opoi eté ichui ‘toyapoño ayase mbahe ndipotasai vahe güeco raisa pipe yuvireco’ oya chupe. 29 Ahe evocoiyase yuvirecoi opacatu mbahe-mbahe tẽi pipe; oyemboaguasa-guasa tẽi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tẽi ava upe. Ahe oñemoiro ambuae ava mbahe pota raisave tẽi, oporapichi, ivava serai, iporombopa serai, ipihañemoñeta ava reco momara ãgua tẽi iyavei imahechiroi ai ipipe yuvireco. 30 Iyavei ambuae ava cupe cotive mara ehi-ehi tẽi vahe, ahe Tũpa amotarẽhisar yuvirecoi, viroĩro avei ava, oyemboivate ai, oyeecomboivate ai tẽi avei oñehe pipe yepi, oseca-seca tẽi mbahe naporai vahe güembiaporã, nomboyeroyai avei oyesupa yuvireco, 31 ndoyapisaca potai eté Tũpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoiparaisuerecoi eté ava yuvireco. 32 Oicua tẽi Tũpa “oimera evocoi nungar aposar upe cañisa” ehi vahe, oyapo viteño rumo mbahe tẽi yuvireco iyavei ambuae ava oyapose mbahe tẽi, ovihareteño sepiase yuvireco.

2

Tũpa omondo ava upe sembiapogüer rupi tupri ité

1 Oimese que pe pãhu pendar ‘co oyapo mbahe tẽi; tocañi’ ohesave ambuae upe, ahese ahe ae oyemocañi tẽi uca. Esepia, ahe inungar tupri avei. 2 Yaicua rumo Tũpa omocañise evocoi nungar mbahe tẽi aposar recocuer, ahe evocoiyase oyapo mbahe supi tupri vahe. 3 Pe opase ava recocuer pesenoi, pe avei rumo ãgüe peye tupri peico. Pe avei eté evocoiyase ndapeñemi chietera Tũpa ñemoirosa sui. 4 ¿Peroĩro tie Tũpa oyapo vitesese mbahe aviye vahe oñemosase, seco mbegüe tupri ai vitesese avei pẽu? ‘Tosecuñaro güecocuer yuvireco’ oyapave rumo ãgüe ehi pẽu. 5 Pe rumo pepiharãta viteño ité Tũpa upe pe yevi potaẽhi ãgua. Sese pereco catu viteño ité Tũpa ñemoirosa peyese, acoi ari oyepotase Tũpa güeco tuprisa pipe yande renoipara yande mocañi ãgua, anise yande pĩsiro ãgua curi. 6 Ahese opara omboepi ñepeipei yande rembiapogüer rupi yandeu. 7 Omboura tecovesa apirẽhi vahe yandeu yasecase teco ori, Tũpa suindar poromboeteisa iyavei mbahe apirẽhi vahe yande mbahe tupri aposa pipe. 8 Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rãgüer sui viroya vahe mbahe tẽi. 9 Judío opacatu mbahe-mbahe tẽi aposar ranengatu oiporarara mbahe rasícuer yuvireco, iparera ndahei vahe avei judío. 10 Tũpa rumo opacatu seco catupri vahe upe omondora imboetei ãgua ‘toipisi teco ori iyavei toyuvirecoi mbahe tupri

pipe' oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepia, Tūpa ndayande mboyoavirati yande rereco. ¹² Ēgüe ehi eté, opacatu oyemboangaipa vahe Moisés porocuaita porēhi oyemocañi tēira yuvireco. Acoi oyemboangaipa vahe Moisés porocuaita rereco pipe yuvireco, ahe porocuaita pipe avei opara ocañi tēi porandusave yuvireco coiye. ¹³ Esepia, osenduño tēi vahe porocuaita ndahei seco catupri vahe yuvireco. Viroya vahe ité rumo porocuaita, ahe seco catupri vahe yuvirecoi. ¹⁴ Supi eté acoi ndahei vahe judío yuvirecoi vahe yepe ndovirecoi co porocuaita yuvireco viña, ahe rumo co porocuaita rupi tupri oyapose mbahe, ahe evocoiyase inungar porocuaita vireco vahe yuvireco. ¹⁵ Esepia, güembiapo catupri pipe omboyecua porocuaita virecose opiha pipe. Opihañemoñeta pipe avei oyandu porocuaita mboaviyesa. Ahe ipipe avei oyandu mbahe güembiavi, ichui avei oyemonguerēhi mbahe aviye vahe apose. ¹⁶ Ahe ari cañi pipe Tūpa oyocuai ucara opacatu ava rembiapo cuaēhisa repri pisi āgua Jesucristo upe, co ñehesa pīsirosa resendar amombehu vahecuer rupi tupri ěgüe ehira curi.

Ñehesa judío resendar, Moisés porocuaita resendar avei

¹⁷ Pe rumo, “Judío aico” peye vahe, peyeroya opacatu Moisés porocuaita mboaviyesa pipe pe reco catupri āgua Tūpa rovaque viña. Iyavei ipipe peyecomboivate ai Tūpa rese peicose. ¹⁸ Peicua semimbotar. Ahe porocuaita pe mbohe avei mbahe aviye catu vahe poravo āgua. ¹⁹ Pe, “Aicatu ité ndasesapiso vahe nungar ava ndayaracuai vahe mboaracua iyavei ava angaipa viyar pītumimbi vahe nungarsave tēi resape āgua” peye tēi. ²⁰ “Aicatu avei ava mbahe ndosenducuai vahe mboaracua iyavei ava chīhivahemi nungar mbohe āgua. Esepia, areco co mborocuaita vireco vahe opacatu mbahecua vahe iyavei mbahe supi tupri vahe ité” peye tēi avei. ²¹ Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaēhi āgua, ¿mahera ru pe ae avei pemonda no? ²² Pe, “Ndiyai pe aguasa” peye; pe teieté avei rumo ěgüe peye. Ndapesepia potai eté mbahe rahanga; pe avei rumo opa peñomi mbahe sepi vahe itūparo pipe sui. ²³ Peyecomboivate ai co mborocuaita rerecosa rese; ndapemboetei rumo Tūpa ipipe ahe mborocuaita mboaviyeēhi pipe. ²⁴ Supi eté icuachiapri aracahendar pipe aipo ehi: “Pe sui tēi ava ndoicuai vahe Tūpa iñehe-ñehe tēi serer maranehi rese yuvireco” ehi.

²⁵ Supi eté co tecocuer cuacua circuncisión resendar ahe aviyere angara pëu, peroya tupri itese Moisés porocuita viña. Ndaperoya tupri ise rumo, pe evocoyase inungar ndapeyembocircuncidai vahe peico. ²⁶ Acoi ava ndoyembocircuncidai vahe, ahe rumo viroyase porocuita, ahe seroyapri inungar imbocircuncidapri yuvirecoi. ²⁷ Acoi ndoyembocircuncidai vahe, oyapose rumo mborocuita yuvireco, ahe evocoyase omombehura pe cañi água yuvireco. Esepia, yepe pereco Tūpa porocuita viña, pe rumo ndapemboaviyei eté. ²⁸ Judío supi eté vahe yaicose, ndahei yande yesupa judío recocuer rupi güeraño ëgüe yahera. Iyavei circuncisión supi eté vahe ndahei yande retecuer rese güeraño tēi avei no. ²⁹ Judío ete ité rumo opihá pipe ité viroya Tūpa. Iyavei circuncisión supi eté vahe, Espiritu rembiapo yande piha pipe, ndahei porocuita icuachiapri rembiapo tēi. Evocoyase judío supi eté vahe oipisira omboeteisa Tūpa suindar ité, ndahei ava tēi suindar.

3

¹ Evocoyase, ¿mbahe vo co aviye judío yande reco água? ¿Yande yembocircuncidasa piha aviyera? ² Supi eté. Esepia, yipindar Tūpa omondo oñehe judío eta upe imboaviye água. ³ Amove yepe ipāhu pendar nomboaviyeise ocuita viña, ¿Tūpa avei tie ëgüe ehira? ⁴ ¡Aní eté! Tūpa rumo supi tupri vahe ité secoi, yepe que ava opacatu semirañete ai tēi yuvireco. Esepia, icuachiapri aracahendar pipe aipo ehi: “‘Supi tupri vahe Tūpa’ ehira nde ñehe rese yuvireco. Sese ereiquesa ava porandusave, eresē tupriñora eso ichui” ehi.

⁵ Yande reco rai pipe tēi yamboyecuase Tūpa reco tupri sa, ¿mara yahera vo evocoyase? ¿“Tūpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tēi viña.) ⁶ ¡Aní eté! Esepia, Tūpa ndaheise supi tupri vahe viña, ndiyai chietera yande recocuer rese porandupa tupri água chupe viña.

⁷ Aviyeteramo oimera ava aipo ehi vahe: “Yande remira pipe sui tēi ava omboetei catuse Tūpa supi eté vahe, ¿mahera piha evocoyase angaipa viyar nungar yande rerecora viña?” ehi. ⁸ “Yayapora ayase mbahe naporai vahe mbahe tupri reime água” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoyase? ¿Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboyecua Tūpa rovaque opacatu angaipa

viyar yaico que judío, que ndahei vahe judío avei. ¹⁰ Supi eté icuachiapri aracahendar pipe aipo ehi:

“¡Ndipoi eté ava seco catupri vahe, que ñepei angara viña!

¹¹ Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

¹² Opatatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepei angara viña!

¹³ Iñehesa mbahe tēi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tēi vahe.

¹⁴ Ipipe oñehe rai opihavĩracuá iteangasa pipe yuvireco.

¹⁵ Ndayipitii oporapichi āgua yuvireco.

¹⁶ Setá ava omomara, omombaraisu avei oguata ruپی yuvireco.

¹⁷ Iyavei ndoicuai eté güeco tupri āgua yuvireco.

¹⁸ Ndipihañemoñetai eté Tūpa sui osiquiye āgua yuvireco” ehi.

¹⁹ Yande niha opa yaicua opacatu co mbahe omombehu vahe mborocuita aracahendar pipe, omombehu co porocuita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tūpa ñemoirosa pisi āgua yuvireco’ ohesave aipo ehi. ²⁰ Esepia, ndipoi chietera que ñepei seco aviye vahe Tūpa rovaque co porocuita mboaviye pipe. Ahe mborocuita rumo oicua uca yande angaipa viyar yande reco.

Cristo rese yande yeroya pipe Tūpa yande pĩsirora

²¹⁻²² Cūrutei rumo Tūpa oicua uca yandeu ndahe iri mborocuita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombehupri secoi porocuita aracahendar pipe, iñehe mombehusareta rembicuachiagüer pipe avei. ²³ Supi eté yande opacatu yayapo angaipa, ndayasupitii eté Tūpa reco porañetesa. ²⁴ Ahe rumo oporoaisusa pipe, “Ereyavi mbahe che ñemoirosa pisi āgua” ndehi iri yandeu. Esepia, ahe yande pĩsiro uca Guahir Jesucristo upe. Yande rumo ndayamboepii eté yande raisusa chupe. ²⁵⁻²⁶ Tūpa rumo ombou Guahir Cristo oipiyere vaherã vuvı yande angaipa rese ñero āgua. Sese yande yeroya pipe oime ñeroisa yandeu. Ipipe omboyecua güeco ivi tupri. Yipisuive rumo güeco asiñehisa pipe oñemosañe aracahendar ava angaipa upe; cūrutei rumo omboyecua ité güeco ivisa

yandeu, seco ñviño ité seco catupri vahe yande rerecose Tahir rese yande yeroya pipe.

²⁷ ¡Evocoyase ndiyai eté yande yeecomboivate ai ñgua so-vaque! Esepia, ndahei porocuita mboaviye rese ñgüe ehi, ahe rumo Cristo rese yande yeroya pipe ñgüe ehi yandeu. ²⁸ Sese yaicua Tüpa, “Ereyavi mbahe che ñemoirosa pisi ñgua” ndehi iri Cristo rese yande yeroyase yandeu, ndahei mborocuita mboaviyesa sui tēi.

²⁹ ¡Tüpa niha opacatu ité ava Tüpa, ndahei ore judío oroico vahe Tüpa güeraño! ³⁰ ¡Supi eté ñepeño ité secoi: sese yayeroyase Cristo rese, oyoya guasño ité, “Ereyavi mbahe che ñemoirosa pisi ñgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no! ³¹ Ndahei rumo, “Ñgüe ehi tēi vahe” yahe evocoi mborocuita upe Jesucristo reroyasa pipe. Ipipe rumo yamboyecua evocoi mborocuita ñgüe ndehi tēi vahe.

4

Abraham recocuer sui yembohesa

¹ Iyavei, ¿mara ehi pñha yande ramoi Abraham recocuer aracahe? ² Acoi mbahe güembiapo pipe sui tēi oipisise güeco tupri ñgua Tüpa sui, oyemboivate aira oico ipipe viña. Ndiyai eté rumo ñgüe ehi Tüpa rovaque. ³ Esepia, icuachiapri aracahendar pipe aipo ehi: “Abraham oyeroya ité Tüpa rese. Sese Tüpa, ‘Co seco catupri vahe’ ehi chupe” ehi. ⁴ Co rumo yande yayapose mboraviqui, ahe yaipisi vahe ndahei porerecosa tēi, ahe rumo mboraviqui repri ité yaipisi. ⁵ Yande rumo, yayeroyase Tüpa rese, Tüpa evocoyase yande pisira, ‘co seco catupri vahe’ ohesave. Esepia, ahe ñgüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña. ⁶ David mborerecuar aracahendar avei oñhe ava rorivetesá rese Tüpa seco catupri vahe nungar pisisa rese. Ahe rumo ndahei mbahe sembiapogüer rese tēi oipisi. ⁷ Ahe aipo ehi aracahe:

“¡Sorivete acoi ava Tüpa ñheroise yangaipa rese, iyavei ndoye-momahenduha irise yangaipa rese chupe!

⁸ ¡Sorivete avei ava, ‘Nde angaipa viyar ereico’ ndehi irise Tüpa chupe!” ehi.

⁹ Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tüpa, “Co seco catupri vahe secoi” ehi Abraham upe oyese iyeroyasa rese. ¹⁰ ¿Marase pñha oipisi oyeupe nara sereco? ¿Oyembocircuncida renondeve pñha, anise ipare tie? Yipive ité. ¹¹ “Toicua ava co seco catupri vahe che rese iyeroyase yuvireco” ehi Tüpa chupe. Sese imbocircuncidapri secoi. Ñgüe ehi Abraham opacatu ava

oyeroya vahe Tūpa rese, ndoyembocircuncidai vahe yesupa nungar seci. Ēgüe ehi Tūpa, “Co seco catupri vahe yuvirecoi” ehi avei ahe ava upe. ¹² Supi eté yande ramoi Abraham opacatu ava oyembocircuncida vahe, Tūpa rese oyeroya vahe yesupa avei seci. Abraham rumo oyeroya vahe Tūpa rese ndoyembocircuncida viteiseve.

Tūpa remimombehu imboaviyesara sese yeroyasa pipe

¹³ Esepia, aracahe Tūpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuita mboyeroya pipe ěgüe ehi chupe, oyese yeroyasa pipe sui eté rumo ahe oipisi ‘co seco catupri vahe’ ohesave. ¹⁴ Supi etese co mborocuita mboyeroysar güeraño oipisise co mbahe oime vaheerā chupe viña, evocoyase yande yeroyasa Tūpa rese ěgüe ehi tēi etera, Tūpa remimombehugüer evocoyase ěgüe ehi tēi vahe aveira viña no. ¹⁵ Esepia, co mborocuita mboaviyeēhisa pipe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroyaēhisa.

¹⁶ Sese mbahe Tūpa remimombehugüer porerecosa yaipisira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuita mboyeroysar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoyase ahe opacatu yande ramoi seci. ¹⁷ Icuachiapri aracahendar pipe aipo ehi: “Orombou ava eta ivi rupindar ramoirā” ehi. Co Tūpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya āgua viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté seci Tūpa ñehes: “Setá oimera ava nde suindar” ehi vahe rupi tupri ité. ¹⁹ Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi āgua yuvireco viña. ²⁰ Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetei eté. ²¹ “Supi eté Tūpa vireco opĩratasa opacatu oñhengagüer mboaviye āgua” ehiño ité opiha pipe. ²² Sese Tūpa, “Co seco catupri vahe seci” ehi iyeroyasa rese chupe.

²³ Co ñehesa ndahei Abraham upe güeraño. ²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús. ²⁵ Esepia, ahe imondopri seci yande angaipa repirā. Ipare Tūpa ombogüerayevi yande pisi āgua seco catupri vahe nungar oyeupe.

5

Tūpa, “Peyavi mbahe” ndehi iri

¹ Sese yaico mbahe tupri pipe Tūpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe. ² Esepia, Jesucristo sui niha yareco co Tūpa suindar porovasasa yayeroyase sese. Ipipe avei yayemoviracuaño ité yaico, yayembovaha avei. Esepia, yaicua Tūpa piri yande reco água imborerecuasave. ³ Ndahei rumo sese güeraño yayembovaha, yande yemombaraisusa rese avei niha yayembovaha yaico. Esepia, yaicua ahe yande mbohe yande ñemosa água, ⁴ iyavei yañemosañose, yasẽ tuprira yande recoãhasa sui, ahese yaicua yaipisi vaherã mbahe aviye vahe Tūpa suindar yepi. ⁵ Iyavei ahe yande remiaro nayamoha tẽi chira sereco. Esepia, Tūpa ombou ité oporoaisusa yandeu oEspíritu Santo yandeu ombou vahe pipe.

⁶ Yande ae ndayaicatui yande ñepisiro água yande recocuerai sui, Cristo rumo osupitise ari chupe, omano opacatu yande angaipa rese. ⁷ Aviyeteramo oimera que ñepi ava omano vaherã ambuae ava aviye vahe upe nara; yepe que ava recocuer supi eté aviye aira viña, seni rumo ndipoi eté que ava, “Che tamano sepirã” ehi vaherã chupe. ⁸ Yepe yande angaipa viyar yaico yipindar, Tūpa rumo omboyecua yande raisusa; ombou Cristo imano água yande angaipa repirã. ⁹ Ipipe sui cūritei, “Peyavi mbahe” ndehi iri chira. Sese nomboui chietera oñemoirosa yandeu. ¹⁰ Esepia, yamotarẽhimbar yaico vitesse, ahe Guahir manosa pipe sui yande reroyevi iri oyeupe mbahe tupri pipe; ocuerayevisa pipe evocoiyase oicatu ité yande pĩsiro. ¹¹ Ndahei co reseño ãgüe yahera, yaviha catu aveira Tūpa rese, yande Yar Jesucristo rese rese avei. Ichui niha ndipo iri mbahe Tūpa rovaque yande rese.

Adán iyavei Cristo resendar ñehesa

¹² Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oyapo angaipa yuvireco. ¹³ Ndipo viteise Moisés porocuita, oime voi eté angaipa co ivi pipe. Yepe tie ndicuasa vitei angaipa porocuita ndipoise viña, ¹⁴ Adán reco sui tupri ité rumo ava omanoño ité oangaipa pipe yuvireco. Ëgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuita mboaviyeẽhisa resendar rese viña. Ahe Adán rese omboyecua mbia ou vaherã.

¹⁵ Tūpa porerrecosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava

omano; Jesucristo rembiapo sui rumo Tūpa ombou oporerecosa poropĩsirosa yandeu. Ahe rumo aviye catu vahe ava eta upe nara. ¹⁶ Ahe ñepei ava angaipa rumo ndoyoyai eté Tūpa poropĩsirosa ombou vahe rese yandeu. Esepia, ñepei ava angaipa sui ou Tūpa ñemoirosa; oporerecosa rumo Tūpa ombouño ité ava eta mbahe oyavi ati vahe upe nara yangaipa mocañi āgua. ¹⁷ Supi eté ñepei ava angaipa sui oimeño ité manosa opacatu yandeu. Yande rumo yaipisi mbahe ipĩrata catu vahe ichui, ahe Tūpa porovasasa tuvichá vahe ité iyavei iporerecosa, “Peyavi mbahe” iheēhisa resendar. Sese yareco ité tecovesa apirēhi vahe yandeyeupe nara ñepei ava sui, ahe Jesucristo.

¹⁸ Evocoyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa pisiēhi āgua ‘tovireco tecovesa apirēhi yuvireco’ oya. ¹⁹ Esepia, ñepei ava Tūpa reroyaēhisa sui setá oime ava angaipa viyar; ēgüe ehi aveira ñepei ava mboyeroyasa sui setá aveira ava vireco güeco catupriša Tūpa rese yuvireco.

²⁰ Supi eté porocuita ouse aracahe, ahese angaipa yaposa catu ité. Yepe ēgüe ehi viña, Tūpa porovasasa rumo ivate catu ité ichui. ²¹ Evocoyase inungar angaipa ipĩrata yandeu yande mano āgua viña, ēgüe ehi avei rumo Tūpa oporovasasa ipĩrata vahe pipe yande pisi seco catupri vahe nungar yande rereco ‘toipisi tecovesa apirēhi vahe che Rahir Jesucristo rembiapo sui’ oya.

6

Angaipa upe omano vahe nungar yaico; Cristo rese yaicose rumo oicove vahe ité yaico

¹ Evocoyase, ¿iya iri pĩha yayapo vite angaipa yaico Tūpa yandeu oporovasasa mboyecua catu āgua? ² ¡Aní chietera! Esepia, yande niha senosepri angaipa sui. Evocoyase ndiya iri eté yayapo viteño angaipa yaico. ³ ¿Ndapeicuai vo pe yañeapiramose Jesucristo rer pipe, ndoyavii yamano vahe ité sese? ⁴ Yande ñeapiramose, aviye acoi ñotimbri yaico Cristo rupive yande mbogüerayevi iri āgua iyavei yande recocuer mopiasu āgua avei, inungar acoi Cristo ocuerayevi Vu reco pĩratasa pipe.

⁵ Yande omano vahe nungar yaicose supive, ēgüe yahe aveira yande yacuerayevi supi. ⁶ Yaicua avei niha yipindar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tēi nungar yande recoēhi āgua. ⁷ Esepia, acoi omano vahe ndoyapo iri angaipa yuvireco.

⁸ Yande avei niha omano vahe nungar Cristo rese yaico. Evocoyase yayeroya avei yaicove vaheřã sese. ⁹ Yande niha yaicua, Cristo ñepei reseve ocuerayevi, nomano iri chietera. Esepia, manosa ndoicatu iri eté chupe. ¹⁰ Supi eté omanose Cristo, omano ñepei reseve opacatu angaipa mocañi ãgua; cūrítei rumo oicove Tūpa upe nara. ¹¹ Ēgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

¹² Sese aní peico vite angaipa pīratasavri ve pe cuai ãgua pe remimbotarai mboyeroyasa pipe. ¹³ Aní peyemondo angaipa upe mbahe tēi apo ãgua. Peyemondo catu Tūpa upe. Esepia, pe inungar ava ocuerayevi iri vahe peico. Sese peyemondo tupri ité Tūpa upe mbahe tupri apo ãgua. ¹⁴ Evocoyase, pe angaipa ndape cuai iri chira pe rereco. Esepia, ndapeicoi Moisés porocuita pipe; pe rumo Tūpa porovasasa pipe peico.

Yembohesa mbiguai tēi recocuer sui

¹⁵ Ndayaico iri mborocuita pipe tēi, yaico rumo Tūpa porovasasa pipe. Evocoyase, ¿“Tayapo vite angaipa” yahera pīha? ¡Aní chietera! ¹⁶ Pe niha peicua que ava pemboyeroyase, ipovri pendar evocoyase peico. Pemboyeroyase Carugar angaipa apo ãgua, ahe evocoyase pe reco mocañi tēira. Tūpa pemboyeroyase rumo, ahe evocoyase pe reco mohivira. ¹⁷ Aviye Tūpa upe. Esepia, pe yipindar mbiguai tēi nungar peico angaipa pipe viña, cūrítei rumo pemboyeroya pe pihave ité porombohesa peipisi vahe. ¹⁸ Ñepei reseve pe angaipa sui Tūpa pe renosese, pe evocoyase mbiguai nungar mbahe supi tupri vahe apo ãgua peico. ¹⁹ (Che amboyoya tecocuer mbahe co ivi pipendar rese imombehu pēu. Esepia, yavai vite ité pēu co ñehesa renducua tupri ãgua.) Yipindar pe retecuer pereco mbahe tēi pipe mbahe naporai vahe apo ãgua. Ēgüe peye rumo pe cūrítei pe reco mohivi ãgua peico mbahe tupri pipe ñepei reseve Tūpa upe pe reco ãgua.

²⁰ Pe peico vitesese mbiguai tēi nungar pe angaipa pipe, ahese ndapeyapo vitei mbahe supi tupri vahe; ²¹ cūrítei rumo pechĩ tēi ichui, ahe niha ndape pītivi ité pe recocuer rese, iyavei pe reraso pota manosa apirēhi vahesave yepi. ²² Cūrítei rumo angaipa sui senosepri peico Tūpa povri ve pe reco ãgua. Ichui mbahe tupri oime pēu. Ahe niha ombou oyeupe nara ité pe reco tupri ãgua. Ipipe sui peicora apirēhi vaheřã. ²³ Angaipa niha ombou manosa tēi yandeu, Tūpa rumo oporerrecosa ombou tecovesa apirēhi vahe yandeu yande Yar Jesucristo rese yande recose.

7

Mendasa sui yembohesa

¹ Che ríivireta, pe niha peicua tupri mborocuaíta, peicua avei ahe porocuaíta povríveño ité opacatu yaico yaicove vitesese co iví pipe. ² Esepia, inungar cuña omenda vahe, imer oicove vitesese, íporocuaítavríve víteño ité secói yepi. Omanose rumo imer ichuí, ahe cuña ndahe iri omer porocuaítavríve secói. ³ Acoi cuña omer recove viteseseve, vírecose ambuae cuimbahe, oyemboaguasa tēi evocoiyase; acoi omanose rumo imer ichuí, ndaseco iri ípovríve. Ahe iyacatu ité omenda yupagüe iri; ahese ndahei yaguasa tēi cute.

⁴ Che ríivireta, pe niha ěgüe peye avei Cristo rese peico vahe; Cristo manosa sui ndahe iri Moisés porocuaítavríve peico Cristo rese peico āgua. Ahe niha acoi ocuerayevi vahe. Sese yande recocuer ěgüe ndehi tēi vahe Tūpa upe. ⁵ Esepia, yande yaicove vitesese yande reco ai pipe, ahe porocuaíta renduse, yaipota catu mbahe tēi pipe yande reco āgua. Ipare rumo ahe manosave tēi yande reraso ucara viña. ⁶ Cūritei rumo yande omano vahe nungar yaico acoi porocuaíta pipe yaico vahecuer sui. ěgüe yahe, yasē ichuí Tūpa upe mbahe apo āgua Espíritu sui yande reco piasu pipe. Ndahe iri mborocuaíta icuachiapri yipíndar vahe pipe yaico.

Angaipa oime vahe yande rese

⁷ ¿“Tūpa porocuaíta angaipa” yahera pīha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuaíta ndipoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuaíta pipe, ahese ndaicuai chiaveira che mbahe pota raisa viña. ⁸ Aicuase mborocuaíta, ahese angaipa ípírata catu cheu. Ahe mborocuaíta apo potaēhisa pipe che querēhi catu opacatu che remimbotarai tēi apo āgua. Esepia, mborocuaíta porēhi angaipa avíye ndipoí vahe viña. ⁹ Yipíndar Tūpa porocuaíta ndaicua vitesese, ndoyavíi avíye vahe ité che reco areco viña. Porocuaíta aicuase rumo, aipota rai angaipa apo āgua. ¹⁰ Che evocoiyase acañi tēi vaherā aico ípipe viña. Ahe porocuaíta che recove apírēhi āgua mbou rāgüer sui, che mondo ucaño itera manosa apírēhi vahe pipe tēi viña. ¹¹ Esepia, angaipa ahe porocuaíta pipe che mbopa ité. Ahe ípipe avei che mocañi tēira viña.

¹² Evocoiyase co porocuaíta ndaseco marai vahe ité, supi tupri vahe ité, avíye vahe avei. ¹³ ¿Co porocuaíta avíye vahe pīha che rereco che mano āgua tēi? ¡Aní eté! Angaipa tēi rumo ěgüe ehi che rereco. Evocoiyase co porocuaíta cuasa sui ípota catu uca mbahe tēi apo āgua cheu. Ípipe aicua angaipa

oime vahe che rese. Ēgüe ehi avei ahe porocuaita omboyecua tupri ité angaipa mbahe tēi vahe yandeu.

¹⁴ Yaicua niha porocuaita Tūpa suindar, che tēi rumo imondopri aico angaipa mboyeroa āgua. ¹⁵ Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotarēhi rumo ayapo. ¹⁶ Che rumo ayapose mbahe ndayapo potai vahe, ahese aicua co porocuaita avīye vahe. ¹⁷ Evocoiyase ndahei cheyesui eté ēgüe ahe, angaipa tēi rumo ēgüe ehi che mbohe uca. ¹⁸⁻¹⁹ Esepia, che aicua ndipoi eté mbahe avīye vahe che reco ai rese; sese yepe che ayapo pota ité mbahe avīye vahe viña, ndaicutui eté rumo yapo. Iyavei yepe ndayapo potai mbahe tēi viña, che rumo ayapoño ité. ²⁰ Sese ayapo viteño itese mbahe ndayapo potai vahe, ndahei rumo che ité ayapo, che pīha pipe angaipa oime vahe, ahe tēi rumo oyapo uca cheu.

²¹ Sese che aicua oime che cuaisar che rese. Esepia, ayapo potase mbahe avīye vahe yepi viña, ahe rumo oyapo uca pota voiño ité mbahe naporai vahe cheu yepi. ²² Che pīha pipe rumo Tūpa porocuaita aipotá iteanga tēi, ²³ che rumo aicua che pīha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbiguai nungar tēi che rereco.

²⁴ “¡Che paraíso ité!, ndaicutu iri eté, ¿uma pīha co mbahe tēi sui che renosera viña?” ahe cheyeupe vichico. ²⁵ Tūpaño ité oicatu Guahir Jesucristo rese. “Avīye” yande Ru Tūpa upe. Ēgüe ehi ahese mbahe cheu; Tūpa porocuaita amboaviye pota viña, che remimbotarai tēi rumo che rereco uca angaipa povrive.

8

Yaico vaherã Tūpa Espiritu rese

¹ Cūritei rumo ndipo iri Tūpa ñemoirosa yandeu Jesucristo rese yaicose. ² Esepia niha, Jesucristo rese yaicose, yande cuaisar Espiritu tecovesa mondosar yande renose angaipa povri sui, manosa sui avei. ³ Esepia, yande remimbotarai rese ndayaicutui Moisés porocuaita mboyeroa āgua, ahe avei evocoiyase ndoicutui eté yande reco moingatu. Tūpa rumo oicatuño ité. Esepia, Guahir ombou yande nungar tupri ité ‘toyemondo ava angaipa repirã’ oya. Ēgüe ehi imocañi opacatu yande angaipa yande sui, yande remimbotarai avei. ⁴ Ahe ēgüe ehi yande yamboaviye vaherã mborocuaita. Esepia, ndayaico iri yande remimbotar tēi pipe. Yaico rumo Espiritu avīye vahe rese.

⁵ Esepia, acoi yuvirecoi vahe rumo güemimbotar tēi pipe, güecocueraí reseño tēi ipihañemoñeta yuvireco; Espiritu rese yuvirecoi vahe rumo semimbotar rese ipihañemoñeta catu yuvireco. ⁶ Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espiritu suindar mbahe rese, virecora tecovesa apirēhi vahe mbahe tupri pipe yuvireco. ⁷ Esepia, acoi güecocueraí reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatui Tūpa porocuita mboyeroia āgua yuvireco. ⁸ Ēgüe ehi eté, acoi yuvirecoi vahe güemimbotarai pipe, ndoicatui eté Tūpa remimbotar apo āgua yuvireco.

⁹ Pe rumo ndapeico iri pe remimbotarai pipe. Peico rumo Tūpa Espiritu rese, ahe perecose peyese. Acoi ndovirecoi vahe rumo Espiritu Cristo suindar, ndahei eté chupendar. ¹⁰ Cristo secoise rumo pe rese, yepe pe rete ocañi tēi vaherā angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu. ¹¹ Acoi Tūpa Espiritu secoise pe rese, Tūpa evocoyase omondora tecovesa piāsu pe retecuer upe oEspiritu pe rese secoi vahe pīratasa pipe. Esepia niha, ipipe ité ombogüerayevi Guahir Jesucristo.

¹² Ēgüe ehi che rivireta, yareco yande cuaita, ndahei rumo yande remimbotarai pipe yande reco āgua. ¹³ Esepia, pe peicoño itese pe remimbotarai pipe, ahese pecañi tēira; pemombopase rumo Espiritu pipe peyēsui, ahese peicovera apirēhi vaherā.

¹⁴ Esepia, opacatu Tūpa Espiritu ombohe vahe, Tūpa rahir ité yuvirecoi. ¹⁵ Supi eté pe Espiritu peipisi vahe ndapembosiquiye uca iri pe rereco, ahe rumo pemoingo Tūpa rahir ité pe reco āgua. Ahe avei, “¡Che Ru!” pe mbohe uca chupe. ¹⁶ Co Espiritu avei oicua uca yande espíritu upe Tūpa rahir yande recose. ¹⁷ Evocoyase yaipisi aveira mbahe yande Ru Tūpa ombou vaherā yandeu; ahe oyoya Cristo reseve yaipisira, Cristo paraisu agüer pipe ité yaicose yareco vaherā teco porañetesa ipiri curi.

Teco porañetesa ou vaherā curi

¹⁸ Cūritei rumo yande paraisusa ndoyoyai eté teco porañetesa yande rese ou vaherā rese. ¹⁹ Opacatu Tūpa rembiapocuer osāro vite ité opacatu oquerēhisa pipe, osepia pota ité teco porañete vahe tahir yuvirecoi vahe rese. ²⁰ Esepia, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ēgüe ehi, Tūpa ité, “Ēgüe tehi” ehi chupe, ombouse angaipa repri ava upe. Mbahe sembiapocuer rumo osāroño ité ²¹ güeco opa tēi vaherā sui ñepisiro āgua teco porañete vahe Tūpa rahir vireco vahe rupiti āgua

curi. ²² Yande niha yaicua aracahe suive opacatu mbahe Tũpa rembiapo oiporara mbaherasicuer yuvireco cuña imembi rasi vahe nungar. ²³ Ndahei rumo ahe güeraño ěgüe ehi yuvireco, yande avei ěgüe yahe. Yande yareco ité Espiritu, ahe yipindar vahe yaipisi vaherã ichui curi. Yayemombaraisu, yasãro vite yande querẽhisa pipe Tũpa guahir ité yande rereco ãgua, yande retecuer recuñaro ãgua avei. ²⁴ Esepia, yande niha yañepisiro ité yande remiaro reroya pipe; sese acoi yasepia vahe mbahe yande remiaro, nayasãro iri. Ndipoi ava osãro vite tẽi vahe mbahe güembiepia. ²⁵ Acoi mbahe yande remiaro ndayasepia viteise rumo, yasãro vite yande ñemosasa pipe sereco.

²⁶ ěgüe ehi avei Espiritu yande pĩtĩvi ndayaicatu irise. Esepia, ndayaicuai eté mara yahera yayeroqui, co Espiritu Santo rumo oporandu ité Tũpa upe yande rese oyemopoasesa pipe. ²⁷ Iyavei Tũpa, ahe oicua vahe opacatu yande pihañemoñetasa, oicuaño ité Espiritu mbahe omombehu pota vahe oyeupe. Esepia, Espiritu oporandu chupe semimbotar rupi yande seroyasar yaico vahe rese.

Yasecopipa itera mbahe tẽi

²⁸ Tũpa niha yande poravo güemimbotar rupi. Yepe yaicua mbahe tẽi oime yandeu viña, Tũpa rumo opacatu mbahe oyapo yandeu mbahe tupri reime ãgua yande raisusave. ²⁹ Esepia, yipive Tũpa yande cua, yande poravo Guahir Jesucristo nungar ité yande reco ãgua ‘ahe che Rahir tenonde catu vahe tasecoi opacatu ambuae che rahir sui’ oya. ³⁰ Iyavei Tũpa yipisuive ahe yuvirecoi vahe oiporavo. Chupe oñehe oyeupe nara seco ãgua. Ipare, “Co seco catupri vahe” ehi chupe; ahe chupe avei omondo teco porañetesa.

³¹ ¿Mara yahe irira vo chupe? ¡Tũpa niha yande repisar secoi, sese ndoicatu iri eté yande amotarẽhimbar yuvireco! ³² Tũpa niha ombou ité Guahir imano ãgua opacatu yande rese. Sese yaicua ombou aveira opacatu mbahe yandeu yande pĩtĩvi ãgua Tahir rese yande recose. ³³⁻³⁴ Sese ndiyai eté ava upe, “Pecañi tẽira, peyavi pe recocuer” ihe ãgua yande iporavopri yaico vahe upe yuvireco. Esepia, Tũpa opa omocañi yande angaipa yande sui Cristo omanose sepirã, iyavei ocuerayevise. Cũritei Cristo Vu acato coti, “Co cheundar ité yuvirecoi” ehi yande rese oyerure yepi. ³⁵ ¿Mbahe piha yande mboyepipira Cristo yande raisusa sui viña? ¿Que yande paraisusa, mbahe yavai vahe yandeu, yande momara-mara tẽisa, que tieporẽhi, anise que yande turucuarã ndipoise, que mbahe tẽise yandeu, yande yuca potase tie yuvireco? ³⁶ Inungar icuachiapri aracahendar pipe aipo ehi:

“Oyemoingatu voi ari rupi yande yuca ãgua yuvireco ndeundar yaicose, ovesa yucapirã nungar tẽi yande rereco yuvireco” ehi

aracahe.

³⁷ Opacatu rumo co mbahe oimese yandeu, yasecopipa ité ahe yande raisusar recocuer pipe sui. ³⁸ Sese che aroya ité Tũpa yande raisu viteño itera yepi yepe que yamanora, anise que mbahe oime vahe yandeu yande recove vitesse. Ndayande mboyepepi chiaveira ichui que Tũpa rembiguai, que seco ivate vahe, seco pĩrata vahe ndayasepiai vahe, que cũritei mbahe oime vahe yandeu, anise que mbahe oime va-herã curi. ³⁹ ¡Ndayande mboyepepi chiaveira que iva pendar mbahe, anise que mbahe ivi pipendar, que ambuae mbahe Tũpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

9

Tũpa oiporavo Israel oyeupe nara aracahe

¹ Che Cristo reroyasar che reco pipe supi eté añehe, ndopombopai. Tũpa Espĩritu oicua ité che pĩhañemoñetasa supi vahe. ² Ndayihai eté che pĩha pipe; oime mbahe tasi vahe cheu yepi. ³ Che aipota tẽi opacatu che mu judío ñepisiro ãgua yuvireco viña. “Tacañi tẽi Cristo porẽhi icañi tẽiẽhi ãgua yuvireco” ahera viña. ⁴ Ahe niha Israel suindar yuvirecoi, aracahe Tũpa oiporavo vahe guahirguã. Ahe ipãhuve avei secoi güendigüer porañetesa pipe, iyavei omondo ité oñehe güemimbotar, oporocuita avei chupe nara viña ‘tache mboetei oyeruesa pipe che rõtave yuvireco’ oya, iyavei, “Amboaviye itera che ñehe pe rese” ehi yuvireco chupe. ⁵ Ahe avei niha yande ramoi yipindar vahe suindar yuvirecoi, Tũpa Rembiporavo Poropĩsirosar avei ahe ichuindar oyesu vahe. Ahe Poropĩsirosar niha Tũpa ité, ivate catu vahe secoi opacatu sui. Sese, ¡timboeteisa catu yepi! ¡Ëgüe tehi apirẽhi!

⁶ “Tũpa nomboaviyei Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe. ⁷ Iyavei ndahei opacatu Abraham suindar tahir supi tupri vahe yuvireco. Esepia, Tũpa aipo ehi: “Nde rahir Isaac sui rumo oimera nde suindar sovasapri” ehi chupe. ⁸ Co rumo osenducua uca yandeu ndahei Abraham suindar yuvĩnose vaheño ité Tũpa rahir yuvirecoi, Tũpa remimombehu rupi yuviroha vahe güeraño rumo ichuindar ité yuvirecoi. ⁹ Esepia, Tũpa Abraham upe aipo ehi aracahe: “Co ari rupi avei ayevira curi, ahese oimera Sara membri ndeu” ehi.

¹⁰ Ndahei rumo co reseño, tahir Isaac rese avei. Esepia, ocuacuase sembireco Rebeca imembi cõi, ahe icõi vahe yesupa rumo ñepeño ité. ¹¹⁻¹³ Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tũpa aipo ehi ichi Rebeca upe: “Yipindar oha vahe nde membri ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarẽhi” ehi. Sese yaicua iya ité Tũpa upe ava poravo güemimbotar rupi, ndahei seco aviye vahe rese.

¹⁴ ¿Sese pĩha Tũpa upe, “Ndaseco tuprii vahe” yahera? ¡Aní eté! ¹⁵ Esepia, acoi Moisés upe aipo ehi: “Aiparaisuerecora ava, asaisu aveira che remimbotar rupi” ehi. ¹⁶ Supi eté ndahei yande remimbotar rupi tẽi, ndahei avei yande pĩratasa rupi Tũpa oyapo mbahe; ahe rumo oporoparaisuerecosa pipe mbahe oyapo yandeu. ¹⁷ Supi eté Tũpa aipo ehi mborereciar guasu Egipto pendar upe aracahe: “Che oromoingue uca mborereciar nde reco ãgua che pĩratasa mboyecua ãgua nde sui, che rer mboetei ãgua avei opacatu ava upe co ivi pipe” ehi. ¹⁸ Ëgüe ehi oporoparaisuereco güemimbotar rupi. Güemimbotar rupi avei omboavai viroya ãgua ava upe.

¹⁹ Aviyeteramo oimera que amove pe pãhu pendar aipo ehi vahe, “Ndiyai evocoyase Tũpa upe, ‘Pe peyavi mbahe’ he ãgua yandeu. Esepia, ndipoi eté niha ava, ‘¡Aní!’ ehi vaherã Tũpa remimbotar upe” ehira. ²⁰ “Ndiyai eté rumo Tũpa poepi ãgua ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tẽi eve?” ihe ãgua oaposar upe. ²¹ Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirã tẽi apo ãgua.

²² Tũpa rumo oñemosa pare iya ité oñemoirora, opĩratasa mboyecua ãgua ocañi tẽi vaherã upe. ²³ Ëgüe ehi avei yapo güemimbotar rupi güeco porañetesa ivate vahe mboyecua ãgua yandeu. Esepia, yande paraisuereco iyavei yipisuive teco ori porañetesa omoingatu yandeu aheve yande reique ãgua. ²⁴ Yande avei yande renoi oyeupe, que judío, anise que ndahei vahe judío yande recose. ²⁵ Esepia, Oseas rembicuachiagüer pipe aipo ehi:

“Acoi ava ndahei vahe cheundar, chupe,
‘Cheundar ité’ ahera, iyavei acoi ava ndahei vahe saisupri
yuvirecoi, chupe, ‘Che rembiaisu ité’ ahera” ehi.

²⁶ “‘Pe ndahei vahe cheundar peico’ ehi vahesave, ahe chupe,
‘Tũpa oicove vahe rahir ité’ hesara” ehi.

²⁷ Isaías rumo aipo ehi israelita upe: “Yepe Israel suindar setá iteangara viña inungar ivi cuhi, moviro tẽi rumo oñepisirora

yuvireco. ²⁸ Esepia, yande Yar omboaviye voira oñehe ava viroyasarēhi mocañi ãgua co ivi pipe” ehi. ²⁹ Oyoya avei ambuae Isaías remimombehugüer yipindar vahe rese:

“Yande Yar seco pĩrata catu vahe noipĩsirose que moviro yande ramoĩ yandeu, yacañipa tẽira viña inungar tecua guasu Sodoma,

Gomorra reseve yuvireco” ehi.

Judío yuvirecoi vahe iyavei ñehesa pĩsirosa resendar

³⁰ ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri ãgua yuvireco viña, Cristo rese oyeroyasa pipe rumo vireco ité güeco catupri Tũpa rovaque. ³¹ Judío yuvirecoi vahe rumo oipota tẽi güeco tupri ãgua ité Tũpa porocuita mboyeroia pipe viña, ndoicatui eté rumo supiti yuvireco. ³² Esepia niha, ndahei oyeroyasa pipe ité oseca oñepiõro ãgua, ahe rumo co mborocuita mboyeroia sui tẽi Tũpa rese yuvirecoi pota viña. Ahe evocoyase ndoyavi oyepiapi vahe “ita yepiapis” rese yuvireco. ³³ Aipo ehi tupri icuachiapri arachendar pipe: “Che amondo Siõn ve ñepeĩ ita yepiapis, ahe oporoeti vahe. Acoi sese oyeroyá vahe rumo, nomochi ucai chietera oyesui” ehi Jesús recocuer upe.

10

¹ Che rivireta, che aipota che piha pipe ité iyavei ayerure Tũpa upe che mu judío recocuer rese ‘toñepiõro yuvireco’ che yapave. ² Supi eté iquerēhi ité Tũpa upe mboraviqui apo ãgua yuvireco viña. Oquerēhisa sui rumo oyavi senducuaēhisa pipe yuvireco. ³ Esepia, ndoicua potai mara ehi Tũpa ava pisi oyeupe. Sese oyesui tẽi oseca güecocuer tupri pipe ‘tomoingatu Tũpa opiha yande pisi ãgua’ ohesave yuvireco viña. Ipipe sui nomboyeroia eté Tũpa remimbotar güeco mbocatupri ãgua ité yuvireco. ⁴ Esepia, Cristo recocuer pipe imboaviyasa tupri Moisés porocuita, “Peyavi mbahe che ñemoirosa pisi ãgua” ehiēhi ãgua Tũpa oyese oyeroyava vahe upe.

⁵ Co yande reco catupri ãgua porocuita pipe sui, Moisés aipo ehi icuachía: “Acoi ava omboaviye tupri vahe opacatu co mborocuita, ipipe sui yuvirecovera” ehi. ⁶ Tũpa, “Peyavi mbahe che ñemoirosa pisi ãgua” heēhi ãgua rumo yande yeroyasa pipe, “Ava vo oyeupira ivave Tũpa Rembiporavo reroyi ãgua” ndapeyei chira. ⁷ Iyavei, “Ava vo ogüeyira omano vahe pãhuve Tũpa Rembiporavo mboyeupi uca ãgua” ndapeyei chiveira. ⁸ ¿Mara peyera evocoyase pe piha pipe? “Co ñehesa namombriveimi pe sui, pe yuru pipe ité, pe piha pipe avei secoi” peyera. ⁹ “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipiõroprĩ peicora.

¹⁰ Esepia, yande p̄iha pipe yayeroya Jesús rese. Ahese Tūpa, “Co seco catupri vahe” ehira yandeu. Iyavei yamombehuse sese yande yeroyasa, ahese ip̄isiropri yaicora.

¹¹ Esepia, icuachiapri aracahendar pipe Tūpa aipo ehi: “Acoi sese oyeroyá vahe rumo, nomochi ucai chietera oyesui” ehi. ¹² Sese oyoya tupri judío ndahei vahe judío recocuer rese. Esepia, ñepeiño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe.

¹³ Esepia, icuachiapri aracahendar pipe aipo ehi: “Acoi opacatu osenoi vahe yande Yar rer, ip̄isiropri yuvirecoira” ehi. ¹⁴ Ava rumo ndoporandui chira p̄isirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduisse yuvireco. Iyavei ndosendui chira ndipoise ñehesa mombehusar yuvireco chupe. ¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe: “¡Aviye ai eté acoi ava güeru vahe ñehesa aviye vahe p̄isirosa resendar!” ehi.

¹⁶ Ndahei rumo opacatu che mu judío viroya co ñehesa p̄isirosa resendar yuvireco. Isaías niha aipo ehi avei aracahe: “Che Yar, ¿uma p̄iha viroya ore ñehe yuvireco?” ehi. ¹⁷ Sese yayeroya Jesucristo rese co ñehesa p̄isirosa rendusa pipe.

¹⁸ ¿Osendu p̄iha judío co ñehesa yuvireco? ¿Osendu ité! Esepia, aipo ehi avei acoi icuachiapri aracahendar pipe: “Sendusa niha opacatú ivi rupi iñehe” ehi.

¹⁹ Iyavei, ¿osenducua p̄iha yuvireco? ¿Osenducuaño ité! Esepia, yipindar Moisés omombehu icuachiapri pipe aipo ehi: “Perecatēhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

²⁰ Ipare omombehu tupri ité Isaías osiquiyeēhisave Tūpa ñehe aipo ehi vahe:

“Acoi ava ndache recai vahe, ahe che p̄isi ité yuvireco. Iyavei ayemboyecua acoi ava che rese ndoporandui vahe upe” ehi.

²¹ Judío recocuer rese avei rumo aipo ehi: “Ari rupi añehe tēi ava che reroyasarēhi ndiporeroyai vahe upe vichico” ehi aracahe.

11

Moviro tēi ava Israel pendar Tūpa oiporavo oyeupe nara

¹ Evocoiyase, ¿omombo p̄iha Tūpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoí eté, Benjamín suindar avei aico.

² Yip̄isuive ité niha Tūpa, “Co ava cheundar ité” ehi ore ramoí

israelita upe. Sese cūritei ndore momboi eté oyesui. Peicua niha acoi Elías resendar icuachiapri aracahendar oyeruqui tēise omu israelita rese aipo ehise Tūpa upe: ³ “Che Yar, nde ñehe mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi. ⁴ Tūpa rumo omboyevi chupe: “Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco” ehi. ⁵ Ēgüe ehi avei cūritei opita viteño moviro judío, ahe niha Tūpa oiporavo oporoaisusa pipe. ⁶ Ipipe ité niha ěgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

⁷ Evocoyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae upe rumo Tūpa omboavai catu viroya āgua. ⁸ Icuachiapri pipe aipo ehi aracahe: “Tūpa nomboyecua uca iri mbahe secocuer pipe. Cūritei ěgüe ehiño vite ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguā; ipipe ndosenducua ucai mbahe chupe” ehi. ⁹ Iyavei David aipo ehi aracahe:

“Ipietasa ivonde nungar iyavei pira mbohasa nungar tasecoi chupe.

Ipipe sui toyuviroha mbahe tēi pipe yuvireco, toyemombaraisu uca avei ipipe yuvireco.

¹⁰ Toicua eme mbahe inungar ndasesapisoi vahe yuvireco. Icuhapapri nungar ayase toyuvirecoi apirēhi vaheerā” ehi.

Ndahei vahe judío ñepisiro agüer

¹¹ Evocoyase areco iri che porandusa pēu: ¿Apirēhi vaheerā ité pīha judío eta ndoyeroyai Jesucristo rese oñepisiro āgua yuvireco? ¡Aní eté! Ahe rumo ěgüe ehi ava ndahei vahe judío pīsirosa pisi āgua yuvireco. Ipipe sui oyemonguerēhi catura judío ipisi āgua yuvireco curi. ¹² Evocoyase judío eta rembiavi sui tuvichá Tūpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tūpa poroparaisuerecosa opacatu ava upe oyevise yuvireco chupe.

¹³ Che rumo areco che ñehesa pēu pe ndahei vahe judío. Tūpa niha che cuai oñehe mombehu āgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi. ¹⁴ Sendusa sui aviyeteramo oimera ipāhuve oyemonguerēhi vahe pīsirosa Tūpa suindar pisi āgua oyeupe nara yuvireco. ¹⁵ Esepia, judío mombosa pipe sui Tūpa omoime ñerosa opacatu ava co ivi pipendar upe. ¿Mara ehira

pīha evocoiyase Tūpa ipisise? Ahese oipisira tecovesa apirēhi vahe yuvireco, evocoiyase ndoyuvireco iri chira omano vahe nungar Tūpa upe. ¹⁶ Esepia, yipindar panguã sui yapopri seropovēhese Tūpa upe, opacatu panvi evocoiyase sovasapri avei ichui. Iyavei inungar ivira rapo seropovēhese Tūpa upe viña, sãca avei evocoiyase opacatu ěgüe ehi aveira viña.

¹⁷ Amove che mu judío inungar Olivo rãca yasiapri. Pe evocoiyase ndahei vahe judío ivira caha pipendar rãca nungar peico vahe, peso yasiapri rendagüerve, ipipe sui peipisi vīracuasa pe recove āgua. ¹⁸ Aní chira rumo, “Yande aviye catu vahe yaico ivira rãca nungar yipindar yuvirecoi vahe sui” peye pe yecomboivate aisa pipe. Esepia, ndahei pe sui judío oipisi oyemoviracua āgua yuvireco, pe rumo yipindar ichui eté peipisi pe yemoviracua āgua.

¹⁹ Iyavei, “Co judío rumo imombosa ité ivira rãca asiapri nungar yande sendagüerve yapita vaherã” peye revo. ²⁰ Supi eté, co rumo Tūpa reroyaēhi pipe ahe imombosa ichui yuvireco, pe rumo seroya pipe suiño ité pepita sendagüerve. Sese peicua catu, aní chira peyemboivate ai ipipe. ²¹ Esepia, Tūpa oiporavo co judío oyeupe nara ité viña, ndoviroyaise rumo, ndoipisii eté. Pëu avei ěgüe ehira ndapemboyeroyaise. ²² Peyapisaca tupri, Tūpa niha aviye vahe ité. Seco pīrata vahe avei rumo ava viroyaēhisar upe. Pëu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar tēi peicora. ²³ Opoipase rumo judío eta Cristo reroyaēhisa sui, Tūpa evocoiyase viroyevi irira oyeupe nara. Esepia, chupe iya ité ipisi iri āgua. ²⁴ Pe ndahei vahe judío ivira caha pipendar rãca yasiapri nungar peico, Tūpa rumo pe mondo ivira aviye vahe nungar rese. ¡Evocoiyase judío ete ité inungar ahe ivira aviye vahe rãca yasiapri, ahe ivate catu oipisi irira oyeupe nara!

Ipa vahe judío ñepisiro agüer

²⁵ Che rivireta, che aipota, “Toicua Tūpa remimbotar icuapirēhi oyemboivate aiēhi āgua yuvireco” ahe pëu. Esepia, amove Tūpa judío upe omboavai viroya āgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pëu, ²⁶ ahese ramo opacatu ava judío yuvirecoi vahe Tūpa oipisiora. Esepia, icuachiapri aracahendar pipe aipo ehi:

“Oura ava Pīsīrosar judío recua Sión pãhu sui, ahe oipehara mbahe naporai vahe opacatu judío sui.

²⁷ Evocoi niha che remimbotar chupe nara, amocañise yangaipagüer yuvireco ichui” ehi.

²⁸ Ēgüe ehi cūritei judío eta ndosendu potai ñehesa pĩsirosa resendar yuvireco. Sese Tūpa amotarēhisar yuvirecoi. Pēu mbahe tupri āgua rumo ēgüe ehi. Tūpa rumo osaisu vite. Esepia, yipive ité oiporavo tamoi eta oyeupe. ²⁹ Supi eté, Tūpa ndoviroyevi iri eté mbahe güemimondo iyavei ndovirovarova tēi vahe opihañemoñetasa güembiporavo sui. ³⁰ Yipindar niha pe ndapemboyeroyai eté Tūpa. Cūritei rumo judío eta ndoviroyaise yuvireco, pe paraisuereco Tūpa. ³¹ Ēgüe ehi avei judío eta cūritei ndoviroyai yuvireco. Tūpa pe paraisuereco uca āgua rumo ēgüe ehi yuvireco. Coiye inungar pe, judío avei osupitira Tūpa poroparaisuerecosa yuvireco. ³² Esepia, Tūpa ité, “Opacatú oyavi mbahe che reroyaēhisa pipe” ehi ‘oicuase mbahe güembiavi, tiquerēhi opacatú che poroparaisuerecosa pisi āgua yuvireco’ oya.

³³ ¿Mara ehi rutei Tūpa aracuasa, imbahecuasa avei? Ndipoi chietera que ava yaracuasa mombehu tupri āgua. Ndayaicatui avei secocuer cuapa tupri āgua. ³⁴ Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tēi ombohe vahe no. ³⁵ Ndipoi que ava mbahe omondo vahe yande Yar upe ‘tomboyevi cheu’ ohesave. ³⁶ Esepia, Tūpa suiño ité niha opacatu mbahe oime, oyeupe nara avei mbahe oyapo opĩratasa pipe. ¡Sese imboeteipri ité Tūpa tasecoi yepi! Ēgüe tehi apirēhi.

12

Yande recocuer imondopri Tūpa upe nara

¹ Sese che rivireta, che Tūpa poroparaisuerecosa pipe aipota pe yemondo ité pe recoveseve chupe nara, inungar mbahe Tūpa upe seropovēhepri ité, ahe aviye itera chupe. Ahe niha pe cuaita pe piha pipe sui eté peyapo vahe rā chupe. ² Peico iri eme co ivi pipendar pihañemoñetasa tēi rupi. Iyacatu rumo pesecuñaro pe pihañemoñetasa. Ipipe sui opacatu pe recocuer oñecuñarora. Ēgüe peyese, peicuara Tūpa remimbotar ahe mbahe aviye vahe, semimbotar supi tupri vahe ité.

³ Tūpa niha oporovasasa pipe che cuai, sese aipo ahe pēu: pepihañemoñeta eme pe yemboivate ai āgua rese. Iyacatu rumo peicua tupri pe pihañemoñetasa peyesendar Tūpa pēu mbahe imbougüer rupi sese pe yeroyasa pipe. ⁴ Inungar yande rete ñepeño ité, sesendar rumo setá, iyavei ndahoyoyai mbahe sembiapo. ⁵ Ēgüe yahe avei yande, yepe que yande retara viña, Cristo rese yayemboyase rumo, ñepeí vahe nungar yaico. Evocoyase yande ñepeí-peí opacatu upendar yaico.

⁶ Tūpa niha omboyeavirati mbahecuasa imbou oporoaisusa pipe ñepeipei upe. Evocoiyase Tūpa ombouse oñehe mombehu āgua yandeu, yamombehura ñepeipei iñehe sese yande yeroyagüer rupi. ⁷ Que ombouse mbahecuasa ambuae ava pĩtivii āgua yandeu, yaipĩtivii tupri aveira. Ombouse yande porombohe āgua, yaporombohe tupriño itera. ⁸ Iyavei ombouse yandeu ambuae ava monguerēhi āgua, yaporomonguerēhiño itera. Ombouse yande poropĩtivii āgua ava mbahe ndovirecoi vahe upe, yamondoño itera mbahe chupe yande recatēhiēhisave. Acoi oporocuai vahe, toyapoño oquerēhisa pipe; iparaisu vahe pĩtiviisar, toipĩtiviño avei vorivetesa pipe.

Cristo reroyasar cuaita

⁹ Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pipe. ¹⁰ Peyeaisu catu ñepeipei oyeivri nungar tupri pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

¹¹ Peyemonguerēhi, aní ndapequerēhi chira iyavei peyapo yande Yar upe mbahe opacatu pe recoete pipe.

¹² Peicoño pe viharetasave mbahe iva pendar rārosa pipe; peñemosañ mbahe rasicuer peiporarase iyavei aní chira peseya pe yeruresa yepi.

¹³ Peipĩtivii ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

¹⁵ Peyemboviha acoi ava oyemboviha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepeipei oyese pe yeaisusa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori āgua. Aní peñemoha imbahe-cua vai vahe nungar.

¹⁷ Aní pēu mbahe tēi aposar upe pemboyvira mbahe tēi avei. Peyapo catu mbahe tupri opacatu ava rembiepiave. ¹⁸ Peicatu vahe rupi peseca pe reco tupri āgua opacatu ava upe. ¹⁹ Che rivireta, aní pe ae pemboyevi mbahe tēi pipe pe rereco momarasar upe. Peseyaño Tūpa upe. Ahe oicuaru chupe. Esepia, icuachiapri pipe aipo ehi: “Che ité aicuaru ava mbahe tēi aposar upe. Che amboepira” ehi yande Yar. ²⁰ Iyavei aipo ehi: “Acoi nde amotarēhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, egüe peyese pe amotarēhimbar upe, ochira pe

sui” ehi. ²¹ Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tupri aposa pipe.

13

¹ Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tūpa suindar. Co oime vahe rumo semimbou ité. ² Sese acoi mborerecuar upe que mara ehi vahe, Tūpa porocuita reroyaēhisar yuvirecoi. Ēgüe ehi vahe inupambri yuvirecoira. ³ Esepia, mborerecuar yuvirecoi vahe ndahei ava seco tupri vahe mbosiquiye āgua yuvirecoi, ahe rumo yuvirecoi ava mbahe tēi aposar mbosiquiye āgua. Ndayasiquiye potaise mborerecuar sui, iya yaicora mbahe tupri pipe. Mborerecuar evocoyase, “Aviye” ehira yande reco catuprisa rese yandeu. ⁴ Esepia, ahe Tūpa rembiguai mbahe tupri apo āgua yandeu. Acoi mbahe tēi yayapose rumo, yasiquiyera ichui. Esepia, ahesē mborerecuar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa āgua yuvireco. ⁵ Sese iya yamboyeroia ité mborerecuar; ndahei rumo ahe yande nupaēhi āgua reseño, yande pihañemoñetasa momaraēhi āgua rese avei. ⁶ Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tūpa rembiguai yuvirecoi. Evocoyase aheño ité iporaviquisa yuvireco.

⁷ Yamondo ñepepei-pei ava upe mbahe chupendar. Iya ité yamondo mborerecuar upe guarepochi oporanduse sese, yamboetei avei ava imboyeroyapri.

⁸ Aní yandereve. Ahe yande cuaita. Yande cuaita avei yande yeaisu āgua, supi eté acoi ava osaisu vahe ambuae ava, omboaviye ité Tūpa porocuita. ⁹ Aipo ehi acoi Tūpa porocuita: “Ndapeyemboaguasai chira, ndapeporoyuca chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuita sendusa tupri ité co ambuae ñehesa rese: “Pesaisu ava pe yeaisu nungar” ehi. ¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyesa tupri ité porocuita.

¹¹ Iyavei peicua tupri co mbahe oime vahe yandeu. Cūritei ari osupiti ité yandeu yande yemopoase āgua. Esepia, yande Yar yevi āgua cōimi catu yandeu iñehengagüer yipindar seroyasa sui. ¹² Supi eté osupiti senimi ari yandeu; sese iyacatu yapoi pītumimbi vahe nungar mbahe-mbahe tēi aposa sui mbahe icatupri vahe pipe yande reco āgua. Evocoyase tayaico sundao oyoepisa omonde vahe nungar. ¹³ Yande catu yaguata yande reco ïvi tuprisa pipe, inungar yaguatase ari

pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande pīhañemoñeta ndahoyoyai vahe pipe, ambuae ava mbahe pota raisa pipe avei no. ¹⁴ Iya rumo yarecora yande Yar Jesucristo recocuer yande yese, aní yande pīhañemoñeta mbahe-mbahe tēi apo āgua yande remimbotarai pipe.

14

Aní peroĩro ambuae Jesús reroyasar

¹ Acoi ava ndoyeroya tupri vitei vahe yande Yar rese que oiquese pe piri, peipisi tupri; aní peiñehepoepira ipihañemoñetasa ndahoyoyaise pe pīhañemoñeta rese. ² Esepia, amove evocoi nungar ava ihupri pāve tēi yuvirohu, oime rumo amove ava ipihañemoñeta opacatu mbahe hu āgua rese. ³ Acoi ava opacatu mbahe ohu vahe, toviroĩro eme amove ndohui vahe mbahe iyavei acoi amove ndohui vahe mbahe, toviroĩro eme acoi ohu vahe opacatu mbahe. Esepia, evocoi nungar ava Tūpa oipisi ité. ⁴ Supi eté pe ndiyai eté peroĩro vaherā ambuae ava rembiguai. Esepia, ahe yande Yar povri pendar seci. Yepe ndoyaviise mbahe ipipe, anise ichui oviapise mbahe tēi pipe, sereciar ité oicuaru chupe. Esepia, yande Yar opĩratasa pipe osecomoingatuño itera.

⁵ Oime avei amove ava ñepepe ari omboetei catu yuvireco ambuae ari sui, iyavei ambuae oime aipo ehi: “Oyoya guasuño ité niha ari” ehi vahe. Ñepepe-pei opīhañemoñeta rupi, “Co supi tupri vahe” ehira opīha pipe yuvireco. ⁶ Acoi que ñepepe ari ava omboetei vahe, yande Yar mboeteisa pipe rumo ēgüe ehi. Iyavei ohu vahe opacatu mbahe, Yar mboeteisave avei ēgüe ehi. Esepia, ahe güembiapo rese, “Aviye ndeu” ehi Tūpa upe; iyavei acoi amove ndohui vahe mbahe, Yar mboeteisave ēgüe ehi, iyavei, “Aviye ndeu” ehi avei Tūpa upe.

⁷ Esepia, yande ñepepe-pei ndayaicoi yandeyeupe nara tēi, ndayamanoi avei yandeyeupe nara. ⁸ Esepia, yaicove vitesse, yaico yande Yar upe nara; yamanose, yamano yande Yar upe nara avei. Ēgüe yahe yande yaicove vitesse, anise yamanose, opacatu chupe nara ité yaico. ⁹ Sese niha Cristo omano, ipare ocuerayevi opacatu ava Yar güeco āgua que omano vahe, anise que oicove vite vahe upe avei.

¹⁰ ¿Mahera evocoyase peroĩro pe mboetasa Cristo reroyasar iyavei mahera ndapesepia potai? Esepia, supi eté niha yande opacatu yasora Tūpa rovai. Ahe evocoyase opara oporandu yande recocuer rese yandeu. ¹¹ Esepia, icuachiapri aracahendar pipe omombehu:

“Supi eté che reco pipe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco,

ehi” ehi.

¹² Evocoyase yande ñepei-peí yamombehura yande recocuer Tũpa upe.

Aní pe rivireta mbahe tẽi pipe pereco uca

¹³ Sese yande ndiyai yañeroiro. Iyacatu rumo ñepei reseve pereco tupri ambuae pe rivri, angaipa pipe sereco ucaẽhi ãgua, iyeroyasa momaraẽhi ãgua avei. ¹⁴ Che yande Yar reroyasar che reco pipe aicua ndipoi eté que tembihu yande reco momara vahe. Amove rumo ava, “Mbahe tẽi co tembihu, ndiyai yahu” ehise, ahe chupe evocoyase mbahe tẽi, ndiyai eté ihu ãgua. ¹⁵ Iyavei yande que mbahe yahuse, ipipe yamomara tẽise yande rivri pihañemoñetasa Tũpa rese, ndahei evocoyase yande poroaisusa pipe ité ãgũe yahe. ¡Aní ahe yamocañi tẽi uca Cristo sui evocoi nungar mbahe yahu vahesa pipe! Esepia, secocuer rese Cristo omano. ¹⁶ Yepe que mbahe aviyera yandeu viña, ndayayapoi chira rumo evocoi nungar yande rembiapo rese ava ñehe-ñehe tẽiẽhi ãgua. ¹⁷ Esepia, ndahei ivate catu vahe Tũpa upe yande carusa, yande igua avei ipovrive yande recose. ãgũe ehi rumo co ivate catu vahe chupe yande recocuer mohivisa, yande reco tuprisa ambuae Tũpa reroyasar pãhuve iyavei yande rorivetesa yareco vahe Espiritu Santo sui. ¹⁸ ãgũe yahese Cristo mboeteisave, aviyẽ aira Tũpa upe iyavei opacatu ava rembiepiave avei no.

¹⁹ Sese opacatu yande recoeté pipe yasecara yaico tupri va-herã yandeyeupe. Ipipe sui yande yaicatura yañepitivii yande yemoviracua tupri ãgua yande Yar rese. ²⁰ Aní pemocañi uca tẽi ava recocuer Tũpa remipĩsiro tembihu sui tẽi. Opacatu niha co tembihu aviyẽ aiño ité; ndiyai eté rumo yahu que tembihu ambuae ava Cristo reroyasar pihañemoñetasa momara ãgua. ²¹ Aviyẽ catu ndayahuisse mbahe roho, que ndayahuisse uva ricuer iyavei que ambuae mbahe ndayayapaise, ambuae ava Cristo reroyasar angaipa pipe seitĩ uca iriẽhi ãgua. ²² Yande pihañemoñetasa yareco vahe rumo yarecoño itera yandeyeupe ité Tũpa rovaque. ¡Aviyẽ ai catuño ité ava acoi, “Aviyẽ yayapose evocoi nungar mbahe” he pare, “¿Mara ehi pĩha?” ndehi irise opihañemoñetasa pipe! ²³ Acoi que ava, “¿Mara ehi pĩha?” ehise tembihu upe. Ipare rumo ohuse, ahe evocoyase oyemboangaipa ipipe. Esepia, ndohui Tũpa rese oyeroyasa pipe. Iyavei ava, “¿Mara ehi pĩha?” ehi vitesẽ que mbahe upe, ipare oyapose ité, ahe angaipa.

15

Yambovihara ava yande cotindar; ndahei chira yande ae tēi yayembovihara

¹ Yande yayemoviracua catu vahe Cristo rese yande yeroyasa pipe, iyacatu yande teieté yañemosañora ava Tūpa rese ndipihañemoñeta tupri vitei vahe rese. Ndahei chira rumo yande ae tēi yayemboviha. ² Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opihañemoñeta pipe Tūpa rese yuvireco’ yande yapave. ³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe tēi opa aipisi” ehi. ⁴ Supi eté co opacatu omombehu vahe aracahe opa icuachiasa yande mbohe āgua, yande yasāro vaherā Tūpa reco porañetesa yande ñemosasa pipe iyavei yande pihamonguerēhisa pipe avei ahe yareco vahe ichuindar. ⁵ Tūpa, acoi ombou vahe yande ñemosasa, yande pihamonguerēhisa avei yandeu, tape pītivii oyoya guasu pe reco tupri āgua ñepeipei peyese Jesucristo recocuer rupi. ⁶ Ipipe sui pe opacatu oyoya guasu ñepeipei pe pihanemoñetasa pipe, pe ñehe pipe avei tapemboetei Tūpa, yande Yar Jesucristo Ru.

Ñehesa pīsirosa resendar imombehusa ava eta ndahei vahe judío upe

⁷ Peyepisi tupri ñepeipei, inungar Cristo pe pisi tupri oyeupe nara Vu mboetei āgua. ⁸ Che rumo aipo ahe pēu: Jesucristo ou judío pītivii Tūpa remimombehugüer mboaviye āgua judío ramoi aracahendar upe. Ēgüe ehi Tūpa oñehe mboaviyesa mboyecua ⁹ ‘tomboetei ava ndahei vahe judío yuvirecoi vahe che Ru Tūpa iporoparisuerecosa rese yuvireco’ oyapave. Ahe Ēgüe ehi icuachiapri rupi tupri ité aipo ehi vahe:

“Sese che oromboeteira opacatu ava ndahei vahe judío pāhu rupi, iyavei asapuacaira ndeu nde rer mboeteisa pipe” ehi.

¹⁰ Iyavei acoi ambuae icuachiapri pipe omombehu avei no: “¡Peyemboviha catu pe opacatu ndahei vahe judío peico vahe judío Tūpa rembiporavo reseve!” ehi.

¹¹ Ambuae pipe avei aipo ehi no:

“Pe opacatu ivi pipendar ava, ¡pembotei yande Yar!” ehi.

¹² Isaías avei aipo ehi icuachía:

“Oimera niha ava Isaí suindar, opacatu ava rerecuarā secoira. Ava ndahei vahe judío seseño ité oyeroyara yuvireco” ehi.

¹³ Tūpa acoi ombou vahe mbahe oyesuindar rāro āgua, tayande mboviharete catu iyavei mbahe tupri tayareco sese

yeroyasa pipe. Ipipe sui tombou yasãro vaheerã ahe mbahe aviye vahe Espiritu Santo pĩratasa pipe.

¹⁴ Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepei-peipeyeupe pe yemboaracua ãgua. ¹⁵ Co tecocuer rese rumo aicuachía opacatu che siquiyeẽhisa pipe pẽu pe resaraiẽhi ãgua ichui. Esepia, ayapo Tũpa che cuaita ombou vahe che raisusa pipe cheu ¹⁶ Jesucristo rese che poraviqui ãgua ava ndahei vahe judío recocuer aviye ãgua. Evocoyase judío pahi nungar che cuaisa pipe amombehu co ñehesa Tũpa ombou vahe pĩsirosa resendar yuvireco chupe imoporẽhi ãgua Tũpa rovai inungar mbahe seropovẽhepri aviye vahe Tũpa upe Espiritu Santo pipe yepi.

¹⁷ Supi eté che Jesucristo reroyasar che recosa pipe aviharete Tũpa che cuaita rese. ¹⁸ Esepia, cheu ndiyai ahehe vaheerã que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu ahehe vaheerã. Esepia, amonguerẽhi Tũpa reroya ãgua yuvireco che ñehese rese, che rembiapo sui avei. ¹⁹ Êgũe ahe poromondiisa mbahe yavai vahe apo Tũpa pĩratasa pipe. Ahe ayapo Espiritu Tũpa suindar pĩratasa pipe. Ipipe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no. ²⁰ Chequerẽhi avei co ñehesa pĩsirosa resendar mombehu ãgua ava Cristo recocuer ndosendui vahe upe yepi. Ndahei rumo ambuae ava imboaracua pare tẽi, ²¹ che rumo ayapo inungar icuachiapri pipe omombehu vahe: “Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipihañemoñeta Roma ve oso ãgua

²² Co rese tẽi che ndaicatui aso pe pĩri, yepe setá rupi aso pota tẽi viña. ²³ Cũritei rumo opa amboaviye che poraviqui co ivi rupi, iyavei opa tẽi setá araviter pe pĩri che sosa rãgũer. ²⁴ España ve che soseve, apita pucumira vicho pe pĩri yande yembovĩha ãgua. Iyavei pe sui che sã potase, che pĩtivimira peye aheve che so ãgua. ²⁵ Cũritei rumo che asora Jerusalén ve. Arasora porerecosa ahe pendar yande mboetasa Jesús reroyasar pĩtivii ãgua. ²⁶ Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe pĩtivii ãgua yuvireco. ²⁷ Ahe êgũe ehi gũemimbotar rupi yuvireco iyavei iya ité imboevĩ ãgua yuvireco chupe ahe mbahe tupri oyeupe apo agũer rese. Esepia, yipindar Jesús reroyasar judío yuvirecoi

vahe oicua uca co tecocuer Tūpa suindar ahe ava ndahei vahe judío yuvirecoi vahe upe. Sese iya ité imboyeveĩ ãgua co ivi pipendar porerecosa chupe. ²⁸ Opase che co porerecosa amondo yuvireco chupe, España ve che sose, ahese apitara vicho pe piri. ²⁹ Che amoha voi eté asose eipeve, tuvichá omboura Cristo oporovasasa yandeu.

³⁰ Che rivireta, yande Yar Jesucristo rer pipe iyavei yeaisusa Espíritu ombou vahe pipe avei aporandu pēu opacatu che rese peyeroqui pĩrata vaheřã Tūpa upe che pĩtivii ãgua co mboraviqui rese. ³¹ Peporandu Tūpa upe, tache repi ava Jesús reroyasarēhi sui ivi Judea ve, iyavei Jerusalén pendar yande rivireta co porerecosa pisi tupri ãgua avei. ³² Ahese Tūpa oipotase, che aviharetera ayepotase pe repia, iyavei toime pituhusa yandeu che pe piri che sose. ³³ Ēgüe tehi Tūpa güeco tupriřa pipe tasecoi opacatu pe rese.

16

Pablo mahenduhasa ñepepei-pei ava upe

¹ Co yande reindri Febe serer vahe, ahe oipĩtivii tecua Cencrea pendar Cristo reroyasar oico. ² Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peipĩtiviiño que mbahe chupe ipane vahe rese. Esepia, ahe setá ité oporopĩtivii iyavei che avei eté che pĩtivii no.

³ Pemombehu che mahenduha Prisca upe, Aquila upe avei, ahe niha che pĩtivii mboraviqui Jesucristo recocuer resendar rese yuvireco. ⁴ Ahe avei niha mbahe tēi pipe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe. ⁵ Pemombehu avei che mahenduha sētave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar. ⁶ Pemombehu avei che mahenduha María upe. Ahe niha oporaviqui iteanga vahe pe recocuer rese. ⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyeroya yuvirecoi, ahe rane avei yipindar Cristo reroyasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pipe. ⁹ Pemombehu avei che mahenduha Urbano upe. Ahe niha yande ndugüer oporaviqui vahe Cristo recocuer rese, che mboripar Estaquis upe avei. ¹⁰ Pemombehu avei che mahenduha Apeles upe. Ahe niha güecoãhasa sui osē tupri vahe Cristo rese oyeroyasa

pipe. Iyavei pemombehu che mahenduhasa ava Aristóbulo rēta pipendar yuvirecoi vahe upe avei. ¹¹ Pemombehu avei che mahenduha che mu Herodión upe, ava Narciso rēta pipendar yande Yar reroyasar upe avei. ¹² Pemombehu avei che mahenduha Trifena upe iyavei Trifosa upe. Ahe niha oporaviqui vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviqui ité yande Yar upe nara. ¹³ Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi. ¹⁴ Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei. ¹⁵ Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpás upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohawe omondo avei omahenduhasa yuvireco pēu.

¹⁷ Che rivireta, peicua catu pe pāhu pendar omboyaho pota serai vahe sui. Oime ava ěgüe ehi vahe, oiti uca vahe ava mbahe tēi pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepipiño itera. ¹⁸ Esepia, ahe ava ndahei yande Yar Jesucristo upe nara oyapo mbahe yuvireco. ěgüe ehi rumo ahe oyeupe nara tēi oipota rai mbahe yuvireco. Iyavei ombopa ava ndayaracua tuprii vahe; oñehe tupri ai angahu oporomohapisi aisa pipe tēi yuvireco. ¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vaherã pe mbahecuasa mbahe aviye vahe apo ãgua, ndahei mbahe tēi apo ãgua. ²⁰ Evocoiyase Tūpa güeco tupriisa pipe pihaivi Carugar osecopipa tupri itera. Pe avei evocoiyase pesecoreroyira. Yande Yar Jesucristo tape rovasa.

²¹ Omondo avei omahenduhasa Timoteo pēu. Ahe che pĩtivi che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

²² Che, Tercio, aicuachía vahe co ñehesa pēu, che avei che mahenduhasa amondo yande Yar reroyasa pipe pēu.

²³ Omondo avei omahenduhasa Gayo pēu. Ahe sētave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pēu, ahe tecua mbahe guarepochi apocatusar. Yande rivri Cuarto avei omondo omahenduhasa pēu.

²⁴ Aviye, yande Yar Jesucristo tape rovasa opacatu.

Pablo omboetei Tũpa

²⁵ ¡Yamboetei Tũpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tũpa omboyecua ramo vahe cheu co ivi apoẽhi suive mbahe ndicuasai vahe rese. ²⁶ Cũritei rumo oyecua uca oñehe mombehusar rembicuachía pipe Tũpa apirẽhi vahe porocuaite rupi cute. Ahe ñehesa ndicuasai vahe omboyecua uca opacatú ava upe ‘toviroya sese oyeroyasa pipe yuvireco’ oya.

²⁷ ¡Tũpa güeraño imbahecuá vahe yepi, ãgüe tehi ahe yande Yar Jesucristo rer pipe imboeteipri tasecoi!

YIPINDAR PABLO REMBICUACHIA CORINTO PĒNDAR UPE CORINTIOS

Pablo mahenduhasa Jesús reroyasar Corinto pendar upe

¹ Che Pablo, yande rívrí Sóstenes reseve, oromondo co ore mahenduhasa opacatu pĕu. Tŭpa niha, güemimbotar rupi, che poravo apóstol che reco āgua. ² Aicuachía co che ñehe pĕu, pe Jesús reroyasar peñemonuha vahe Tŭpa upe tecua Corinto ve. Peicua niha pe ipehapri peico Tŭpa upe nara ité Jesucristo rese peicose. Peicua avei niha Tŭpa pe poravose oyeupe nara pe reco catupri āgua, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei. ³ Yande Ru Tŭpa, yande Yar Jesucristo tape rovasa pe reco tupri āgua.

Jesucristo suindar porovasasa seroyasar upe

⁴ Che, “Aviye ndeu” aheño ité Tŭpa upe pe recocuer rese yepi. Esepia, Tŭpa pe rovasa ité Jesucristo rese peicose. ⁵ Ēgüe ehi secocuer pipe sui Tŭpa ombou opacatu pe reco tupri catu āgua, pemombehu tupri vaherā imbahecuaasa, opacatu mbahe supi eté vahe cua tupri āgua avei. ⁶ Esepia niha, ore co ñehesa Jesucristo resendar pĕu imombehusa pipe sui pe recuñaro uca ité. ⁷ Sese ndipoí eté que porovasasa Tŭpa Espíritu suindar ipane vahe pĕu yande Yar Jesucristo yevi āgua pesārose. ⁸ Tŭpa niha pe moviracuaño itera pe rereco ari cañisa pipe Jesucristo yevise voi curi ‘tipo eme que mbahe tēi secocuer rese yuvireco’ ohesave. ⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco āgua.

Jesús reroyasar pihañemoñetasa ndahoyoyai vahe resendar

¹⁰⁻¹¹ Che rívríreta, che amombehu potami mbahe pĕu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiro-iro yuvireco oyeupe ae” ehi. Sese aipo ahe pĕu: pemboyoya catu pe pihañemoñetasa, ndapeyemboyohoi chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimbotar. ¹² Supi eté amove aipo, “Ore Pablo rupindar oroico” peye tēi; ambuae evocoiyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye tēi aipo peico. ¹³ ¡Cristo rumo vireco porombohesa ndoyaho-yaho

têi vahe! ¿Che tie amano curusu rese pe angaipa repirã? anise, ¿che rer pipe tie peñeapiramo uca peico? ¹⁴ ¡Aviye Tũpa upe che ndopoãpiramoise! Crispo iyavei Gayo, ahe güeraño rumo añapiramo yuvireco cuese. ¹⁵ Sese ndipoi chira “serer pipe ñapiramosa” ehi vahe yuvireco cheu. ¹⁶ Estéfanas rêta pendar avei añapiramo yuvireco, ipare ndipo iri revo ambuae ava añapiramo vahecuer. ¹⁷ Cristo niha nomombehui che poroãpiramo ãgua. Êgüe ehi rumo che cuaita ñehesa ñepisirosa resendar mombehu ãgua têi. Iyavei ndahei ñehesa yavai catu vahe aiporu. Esepia, nañomi potai eté que chĩhi co ñehesa pĩratagüer Jesucristo curusu rese imano agüer resendar ava sui.

Cristo Tũpa pĩratasa, imbahecuaasa avei

¹⁸ Esepia, acoi ava ocañi têi vaheã upe co ñehesa curusu rese Cristo manosa resendar aviye êgüe ehi têi vahe viña. Yande ipĩsipropi yaico vaheã upe rumo co ñehesa vireco ité Tũpa pĩratasa, ¹⁹ inungar Isaías rembicuachiagüer pipe aipo ehi:

“Amocañira co ivi pipendar ava têi mbahecuaasa iyavei arocuara ava yaracua vai têi vahe sui yaracuaasa” ehi.

²⁰ ¿Mara ehi evocoyase co ivi pipendar ava imbahecua vai vahe, ava-ava têi aracuasa cuapar avei, iyavei iñehe cua tupri ai vahe co ivi pipendar mbahe rese yuvireco? ¡Tũpa niha osecuñaro evocoi nungar mbahecuaasa êgüe ehi têi vahe pipe! ²¹ Êgüe ehi eté oaracuasa pipe ‘toicua eme che recocuer ava oaracuasa pipe têi’ oya. Yepe, “Co ñehesa Cristo resendar êgüe ehi têi vahe” ehi têi ava yuvireco chupe viña, Tũpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

²² Che mu judío osepia pota têi mbahe poromondiisa ipĩratá vahe iva pendar yuvireco. Griego evocoyase osendu pota têi ñehesa aracuasa resendar yuvireco no. ²³ Yande rumo, “Cristo omano curusu rese” yahe ava upe yaico. Amove judío upe mbahe têi co ñehesa. Iyavei amove ndahei vahe judío, co ñehesa osenduse, aviye acoi êgüe ehi têi vahe yuvireco chupe. ²⁴ Yande rumo, Tũpa rembiporavo yaico vahe, que judío, anise que griego avei, yandeu co ñehesa Tũpa Rembiporavo Cristo resendar Tũpa pĩratasa ité, imbahecuaasa avei. ²⁵ Esepia niha, ava upe, Tũpa suindar mbahe aviye acoi êgüe ehi têi vahe viña. Co Tũpa suindar rumo mbahecuaasa aviye catu vahe ité ava têi mbahecuaasa sui iyavei acoi mbahe Tũpa suindar aviye nipiratai vahe ava upe viña, ahe rumo ipĩrata catu ité opacatu ava têi pĩratasa sui. ²⁶ Che rivireta, peyemomahenduha catu co rese: Tũpa pe poravo, yepe pe pãhu pendar ndasetaimi

imbahecua vai vahe ava rovaque yuvireco viña. Ndase-taimi avei pereco pe mu seco ivate vahe viña no. ²⁷ Evocoi ava, “Ndoicuai vahe mbahe yuvireco” ehi yuvireco pëu viña. Tūpa rumo pe poravo evocoi ava imbahecua vai vahe mochi āgua. Iyavei oiporavo ava pe pāhu pendar ndoicatu tuprii vahe yuvireco ava ipīrata vahe Tūpa cuaparēhi mochi āgua. ²⁸ Oiporavo avei co ivi pipe ava remieroīro seco mbegüemi vahe, ava seco ivi coti catu vahe pe pāhu pendar co ava seco ivaté vahe reroyi āgua ²⁹ ‘toyemboivate ai eme que ava che rovaque yuvireco’ oya. ³⁰ Tūpa ité rumo yande mboyemboya Guahir Jesucristo rese, ahe avei ombou Guahir yande mboaracua āgua, yande reco mohivi āgua avei ‘toyuvirecoi cheu nara’ ohesave iyavei ‘ipīsiropri toyuvirecoi’ oya yandeu. ³¹ Sese inungar aipo ehi ñehesa icuachiapri aracahendar pipe: “Acoi ava oyecomboivate ai pota vahe, toyecomboivate catu yande Yar rembiapo rese” ehi.

2

Pablo omombehu curusu rese Cristo mano agüer

¹ Iyavei, che rivireta, che asose cuese, añehese pëu Tūpa suindar ñehesa supi eté vahe yipindar ndicuasai vahe pipe, nañehi co ivi pipendar tēi ava mbahecuaasa pipe, ñehesa ivate ai vahe pipe avei. ² Esepia, acoi aicose pe pāhuve cuese, ndachepihañemoñetai eté que ambuae mbahe rese; Jesucristo recocuer rese, yatica agüer rese catu ité che pihañemoñeta vichico. ³ Iyavei ndachepīratoi, aririi avei che siquiyepave pëu che sose. ⁴ Iyavei acoi añehese ñehesa pīsirosa re-sendar rese pëu, ndaiporui eté rumo ñehesa ivate ai vahe pe pihañemoñetasa rerova āgua. Che rumo Tūpa Espiritu pīratasa pipe añehi pëu ⁵ ‘toyeroya catu Tūpa pīratasa rese yuvireco’ che yapave pe yeroyaēhi āgua ava tēi mbahecuaasa rese.

Tūpa oEspiritu pipe oicua uca mbahe yandeu

⁶ Ore rumo oromombehuño ité aracuasa pëu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepia, ahe imborerecuasa ocañi tēi vahe. ⁷ Oroñehi catu aracuasa Tūpa suindar ndicuasai vahe rese, ahe yipive vireco vahe ivi apoēhi viteseve, ahe co omboyecua ramo vahe yandeu yaico vahe teco ori apirēhi vahesave. ⁸ Co ivi pipendar ava mborerecuareta rumo ndosenducuai eté co ñehesa. Osenducuae rumo mborerecuar Jerusalén pendar yuvireco viña, ndoyatica ucai chira yande Yar seco ivate, porañete vahe curusu rese yuvireco viña. ⁹ Icuachiapri aracahendar pipe aipo ehi:

“Tūpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopihañemoñetaimi eté sese yuvireco no” ehi aracahe.

¹⁰ Tūpa rumo oicua uca Espíritu pipe yandeu cute. Esepia, Espíritu oicua tupri catu ité opacatú secocuer oico.

¹¹ Ēgüe ehi eté, inungar opacatu ava pãhuve ndipoi eté que ñepeí ava pihañemoñetasa oicua vahe, iespíritu güeraño ité oicua mbahe oime vahe ipiha pipe. Ēgüe ehi avei Tūpa Espíritu güeraño ité oicua Tūpa pihañemoñetasa. ¹² Yande evocoiyase ndahei co ivi pipendar tēi espíritu yaipisi, Ēgüe ehi rumo Espíritu Tūpa suindar yaipisi yaicua vaherã iporecoca oporoaisusa pipe ombou vahe yandeu. ¹³ Ahe niha oromombehu Tūpa Espíritu ore mbohe vahe, ndahei ñehesa ava tēi aracuasa sui. Ēgüe orohe co supi eté vahe ñehesa Espíritu suindar oromombehu Espíritu rese yuvirecoi vahe upe yepi.

¹⁴ Acoi ava ndovirecoi vahe rumo Tūpa Espíritu opiha pipe, ndoipisii eté mbahe Tūpa Espíritu suindar yuvireco. Esepia, chupe evocoi mbahe aviye Ēgüe ehi tēi vahe, iyavei ndosenducua catui eté yuvireco. Esepia, evocoi nungar mbahe senducua Espíritu pipeño ité. ¹⁵ Acoi ava vireco vahe rumo Tūpa Espíritu opiha pipe oicatu opacatu mbahe cua ãgua. Ndipoi chira rumo ambuae ava ndovirecoi vahe Espíritu opiha pipe ahe ava recocuer cua tupri ãgua. ¹⁶ Esepia, icuachiapri arachendar pipe aipo ehi: “¿Ava vo oicua tēira yande Yar pihañemoñetasa viña? ¿Ava vo ombohe tēira viña?” ehi. Yande rumo yareco yande Yar Cristo pihañemoñetasa.

3

Pablo iyavei Apolos Tūpa upe oporaviqui vahe yuvirecoi

¹ Che rivireta, ndapeguata tuprii Espíritu reroyasa pipe; pe rumo peguataño vite ava tēi pihañemoñetasa rupi peico. Sese namombehu catui ñehesa yavai vahe Espíritu suindar pēu. Esepia, pe pītaniami nungar vite tēi pe pihañemoñetasa Cristo rese.

² Sese che opombohe mbahe ndayavaimi vahe rese. Esepia, pītaniami ndoicatu vitei ocaru. Sese ocambu viteño tēi. Cūrítei rumo Ēgüe peye vite ité. Esepia, pe ndapesenducua catu vitei eté Tūpa Ñehengagüer yavai vahe. ³ Peguata viteño co ivi pipendar pihañemoñetasa tēi rupi. Esepia, peyemoecatēhi-tēhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoiyase peyapo ava ndoicuai vahe Tūpa rembiapo nungar. ⁴ Esepia, aipo peyeño tēi, “Ore Pablo rupindar oroico”; ambuae evocoiyase, “Ore Apolos rupindar oroico” peye-peye tēi pe yembohesa rese pe yeecopisa pipe.

Aipo ehi vahe pe pãhuvé inungar ava Tũpa ndoicuai vahe pĩhañemoñetasa.

⁵ Pesendu che ñehe: ¡Che Pablo iyavei Apolos Tũpa rembiguai tẽi oroico! Esepia, yande Yar niha ombou ñepei-peĩ mboraviquĩ yandeu chupe yayapo vaherã. Tũpa upe ore poraviquĩsa pipe sui niha peroya yande Yar peico: ⁶ che rane inungar añoti vahe mbahe rãhiĩ pe piha pipe; Apolos evocoyase inungar imboĩhusar; Tũpa rumo inungar omboori vahe pẽu. ⁷ Evocoyase ndiyai peyeroya mbahe tĩsar rese tẽi, imboĩhusar rese tẽi avei. Peyeroya catura rumo Tũpa rese. Ahe niha pe reco momirata catu pe rereco. ⁸ Ore rumo oyoya tupri oroyapo mbahe pẽu nara. Sese ñepei-peĩ Tũpa omboura porerecosa pe rese ore poraviquĩgũer rupi oreu. ⁹ Ore oroporaviquĩ vahe Tũpa upe. Pe evocoyase ivi nungar peico Tũpa poraviquĩ ãgua iyavei pe inungar Tũpa omopuha ramomi vahe oi peico. ¹⁰⁻¹² Che inungar oi apo cuapar oyapo rane vahe oi vĩracua ãgua, ĕgũe ahe imombehu Cristo resendar ñehesa pẽu seroya tupri ãgua. Ndiyai eté yaroya que ambuae ava tẽi, Jesucristo gũeraño ité yaroyara. Ambuae evocoyase inungar oi aposar omopuha vahe ivĩracuasa harive, ĕgũe ehi ahe pe monguerẽhi catu pe mbohe co ñehesa rese. Evocoyase inungar oi aposar amove oiporu mbahe ipocopi vahe oi apo ãgua yuvireco oro, guarepochi, anise ita aviye vahe. Amove rumo oiporu avei ndipocopi vahe mbahe que ivirape tẽi, capihĩ, anise tacuar tẽi oigũã yuvireco. Ĕgũe ehi aveira pe mbohesar yuvireco. Ahe ñepei-peĩ rumo iya oicua tuprira pe mbohe ãgua yuvireco. ¹³ Ahe iporaviquĩ agũer rumo ari cañise icuasa tuprira ñepei-peĩ yuvireco. Esepia, ahe ari pipe yande Yar oura tata reseve ñepei-peĩ pe mbohesar poraviquĩ agũer cua ãgua. ¹⁴ Acoi ava oporombohe tupri vahe inungar ava oyapo oi ndocai vahe, ahe oipisira oporaviquĩ repri; ¹⁵ ambuae oporombohe rai vahe rumo inungar oi oyapo ocai vahe tẽi, iporombohe agũer opa tẽi etera ocañi. Ahe gũeraño evocoyase oñepisiro sãira tata guasu sui.

¹⁶ ¿Ndapeicuai vo pe yande Jesús reroyasar Tũpa rẽta nungar yaico? IEspĩritu niha secoi eté yande piha pipe. ¹⁷ Oimese que ava yande pãhuvé omomara vahe Tũpa rẽta, Tũpa evocoyase omboura oñemoĩrosa ahe ava upe. Esepia, Tũpa rẽta nimarai vahe ité; yande teieté niha Tũpa rẽta yaico.

¹⁸ Peyembopa eme catu pe ae. Oimese que pe pãhu pendar oyeupe aipo “che yaracua tupri vahe aico” ehi vahe co ivi pipendar pĩhañemoñetasa rupi tẽi, toyecomombegũemi rane oaracua ãgua. ¹⁹ Esepia, ava tẽi aracuasa Tũpa upe ĕgũe ehi tẽi vahe. Inungar icuachiapri aracahendar pipe aipo ehi: “Ava oaracua raisa pipe oyeiti uca mbahe tẽi pipe Tũpa

upe yuvireco” ehi. ²⁰ Iyavei aipo ehi no: “Yar rumo oicua ava tēi yaracua rai vahe pīhañemoñetasa, ahe ěgüe ehi tēi vahe” ehi. ²¹ Sese ndapeyecomboivate ai chira que ava tēi porombohesa rupi peico. Esepia, opacatu mbahe pēundar ité: ²² ěgüe ehi eté che Pablo, iyavei Apolos, Pedro avei, opacatu ivi pīpendar mbahe Tūpa omoime vahe yandeu, tecovesa, manosa avei, yasepia vahe, iyavei mbahe oime vaherã, ahe niha opacatu pēu nara, ²³ pe niha Cristo upendar, Cristo evocoyase Tūpa upendar secoi.

4

Apóstol yuvirecoi vahe poraviqui agüer

¹ Iya aipo peye: “Co mbia Cristo povri pendar yuvirecoi, icuaita ité niha Tūpa suindar ñehesa oyecua ramo vahe rese iporombohe āgua” peyera oreu viña. ² Acoi vireco vahe ocuaitarã, iya ité omboyecua ocuaita mboaviye tupri. ³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu āgua yuvireco. Che avei ndaicuai eté che recocuer cuapa tupri. ⁴ Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vaherã pēu. Yande Yar rumo oicua. ⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesãro ranera rumo yande Yar yevi āgua. Ahe niha omboyecuara opacatu mbahe ndoyecuai vahe, iyavei omboyecuapara ñepeipei yande pīhañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepeipei yandeu.

⁶ Che rivireta, che añehe cheyese ae, Apolos rese avei pēu mbahe tupri āgua rese ‘ore recocuer sui toyembohe yuvireco Tūpa remimbotar icuachiapri rupi tupri yuvirecoi āgua’ ore yapave pēu. Pe evocoyase, “Co mbia seco ivate catu vahe co ambuae mbia sui” ndapeyei chira pe yemboivate aisa pīpe oreu. ⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tūpa suindar. ¡Sese ndiyai peyecomboivate etepri co mbahe pereco vahe rese! ¡Aviye opacatu mbahe peyesui tēi pe reco vahe viña!

⁸ Ndojavii pereco ité vahe opacatu mbahe pe remimbotar viña, ndoyavii avei nipanei vahe ité Tūpa suindar mbahe pēu. Peyeupe revo ndoyavii mborerecuar guasu peico ore sui viña. ¡ěgüe peye itera tarahu viña! Ahese, ore avei mborerecuar oroicora pe pãhuve viña. ⁹ Ore rumo apóstol oroico vahe ndoyavii cheu Tūpa ore renoi ipa tēi vahe ore mano tēi āgua.

Sese seroĩrombri oroico inungar ava imboguaipei yucapĩrã. Ĕgũe orohe oroico opacatu ava rovaque, Tũpa rembiguai eta iva pendar rovaque avei. ¹⁰ Iyavei, “Co ndayaracuai vahe” ehi rutei ava yuvireco oreu Cristo rese ite ore recose; ahese avei rumo pe peyeapo imbahecua etepri vahe peico Cristo rese pe recosa pipe. Iyavei ore ndoyavii ndaseco pĩratat vahe oroico ava rembiepiave; aheseve avei rumo peyecocomirata teĩ peico. Ore seroĩrombri teĩ oroico, pe evocoyase ava pe mboetei guasu pe rereco yuvireco. ¹¹ Cũritei ore oroicove vite ite ore rieporẽhi pipe, ore husei teĩ iyavei ndore turucuai ete. Ava rumo evocoyase mara-mara teĩ ore rereco yuvireco. Iyavei ndorovirecoi ore rẽta ite. ¹² Ore oroporaviquiño ite, oroyembogũerai teĩ ipipe. Ava rumo iñehe mara-mara teĩ ete yuvireco oreu; ore evocoyase oromboyeviño iñehe mbahe tupri pipe chupe. Ore reca-reca catuño ite ore momara ãgua yuvireco; ore rumo oroñemosañe ite yuvireco chupe. ¹³ Iñehe-ñehe teĩ ore rese yuvireco; ore rumo saisusa pipe oromboyevi iñehe yuvireco chupe. Ore rereco iti nungar teĩ iyavei ore rereco inungar ava Ĕgũe ehi teĩ vahe yuvireco. Cũritei Ĕgũe ehi viteño ite yuvireco oreu.

¹⁴ Ndahei pe mochi ãgua aipo ahe icuachia pẽu, Ĕgũe ehi rumo pe mboaracua ãgua teĩ. Inungar che rahir ite, che rembiaisu opovireco. ¹⁵ Esepia, yepe pereco ati pe pĩtivĩsar Cristo rese pe reco ãgua viña, ndaperecoi rumo seta pe yesupa. Esepia, che amombehuse niha ñehesa pĩsirosa resendar pẽu, ahese ramo peroya Jesucristo. Seroyasa pipe evocoyase che inungar pe yesupa ite aico pẽu. ¹⁶ Sese che aipota ite che recocuer moña peye.

¹⁷ Sese che amondo che rembiaisu Timoteo pẽu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agũer rese che sose opacatu Jesús reroyasar ñemonuhasa rupi yepi. ¹⁸ Amove oime pe pãhuve oyecomboivate ai vahe. “Ndou iri chietera revo cohava yande repia” ehi yuvireco cheu viña; ¹⁹ aso pihaiviño itera rumo pe repia yande Yar oipotase cheu. Ahese aicua tuprira oyemboivate ai vahe reco pĩratasa yuvireco. Ndahei chira iñehe gũeraño teĩ aicuara. ²⁰ Esepia, Tũpa omborerecuasave, ndahei oñehe pipe teĩ oporocuai, opĩratasa pipe rumo Ĕgũe ehi. ²¹ ¿Mbahe pĩha peipota peico? ¿Peipota pĩha che aso vaherã pẽu che ñehe pĩrata pe mboaracua ãgua mbahe pe rembiavi rese? Anise, pemoingatu rane pe recocuer, ahese asora mbahe tupri pipe pe piri.

5

Pablo oñehe ñepei Jesús reroyasar pãhu pendar oyemboaguasa vahe rese

¹ Ambuae mbahe, oroyandu ñepei mbahe tẽi pe pãhu pendar rembiapo oroico: oime aipo osi recoyar rese secoi vahe. Ahe angaipa guasu oyapo oico. Tũpa reroyasarẽhi ité ndoyapoi evocoi nungar mbahe tẽi yuvireco. ² ¡Pe rumo peyecomboivate ai peico! ¡Iyacatu rumo ndapeyembovıhai chira evocoi nungar mbahe tẽi repiase viña! Evocoi nungar ava iyacatu ité pemboyepepıra pe pãhu sui. ³ Yepe niha che teieté ndaicoi pe pãhuve viña, pe rese che mahenduhasa pıpe rumo aicove ité pe pãhuve iyavei aicua voi eté aipo oyapo vahe mbahe tẽi recocuer inungar-ra aico vahe ité pe pãhuve viña. ⁴ Acoi peñemonuhase, che avei niha aicora pe pãhuve che mahenduhasa pıpe, yande Yar Jesucristo pıratasa avei secoira pe rese. ⁵ Evocoiyase ahe ava timondosa Carugar povrıve secocuerai mocañi ãgua. Ipipe sui iespıritu oñepısırora yande Yar Jesucristo yevıse curi.

⁶ Ndapeyecomboivate ai chira peico co mbahe tẽi oimese pe pãhuve. Esepia, peicua niha co ñehesa aipo ehi vahe: “Yepe chıhimi imondosa pan mboapeposa panguã rese viña, ahe rumo oiquepa tuprı panguã rese” ehi. ⁷ Evocoi ava rembiapo ai inungar pan mboapeposa pe pãhuve. Sese pemombopa pe pãhu sui peicoẽhi ãgua angaipa pıpe peico vahe rã inungar panguã ipıasu vahe ndovırecoi vahe omboapeposa oyese. Ēgüe peye ité niha. Esepia, yande Yar Jesucristo iparaisu omano yande repıra. Ēgüe ehi ahe inungar ovesa yucaprı angaipa mocañi ãgua judıo pieta Pascua pıpe yepi. ⁸ Sese inungar judıo omboetei vahe Pascua pieta yuvireco yepi omombopaño pan mboapeposa cuacua vahe oyesui pan ipıasu, ndayapepoi vahe rereco ãgua, Ēgüe yahe aveira yaico yande reco pıasu supı eté vahe pıpe; yamombopara yande recocuerai yandeyesui, ahe ava reco momara-mara tẽisa, mbahe naporai vahe avei.

⁹⁻¹⁰ Ambuae aicuachıa vahe pıpe aipo ahe pẽu: “Ndapemborıi chira ava oyemboaguasa-guasa tẽi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tẽi oyerure vahe” ahe. Co che ñehesa rumo ndahei Tũpa ndoicua vıtei vahe upendar. Esepia niha, pe yepepı ãgua ñepei reseve evocoi nungar ava sui, pesẽ itera co ivı pıpe sui viña. ¹¹ Che niha aipo ahe icuachıa pẽu: ndapemborıi chira que ava acoi “che Jesucristo reroyasar aico” ehi angahu tẽi vahe, que oyemboaguasase, anise oipota raise que ambuae ava mbahe, oyerokuı tẽi vahe que mbahe rahanga upe, iyavei imahechıroi ai vahe, caguar tẽi vahe,

anise imonda rai vahe. Evocoi nungar ava piri ñepe yependapecarui chietera. ¹²⁻¹³ Cheu ndiyai eté ava ndoyuvirecoi vahe Tūpa rese recocuer rese porandu āgua. Tūpa ahe ava yuvirecoi vahe recocuer opara oicua coiye. Pe rumo pe cuaita ité Tūpa rese yuvirecoi vahe upe pe porandu āgua secocuer rese. ¡Sese pemboyepepiño ité osi recoyar rese secoi vahe pe pāhu sui!

6

Ndiyai Jesús reroyasar serasosa ndahei vahe Jesús reroyasar mborerecuar rovai

¹ Ambuae mbahe no: Oime pe pāhu pendar “co mbia oyapo mbahe tēi cheu” ehi vahe ambuae Jesús reroyasar upe. ¡Mahera peraso mborerecuar Tūpa reroyasarēhi upe tēi evocoi mbia rembiapo ai rese porandu āgua! Iyacatu rumo Tūpa reroyasareta upe perasora secocuer moingatu āgua yuvireco viña. ² Peicua niha pe Tūpa reroyasar peporandura ava ndoicuai vahe Tūpa upe secocuer rese yuvireco curi. Evocoyase, ¿ndapeicatu pīha co tecocuer mbahemi tēi moingatu peico? ³ ¿Ndapeicuai vo yande avei yaporandura Tūpa rembiguai recocuer rese curi? Evocoyase, ¡peporandu catu itera co ivi pipendar tecocuer rese peyeupe yepi! ⁴ Perecose evocoi nungar mbahe tēi peyeupe, ¡mahera peiporu ava ēgüe ehi tēi vahe tūparo pendar upe mbahe moingatu āgua! ⁵ Che aipo ahe ité pēu pe chī āgua: ¿Ndipoimi eté vo pe pāhuve que ñepe yaracua vahe oicatu vahe que mbahe tēi peyependar moingatu āgua? ⁶ ¡Amove pevava peyeupe! ¡Ndahei co güeraño, oime avei pe pāhu pendar Tūpa reroyasar viraso ambuae omboetasa mborerecuar Tūpa reroyasarēhi upe tēi mbahe moingatu āgua!

⁷ Supi eté evocoiya pe reco pipe peyavi guasu ité. Iya peñemosañora co mbahe tēi pe mboetasa suindar upe viña. Ēgüe ehi eté, iya mbahe pe reco vahe, “Toñomiño yuvireco” peyera chupe pe raso rāgüer sui Tūpa reroyasarēhi mborerecuar upe viña. ⁸ Amove rumo pe avei peyapo mbahe-mbahe tēi eté; peñomi avei pe mboetasa Tūpa reroyasar mbahe.

⁹⁻¹⁰ ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pipe curi! Peyembopa ucai rene chupe. Esepia, acoi ava oyemboaguasa-guasa tēi vahe, mbahe rahanga upe tēi oyeroyu vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava virocua yesapihaño tēi vahe mbahe tēi pipe ambuae ava mbahe, ahe opacatu

ndoyuvirasoi chira ivave Tūpa mborerecuasave curi. ¹¹ Oime avei niha acoi pe pāhu pendar yipindar ēgüe ehi vahe yuvireco viña, cūritei rumo opa pe angaipa imocañisa pe sui iyavei pe ipehapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espiritu pīratasa pipe avei no.

Yande rete ipehapri Tūpa upe nara yaguasaēhi āgua

¹² Iyavei ambuae mbahe: Supi eté niha “aviye que mbahe che remimbotar ayapo vaheṛā” ehi vahe. Amove rumo co mbahe ndahei aviye vahe yandeu iyavei yandeu ndiyai evocoi nungar mbahe povrive nara tēi yande reco āgua. ¹³ Supi eté niha aipo ehi vahe: “Yande rembihi yande aviter upe nara, yande aviter evocoiyase yande rembihi upe nara” ehi. Coiye rumo Tūpa opara omocañi evocoi nungar mbahe. Yande retecuer rumo ndicuitai yaguasa tēi vaheṛā, ahe rumo yande Yar upe nara. Yande Yar evocoiyase yande retecuer upe nara secoi. ¹⁴ Inungar Tūpa ombogüerayevi yande Yar, ēgüe ehi aveira yande mbogüerayevi opīratasa pipe coiye.

¹⁵ Peicua niha yande rete Jesucristo upendar ité. Ndiyai eté evocoiyase Jesucristo upendar yande rete mondo āgua cuña güetecuer omondo-mondo tēi vahe upe. ¹⁶ Peicua niha pe aipo nungar cuña ndipihai vahe rese peicose, pe retecuer evocoiyase ñepe vahe nungar ité pereco. Esepia, icuachiapri arachendar pipe aipo ehi yandeu: “Yepe ñuvirío ava yuvirecoi vahe viña, ñepe vahe nungar ité rumo secocuer yuvireco” ehi. ¹⁷ Acoi ava secoi vahe rumo yande Yar rese, ahe secocuer evocoiyase ñepeño ité.

¹⁸ Peyepipi voiño catu ava yemboaguasa-guasa tēisa sui. Opacatu ambuae angaipa ndahei yande retecuer rese nara ité. Acoi ava rumo oyapo tēi vahe mbahe cuña rese, güetecuer ae evocoiyase omomara catu güembaliapo pipe sui tēi. ¹⁹ ¿Ndapeicuai vo pe retecuer Espiritu Santo upendar ité secoi, iyavei ahe Espiritu Tūpa remimbou pe rese ité secoi? Sese pe retecuer ndahei pēundar ité. ²⁰ Esepia, Tūpa yande rerocua oyeupe nara. Yande rumo yande repi chupe. Sese peyapo mbahe aviye vahe pe retecuer pipe Tūpa mboetei āgua.

7

Poromboaracuasa mendasa resendar

¹ Cūritei amboyevira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña. ² Pe aguasa-guasa tēiēhi āgua rumo peyacatu perecora pe rembireco, cuña avei evocoiyase tovireco oyacatu omer yuvireco. ³ Cuimbahe tomboaviye omendasa güembireco rese iyavei cuña omenda

vahe, tomboaviye avei mendasa omer rese. Ahe niha yande cuaita yamendase. ⁴ Esepia, cuña omenda vahe güetecuer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara vireco, ahe rumo güembireco upe nara ité vireco. ⁵ Ndiyai peatêhi oyeupe. Oyoya rumo, “Yayapo eme mbahe” peyese peyeupe pe yeroqui água Tüpa upe, ahe aviyeño. Ndiyai rumo peyoeya pucura, avieteramo ndapeñemosai chira, ipipe sui aviyyeretamo Carugar pe âtoi tiêtera.

⁶ Ndahei che opocuai ‘tomenda yuvireco’ viya pëu. ⁷ Che rumo aipota che nungar pe mendaêhi água viña. Tüpa rumo ombou yande yacatu yande recorã.

⁸ Iyavei ndomenda vitei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar. ⁹ Ndapeicatuise rumo pe ñemosa água, pemendaño. Esepia, aviye catu itera pemenda poropota rai rãgüer sui.

¹⁰ Che rumo amombehu omenda vahe upe ‘topoi eme cuña omer sui’ viya. Ndahei cheyesui têi aipo ahe. Ahe rumo yande Yar porocuaite ité. ¹¹ Acoi oprise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

¹² Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoi potaño itese sese, evocoyase ahe topoi eme ité güembireco sui. ¹³ Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoyase ahe cuña topoi eme ité ichui. ¹⁴ Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tüpa rovaque. Êgüe ehi aveira cuimbahe Jesús reroyasar virecose güembireco Jesús reroyasarêhi. Êgüe ndehise rumo, tahir avei ndoyavii chira ndahei vahe Jesús reroyasar rahir yuvireco viña. Ahe tahir rumo Tüpa upendar yuvirecoira. ¹⁵⁻¹⁶ Sese pe, pemenda vahe ndahei vahe Jesús reroyasar rese, pepoi eme catu ichui; aviyyeteramo pe recocuer sui pe mer oñepisirora. Iyavei pe cuimbahe, aviyyeteramo pe recocuer sui avei pe rembireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tüpa oipota mbahe tupri pipe yande reco água.

¹⁷ Co rumo mbahe: peicoveño yipindar pëu Tüpa ombou vahe rese seroyaêhi vitesendar pipe. Ahe aporocuai opacatu

Cristo upendar ñemonuhasa rupi yepi. ¹⁸ Acoi Tũpa osenoise ava judío oyeupe nara, ahe judíoño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco ãgua. ¹⁹ Esepia, ndahei chira que judío, anise que ndahei vahe judío yaicose aviye catura yaico. Co rumo Tũpa oipota catu, “Tomboaviye opacatu che porocuita amondo vahe chupe yuvireco” ehi yandeu. ²⁰ Sese peicoveño peyacatu pe recocuer pẽu Tũpa ombou vahe rese pe renoiẽhi viteseve. ²¹ Pe mbiguai tẽi peico vahe pe renoise Tũpa, pepihañemoñeta etepri eme evocoiya pe recosa sui pesẽ vaherã rese. Peicatusé rumo, peyepipiño itera ichui. ²² Esepia, yepe pe mbiguai tẽi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai tẽi peico vahe, yepe ãgũe peye viña, peroyase rumo Cristo, ahese sembiguai peico. ²³ Tũpa upe rumo perepi iteanga, sese ndiyai eté ambuae ava povrive tẽi peico. ²⁴ Sese, che rivireta, peicoveño itera pe recocuer pipe inungar yipindar Tũpa pe renoise.

²⁵ Cuñatai ndomenda vitei vahe resendar rese rumo ndarecoi Yar suindar che ñehe ãgua. Che rumo amondora che pihañemoñetasa yuvireco chupe. Esepia, yande Yar che paraisuerecosa pipe imboyeroyapri aico. ²⁶ Cheu aviye catuño ité ndomendai vahe ãgũe ehiño tẽise yuvireco viña. Esepia niha, tecocuer yavaí eteanga cũritei. ²⁷ Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe. ²⁸ Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavai catura co ivi pipe yuvireco chupe. Sese che ndaipotai evocoi nungar mbahe pipe yuvireco vaherã.

²⁹ Che rivireta, aipo mbahe amombehu pota pẽu: ndipucuvei co ari naporai vahe yepota ãgua yandeu. Sese co pipe suive tupri omenda vahe toyuvirecoi ndomendai vahe nungar yande Yar rese opihañemoñetasa pipe. ³⁰ Acoi ndovihai vahe, toyuvirecoi eme oviharẽhisa pipe iyavei acoi oviharete vahe, ahe toyuvirecoi eme avei oviharetasa pipe, iyavei virocua vahe mbahe omahera, toyuvirecoi inungar mbahe ndovirocuai vahe omahera viña yande Yar rese opihañemoñetasa pipe. ³¹ Acoi ava ipihañemoñeta catu vahe co ivi pipendar mbahe poru ãgua, tipihañemoñeta eme evocoi nungar mbahe tẽi rese yuvireco. Esepia, co ivi pipendar mbahe yasepia vahe, ocañi tẽira.

³² Che ndaipotai co ivi pipendar recocuer rese tẽi pe pihañemoñeta etepri peico. Acoi mbia ndomendai vahe rumo, ipihañemoñeta catuño ité yande Yar rese imboviha ãgua; ³³ omenda vahe rumo ipihañemoñeta avei co ivi pipendar

recocuer rese tēi, güembireco mbovīha āgua rese avei. ³⁴ Evocoyase ndahei ñepei opīhañemoñetasa vireco. Ēgüe ehi avei cuña opīhañemoñeta rereco; cuña ndomendai vahe, ipīhañemoñeta yande Yar upendar mbahe rese, güetecuer iyavei oespíritu rereco tupri āgua Tūpa upe. Cuña omenda vahe rumo ipīhañemoñeta co ivi pipendar recocuer rese tēi omer mbovīha āgua oico.

³⁵ Che aipo ahe pēu ‘mbahe tupri pipe toyuvirecoi’ viya, ndahei mbahe yavai vahe pipe pe reco āgua. Che aipota ité pe reco catuprisa pipe yande Yar upeño ité mbahe peyapo vaheṛā pe recoeté pipe peico.

³⁶ Acoi ava ipīhañemoñeta vahe güembirecovi rese omenda āgua, “Aviyeteramo ayavira mbahe ichui iyavei niha osupiti ité imenda āgua, sese aviye catu yamenda” ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipa. ³⁷ Acoi mbia rumo ndovirecoise que ocuaita omenda āgua iyavei oicatu ité güemimbotar apo, ipīhañemoñetase ñepei reseve güembirecovi rese omendaēhi āgua, ahe aviyeño ité. ³⁸ Evocoyase acoi omenda vahe aviyeño; acoi ndomendai vahe rumo, aviye catuño ité.

³⁹ Iyavei acoi cuña omenda vahe, ahe ndiyai eté iyepēpi āgua omer sui imanoēhi viteseve. Omanose rumo ichui, ahese ramo ahe cuña upe aviyeño imenda iri āgua güemimbotar rupi. Yande Yar reroyasar rese avei rumo omendara. ⁴⁰ Ndomenda irise rumo, aviye catuño itera. Ahe che pīhañemoñetasa, iyavei revo ahe che pīhañemoñetasa Tūpa Espiritu suindar.

8

Pablo oñehe tembihu mbahe rahanga upe tēi seropovēhepri rese

¹ Cūritei ambuae mbahe amombehura pēu mbahe rahanga upe mbahe mīmba yucapri seropovēhepri rese. Supi eté aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayeecomboivate ai tēi! Yayeaisuse rumo, ahese yañepitivii catu Cristo reroya tupri āgua. ² Supi eté yande, “Che aicua ité co mbahe” yahe tēise que mbahe upe, ipane vite ité rumo icua tupri āgua yandeu. ³ Yande rumo yasaisuse Tūpa, ahese Tūpa, “Co ava cheundar ité secoi” ehira yandeu.

⁴ Evocoyase co mbahe rahanga upe tēi seropovēhepri mbahe mīmba yucapri hu āgua rese añehe. Yande niha yaicua co mbahe rahanga ēgüe ehi tēi vahe co ivi pipe, iyavei oime ñepei güeraño ité Tūpa. ⁵ Esepia, yepe ava upe setá tūpa ivave, ivive avei viña (setá iteanga niha oime tūpa angahu tēi, yar angahu tēi avei). ⁶ Yande rumo yaicua ñepeiño ité Tūpa

oime, ahe niha yande Ru opacatu mbahe aposar. ¡Evocoyase yande chupe nara ité yaico! Oime avei yande Yar ñepei vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovêhepri, ipihañemoñeta, “Co mbahe roho tûpa rahanga upe seropovêhepri” ehi viteño yuvireco oyeupe. Ipípe sui omomara uca Tûpa rese opihañemoñetasa yuvireco. ⁸ Supi eté tembihu ndayande p̃tivii Tûpa rese yaico vaherã. Ndahei mbahe roho husa pípe sui tēi aviye catura yaico iyavei ndayahuse, ndahei chira mbahe tēi catu yaico. ⁹ Pēu niha aviyeño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangaipa ucara. ¹⁰ Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerēhi aveira ihu uca ãgua chupe. ¹¹ Evocoyase co pe mbahecuasa pípe pemocañi uca yande rivri Tûpa rese noviracua tupri vitei vahe peico. ¡Cristo rumo omano ipĩsiro ãgua! ¹² Esepia, pemomarase Tûpa rese ipihañemoñetasa, ahese pe ae peyemboangaipa uca Cristo amotarēhisa pípe peico. ¹³ Sese yande mbahe roho husa pípe sui yamboangaipa ucasa yande rivri viña, ndayahu iri chietera evocoi mbahe roho yande rivri mboangaipa ucaēhi ãgua.

9

Apóstol Pablo ndoporandu potai oyeupe nara apóstol upendar mbahe rese ava upe

¹ Supi eté che aicatu avei apóstol upendar mbahe písi ãgua viña. Esepia, che apóstol aico. Supi eté che asepia yande Yar Jesús iyavei che poraviquisa pípe sui niha peroya yande Yar peico. ² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voiño itera cheu. Esepia, che remimombehu pípe sui niha yande Yar peroya peico. Ipípe sui avei icuasa tupri apóstol che recosa pēu.

³ Ahe ñehesa amboyevi tupri ava che recoña potasar upe yuvireco yepi. ⁴ Iya ité che remihura písi, che iguarã avei pe sui viña. ⁵ Iyavei inungar ambuae apóstol viraso ité güembireco oyeupi yuvireco yepi, Jesús rivireta avei ēgüe ehi yuvireco, ēgüe ehi avei Pedro, ēgüe ahe aveira niha che viña. ⁶ ¿Ore güeraño tie Bernabé rese oroporaviquira ambuae mbahe rese

ore recove ãgua? ⁷ Esepia, sundao nombopëi sundao güeco ãgua, ahe rumo oporaviquisa repri oipisíño. Iyavei ava uva tísar, ahe avei yaviyese, ohu güemitigüer. Iyavei ovesa rãrosar, ahe avei omohe ovesa cambi igua. ⁸ Che ndahei cheyesui tēi aipo ahe pēu. Esepia niha, Moisés porocuita pipe avei aipo ehi yandeu: ⁹ “Pemondo eme tivi yuru rese mbahe icaruēhisa mbahe rāhii oicambese yuvireco pēu” ehi. Supi eté co Tūpa aipo ehi vahe ndahei tivi upeño. ¹⁰ Yande reco tupri ãgua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rāhii, oyoya osãro mbahe oipisi vahe rã oporaviquisa sui oyeupe nara yuvireco yepi. ¹¹ Evocoyase ore avei oroñoti Tūpa Ñehengagüer pe piha pipe ore pe mbohese. Sese aviyeño aveira oroipisise mbahe pe sui oreyeupe nara viña. ¹² Esepia, ambuae oicatu mbahe pisi ãgua oyeupe nara yuvireco pe sui. Evocoyase ore avei niha oroicatu mbahe pisi ãgua pe sui ore poraviquisa pipe viña.

Ore rumo ěgüe ndorohei eté. Esepia, ore oroñemosañi ité ‘tiñehe mara eme co ñehesa Cristo resendar rese yuvireco’ ore yapave. ¹³ Pe niha peicua ité acoi oporaviqui vahe judío tūparove, ichui ocaru yuvireco. Esepia, yuvirohu mbahe roho Tūpa upe seropovēhepri tūparo rocarve yuvireco yepi. ¹⁴ ěgüe ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu. ¹⁵ Che rumo ndaporandui eté mbahe pe rembiereco rese vichico pēu yepi. Ndahei ‘tombou mbahe yuvireco cheu’ che yapave aipo aicuachía imondo pēu. Che rumo evocoi nungar mbahe rese ayembovihañi ité. ¡Yepe che yucapri tēira tieporēhi viña, ndaporandui chietera rumo mbahe rese pēu! Esepia, namocañi potai eté co che yembovihasa cheyesui.

¹⁶ Che rumo amombehuse co ñehesa pīsirosa resendar ava upe, ndiyai ayeecomboivate ai ipipe. Esepia niha, che cuaita ité yapo ãgua iyavei, ¡cheparaisu itera ndamombehuse ava upe co ñehesa viña! ¹⁷ Tūpa ndache cuaise oñehe mombehu ãgua viña, che rumo che querēhisa pipe amombehuse, ahese aipisira Tūpa suindar porerecosa. ěgüe ndahei rumo. Esepia, Tūpa che cuaisa pipe niha amombehu. ¹⁸ Ndaporanduisse mbahe rese pēu amombehuse co ñehesa pīsirosa resendar, ipipe ayemboviha ahe che vihasa porerecosa nungar cheu. Yepe aicatu mbahe rese che porandu ãgua viña, che rumo ěgüe ndahei eté.

¹⁹ Yepe che ndahei ava povrive tēi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iquerēhi vahe Cristo reroya ãgua’ che yapave. ²⁰ Esepia, aicose judío pãhuve, secocuer rupi aicoveño Yar upe imonguerēhi catu ãgua yuvireco. ěgüe ahe ité, aicose

ava Moisés porocuita povrive yuvirecoi vahe pãhuve, che avei eté mborocuitavrive nungar aico. Ndahei rumo Moisés porocuita povrive ité aico imboaviye ãgua. ²¹ Iyavei ava ndoyuvirecoi vahe Moisés porocuita povrive, ipãhuve aicose, inungar ahe yuvirecoi, êgüe ahe tupri avei imonguerêhi ãgua yande Yar upe vichico. Ndahei rumo Tûpa porocuita mboyeroaêhisa pipe aico. Esepia, Cristo porocuitavrive che recocuer. ²² Iyavei no, aicose ava yande Yar ndoviroya tupri vitei vahe pãhuve, secocuer nungar tupri avei aico Yar upe imonguerêhi catu ãgua. Êgüe ahe opacatu ava upe ‘toñepisiro catu ahe avei yuvireco’ viya. ²³ Che ayapo co opacatu mbahe ‘taseta catu co ñehesa pñisirosa reroyasar yuvireco’ che hesa pipe, ‘taipisi avei co porovasasa oime vahe co ñehesa reroyasa pipe’ che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerrecosa yepi. Evocoyase inungar co ivava catu vahe, êgüe peye avei pe recocuer pipe Tûpa porerrecosa pisi ãgua peico. ²⁵ Iyavei opacatu oyemoingatu vahe oguayi ãgua oñearo tupri opacatu mbahe tõi sui oyemomaraêhi ãgua yuvireco. Ahe êgüe ehi porerrecosa ndipocopi vahe pisi ãgua tõi yuvireco. Yande rumo yayemomborarara porerrecosa apirêhi vahe pisi ãgua yaico. ²⁶ Evocoyase che avei, ndahei ava oyahuva-huva tõi vahe nungar aico Tûpa remimbotar apo ãgua iyavei che ndaicoi ava iguayi tõi vahe nungar. ²⁷ Che rumo mbiguai nungar che retecuer areco, amboyeroya uca pihañemoñeta tuprisa upe. Esepia, ndaipotai ambuae ava mbohe pare imombopri tõi nungar guayisa sui che yereco ãgua.

10

Ndiyai aracahendar ava recocuerai rupi yaguata

¹ Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe pïtu Tûpa imboguata agüer rese. Iyavei para guasu Pïra vahe avei osasa opacatu yuvireco aracahe. ² Êgüe ehi eté opacatu oguatase mbahe pïtuvri rupi iyavei para guasu osasase yuvireco, ndoyavii ñapiramombri yuvirecoi Moisés recocuer rupi oguata ãgua aracahe. ³ Iyavei oyoya guasu yuvirohu tembihu Tûpa ombou vahe chupe nara yuvireco, ⁴ opacatu guasu avei oihu ita sui Tûpa ombou vahe ihiguarã yuvireco. Ahe ita rumo inungar Cristo secoi opacatu iguatasa rupi yuvireco. ⁵ Yepe êgüe ehi Tûpa opacatu yande ramoi judío upe viña, setá iteanga rumo ava ipãhu pendar ndahei aviye vahe ipiha rupi yuvireco. Ipipe sui opa omano ivi iporupirêhisa rupi aracahe.

⁶ Co opacatu mbahe sembiapogüer yuvireco ahe yande mbohe ãgua ‘toipota rai eme mbahe-mbahe tēi inungar ahe ava yuvirecoi’ oyapave yandeu. ⁷ Sese yande ndayamboetei chira mbahe rahanga tēi, inungar ahe ipãhu pendar yuvirecoi aracahe. Aipo ehi eté niha icuachiapri aracahendar pipe: “Co ava ocaru vahe, yuviroihu avei yuvinoi. Ichui yuviropũha, oyembovihaño pieta apo yuvireco” ehi. ⁸ Ndayayemboaguasa-guasa tēi chiaveira inungar ahe amove ěgüe ehi yuvireco. Ipipe sui tēi ñepei ari pipe ahe opa omano veintitrés mil tupri yuvireco aracahe. ⁹ Ndayasecoãha-ãha tēi chiaveira yande Yar, inungar ahe yuvireco. Ipipe sui oyeyucapa uca mboi osuhusa pipe yuvireco. ¹⁰ Iyavei ndayande ñehe mara-mara tēi chira yande Aposar rese, inungar ahe ěgüe ehi yuvireco. Ipipe sui Tũpa ombou güembiguai ava yucasar iva sui ahe ava yucapa ãgua aracahe.

¹¹ Co opacatu yande ramoi upe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he ãgua yandeu. ¹² Sese yande “che aico tupri ité Tũpa rese” yahe vahe, yaicua catura rumo. Aviyeteramo yaviapira mbahe tēi pipe. ¹³ Pe recoãhasa rumo oyoya tupri ité ambuae ava recoãhasa rese. Pe rumo peyeroyaño itera Tũpa rese, ahe niha oicua pe yemoviracuasa, noñocuai chira tecoãhasa imbou pẽu. Acoi mbahe tēi oimese pe recoãhase, Tũpa ombou voiñora pĩratasa evocoi mbahe tēi sui pe sē ãgua, chupe pe ñemosã ãgua.

¹⁴ Sese che rivireta, che rembiaisu, peyepipi mbahe rahanga mboeteisa sui. ¹⁵ Ava niha peico pesenducua vaherã mbahe, evocoyase peporandu co che remimombehugüer rese peyeupe icua tupri ãgua. ¹⁶ Yaihuse uva ricuer sovasapri, “Aviye ndeu, che Yar” yande hesa pipe, ahese oyoya guasu Cristo rese yaico suvi pipe sui. Yahuse co pan imboyahoyahopri, ahese oyoya guasu yaipisi Cristo retecuer yandeyupe nara. ¹⁷ Yepe yande reta yaico viña, opacatu rumo yahu ñepei pan sui. Sese yande ñepei vahe ité yaico.

¹⁸ Peyapisaca acoi ava aracahendar Israel recocuer rese. Esepia, acoi yuvirohu vahe Tũpa upendar mbahe seropovēhepri, ahe evocoyase chupendar ité yuvirecoi. ¹⁹ Che rumo, “Mbahe rahanga aviye vahe ité” ndahei, iyavei, “Mbahe roho icuavēhepri mbahe rahanga upe, aviye catu ité” ndahei avei. ²⁰ Co rumo, acoi ava ndoicuai vahe Tũpa oicuavēhe mbahe carugar upe tēi yuvireco yepi. Ndahei rumo Tũpa upe nara ité ěgüe ehi yuvireco. Che evocoyase ndaipotai eté carugar upe nara tēi ěgüe peye vaherã peico. ²¹ Peihuse rumo yande Yar upendar igua, ndiyai peihu avei

carugar upendar igua; iyavei pehuse yande Yar upendar mbahe, ndiyai avei pehu carugar upendar mbahe.

²² ¿Yasecara p̄iha yande ae yande Yar ñemoiro āgua yandeyeupe? ¡Yande rumo ndahei chira ip̄irata catu vahe yaico ichui!

Yande renosesa mbiguai t̄ei nungar yande recosa sui mbahe tupri apo āgua

²³ Amove ava, “Aviyeño opacatu mbahe yayapo yande remimbotar rupi” ehi yuvireco viña. Ēgüe ehi eté niha, ndahei rumo opacatu aviye, ndahei avei co opacatu mbahe yande p̄it̄iv̄i catu Cristo rese yande reco āgua. ²⁴ Ndapesecai chira que mbahe aviye vahe peyeupe nara t̄ei, pesecara rumo ambuae ava upe nara.

²⁵ Pehuño mbahe tembihu opacatu mbahe mboep̄isa rupi sui perocua vahe. Ndapeporandui chira rumo sese T̄upa rese pe p̄ihañemoñetasa momaraēhi āgua. ²⁶ Esepia, ivi opacatu ipor reseve, ahe yande Yar upendar.

²⁷ Acoi T̄upa reroyasarēhi pe soho ucase oyepiri pe mbo-caru āgua, peso potase ipiri, pehuñora mbahe imboupri p̄eu. Ndapeporandui chira rumo sese chupe T̄upa rese pe p̄ihañemoñetasa momaraēhi āgua. ²⁸ Acoi ava, “Co mbahe roho icuavēhepri mbahe rahanga upe” ehise p̄eu, ndapehui chira ahe mbahe roho. Ēgüe peyera p̄eu imombehusar rereco meguaēhi āgua, ava p̄ihañemoñetasa momaraēhi āgua avei. ²⁹ Supi eté che añehe co ambuae ava p̄ihañemoñetasa rese, ndahei pe p̄ihañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava p̄iha rupi?” ehi vahe. ³⁰ Iyavei aipo ehira no: “‘Aviye ndeu’ ahese T̄upa upe mbahe ahu vahe rese, ¿mahera p̄iha che reroirora yuvireco ahuse viña?” ehira. ³¹ Iyacatu rumo pehuse que mbahe, peihuse avei, anise que mbahe peyapose, peyapo ru opacatu T̄upa mboeteisa pipe. ³² Supi eté ndapemboyecuai chira pe recocuerai, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei. ³³ Che opacatu che rembiapo pipe aipota ité mbahe tupri apo āgua opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñep̄isiro āgua yuvireco.

11

¹ Che raquicue moñá catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvireco yepi

² Che rivireta, che, “Aviye ité yuvirecoi” ahe pëu yepi che rese pemahenduha vïtese iyavei peguataño vïtese che opombohe vahe agüer rupi. ³ Che rumo aicua uca tupri pota pëu, Cristo niha secoi ñepei-pei cuimbahe cuaisar, cuimbahe evocoyase güembireco cuaisar secoi. Ëgüe ehi avei Tüpa Guahir Cristo upe. ⁴ Acoi cuimbahe Cristo upe ñemonuhasave oãca ndiru ndosequise oyerure ãgua, anise Tüpa Ñehengagüer mombehu ãgua, ahe ëgüe ehi güereciar Cristo mboeteiëhisa pipe. ⁵ Iyavei acoi cuña ndoyopiise oãca oyeroqui ãgua, anise Tüpa Ñehengagüer mombehu ãgua, ahe ëgüe ehi omer mboyeroyaëhisa pipe. Ahe cuña evocoyase ndoyavi oñeapipa tupri vahe. ⁶ Acoi cuña ndoyopi potaise oãca, tayapecãraisa tupri. Ochïse rumo oapecãrai ãgua, evocoyase toyopiño oãca sereco. ⁷ Cuimbahe rumo ndoyopi chira oãca sereco. Esepia, ahe Tüpa rahanga ité secoi iyavei iporañetesa omboyecua ité oyese. Cuña rumo omboyecua omer recocuer oyese yuvireco. ⁸ Esepia, Tüpa oyapose cuimbahe, ndahei cuña sui vinose, cuimbahe sui niha cuña oyapo. ⁹ Iyavei ndahei cuña upe nara Tüpa oyapo cuimbahe, ahe rumo oyapo cuña cuimbahe upe nara. ¹⁰ Co rese cuña vïrecora oãcapisa omer mboyero-asa mboyecua ãgua omahese Tüpa rembiguai eta yuvireco sese. ¹¹ Yande, yande Yar reroyasar yaico vahe co tecocuer rese, yañepitivï oyoya yaico. Evocoyase cuimbahe ndoicatui cuña porëhi; cuña avei ndoicatui cuimbahe porëhi yuvireco. ¹² Esepia, yepi supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tüpa suindar yuvirecoi.

¹³ Evocoyase peyapisaca tupri co rese: ¿Iya pïha cuña noñeacapii vahe oyerure Tüpa upe? ¹⁴ Yande ité yaicua yemochisa cuimbahe oyemboha vucuse. ¹⁵ Cuña rumo oviharete oha vucu porañetesa rese. Esepia, chupe imondopri ité ñacapi ãgua. ¹⁶ Acoi ava iñehe-ñehe tïi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar ëgüe ehi avei yuvireco.

Yande Yar rese yemamahenduha raisa

¹⁷ Co ambuae mbahe rese rumo ndaicatui eté, “Aviye tupri yuvirecoi” che he ãgua pëu. Esepia, aipo pe ñemonuhasave, mbahe tïi eté aipo peyapo. ¹⁸ Esepia, yipïndar che ayandu peñemonuhapase aipo oyese yande Yar mboetei ãgua pe pïhañemoñetasa ndahoyoyai pipe peico. Amove ayanduse pe rerãcua, aroya ité. ¹⁹ ¿Iya ité revo pïhañemoñetasa ndahoyoyai vahe reime ãgua pe pãhuve Jesús reroyasar supi tupri vahe cua tupri ãgua! ²⁰ Peñemonuhase pe pïhañemoñetasa ndahoyoyai vahe pipe pe caru ãgua, ndahei yande Yar rese

pe yemomahenduhaseve ãgüe peye. ²¹ Espia, aipo pecaruse, pe rane aipo pepoyava pecaru. Ambuae aipo evocoiyase ndasiepoi tã yuvireco; ambuae rumo pe pãhu pendar aipo oyembosavaipoño yuvireco. ²² Pereco niha pe rãta aheve pe caru ãgua iyavei pe ihu ãgua. Pe rumo pe reco pipe opa peroïro ambuae Jesús reroyasareta peico. Ipipe avei pemochi ava ndovirecoi vahe mbahe. ¡Che evocoiyase, “Aviye yuvireco” ndahei chietera co mbahe pe rembiapo ai rese pëu!

Yande Yar rese yemomahenduhase supi ité vahe resendar

²³ Co ñehesa aipisi vahe yande Yar suindar amombehu vahe pëu: ahe pãtu pipe acoi Jesús mboguaisar opisi ãgua renonde, ahe oipisi pan. ²⁴ “Aviye ndeu” ohe pare Vu upe, ombohi-mbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco ãgua. Ëgüe peyera che rese pe mahenduhase pipe peico” ehi. ²⁵ Ëgüe ehi avei ocarure yuvireco, ahe oipisi igua riru aipo ehi: “Co uva ricuer omboyecua pëu Tüpa oyapora mbahe ipiasu vahe pe recorã. Che ruvi pipe rumo yaposara. Evocoiyase co ari pipe suive peihuse co, peyemomahenduhase che rese yepi” ehi. ²⁶ Esepia, acoi pehuse co, peihuse avei, peyemomahenduhase, pemombehu aveira yande Yar mano agüer opacatu ava upe peico. Ëgüe peyera iyevi rãro peico.

Mara yahera yande Yar rese yayemomahenduhase

²⁷ Evocoiyase acoi ava ocaruño tã vahe, yuviroihuño tã vahe avei Yar mboeteiëhisave, ahe evocoiyase nombotei yuvireco yande Yar rembiapocuer omondose güetecuer, iyavei oipiyerese vuvi. ²⁸ Sese tipihañemoñeta rane oyacatu güecocuer rese ava co pan hu ãgua renonde, oihu ãgua renonde avei co uva ricuer yuvireco. ²⁹ Esepia, acoi pe yemomahenduhasehisave co setecuer rese pehuse iyavei peihuse, ahese mbahe naporai vahe peseca peyeupe nara peico. ³⁰ Ichui niha setá pembaheasi, oime setá nipirata iri vahe avei pe pãhuse, oime avei omano vahe pe pãhu pendar. ³¹ Yande pihañemoñeta tuprise rumo yande reco ãgua rese, yande Yar evocoiyase nomoime chira mbahe tã yandeu evocoiya yande recosa pipe. ³² Yande Yar rumo oicua yande rembiapo ai. Sese omoime mbahe tã yandeu. Yande reco mohivi tupri ãgua rumo ãgüe ehi yandeu, ndahei yande cañi ãgua opacatu ava viroyasarëhi reseve.

³³ Sese, che rivireta, acoi peñemonuhase pe yemomahenduhase ãgua yande Yar rese, peñearo ranera oyoya guasu pe caru ãgua. ³⁴ Acoi ava ndasiepoise yuvireco, tocaru rane güetave. Ahese yuvirasose ñemonuhaseve, ndipoi chira mbahe

chupe. Iyavei che asose eipeve pe repia, opara ambuae mbahe amoingatu vicho pëu.

12

Mbahecuasa Tūpa Espiritu suindar

¹ Che riviřeta, che aicua uca pota pëu co mbahecuasa re-sendar ñepepe-pei pëu Espiritu omondo vahe.

² Pe niha cūritei peicua tupri ité yipindar Tūpa rese peicoëhi vıtese, peyembopa uca mbahe rahanga ěgüe ehi tēi, noñehei vahe upe peico. ³ Sese, che aipota peicua acoi ava iñehe mara Jesús upe ndahei Tūpa Espiritu pıřatasa pipe ěgüe ehi. Iyavei ava ndoicatui chira, “¡Jesús che Yar secoi!” ohe āgua opiha pipe Espiritu Santo ndovırecoise.

⁴ Oime setá ambuae-ae tēi mbahecuasa Espiritu suindar yande Jesús reroyasar yaico vahe upe nara, ahe Espiritu rumo ñepeıño ité imondosar secoi. ⁵ Setá mbahe avei oime mbahe yayapo vaheřā yande Yar upe. Ahe yande Yar rumo ñepeıño ité secoi. ⁶ Iyavei setá oime ambuae mbahe Tūpa oyapo vahe yande rese opıřatasa pipe, Tūpa rumo ñepeıño ité secoi. Ahe oyapo opacatu co mbahe ñepepe-pei yande rese. ⁷ Ahe omboyecua yande Espiritu rerecosa ñepepe-pei yandeu opacatu yande reco tupri āgua. ⁸ Espiritu pıřatasa pipe Tūpa omondo ñepepe vıroyasar upe iñehe āgua aracuasa rese iyavei ambuae upe omondo iporombohe tupri catu āgua ombahecuasa pipe. ⁹ Ambuae upe evocoyase omondo oyese yeroya tupri catu āgua oEspiritu pipe sui avei. Iyavei ambuae upe omondo opıřatasa imbaheasi vahe mbogüera āgua. ¹⁰ Ambuae oipisi pıřatasa mbahe poromondiisa oyapo vaheřā yuvıreco. Ahe ichui avei vıreco ambuae ava omombehu vaheřā ñehesa Tūpa suindar yuvıreco. Ambuae upe Tūpa omondo mbahecuasa espıritu naporai vahe iyavei Espiritu supı tupri vahe cua tupri āgua. Ambuae evocoyase ichui avei oıcatu ñehesa ndicuasai vahe Tūpa suindar pipe oñehe āgua. Ahe ichui avei ambuae oıcatu ahe ñehesa ndicuasai vahe mombehu tupri āgua ava upe. ¹¹ ěgüe ehi Espiritu ñepeıño ité güemimbotar rupı omondo ñepepe-pei yande Jesús reroyasar yaico vahe upe co mbahecuasa.

Opacatu Cristo rese yaico vahe ñepeıño ité yande recocuer

¹² Inungar yande retecuer resendar setá mbahe oime viña, ahe rumo ñepeıño ité; ěgüe ehi avei Cristo. ¹³ ěgüe yahe avei opacatu, yepe yande pāhuve oime: judıo, ndahei vahe judıo, mbiguai, ndahei vahe avei mbiguai, yande rumo opacatu ñapiramombri yaico ñepepe vahe nungar yande reco āgua Espiritu ñepepe vahe pipe. Ahe ñepepe Espiritu avei opa yaipisi.

¹⁴ Supi eté yande rete resendar ndahei ñepeí mbahe, setá rumo mbahe. ¹⁵ Iyavei yepe que yande pí revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tēi ndaseco iri chira yande rete rese. ¹⁶ Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tēi ndaseco iri chira yande rete rese! ¹⁷ Esepia, opacatu tupri yande rete sesa pãve tēise, ndayasendui chietera evocoyase mbahe viña. Anise, yande rete yapisacuar pãve tēise, ndayasētui chietera evocoyase mbahe viña. ¹⁸ Tūpa rumo ñepeí-peí yande rese mbahe omondo senara rupi tupri güemimbotar rupi. ¹⁹ Yande opacatu ñepeí ava rete resendar nungar pãve tēise, ndahei evocoyase opacatu tupri ava rete nungar yaico. ²⁰ Supi eté yepe setá mbahe yande rete rese, ñepeíño ité rumo yande rete.

²¹ Iyavei que yande resa ndiyai aipo ehira yande po upe: “¡Nde ěgüe ere tēi vahe eico!”; anise que yande āca avei, “¡Nde ěgüe ere tēi vahe eico!” ndehi chira yande pí upe. ²² Esepia, yande rete resendar mbahe avīye nipiratai vahe yandeu, ahe sese rumo yayeroya catu. ²³ Iyavei yande rete rese mbahe ndayasaisu tuprii vahe, ahe rumo yamboyemonde tupri ai sereco. Iyavei no yande rete resendar mbahe ndayamboye-cuai vahe ava rembiepiave, ahe yayopí tupri sereco. ²⁴ Oime rumo ambuae yande rete resendar ndayayopii vaheerã. Ęgüe ehi Tūpa yande rete resendar mbahe imoingatu tupri. Evocoyase yande rete resendar mbahe ndayasaisu tuprii vahe imboeteipri catu secoi. ²⁵ Tipo eme pihañemoñetasa ndoyoyai vahe pe pãhuve. Oyoya pehañeco tupri ñepeí-peí peyese peico. ²⁶ Evocoyase que ñepeí yande pãhu pendar upe mbahe tasise, opacatu ambuae upe avei tasi; anise que ñepeí imboyeroyapri secoise, ambuae avei opacatu oyemboviha yuvireco sese.

²⁷ Supi eté pe inungar Cristo rete peico. Ęgüe peye ité ñepeí-peí chupendar ité peico. ²⁸ Ęgüe ehi Tūpa iporavo viroyasar pãhuve, “Toime rane yipīndar apóstol; ipare toime ava che ñehengagüer mombehu āgua, ichui ambuae upe iporombohe āgua, ipare ambuae mbahe ndayasepiai vahe apo āgua, iyavei ambuae ava imbaheasi vahe mbogüera āgua, ambuae ava pītiviisar tasecoi, ambuae ava recocuer reroguata tupri āgua tasecoi, ambuae ava evocoyase toñehe ñehesa ndicuasai vahe pipe” ehi. ²⁹ Ndahei rumo opacatu ava apóstol yuvirecoi, iyavei ndahei opacatu Tūpa ñehe mombehusar yuvirecoi, ndahei opacatu oporombohe yuvireco, ndaopacatui avei oyapo mbahe ndayasepiai vahe yuvireco, ³⁰ ndahei opacatu vireco pīratasa oporombogüera āgua yuvireco, iyavei ndahei

opacatu ndicuasai vahe ñehesa Espíritu suindar pipe oñehe yuvireco, ndaopacatui avei oicua evocoi ñehesa renducua uca ãgua ambuae ava upe yuvireco. ³¹ Peseca ru Espíritu suindar mbahecuasa aviye catu vahe peyeupe nara.

Yembohesa yande poroaisu ãgua resendar

Che rumo amombehura tecocuer aviye catu vahe pëu.

13

¹ Yepe yande yañeheño tēise ambuae ava ñehe ndayaicuai vahe pipe, iyavei Tūpa rembiguai ñehe pipe avei viña, ndayasaisuise rumo ava ipipe, yande evocoiyase ãgüe yahe tupri tēi inungar mbahe guarepochi apopri siapu iteanga vahe, iyavei inungar acoi platillo siapú rai tēi vahe, ãgüe yahe tēi yaico. ² Iyavei yepe yamombehuño tēise Tūpa suindar ñehesa ou vahe yandeu viña, iyavei yepe yaicua mbahe opacatu icuapirēhi Tūpa suindar yaico, yarecose avei yande aracuasa opacatu yandeyese, iyavei yepe yande Tūpa rese yeroya pipe yarosirira ivitri guasu senda sui viña, ndayasaisuise rumo ava ipipe, yande evocoiyase ãgüe yahe tupri tēira yaico. ³ Iyavei yande mbahe opacatu yareco vahe yamboyaho-yaho tupri tēise ava iparaisu vahe upe viña, iyavei yayoapi ucapa tupri tēise viña, ndayasaisuise rumo ava ipipe yaico, ndayande pītivii eté evocoiya yande reco agüer.

⁴ Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarēhi ambuae ava mbahe potasave; “Che aviye catu vahe aico” ndehi avei, ndoyeecomboivate ai eté, ⁵ ahe ndovirecoi eté oporomboeteiēhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe. ⁶ Ndahei mbahe tēi rese oyemboviha; ahe rumo oyemboviha mbahe supi tupri vahe rese. ⁷ Oporoaisusa virecose oñemosañño opacatu uve, oyeroya vite sese, osãro vite mbahe tupri ichui, iyavei seco mbegüe viteño chupe.

⁸ Poroaisusa niha ndopai vahe ité. Oyepotara ari ipapapri coiye, ahese ndayamombehu iri chira Tūpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiaveira yande mbahecuasa. ⁹ Esepia niha, yaicua raimi tēi mbahe iyavei chīhi raimi tēi yamombehu Tūpa Ñehengagüer. ¹⁰ Acoi ouse rumo oicuapa tupri vahe mbahe, ahese ndahe iri chira yaicua raimi tēi vahe yaiporura.

¹¹ Esepia niha, chīhivahe vite yande recose, yañehe, yandepihañemoñeta, yasenducua mbahe chīhivahe nungar; yacuacuase ité rumo cute, yaseyapa chīhivahe yande reco agüer. ¹² Cūritei yande ndayasenducua tuprii Tūpa resendar

mbahe, inungar acoi yepiasa pīpe yasepia hāvomi tēi que mbahe; oyeovai eté yaicose rumo, yasenducua tupri catu itera mbahe evocoyase. Cūrītei rumo yaicua raimi tēi mbahe Tūpa suindar yaico; coiye rumo yaicua tupri catu itera, inungar ahe oicua tupri ité yande recocuer.

¹³ Co oime mbosapī mbahe ndopai vaheṛā, ahe: Tūpa rese yande yeroyasa, mbahe yande remiaro ivave oime vahe iyavei yande yeaisusa; co imombosapīsa rumo aviye catú vahe ité ambuae sui yandeu, ahe yeaisusa.

14

Yaseca catura Tūpa suindar ñehesa mombehu āgua

¹ Peseca catu pe yeaisu tupri āgua peico; aheseve avei peipotara mbahecuasa Tūpa Espīritu remimbou. Ichuindar ñehesa mombehu āgua rese catu ité rumo peicora. ² Esepia, acoi ava oñehe vahe ñehesa ndayaicuai vahe pīpe, Tūpa upe ité evocoyase oñehe; ndahei ava upe tēi oñehe. Esepia, ndipoi eté ava iñehe renducuapar. Ahe rumo oñehe mbahe ndicua-sai vahe rese oespīritu pīpe. ³ Acoi ava omombehu vahe rumo Tūpa suindar ñehesa yasenducua vahe pīpe, ahe oipītivī ambuae ava Tūpa rese iyeroya āgua, oporomonguerēhi catu, oporombovīha catu avei. ⁴ Acoi ava oñehe vahe rumo ñehesa ndayaicuai vahe pīpe, ahe ae tēi vireco catu Tūpa rese opīhañemoñetasa. Acoi ava omombehu vahe rumo Tūpa suindar ñehesa icuapri ité, ahe ombopīhañemoñetá catu Tūpa rese Cristo reroyasar yuvirecoi vahe.

⁵ Yepe aipotara opacatu pe ñehe āgua ñehesa ndayaicuai vahe pīpe pēu viña, aviye catu rumo pemombehura Tūpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupri āgua, ahese aviyeño oñehe Jesús reroyasar rovaque. Ipipe sui ipīhañemoñeta catura Tūpa rese yuvireco. ⁶ Sese, che rivireta, asose pe repia, añehese co ñehesa ndayaicuai vahe pīpe pēu, ndapesenducuai chira che ñehe viña. Amombehuse rumo Tūpa oicua uca vahe cheu que mbahecuasa supi tupri vahe resendar, anise que ñehesa Tūpa suindar, anise que ambuae porombohesa, ahese pesenducua viña.

⁷ Mbahe yande remimombehu rumo inungar acoi mbahe porasei recasar imoñehēpri viña, inungar mimbi, arpa avei. Esepia, ndoyoya tupriise iñehēgüer yuvireco, ndayasenducuai eté evocoyase mbahe-mbahe sapucaisa osāha yuvireco. ⁸ Anise co inungar mimbi nomoñehe tupriise vavasave nara yuvireco viña, ndipoi chietera que ava oyemoingatu voi vaheṛā ovava āgua viña. ⁹ Ēgüe peye avei niha peico peñehese

ava upe ñehesa ndayasenducuai vahe pipe, ahe evocoyase osenduño tēi, ndosenducuai eté rumo pe ñehes yuvireco. ¡Evocoyase peñehes tēi eté! ¹⁰ Supi eté, setá iteanga co ivi pipe oime ambuae-ae tēi ava ñehesa. Oime avei rumo ava osenducua vahe aipo nungar ñehesa. ¹¹ Acoi ndayasenducuaise rumo ambuae ava ñehes, yande evocoyase inungar ambuae tecua pendar tēi yaico vahe chupe; yandeu avei evocoyase ahe ava inungar ambuae tecua pendar tēi yuvirecoi vahe. ¹² Pe niha peipota ité pereco vaheerã mbahecuasa Tūpa Espiritu suindar yepi. Sese peporandu catu mbahecuasa Espiritu suindar rese opacatu Jesús reroyasar pītivii āgua Tūpa rese yuvirecoi tupri catu vaheerã.

¹³ Sese acoi ava oñehes vahe ñehesa ndayaicuai vahe pipe, toporandu rane Tūpa upe ambuae ava upe senducua uca tupri āgua rese. ¹⁴ Esepia, acoi yayeroquiño tēise Tūpa upe ñehesa ndayasenducuai vahe pipe, yayeroqui yande espíritu pipe, ndayasenducuai rumo yande yeroqui. ¹⁵ ¿Mara yahera vo evocoyase? Yayeroquiira yande espíritu pipe, yande aracuasa pipe avei. Yasapucaira yande espíritu pipe, yande aracuasa pipe avei no. ¹⁶ Esepia, acoi Tūpa upe, “Aviye ndeu” yahese yande espíritu pipe güeraño, evocoyase ava ndosenducuai vahe, oyemboyase yande rese iyavei osenduse yande yeroquisa, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco. ¹⁷ “Aviye ndeu” yande hesa, aviyeteramo aviyera Tūpa upe viña, ambuae ava rumo osenduse, noipitivii chietera Tūpa rese imbopihañemoñeta catu āgua senducuaēhi pipe. ¹⁸ “Aviye ndeu” ahe Tūpa upe. Esepia, añehes catu ñehesa ndayaicuai vahe pipe opacatu pe sui. ¹⁹ Jesús reroyasar ñemonuhasave rumo aipota catu amombehu vaheerã moviromi tēi ñehesa yasenducua vahe ava mbohe āgua setá ñehesa ndicuasai vahe pipe che ñehes rāgüer sui.

²⁰ Che rivireta, pepihañemoñeta eme chñihvahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoēhi āgua. ²¹ Porocuita resendar icuachiapri aracahendar pipe aipo ehi: “Añehes co ava yuvirecoi vahe upe ambuae ava ñehes pipe. Iyavei ava ambuae ivi pendar amoñehes uca iñehes pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe. ²² Evocoyase co ñehesa ndayaicuai vahe pipe oñehes ava Tūpa pīratasa pipe, ahe Jesús reroyasarēhi yuvirecoi vahe upe nara: “¡Peicua catu, co supi tupri vahe!” he āgua. Ndahei rumo ava Jesús reroyasar yuvirecoi vahe upendar. Ñehes Tūpa suindar

senducuapri yamombehuse rumo, ahe, “Co supi tupri vahe” he āgua Jesús reroyasar yuvirecoi vahe upe; ndahei ava seroyasarēhi yuvirecoi vahe upendar. ²³ Evocoiyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tēi, ipare yuviroiquese pe pāhuve Jesús reroyasarēhi ndosenducuai vahe Tūpa suindar mbahe yuvireco, “¡Opacatu co ndayaracuai vahe tēi yuvireco!” ehira yuvireco pēu. ²⁴ Opacatu rumo peñehese Tūpa suindar ñehesa yasenducua vahe pipe, yuviroiquese evocoi nungar ava yuviraso pe pāhuve, ahe ae evocoiyase, “Supi eté ayavi che recocuer Tūpa rovaque” ehira pe ñehere renduse yuvireco. ²⁵ Ēgüe ehira opihañemoñeta rai ndoyecuai vahe imboporēhipa uca oyeupe pe ñehere rendu ramosa yuvireco. Ipipe sui omboeteira Tūpa yuvireco. Ahe, “Supi eté catu Tūpa ité pereco peyese” ehira yuvireco pēu.

Yayapora mbahe opacatu yande cuaita rupi ñemonuhasave

²⁶ Sese che rivireta, peñemonuhasave, oime pe pāhu pendar osapucuai pota vahe sapucaisa Tūpa upendar, ambuae evocoiyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tūpa, ambuae oipota ité oñehere ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu āgua yuvireco. ²⁷ Acoi ava oñehere ñehesa ndayaicuai vahe pipe, toñehere ñuvirío güeraño yuvireco, anise que mbosapi ñepepepe rupi; ñepepepe evocoiyase osenducua ucara iñehere ava upe oico. ²⁸ Acoi ndipoise ité rumo ambuae ava ahe ñehesa ndayaicuai vahe renducua uca āgua, ndiyai ahe oñehere yuvireco pe ñemonuhasave; oyeupeñomi evocoiyase ahe oñehere ipipe yuvireco Tūpa upe. ²⁹ Ēgüe peye tupri aveira pemombehuse Tūpa suindar ñehesa ambuae ava upe, peñehere ñuviriomi, anise mbosapi. Ambuae evocoiyase pe pāhu pendar oyapisaca tuprira sese yuvireco ‘¿supi eté pīha?’ ohesave. ³⁰ Que ñepepepe oñehere vitese Tūpa oicua ucasa mbahe ambuae ava upe, topituhuño yipindar oñehere vahe, ambuae evocoiyase toñehere pēu. ³¹ Evocoiyase ēgüe peyera peñehere ñepepepe opacatu ambuae osendu vahe mbohe āgua iyavei imonguerēhi catu āgua. ³² Acoi omombehu vahe ñehesa Tūpa suindar, ahe oicatu oñehere mombituhu āgua. ³³⁻³⁴ Esepia, Tūpa seci mbahe aviye vahe aposar, ndahei ndoyembohe catui vahe.

Ndiyai cuña upe iñehere āgua pe ñemonuhasave. Esepia, ēgüe ehi avei opacatu ambuae Jesús reroyasar ñemonuhasa rupi yuvireco. Evocoiyase ndiyai eté aheve iñehere āgua yuvireco chupe. Iyacatu rumo ahe imboyeroyapri yuvirecoira omer

upe Tūpa porocuaita rupi. ³⁵ Oicua potase que mbahe, iya omer upe oporandura güētave yuvireco. Esepia, cuña upe ndiyai eté iporandu āgua mbahe rese pe ñemonuhasave.

³⁶ Peyapisaca catu co ñehesa rese. Ndahei niha pe rane pemombehu Tūpa Ñehengagüer ava upe peico, ndahei avei pēuñomi ou Tūpa suindar ñehesa. ³⁷ Acoi que pe pāhuve oimese “che Tūpa Ñehengagüer mombehusar aico” ehiño tēi vahe, anise que “aicua Espiritu suindar mbahe” ehi vahe, iya rumo oicua tupri co aicuachía vahe imondo pēu, ahe yande Yar porocuaita resendar. ³⁸ Ahe ndoyapisaca potaise rumo che ñehe rese, iñehe rese evocoyase ndapeyapísacai chira.

³⁹ Sese, che rivireta, peyemonguerēhi catu Tūpa suindar ñehesa icuapri vahe mombehu āgua peico. Ndiyai rumo ndapeipotai ambuae ava upe ñehesa ndayaicuai vahe pipe iñehe āgua. ⁴⁰ Peyapora rumo opacatu mbahe ñepeipei pe cuaita rupi mbahe tupri pipe.

15

Cristo cuerayevi agüer

¹ Che rivireta, che aipota peyemomahenduha acoi ñehesa p̄sirosa resendar pēu mombehu vahecuer rese. Co ñehesa niha peipisi. Ipipe sui avei niha peyemoviracua peyese. ² Seroya pipe niha peñepisiro peico peyemoviracuase sese. Ēgüe ndapeyese rumo, peroya tupri tēi.

³ Acoi ñehesa aipisi vahe, opa uca aicua pēu. Esepia, ahe aviye catu vahe: Cristo omano yande angaipa repirā Tūpa Ñehengagüer icuachiapri rupi eté ⁴ iyavei oñoti sehögüer yuvireco. Ipare rumo, imombosapisa ari pipe, ocuerayevi iri icuachiapri rupi eté avei. ⁵ Ichui oyemboyecua Pedro upe. Ipare voi oyemboyecua apóstol yuvirecoi vahe upe. ⁶ Ichui oyemboyecua quiniento sui setá catu vahe viroyasar upe. Evocoyase oyoya guasu osepia yuvireco. Setá vite rumo sepiasarer yuvirecove vite cūrítei; amove rumo ambuae opa omano yuvireco. ⁷ Coiye oyemoporēhi Santiago upe. Ipare opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviye evocoyase che ipá oha vahe aico seroya āgua. ⁹ Esepia, che seco ivi coti catu vahe opacatu ambuae apóstol sui aico. Iyavei ndacheāroi eté apóstol che reco āgua viña. Esepia, che yipindar seroyasar aseca-seca catu vahe mara-mara tēi sereco āgua. ¹⁰ Che rumo apóstol ité aico. Esepia, Tūpa oyapo mbahe aviye vahe ité cheu; che rovasa oico. Evocoyase che recocuer osecañaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tēi Ēgüe ahe vichico, Tūpa rumo

oporovasasa pīpe secōi che rupi. ¹¹ Ndapepīhañemoñetai chira rumo acōi oporavīqui catu vahe rese tēi. Co ñehesa Cristo recocuer resendar ore oromombehu vahe rese rumo pepīhañemoñeta catura. Esepia niha, ahe peroya vahe ité peico.

Ava omano vahe cuerayevīsa

¹² Oromombehu ité niha Cristo cuerayevī agüer resendar pēu. Oime rumo amove pe pāhu pendar, “¿Mahera aipo ocuerayevīra omano vahe yuvīreco viña?” ehiño yuvīreco. ¹³ Ndocuerayevīse ité rumo ava omano vahe viña, Cristo avei evocoyase ndocuerayevīi chietera viña; ¹⁴ iyavei Cristo ndocuerayevīise viña, ore secocuer oromombehu vahe evocoyase ēgüe ehi tēi etera viña. Iyavei pe yeroyasa Cristo rese ēgüe ehi tēi aveira viña. ¹⁵ Acoi ēgüe ehise ité rumo viña, ore avei evocoyase oroñheño tēi etera Tūpa resendar ñehesa rese oroico viña. Esepia, “Tūpa Cristo ombogüerayevī” orohe ité imombehu ava upe oroico. Ndocuerayevīse ité rumo omano vahe yuvīreco viña, ahese Tūpa nombogüerayevīi chiaveira Cristo viña. ¹⁶ Ēgüe ehi eté, acōi omano vahe ndocuerayevīise yuvīreco viña, Cristo avei evocoyase ndocuerayevīi chietera viña; ¹⁷ Tūpa rese pe yeroyasa evocoyase ēgüe ehi tēi vahe itera viña; angaipa pīpe vīteño tēi evocoyase pe recocuer viña. ¹⁸ Iyavei acōi ēgüe ehise ité viña, evocoyase omano vahe Cristo reroyasar, ahe avei ocañi tēira viña. ¹⁹ Ndipoise yasāro vaheṛā Cristo suindar mbahe yamanose, yande evocoyase imbopapri tēi catu itera yaico opacatu ambuae ava sui yuvīreco viña.

²⁰ Cristo rumo supi eté ocuerayevī omano vahe pāhu sui; ahe rane yipīndar ocuerayevī vahe. ²¹ Esepia, ñepeī ava rembiapo sui oime manosa yandeu. Evocoyase ñepeī ava rembiapo sui avei yacuerayevīra. ²² Esepia, inungar acōi Adán rembiapo ai sui ava opacatu omano yuvīreco, ēgüe ehi aveira Cristo rembiapo sui opacatu ava sese yuvīrecoi vahe vīrecoṛa tecovesa yuvīreco. ²³ Ñepeī-peī yandeu imombehusa rupi; yipīndar Cristo ocuerayevī, ichui yande seroyasar yaico vahe yacuerayevī aveira sese acōi ahe oyevīse curi. ²⁴ Ahese oura ari ipa vahe cute. Yipīndar rumo Cristo omocañipara opacatu seco pīrata ēgüe ehi tēi vahe. Ipare omondora opovri pendar Vu Tūpa upe. ²⁵ Ahe rane ité rumo opacatu oporocuaire oico acōi Tu opase voi eté omondo opacatu yamotarēhimbar ipovrive. ²⁶ Ahese ipa manosa opa itera. ²⁷ Esepia, Tūpa osecopi opacatu mbahe imondo ipovrive, “Opacatu ité mbahe secopipri” ehise. Ndahei rumo Tu Tūpa avei secōi ipovrive. Esepia, Tu ité opacatu mbahe osecopi imondo ipovrive. ²⁸ Evocoyase, opase mbahe imondosa

ipovrive, ahe ae evocoiyase oyemondora Vu Tūpa povrive. Tu evocoiyase secoira ivate catu vahe opacatu mbahe sui.

²⁹ Ndipoise omano vahe cuerayevi āgua yuvireco viña, ¿mbahe rese pīha evocoiyase omanose ava, amove chupe nara tēi ambuae oñeapiramo uca yuvireco? Esepia, omano vahe ndocuerayeviise yuvireco viña, ¿mahera ru evocoiyase ahe ava oñeapiramo uca chupe yuvireco? ³⁰ Iyavei ore no, ¿mahera ru evocoiyase oroyemondora mbahe tēi upe ari rupi viña? ³¹ Supi eté, che rivireta, ari yacatu aviye che amano vaherā opacatu co mbahe tēi sui. Ahe pipeve avei rumo che areco ité che viharetesa pe rese yande Yar Jesucristo rese che recose. ³² Oime mbia Efeso pendar mbahe tēi eté oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocuerayeviise rumo yuvireco viña, evocoiyase ichui ndipoi chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoiyase virovara pe reco tupriša” ehi vahe. ³⁴ Pepihañemoñeta tupri iri, peyemboangaipa uca iri eme. Esepia, amove pe pāhu pendar oime ndoicuai vahe ité Tūpa yuvireco. Che aipo ahe ité pēu ‘toyuvinochi che ñehe osenduse yuvireco’ viya.

Yande retecuer cuerayevisa resendar

³⁵ Aviyeteramo pe pāhu pendar oimera oporandu vahe: “¿Mara ehira pīha omano vahe ocuerayevi irise yuvireco coiye? ¿Mara ehi angahura pīha setecuer ahese yuvireco?” ehira yuvireco oyeupe. ³⁶ ¡Pe aipo peye-peye tēi peico! Esepia, mbahe rāhii yañotise, ituyu rane ité sorī āgua. ³⁷ Yañotise mbahe, sāhii rane ité yañoti; ndahei ihī opacatu reseve yañoti. ³⁸ Ipare rumo Tūpa omondo ahe mbahe rāhii upe ihiguā güemimbotar rupi, iyavei ambuae mbahe rāhii yacatu omondo ihiguā. ³⁹ Ndahoyoyai rumo que ñepeī mbahe miti hī ambuae mbahe miti hī rese. Ēgüe yahe avei yande yaico vahe ambuae ité yande rete mbahe mīmba sui; vīrai rete ambuae ité iyavei pira rete ambuae tēi no. ⁴⁰ Ēgüe ehi avei niha, oime iya pendar rete, ivive ava yuvirecoi vahe rete avei no. Iya pendar rete catuprigüer rumo ndahoyoyai eté ivi pipendar rete rese. ⁴¹ Ari rendigüer avei ndahoyoyai yasi rendigüer rese, yasitata rendigüer rese avei. Ñepeī yasitata ambuae yasitata rese ndahoyoyai avei sendigüer yuvireco.

⁴² Ëgüe ehi aveira niha omano vahe cuerayevisa; yañotise sehögüer, ahe ituyu vaheerã. Ocuerayevisa rumo ndituyu iri chietera; apirêhi vaheerã ité secoira. ⁴³ Tehögüer ñotimbrî nimomburusai vahe; coiye ocuerayevisa rumo, imboeteipri ité secoi. Acoi ava rehögüer oñoti vahe yuvireco, nipirata iri eté oico, coiye ocuerayevisa rumo, ipirata itera. ⁴⁴ Supi eté, acoi ava rehögüer ñotisa vahe, ahe co ivi pipendar tēi setecuer. Ocuerayevisa rumo, setecuer iva pendar secoira. Esepia, oime ité ivi pendar setecuer, oime avei iva pendar setecuer.

⁴⁵ Supi eté aipo ehi icuachiapri arachendar pipe: “Yipindar ava Adán serer vahe. Ahe sete upe ombou Tūpa secove āgua co ivi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa iva pendar ava upe imbou āgua. ⁴⁶ Yipindar oime co ivi pipendar tecovesa. Ipare rumo oime co tecovesa iva pendar yandeu. ⁴⁷ Ëgüe ehi yipindar ava ivi sui yapopri, ivi rese nara ité icuaita oico; coiye catu ava ou vahe evocoyase iva pendar. ⁴⁸ Inungar yipindar ava ivi suindar, Ëgüe ehi avei opacatu ava ivi suindar tecovesa rereco yuvireco. Iyavei inungar Jesús iva suindar, Ëgüe ehi aveira opacatu iva suindar tecovesa vireco vahe yuvireco.

⁴⁹ Iyavei inungar cūritei Adán nungar tupri yaico; Ëgüe yahe aveira yande Jesucristo iva pendar nungar tupri yaico curi.

⁵⁰ Che rivireta, co mbahe amombehu potami pēu: acoi ava upe güetecuer reseve, ndiyai eté sei que āgua ivave Tūpa mborerecuasave. Esepia, co yande rete ocañi tēi vaheerã, ndoipisii chira tecocuer apirêhi vahe. ⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara. ⁵² Mimbî moñehese voi yande resapihara inungar yande resapiqui vahe, Ëgüe ehira secuñarosapa yande rete. Aheseve avei omano vahe ocuerayevipara apirêhi vaheerã ité yuvireco; yande evocoyase nayamano vitei vahe, opaño tēira yande rete secuñarosa. ⁵³ Esepia, co yande rete ocañi tēi vaheerã, ahe yande rete niha opara oñecuñaro apirêhi vaheerã yuvireco. ⁵⁴ Ëgüe ehise yandeu, ahese ramo osupitira Tūpa ñehe icuachiapri pipe imombehupri yandeu curi: “Manosa opara imocañisa” ehi vahe. ⁵⁵ Iyavei aipo ehi: “Ndayasiquiye iri chira yande mano āgua. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui” ehi. ⁵⁶ Angaipa niha inungar mbahe popiar omoime vahe manosa yandeu. Moisés porocuita arachendar evocoyase ombou piratasa angaipa upe angaipa aposar mocañi uca āgua. ⁵⁷ Che rumo, “¡Aviye ndeu!” ahe Tūpa upe. Esepia, ahe ombou

angaipa recopi āgua yandeu yande Yar Jesucristo rembiapo sui.

⁵⁸ Sese, che rīvireta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ěgüe ehi tēi vahe.

16

Porrecosa Jesús reroyasar pītivii āgua resendar

¹ Iyavei co guarepochi monuha āgua iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe.

² Domingu yacatu iya pe avei peipeha voimi guarepochi peico pe poraviqui repri sui yapocatu āgua. Eipeve che yepotase, ndapeyemañeco iri chira guarepochi monuha āgua rese peico.

³ Evocoyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso āgua yuvireco ahe pendar yuvirecoi vahe upe. ⁴ Aviyeteramo, iyase cheu, che avei asora aheve. Evocoyase ahe yuvirasora che rupi.

Pablo ipihañemoñeta oguata āgua rese

⁵ Che sose, asora ivi Macedonia rupi, ipare asora pe repia Corinto ve. ⁶ Aviyeteramo apita pucumira pe piri, anise aviyeteramo pe pīrive ité mbahe porañehi che mombitañora.

Ipere pe che pītiviiñomira peye eipeve sui ambuae tecuave che so āgua rese. ⁷ Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri.

⁸ Che rumo cūrítei apitaño vitera cohava Efeso ve, asepia ranera Pentecostés pieta. ⁹ Esepia, oime ité yande Yar upe che poraviquisa aviye vahe ité cohava, yepe setá iteanga ava che amotarēhimbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar. ¹¹ Tipo eme ñepey yepe sepia potaēhisar yuvireco, iya rumo peipītivii catura che piri iyepota tupri āgua rese. Esepia, che iyavei ambuae Jesús reroyasar rese orosāro ité iyepota āgua oroico.

¹² Yande rīvri Apolos upe, “Eso ambuae Jesús reroyasar piri Corinto ve” ahe tēi. Cūrítei rumo niquerēhii oso pe repia; iyase chupe, ahese osora pe piri.

Pablo mahenduhasa ipa vahe

¹³ Pemahemoha peyese; peyemoviracua avei Jesús rese pe yeroyasa pipe. Peñemosaño catu pe cuaita upe. Peicoveño

itera Tũpa pĩratasa pipe. ¹⁴ Opacatu mbahe peyapo pota vahe, peyapora pe poroaisusa pipe ité.

¹⁵ Che rivireta, pe peicua Estéfanas opacatu güeta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri água yuvireco no. ¹⁶ Evocoyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

¹⁷ Pe pãhu pendar Estéfanas, Fortunato iyavei Acaico cohave oyepotase che mboviha yuvireco. Esepia, ahe oyapo ité pe ndapeicatu tuprii vahe apo yuvireco. ¹⁸ Ahe che monguerẽhi catu yuvireco, ãgüe ehi avei revo pẽu no. Pemboeteira evocoi nungar ava peico.

¹⁹ Jesús reroyasar Asia pendar opacatu ombou omahenduhasa yuvireco pẽu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sêtave yuvireco, ahe avei ombou omahenduhasa yande Yar rer pipe yuvireco pẽu. ²⁰ Opacatu Jesús reroyasar coha pendar avei omondo omahenduhasa yuvireco pẽu. Peyeovaupite catu pe reco maranehisa pipe ahe mahenduhasa mombehu peyeupe pe viharetasave.

²¹ Che Pablo, che po pipe ité aicuachía co che mahenduhasa imondo pẽu.

²² Acoi ava ndosaisui vahe yande Yar Jesucristo, ahe tocañi mbahe tẽi pipe. ¡Toyevi pihaivi voi yande Yar ou!

²³ Yande Yar Jesucristo tape rovasa ité yepi. ²⁴ Pẽu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pẽu.

IMONUVIRIOSA PABLO REMBICUACHIA CORINTO PNDAR UPE CORINTIOS

Pablo mahenduhasa Jesús reroyasar Corinto pndar upe

¹ Avirave, opacatu Jesús reroyasareta Corinto pndar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachía che ñehe pëu. Co yande rivri Timoteo avei omondo omahenduhasa pëu. ² Tapeipisi catu yande Ru Tūpa, yande Yar Jesucristo porovasasa avei pe reco tupri água.

Pablo paraisu agüer resendar

³ Yamboeteiño itera yande Ru Tūpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mboviha água yepi. ⁴ Ahe niha yande mbovihaño opacatu yande paraिसusa pipe, yande avei evocoyase yaicatura ava iparaisu vahe mboviha água yuvireco. Ëgüe ehi eté Tūpa imbou vihasa yandeu, ahe avei yande yamondora yuvireco chupe. ⁵ Esepia, inungar Cristo imombaraisupri secoi, Ëgüe yahe aveira imombaraisupri yaico yaicose sese. Cristo sui avei rumo oime itera vihasa yandeu. ⁶ Ore paraisu pe mboviha água ‘toñepisiro yuvireco’ ore yapave. Iyavei Tūpa ore mboviha pe mboviha água avei. Supi evocoyase pe peñemosañora mbegüe rupi ore paraisu agüer nungar tupri pe recose. ⁷ Ore oroyeroya ité Tūpa pe pítivi água rese. Esepia, oroicua ore paraisu agüer nungar tupri peico, Ëgüe peye avei peipisi ore vihasa Tūpa suindar.

⁸ Che rivireta, opomomahenduha pota mara orohe oroico ivi Asia rupi. Ore recoãhasa yavai vahe ité oime aheve oreu. Ndroicatu iri eté oroñemosa ore pĩrataëhise chupe, seni orepihañemoñeta: “Yamanoño itera co mbahe-mbahe tēi pipe” orohe viña. ⁹ Supi eté oromoha ore cañi tēi água viña, Ëgüe ehi rumo oreu oroyeroya catu água Tūpa rese, ndahei oreyese tēi. Esepia, ahe oporombogüerayevi vahe secoi. ¹⁰ Ahe niha ore repi ore mano rãgüer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui, ¹¹ pe ore pítiviise peye pe yeroqui pipe. Ahese setá, “Aviye ndeu” ehira yuvireco Tūpa oporopítiviisa ombou vahe rese oreu setá yeroquisa sui.

Mbahe sui Pablo ndosoi Corinto ve

12 Oime mbahe ore mboviharere vahe: ore piha pipe ité oroicua oroico tupri Tūpa suindar ore reco catuprisa pipe, ore pihañemoñeta tuprisa pipe avei co ivi pipendar ava rembiepiave, pe rembiepiave avei eté. Tūpa porovasasa pipe niha ěgüe orohe, ndahei ava co ivi pipendar mbahecuaasa pipe tēi. 13-14 Esepia, che ñehe aicuachía vahe imondo pēu, aicuachía ñepei reseve pe yeroqui tupri āgua, pe senducua tupri āgua avei no. Iyavei ore cua revo chíhi peye cute. Acoi yande Yar Jesús yevise curi, ahese peyemboviharera ore rese, inungar ore oroyemboviharera pe rese.

15-16 Sese yipindar supi eté che pihañemoñeta aso vaheṛā ñuvirío yupagüer pe repia, pe mboviharera catu āgua viña. Ęgüe ahe ité, che pihañemoñeta pe piri rane che so āgua che guatasa rupi Macedonia ve. Ichui ayevi pota iri pe piri viña, ipare pe che pitivimira peye ivi Judea rupi che so āgua rese viña. 17 Ndachepihañemoñeta voiño tēi che so āgua, ndahei iporombopa serai vahe aico “che co mbahe ayapora” ehi tēi vahe, ipare rumo nomboaviyei eté. 18 Tūpa rumo oicua ore ndahei, “Aviye” ore he voisa pēu, ahe pipeve avei, “Aní” ore hesa. 19 Esepia, Tūpa Rahir Jesucristo avei ñepei reseve vahe ité yayeroyá vahe sese. Ahe secocuer niha oromombehu oroico pēu, che, Silvano, Timoteo avei. 20 Esepia, opacatu Tūpa remimombehugüer imboaviyasa sese. Sese niha serer pipe, “Ęgüe tehi” yahe Tūpa upe imboeteisave. 21 Tūpa niha opacatu yande momirata seseño ité yande reco āgua, yande poravo avei. 22 Güerer omondo yande rese ‘cheu nara’ oyapave. Ombou avei oEspíritu yande piha pipe ‘ipipe toicua che remimombehugüer rupi tupri ité mbahe amondora chupe yuvireco curi’ oyapave.

23 Tūpa niha oicua acoi ndayevise Corinto ve pe piri, ěgüe ahe pēu mbahe aviye āgua rese. 24 Ndahei opocuai pota mbahe pe rembieroyarā rese. Esepia, pe Tūpa rese pe yeroyasa pipe peyemoviracuaño ité Cristo rese. Ore rumo oroipota pe pitivisa pe yemboviharera āgua.

2

1-2 Co rese ndaso catu iri pe piri. Esepia, che aso irise pe piri ndopomboviharera catui chira viña, ¿ava vo evocoyase che mboviharera viña? Pe ité niha che mboviharera peico. 3 Sese che aicuachía ñehesa ipirata vahe pēu cuese. Esepia, ndaipotai eipeve che sose, che mboviharera ěgua peye. Pe rumo iya ité che mboviharera catura peye viña. Che ayeroya ité opacatu pe rese aviharetese, pe avei evocoyase opacatu peviharetera che rese. 4 Supi eté che aicuachiasa che ñehe pēu, che ae ayepihamboasi ité, ayaseho avei. Esepia, aicuachía vahe pēu

ndahei pe mbovibaēhi āgua, che rumo aicuachía ‘toicua che guaisu eteprisa yuvireco’ che yapave pēu.

Oime ñerosa ava upe mbahe sembiavi rese

⁵ Acoi yande rivri omoime uca vahe viharēhisa co mbahe tēi apo pipe, ndahei che güeraño ndache mbovihai, pe avei rumo seni opacatu ēgüe peye. Che, “Seni” aipo ahe ité pēu. Esepia, ndaipotai che ñehe rasi āgua. ⁶ Co mbia upe setá mbahe peiporara uca ité, evocoi rupive iya ēgüe peye chupe. ⁷ Co suive ité rumo peñerora chupe, peipitivi aveira. Esepia, aviyeteramo oviharēhisa pipe oyemocañi tēira. ⁸ Sese cūritei opomonguerēhi ité pe mboyecua iri āgua pe poroaisusa chupe. ⁹ Cuese ambuae che ñehe aicuachía co che pe mbohesa resendar pēu pe recoāha āgua, “¿Oyapo itera pīha che remimombehu yuvireco?” ahe pēu. ¹⁰ Cūritei cheñero avei que ava upe peñero vahecuer upe. Esepia, oimese que mbahe rese che ñero āgua, Cristo rovaque ēgüe ahe pe raisusave ¹¹ Carugar yande mbopaēhi āgua. Esepia, yande yaicua tupri ité iporombopasa.

Tecua Troas ve Pablo nombohe catui opihañemoñetasa

¹² Ayepotase tecua Troas ve Cristo recocuer mombehu āgua, oime ité yande Yar upe nara aheve che poraviqui āgua viña. ¹³ Nambohe catui rumo che pīhañemoñetasa. Esepia, ndasepiai eté yande rivri Tito. Sese, che, “Aviye” ahe pare ava Troas pendar upe, asoño ivi Macedonia rupi.

Cristo rese yaicose, yaicatu mbahe tēi recopi

¹⁴ Aviye yande Ru Tūpa upe. Esepia, yande Cristo rese yaico vahe yande renose oamotarēhimbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe sīacua vahe yasētu vahe opacatu rupi. ¹⁵ Esepia, inungar itaisi sīacua vahe opacatu rupi, ēgüe yahe avei yande Tūpa upe Cristo yande reropovēhese yaico ava ipīsiropirā upe, ava ocañi tēi vaherā upe avei. ¹⁶ Ahe ava ocañi tēi vaherā upe evocoi ñehesa yaru vahe inungar cañi tēisa resendar; ava ipīsiropirā yuvirecoi vahe upe rumo evocoi ñehesa ombou tecovesa. Yande ae tēi rumo ndayaicatui evocoi nungar mbahe apo. ¹⁷ Ore rumo ndahei setá ambuae ava nungar tēi oroico. Esepia, oromombehuse Tūpa Ñehengagüer, ndahei mbahe pisi āgua tēi rese ēgüe orohe, ore rumo ore pīhañemoñeta tuprisa pipe oromombehu co ñehesa Tūpa rovaque Cristo rese ore recosa pipe. Esepia niha, ore semimondo oroico.

3

Ñehesa Tũpa remimbotar ipiasu vahe resendar

¹ Ore aipo orohese, aviyeteramo pẽu ndoyavii oroyecomboivate ai pota iri viña, ẽgũe ndorohei rumo iyavei ndorosecai icuachía ãgua ava ñehesa aviye vahe ore recocuer resendar oromondo vaheã pẽu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi. ² Esepia, pe ité inungar ore rembicuachía ore recocuer resendar ore oroipota vahe, ẽgũe peye peico ore piha pipe. Esepia, opacatu ava pe reco tupri repiase, oicua ore poraviqui tupri sa pe pãhuve yuvireco. ³ Pe niha pemboyecua pe reco tupri pipe ore rembiapo Cristo porocuita pipe pe pãhuve. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta pipe ité icuachiapri itape rese, Espiritu Tũpa oicove vahe suindar pipe rumo yapopri ava piha pipe.

⁴ Oroyeroya ité co rese Tũpa rese ore yeroyasa pipe. Cristo niha ẽgũe ehi oreu. ⁵ Ndahei oreyesui tẽi oroicatu co mbahe apo. Tũpa rumo ombou oreu opacatu co mbahe apo ãgua. ⁶ Ahe niha ombou opĩratasa oreu gũemimbotar ipiasu vahe rese poraviqui ãgua, ndahei Moisés rembicuachiagũer rupi oroporaviqui. Esepia, ahe imboaviyeẽhisa pipe yamano tẽira viña. Ahe rumo Espiritu Tũpa suindar pipe oroporaviqui. Esepia, ahe ombou tecovesa yandeu.

⁷ Co Moisés recosendar porocuita icuachiasa ité itape rese, iyavei Tũpa reco porañetesa pipe ou. Israelita evocoyase Moisés rova rese nomahe catui eté yuvireco. Esepia, sendi iteanga, yepe sendigũer ogũe mbegũeño oso viña. Ahe Moisés recosendar porocuita ava upe manosa tẽi gũeru vahe iporañete ai eté yipindar oico viña. ⁸ ¡Cũritei rumo iporañeté catu ité ñehesa Tũpa remimbotar ipiasu vahe resendar Espiritu Santo ombou vahe yandeu! ⁹ Supi eté yepe iporañete ai eté Moisés porocuita acoi gũeru vahe manosa yandeu viña, ¡co ñehesa ipiasu vahe rumo yande reco moingatu vahe iporañete catu ité ichui! ¹⁰ Esepia, co yipindar porañete vahe ndahoyoyai ñehesa cũriteindar porañete catu vahe rese. ¹¹ Acoi mborocuita yipindar ndipocopiimi vahe virecose Tũpa reco porañetesa, co ñehesa piasu ipocopi vahe rumo iporañete catu itera ichui.

¹² Ore oroyeroya ité co ñehesa ipocopi vahe rese. Sese oroñehe ava upe ore siquiyeẽhisa pipe ité. ¹³ Ore rumo ndahei Moisés nungar oroico. Esepia, ahe oyovapi turucuar pipe omu israelita sui gũepiãhi ãgua ndogũe viteise sendigũer ichui aracahe. ¹⁴ Ẽgũe ehi ahe ndosenducua ucai eté ndoyavii sovapisa vite vahe cũritei, ẽgũe ehi vite oyeroquise Moisés

porocuaita icuachiapri yipindar vahe pipe yuvireco. Ñomipri vahe nungar tēi chupe ahe senducuaēhi pipe. Esepia, Cristo güeraño ité oicatu sovapisa nungar rerocua ichui senducua uca āgua chupe. ¹⁵ Ēgüe ehi vite cūrítei, senducuaēhi pipe Moisés porocuaita pipe oyeroqui viteño tēi eté yuvireco inungar sovapisa vite vahe. ¹⁶ Supi eté que ava oyevise yande Yar upe, aheseramo serocuasa sovapisa nungar ichui senducua tupri āgua. ¹⁷ Esepia niha, yande Yar Espiritu secoi. Ahe Espiritu ava rese secoise, ndahe iri mbiguai nungar yuvirecoi. ¹⁸ Sese opacatu yande ndahei Moisés oyeovapi vahe nungar yaico Tūpa porañetesa sendiyai vahe repiaēhi āgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, ēgüe yahese, yareco catu-catu iri seco porañetesa yandeyese. Yande Yar rumo acoi Espiritu secoi vahe ēgüe ehi yandeu.

4

¹ Sese, “Ndorequerēhi iri” ndorohei eté. Esepia, Tūpa ore poravo ore paraisuerecosa pipe ore poraviqui āgua co ñehesa rese. ² Ore rumo oroseyapa opacatu mbahe tēi ore chī aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñehengagüer ndorosecuñaro-ñaro tēi. Ore rumo oroñehe tupri mbahe supi tupri vahe rese güeraño. Ēgüe orohe opacatu ava upe Tūpa rovai ‘Supi eté, tehi yuvireco opiha pipe’ ore yapave. ³ Yavaise co ñehesa pīsirosa resendar ore remimombehu renducua āgua, ahe ēgüe ehi ava ocañi tēi vaherā upe. Ahe aviye oyeovapi vite vahe. ⁴ Esepia, supi eté caruguar rerecuar inungar nomboesapiso vahe ahe ava yuvireco, sese ndosenducua ucai chupe ‘toviroya eme ñehesa Poropīsirosar Cristo resendar porañete vahe’ oyapave. Ahe niha Tūpa recocuer mboyecuar secoi. ⁵ Esepia, oromombehuse ñehesa pēu, ndahei ore yese tēi. Ore rumo, “Jesucristo yande Yar secoi” orohe oroico. Ore evocoyase mbiguai nungar tēi oroico pēu Jesús raisupave. ⁶ Esepia, Tūpa aipo ehi aracahe: “Toime tesapesa pītumimbi vahe resape āgua” ehi. Ahe avei osesape uca yande piha pipe ‘ipipe toicua che porañetesa che Rahir Cristo recocuer rese oime vahe yuvireco’ oya.

Yaicora Cristo rese yande yeroyasa pipe ité

⁷ Co tesapesa nungar porañete vahe Tūpa suindar rumo yareco yande retecuer pipe, inungar-ra que mbahe sepirusu vahe yapocatupri ivi mbahemoinda ndipocopi vahe pipe tēi

viña. Ipípe toicua opacatu ava yuvireco co pĩratasa Tũpa suindar, ndahei oreyesuindar tẽi. ⁸ Yepe mbahe-mbahe tẽi oime opacatu rupi oreu viña, oimeño ité rumo ore sã ãgua ichui. Yepe orepihañemoñeta-ñeta tẽi mbahe rese, yande Yar rese ore pihañemoñetasa rumo ndoromocañii eté oreyesui. ⁹ Yepe ore reca-reca catu tẽi ore amotarẽhimbar yuvireco viña, Tũpa rumo ndore reyai eté; iyavei yepe ore reiti ore recopi ãgua yuvireco viña, aní eté rumo. ¹⁰ Opacatu ore guatasa rupi rumo orovirecoño ité Jesús mara-mara tẽi sereco agüer ore mano ãgua oreyese, “Toyecua avei secocuer ore rese” ore hesave. ¹¹ Esepia, ore recove vitesese imboguaipri oroico ore mano ãgua Jesús rese. Ëgüe orohe secocuer mboyecua ãgua ore retecuer ndipocopi vahe rese. ¹² Evocoiyase co ñehesa mombehu pipe ore manosa ore ropeña, ipípe sui rumo pesopeña tecovesa apirẽhi vahe peico seroyasa pipe.

¹³ Icuachiapri aracahendar pipe niha aipo ehi: “Ayeroya ité Tũpa rese, ipípe sui añehe” ehi; Ëgüe orohe avei ore, sese oroyeroya ité, ichui oroñehe. ¹⁴ Esepia, yaicua niha acoi Tũpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu pe reseve oyeipive yande rerecora. ¹⁵ Co opacatu mbahe tẽi oime vahe oreu, pẽu mbahe aviye ãgua rese niha ‘tovireco catu Tũpa porovasasa yuvireco; ipípe sui, Aviye ndeu, tehi setá catu ava imboetisave yuvireco chupe’ ore yapave.

¹⁶ Sese orequerẽhiño ité mbahe apo oroico pẽu. Yepe ore rete ocañi pota tẽi viña, ore recocuer rumo Tũpa ombopiasu-asuño ité ari yacatu rupi. ¹⁷ Esepia, co mbahe oroiporara vahe co ivi pipe, ahe Ëgüe ehi raimi tẽi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirẽhi orovireco vaherã. ¹⁸ Sese ore ndorepihañemoñeta atii chira co ivi pipendar mbahe rese; ore rumo orepihañemoñeta mbahe iva pendar ndayasepia vahe rese. Esepia, co mbahe yasepia vahe, ahe Ëgüe ehi raimi tẽi vahe; co mbahe rumo ndayasepia vahe, apirẽhi vaherã ité.

5

¹ Yaicua niha yande retecuer ndipocopi vahe, inungar oi ndipocopi vahe avei. Sese imocañisase, aviyeño. Esepia, Tũpa opa omoingatu ambuae yande rete ndopai vahe ivave yandeu. Ndahei ahe ava rembiapo tẽi. ² Supi eté yaicove vitesese co yande rete ndipocopi vahe rese, yande poãsesa pipe yaipota ité yande rete iva pendar. ³ Aheve yande rete ipiasu vahe yarecose, ahese ndahei chira yande hã nani tupri vahe nungar yuvirecoira. ⁴ Ëgüe ehi eté yande retecuer pipe vite yaicose, yande poãse yande viharẽhisa pipe.

Esepia, ndayaipotai yande hã nani tupri vahe nungar seco ãgua, yande rumo yaipota yande retecuer ipiasu vahe, ndopai vahe. Evocoyase, “Tocañipa co mbahe ocañi tẽi vaheã yande resendar tecovesa piasu, ndopai vahe rereco ãgua” yahe. ⁵ Tũpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya.

⁶ Sese niha yayeroyaño ité yepi; iyavei yaicuaño yande yaicove vitesse yande rete rese, ndayaico vitei eté ivave yande Yar piri. ⁷ Esepia, cũritei yande Yar rese yeroyasa pıpe ité yaguata, ndahei mbahe yande rembiepia pıpe. ⁸ Yande rumo yayeroyaño ité sese, iyavei yaipota ité yande retecuer reya ãgua yande Yar piri yande so ãgua ivave. ⁹ Sese yaseca yande Yar mbovıha ãgua yepi, que yaicove vitesse yande rete rese, anise que yasẽse ichui. ¹⁰ Esepia, yande opacatu yañecuavẽhera Cristo rovai iporandusave yaipısi vaheã ñepeipei mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitesse.

Ñehesa yande reco moingatusa resendar

¹¹ Ore niha oroicua yande Yar sui ore siquiye ãgua imboyeroyasave. Sese orosãha ava pıhañemoñeta rerova Tũpa rese ipıhañemoñeta ãgua yuvireco. Tũpa niha ore cua tupri, tapeicua avei ru ore recocuer. ¹² Ndorofnehei pẽu ore yemboivate ai ãgua tẽi. Ore rumo oroñehe pẽu ‘tovıharete catu ore rese yuvireco’ ore yapave. Ipipe sui peicatura ava güembiepia rese tẽi oyemboivate ai vahe upe iñehe mboyevi ãgua. Esepia, ahe ndahei ava pıha pıpendar rese oyembovıha yuvireco. ¹³ Ndayaracuai vahe nungar ore rerecose amove pe pãhu pendar yuvireco. Tũpa upe rumo ãgũe orohe oroico. Yaracua vahe nungar rumo, ore rerecose peye, pẽu mbahe aviye ãgua rese ãgũe orohe. ¹⁴ Cristo poroaisusa, ahe ité ore reroguata catu. Esepia, supi eté ahe omano opacatu ava repıã, ipipe sui yaicua opacatu ava ocañi tẽi vaheã yuvireco viña. ¹⁵ Cristo niha omano opacatu yande repıã. Yande yaicove vite vahe evocoyase ndahe iri yandeyeupe nara tẽi yaico; yande rumo yaico chupe nara ité. Esepia, ahe omano, ocuerayevi yande rese. ¹⁶ Sese, iya ité oreu ore pıhañemoñetañhi iri ãgua que ava rese, ava tẽi pıhañemoñetasa rupi. Yepe yıpındar inungar ava ivı pıpendar tẽi ãgũe orohe ore Cristo rese ore pıhañemoñeta oroico viña, cũritei rumo ãgũe ndorohe iri orepıhañemoñeta sese. ¹⁷ Evocoyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yıpındar vahe sese. Opacatu ité oyembopiasu iri.

18 Co mbahe opacatu Tūpa oyapo yandeu, ahe niha Cristo rembiapo sui yande recocuer moingatu oyeupe nara. Ipare oreu avei ombou co ñehesa mombehu āgua ambuae ava upe secocuer moingatu āgua avei. 19 Aipo oyapave aipo ehi: Tūpa ombou Guahir Cristo co ivi pipe ava recocuer moingatu āgua ‘toyevi cheu’ oya; ipipe sui avei ahe ava angaipagüer omocañi yuvireco ichui. Ore evocoiyase ore cuai ahe ñehesa ava recocuer moingatusa resendar mombehu āgua ava upe. 20 Ore evocoiyase Cristo porocuita rupi oroñehe vahe oroico, inungar Tūpa ité oñehera pëu viña. Sese, “Peyevi Tūpa upe, ahe pe recocuer moingatura oyeupe nara” orohe Cristo rer pipe pëu. 21 Yepe Cristo ndoyapoi eté angaipa, Tūpa rumo vireco uca angaipa viyar nungar yande repirã yande reco ïvi āgua Cristo rupi yande guatase.

6

1 Ore pe mboetasa co Tūpa upendar mboraviqui resendar ore recosa pipe: “Peicua catu, pemocañi tēi rene Tūpa porovasasa peipisi vahe” orohe pëu. 2 Esepia, Tūpa aipo ehi icuachiapri aracahendar pipe:

“Acoi ari aviye vahe pipe niha che asendu pe yeruresa; iyavei ahe ari poropisirosa pipe opopitivi” ehi.

¡Ahe ari oyepota cute! iyavei oime ité cūrítei ñepisirosa.

3 Ore niha ndoromboyecuai ore reco ai ava pāhuve. Esepia, ndoroipotai que ava Tūpa upe ore poraviquisa rese iñehe rai āgua yuvireco. 4 Ore rumo oromboyecua ité Tūpa rembiguai ore recosa. Esepia, ore reco mbegüesa pipe oroñemosañi mbahe-mbahe tēi upe yepe ipane mbahe oreu viña, iyavei mbahe yavaise; 5 ěgüe orohe avei ore nupanupase, ore roquendase avei iyavei omonguerēhise ava rehi ore amotarēhi āgua yuvireco. Oroyapo avei mboraviqui ipirata vahe; amove ndoroquei eté, setá rupi ndoreriepoi tēi avei. 6 Oromboyecua avei ore reco maranehisa, ore mbahecuasa supi eté vahe, ore reco mbegüe tuprisa, yeaisusa orovireco avei no. ěgüe orohe ité niha Espiritu Santo pīratasa pipe, ore poroaisusa supi eté vahe pipe avei. 7 Ore remimombehu supi eté vahe pipe iyavei Tūpa pīratasa pipe avei oroico. Ore niha ore reco tupri pipe orosecopi mbahe-mbahe tēi. Ipipe avei oroyoepe. 8 Amove ava ore mboetei ai, amove rumo oñemoiro yuvireco oreu; amove avei oñehe tupri ai ore rese yuvireco, ipare rumo iñehe-ñehe tēi ore rese yuvireco yepi no. Iyavei amove oporombopa tēi vahe nungar ore rereco yuvireco, yepe oromombehu tēi mbahe supi eté vahe viña. 9 Amove ndicuasai vahe nungar tēi ore rereco yuvireco, icuapri ité tie oroico viña; amove ore yuca seni yuvireco,

oroicoveño ité rumo; iyavei amove ore mombaraisusa catu tēi, ndore yucaí eté rumo ipipe yuvireco. ¹⁰ Amove ndoyavii ndorovihaí vahe yuvireco chupe, ore rumo orovihaño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tūpa suindar oime oreu.

¹¹ Che rivieta Corinto pendar, ore ñehesa pipe opacatu mbahe oromboyecua pēu iyavei pe raisu āgua orovireco ore piha pipe tuvichá pe rese. ¹² Ndorehāpisii pe rese pe raisu āgua; pe rumo ēgüe ndapeyei ore rese. ¹³ Che niha opovireco che rahir nungar; pemboyevi avei catu ore pe raisusa oreu.

Tūpa oicove vahe rēta nungar ité yaico

¹⁴ Ndapeyovaichoi chira ava Tūpa ndoviroyai vahe rese. Es-epia, ndoyoyai eté pe pihañemoñetasa. Ēgüe ehi eté teco ívisa ndoyoyai teco rai rese inungar tesapesa ndoyoyai pītumimbi vahe rese. ¹⁵ Ndahoyoyai eté niha Cristo pihañemoñetasa Carugar pihañemoñetasa rese yuvireco. ¿Oyoya tie Tūpa reroyasar Tūpa reroyasarēhi rese yuvireco? ¡Aní eté! ¹⁶ ¿Oyoya tie mbahe rahanga tēi Tūpa rēta rese? Yande niha Tūpa oicove vahe rēta nungar ité yaico. Ahe ité niha aipo ehi icuachiapri pipe aracahe:

“Che aicovera seseve iyavei aguatará ipāhu rupi yuvireco; che avei aicora iTūpa ité; ahe evocoyase cheundar yuvirecoira” ehi.

¹⁷ Iyavei aipo ehi:

“Sese peyepipi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

¹⁸ Che aicora pe yesupa; pe evocoyase peicora che rahir, che rayri avei’ aipo ehi yande Yar güeco pīratasa pipe” ehi.

7

¹ Che rivieta, che rembiaisu, co Tūpa remimombehu imboaviyepirā yandeu. Sese yande yamoiñgatu tuprira yande recocuer chupe yarecoēhi āgua yande retocuer iyavei yande espíritu mbahe tēi pipe. Iyavei Tūpa mboeteisa pipe yasecara yande reco catupri āgua chupe nara güeraño ité.

Corinto pendar ava recocuer recuñarosa resendar

² ¡Che pisi peye pe piha pipe! Ndoroyapoi niha mbahe tēi que ava upe, ndoromomaraí eté que ava recocuer, ndoropombopai avei. ³ Ndahei pe recocuer rese che ñehes raisave aipo ahe pēu. Supi eté yipindar, “Che pihave ité opoaisu, pēu nara avei aicove, amano aveira pēu” ahe acoi pēu cuese.

⁴ Ayeroya ité pe rese, pe rese avei aviharete. Che paraisu pãhuve ayemonguerēhi iyavei ayembovihareteño.

⁵ Ore yepotasa suive rumo Macedonia ve, ndopituhui eté mbahe tēi ore sui; oime viteño ité rumo mbahe-mbahe tēi oreu opacatu rupi: oime ore amotarēhimbar iyavei oime ore yepihamondiisa. ⁶ Tūpa rumo, ava ndoyemonguerēhi vahe, omonguerēhi iri yepi. Ahe ore monguerēhi catu iri Tito yepotase. ⁷ Ndahei rumo Tito yepotaseño oroviharete, ahe avei oyemboviha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharēhi agüer cheu, pemahenduhaño ité aipo che rese pe che raisusave yepi. Aipo nungar renduse ayembovihá catu.

⁸ Yepe che ñehe aicuachía vahecuer imondo pēu ndape mbovihai viña, cheu rumo aviyeño cūrítei. Yipindar rumo ayepihamboasi aicuase che ñehe tasí iteanga vahe pēu; chñhi rupi tēi rumo ndapevihai peyeroqui pare sese. ⁹ Cūrítei che avihareté. Ndahei rumo pe viharēhisa rese ēgüe ahe. Esepia, co pe viharēhisa sui pemboasi pe angaipa Tūpa upe pe yevi āgua, evocoi nungar Tūpa oipota. Evocoyase ore ñehe ndoyapoi mbahe naporai vahe pēu. ¹⁰ Esepia, co nungar viharēhisa Tūpa oipota vahe yande angaipa mboasi uca, chupe yande yevi āgua. Ipipe sui niha yañepisiro yande pihañemoñeta rerovaēhisa pipe. Co ivi pipendar tēi viharēhisa rumo manosa tēi vireco yandeu. ¹¹ Pe rumo peñemosañe pe viharēhisa upe; ahe aviye Tūpa upe. ¡Pesepia ru co mbahe aviye vahe pe recocuer pipe oime vahe evocoi Tūpa remimbou pe viharēhisa sui cute! Supi eté rumo, peyapisaca iyavei pe querēhisa pipe peyoepi, pemboasi pe piha pipe ité co mbahe tēi oimese pe pãhuve, iyavei peyembosiquiye peico. Ichui che repia pota ité peye, iyavei pequerēhi ité mbahe moingatu āgua. Sese pemboyepepi ité evocoi mbahe tēi aposar peyesui. Che aicua cute pēu ndahei pe piha rupi co nungar mbahe tēi oimese. ¹² Cuese aicuachiasse evocoi che ñehe imondo pēu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tūpa rovaque. ¹³ Co rese ore oroyemboviharete.

Iyavei oroviha catu Tito yembovihasa repiase. Esepia, pe avei niha opacatu pemboviha catu ité pe recocuer pipe. ¹⁴ “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipipe nachí eté. Inungar oromombehu mbahe supi tupri vahe pēu yepi; inungar tupri avei supi eté mbahe oromombehu vahe pe rese yeroyasave Tito upe. ¹⁵ Iyavei cūrítei ahe pe raisu catu ité pe rese omahenduhase opacatu pe poreroyasa rese. Iyavei peipisi tupri

ité imboeteisave sereco. ¹⁶ ¡Ayeroya ité pe rese, sese aviha ité!

8

Ava querēhisa porerecosa mondo āgua Jerusalén pendar upe

¹ Che rivireta, cūrītei che amombehu potami pēu mara ehi mbahe tupri apo Tūpa ava viroyasar upe ivi Macedonia rupi. ² Yepe ahe ava recocuer yavai eté yuvireco chupe secoāhasa pipe viña, ovihareteño rumo ipipe yuvireco; yepe iparaisu vahe pāve tēi, iporerecoño ité rumo yuvireco. ³ Supi eté oquerēhisa pipe omondo ité ocatugüer rupi; amove oseca iri mbahe güemimbotar rupi yuvireco. ⁴ Ahe, “Ore avei catu toroipitivi ambuae Tūpa reroyasar” ehi yuvireco. ⁵ Ahe rumo oñocua iri ore pihañemoñetasa yuvireco. Yande Yar upe rane oyemondo. Ipare Tūpa remimbotar rupi ēgüe ehi avei oreu yuvireco. ⁶ Evocoyase ore aipo orohe Tito upe pēu: “Tomboyeapi iri co porerecosa monuha āgua ava upe” orohe. Esepia, yipindar ahe oose pe pāhve, ahe pe pītivi imboipi āgua. ⁷ Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tūpa ñehesa, pereco ité Tūpa suindar mbahecuasa, pequerēhi ité Tūpa upe mbahe apo āgua iyavei ore raisu ité peye. Evocoyase ēgüe peye aveira co nungar poroaisusa apo.

⁸ Ndahei pe cuaisa pipe aipo ahe pēu, che rumo ‘toicua ambuae ava rembiapo oquerēhisa pipe oyapo vahe yuvireco’ che yapave. Sese niha peicuara, supi eté vahe pīha pe poroaisusa. ⁹ Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya ombahe pe recocuer rese; iparaisu pipe sui niha pe iva pendar mbahe pereco.

¹⁰ Pēu mbahe aviye āgua che añehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querēhisa pipe peyapo. ¹¹ Cūrītei pemboaviye catu pe porerecosa pe querēhisa yipindar pe reco vahe pipe; pemondoñora mbahe peicatugüer rupi. ¹² Esepia, acoi que ava omondo pota vahe mbahe, Tūpa oipisi ahe iporerecosa que mbahe virecomi vahe; ahe rumo ndoporandui mbahe ndayarecoi vahe rese yandeu.

¹³ “Toyemombaraisu ava pītiviisa pipe yuvireco” ndahei rumo pēu. ¹⁴ Cūrītei mbahe pe rembiereco eta pipe peipitivi catu ambuae ava ipane vahe mbahe yuvireco chupe. Virecomise mbahe, ahe avei pe pītivira yuvireco pēu mbahe ipanese. Evocoyase pe recocuer oyoya tupri itera. ¹⁵ Inungar Tūpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acoi moviromi tēi mbahe omonuha vahe, nipanei mbahe chupe” ehi.

Pablo omondo Tito indugüer reseve Corinto ve

¹⁶ Aviye Tüpa upe ombopihañemoñeta Tito pe rese inungar che pihañemoñetasa pe rese yepi. ¹⁷ Ahe viroya ité che ñehe. Güemimbotar rupi eté rumo iquerēhi oso āgua pe repia.

¹⁸ Supi oromondo yande rivri, ahe opacatu ambuae Jesús reroyasar oicua iporaviqui tupri aise ñehesa p̄sirosa rese yuvireco. ¹⁹ Sese opacatu oiporavo yuvireco ore rupi iguata āgua ore p̄tivii vaherā avei co porerecosa reraso āgua. Ore ěgüe orohe oroico yande Yar mboetei āgua rese ‘toicua ore querēhisa pipe ité oroporop̄tivii yuvireco’ ore yapave. ²⁰ Ore ndoroipotai que ava oñehe tēira ore rese yuvireco co porerecosa monuhasa pipe sui. ²¹ Esepia, ore oroyapo pota mbahe aviye vahe, ndahei Tüpa rovaque güeraño, opacatu ava rembiepiave avei.

²² Supi avei oromondo ambuae yande rivri. Ahe omboyecua ité oreu oquerēhisa opacatu mbahe güembiapo pipe. Ahe cūrteitē iquerēhi catu ité. Esepia, oyeroya ité pe rese. ²³ Acoi oporanduse que ava Tito rese yuvireco p̄u, “Ahe oyoya Pablo rese oporaviqui vahe pe p̄tivii āgua” peyeñora. Acoi oporanduse avei ambuae yande rivri rese yuvireco p̄u, “Ahe ambuae Jesús reroyasareta remimbou Cristo mboeteisar yuvirecoi” peyeño aveira chupe. ²⁴ Sese, pe recocuer cua āgua, pemboyecua catu pe poroaisusa supi eté vahe chupe yuvireco. Evocoyase toviroya ité che ayeroyase iyavei ayembovihase pe recocuer rese yuvireco.

9

Porerecosa imonuhapri Jesús reroyasar upe

¹ Porerecosa imonuhapri Jesús reroyasar upe nara rese rumo nañehe iri p̄u. ² Esepia, che aicua pequerēhi ité ip̄tivii āgua. Evocoyase che viharetesa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta p̄tivii āgua cuese ambuae araviter suive yuvireco” ahe yuvireco chupe. Evocoyase pequerēhise ité ip̄tivii āgua, ahese setaño ité oyemonguerēhi yuvireco. ³ Che rumo amondo co yande rivri yuvireco p̄u cūrteitē ‘ěgüe tehi tēi eme che ñehesa aviye vahe sesendar yuvireco’ viya p̄u. Pe yemoingatu tupri āgua ité aipo ahe p̄u; ⁴ aní acoi arasose Macedonia pendar cheyeupi, sembiepiave ndapeyemoingatu vitei chira peico. ěgüe peyese ore mochi guasu uca tiētera peye. Esepia, che ayeroya ité pe rese. Pe avei evocoyase pechīra. ⁵ Sese che pihañemoñeta yipindar añehe co mbosapi yande rivri upe yuvireco, ahe ranei ore renonde yuviraso āgua pe piri pe p̄tivii āgua co porerecosa aviye

vahe monuha āgua rese, acoi cuese pe remimombehugüer rupi. Evocoyase ahe pe porerecosa pe remimonuha opara pemoingatu tupri ité pe avagüer mboyecua āgua, ndahei chira rumo pe recatēhisa pipe.

⁶ Peyemomahenduha co rese: acoi noñoti atimi vahe mbahe, chupe moviromi tēi avei iha; acoi oñoti ati vahe rumo mbahe, ahe setá catu avei iha chupe. ⁷ Ñepeipei iya opihañemoñetasa rupi omondora oporerecosa Tūpa upe yuvireco, ndahei chira opiha vīracuasa pipe tēi iyavei ndahei chiaveira ambuae ava ocuai pīratasa pipe tēi. Esepia, Tūpa osaisu ava oviharetesa pipe omondo vahe oporerecosa chupe. ⁸ Tūpa niha oicatu opacatu mbahe aviye vahe mondo āgua pēu ari yacatu rupi pereco vaherā opacatu mbahe ipane vahe pēu iyavei sumbirer pipe opacatu ambuae mbahe aviye vahe rese pe poropītivii āgua. ⁹ Inungar icuachiapri pipe aipo ehi:

“Ahe iporereco ai iparaisu vahe rese yepi. Ahe mbahe aviye vahe sembiapo nocañi chietera” ehi.

¹⁰ Tūpa niha ombou mbahe rāñi ava remitira, mbahe semihura avei. Sese ombou catura mbahe pēu iyavei ombouvicha catura pe rembiapo aviye vahe ava pītivii āgua. ¹¹ Tūpa ombou catura opacatu mbahe pe rembierecorā ava upe imondo catu āgua pe avasa pipe. Ore orovirasose porerecosa pe remimbou yande rivireta upe, ahe evocoyase, “Aviye ndeu” ehira Tūpa upe yuvireco. ¹² Esepia, co pemondo vahe yande rivireta pītivii āgua, ndahei peipītivii mbahe ipane vahe rese güeraño, ichui avei niha, “Aviye Tūpa upe” ehira yuvireco. ¹³ Ahe evocoyase omboeteira Tūpa yuvireco. Esepia, co pe poropītivii isa pipe pemboyecua itera pe Cristo ñehe reroyasa peico. Ahe avei omboeteira Tūpa yuvireco. Esepia, pe pemondoño itera mbahe pe porerecosa chupe iyavei opacatu ambuae ava upe. ¹⁴ Evocoyase ahe oyoquirira pe rese iyavei pe raisu etepirira yuvireco. Esepia, Tūpa pe pītivii eté oporovasasa pipe. ¹⁵ ¡Aviye Tūpa upe! ¡Esepia, ahe ombou mbahe tuvichá vahe aviye catu vahe yandeu, ndayaicatui vahe mombehu tupri āgua!

10

Pablo cuaita apóstol seco āgua

¹ Che Pablo añehe Cristo poroaisusa, seco asiēhisa pipe avei pēu. Amove ava pe pāhu pendar, “Seco mbegüemi tēi yande pāhuve oicose, amombri güecose rumo oñehe pīratá iteanga” aipo ehi tēi yuvireco cheu viña. ² Che rumo asose pe repia, ndaipotai che pīratasa mboyecua āgua pe pāhu pendar upe. Amove rumo ava pe pāhu pendar ipihañemoñeta: “Oyapo

mibahe co ivi pipendar pihañemoñetasa rupi tēi” ehi yuvireco cheu. Sese che ayemoingatuño ité evocoi nungar ava upe añehe pĩrata vaheṛã. ³ Supi eté, yepe co ivi pipe orocove viña, ore rumo ndoroyapoi mibahe ava co ivi pipendar rembiapo nungar. ⁴ Esepia, ore yoepisa ndahei ava co ivi pipendar yoepisa nungar; orovireco rumo Tũpa pĩratasa mibahe tēi seco pĩrata vahe recopi ãgua ava aracuasa tēi recopi ãgua avei. ⁵ Ahe ipipe ore opa orosecopi yepoepi-episa iyavei opacatu semira-mira tēi vahe güeco ivate aisa pipe ndoicua uca potai vahe Tũpa recocuer ava upe. Iyavei opacatu ava pihañemoñeta raisa orosecopi Cristo reroya tupri ãgua yuvireco. ⁶ Iyavei ore oroyemoingatu ité opacatu ndiporeroyai vahe recocuer reroyi ãgua. Pe rane rumo peroya tupriṛa.

⁷ Pe rumo pemaheño tēi ahe ava recocuer rese. Acoi ava pe pãhu pendar oicua vahe Cristo rese güecosa, toicua tupri avei ore Cristo rese ore recosa yuvireco. ⁸ Yepe ayecomboivate che mborerecuasa rese pẽu viña, ipipe rumo nachi eté. Esepia, yande Yar ombou mborerecuasa cheu pe recocuer moviracua tupri ãgua, ndahei rumo pe recocuer momara ãgua. ⁹ Aní chira, “Pablo yande mbosiquiye pota güembicuachía pipe” peye cheu. ¹⁰ Esepia, amove ava pe pãhu pendar, “Oñehe oicuachía vahe ombou yandeu, ahe ipĩratá, yavai avei yandeu; ahe ité rumo aní angai vahe secoi yande pãhuve iyavei iñehe ãgüe ehi tēi vahe” ehi yuvireco cheu. ¹¹ Toicua catu ru yuvireco: eipeve oroso irise, inungar amombehu che rembicuachía pipe amombri che recose, ãgüe ahe tupri aveira yapo pe pãhuve.

¹² Ndoromboyoyai eté ore recocuer ava oyese tēi oñehe vahe recocuer rese. Esepia, omboyoyase oyese, ndoyapisacai eté yuvireco. ¹³ Ore rumo ore remimombehu pipe ndoroyapirasai chietera ore cuaita ore yeecomboivatesa pipe. Tũpa rumo güemimbotar rupi ombou ore poraviqui ãgua oreu, eipeve pe rese ore poraviqui ãgua avei. ¹⁴ Ore rumo ndoroyapirasai ore cuaita mombehusa icuachía pẽu. Esepia, supi eté ore ranei eté oroico pe pãhuve, ore ranei avei oroviraso Cristo resendar ñehesa imombehu pẽu. ¹⁵ Ndoroyapirasai avei ore ñehe pipe ambuae ava poraviquisa sui tēi. Ore rumo, orosãro ore oroporaviqui catu vaheṛã pe pãhuve Tũpa rese pe yeroyasa rupi. Ndoroyapirasai avei rumo ore cuaita. ¹⁶ Iyavei orosãro ñehesa pĩsirosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tēi oroyecomboivate oroico.

¹⁷ Acoi ava oyecomboivate pota vahe, toyecomboivate catu yande Yar rese. ¹⁸ Esepia, acoi ava “che aico tupri” ehi

vahe ndahei ahe osẽ tupri güecoãhasa sui yande Yar rovaque; “Aviye ité co mbia” ehise rumo yande Yar chupe, ahe osẽ tupri güecoãhasa sui.

11

Pablo iyavei apóstol angahu tẽi yuvirecoi vahe

¹ ¡Peñemosa iriñomi tẽira cheu co che ñehe ndayaracuai vahe nungar pipe che ñehese! ² Esepia, che cherecatẽhi ité pe rese, ahe tecatẽhisa ou cheu Tũpa sui. Che aipota Cristo upe opomondo vaheã pe reco maranehisa pipe, inungar cuñatai ndaseco marai vahe imondopri cuimbahe upe imenda ãgua. ³ Che rumo asiquiye co mbahe sui, inungar mboi ombopa Eva oporombopasa pipe, aviyeteramo Carugar pe mbopa aveira pe pihañemoñetasa rerova ãgua Cristo mboeteisa supi eté vahe sui. ⁴ Esepia, peñemosañõ ava õñehe vahe pẽu ambuae Jesús rese ndoyoyai vahe ore remimombehu rese. Ichui peipisi pe querẽhisa pipe ambuae espíritu peipisi vahecuer sui. Iyavei ambuae ñehesa pĩsirosa resendar peipisi avei ndoyoyai vahe ore pẽu oromombehu vahe rese. ⁵ Che rumo namohai eté ivi coti catu tẽi aicora evocoi supi peguata vahe apóstol yemboivate ai tẽi vahe sui. ⁶ Yepe ndayembohei che ñehe tupri ãgua ité, che rumo areco che mbahecuasa, ahe oromboyecuañõ ité opacatu ore rembiapo pipe pe rembiepiave.

⁷ Ndamombehui eté niha ñehesa pĩsirosa resendar pe cheu imboepi ãgua; pe recocuer mboivate catu ãgua rumo Tũpa rovaque ãgua ahe che reco yemominisa pipe. ¿Mbahe tẽi pĩha ayapo ãgua ahe pẽu? ⁸ Aipisi ambuae ava Jesús reroyasar sui guarepochi, pe recocuer rese che poraviqui ãgua. ⁹ Iyavei acoi aicose pe pãhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. ãgua ahe che pepoisupave pe mañecoẽhi vichico. Ndopomañecoi chietera niha mbahe ipanese cheu. ¹⁰ Supi eté aicua supi tupri vahe mbahe Cristo suindar. Evocoyase supi eté avei che aicua ndipoi chietera que ava ivi Acaya rupi vicrocua vaheã co che viharetasa che sui yuvireco. ¹¹ ¿Mbahe rese pĩha aipo ahe pẽu? ¿Pe raisuẽhisave pĩha? ¡Tũpa rumo oicua che pe raisusa!

¹² Ayapoñõ itera rumo co mboraviqui cheu imboepiẽhisa pipe vichico co ambuae pe pãhu pendar ava pe mbopaẽhi ãgua yuvireco. Esepia, che nungar yuvirecoi pota tẽi viña. ¹³ Ahe rumo ndahei apóstol supi tupri vahe yuvirecoi, ahe oporombopa tẽi, “Ore apóstol oroico” ehi tupri tẽi yuvireco. ¹⁴ Yaicua niha Carugar rerecur oporombopa. Esepia, oyeapo inungar Tũpa rembiguai amove. ¹⁵ Sese yaicua avei

Caruguar povri pendar oporombopasa pipe oyeapo inungar Tūpa ñehe mombehúsar yuvireco. ¡Ahe chupe rumo oimera Tūpa ñemoirosa mbahe sembiapocuer rupi curi!

Pablo oiporara mbahe-mbahe tēi apóstol güecosa pipe

¹⁶ Aipo ahe iri pēu: tipo eme ava “ndayaracuai” ehi vahe cheu. Acoi, “Ēgüe ehi oico” peyese cheu, tañeheño ayase ndayaracuai vahe nungar, che avei evocoyase tayecomboivateño vichico. ¹⁷ Ndahei rumo yande Yar che cuaisa pipe aipo ahe, che aracuaēhisa nungar pipe rumo aipo ahe che yemboivate aisa pipe. ¹⁸ Esepia niha, setá iteanga ava ahe ae tēi oyemboivate ai güecocuer aviye angahu vahe tēi pipe. Sese che avei ayemboivatera. ¹⁹ Esepia, yepe pe imbahecua vai vahe nungar peico, pemboyoyá catu pe querēhisa pipe ava ndayaracuai vahe. ²⁰ Pe niha pemboyoyaño acoi que mbiguai tēi nungar pe rereco vahe, que mbahe pe rembiereco sui tēi oicove vahe, que pe mbopa tēisar, pe roeroirosar, que pe rova pete-pesar avei. ²¹ Che chīsa pipe aipo ahe co imombehu, jore reco mbegüe etepri evocoi nungar apo āgua pēu!

Acoi oñehese ambuae ava oyeupendar mbahe rese oyemboivate aisa pipe, che avei evocoyase Ēgüe ahera. Aipo ahese rumo aviye ndayaracuai vahe nungar aico. ²² Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico. ²³ “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri tēi aico yuvireco ichui, inupambri catu aico ichui yuvireco, setá rupi avei seni-seni che yuca uca che mombaraisusa pipe yuvireco. ²⁴ Cinco yupagüer judío che nupá iteanga treinta y nueve tupri tucumbo pipe yuvireco. ²⁵ Mbosapi yupagüer che nupasa ivira pipe, ñepepi rupi evocoyase che api-apisa ita pipe. Mbosapi yupagüer avei oñeapivii iar ipive che guatasa rupi cheu, ñepepi pītu, ñepepi ari avei avevui tēi para guasu aviter rupi vichico. ²⁶ Setá aguata opacatu rupi, iyavei iai rupi mbahe-mbahe tēi oime cheu, aico avei imonda rai vahe pāhuve; che mu judío mbahe tēi vahe pāhuve avei aico iyavei ndahei vahe che mu pāhuve no. Aico avei tecua guasu pipe mbahe tēisave, amombri vahesa rupi iyavei para guasu pipe, iyavei mbahe-mbahe tēisave Jesús reroyasar angahu tēi pāhuve aico. ²⁷ Aporaviqui ité iyavei ayapo mbahe cheu yavai vahe; iyavei setá yupagüer ndaquei eté; aiporara avei tieporēhi iyavei husei; setá rupi

ndacarui; sōhisagüer avei aiporara, ndacheturucuai avei vichico.

²⁸ Ndahei co opacatu mbahe güeraño aiporara, ari yacatu rupi che mahenduhaño ité avei opacatu tecua rupindar Jesús reroyasar rese. ²⁹ Oimese que oiporara vahe mbaherasicuer, che avei ayandu co mbaherasisa. Acoi que oimese oyavi uca vahe mbahe, che moñemoiro uca. ³⁰ Iyase che yeecomboivate ai ãgua cheu, co mbahe omboyecua vahe che pĩrataẽhisa rese ayecomboivate aiño itera. ³¹ Yande Yar Jesucristo Ru Tũpa, ahe imboeteipri apirẽhi secoi vahe, ahe oicua aipo che hesa supi tupri vahe. ³² Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendipive che rese osareco vaheã che roquenda ãgua yuvireco viña; ³³ oime rumo ava iruova guasu pipe che mogüeyi vahe tecua ãchisa metana rupi yuvireco. Ëgüe ahe añemi ichui yuvireco.

12

Tũpa omboyecua Pablo upe mbahe queraisa nungar pipe

¹ Ndipoi eté que ava mbahe oipisi vahe ahe ae tẽi oyemboeteisa pipe. Che rumo amombehuño itera mbahe asepia vahe che quer nungar pipe iyavei yande Yar remimboyecua che aipisi vahe ichui. ² Che aicua mbia Cristo reroyasar, omomba cũritei catorce araviter ahe imbosapisa ivave seraso agüer. Ndicuasai güetecuer rese tie revo oso, anise ihã güeraño tie revo. Tũpa rumo oicua. ³⁻⁴ Che rumo, “Ëgüe ehi tie revo oico” ahe aipo mbia upe, Tũpa güeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava tẽi upe ndipotasai imombehu ãgua yuvireco. ⁵ Evocoi nungar mbia rese ayecomboivaterra; cheyese ité rumo ndayecomboivate ai chira. Che recocuer nipiratai vahe reseño Ëgüe ahera vichico. ⁶ Yepe che añehe tupri aira cheyese viña, che revo ndahei chira ndayaracuai vahe nungar aico. Esepia, mbahe supi eté vahe amombehura viña. Ahe rumo ndayapoi. Esepia, ‘tipihañemoñeta catu che rembiapo rese, che remimombehugüer rese avei yuvireco che querve nungar mbahe mombehu rãgüer sui’ viya. ⁷ Sese che yemboivate aiẽhi ãgua che quer nungar mbahe che pihamondii vahe rembiepiagüer rese Tũpa ombou teco asisa cheu. Ahe aviye yu che cutu guasu vahe, ndoyavii avei Carugar mara-mara tẽi che rereco vahe. ⁸ Mbosapi yupagüer yande Yar upe aporandu ité teco asisa che sui serocua ãgua rese viña. ⁹ Ahe rumo aipo ehi cheu: “Che porovasasa ndeu ombou vahe iyara nde ñemosa ãgua. Esepia, che pĩratasa oyecua catu ité ava nipiratai vahe recocuer rese” ehi. Evocoyase che ayembovaha catuño itera

che reco nipiratai vahe rese. Ēgüe ehira Jesucristo pĩratasa oyecua che rese. ¹⁰ Sese Cristo rese che recosa pĩpe aviyeño ité ndache pĩratase, que ambuae ava oñehe raise che rese, que mbahe ipanese cheu, ambuae che reca-reca tẽise che reco momara ãgua yuvireco iyavei que mbahe yavai vahe aiporarase Cristo sui. Esepia, ayanduse che pĩrataẽhisa, ahese che pĩrata catu.

Pablo ipihañemoñeta ité Jesús reroyasareta Corinto pendar rese

¹¹ Che ndayaracuai vahe nungar aico pẽu, pe rese tẽi rumo ěgüe ahe. Iya rumo peñehe tuprira che rese viña. Esepia, yepe ndahei seco ivate vahe aico viña, co apóstol angahu tẽi rumo pe supi peguata vahe ndahei ivate catu vahe che sui yuvireco. ¹² Che ñemoso tupri pĩpe mboraviqui ayapo pe pãhuve. Ayapo mbahe poromondĩisa mbahe pesepia yesapiha rai vahe imboyecua ãgua che supi eté vahe apóstol che recosa. ¹³ Co mbahe reseño pe ivi coti catu peico ambuae Jesús reroyasareta sui, che ndopomañecoise mbahe cheu pembou vaherã rese. ¿Ayavi tie che cuaita, ěgüe ahese pẽu? ¡Peñero sese cheu!

¹⁴ Cũritei che ayemoingatu imombosapisa rupi che so ãgua pe piri. Iyavei ndopomañecoi chira mbahe rese. Esepia, ndasecai mbahe pe rembiereco; pe recocuer ité rumo aipota. Esepia, iyepia omonuha guarepochi guahir upe, ndahei tahir tẽi ěgüe ehi oyesupa upe yepi. ¹⁵ Evocoyase che querẽhisa pĩpe amondora opacatu che mbahe areco vahe pe pĩtivĩ ãgua iyavei opacatu che recocuer rese ayemondo pẽu pe reco tupri ãgua. Che rumo opoaisu ité, pe tie revo ndache raisu tuprii eté peye.

¹⁶ Cheu mbahe ipanese, ndaporandui eté mbahe pereco vahe rese pẽu. Amove rumo ava, “Yande mbopa ãgua tẽi ěgüe ehi Pablo yandeu” ehi tẽi yuvireco. ¹⁷ ¿Opombopa uca tie ava pẽu che remimondo pĩpe? ¹⁸ Che Tito upe, “Eresora ipiri yuvireco” ahe. Supi avei ambuae yande rivri Tũpa reroyasar amondo. ¿Pembopa tie Tito? Oyoya tupri mbahe oroyapo Tũpa upe ñepeĩ ore pihañemoñetasa pĩpe.

¹⁹ Che rivireta, che rembiaisu, pe revo pepihañemoñeta ore oroicuachía co pẽu, ore yoepi ãgua tẽi. Ēgüe ndorohei eté rumo. Ore rumo Cristo rese ore reco pĩpe oroñehe Tũpa rovaque. Opacatu ité niha mbahe oroyapo pe recocuer moviracua catu ãgua. ²⁰ Che asiquiye asose eipeve pe repia, aviyeteramo ndahei chira che piha rupi pe recocuer. Iyavei pe aviyeteramo ěgüe peye aveira che repiase. Che asiquiye ité, oime revo pe pãhuve yepoepi-episa, pe pihañemoñeta raisa ava mbahe pota raisa pĩpe, pe ñemoirosa peyeupe. Iyavei aviyeteramo oimera pe pãhuve ava oyeupeño tẽi mbahe

oipota vahe, imahechiroi ai vahe iyavei oñehe-ñehe tēi vahe ambuae ava rese, seco ivate ai vahe iyavei ndiporoviroyai vahe. ²¹ Asi quíye avei aso irise pe repia, omboura Tūpa pe sui che chĩ āgua, che mboyaseho uca tiētera peye setá pe cueseve peyemboangaipa vahe rese iyavei ndapemboasii etese mbahe tēi, yemboaguasa-guasa tēisa iyavei que mbahe pe remimbotarai peyapo vahecuer.

13

Poromboaracuasa iyavei mahenduhasa

¹ Co niha imombosapisa yupagüer asora pe repia. Pe-mombehu potase que ava rembiapo ai cheu, toime que ñuvirío, anise mbosapí oicua vahe sembiapo ai. ² Co yipindar oyemboangaipa vahe upe opa aipo ahe: “Peicua catu” ahe che imoñuvirío yupagüesa pipe aicose pe piri. Cūrítei amombri aico pe sui, amombehu irira rumo co pēu. Co yipindar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe pāhuve, ndopoparaisuereco iri chira. ³ Esepia, pe peipota ité che recoãha āgua ‘¿Cristo ité pīha omoñehe uca?’ pe yapave cheu. Cristo ndaseco mbegüemi pēu mbahe apo oico. Ahe rumo omboyecua opĩratasa pēu. ⁴ Supi eté niha ahe yaticasa, inungar ava nipiratai vahe. Cūrítei rumo ahe oicove Tūpa pĩratasa pipe. Ēgüe orohe avei ore seco pĩrataēhisa sereco. Oroicose rumo sese oroico Tūpa pĩratasa pipe pe rese hañeco āgua.

⁵ Pemahecua tupri catu pe recocuer rese: ¿peico ité pīha pe Cristo rese yeroyasa pipe? ¿Ndapeicuai vo Jesucristo secoise pe rese, pesēse pe recoãhasa sui? ⁶ Pe revo peicuara ore ndorocañi tēi vahe oroico ore recoãhasa pipe. ⁷ Iyavei oroyerure pe rese Tūpa upe ‘toyapo eme mbahe tēi yuvireco’ ore hesave. Ndahei rumo ore ivate catu vahe mbahe tēi rasa pare mboyecuasave ēgüe orohe; co catu ‘toyapo mbahe aviye vahe yuvireco’ ore yapave, yepe pēu ndoyavii orocañi tēi vahe oroico viña. ⁸ Esepia, ndiyai mbahe supi tupri vahe amotarēhi āgua oreu; ēgüe ehi rumo sese catu ité oroñehe. ⁹ Sese orovihaño ité norepĩratase, ore rumo oroipota ité pe momirata; iyavei ore oroyerure catuño itera pe recocuer catupri catu āgua rese. ¹⁰ Aicuachía co che ñehe imondo pēu pe piri che so āgua renonde. Acoi asose, namboyecua pĩratatai chira che mborerecuasa eipeve. Ahe niha yande Yar ombou vahe cheu pe reco momirata catu āgua, ndahei pe reco momara āgua.

¹¹ Imomba āgua, che rivireta, aipota peviharetera peico. Peseca avei pe reco tupri catu āgua peyeupe, peyemonguerēhi catu, oyoya guasu peico tupri avei peyese mbahe tupri pipe.

Evocoyase Tũpa oporoaisusa pipe, güeco tuprisa pipe avei secoira pe rese. ¹² Pemombehu che mahenduhasa ñepeipei peyeupe pe yeovaupitesa pipe. ¹³ Opatatu ambuae yande rivri, Tũpa reroyasar avei omondo omahenduhasa yuvireco pẽu.

¹⁴ Peipisi yande Yar Jesucristo porovasasa, Tũpa poroaisusa iyavei Espíritu Santo tasecoi opatatu pe rese. Aipo rupive che ñehe pẽu.

PABLO REMBICUACHIA GALACIA PENDAR UPE GALATAS

Pablo mahenduhasa Jesús reroyasar Galacia pendar upe

¹ Che, Pablo, imondopri aico apóstol che reco āgua. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir. ² Che, Pablo, iyavei opacatu Jesús reroyasar yuvirecoi vahe cohavé oroicuachía co ore ñehe pēu, pe opacatu Jesús reroyasar Galacia pipe peico vahe. ³ Tapeipisi yande Ru Tūpa, yande Yar Jesucristo porovasasa pe reco tupri āgua. ⁴ Ahe acoi oyemondo vahe omano āgua yande angaipá repirã. Ēgüe ehi cūrítei yande renose co ivi pipe mbahe-mbahe tēi sui yande Ru Tūpa remimbotar rupi. ⁵ ¡Imboetepri apirēhi Tu tasecoi!

Ndipoi ambuae ñehesa poropĩsirosa resendar

⁶ Che pihamondii etepri peye. Esepia, peyepipi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohesa pe ñepisiro āgua peico viña. ⁷ Supi eté ndipoi ambuae ñehesa pĩsirosa resendar. Ēgüe ehi rumo, oime ava pe mañeco tēi vahe pe mbopa āgua ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco. ⁸ Oimese rumo que ambuae ava oñehe vahe poropĩsirosa angahu tēi rese ndoyoyai vahe che ñehesa rese pesendu vahe yipisuive, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai iva pendar avei no. ⁹ Amboyupagüe iri, “Evocoi nungar ava upe toime ité Tūpa ñemoirosa” ahe.

¹⁰ Aipo che he pipe, ndasecai ava tēi, “Co mbia aviye vahe” he āgua cheu, Tūpa rumo aseca cheu aipo he āgua. Esepia, java remimbotar rupi tēi mbahe ayapo vitesé, evocoiyase ndahei chietera Cristo rembiguai aico viña!

Mara ehi Pablo apóstol güeco āgua

¹¹ Che rivireta, tapeicua co ñehesa poropĩsirosa resendar amombehu vahe ava upe ndahei ava tēi pihañemoñetasa. ¹² Ndahei avei ava tēi che mbohe; Jesucristo ité niha oicua uca cheu.

¹³ Pe niha pesendu yipindar che recocuer resendar, che mu judío yembohesa rupi aguata vitesé aracaco. Che pĩratasa pipe tēi aseca opacatu Tūpa rembiporavo Jesús reroyasar momara

ãgua. ¹⁴ Ëgüe ahe che ayemboivate ai catu che mboetasa eta sui judío yembohesa pipe. Ayapó catu opacatu che recocuer pipe yipindar che ramoi eta yembohe agüer rupi eté vichico. ¹⁵ Tüpa rumo yipive che ha viteñhiseve che poravo oyeupe nara. Iyavei oporoaisusa pipe che renoi güemimbotar rupi. ¹⁶ Ëgüe ehi ahe oicua uca Guahir cheu, che imombehu ãgua co ñehesa Tahir recocuer resendar ava ndahei vahe judío upe. Ndasoi rumo ava tēi upe icua ãgua; ¹⁷ ndasoi avei Jerusalén ve yipive apóstol yuvirecoi vahe repia ãgua. Che rumo aso voi eté ivi Arabia ve. Coiyé ayevi tecua Damasco ve vitu.

¹⁸ Ichui mbosapi araviter che seroya pare, aso tecua guasu Jerusalén ve cute. Ahese ramo Pedro ambori quince arí rupi güerañomi tēi. ¹⁹ Ndasepiai eté rumo ambuae apóstol. Yande Yar rivri Santiago güeraño asepia. ²⁰ Tüpa oicua co mbahe aicuachía vahe pēu, supi tupri vahe ité.

²¹ Ipare aso ivi Siria ve, Cilicia ve avei no. ²² Yande Yar reroyasar rumo oñemonuha vahe ivi Judea ve ndache cuai eté yuvireco. ²³ Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo ãgua, cūrítei omombehu Jesucristo reroya ãgua oico” ehi, “Ahe acoi yipindar yande mocañi pota rai vahe oico” ehi yuvireco cheu. ²⁴ Ahese, “Imboeteipri Tüpa tasecoi” ehi yuvireco che recocuer rese.

2

Ambuae apóstol, “Aviye ité Pablo porombohesa” ehi yuvireco

¹⁻² Coiye catorce araviter pare, Tüpa omboyecua cheu Jerusalén ve che yevi ãgua. Evocoiyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaipotai che rembiapo opítara ãgüe ehi tēi vaheñã. Evocoiyase amombehu co ñehesa poropísirosa resendar chupe yuvireco acoi amombehu vahe ava eta ndahei vahe judío pãhuve. ³⁻⁴ Oime rumo amove yande rivri angahu tēi, ahe yuviroique mbegüe vahe ore pãhuve ‘yasecoepia rane, ¿supi eté ndoviroyai Moisés porocuita Jesucristo reroyasa pipe yuvireco?’ oyapave. Oipota ahe ore reroyevi iri Moisés porocuitavri tēi yuvireco viña. Ahese che ndugüer Tito upe, “¡Eyembocircuncida Moisés porocuita rupi!” ehi yuvireco. Esepia, ahe ndahei vahe judío secoi. ⁵ Ore rumo ndoroipotai eté semimbotar apo ãgua yuvireco chupe. Esepia, ‘tovireco viteño oyese co ñehesa písirosa resendar supi tupri vahe yuvireco’ ore yapave pēu.

⁶ Co rumo acoi icuapri ité Jesús reroyasar rerecuar, nomombelui eté yembohesa ambuae vahe yuvireco cheu,

oyoyaño ité che porombohesa rese. (Yepe ocuaita virecora ivate yuvireco viña. Che rumo nañecuñaroi chietera che recocuer sui. Esepia niha, Tūpa ndahei ava rete tēi os-epia.) ⁷ Ahe rumo oicua yuvireco Tūpa che cuai oñehengagüer poropĩsirosa resendar mombehu ãgua ndahei vahe judío yuvirecoi vahe upe, inungar omondo Pedro oñehengagüer poropĩsirosa resendar mombehu ãgua judío upe. ⁸ Esepia, inungar Tūpa omondo Pedro upe apóstol seco ãgua ava judío upe nara, ãgüe ehi avei imbou apóstol che reco ãgua ava ndahei vahe judío upe nara.

⁹ Sese Santiago, Pedro iyavei Juan, ahe chupe, “Oyemoviracua vahe Jesús reroyasar pãhuve” ehi yuvireco, ahe oicua yuvireco Tūpa ombou vahe oporovasasa cheu. Ahese imboetasa ore recosa pipe che po pĩsi yuvireco, Bernabé upe avei ãgüe ehi yuvireco. Iyavei ipiha rupi eté ore oroporaviqui vaherã ava ndahei vahe judío pãhuve oroico, inungar ahe oporaviqui judío pãhuve yuvireco. ¹⁰ Co reseño oporandu yuvireco oreu: “Peyemomahenduhami ava iparaisu vahe pĩtivi ãgua rese” ehi. Yipive ité rumo che ãgüe ahe pota vichico yepi.

Pablo oñehe pĩrata Pedro upe sembiavi rese Antioquía ve

¹¹ Iyavei olose Pedro tecua Antioquía ve. Aheve oyavi güecocuer. Evocoyase añehe pĩrata sovai eté chupe mbahe sembiavi rese. ¹² Esepia, yipindar ahe ocaru ndahei vahe judío pĩri viña. Ipare rumo, oyepotase ambuae judío Jesús reroyasar Santiago mboetasa yuvireco, ahese Pedro osirĩño ichui osiquiyepave. Iyavei ndocarú iri ipĩri. Esepia, ahe Jesús reroyasar judío yugüeru vahe “judío recocuer rupi yaguatara yande ñepĩsiro ãgua” ehi vahe ité yuvireco viña. ¹³ Evocoyase ambuae Jesús reroyasar judío avei osirĩpaño tēi supive yuvireco. Bernabé avei eté supive ãgüe ehiño tēi. ¹⁴ Che asepiase rumo, ndahoyoyai secocuer yuvireco co ñehesa poropĩsirosa resendar supi tupri vahe rese. Ichui Pedro upe añehe opacatu Jesús reroyasar rovaque: “Nde niha judío, ereico rumo inungar ndahei vahe judío. Cũritei rumo erembohe tēi nde rembiapo pipe evocoi ava ndahei vahe judío Jesús reroyasar judío rereco uca ãgua” ahe chupe.

Judío, ndahei vahe judío oyoya oñepĩsiro yuvireco Cristo rese oyeroyasa pipe

¹⁵ Yande niha judío yande hasa suive yaico, ndahei ava ndahei vahe judío nungar yangaipa vahe yaico. ¹⁶ Cũritei rumo yaicua, ndipoi eté que ava seco catupri vahe Tūpa rovaque Moisés porocuita mboaviyesa pipe. Jesucristo rese yeroyasa pipeño ité rumo yande reco catupri. Sese yande

yayeroya ité Jesucristo rese, “Co seco catupri vahe” Tūpa he āgua yandeu. Ēgüe ehi eté seroya pipe, ndahei acoi porocuita tēi reroyasa pipe. Esepia, ndipoi chietera que ñepeí ava seco catupri vahe Tūpa rovaque evocoi porocuita tēi aposa pipe.

¹⁷Yasecase yande reco catupri āgua Cristo rese yande yeroyasa pipe, ipipe yaicuase angaipa viyar yande reco, ¿Cristo pñha evocoiyase yande mboangaipa? ¡Aní eté! ¹⁸Che amocañise mbahe, ipare rumo amopuha irise, che evocoiyase ayemboangaipa ipipe. ¹⁹Esepia, ndaicutise Moisés porocuita reroya tupri che ñepisiro āgua, ahese ocañi tēi vahe aico ipipe. Ichui rumo Jesucristo reroyasa pipe asupiti Tūpa upe nara che recove āgua. Esepia, che aviye yaticapri aico Cristo rese. ²⁰Sese ndahe iri che ité aicove; Tūpa Rahir Cristo rumo che rese secoi. Sese ité ayeroya che retecuer pipe che recove āgua. Ahe niha oyemondo omano āgua che raisupave. ²¹Naroiroi eté co Tūpa porovasasa. Esepia, ava seco catuprira Tūpa rovaque porocuita tēi reroya pipe viña, evocoiyase Cristo mano agüer ēgüe ehi tēi etera viña.

3

Porocuita iyavei yeroyasa

¹¡Ndapembahecuai eté pe Galicia pendar! Pe ndoyavii ipaye vahe remimbopa peico. Oromombehu tupri niha pe rovai eté acoi Jesucristo curusu rese yatica agüer pēu. ²¡Pemboyecua co che porandusa cheu! ¿Moisés porocuita mboyeroya pipe pñha peipisi Espiritu Tūpa suindar, co ñehesa pesendu vahecuer reroya pipe tie? ³¡Ndapembahecuai eté! Yipindar Espiritu pipe pemboipi Cristo rupi pe guata āgua. ¿Ēgüe peye aveira pñha pe pñratasa pipe tēi pe guata tupri āgua Cristo rupi cūrítei? ⁴¿Ndape pñtiviimi eté vo acoi opacatu pe paraisusa Cristo recocuer rese? ¡Pe pñtiviimira tarahu viña! ⁵Tūpa niha omondo oEspiritu pe rese iyavei oyapo poromondiisa pe pñhuve. ¿Mahera pñha oyapo? Esepia, co ñehesa pesendu vahe peroya ité, sese ēgüe ehi pēu ndahei Moisés porocuita tēi reroya pipe.

⁶Esepia, aracahe Abraham oyeroya ité Tūpa rese, ipipe sui Tūpa oipisi seco catupri vahe nungar oyeupe nara. ⁷Sese iya ité peicuara opacatu acoi oyeroya vahe Tūpa rese yuvireco, ahe Abraham suindar supi tupri vahe. ⁸Iyavei Tūpa Ñehengagüer icuachiapri pipe omombehu ité senondeve Tūpa oipisi aveira opacatu oyese oyeroya vahe ndahei vahe judío co ivi pipendar oyeupe nara. Iyavei omombehu co ñehesa icatupri vahe Abraham upe: “Opacatu ava ivi pipendar sovasaprira yuvireco nde sui” ehi. ⁹Evocoiyase Tūpa osovasara cūríteindar oyese yeroyasareta inungar Abraham aracahe.

¹⁰ Acoi seco catupri pota vahe Moisés porocuita pipe tēi yuvirecoi vahe, ahe Tūpa ñemoirosavri ve tēi yuvirecoira. Esepia, icuachiapri aracahendar pipe aipo ehi: “Opacatu ava nomboaviyei vahe ité opacatu Tūpa porocuita icuachiapri pipe yepi, ahe ñemoirosavri ve tēi yuvirecoira” ehi. ¹¹ Sese, co omboyecua tupri yandeu ndahei Moisés porocuita reroyasa pipe tēi Tūpa, “Co seco catupri vahe” ehi ava upe. Esepia, icuachiapri aracahendar pipe aipo ehi: “Acoi ava seco catupri vahe oicovera Tūpa rese oyeroyasa pipe sui” ehi. ¹² Moisés porocuita ndahoyoyai Cristo rese yeroyasa rese. Esepia, ahe porocuita aipo ehi: “Acoi ava oico pota vahe co porocuita pipe, tomboaviye tupri ité opacatu porocuita güecove água” ehi.

¹³ Moisés porocuita mboaviyeēhisa pipe yacañi tēira viña. Cristo rumo yande renose yande cañi tēi rāgüer sui. Ahe ae opa oipisi ñemoirosa yande repirã. Esepia, icuachiapri aracahendar pipe aipo ehi: “Opacatu ava imboyasecopri ivira rese, oipisi Tūpa ñemoirosa yuvireco” ehi. ¹⁴ Ēgüe ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tūpa omombehu vahecuer Abraham upe aracahe. Ipipe sui yande opacatu yaipisi Espiritu imombehupri yayeroyase Cristo rese cūrítei.

Porocuita iyavei Tūpa güemimombehugüer omboaviye vaherã

¹⁵ Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepei reseve oicuachias güemimbotar omombehu vahe, ahese ndipoi que ambuae ava omboyeho vaherã iyavei ndipoi que ambuae ava omboyeapi iri vaherã. ¹⁶ Ēgüe ehi avei Tūpa remimombehugüer Abraham upe aracahe. Esepia, oñehe ñepei reseve chupe iyavei ichuindar upe avei. Tūpa Ñehengagüer icuachiapri pipe: “Nde suindareta upe” ndehi, inungar-ra que ava rehi upe viña. Ēgüe ehi rumo, “Nde suindar upe ité” ehi ‘ñepei ava’ ohesa pipe, ahe Tūpa Rembiporavo Jesucristo. ¹⁷ Co mbahe amombehu pota pēu: evocoi porocuita Tūpa ombou vahecuer cuatrocientos treinta araviter pare, ndoicatui chitera Tūpa ñepei reseve Abraham upe omombehu vahecuer iyavei oñehe omboaviye vaherã mboyeho água. ¹⁸ Supi eté acoi Tūpa suindar ou vaherã porerecosa Moisés porocuita mboaviyesa pipe suise viña, ahese ndahei chiaveira Tūpa remimombehugüer sui. Ahe rumo ñepei reseve Tūpa remimombehugüer rupi Abraham upendar porerecosa.

¹⁹ ¿Mahera pīha evocoiyase aviye Moisés porocuita? Esepia, ava poreroyaēhisa cua água Tūpa ombou oporocuita Moisés upe aracahe. Co porocuitavri ve rumo ava yuvirecoi

acoi oyepotase voi Abraham suindar Jesús Tūpa remimombe-
hugüer rupi. Yipindar rumo Tūpa oyocuai güembiguai iva
pendar oporocuita mombehu āgua Moisés upe aracahe ‘to-
mombehu evocoyase Moisés che porocuita opacatu ava
upe’ oyapave. ²⁰ Ñepeí ava rese oñemoñetase, ndipotasai
ambuae imoingatu āgua. Tūpa niha ñepeí vahe secoi.

Mbahe sui Tūpa ombou oporocuita

²¹ “Moisés porocuita co coti tēi Tūpa remimombe-
hugüer imboaviyepirã sui” aipo ndahei eté pēu. Esepia, acoi Tūpa
omondose que porocuita ombou vaheṛã tecovesa apirēhi
ava upe imboaviyesa pipe, evocoyase porocuita reroya
pipe yande reco catuprira Tūpa rovaque viña. ²² Icuachiapri
aracahendar pipe rumo omombehu ité co: opacatu ava in-
ungar mbiguai tēi oangaipa pipe yuvirecoi. Evocoi ēgüe ehi,
Jesucristo rese yande yeroyasa pipe yasē vaheṛã ichui mbahe
imombehupri piṣi āgua.

²³ Yipindar rumo mbiguai nungar yaico Tūpa nomboyecua
viteise Guahir rese yande yeroya āgua. ²⁴ Inungar chīhivahemi
tēi, ēgüe vahe porocuitavrive yaico yipindar. Ahe porocuita
rumo yande mbohe Cristo yu āgua ‘toyeroya Cristo rese
güeco catupri āgua curi’ oya yandeu. ²⁵ Cūrítei rumo oime
Jesucristo rese yeroya āgua cute. Evocoyase ndahe iri ahe
porocuitavrive yaico. ²⁶ Pe niha opacatu Tūpa rahir peico
Jesucristo rese yeroya pipe. ²⁷ Opacatu pe ñapiramombri peico
vahe Jesucristo rupi pe guata āgua, secocuer avei pereco.
²⁸ Iyavei ndipoi eté yemboyahosa Jesucristo rese yaicose,
yepera que judío viña, ndahei vahe judío; anise mbiguai,
ndahei vahe mbiguai; que cuimbahe, cuña avei. Esepia,
opacatu ñepeí vahe nungar ité yaico Cristo rese. ²⁹ Jesucristo
rese peicose, pe evocoyase Abraham suindar nungar tupri
ité peico. Evocoyase pe avei peipisira Tūpa remimombehu
porerecosa yandeundar.

4

¹ Amboyoapi vitera co che ñehesa pēu: inungar que ava
omanose, oseyá ombahe eta guahir upe chīhivahemise. Yepe
ahe tahir opacatu mbahe yar secoira viña, ahe rumo inungar
tupri mbiguai tēi secoi vahe yepi. ² Esepia, ahe guārosar
povrive secoi imboyeroya āgua. Ocuacuase voi eté, opoira
tu remimombehugüer rupi ichui. ³ Ēgüe ehi avei yandeu.
Yande chīhivahemise, evocoyase mbiguai nungar yipindar
vahe co ivi pipendar porocuitavrive yaico. ⁴ Oyepotase rumo
ari imombehupri, Tūpa ombou Guahir, ahe oha cuña sui;
evocoyase ahe Moisés porocuitavrive secoi. ⁵ Ēgüe ehi ou
opacatu yande renose āgua evocoi mborocuitavri sui Tūpa

rahir ité yande reco ãgua. ⁶ Evocoyase Tūpa omboyecua Guahir yande recose ombouse Guahir Espiritu yande pīha pipe, “¡Che Ru!” yande he ãgua chupe. ⁷ Sese yande Tūpa rahir ité yaico, ndahe iri cūritei mbiguai tēi nungar. Tūpa rahir yande reco pipe ahe ombou aveira oporerecosa yande mahera.

Pablo ipīhañemoñetaño ité Jesús reroyasar rese oico

⁸ Yipindar tūpa angahu rembiguai tēi peico Tūpa ité cuaēhi pipe. ⁹ Cūritei rumo peicua Tūpa, ěgüe ehi rumo Tūpa ité oicua pe recocuer. Sese niha aipo ahe cheyeupe: “¿Mara ehi pīha oyevī iri mborocuaita tēi pipe mbiguai tēi güeco iri ãgua yuvireco?” ahe pēu. ¹⁰ Esepia, pemboetei vite ari, yasi, araviter pieta eta tēi peico. ¹¹ ¡Che ayembosiquiye pe rese, “Che porombohesa revo ěgüe ehi tēi vahe ipāhuve yuvireco chupe” ahe pēu!

¹² Iyavei che rivireta, aipota che recocuer moña peye. Esepia, cuese che asē Moisés porocuaita povri sui inungar pe yipindar ěgüe ahe vichico pe pāhuve. Ahese ndapeyapoi eté mbahe cheu. ¹³ Peicua niha che yipindar chembaheasise vichico, ahese amombehu co ñehesa pīsirosa resendar pēu. ¹⁴ Yepe co che mbaherasisa yavai etepri pēu viña, pe rumo ndache reroiroi eté peye iyavei ndache momboi peye. ěgüe ehi rumo aviye acoi Tūpa rembiguai eté che rereco peye viña iyavei aviye Jesucristo itera aico pēu viña no. ¹⁵ ¡Mahera ru cūritei ndapeyemboviharete vitei che rese peico eipeve! Esepia, supi eté, cuese acoi que pe resa teieté revo pemboura cheu viña. ¹⁶ ¡Evocoyase cūritei che amotarēhi tie peye acoi pēu mbahe supi tupri vahe mombehusa sui tēi!

¹⁷ Evocoi ava iquerēhi ité pe rese, ndahei rumo mbahe aviye vahe apo ãgua yuvireco. Ahe rumo oipota pe mboyepēi ãgua tēi ore sui yuvireco pe querēhi ãgua supi. ¹⁸ Aviye ité niha yande querēhise mbahe apo ambuae ava upe, mbahe aviye vahe apo ãgua rumo. Ndahei chira pe pāhuve che recoseño pereco pe querēhisa. Iyacatu rumo pequerēhiño itera yepi. ¹⁹ Che rahireta, che ayembopiharasi ité vichico pe rese. Inungar cuña imembirasī vahe; ěgüe aheño itera ayemombaraisu vichico ‘toico rane ité Cristo sese yuvireco’ che yapave pēu. ²⁰ Cūritei rāgüer opoepiara viña añehe tupri catu ãgua pe rese. Esepia, “¿Mara ahera revo sereco yuvireco?” ahe pēu.

Agar, Sara recocuer resendar yembohesa

²¹ Pe peroya pota vahe Moisés porocuaita pe reco catupri ãgua, pemombehumi cheu: ¿Ndapesenducuai tie co mborocuaita aipo ehi vahe? ²² Esepia, aipo ehi: Abraham

aipo vireco ñuvirío guahir, ñepi tahir aipo sembiguai Agar membri, ambuae tahir evocoyase sembireco Sara membri. ²³ Evocoi sembiguai membri oha que ava tēi yesu nungar; sembireco membri rumo oha Tūpa remimombehugüer rupi eté. ²⁴⁻²⁵ Co tecocuer mboyoyasa yaracua vahe ité. Co ñuvirío cuña sui yayembohe ñuvirío Tūpa remimbotar rese. Yipindar sembiguai Agar omboyecua evocoi porocuita imondopri Arabia pipendar ivitri Sinaí ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuitavrive yuvirecoi. Ēgüe ehi avei opacatu Moisés porocuita pipendar, yuviroha mbiguai nungar güeco āgua, opacatu ichuindar ēgüe ehi vite yuvireco. ²⁶ Yande rumo inungar-ra que Jerusalén iva pendar suindar yaico viña ēgüe yahe yaico mbiguaiēhi. ²⁷ Esepia, icuachiapri aracahendar pipe aipo ehi:

“Eyembovihareté, cuña nimembii vahe; esapucai nde rorivetesá pipe, nde ndereiporarai vahe nde membri rasiçuer. Esepia, acoi cuña seyapri imembi ati catura cuña omer vireco vahe sui” ehi.

²⁸ Che rivireta, inungar Sara membri Isaac, ēgüe yahe avei tahir ité yaico Tūpa remimombehugüer rupi. ²⁹ Co rumo aracahe sembiguai membri oha vahe ava tēi yesu nungar, ahe ndoyambotai sembireco membri acoi Espiritu pĩratasa pipe sui oha vahe; cūritei ēgüe ehi tupri avei. ³⁰ ¿Mara ehi icuachiapri aracahendar pipe? “Pemboyepipi pe rēta sui cuña mbiguai tēi imembi reseve. Esepia, cuña mbiguai tēi membri ndiyai oyoya cuña ndahei vahe mbiguai membri rese vu mbahe piši āgua yuvireco” ehi. ³¹ Sese, che rivireta, yande ndahei sembiguai tēi membri nungar yaico, yande rumo sembireco membri nungar yaico. Esepia, ahe ndahei mbiguai.

5

Peyemoviracuaño ité Moisés porocuita pipe pe recoēhi āgua

¹ Jesucristo niha ombou yandeu mbiguai tēi nungar sui yande sē āgua. Sese peyemoviracua mbiguai tēi pe reco iriēhi āgua.

² Pesendu che ñehe. Che, Pablo, aipo ahe pēu: acoi peyembocircuncida ucase, ahese ēgüe ehi tēi vahe Cristo pereco.

³ Che amombehu pota irimi pēu, que ava oyembocircuncida uca vahe, vireco niha ocuaita opacatu Moisés porocuita mboyeroya āgua. ⁴ Pe pereco catupri pota tēi vahe Tūpa rovaque evocoi porocuita tēi reroya pipe, peyepipi ité Cristo sui. Evocoyase Tūpa porovasasa avei pemocañi tēi peyesui.

⁵ Yande rumo yande querēhisa pipe yayeroya yande reco

catupri ãgua rese. Ēgüe yahe Espíritu yande pĩtívĩisa pipe iyavei Jesús rese yeroyasa pipe avei. ⁶ Esepia, acoi yaicose Jesucristo rese, yepe yayembocircuncidase, anise ndayayembocircuncidaise, ahe ndayande pĩtívĩi eté yande reco catupri ãgua Tũpa rovaque. Co güeraño rumo yande pĩtívĩi Jesús rese yande yeroyasa. Ahe niha yande mboyeaisu uca.

⁷ Peico tupri niha yĩpindar viña. ¡Ava ru ndoviroya uca iri mbahe supĩ tupri vahe pẽu! ⁸ Ndahei eté rumo pe poravosar Tũpa ěgüe ehi pẽu. ⁹ ¿Ndapeicuai vo acoi aipo ehi vahe: “Chĩhimi pan mboapeposa oso panguã rese opacatu rupi oicahopa tupri yepi” ehi? ¹⁰ Che rumo ayeroya yande Yar rese pe pĩhañemoñeta ãgua che pĩhañemoñetasa rupi. Tũpa rumo omboura oñemoĩrosa que ava pe mbopĩhañemoñeta yoavirati uca vahe upe.

¹¹ Che rumo, che rivireta, “Iya yayembocircuncida yande reco catupri ãgua” ahe viteses Jesús reroyasar upe viña, ahese revo ndipoi chira che amotarẽhisar judío pãhuve, ahese avei ndipoi chira ñehesa curusu rese Jesús manosa resendar amotarẽhimbar ipãhuve viña. ¹² Evocoi ava pe mbopĩhañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepeĩ reseve yuvireco!

¹³ Esepia, pe ore rivireta, Tũpa niha pe renoi mbiguai tẽi nungar pe recosa sui pe renose ãgua. Ndahei chira rumo pe remimbotarai tẽi apo ãgua, iyacatu rumo peñepitívĩira pe yeaisusa pipe. ¹⁴ Esepia, opacatu evocoi mborocuita imboavĩyesa yamboavĩyese co ñehesa aipo ehi vahe: “Esaisu ambuae ava nde yeaisu nungar” ehi vahe. ¹⁵ Peyeseño teteĩ rene catu; peicua catu, aviyeteramo ěgüe peyese, pe recocuer pemomarapa tiẽtera.

Yaguatara Espíritu remimbotar rupi, ndahei yande remimbotar tẽi rupi

¹⁶ Pesendu che ñehe: Espíritu pĩratasa pipe catu peico yepi. Iyavei peyapoi rene mbahe pe remimbotarai. ¹⁷ Esepia, co pe remimbotarai ndahoyoyai eté Tũpa Espíritu remimbotar rese. Ndoymbohe catui eté. Sese ndapeyapo ucai mbahe pe remimbotar avĩye vahe peyeupe. ¹⁸ Acoi Espíritu ité pe reroguatase, ahese ndahe iri chiaveira Moisés porocuitavrive peico.

¹⁹ Yande remimbotarai suindar yande rembiapo ai icuasa tupri ité. Ahe: yemboaguasa tẽisa, teco quĩhasa, mbahe tẽi aposa; ²⁰ mbahe rahanga upe yerure tẽisa, yembopayesa, ñeroĩrosa, ñehepoepi-episa iyavei ambuae ava mbahe pota raisa; ñemoĩro seraisa, yemboyaho-yahosa, pĩhañemoñeta yoyaẽhisa, ²¹ iyavei ambuae ava mbahe pota raisa rese

ñemoirosa, savaiposa, yembopieta tēisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroi quei chietera Tūpa mborerecuasave yuvireco curi.

²² Yayapose rumo Espiritu remimbotar, yande evocoiyase yayeaisura, yande rorivetera, yaicora mbahe tupri pipe, yande reco mbegüera, yaporoaisura yande reco aviyesa pipe, yamboycuara yande cuaita mboaviyesa, ²³ yayemominiñora iyavei yande recorã rese yañearo tuprira. Evocoi nungar yayapose, ndipoi eté que mborocuaite pipe yande yeamotarēhi āgua. ²⁴ Jesucristo rese ité yuvirecoi vahe rumo, opa ité omombo güecocuerai co ivi pipendar tēi oyesui yuvireco, güemimbotarai, opihañemoñeta raisa avei no. ²⁵ Yande yaicose Espiritu pĩratasa rese, ahese Espiritu rupi eté yaguatara.

²⁶ Ndayayemboivate ai chira. Esepia, ipipe sui yayeamotarēhi, yaipota rai avei yande mboetasa recocuer nungar yande reco āgua.

6

Peñepitivi ñepeipei

¹ Che rivireta, acoi que Jesús reroyasar pe pāhu pendar oyavise güecocuer, pe peico vahe Espiritu rese, peipitivi secocuer moingatu āgua pe recocuer mbegüemisa pipe. Peicua catura rumo, aviyeteramo oyoya voi peyemboangaipa uca tiētera. ² Peñepitivi-tivii catu que mbahe yavai rai vahe rese. Ēgüe peyese, Jesucristo porocuaite pemboaviyera.

³ Amove ava, “Che ivate catu vahe aico” ehi tēi. Ēgüe ehi rumo ahe ae oyembopa aipo ohesa pipe oico. ⁴ Sese niha ñepeipei eté yaicua tuprira yande recocuer. Aviyese, evocoiyase sese yaviharetera. Ndahei acoi ambuae ava recocuer rese tēi yamboyyara yande recocuer. ⁵ Esepia, ñepeipei eté yande yacatu yareco yande cuaita imboaviye āgua.

⁶ Acoi oyembohe vahe Tūpa ñehe pĩsirosa resendar rese, tomondo ombohesar upe mbahe güembiereco ipitivi āgua.

⁷ Peyembopa eme catu pe ae. Ndipoi chietera que ava viroiro vahe Tūpa ñemoirosa pisiñhisa pipe. Ēgüe ehi eté: yañotise mbahe, ichui avei mbahe yaipisira. ⁸ Acoi ava rumo oyapo vahe mbahe güemimbotarai pipe, ahe oipisira cañisa apirēhi vahe. Acoi oyapo vahe mbahe Espiritu remimbotar rupi, ahe oipisira tecovesa apirēhi vahe yuvireco. ⁹ Evocoiyase tayandecuerai eme mbahe tupri aposa pipe. Esepia, acoi ndayandecueraise, yaipisira mbahe tupri apo repri. ¹⁰ Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

Pablo, "Peicua catu pe mbocircuncida pota vahe sui" ehi iyavei ñehesa ipa vahe

¹¹ ¡Pesepia co ñehesa ipa vahe che pove ité aicuachía tuvicha vahe pëu! ¹² Acoi judío Jesús reroyasar pe mbocircuncida uca potaño tēi vahe 'Co mbia aviye ité, tehi ndahei vahe Jesús reroyasar judío yuvireco yandeu' ohesa pipe tēi ēgüe ehi yuvireco viña. Esepia, ndoipotai evocoi judío oamotarēhi co ñehesa Cristo atica agüer mombehu pipe yuvireco. ¹³ Acoi oyembocircuncida uca tēi vahe avei rumo nomboaviyei eté opacatu mborocuaite yuvireco. Oipota rumo pe mbocircuncida ucara oyemboivate ai āgua pe cuaise evocoi nungar apo yuvireco. ¹⁴ Che rumo ndayemboivate potai eté. Curusu rese yande Yar Jesucristo mano agüer rese güeraño ité ayemboviha. Imano agüer sui co ivi pipendar mbahe pota raisa opa ité che sui. Che evocoyase inungar omano vahe aico chupe. ¹⁵ Yepe que yayembocircuncidase revo, anise que ndayayembocircuncidaise viña, ndayande p̄tivii eté Cristo rese yaico tupri āgua. Co rumo aviye vahe ité yandeu: Tūpa yande recocuer mbopiasuse. ¹⁶ Opacatu yuvirecoi vahe co ñehesa che remimombehugüer rupi iyavei opacatu Tūpa upendar supi eté vahe toipisi Tūpa suindar teco tuprisa iyavei iporoparisuerecosa yuvireco.

¹⁷ Aviye, co pipe suive ndaipota iri que ava che mañeco tēi vaherā. Esepia, che areco che retecuer rese che apicha-picha agüer. Ahe omboyecua Jesús rembiguai che recosa.

¹⁸ Che rivireta, yande Yar Jesucristo tape rovasa opacatu. Aipo rupive.

PABLO REMBICUACHIA EFESO PENDAR UPE EFESIOS

Pablo mahenduhasa Jesús reroyasar Efeso pendar upe

¹ Che, Pablo, Jesucristo apóstol aico Tūpa remimbotar rupi. Che aicuachía co che ñehe pëu pe Efeso pendar, Tūpa upendar Jesucristo reroyasar peico vahe. ² Yande Ru Tūpa iyavei yande Yar Jesucristo tombou oporovasasa pe reco tupri ãgua pëu.

Cristo suindar porovasasa

³ Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe. ⁴ Sese niha Tūpa yande poravo yipivé ité ivi apoëhi viteseve ‘toyuvirecoi cheu nara ité iyavei tasecomara eme yuvireco che rovaque’ oyapave oporoaisusa pipe. ⁵ Ipipe avei yipisuive yande pisi guahirguã Jesucristo yande pisirosa pipe güemimbotar rupi. ⁶ Sese yande yasapucaí chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui. ⁷ Tūpa yande raisu eteprisa pipe yande pisiro Guahir ruvi piyeresá pipe yande angaipa rese ñero ãgua. ⁸ Yande raisu pipe avei ombou opacatu yande aracua ãgua iyavei yande yapisaca ãgua avei yandeu, ⁹ iyavei oicua uca güemimbotar yipisuive ndicuasai vahe yandeu co güembiaporã mboaviye ãgua. ¹⁰ Oyepotase ahe ari imboaviye ãgua, Tūpa opacatu mbahe iva pendar, co ivi pipendar avei opara omoingue ñepeí reseve Guahir Cristo povrive.

¹¹ Cristo rese yaicose, Tūpa yande poravo yipisuive ichuindar mbahe yandeundar pisi ãgua. Opacatu rumo mbahe Tūpa remimbotar rupi. Ahe niha oicua ité güemimbotar apo ãgua ¹² ‘tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase’ oya oreu. ¹³ Pe avei niha, pesenduse co ñehesa supí eté vahe pisirosa resendar, Cristo peroya pe piha pipe sese peico vaheerã. Tūpa ombou güemimombehugüer Espíritu Santo pe piha pipe ‘cheundar ité yuvirecoi’ oya. ¹⁴ Ipiśisa pipe niha yaicua yande yaipisi vaheerã yandeundar mbahe imoingatupri, acoi Tūpa opase oipisiro ava oyeupendar ‘ipipe sui tomboetei che reco ivatesa ava yuvireco’ oya.

Pablo oporandu Tūpa upe mbahecuasa Jesús reroyasareta upe mondo ãgua

15 Ayandu peyeroya tupri yande Yar Jesús rese iyavei pesaisu ité ava opacatu Tūpa upendar. 16 Sese ndapoi eté Tūpa upe, “Aviye ndeu” che hesa sui chemahenduhase pe rese che yeruresa pipe. 17 Che aporandu yande Yar Jesucristo Ru Tūpa seco porañete vahe upe, pe recocuer resape āgua rese. Ipipe peicua tupri catura semimboyecua iyavei peicua tupri catura yande Yar. 18 Ēgüe ahe ité aporandu Tūpa upe pe piha resape āgua rese. Ipipe peicua catura co pesāro vahe ivave pe reique āgua; chupe nara ité Tūpa pe peha. Iyavei peicuara co mbahe imondopirā iva pendar iporañete vahe Tūpa upendar yuvirecoi vahe upe. 19-20 Ipipe sui peicua tupri aveira Tūpa pīratasa ndopai vahe yande seroyasar yaico vahe rese. Co pīratasa ivaté vahe ité. Ahe pīratasa Tūpa omboyecua, ombogüerayevise Guahir Cristo omano vahe pāhu sui, iyavei omboguapise oacato coti ivave. 21 Osecomboivate catu opacatu iva pendar, ivi pendar seco ivate vahe mborerecuarecuar tēi pīratasa sui iyavei opacatu cūrteindar sui, que oime vaherā sui avei. 22 Opacatu mbahe omondo Guahir Cristo povrive, Tahir upe avei ombou mborerecuar ivate catu vahe seco āgua opacatu viroyasar upe. 23 Opacatu yande seroyasar yaico vahe recocuer rese Cristo secoi. Evocoyase yande setecuer nungar yaico. Ahe opacatu rupi secoi.

2

Tūpa oporovasasa pipe yande pīsiro

1 Pe rumo, yipindar angaipa pipe peicose, inungar omano vahe peico Tūpa upe. 2 Co ivi pipendar pihañemoñetasa rupi tēi peico iyavei ivate rupindar caruguar rerecuar porocuaíta tēi avei peroya, ahe Jesús reroyasarēhi ombohe vahe. 3 Yipindar opacatu yande avei yaguata yande remimbotar rupi tēi yande recocueraí pipe. Yande pihañemoñeta raisa rupi tēi avei yayapo mbahe. Sese Tūpa ñemoirosa yaipisira opacatu ambuae ava rupive viña. 4 Tūpa rumo yande paraisuereco ité, yande raisu etepri avei. 5 Yepe angaipa pipe yaico omano vahe nungar viña, ahe rumo ombou Guahir yande recove āgua. Ahe oporovasasa pipe yande pīsiro. 6 Yande mbogüerayevi iri avei niha sese. Ipare seseve yande moingue oyepiri ivave 7 ‘tamboyecua opacatu iva pendar upe che porovasasa iyavei che poroaisusa tuvicha vahe che Rahir rembiapo pipe sui curi’ oya. 8 Esepia, oporovasasa pipe pe pīsiro Jesús rese peyeroyase. Ndahei rumo pe recocuer sui tēi peñepisiro, ahe rumo ombou porerecosa pēu. 9 Ndahei avei ava rembiapo sui tēi ou vahe. Evocoyase ndiyai chira yayemboivate ai ipipe. 10 Tūpa niha yande recocuer mohivi Jesucristo rese yande reco āgua mbahe icatupri vahe apo

ãgua. Ahe mbahe icatupri vahe yipisuiwe Tūpa omoime yande rembiaporã.

Cristo ombou yande reco tupri ãgua

¹¹ Evocoyase peyemomahenduha yipindar pe recocuer rese. Ndahei rumo judío suindar peico: “Co ndoicuai vahe Tūpa, ndoyembocircuncidai vahe tēi yuvirecoi” ehi judío yuvireco pēu, (ahe judío oyembocircuncida vahe güete rese oyeupe, “Yande Tūpa rembiporavo imbocircuncidapri yaico” ehi yuvireco). ¹² Peyemomahenduha yipindar Cristo ndaperecoi vahe rese. Ahese ndapeicoi Tūpa rembiporavo Israel recua pendar iyavei ndapecuai Tūpa remimbotar semi-mombehu avei ombou vahe judío upe ipitiviã ãgua; ndaperecoi Tūpa iyavei ndaperecoi sãrosa pe ñepisiro ãgua co ivi pipe viña. ¹³ Esepia, ahese amombri Tūpa sui peico. Cūritei rumo Jesucristo rese peico. Esepia, ahe vuvi pipe pe reru Vu Tūpa upe. ¹⁴ Ahe avei niha teco tupri sa yandeu. Esepia, ahe yande mboyeseha judío, ndahei vahe judío ñepe vahe nungar yande yeamotarēhiēhi iri ãgua oyeupe. Yande ñemoirosa niha opa omocañi yande sui güetecuer mondose pipe. ¹⁵ Cristo omomba opacatu Moisés porocuita. Ahe oipota ñepe ava nungar teco piasu pipe yande reco ãgua, judío iyavei ndahei vahe judío. Ēgüe ehi imocañipa yande yeamotarēhisa yande sui yande reco tupri ãgua. ¹⁶ Evocoyase ahe ae omanose curusu rese, ombou yandeu yandeyeupe ñero ãgua judío, ndahei vahe judío ñepe ava nungar Tūpa rupi yande reco ãgua.

¹⁷ Ahe ou omombehu co tecocuer piasu pēu pe amombri Tūpa sui peico vahe, omombehu avei ore namombri vahe judío oroico vahe upe ‘tiñero yuvireco oyeupe’ oya. ¹⁸ Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vahe rã Tūpa rese Espiritu ñepe vahe pipe. ¹⁹ Sese pe ambuae ivi pendar peico vahe, ndahe iri amombri Tūpa sui peico cute. Cūritei rumo Tūpa upendar ité peico opacatu ambuae seroyasar reseve. Yande evocoyase ñepe reseve oñemu guasu vahe nungar yaico. ²⁰ Pe inungar tūparo maranehi imopuhambri ihivipirã hari pendar peico; apóstol iyavei Tūpa ñehe mombehusar evocoyase inungar ihivipi yuvirecoi tūparo moviracua ãgua. Jesucristo rumo inungar ita yipindar vahe imohivisa yandeu. ²¹ Ichui Cristo opa yande mboyeseha oyese, inungar oi imopuhambri oyeupi catu-catu iri vahe tūparoguã, ēgüe yahe ipehapri yaico yande Yar upe nara sese ité yande reco ãgua. ²² Sese niha, Cristo rese peicose, pe ambuae viroyasar rese avei sētarã nungar peico. Ipipe Tūpa, oEspiritu pipe, secoira.

3

Pablo cuaita ñehesa pĩsirosa resendar mombehu ãgua ava ndahei vahe judío upe

¹ Sese, che Pablo, soquendapri aico cohawe Jesucristo recocuer mombehusa sui tẽi. Ndahei vahe judío peico vahe pe recocuer aviye ãgua rese ãgũe ahe. ² Peicua tupri revo co che poraviquisa Tũpa ombou vahe cheu oporovasasa mombehu ãgua pẽu nara. ³ Co ñehesa yipindar ndicuasai vahe güemimbotar resendar Tũpa omboyecua uca vahe cheu, ahe niha aicuachía chĩhi pẽu. ⁴ Co rese peyeroquise peicua tupri catura co che aracuasa Cristo recocuer resendar oyecua ramo vahe. ⁵ Co ñehesa icatupri vahe ndoicuai eté ava yuvireco aracahe. Cũritei rumo Tũpa oEspíritu pipe omboyecua güembipeha yuvirecoi vahe upe. Ahe sembipeha apóstol, iñehe mombehusar avei yuvirecoi. ⁶ Evocoi oyecua ramo vahe, ahe co: pe ndahei vahe judío upe avei Tũpa omboura judío upendar nungar tupri porovasasa co ñehesa poropĩsirosa resendar reroyasa pipe. Pe avei oñemu nungar tupri peico, oyoya ore judío oroico vahe rese. Pẽu nara avei Tũpa remimombehugüer aracahendar peyeroyase Jesucristo rese.

⁷ Yepe ndiyai cheu viña, Tũpa rumo che moingo opĩratasa pipe ñehesa pĩsirosa resendar mombehu ãgua. ⁸ Che recocuer niha ivi coti catu opacatu ambuae Tũpa reroyasar sui viña, ahe rumo ombou oporovasasa co mboraviquisa ñehesa aviye vahe Cristo recocuer resendar mombehu ãgua ava ndahei vahe judío upe nara cheu. ⁹ Iyavei ombou che cuaitarã amombehu tupri vaherã opacatu ava upe opacatu mbahe Aposar pihañemoñetasa yipindar ndicuasai vahe. ¹⁰ ãgũe ehi cũritei oyesuindar aracuasa cua uca ãgua viroyasareta recocuer rese opacatu mborerecuar guasu, seco pĩrata vahe iva pendar upe. ¹¹ ãgũe ehi, Tũpa opihañemoñeta ndopai vahe mboaviye Guahir, yande Yar Jesucristo rese. ¹² Sese yande yeroyasa suiño ité yaicatu yande yemboya ãgua Tũpa rese yande siquiyeẽhisa pipe. ¹³ Sese aní chira, ndapequerẽhi iri Cristo rupi pe guata ãgua, pe recocuer rese che yemombaraisusa sui. Iyacatu rumo che paraisusa pereco pe yemboviha ãgua.

Cristo poroaisusa

¹⁴ Sese añenopiha yande Ru Tũpa rovaque. ¹⁵ Ichui serer pãve vireco yuvireco, opacatu seroyasareta iva pendar, ivi pendar avei ñepei oñemu yuvirecoi vahe nungar. ¹⁶ Che aporandu chupe ‘tombou güeco porañetesa sui opĩratasa yuvireco chupe oEspíritu pipe imoviracua ãgua’ viya pẽu. ¹⁷ ãgũe ahe

ayeroqui pe rese pe piha pipe Cristo rereco āgua sese pe yeroyasa pipe. Iyavei pe poroaisusa pipe pe yemoviracua catu āgua peyese ¹⁸ ‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu āgua yuvireco’ viya pēu. ¹⁹ Che ayeroqui ahe poroaisusa peicua tupri catu āgua rese (yepé ndayaicatui icuapa tupri āgua yaico viña). Ipipe sui Tūpa tasecoi pe rese.

²⁰ Cūrítei yamboetei yande Ru Tūpa. Esepia niha, ahe opĩratasa pipe ombouvicha catu itera mbahe yande porandusa sui, yande pihañemoñetasa sui avei yandeu. Esepia, opĩratasa pipe oporaviqui yande rese. ²¹ ¡Sese ēgüe tehi imboeteipri Tūpa tasecoi seroyasareta recocuer sui, Jesucristo sui avei apirēhi vaherā!

4

Ava Espiritu rese oyoya guasu yuvirecoi vahe

¹ Sese Cristo recocuer mombehusa sui che roquendasa pipe, “Peico tuprira pe cuaita rupi Tūpa pe renoisa pipe” ahe pēu. ² Peyemominira peico pe reco aviyesa pipe, pe reco mbegüesa pipe aveira iyavei peñemosañe pe yeaisusa pipe peyeupe. ³ Peyapo opacatu pe recocuer pipe peico tupri vite āgua peyepāhuve Espiritu Santo pe pĩtiviisa pipe, pe reco tuprisa pipe avei. ⁴ Yaico ñepe nungar Cristo rese iyavei yareco ñepe Espiritu. Ēgüe ehi avei Tūpa yande poravo ñepe guārosa rereco āgua. ⁵ Oime ñepe yande Yar, ñepe yande yeroyasa, oime avei ñepe poroāpiramosa. ⁶ Oime ñepe Tūpa, ahe opacatu yande Ru, opacatu yande cuaisar, ahe oporaviqui opacatu yande rese, secoi avei yande rese no.

⁷ Iyavei Cristo niha yande yacatu ñepepei mbahecuasa ombou. ⁸ Sese aipo ehi icuachiapri aracahendar pipe: “Oso ivave, viraso secopipireta oyeupi; omondo avei porerecosa ava upe” ehi.

⁹ ¿Mara oya aipo ehi: “Oso ivave”? Yipindar ogüeyi co ivi pipe. ¹⁰ Acoi ogüeyi vahe co ivi pipe oso ivate catusave ‘taico opacatu rupi’ oya. ¹¹ Ahe niha ombou amove apóstol seco āgua, ambuae upe ombou Vu ñehe mombehu āgua, ambuae upe ombou ñehesa pĩsirosa mombehu āgua, ombou avei ambuae upe viroyasar rāro āgua iyavei iporombohe āgua. ¹² Ēgüe ehi ava viroyasar mbohe oyeupe mboraviqui apo ambuae viroyasar moviracua tupri catu āgua. ¹³ Opacatu yaico tupri rane itera oyese Jesús rese yeroyasa pipe iyavei yaicua tuprira Tūpa Rahir recocuer. Ahese yaico tuprira yande Cristo rese inungar ava ipihañemoñeta tupri catu vahe, ahese yasupitira Cristo recocuer yaico. ¹⁴ Evocoiyase ndahe iri chira chĩhivahe

têi nungar ova-ova têi vahe yaico inungar-ra que ivitu yande reraso vahe oyeupi. Ndayayembopa uca iri chira ava co coti têi oporombohe vahe upe, que yande rerova pota vahe upe mbahe têi pipe. ¹⁵ Yande rumo evocoyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu yande recocuer pipe. Ahe niha yande rerecuar secoi. ¹⁶ Esepia, ahe yande mboya tupri oyese, yande moenda tupri avei yande rereco, êgüe ehi ahe yande mboyemboya oyese ñepepe vahe nungar. Ñepepepe yaporaviqui tuprise, ahese opacatu yayeroya catu itera, yayemoviracua catu aveira yande yeaisusa pipe.

Cristo yande recocuer mbopiasu

¹⁷ Che aipo ahe Tûpa rer pipe pëu che pe cuaisa pipe: peico iri eme ava Tûpa cuaparêhi nungar. Ahe yuvirecoi vahe ité opihañemoñeta raisa pipe, ¹⁸ ndoicatui mbahe renducua tupri âgua iyavei ndovirecoi tecovesa Tûpa suindar oyese yuvireco. Esepia, ndoicuai Tûpa ñehe opihañemoñetaêhisa pipe yuvireco. ¹⁹ Ndoiyuvinochi iri mbahe têi apo âgua iyavei oyemondo ité mbahe têi pipe. Ndosiquiyei eté opacatu güemimbotarai apo âgua yuvireco. ²⁰ Pe rumo ndapeyembohei eté evocoi nungar mbahe rese Cristo rese peicose, ²¹ supi eté pesenduse porombohesa supi tupri vahe Jesucristo resendar iyavei peyembohese secocuer rese. ²² Ahe yande mbohe yande recocuerai yipindar vahe reya âgua. Esepia, ahe naporai vahe yande mbopa têi yande pihañemoñeta rai apo âgua. ²³ Pesecuñaro catu pe yapisacasa. ²⁴ Peicoño ité avei pe recocuer piasu pipe. Sese niha Tûpa yande apo yande reco ivi tupri âgua yande reco maranehi vaherã supi tupri vahe pipe, inungar ahe.

²⁵ Sese ndaperemira iri chira, iya rumo peñehe ñepepepe mbahe supi tupri vahe rese peyeupe. Esepia niha, yande opacatu ñepepepe ava rete resendar nungar yaico.

²⁶ Peyemboangaipai rene peñemoirose, iyavei ndiyai peñemoiro ari momba peico. ²⁷ Peipota ucai rene Carugar upe peyeupe mbahe apo âgua.

²⁸ Acoi imonda rai vahe, timonda iri eme; toporaviquiño ava iparaisu vahe pítiviã âgua.

²⁹ Ndapeñehe rai chira, iyacatu rumo peñehe tuprira ñehesa aviye vahe pipe ambuae pe ñehe rendusar monguerêhi catu âgua yuvireco yande Yar rese. ³⁰ Peyapoi rene mbahe Espiritu Santo mbovihaêhi âgua. Ahe niha Tûpa ombou yandeu 'toicua ava co cheundar oipisira ari ipa vahe pipe poropisirosa ñepepe reseve vahe yuvireco' oya.

³¹ Peyepēpi co nungar mbahe sui: piha vīracuasa, mbahe mboasi pīratasa, ñemoirosa, pe rāse aisa, opacatu pe ñehe rai, opacatu ambuae mbahe-mbahe tēi sui avei. ³² Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tūpa iñero Guahir Cristo rese pēu.

5

Mara ehira ava Tūpa rahir yuvireco

¹ Pe niha Tūpa rahir sembiaisu peico. Sese peyemonguerēhi catu secocuer moña āgua. ² Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovēhepri Tūpa uve. Ahe aviye ité inungar mbahe siācua vahe chupe.

³ Pe niha Tūpa upendar ité peico. Sese ndapeyemboaguasai chiera iyavei ndapeicoi chira ambuae mbahe naporai vahe pipe, que yemombotasa opacatu mbahe rese. ⁴ Ndapeñehe rai chira que poromochisa rese, que ēgüe ehi tēi vahe rese, anise que co coti-coti tēi vahe rese. Esepia, evocoi nungar ndahei mbahe aviye vahe. “Aviye ndeu” peye catuñora rumo Tūpa upe peico. ⁵ Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvirecoi chira Tūpa povrive iyavei Tahir Cristo povrive. ⁶ Ndapeyembopa ucai chira evocoi nungar ñehesa tecocuer ēgüe ehi tēi vahe upe. Esepia, evocoi nungar mbahe apo pipe sui ou Tūpa ñemoirosa ava seroyasarēhi upe. ⁷ Sese ndapeyemboyai chira evocoi nungar ava rese.

⁸ Peicua niha yipindar peico pītumimbisa nungar mbahe-mbahe tēi pipe. Cūrītei rumo peico tesapesa nungar pipe yande Yar rese. Sese peico tupriño ité Tūpa suindar poroesapesa pipe. ⁹ Esepia, poroesapesa pipe yande recose, yayapo opacatu mbahe tupri ava upe yande reco īvi tuprisave, mbahe supi tupri vahe pipe. ¹⁰ Sese peyembohe catu mbahe Tūpa piha rupindar apo āgua rese. ¹¹ Peyepēpi ité opacatu pītumimbisa nungar ava rembiapo ai, ēgüe ehi tēi vahe sui. Iya peicua uca voira co nungar mbahe. ¹² Esepia, ahe sembiapo yemochīsa ñomipri tēi vireco yuvireco. ¹³ Acoi yamboyecua ucasa rumo evocoi nungar mbahe tesapesa nungar pipe, ahese oyecua tupri secocuer naporai vahe. ¹⁴ Esepia, co tesapesa omboyecua tupri opacatu mbahe recocuer yandeu. Sese aipo ehi:

“Peyemopoāse pe oque vahe nungar, peyepēpi omano vahe nungar pāhu sui.

Ahese niha Cristo pe recocuer resapera” ehi.

15 Sese pemahecua tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe. 16 Peiporu catu ñepei-pei ari yande Yar upe nara pe recoveseve. Esepia, cūrítei tecocuer co ivi pipe mbahe tēi. 17 Sese peico eme ndoyemboaracuai vahe; iya rumo peyembohe catu yande Yar remimbotar apo āgua. 18 Ndahei chira caguar tēi peico, evocoi mbahe ndoporopoisui mbahe tēi apo uca āgua. Peico catura rumo Espiritu Santo pe mbohesa pipe. 19 Peñehe catu Salmo pipe, opacatu Tūpa upendar sapucaisa pipe avei peyeupe; pesapucaí, pemboetei avei opacatu pe piha pipe yande Yar. 20 “Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

Omenda vahe cuaitarã mbiguai reseve

21 Peyemboyeroia catu ambuae rese Cristo mboeteisa pipe peico.

22 Cuña tomboyeroia omer, inungar yande Yar omboyeroia yuvireco. 23 Esepia, imer güembireco cuai āgua secoi, ěgüe ehi avei niha Cristo viroyasar cuai āgua oico. Viroyasar Pīsirosar avei secoi, inungar güetecuer ité sereco. 24 Evocoiyase inungar seroyasar omboyeroia Cristo yuvireco, cuña avei niha ěgüe ehira opacatu omer mboyeroia yuvireco.

25 Iyavei cuimbahe osaisura güembireco, inungar Cristo osaisu opacatu viroyasar, omondo güecocuer chupe nara. 26 ěgüe ehi yande recocuer moatiro yande angaipa sui i pipe Tūpa Ñehengagüer reroyasave. 27 Iyavei oyeupe yande rerec-ora yande reco catuprisa pipe iyavei yande reco quihaēhisa pipe ‘tipo eme que mbahe tēi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe. 28 ěgüe ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae. 29 Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua āgua, oñearo tupri avei. ěgüe ehi avei Cristo opacatu viroyasar upe. 30 Esepia, chupendar ité yaico setecuer nungar. 31 “Sese ava osepara vu, osi güembireco rese güeco āgua; ñuvirío yuvirecoira ñepei ava nungar.” 32 Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa. 33 ěgüe ehi eté ñepei-pei pesaisu pe rembireco pe yeaisu nungar. Iyavei cuña tomboetei tupri omer yuvireco.

6

1 Chīhivahe, pemboyeroia pe yesupa, pe si avei yande Yar raisu pipe. Esepia, ahe niha pe cuaita. 2 Co porocuita yipindar omombehu vahe porovasasa pisi āgua imboaviyesa

pipe aipo ehi: “Pemboeteira pe ru, pe si avei. ³ Ëgüe peyese, pe rorivetera iyavei pe reco pãhumbucu catura co ivi pipe” ehi.

⁴ Iyavei pe iyésupa, pemoñemoiro ucai rene pe rahir. Iyacu rumo pemboacua imboaracuasa tupri pipe, imbohesave avei yande Yar upe saísusa pipe.

⁵ Pe avei no mbiguai, pemboyeroia catura pe rereciar co ivi pipe imboeteisave. Ichui pe siquiyepave avei mbahe tupri pipe mbahe peyapora inungar-ra Jesucristo upe ité mbahe peyapo vaheã viña. ⁶⁻⁷ Peaporaviqui tupri catu chupe nara, ndahei chira rumo pe repiaseño imbovha ãgua tẽi; peaporaviquira rumo pe querẽhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri ãgua. ⁸ Esepia, peicua Tũpa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

⁹ Iyavei pe sereciar, peico tupri aveira pe rembiguai upe pe recoasiẽhisa pipe. Peicua niha pe opacatu Tũpa pe rereciar ivave chini vahe povrive peicose. Ahe niha ndayande raisu yoaviratĩ yande rereco.

Ava Cristo rese yuvirecoi vahe yoepisa resendar

¹⁰ Sese peyemoviracua catu yande Yar rese, ipĩratasa rese avei. ¹¹ Peñearo tupri catu Tũpa pĩratasa pipe pe yemoviracua ãgua Carugar pe mbopa tẽiẽhi ãgua. ¹² Esepia, yande ndahei ava ité amotarẽhisave yayepihamoviracua. Yande rumo yayepihamoviracua espĩritu naporai vahe ndoyecuai vahe upe iyavei co ivi pipendar Carugar ipĩrata vahe pĩtumimbisa pendar reroyaẽhi ãgua. ¹³ Sese peipisi catu opacatu mbahe Tũpa ombou vahe pẽu pe yoepi ãgua. Evocoyase yepe oime tẽira mbahe tẽi pẽu viña, peyemoviracuaño itera rumo chupe.

¹⁴ Ëgüe peye aveira peyemoviracua catu ñehesa supi tupri vahe pipe. Iyavei peyoepira pe reco ivi tuprisa pipe. ¹⁵ Peyemoingatu voi Tũpa Ñehengagüer ñeroisa resendar mombehu ãgua yepi. ¹⁶ Iyavei pereco catu Tũpa rese pe yeroyasa peyese. Ahe inungar sundao yoepisa. Ipipe peyoepira carugar uhu tata resendar nungar pe ãtoisa sui. ¹⁷ Poropĩsirosa inungar sundao ãca ndiru, ipipe tapeyoepi; peiporu avei Tũpa Ñehengagüer, ahe niha inungar quise pucu Espĩritu vireco vahe. ¹⁸ Peyeroqui catu Espĩritu pĩratasa pipe ari yacatu rupi Tũpa upe opacatu yeruresa pipe. Pemahemoha catuño ité pe yeruresa pipe. Peyeroquiño ité avei opacatu ava Tũpa reroyasar rese yepi. ¹⁹ Peyeroqui avei che rese. Evocoyase Tũpa tombou che ñehe ãgua cheu che siquiyẽhisa pipe ñehesa ñepĩsirosa icuapi ramo vahe cua uca ãgua ava eta upe. ²⁰ Tũpa niha che cuai co ñehesa mombehu ãgua. Ichui

tēi cūritei soquendapri aico. Peyeroqui catu che rese che siquiyeēhisa pipe co ñehesa mombehu āgua.

Ñehesa ipa vahe

²¹ Yande rivri Tíquico, yande rembiaisu, che p̄tiviisar omboaviye vahe ocuaita yande Yar upe mboraviquisa rese, ahe omombehura opacatu che recocuer, mbahe che rembiapo avei p̄u. ²² Sese amondo eipeve p̄u ore recocuer mombehu āgua ‘ipipe toyemonguerēhi catu yuvireco’ viya.

²³ Yande Ru Tūpa iyavei yande Yar Jesucristo tomondo opacatu viroyasar upe teco catupri āgua, iporoaisu āgua, oyese yeroya āgua avei. ²⁴ Tūpa tosovasa opacatu yande Yar Jesucristo raisupar saisusa ñepeí reseve vahe pipe. Aipo rupive.

PABLO REMBICUACHIA FILIPO PNDAR UPE FILIPENSES

Pablo mahenduhasa Jesús reroyasar Filipo pndar upe

¹ Che, Pablo, iyavei Timoteo oroico Jesucristo rembiguai. Aicuachía co che ñehe pëu, pe Tūpa upendar Jesucristo rese peico vahe tecua Filipo ve, Jesús reroyasar rãrosar uve, seroyasar rese ihañeco vahe upe avei. ² Yande Ru Tūpa, yande Yar Jesucristo tape rovasa pe reco tupri ãgua.

Pablo yeruresa Jesús reroyasar rese

³ Pe rese che mahenduhasa pipe, “Aviye ndeu” ahe Tūpa upe yepi. ⁴ Iyavei che ayeruresa, ari rupi ayeroqui opacatu pe rese Tūpa upe che viharetesa pipe yepi. ⁵ Esepia, oyoya yañepitivii Jesucristo resendar ñehesa icatupri vahe rese, acoi pe seroya ramo suive. ⁶ Che aicua co Tūpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevise yande Yar Jesucristo.

⁷ Aviye ité aipo rupi che pihañemoñeta areco opacatu pe rese. Esepia, che opoaisu ité. Opacatu niha oyoya yaipisi Tūpa porovasasa yepe co che roquendasave añ, anise que co coti rupi aico mborerecuar rovaí co ñehesa písirosa resendar repi ãgua iyavei amboyecua vaherã ahe ñehesa supi tupri vahe yuvireco chupe. ⁸ Tūpa oicua ité che opoaisu etepri opacatu. Esepia, Jesucristo niha pe raisu uca cheu. ⁹ Che aporandu vite Tūpa upe che yeruresa pipe: “Toicua tupri oaracuasa pipe oyeaisu catu-catu iri ãgua yuvireco” ahe pëu. ¹⁰ Ipipe sui peicuara mbahe aviye catu vahe poravo ãgua yepi; ëgüe peye aveira pe recocuer moatiro ãgua peico. Evocoyase ndipoi chira angaipa pe rese acoi Jesucristo ouse curi. ¹¹ Perecora pe recocuer aviye vahe ité Jesucristo ombou vahe pëu Tūpa mboetei ãgua.

Cristo Pablo recovesa ité secoi

¹² Che rivireta, aipota peicuara co mbahe tēi co oyapo vahe yuvireco cheu, ahe ichui setá catu ava osendura Jesucristo resendar ñehesa yuvireco. ¹³ Evocoyase opacatu mborerecuar guasu poraviquisa pndar iyavei opacatu ambuae ava oicuapa che roquendasas Jesucristo rupi che guata sui tēi yuvireco. ¹⁴ Iyavei setá etepri yande rivri che repiase soquendapri che recose yuvireco, oyemonguerēhi catu Tūpa Ñehengagüer mombehu ãgua osiquiyeēhisa pipe. Yande Yar rese evocoyase oyeroyá catu yuvireco.

¹⁵ Supi eté oime ava oñhe angahu tēi vahe Jesucristo rese che reroĩrosa pipe tēi. Oime rumo amove ava oñhe tupri Jesucristo rese opihañemoñeta tuprisa pipe. ¹⁶ Evocoi ava oñhe tupri oporoaisusa pipe, ahe oicua cohava che roquendase yuvireco, “Co ñehesa Tũpa ñehes pĩsirosa resendar, ahe supi eté vahe, ndahei temira tēi” ahese. ¹⁷ Evocoi ambuae ava Cristo rese oñhe angahu tēi vahe oyeupe nara tēi oipota mbahe. Ahe che reco momara pota catu co che roquendasave che rēi vitesese. ¹⁸ Mara etemo che areco aipo mbahe-mbahe tēi viña. Yepe amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mboviha.

Che mboviha catu aveira. ¹⁹ Esepia, che aicua co opacatu mbahe-mbahe tēi sui añepisiora pe yeruresa pipe iyavei che pĩtĩvĩra Jesucristo Espĩritu. ²⁰ Che aipota ité, asãro avei opacatu che recocuer sui che chĩhĩ ãgua añehes vaheerã opacatu che siquiyehisa pipe. Evocoyase yepe amanora, anise aicovera, toboetei catu ava Cristo che recocuer repiase yuvireco. ²¹ Esepia, Cristo che recovesa ité secoi; amanose rumo, aviyeño itera cheu. ²² Aicove vitesese co ivi pipe, aicatura aporaviqui tupri yande Yar recocuer rese. Evocoyase ndaicuai uma revo aviyeera cheu. ²³ Ndaicatui co ñuvirĩo che pihañemoñetasa rereco: amove amano pota che so ãgua ivave Cristo pĩri. Ahe aviye catura cheu viña. ²⁴ Pẽu nara rumo aviye catu aicove vitesese co ivi pipe. ²⁵ Sese che aicua aicove vite vaheerã pe pĩtĩvĩ vite ãgua, pe guata tupri vite catu ãgua iyavei pe viharete catu ãgua pe Jesús reroyasa pipe. ²⁶ Evocoyase che rereco vitera peye pe pĩri. Ahese pe viharetesa pipe, “Imboeteipri Jesucristo tasecoi” aipo peyera che repiase.

²⁷ Co catu toyoya tupri pe recocuer co ñehesa aviye vahe Jesucristo resendar rese. Evocoyase asose pe repia, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe pihañemoñetasa yoyasa resendar iyavei pe poraviqui pĩratasa resendar pe poreroyasave co ñehesa poropĩsirosa resendar rese. ²⁸ Iyavei ndapeyembosiquiyei chira pe amotarẽhimbar sui. Evocoyase ahe oicuara yuvireco chupe ité Tũpa omondora imocañi ãgua; pe rumo Tũpa pe pĩsiora curi. ²⁹ Supi eté ndahei Jesucristo recocuer reroya ãgua güeraño Tũpa oipota pẽu, sese pe yemombaraisu ãgua avei oipota. ³⁰ Esepia, pe, che avei oyoya tupri yaporaviqui pĩrata yande amotarẽhimbar pãhuve yaico. Iyavei acoi pesepia yipĩndar che aporaviqui pĩrata che amotarẽhimbar pãhuve vichico, iyavei cũritei peyandu mara ahe aporaviqui pĩrata vite ipãhuve yuvireco.

2

Cristo yemominisa, seco ivatesa resendar avei

¹ Iyavei Cristo pe monguerēhi, pe mbovīha oporoaisusa pipe oico, Espiritu avei secoi pe rese. Peyeaisu tupri iyavei pe yeaisusa pipe peñepitivī. ² Sese che mbovīha catu peye: perecora pīhañemoñetasa ñepei reseve, oyoya guasu avei peyeaisura, oyoya aveira pe pīhañemoñetasa, ñepei reseve mbahe pe remimbotar rese avei. ³ Ndapeyapoi chira mbahe peyeupe güeraño tēi. Ndapeyapoi chiaveira mbahe pe yemboivate aisave. Iyacatu rumo pe reco yemominisa pipe ambuae aviye catu perecora peyesui. ⁴ Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri āgua.

⁵ Inungar Cristo pīhañemoñeta, ēgüe peye tupri aveira.

⁶ Yepe ahe Tūpa recocuer vireco, “Taseya eme Tūpa recocuer areco vahe ivive che so āgua” ndehi.

⁷ Opa ité rumo oseya, oyemboava inungar mbiguai tēi ou.

⁸ Ēgüe ehi oyemomini.

Vu porocuaita reroyasa pipe ou iyavei omano poromochisa pipe curusu rese.

⁹ Sese Tūpa omboivate catu, omondo avei sererguā ivate catu vahe opacatu ambuae rer sui.

¹⁰ Evocoyase ahe terer ivate catu vahe renduse ‘toñenopiha opacatu iva pendar, ivi pipendar, opacatu omano vahecuer avei yuvireco’ oya.

¹¹ Ichui toicua opacatu, “Jesucristo ité yande Yar” tehi yande Ru Tūpa mboetei āgua yuvireco.

Jesús reroyasar tesapesa nungar yuvirecoi co ivi pipe

¹² Evocoyase che rembiaisu, yepe che amombri aico pe sui viña, iya rumo pe che reroya vite ité peye inungar aicose pe pāhuve cuese. Che aipota peicora pīsirosa pipeño ité Tūpa mboeteisave ichui pe siquiyesa pipe. ¹³ Esepia, Tūpa ombou pe querēhisa semimbotar apo āgua. Güemimbotar rupi avei ombou pīratasa imboaviye āgua pēu.

¹⁴ Peyapo opacatu mbahe pe ñehe-ñehe tēiēhisa pipe, pe yepoepi-epiēhisa pipe avei. ¹⁵ Sese tipo eme mbahe pe rembiavi que pe reco raisa pe rese. Evocoyase peicora Tūpa rahir ndayangaipai vahe ava mbahe-mbahe tēi oyapo vahe pāhuve. Ahe ipāhuve pe recocuer osesapera, inungar tataendi osesape pītumimbisave. ¹⁶ Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa ēgüe ndehi tēi vaherä. ¹⁷⁻¹⁸ Jesucristo recocuer rese pe yeroyasa, ahe inungar mbahe seropovēhepri Tūpa upe. Aviyeteramo ichui tēi che yucara

yuvireco. Ahe omboaviye tupri itera pe porerecosa Tūpa upe. Yepe che yucara yuvireco viña, che rumo ayemboviñañora opacatu pe rese. Pe avei, pevñañora che rese.

Pablo oicuachía Timoteo, Epafrodito recocuer resendar

¹⁹ Che ayeroya yande Yar Jesús rese amondo pihaivi vaherã Timoteo pe repia. Ahe omboveyise ñehesa pe recocuer resendar, ahese che aviharetera. ²⁰ Iyavei ndipoi eté ambuae ava Timoteo nungar che piñañemoñetasa rupi tupri imahenduha vahe pe rese pe reco tupri ãgua. ²¹ Esepia, opacatu oseca güemimbotar tēi apo ãgua, ndosecai eté Jesucristo remimbotar yuvireco. ²² Pe niha peicua Timoteo reco tupriisa opacatu upe. Iyavei che pítivii Tūpa Ñehengagüer mombehu ãgua, inungar chihivahe oipítivii oyesupa, ãgüe ehi che pítivii oico. ²³ Sese che aipota imondo ãgua pe repia acoi aicuase mara ehira che rereco yuvireco. ²⁴ Che rumo ayeroya yande Yar rese aso pihaivi vaherã che teieté pe repia.

²⁵ Iyavei revo aviye catu co yande rivri Epafrodito amboveyira pe piri ahe pembou vahe che pítivii ãgua mbahe cheu ipane vahe rese. Ahe che ndugüer oporaviqui pĩrata vahe Tūpa upe. ²⁶ Esepia, ahe pe repia pota ité opacatu. Iyavei ahe ehiño oico pēu peicuase imbaheasi. ²⁷ Supi eté imbaheasi oico, seni eté omano viña. Ipare rumo Tūpa oiparaisuereco, ndahei ahe güeraño oipítivii, che avei che paraisuereco co viharēhisa yeapi-apiñoēhi ãgua cheu. ²⁸ Sese che amondo pota poyava ité pe piri sese pe yemboviha iri ãgua, che mboviha iri ãgua avei. ²⁹ Peipisi tupri pēu iyepotase pe viharetesa pipe. Esepia, ahe yande rivri yande Yar rese secoi vahe ité. Pesaisu itera evocoi nungar ava yepi. ³⁰ Yande Yar rese oporaviquise che piri seni omano. Ahe niha oyemondo ité mbahe-mbahe tēi porara ãgua che pítivii pipe. Esepia, pe ité ndapeicatui che pítivii peye.

3

Oicoete ai vahe ité

¹ Iyavei, che rivireta, peyemboviñaño yande Yar rese peicose. Ndachecuerai eté ñehesa aicuachía vahecuer cuachía iri ãgua pēu. Iyavei aviye catu ité pēu nara. ² Peñearo acoi ava cave nungar tēi sui, oyapo vahe mbahe tēi iyavei güetecuer omomara tēi vahe. ³ Yande rumo imbocircuncidapri nungar supi eté vahe Tūpa mboyeroyasar yaico. Esepia, yayerure Espíritu pipe Tūpa upe; yayemboviha avei Jesucristo reroysasar yande recosa rese. Ndahei yande retecuer rese tēi yayeroya, ⁴ yepe che supi eté ayeroya catura ambuae ava sui evocoi nungar mbahe rese viña. ⁵ Esepia, che imbocircuncidapri aico ocho ari pipe che hare, israelita, Benjamín

suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoiyase ayembohe tupri fariseo aracuaa judío porocuaita resendar rese vichico. ⁶ Ipípe sui tēi eté aseca-seca catu ayapo vaheṛã mbahe opacatu ava Jesucristo reroyasar upe vichico. Co porocuaita reroyasa rese rumo ndipoi eté ava “mara” ehi vahe yuvireco cheu. ⁷ Opacatu co mbahe avíye ité cheu aracaco viña. Cūrítei rumo Jesucristo rese aicose, ēgüe ehi tēi vahe nungar areco. ⁸ Iyavei opacatu que ambuae mbahe avíyera cheu viña, areco rumo inungar ití che Yar Jesucristo recocuer cuasa pípe. Opacatu ahe mbahe aseya Cristo rese che reco ãgua. Supi eté Cristo rereco ãgua areco opacatu ambuae mbahe ití nungar tēi ⁹ ‘taico sese’ che yapave. Ndahei porocuaita mboavíyera rese tēi aseca che reco catupri ãgua, che rumo aseca Jesucristo rese che yeroyasa pípe sui ēgüe ahe vaheṛã. Ēgüe ehi eté Tūpa che písi seco catupri vahe nungar Cristo rese che yeroyasa pípe. ¹⁰ Che aipota ité Cristo cua tupri catu ãgua. Iyavei areco pota pīratasa icuerayeví agüer resendar cheyese. Iyavei aipísi pota iparaisu agüer. Iyavei inungar ahe omano, ēgüe ahe pota avei. ¹¹ Ēgüe tahe avei che cuerayeví ãgua omano vahe pãhu sui, ahe co che asãro vichico.

Pablo osupiti pota ité güeco maranehi ãgua

¹² “Asupiti ité opacatu co mbahe” ndahei eté. Iyavei, “Ndaseco marai vahe ité aico” ndahe vítei chietera. Che rumo aseca víte ahe tecocuer che recorã. Esepia, Jesucristo che písi ité oyeupe nara. ¹³ Che rívíreta, “Che ae tēi co tecocuer ihívi vahe opa ité ayapo vichico” ndahei chira pēu. Co rumo mbahe che ayapo, ayemboesarai opacatu che reco agüer sui. Iyavei opacatu che recovesa rese aguata tenondeño ité. ¹⁴ Esepia, Tūpa che renoi ivave che so ãgua aipísi vaheṛã iporerrecosa íva pendar Jesucristo rese che recose. Ahe niha aipota catu ité cheyeupe nara.

¹⁵ Aipo rupi iya yande píhañemoñetara opacatu yande yaracua tupri vahe. Que revo yande píhañemoñetase que ambuae mbahe rese tēi, ahe Tūpa oicua ucara yandeu. ¹⁶ Co rese rumo yaicora yande yembohesa yareco vahe rupi tupriño ité.

¹⁷ Che rívíreta, peico che nungar iyavei pemahecua tupri ava ore recocuer moñasar rese. ¹⁸ Iyavei amombehu setá yu-pagüer pēu, cūrítei amboyeví iri che yasehosa pípe imombehu pēu. Setá ité oime ava co ñehesa Cristo mano agüer curusu resendar amotarēhimbar. ¹⁹ Ahe rumo imocañipirã yuvirecoira curi. Oyemonguerēhi opacatu mbahe tēi apo ãgua rese yuvireco yepi. Ahe niha otūpa nungar ité víreco. Iyavei güeco ívate aisa pípe oyapo mbahe tēi yande mochi ai vahe yuvireco. Co ívi pípendar mbahe-mbahe tēi reseño ité

ipihañemoñeta yuvireco. ²⁰ Yande rumo ivave nara ité yaico. Iyavei yasãro ité yaico iva sui ou vaheã yande Pĩsirosar, ahe yande Yar Jesucristo. ²¹ Ahe opĩratasa pipe virecora opacatu mbahe opovrive. Ahe opĩratasa pipe avei osecuñaropara yande retecuer ěgũe ehi tẽi vahe, ahese inungar ahe setecuer sendi yai, nimarai vahe, ěgũe yahe aveira yande yaico.

4

Yayemboviha yande Yar rese yepi

¹ Sese che rivireta, che rembiaisu, peyemoviracuara yande Yar rese yepi. Che niha opoepia pota ité. Pe inungar porerecosa imbouprĩ peico cheu. Esepia, che vihasa ité peico.

² Ambuae mbahe, Evodia iyavei Síntique toyuvirecoi oye-cupihir nungar ité yande Yar reroyasa pipe yuvireco. ³ Nde niha che pĩtivii tuprĩ vahecuer che poraviquisa rese eve. Eipĩtivii evocoi cuña. Esepia, ahe niha oyembopihavĩracua ité che pĩtiviise Tũpa Ñehengagũer pĩsirosa resendar mombehu ãgua yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Tũpa cuachiar tecovesa apirẽhi vahe resendar pipe.

⁴ Peyemboviharete ari yacatu rupi yande Yar rese yepi, “¡Peyembovihaño ité!” ahe aipo pẽu. ⁵ Pemboyecua catu opacatu ava upe pe reco mbegũesa. Esepia, cõimi yande Yar yevi iri ãgua yandeu.

⁶ “¿Mara ahera pĩha vichico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Tũpa uve, peporandura evocoi mbahe rese iyavei, “Aviye ndeu” peyera chupe. ⁷ Evocoyase Tũpa omondora güeco tuprisa pẽu, pe Jesucristo rese peico vahe. Co teco tuprisa niha aviye catu ité opacatu ava pihañemoñetasa sui. Ipipe sui Tũpa osãrora pe pĩha, pe pihañemoñetasa avei pẽu.

Yandepihañemoñetara opacatu mbahe aviye vahe rese

⁸ Co ipa, che rivireta: yande pihañemoñetara opacatu mbahe supi tuprĩ vahe rese, poromboetei ãgua rese, mbahe ihĩvi vahe rese, mbahe maranehi rese, mbahe yande mboviha vahe rese, opacatu mbahe aviye vahe icuapri vahe rese. Iyavei yande pihañemoñetara que ambuae mbahe aviye vahe rese, imboeteipri vahe rese avei.

⁹ Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoyase Tũpa güeco tuprisa reseve secoira pe rese.

Filipo pendar porerecosa Pablo upe

¹⁰ Aviharete yande Yar rese. Esepia, pemahenduha irimi che rese pe porerecosa mbou ãgua cheu. “Sesarai yuvireco che sui” ndahei chira pëu. Pe rumo yipindar ndapeicatui eté che pítivii ãgua peye. ¹¹ “Ipane mbahe cheu” ndahei chira pëu. Esepia, ayembohe che viharete ãgua mbahe che rembiereco rese. ¹² Aicua mara yahe yande paradisusa pipe yaico, aicua avei mara yahe mbahe rereco ati ãgua. Ayembohe avei che viha ãgua opacatu mbahe oimese cheu, que chehitarose, ndache riépoise, que oimese sumbire vahe mbahe cheu, que mbahe ipanese cheu. ¹³ Aicatu opacatu mbahe uve che yemoviracua ãgua. Esepia, Cristo ombou che pírata ãgua. ¹⁴ Pe rumo peyapo mbahe aviye vahe cheu che pítivii eteprisave peye mbahe-mbahe tēi oimese cheu.

¹⁵ Iyavei pe Filipino pendar peicua avei acoi yipindar peipisise pīsirosa resendar Tūpa Ñehengagüer acoi che sose Macedonia sui, ndipoi eté Jesús reroyasar ambuae tecua pendar iporereco vahe yuvireco che rese. Pe güeraño pembou pe porerecosa, “Aviye” pe hesa pipe che pítivii ãgua. ¹⁶ Iyavei aicose Tesalónica ve, pembou pe porerecosa che ñuvirío yupagüer che pítivii ãgua. ¹⁷ Ndachepihañemoñetai mbahe arocuaño tēi vaherã pe sui. Che rumo aipota Tūpa omboyevira pëu co pe porerecosa pembou vahe cheu. ¹⁸ Che opa aipisi pe porerecosa Epafrodito upe pembou vahe. Evo-coiyase oimeño ité iyavei sumbire vite cheu. Ahe pembou vahe cheu aviye ité, inungar itaisi sñacua vahe, iyavei inungar mbahe seropovēhepri aviye vahe Tūpa upe. ¹⁹ Evocoiyase yande Ru Tūpa, ombahe eta porañete vahe sui omondora opacatu mbahe ipane vahe pëu Jesucristo rese oime vahe. ²⁰ ¡Ëgüe tehi timboeteisa yande Ru Tūpa! ¡Ahe apirēhi vahe secoi yepi!

Ñehesa ipa vahe

²¹ Aviye, pemombehu che mahenduhasa opacatu Tūpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pëu. ²² Iyavei opacatu ambuae yuvirecoi vahe cohava Jesús reroyasar iyavei acoi mborerecuar guasu rētave yuvirecoi vahe, ahe ité avei omondo omahenduhasa yuvireco pëu.

²³ Yande Yar Jesucristo tape rovasa opacatu. Aipo rupive.

PABLO REMBICUACHIA COLOSA PNDAR UPE COLOSENSES

Pablo mahenduhasa Jesús reroyasar Colosa pndar upe

¹ Che, Pablo, Jesucristo apóstol aico Tūpa remimbotar rupi yande rivri Timoteo reseve. ² Co aicuachía pēu, pe Cristo rese peico tupri vahe Colosa ve, Tūpa upendar peico vahe. Yande Ru Tūpa tape rovasa, tombou pe reco tupri āgua pēu.

Pablo yeruresa Jesús reroyasar rese

³ Ari yacatu ore yeroqui pipe, “Aviye ndeu” orohe yande Yar Jesucristo Ru Tūpa upe pe rese. ⁴⁻⁵ Esepia, oroyandu acoi oyepota ramosē Tūpa ñehe supi eté vahe, aviye vahe pīsirosa resendar pēu, peyapisaca tupri sese. Ipipe sui peyeroya ivave pe reique āgua Tūpa porerecosa pisi āgua. Ahe ichui peyeroya tupri Jesucristo rese iyavei pesaisu opacatu ambuae Tūpa rembiporavo yepi. ⁶ Co ñehesa imombehusa avei opacatu ivi rupi, setá ava oipisi tupri avei yuvireco. Inungar acoi pesenduse yipindar Tūpa porovasasa resendar ñehesa, ipipe sui peicua tupri catu ahe porovasasa supi eté vahe. ⁷ Co ñehesa yande rembiaisu yande mboetasa Ēpafra pe mbohe. Ahe mbia yande Yar Jesucristo rese oporaviqui vahe ore rupi, ocuaita viroya tupri vahe pe pāhuve. ⁸ Ahe omombehu oreu Espiritu pipe pe ore raisusa resendar.

⁹ Sese avei ore aipo nungar rendu ramosēve ndoroyeroquipai pe rese. Oroyeroqui, oroporandu pe rese ‘toicua tupri opacatu Tūpa remimbotar ombahecuasa Espiritu suindar pipe, senducua tupri pipe avei yuvireco’ ore yapave pēu. ¹⁰ Ipipe sui tapeguata tupri yande Yar rupi seroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipipe sui avei tapeicua tupri catu Tūpa recocuer peico. ¹¹ Iyavei tombou catu pe momirata āgua güecocuer pīratasa pipe sui. Evocoyase oimese que mbahe tēi pēu, peñemosañora pe reco mbegüesa pipe. ¹² “Aviye ndeu” peyera pe viharetasa pipe yande Ru Tūpa uve. Esepia, ahe omoingatu pe recocuer peipisi āgua iporerecosa oime vahe opacatu sembiporavo upe acoi yuvirecoi vahe Tūpa poroesapesa pipe. ¹³ Ahe niha yande pīsiro Carugar povri sui. Ēgüe ehi yande reraso Guahir güembiaisu povri. ¹⁴ Ahe Tahir yande pīsiro iyavei yande angaipa rese iñero yandeu.

Jesús omano curusu rese Tūpa upe opacatu mbahe moingatu āgua

¹⁵ Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yipisuive ivate catu vahe opacatu mbahe yapopri sui. ¹⁶ Esepia, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapopri opacatu iva pendar mborerecuar, mborerecuar guasu iyavei mborerecuar ivate catu vahe. Ēgüe ehi ipipe sui opacatu mbahe yapopri, chupe nara avei. ¹⁷ Ahe oicove yipisuive aracahe opacatu mbahe reimeēhi viteseve. Ahe avei omoime vite opacatu mbahe yandeu. ¹⁸ Iyavei ahe niha yande rerecuar tenonde secoi yandeu opacatu seroyasar yaico vahe. Esepia, ahe rane yipindar vahe iyavei ahe rane avei ocuerayevi. Evo-coiyase ahe ivate catu vahe opacatu sui. ¹⁹ Esepia, Tu oipota opacatu güecocuer reseve secoi āgua sese yepi. ²⁰ Iyavei 'che Rahir recocuer pipe sui taroyevi iri opacatu mbahe cheyeupe ivi pipendar, iva pendar avei' oya. Ēgüe ehi Jesús oipiyere vuvu curusu rese Tūpa upe opacatu mbahe moingatu āgua.

²¹ Yipindar pe pihañemoñeta raisa pipe sui tēi amombri Tūpa sui peico yamotarēhisa pipe mbahe pe rembiapo ai rese. ²² Cūritei rumo Tūpa iñero pēu pe reroyevi oyeupe Cristo mano pipe. Ahe niha ēgüe ehi Vu rovai ipehapri pe rereco oyeupe nara, pe reco maranehi āgua mbahe aviēhisa pipe ava rovaque. ²³ Ēgüe peye āgua rumo peyemoviracuaño itera Cristo rese pe yeroyasa pipe yepi. Ndapeyepipi chiaveira mbahe oime vaherā rese pe yeroyasa sui pesendu vahe co ñehesa ñepisirosa resendar pipe. Ahe imombehusa opacatu ivi rupi. Che niha Pablo, icuaipri, aico co ñehesa mombehu āgua.

Pablo icuaita Jesús reroyasar rese hañeco āgua

²⁴ Cūritei aviha pe rese che yemomborarasa pipe. Ēgüe ahe iporara che rete rese cohove vichico. Ēgüe ehi avei Cristo oye-momborara vite viroyasar rese. Esepia, yande seroyasar setecuer nungar yaico. ²⁵ Jesús reroyasar pitivii āgua niha Tūpa che cuai. Sese amombehu opacatu iñehengagüer pēu pe reco tupri āgua rese. ²⁶ Ahe ñehesa aracahe suive ndicuasai vahe ité. Cūritei rumo Tūpa omboyecua viroyasar upe. ²⁷ Chupe ité omboyecua pota co ñehesa porañete vahe omboyecua ramo vahe ava ndahei vahe judío upe. Co ndicuasai vahe, ahe Cristo pe rese secoi vahe. Co yande remiaro yareco vaherā teco ori porañete vahe curi.

²⁸ Ore niha Cristo recocuer oromombehu opacatu ava upe. Orombohe avei ava yaracua tupri āgua ore aracuasa pipe 'toyuvirecoi tupri ité Cristo rese Tūpa rovai' ore hesa pipe.

29 Co rese niha che aporaviqui etepri opacatu Cristo pĩratasa pipe.

2

1 Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cua-parēhi recocuer rese avei ² ‘toyemonguerēhi catu, toyem-boyoya guasu oyeaisusa pipe yuvireco’ viya. Iyavei ‘senducua tupriisa pipe toyuvirecoi mbahe tupri pipe’ viya opacatu pēu. Esepia, ichui avei peicua tupriira co mbahe imboye-cuapi ramo, ahe niha Cristo. ³ Ahe vireco opacatu mbahe yande mboaracua āgua, mbahe renducua tupri āgua avei. ⁴ Aipo mbahe amombehu pēu ava oñehe tupri aisa pipe tēi pe mbopaēhi āgua. ⁵ Iyavei yepe amombri aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco ñvisa pipe, ndapeyepipiise co coti rupi Jesucristo reroyasa sui. Sese che mbovihareteño ité peye.

Jesús suindar tecocuer piasu

⁶ Evocoyase inungar acoi peipisi Jesucristo pe Yarā, ēgüe peye aveira peico sese ari yacatu rupi ⁷ pe yemoviracuasa pipe. Pe yembohesa rese peyemomirata catura Cristo rese pe yeroyasa pipe. Iyavei, “Aviye ndeu” peye itera Tūpa upe ari yacatu yepi.

⁸ Peicua catu, peyembopa ucai rene aracahendar tēi ava aracuasa pipe. Esepia, ahe ēgüe ehi tēi vahe, ava suindar tēi yembohesa, ivi pipendar ava seco ivate catu vahe pihañemoñetasa tēi. Ndahei Cristo suindar porombohesa.

⁹ Esepia, Cristo vireco opacatu Vu Tūpa reco oyese. ¹⁰ Evocoyase pe pereco Tūpa reco Cristo rese peicose. Ahe opacatu mborerecuar ivi pipendar iyavei iba pendar rerecuar secoi. ¹¹ Iyavei sese peicose, ahese inungar imbocircuncidapri peico. Ndahei rumo pe rete rese iyavei ndahei ava rembiapo tēi. Co rumo Cristo oyapo vahe pe recocuer rese. Esepia, ahe virocuva pe recocueraí pe sui. ¹² Pe āpiramosa pipe ndoyavi pe recocueraí ñotimbrí Cristo reseve. Ēgüe ehi avei ndoyavi pe recocuer ocuerayevi vahe seseve avei, peyeroyase Tūpa pĩratasa rese. Ahe niha ombogüerayevi vahe Guahir omano vahe pāhu sui. ¹³ Pe niha acoi cuese omano vahe nungar peico Tūpa upe pe angaipa pipe, pe ndahei vahe judío peico vahe. Ahe rumo pe recocuer mbogüerayevi Guahir reseve iyavei iñero pe angaipa rese pēu. ¹⁴ Ahe yande cañi rāgüer rumo opa omboepi. Esepia, yande iporocuaíta pipe yaico imboaviye āgua viña, evocoyase imocañipri tēi yaico ipovrive viña; ombou rumo Guahir

curusu rese yatica ãgua yande cañi rãgüer sui yande renose ãgua. ¹⁵ Ëgüe ehi ahe omano pipe curusu rese carugar, ipovri pendar mborerecuareta reseve secopi. Ëgüe ehi seco reroyi, inungar vavasa pendar ipisipri serasosa opacatu ava rembiepiave.

Peseca ìva pendar mbahe pe recouer upe nara

¹⁶ Evocoiyase toñehe-ñehe tõi eme que ava pe rembiyu rese yuvireco, pe igua rese avei; anise que ndapemboeteise judío pieta, que ari, yasi osẽ ramomi vahe, anise que judío ari mbituhusa avei no. ¹⁷ Esepia, opacatu co mbahe, ahe yipindar vahe, “Ëgüe ehira Cristo ou” hesa tõi yandeu. Co rumo Cristo ité cute. ¹⁸ Peyapisacai rene acoi ava “ndapeipisii chira porerecosa ìva pendar ndaperoyaise ore ñehe” ehi tõi vahe rese pẽu. Acoi ava “Tũpa rembiguai pemboeteira” ehi tõi vahe yuvireco. Ahe avei, “Che seco mbegüe vahe aico” ehi angahu tõi. Iyavei, “Che asepia che quer nungar pipe ìva pendar mbahe” ehi tõi. Esepia, ahe oyemboivate ai oaracua rai tẽisa pipe yuvireco. ¹⁹ Evocoi rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoiyase ahe omboyemboya tupri oyese, ñepeï vahe nungar vireco oyeupe Vu Tũpa remimbotar rupi.

²⁰ Pe omano vahe nungar peico Cristo rese. Evocoiyase ndahe iri co ìvi pipendar pihañemoñetasavrive peico. ¿Maha evocoiyase peroya vite co ìvi pipendar porocuita ãgüe ehi tõi vahe, ²¹ inungar “pepocoi rene co mbahe rese, pehui rene evocoi nungar mbahe” ehi tõi vahe? ²² Opacatu co nungar porocuita ocañi tõi vaherã. Esepia, ahe ava remimbotar tõi yembohesa, iporocuita tõi avei. ²³ Co mbahe aviye angahu aracuasa supi eté vahe. Esepia, seroyasar ahe ehiño oyeruresa uve, oyeecomomini tõi iyavei omombaraisu güetecuer yuvireco viña. Ahe aracuasa rumo ãgüe ehi tõi vahe. Esepia, ndayande pĩtivii eté yande yepipi ãgua yande remimbotarai sui.

3

¹ Cũritei rumo ocuerayevi vahe peico Cristo rese. Sese peseca catu co mbahe aviye vahe ìva pendar. Aheve ìvave Cristo oguapi oĩ güeco mborerecuasa pipe Vu acato coti. ² Pepihañemoñeta mbahe ìva pendar rese, ndahei chira ìvi pipendar mbahe rese tõi. ³ Esepia, cũritei omano vahe nungar peico pe recouerai upe. Iyavei Cristo reseve peico Tũpa piri, inungar-ra ìvave viña. ⁴ Cristo niha yande recovesa ité secoi. Sese ahe oyevi irise curi, ãgüe peye aveira perecora ipiri seco ori porañetesa.

Yande recocuer yipindar iyavei yande recocuer piasu

⁵ Evocoyase pepoi opacatu co mbahe naporai vahe co ivi pipendar tēi pe rese oime vahe sui: ndapeyemboagua-sai chira, ndapeyapoi chira mbahe tēi pe recocuer pipe, ndapeipota rai chira pihañemoñeta raisa, ndapeipota rai chiveira ambuae ava mbahe (esepia, ahe niha oyoya mbahe rahanga tēi mboeteisa rese). ⁶ Acoi oyapo vahe co nungar mbahe, ahe Tūpa ñemoirosa oipisira seroyaēhisa pipe yuvireco. ⁷ Ēgüe peye avei yipindar pe recocuerai pipe peico. ⁸ Cūrítei rumo peseya opacatu co mbahe-mbahe tēi: pe ñemoirosa, pe poroyucaí aisa, pe reco raisa, pe ñehe mara-mara tēisa iyavei pe ñehesa ndayamombehui vahe. ⁹ Ndaperemirai chira peyese. Esepia, pepoi yipindar pe reco ai sui iyavei pe rembiapo ai sui. ¹⁰ Iyavei peipisi tecocuer piasu, aviye vahe. Ipípe peyembohe arí yacatu yande Aposar Tūpa recocuer rese peico, icua tupri catu āgua. ¹¹ Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidapri aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai tēi secoi” ehi vahe. Aníse que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pipe yareco.

¹² Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora. ¹³ Ēgüe peyera peñemosa oyeupe, peñero aveira opacatu oyeupe acoi pe pāhu pendar oñemoirose pēu. Inungar Cristo ñerosa ombou yandeu, pe avei ēgüe peyera ambuae ava upe. ¹⁴ Iyavei peyeaisu catura. Esepia, ahe yande mboyemboya tupri oyese yepi. ¹⁵ Acoi teco tuprisa Cristo ombou vahe pēu, tape mbohe pe pihañemoñeta tupri āgua. Esepia, co rese Tūpa pe renoi ñepeí ava nungar pe reco āgua. Iyavei, “Aviye ndeu” peyera chupe.

¹⁶ Topita tupri Cristo ñehengagüer pe piha pipe. Pe aracuasa tuprisave peyembohe tupri, peyemonguerēhi catu sapucaisa Tūpa resendar rese. Pesapucaí opacatu sapucaisa Tūpa upendar pe pihá pipe, “Aviye ndeu” pe hesave yepi. ¹⁷ Iyavei opacatu que mbahe peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tūpa upe yepi.

Jesús reroyasar cuaita resendar

¹⁸ Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe. ¹⁹ Pe avei

no imer: pesaisu pe rembireco. Perecoi rene pihavĩracuasa pipe.

²⁰ Pe avei no chĩhivahe: peroya aveira pe yesupa. Esepia, ahe yande Yar oipota. ²¹ Pe avei no tu: pemoñemoiro ucai rene pe rahir peyeupe. Esepia, aviyeteramo niquerẽhi iri chira ocuaise pẽu.

²² Pe avei no mbiguai: peroya tupri avei pe rereciar co ivi pipe yepi. Aní chira ahe pe repiaseño pembovihara. Iyacatu rumo pemboyeroyara pe pihañemoñeta tuprisa pipe, Tũpa sui pe siquiyesa pipe avei. ²³ Opacatu mbahe peyapo vahe, peyapo pe querẽhisave yande Yar mboviha ãgua. Ndahei chira ava mboviha ãgua tẽi. ²⁴ Esepia, peicua tupri co: yande Yar omboura oporerecosa yandeundar. Esepia niha, Cristo upe nara ité mbahe peyapo. Ahe niha pe Yar supi tupri vahe. ²⁵ Acoi ava oyapo vahe mbahe naporai vahe, oipisi aveira güembiapo ai repri. Tũpa niha nomboyoaviratii yande raisu.

4

¹ Pe avei sereciar: peyapo mbahe ihĩvi vahe pe pihañemoñeta tuprisa pipe pe rembiguai upe. Peyemomahenduha co rese: pe avei pereco pe rereciar ivave.

² Iyavei no opacatu peyeroqui catu ari rupi pe mahemohasa pipe. “Aviye ndeu” peye Tũpa upe. ³ Peyeroqui avei ore rese. Tore pĩtivii Tũpa oñehengagüer mombehu vite ãgua. Toroñehe vite avei co ñehesa Cristo resendar Tũpa omboyecua ramo vahe rese yandeu. Sese tẽi niha co che roquendasa. ⁴ Evocoiyase peyeroqui che rese, tamombehu tupri catu co ñehesa opacatu upe senducua tupri catu ãgua. Ëgüe tahe che cuaita mboaviye.

⁵ Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye viteseve. ⁶ Pe reco aviye tuprisa pipe peñehera yepi. Iyavei peicua tuprira ñehesa mboyevi ãgua ñepeipei ava uve.

Ñehesa ipa vahe

⁷ Co yande rivri, yande rembiaisu, Tíquico, che pĩtivii tuprisar, ahe oporaviqui tupri yande Yar recocuer rese che rupi. Ahe omombehura che recocuer resendar pẽu. ⁸ Sese co amondo pẽu ore recocuer cua tupri ãgua, pe monguerẽhi catu ãgua avei. ⁹ Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirio mbia omombehura pẽu opacatu mbahe oime vahe cohave.

¹⁰ Aristarco, che ndugüer che roquendasave, omondo omahenduhasa pëu iyavei Marcos, Bernabé rihir. Pe revo pecuaño Marcos so ãgua eipeve; osose pe piri, peipisi tupriñora. ¹¹ Iyavei omahenduhasa omondo Jesús, ahe serer acoi Justo, pëu. Co güerañomi Jesús reroyasar pãhuve judío oporaviqui vahe che rupi yuvireco Tüpa mborerecuasave nara. Ahe niha che mboviha yuvireco yepi. ¹² Epafra avei omondo omahenduhasa pëu. Ahe pe recua pendar ité, Jesucristo rembiguai. Ahe oyerogui vahe pe rese yepi 'toyemoviracua tupri iyavei toyuvirecoi Tüpa remimbotar rupi yuvireco' oyapave. ¹³ Che aicua ité secocuer. Ahe oyemboaqi oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei. ¹⁴ Iyavei yande rembiaisu Lucas, oporoposano vahe, Demas reseve omondo omahenduhasa yuvireco pëu.

¹⁵ Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tüpa reroyasar yuvireco. ¹⁶ Peyeroquire, pemondo co cuachiar Laodicea pendar Jesús reroyasar upe iyeroqui ãgua. Iyavei Laodicea pendar cuachiar rese peyeroqui avei. ¹⁷ Iyavei emombehu Arquipo upe aipo ere: "Emboaviye tupri Tüpa nde cuaisa" ere.

¹⁸ Che Pablo aico. Che ité aicuachía co che mahenduhasa pëu. Tapemahenduha vite che roquendasave che rese. Aviye pëu. Yande Aposar tape pñivi. Aipo rupive.

PABLO REMBICUACHIA YIPINDAR VAHE TESALONICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano reseve iyavei Timoteo, aicuachía co che ñehe pëu, ore rivireta, peñemonuha vahe Tüpa upe tecua Tesalónica ve, yande Ru Tüpa, yande Yar Jesucristo rese peico vahe. Tape rovasa pe reco tupri água yande Ru Tüpa, yande Yar Jesucristo avei.

Tesalónica pendar yeroyasa resendar ñehesa

² Ore, “Aviye ndeu” orohe ari rupi Tüpa upe opacatu pe rese yepi. Iyavei oremahenduha pe rese ore yeruresa pipe. ³ Pe niha yande Yar rese pe yeroya tuprisa pipe peporaviquiño yepi, iyavei pe poroaisusa pipe peyapo mbahe Tüpa upe, iyavei peñemosañõ mbahe tõi upe Jesucristo rãrosa pereco vahe rese. Sese oremahenduha pe rese ari yacatu rupi yande Ru Tüpa rovai. ⁴ Ore rivireta, Tüpa niha pe raisu, oroicua avei ahe ité pe poravo. ⁵ Esepia, acoi oromombehuse ñehesa pĩsirosa resendar, ndahei ñehesa oreyesuindar tõi oromombehu pëu; Espiritu Santo reco pĩratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pãhuve oroicose, oroico tupriño ité, orosecaño avei pe reco tupri água.

⁶ Ipare pemboyeapi ore recocuer peico iyavei yande Yar recocuer avei no. Iyavei yepe peparaisu mbahe-mbahe tõi pãhuve peico viña, peipisiño ité rumo co ñehesa pe vihasa pipe Espiritu Santo ombou vahe pëu. ⁷ Evocoya pe reco pipe pemboyecua catu pe reco catuprisa Tüpa reroyasar Macedonia pendar upe, Acaya pendar upe avei. ⁸ Esepia, pe Tüpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuvireco Tüpa reroyasa pereco vahe peyese. Sese ore ndoromombehu iri chira pe recocuer. ⁹ Esepia, ahe avei omombehu yuvireco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tüpa oicove vahe rupi pe guatasa yuvireco, pe chupe nara mbahe apo água avei no. ¹⁰ Omombehu avei pesãro vahe Tüpa Rahir Jesús iyevi água iva sui yuvireco oreu, acoi Tüpa ombogüerayevi vahe omano vahe pãhu sui. Ahe niha yande pĩsirora Tüpa ñemoirosa ipĩrata vahe ou vaherã sui.

2

Tesalónica pendar yeroyasa mboyecuasa

¹ Ore rivireta, pe niha peicua ore so agüer pe piri ndahei êgüe ehi tõi vahe. ² Peicua tupri avei niha acoi cuese yipindar mara-mara tõi ava ore rereco yuvireco tecua Filipo ve. Tũpa rumo ore pĩtivii oñehengagüer pĩsirosa resendar mombehu ãgua opacatu ore siquiyeẽhisa pipe ore amotarẽhimbar pãhuve. ³ Esepia, ndoroyavii eté ore ñehe iyavei ndoroñehei ore pihañemoñeta raisa tõi pipe pẽu, ndahei avei ore porombopa ãgua oroñehe. ⁴ Tũpa rumo ore recoãha, ichui ore cuai oñehengagüer pĩsirosa resendar mombehu ãgua; êgüe ehi ore ñehe, ndahei ava tõi mbovĩha ãgua. Tũpa yande pihañemoñetasa oicua vahe rumo orombovĩha. ⁵ Peicua niha ore ndoroñehei ñehesa icatupri catu vahe tõi rese pe mbopa ãgua, iyavei ndahei guarepochi potasave tõi oroñehe tupri. Tũpa niha oicua. ⁶ Ore ndorosecai eté ava ore mboetei catu ãgua pe, que ambuae ava eta avei no. ⁷ Ehi oroyandu ucara ore mborerecuasa Jesucristo ore cuaisa pẽu viña; oroyominiño rumo oroico pe pãhuve inungar acoi cuña osãro tupri vahe omembri imboacua. ⁸ Êgüe orohe avei ore pe raisu. Sese ndahei Tũpa Ñehengagüer año oromondo pota pẽu, ore recocuer avei no. Esepia, opoaisú ité. ⁹ Ore rivireta, peyemomahenduha acoi ore paraisu agüer rese, ore poraviqui agüer rese avei ari, pĩtu reseve. Ndahei que ñepeĩ mañeco tõi ãgua mbahe rese oromombehu Tũpa Ñehengagüer oroico pẽu.

¹⁰ Pe niha ore repia peye Tũpa avei oicua, ore reco tuprisa, ore rembiapo supi eté vahe, ihĩvi vahe pe Jesús reroyasar pãhuve. ¹¹⁻¹² Peicua niha, inungar mbia guahir upe, êgüe orohe pe monguerẽhi, pe mbovĩhasa avei ñepeĩ-peĩ opacatu. Iyavei oromondo pe cuaitarã pe reco tupri ãgua Tũpa remimbotar rupi. Ahe niha oñehe pẽu peico vaherã sese imborerecuasa porañetesave.

¹³ Co rese, “Aviye ndeu” orohe Tũpa upe ari yacatu rupi. Esepia, Tũpa Ñehengagüer, oromombehu vahe pẽu, peipisi ité, “Co Tũpa ñehe, ndahei ava tõi ñehe” aipo peye ité pe chupe. Supi eté Tũpa ñehe. Ahe niha osecuñaro ité pe recocuer peroyare. ¹⁴ Ore rivireta, acoi cuese peiporara mbahe-mbahe tõi pe mu eta pãhuve peicose; êgüe ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarẽhisave yuvireco. ¹⁵ Ahe niha oyuca yande Yar Jesús yuvireco. Ahe avei oyucapa Tũpa ñehe mombehusar yuvireco aracahe. Ore avei opa ore mombo yuvireco. Ndoviroyai Tũpa yuvireco iyavei opacatu ava amotarẽhimbar tõi yuvirecoi. ¹⁶ Esepia, acoi oroñehe

potase ava ndahei vahe judío upe iñepisiro ãgua rese, ahe rumo ndoipotai yuvireco oreu. Ipípe sui oyemboangaipa catu yuvireco. Cũritei rumo Tũpa ñemoirosa ipĩrata vahe ou iharive yuvireco cute.

Pablo oso pota iri Tesalónica pendar repia

¹⁷ Ore rivireta, yepe ndayaoepia iri yayepipi raimise yandeyesui, ore piha pipe rumo, “Ahé” oroheño ité pẽu. Iyavei orequerẽhiño ité yepi oroso iri vaherã pe repia. ¹⁸ Orosãha tẽi ore so ãgua pe repia yepi; che Pablo teieté setá yupagüer tẽi aso pota. Carugar rumo ndoipotai. ¹⁹ ¿Ava sui piha orosãro mbahe aviye vahe? ¿Uma ore vihasa? ¿Uma ore mboviharete catura? ¡Peño itera acoi yande Yar Jesucristo yevise curi! ²⁰ Pe ité niha ore mbovihara peye, iyavei oroviha catura pe rese no.

3

¹⁻² Evocoyase che nañemosa irise pe repiaẽhi rese, chepihañemoñeta yande rivri Timoteo mondo ãgua pe repia; “Che güeraño tapita Atenas ve” ahe. Esepia niha, ahe oporaviqui vahe Tũpa upe ore rupi, omombehu vahe co ñehesa piñirosa resendar Cristo suindar ou vahe. Ahe amondo pẽu pe moviracua catu ãgua, pe monguerẽhi catu ãgua avei peyeroya catu vaherã Cristo rese. ³ Evocoyase tipo eme oyembosiquiye vahe co mbahe tẽi pe mombaraisuse. Peicua niha yaiporara rane itera co nungar mbahe. ⁴ Iyavei niha acoi oroico vitesese pe piri, “Yande paraisu rane itera mbahe yavai vahe” orohe voi eté acoi pẽu. Ahe niha cũritei peicua. ⁵ Evocoyase che nañemosa irise, amondo Timoteo ‘¿yuvirecoiño ité piha Tũpa rese?’ che yapave. Che asiquiye, “Aviyeteramo Carugar omondora mbahe tẽi pipe yuvireco” ahe ‘ore poraviqui agüer evocoyase ocañi tẽira’ che hesave.

⁶ Cũritei rumo Timoteo oyevi Tesalónica sui, güeru ñehesa aviye vahe pe resendar oreu pe Tũpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota tẽi peye no; inungar ore pe repiasa pota tẽi avei. ⁷ Sese, ore rivireta, ore paraisusa pãhuve ore mboviharete peye, co oroicuase pe reco tupri Tũpa reroyasa pipe. ⁸ Cũritei ore mopoase catu iri oroyanduse pe yemoviracua tuprisa yande Yar rese. ⁹ “¿Mara yahera piha, ‘Aviye ndeu’ yande he tupri catu ãgua Tũpa upe?” orohe pe reco tuprisa rese, iyavei ore yemboviha catusa rese avei no ¹⁰ pĩtu, arĩ rupi oroporandu Tũpa upe ore so ãgua pe repia eipeve iyavei Tũpa reroyasa ipane vite vahe mboaviye tupri ãgua pẽu.

¹¹ Iyavei ore oroipota ore p̄t̄ivira yande Ru Tūpa, yande Yar Jesucristo avei ore so āgua pe p̄iri. ¹² Evocoyase yande Yar tape moviracua catu, tombou catu avei pe yeaisu āgua, iyavei opacatu raisu catu āgua, inungar ore orovireco pe raisusa. ¹³ Ip̄ipe sui tape moviracua pe reco maranehi p̄ipe pe mbahe aviēhisave yande Ru Tūpa rovai acoi oyevise yande Yar Jesús opacatu ovoya reseve. Ēgüe tehi p̄eu.

4

Teco tupri Tūpa oipota

¹ Ore rivireta, cūritei oroñehe pota p̄eu pe cuaitarã rese yande Yar Jesús rer p̄ipe: inungar cūritei pe recocuer pereco, ēgüe peyeño ité catu peico ore pe mbohe agüer rupi Tūpa mboetei āgua.

² Pe niha, peicua acoi ore pe mbohe agüer yande Yar Jesús rer p̄ipe. ³ Esepia, Tūpa oipota pe reco maranehi āgua oyeupe. “Tipo eme que ñepeí oyemboaguasa t̄ei vahe” ehi. ⁴ Iyavei peico tupri pe rembireco rese pe reco ñvisa p̄ipe Tūpa remimb-otar rupi, iyavei pemboetei tuprira sereco yepi. ⁵ Peicoi rene ava Tūpa ndoicuai vahe reco p̄ipe pe remimb-otar t̄ei apo āgua. ⁶ Tipo eme avei oyapo vahe co nungar angaipa yande rivri reco momara āgua t̄ei. Esepia, Tūpa omondora oñemoirosa ip̄irata vahe evocoi nungar ava upe. Evocoi niha yip̄isuive oromombehu vahe p̄eu. ⁷ Esepia, Tūpa niha yande poravo yande reco maranehi āgua, ndahei angaipa p̄ipe yande reco āgua t̄ei. ⁸ Sese acoi ndosendu potai vahe co yembohesa, ndahei eté ava t̄ei viroïro, ahe rumo Tūpa ité viroïro yuvireco acoi ombou vahe oEspíritu Santo p̄eu.

⁹ Iyavei co peyepãhuve pe yeaisusa rese, ndaicuachía iri chira p̄eu. Esepia, Tūpa ité niha pe mbohe pe yeaisu āgua opacatu. ¹⁰ Ēgüe peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvicha vite catu pe poroaisusa. ¹¹ “Peico tupriño avei pe reco mbegüesa p̄ipe; mbahe pe rembiapo reseño tupri pehañeco; peporaviqui pe po p̄ipe ité” aipo orohe acoi p̄eu cuese. ¹² Evocoyase pe mboyeroyara ava ndahei vahe Jesús reroyasar yuvireco; iyavei ēgüe peyera mbahe p̄eu ipaneēhi āgua avei no.

Oyevira yande Yar co ivi p̄ipe

¹³ Ore rivireta, ore oroipota peicua aveira manosa recocuer; sese ndapeicoi chira pe viharēhisa p̄ipe inungar co ava ndoyeroyai vahe Tūpa rese. ¹⁴ Esepia, yande yaroya: Jesús omano, ichui ocuerayevi. Evocoyase yande avei yaroya

Tūpa Guahir Jesucristo reseve ombogüerayevira opacatu acoi seroyasa pipe omano vahe yuvireco.

¹⁵ Sese co oromombehu pëu, ahe niha yande Yar porombohesa: yande yaicove vite vahe co ivi pipe, acoi oyevise yande Yar, ndahei chira yande rane omano vahecuer sui yayemboya yande Yar rese. ¹⁶ Esepia, yande Yar ité ogüeyi irira iva sui ou mborerecuar ivate vahe ñehesa pipe; ahese oyeendura Arcangel ñehe iyavei Tūpa remimbi moñehe pīratasa. Ahese seroyasar omano vahecuer rane opūhara yuvireco. ¹⁷ Ipare voi yande yaicove vite vahe, serasopri yaicora opacatu iva quiha rese co yande Yar rovaichi āgua ivitu rupi. Ēgüe yahera yande Yar piri yaico vaherā apirēhi. ¹⁸ Sese peyemonguerēhi catu co ñehesa pesendu vahe rese.

5

¹ Iyavei no, acoi ari yande Yar yusa resendar ore ndoroicuachiai chira pëu. ² Esepia, pe peicua tupri co yande Yar ari oyepotara imohaēhisa pipe, inungar acoi imonda rai vahe oyepota pītu pipe. ³ Acoi ava aipo ehise yuvireco: “Opacatu aviye ité yaico, ndipo iri mbahe-mbahe tēi yandeu” ehise, ahese inungar acoi cuña imembirasi aviyeteramo tēi, ēgüe ehi aveira, aviyeteramo tēi icañi oura iharive, ahese ndoicatu chira ichui oñemi yuvireco. ⁴ Pe rumo, ore rivireta, ndahei pītumimbisa pendar nungar peico. Evocoyase oyepotase yande Yar ari, ndahei chira imonda rai vahe nungar pe resapiha tēi ou. ⁵ Esepia, pe opacatu peico vahe Tūpa poroesapesa pipe, ndahe iri yande pītumimbi pipendar yaico. ⁶ Evocoyase ndayaicoi chira co ambuae yuviroque tēi vahe nungar pihañemoñetasa pipe; iyacatu rumo yande yayemopase yande pihañemoñeta tuprisa pipe. ⁷ Acoi yuviroque vahe, yuviroque pītu pipe; iyavei acoi osavaipo vahe, osavaipo avei pītu pipe yuvireco. ⁸ Yande rumo yaico vahe Tūpa poroesapesa pipe. Evocoyase yareco tuprira yande pihañemoñetasa yande reco tupri āgua yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oāca ndiru guarepochi apopri yuvireco oāca repi āgua, yande avei tayareco yande remiaro yande ñepisiro āgua. ⁹ Esepia niha, Tūpa yande poravo ndahei yaico vaherā iñemoirosa pipe nara; ahe rumo yande poravo yasupiti vaherā ñepisirosa yande Yar Jesucristo rembiapo sui. ¹⁰ Esepia, ahe omano yande recocuer rese oyese yande rereco āgua opacatu yande recove vitesse, yamanose avei. ¹¹ Sese peyemonguerēhi catu, iyavei peyemoviracua catu vite peyeupe inungar co peyapo peico.

Pablo omboaracua Jesús reroyasar oico

¹² Iyavei no, ore rívíreta, pemboyeroya acoi oporavíqui vahe yuvireco pe pãhuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco.

¹³ Pemboyeroya iyavei pesaisu tuprí iporavíquisa rese. Peico tuprí avei peyepãhuve.

¹⁴ Iyavei ore rívíreta, pe cuaisa: pemboaracua acoi ndoporavíqui potai vahe imbohe catu água. Iyavei pemonguerêhi acoi niquerêhi iri vahe. Peipítiví avei acoi ndoyemoviracuai vahe Tũpa rese güeco água. Iyavei peñemosañõ opacatu ava uve yepi.

¹⁵ Peicua catu pe rereco megua potasar sui. Ndapemboyeví chira mbahe-mbahe tẽi co pe rereco megua potasar upe. Iyacatu rumo peyapo tuprí mbahe aviye vahe peyeupe, opacatu ava upe avei no.

¹⁶ Peyembovihanõra ari yacatu peico. ¹⁷ Iyavei peyeroquirã ari yacatu rupi no. ¹⁸ “Aviye ndeu” peyera Tũpa upe opacatu mbahe rese. Esepia, ahe niha Tũpa oipota yandeu Cristo rese yaico vahe.

¹⁹ Iyavei ndapemombítuhui chira mbahe Espíritu Santo oyapo pota vahe pe rese. ²⁰ Ndapeyamotarêhi chira Tũpa ñehe imombehuprí. ²¹ Pesãhapa rane opacatu mbahe. Ichui peipísira mbahe aviye vahe peyeupe. ²² Peyepépi opacatu mbahe naporai vahe sui.

²³ Tũpa acoi ombou vahe teco tuprísa yandeu tape pehapa tuprí oyeupe nara. Iyavei tosãro tuprí opacatu pe espíritu, pe hã, pe rete avei pe reco maranehi água co yande Yar Jesucristo yeví irise. ²⁴ Ahe acoi pe poravo vahe oyeupe nara seco tuprí vahe. Ahe omboavíyera opacatu co mbahe.

Pablo imahenduha Jesús reroyasar rese

²⁵ Ore rívíreta, peyeroquí ore rese.

²⁶ Pemboavírave opacatu yande rívrí eipe pendar pe yeo-vaupítesa pípe.

²⁷ Che opocuai yande Yar rer pípe: peyeroquí co cuachiar opacatu yande rívíreta upe.

²⁸ Yande Yar Jesucristo tape rovãsa tupríño pe rereco. Aipo rupive.

PABLO REMBICUACHIA IMOÑUVIRIOSA TESALONICA PNDAR UPE TESALONICENSES

Pablo mahenduhasa Jesús reroyasar Tesalónica pndar upe

¹ Che, Pablo, Silvano, Timoteo reseve, aicuachía co ore ñehe pëu, ore rivireta, peñemonuha vahe Tüpa uve tecua Tesalónica ve, yande Ru Tüpa, yande Yar Jesucristo rese peico vahe. ² Tombou pëu oporovasasa pe reco tupri ãgua yande Ru Tüpa, yande Yar Jesucristo avei.

Tüpa omombaraisura viroyasarëhi Jesucristo yevise curi

³ Ore rivireta, “Aviye ndeu” orohe itera Tüpa upe pe recocuer rese yepi. Esepia, Tüpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe. ⁴ Evocoyase, ore oroñehe pe rese ore vihasa pipe Tüpa reroyasar ñemonuhasa rupi. Esepia, acoi ava mbahe-mbahe tëise pëu, peñemosaño chupe pe Cristo rese pe yeroyasa pipe. ⁵ Co niha omboyecua Tüpa reco ñvisa ava upe. Esepia, ipipe pe rereco omborerecuasave pe reique ãgua. Sese niha, peparaisu vite tëi peico.

⁶ Tüpa omombaraisura acoi pe mombaraisusarer. Iya ité ëgüe ehi vaherã chupe. ⁷ Pe rumo imombaraisupri peico vahe, Tüpa omondora pe pituhu ãgua, ore pituhu ãgua avei, acoi yande Yar Jesús oyevisé tata rendigüer pãhuve ñva sui opacatu güembiguai seco pñrata catu vahe reseve. ⁸ Ahe oura opacatu Vu Tüpa reroyasarëhi mombaraisu ãgua iyavei oyesuindar ñehesa poropñsirosa resendar rendu tëisar mombaraisu avei. ⁹ Evocoi iparaisura yuvireco, imocañipri yuvirecoira apirëhi. Iyavei imboyepepisara amombri yande Yar reco pñratasa porañtesa sui. ¹⁰ Acoi ouse ahe arí pipe, yande Yar imboeteiprira opacatu seroyasar pãhuve; ipãhuve pe peicora. Esepia, peroya ité oromombehu vahe pëu.

¹¹ Co rese oroyeroqui pe rese yepi: oroporandu yande Ru Tüpa upe tape rereco tupri güemienoi pe recosa pipe. Iyavei oroyeroqui chupe, tomboaviye güeco pñratasa pipe opacatu ñepeipei mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe. ¹² Evocoyase yande Yar Jesucristo rer imboeteiprira pe recocuer pipe sui; iyavei pe imboeteiprira peico yande Yar rese peico vahe yande Ru Tüpa, yande Yar Jesucristo pe raisusavé.

2

Yande Yar Jesús yevisa resendar mombehu tuprisa

¹ Iyavei, ore rivireta, ore oromombehu potami pēu opacatu acoi yande Yar Jesucristo yevisa resendar yande monuha vaheṛā oyese. ² Peicua catu, tapepihañemoñeta rerova eme iyavei peyembosiquiyei rene que ava “che añehe Espiritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco pēu. ³ Peicua catu peyembopa ucai rene ñepe yepe ava upe. Esepia, yipindar ari Jesucristo yu āgua renonde, yugüerura mbahe-mbahe tēi aposar. Ahe Tūpa amotarēhisar yuvirecoi vahe. Ahese oyemboyecua ara ava yangaipa guasu vahe. Ahe ocañi tēi vaheṛā. ⁴ Oyemboivate aira opacatu Tūpa rer rerecosar amotarēhisave iyavei ndoipotai chira ambuae mboetei. Oique aveira, uguapi Tūpa rēta pipe inungar-ra Tūpa ité viña. “Supi eté che Tūpa aico” ehi tupri tēira oī.

⁵ ¿Ndapemahenduhai vo acoi che ñehengagüer rese pe pāhuve aico vitesse cuese? ⁶ Co imombitasar peicua cūritei. Ihari oyepotase voi, oyemboyecua. ⁷ Co porocuaita amotarēhisar ndoyemboyecua vitei vahe rembiapo oime cūritei. Co güeraño ipane imombitasar renose āgua ipāhu sui, ⁸ ahese voi oyemboyecua ara ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer pīratasa pipe oyevise curi. ⁹ Yucasa renonde rumo, acoi ava yangaipa guasu vahe oura Carugar pīratasa pipe; güerura güeco pīratasa tuvicha vahe; omboyecua angahura poromondiisa. ¹⁰ Oyapo angahura opacatu mbahe tēi oporombopa āgua oico ava ocañi tēi vaheṛā upe. Esepia, evocoi ava ndosendu potai porombohesa supi eté vahe oñepisiro āgua yuvireco. ¹¹ Sese Tūpa oseyara co porombopasa reroya āgua yuvireco ¹² ‘ipipe tocañi tēi co ava, opacatu mbahe supi eté vahe reroyaēhisar, acoi oyemboiha catu vahe mbahe-mbahe tēi rese yuvireco’ oya.

Iporavopri ipisiropirā

¹³ Ore rumo, “Aviye ndeu” orohera Tūpa upe pe recocuer rese yepi, ore rivireta, yande Yar rembiaisu peico vahe. Esepia, Tūpa niha pe poravo yipisuive pe pīsiro āgua pe reco maranehi āgua rese Espiritu pipe iyavei porombohesa supi eté vahe reroya āgua. ¹⁴ Sese niha, Tūpa oñehe yandeu yande piha pipe co ñehesa pīsirosa resendar pipe, ore oromombehu vahe pēu ‘tovireco che Rahir Jesucristo reco porañetesa’ oya.

¹⁵ Sese ore rivireta, peyemoviracua iyavei peresarai eme acoi oromombehu vahecuer iyavei oroicuachía vahe acoi pēu. ¹⁶ Yande Yar Jesucristo teieté, yande Ru Tūpa avei, yande

raisusa yande rovasasa pipe ombou vahe vihasa apirēhi vahe yandeu iyavei yande reco tupri rāro āgua, ¹⁷ ahe tape monguerēhi, tape moviracua avei opacatu ñehesa aviye vahe rese, opacatu mbahe pe rembiapo aviye vaherā rese avei.

3

Pablo oporandu Jesucristo reroyasar yeroquisa rese oyeu-penara

¹ Ore rivireta, co mbahe ipa vahe amombehu pota pēu: peyeroqui ore rese. Evocoyase toyepota pihaivi yande Yar ñehengagüer opacatu rupi; tipisisa tupri imboeteisa pipe inungar oyepota pe pāhuve. ² Peyerure avei ore repi āgua rese ava ndaseco pōrai vahe, ipihañemoñeta rai vahe sui. Esepia niha, ndaopacatui Tūpa rese ipihañemoñeta yuvireco. ³ Yande Yar rumo seco ivi vahe. Ahe pe recocuer moviracuara iyavei pe rārora mbahe tēi sui. ⁴ Ore oroyeroya yande Yar rovai peyapo vahe rese iyavei peyapo viteño vaherā rese acoi ore pe cuai agüer. ⁵ Yande Yar tape pítivii pe poroaisu āgua inungar Tūpa oporoaisu iyavei Cristo ñemosasa rereco āgua.

Yande cuaita yande poraviqui āgua

⁶ Ore rivireta, opocuai yande Yar Jesucristo rer pipe: acoi ndoporaviqui potai vahe yande rivri pe pāhuve, peyepipiño ichui, acoi ndoviroya potai vahe avei ore porombohesa oromombehu vahe pēu. ⁷ Pe peicua mara peyera ore recocuer moña āgua peico. Ore oroicose pe pāhuve, ndoroico tēi, ⁸ ndorohu tēi avei ambuae tembihu imboepipirēhi. Ore rumo que ñepe mañeco tēiēhi āgua rese oroporaviqui ore cuerai rane ité ari, pítu reseve. ⁹ Iya ité niha mbahe rese ore porandu āgua pēu ore pítivii āgua rese viña; ore rumo oroporaviqui pe ore recocuer rupi pe guata āgua rese. ¹⁰ Acoi oroico vitesse pe pāhuve, oromondo pe cuaitarā: acoi ndoporaviqui potai vahe, ahe tocaru eme. ¹¹ Oroyandu amove aipo pe pāhu pendar yuvirecoiño tēi ndoporaviquii vahe. Evocoi omañeco tēi ambuae ava recocuer. ¹² Ore oromondo acoi ava upe mborocuita yande Yar Jesucristo rer pipe: toporaviqui güeco quiririsa pipe; ipipe sui yuvirecovera.

¹³ Ore rivireta, pecuerai eme mbahe aviye vahe apo. ¹⁴ Oimese ndoviroyai vahe ore remimombehu co cuachiar pipe, peicua tupri evocoi nungar. Peyemboya eme sese. Evocoyase tochĩ ahe. ¹⁵ Pereco eme catu yamotarēhisa chupe; iyacatu rumo pemboaracua catuñora inungar yande rivri.

Ñehesa ipa vahe

¹⁶ Avíye, yande Yar ae tombou güeco tuprisa pe reco tupri ãgua pẽu ari yacatu rupi opacatu pe reco pipe. Tasecoi pe rese ari yacatu.

¹⁷ Che, Pablo, aicuachía co mahenduhasa che po pipe ité pẽu. Che rembicuachía icuapri opacatu che cuachiar pipe.

¹⁸ Yande Yar Jesucristo tape rovasa opacatu yepi. Aipo rupive.

PABLO REMBICUACHIA YIPĪNDAR VAHE TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, aicuachía che ñehe ndeu, Timoteo. Nde niha che rahir Tūpa reroyasa pipe ereico. Che niha Jesucristo apóstol aico, yande Pīsīrosar Tūpa porocuita rupi iyavei yande Yar Jesucristo porocuita rupi. Ahe niha yande remiaro. Tombou yande Ru Tūpa, yande Yar Jesucristo oporovasasa, oporoparaisuerecosa ndeu nde reco tupri āgua.

Pablo, “Eicua catu porombohesa co coti tēi vahe sui” ehi Timoteo upe

³ Iyavei acoi aipo ahe ndeu cuese che so āgua Macedonia ve: nde epita co tecua Efeso ve. Evocoyase eremboaracuara co ava co coti tēi oporomboaracua vahe, toporomboaracua eme pihañemoñetasa co coti-coti tēi vahe rese yuvireco. ⁴ Toyapisaca eme avei tecocuer ipapapri tēi vahe rese, tecocuer aracahendar ēgüe ehi tēi vahe rese avei. Ahe ichui osē yeacasa naporai vahe yepi; ndayande pītiviī rumo Tūpa remimbotar reroya tupri āgua rese.

⁵ Sese co amondo porocuita ndeu yande yeaisu āgua yande pihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe. ⁶ Esepia, amove ava oime ichui oyearacua mocañi oñehe-ñehe tēisa pipe yuvireco. ⁷ Oporombohe pota tēi Tūpa porocuita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

⁸ Yaicua niha co porocuita aviye ai eté yaiporuse Tūpa remimbotar rupi eté. ⁹ Yaicua avei acoi porocuita ndahei ava aviye vahe upe nara. Ahe rumo ndiporeroyai vahe mboaracua āgua, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nombotei vahe Tūpa iyavei chupendar pihañemoñetasa; acoi vu, osi oyuca vahe; opacatu ava oporapichi vahe upendar. ¹⁰ Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocuva tēi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuita; imondosa avei opacatu porombohesa nimarai vahe amotarēhisar upe nara. ¹¹ Co porombohesa nimarai vahe oyoya tupri ñehesa porañete vahe

poropĩsirosa resendar rese. Tũpa sovasapri secoi, ahe che cuai vahe sese.

Pablo oparaisuerecosa rese, “Aviye ndeu” ehi Tũpa upe

¹² “Aviye ndeu” ahe yande Yar Jesucristo upe. Ahe niha ombou pĩratasa co che ñehe ãgua. Esepia, ahe oyeroya che rese. Sese che mondo oñehengagũer mombehu ãgua. ¹³ Yepe che yipindar che ñehe-ñehe tẽi sese; aseca-secaño mbahe-mbahe tẽi che rembiapoguã yamotarẽhimbave che yemboivate aisa pipe, Tũpa rumo, che paraisuerecoño. Esepia, che ahese, ndahe vitei Cristo reroyasar aico; ndaicua vitei mbahe ayapo vahe. ¹⁴ Ëgũe ehi yande Yar ombou catu oporovasasa che rese iyavei ombou che oyese yeroya ãgua iyavei che poroaisu ãgua Jesucristo rese che recosa pipe.

¹⁵ Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pipe ava yangaipa vahe pĩsiro ãgua. Che rumo acoi ivate catu vahe yipindar aico ipãhuve. ¹⁶ Sese Tũpa che paraisuereco che rese rane Jesucristo reco mbegũe tupri mboyecua ãgua. Ëgũe ehi che recouer upe ambuae ava seroya ãgua. Ipipe sui osupitira tecovesa apirẽhi vahe yuvireco. ¹⁷ ¡Sese yamondo imboeteisa apirẽhi yande Rereciar ndopai vahe upe! ¡Ahe nomanoi vahe, ndayasepiai vahe, ahe ñepeí vahe Tũpa!

¹⁸⁻¹⁹ Che rahir Timoteo, co amondo nde cuaitarã ndeu nde reco moviracua ãgua mbahe tẽi recopi ãgua Cristo rese nde yeroyasa pipe nde pihañemoñeta catupri pipe avei. Supi tupri cuese Tũpa reroyasar oñehe yuvireco nde rese serer pipe. Amove ava opihañemoñeta tupri reroyaẽhisave, omocañi uca Tũpa rese oyeroyasa ²⁰ inungar vahe Himeneo rese, Alejandro yuvirecoi. Ahe che amondo Carugar povrive ‘evocoyase toicua tiñehe-ñehe tẽi eme Tũpa upe yamotarẽhisave yuvireco’ che yapave.

2

Ñehesa yeruresa resendar

¹ Iyavei no, co che opomonguerẽhi pe yerure ãgua, peporandu, pemondo avei “aviye” pe hesa Tũpa upe opacatu ava recouer rese. ² Iyavei peyerure opacatu mborereciar rese. Evocoyase tayareco yande reco tupri Tũpa mboetei tupri pipe, yande poromboeteisa pipe avei. ³ Co aviye ité; ahe niha yande Pĩsirosar Tũpa remimbotar. ⁴ Supi eté ahe oipota opacatu ava ñepisiro iyavei co porombohesa supi eté vahe cua tupri ãgua. ⁵ Esepia, ñepeíño ité Tũpa, iyavei ñepeíño ité ava oicatu vahe yande reraso Tũpa upe: ahe Jesucristo. ⁶ Esepia, Jesucristo omano opacatu ava yangaipa vahe repirã ipĩsiro

ãgua. Ahe imombehusa chupendar ari iporavopri rupi. ⁷ Sese che supi eté apóstol, icuai pri aico Tūpa Ñehengagüer mombehu ãgua, ava ndahei vahe judío mbohe ãgua, co yeroyasa rese iyavei supi eté vahe rese. Supi eté ndopombopai.

⁸ Evocoyase che aipota opacatu rupi ava toyerure yuvireco. Tomopuha opo yuvireco opihañemoñeta catuprisa pipe, ombahe mboasiẽhisa pipe, oyeacaẽhisa pipe avei. ⁹ Iyavei cuña toyemonde tupriño turucuarño tẽi pipe yuvireco. Aní chira rumo oãca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepí rusu vahe tomondo eme yuvireco. ¹⁰ Iyacatu rumo yuvirecoi tuprira güemiapio aviye vahe pipe, inungar cuña oyemondo tupri vahe Tūpa upe yuvireco yepi. ¹¹ Iyavei cuña tosendu porombohesa oquiririsa pipe imboyeroyasave. ¹² Ndaipotai cuña oporombohe ava rehí pãhuve iyavei toyocuai eme cuimbahe. Iyacatu rumo iquiririñora yuvireco. ¹³ Esepia, Tūpa oyapo yipindar Adán; ipare Eva oyapo. ¹⁴ Adán ndahei imbopapri; cuña rumo oyembopa uca. Ichui oviapi angaipa pipe. ¹⁵ Oñepisirora rumo ocuaita mboaviyesa pipe oyese yeroyasa rereco pipe, iporoaisusa pipe, güeco maranehisa pipe avei.

3

Tūpa reroyasar rãrosar cuaita

¹ Iyavei co supi eté: acoi amove oico pota vahe Tūpa reroyasar rãro ãgua, ahe oipota mboraviqui aviye catu vahe. ² Sese acoi vireco vahe ocuaita Tūpa reroyasar rãro ãgua, ahe secoi tuprira mbahe aviye vahe pipe yepi. Ipipe ava noñehi chira yamotarẽhisave. Iyavei omendara ñepeí cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oyepota vahe güetave. Oicua aveira ava mbohe tupri ãgua. ³ Iyavei ndahei chira caguar tẽi. Ndosecai chiaveira ovava ãgua. Iyacatu rumo seco mbegüera opacatu ava upe. Ndoipota rai chiaveira guarepochi. ⁴ Iyavei oicua tuprira güeta pipendar rãro ãgua. Ombohe aveira guahir iporeroya ãgua, iporomboetei ãgua avei. ⁵ Esepia, acoi ndoicuai vahe güeta pipendar rãro, ¿mara ehira evocoyase Tūpa reroyasar rãro? ⁶ Tūpa reroyasar rãrosar rumo ndahei chira oipisi ramo vahe Tūpa opiha pipe. Esepia, aviyeteramo oyemboivate ai tiẽtera. Ipipe sui imocañipri avei secoira Carugar nungar. ⁷ Iyavei oyecua uca tupri ranera Tūpa reroyasarẽhi pãhuve. Ahese ndipoi chira imboeteiẽhisa iyavei ndoviapi chira Carugar povrive.

Tūpa reroyasar rese ihañeco vahe cuaita

⁸ Iyavei Tūpa reroyasar rese ihañeco vahe yuvirecoira oporomboeteisa pipe. Tomboaviye oñehe. Ndahei chira caguar tēi; ndahei chiaveira guarepochi pota raisar tēi. ⁹ Iyacatu rumo, porombohesa supi eté vahe rese oyemboya catura opihañemoñeta catupriisa pipe yuvireco. ¹⁰ Iyavei secoãhasa ranera. Acoi osē tuprise, ahese toyuvirecoi Tūpa reroyasar rese ihañeco vaheerã. ¹¹ Iyavei sembireco yuvirecoi aveira oporomboeteisa pipe, nimahechiroi chira, osãro tupriira güecocuer yuvireco, iyavei imboyeroyapri aveira opacatu mbahe rese yuvireco. ¹² Iyavei Tūpa reroyasar rese hañecosar ñepeño itera sembireco, oicua aveira guahir rãro tupri ãgua, güëta pipendar rãro ãgua avei. ¹³ Esepia, Tūpa reroyasar rese hañecosar oyapo tuprise oporaviquisa yuvireco, ipipe sui imboyeroyasara. Osiquiyeëhisave avei secoira Jesucristo reroyasa pipe.

Tūpa reco oyecua ramo vahe reroya tupriisa

¹⁴ Che aso pihaiivi pota nde repia. Aicuachía rumo co che ñehe ndeu ¹⁵ acoi che aracahese, ereicuañora rumo pe reco tupri ãgua ava Tūpa rese yuvirecoi vahe pãhuve; ahe acoi Tūpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua ãgua. ¹⁶ Supi eté tuvichá etepri Tūpa reco oyecua ramo vahe reroya tupriisa:

Cristo oyemoporēhi yande reco nungar pipe yandeu.

Ipare Espiritu pipe imboyecuasa secocuer supi tupri vahe.

Iyavei Tūpa rembiguai rembiepiave secoi.

Ichui imombehusa opacatu ivi rupi; opacatu rupi avei seroyasa.

Iyavei ipisiipri secoi ivave nara.

4

Oimera ava oyepepi vahe Tūpa rese oyeroyasa sui yuvireco coiye

¹ Iyavei Espiritu aipo ehi tupri yandeu: coiye, ari cañi renonde, amove ava oyepepira Tūpa rese oyeroyasa sui yuvireco. Omboyeroyara espíritu oporombopa tēi vahe, porombohesa Carugar suindar avei. ² Oyapisacara ava aipo ehi tēi vahe rese, semirañete ai vahe ñehe rese avei yuvireco. Ëgüe ehira opihañemoñetasa mocañi tēi yuvireco. ³ Co ava niha, “Aní chira yamenda” ehi tēi ava upe yuvireco; “Aní chira yahu opacatu mbahe” ehi avei chupe. Tūpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tūpa upe yuvireco. ⁴ Esepia, opacatu

mbahe Tūpa rembiapo, aviye ité. Ahe ndiyai chira yaroïro yaipisise, “Aviye ndeu” yande hesa pipe chupe. ⁵ Esepia, Tūpa oñehe pipe yande yeroquise co tembihu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

⁷ Ndereyapisacai chira rumo acoi mbahe aracahendar co ivi pendar yapisaca tēisa rese. Eyembohe catu yande Yar uveño ité nde reco āgua. ⁸ Esepia, yepe aviyeño chīhi yande retecuer yamoviracua viña, yande Yar upe yande reco āgua aviye catu opacatu yande reco uve nara. Esepia, ahe yande pītiviira yande recove āgua cūritei iyavei curi yande recove āgua. ⁹ Co supi eté vahe, evocoyase yande yaroyara opacatu yepi. ¹⁰ Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava Pīsirosar, iyavei viroyasar Pīsirosar catu ité secoi.

¹¹ Co porombohesa eremombehura ava pāhuve, erembohe aveira sese. ¹² Tipo eme ava nde roeroïro vahe chīhivahe catu nde reco rese. Nde rumo ereico tuprira Tūpa reroyasar rovaque. Eñehe Tūpa reroyasave nde reco tuprisa pipe. Esaisu tupri nde yeroyasave nde recocuer maranehi pipe. ¹³ Che yepota renondeve, eyeroqui catu Tūpa Ñhengagüer rese opacatu ava rovaque. Emonguerēhi catu yande rivireta iyavei erembohe tuprira. ¹⁴ Nderepoi chira Tūpa ndeu mbahecuasa ombou vahe sui. Esepia, ava Jesús reroyasar rārosar upe Tūpa omombehuse nde cuaitarã, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatu catusa yuvireco. ¹⁶ Iyavei eñearo tupri, eicua catu nde porombohesa rese; eyemoviracua sese ité nde hañeco. Acoi ēgüe erese, ipīsiroprī ereicora; nde ñehe rese oyapisaca vahe avei ipīsiroprī yuvirecoira.

5

Mara ehira Jesús reroyasar oyepāhuve yuvireco

¹ Eremboaracua pīrata eme mbia cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbia chīhivahe upe ereñehe tuprira secocuerã rese inungar nde rivri upe. ² Cuña otiaro vahe upe avei ereñehe tuprira inungar nde si ité sereco; iyavei cuñatai eremboaracua tuprira inungar nde reindri ité ererecora opacatu nde reco catuprisa pipe.

³ Acoi imer mano vahecuer ité ereip̄it̄iv̄ira que mbahe ipane vahe rese. ⁴ Que oimese imembri, anise que semiarro, toyembohe rane ocuaita mboaviye āgua yuvireco chupe. Ēgüe tehi guaisu mboyevi chupe, ahe niha Tūpa remimbotar. ⁵ Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tūpa rese, iyavei oyerokuñño ité ari, p̄itu yacatu yepi. ⁶ Osecase rumo mbahe güemimbotar yuvireco, ahese omano vahe t̄ei secocuer yuvirecoi. ⁷ Eyocuai tupri ava co ñehesa rese; ichui ndahei chira ava ñehedora t̄ei yuvirecoi. ⁸ Acoi ava rumo nosaroi vahe omu; acoi güeta pipendar nosaroi vahe avei, ahe ndoguata iri Tūpa rese oyeroyasa rupi iyavei mbahe t̄ei catu Jesús reroyasar̄ehi sui.

⁹ Icuachiasara rumo ambuae cuña imer mano vahecuer p̄ahuve ivate catu sesenta sui iharav̄iter vahe, iyavei ñepeñño ité omer v̄ireco vahecuer. ¹⁰ Icuapr̄ira secocuer icatuprisa rese, omboacua tuprise ch̄ihivahe oyesuindar, omoinguese ava güeta pipe, ihañecose ava Tūpa reroyasar rese ipi sei āgua, oip̄it̄iv̄ise ava iparaisu vahe, oyapo tuprise opacatu mbahe aviye vahe.

¹¹ Ereicuachía eme iharav̄iter ndosupit̄i vahe sesenta cuachiar pipe. Esepia, amove güemimbotar pipe t̄ei oyepepi Cristo sui, omenda yupagüe pota iri vahe. ¹² Ipipe oimera Tūpa poronupasa chupe. Esepia, yip̄indar oyemondo Tūpa upeño ité oyecuachiasa. Ipare rumo nomboaviyei eté oñehe. ¹³ Iyavei oi yacatu rupi t̄ei oguatase oico, ahese v̄irecora oat̄ehisa, iyavei imahechiroi t̄eira, oñangareco t̄eira opacatu rese, omombehu-mbehu t̄ei aveira mbahe naporai vahe. ¹⁴ Sese co aipota acoi imer mano vahecuer cuñatai vite vahe: tomenda iri, timembri iri avei yuvireco, iyavei tosāro tupri güeta pipendar. Sese yamotar̄ehimbar secocuer ndahei chira oñehedora t̄ei v̄ireco yuvireco. ¹⁵ Esepia, oime ité amove oyepepi vahe güemimbotar pipe Carugar rupi güeco āgua.

¹⁶ Acoi oimese que cuña Tūpa reroyasar v̄ireco vahe que cuña imer mano vahecuer oyepiri, ahe toip̄it̄ivi yuvireco. Ahe sese evocoyase t̄uparo pendar nihañecoi chira. Ahese oicatura supi eté imu ndipoi vahe rese hañeco āgua yuvireco.

¹⁷ Iyavei acoi Tūpa reroyasar r̄ārosar osāro tupri vahe, ahe toip̄isi catu ava porop̄it̄iv̄iisa imboyeroyasave. Acoi oye-mondo vahe Tūpa Ñehengagüer mombehu āgua, ava mbohe āgua avei, ahe co porop̄it̄iv̄iisa oip̄isi catura. ¹⁸ Esepia, arachendar icuachiapri pipe aipo ehi: “Ereiyuru āpichi rene t̄ivi oporav̄iqui vahe trigo cambesar” ehi. Iyavei aipo ehi: “Mbia oporav̄iqui vahe iyacatu oip̄isira oporav̄iqui repri” ehi.

¹⁹ Iyavei nde, ndereroyai chira mbahe omombehu vahe Tūpa reroyasar osāro vahe yamotarēhisave yuvireco. Oimese que ñuvirio sepiasar, que mbosapi, ahese ramo ereroyara.

²⁰ Acoi oimese rumo angaipa aposar ipāhuve, ahese eremboaracuara opacatu ava rovaque. Evocoiyase ambuae osiquiyera angaipa apoēhi āgua yuvireco.

²¹ Iyavei che orocuai Tūpa rovaque, Jesucristo rovaque iyavei opacatu Tūpa rembiguai iva pendar rovaque avei: ereyapo tuprira co mborocuita, nderemomahuatī chira ava imboaracua nde remimbotar rupi tēi. ²² Ndahei chira pihaiivi eresenoī mbīa mborocuita rese ihañeco vaheṛā. Aviyeteramo nde rese pāve mbahe oimera. Eñearo tupri nde reco maranehisa pipe.

²³ Nde rie mbaherasisa upe ndereihui chira i güeraño tēi, chīhimi rumo uva ricuer ereihuñomira chupe.

²⁴ Amove ava angaipa oyecua tupri oyeupe porandu āgua renonde. Oime rumo acoi oñomi vahe oangaipa yuvireco. Ipare tēi icuasa. ²⁵ Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

6

¹ Iyavei co ava mbiguai Jesús reroyasar, ahe oyeroya tuprira güerecuar yuvireco ava oñehe-ñehe tēiēhi āgua Tūpa rer rese, yande porombohesa rese avei no. ² Acoi co mbiguai virecose güerecuar Tūpa viroya vahe yuvireco, ahese ndovirecoi chira imboyeroyaēhisa Jesús reroyasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporaviquisa, ahe Jesús reroyasar saisupri yuvirecoi yepi.

Tūpa rese yande pihañemoñetasa sepirusu vahe nungar

Eporombohe, emombehu co mbahe: ³ oimese oporombohe vahe oyesuindar pihañemoñetasa co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tūpa rese yande yeroya tuprisa rese, ⁴ ēgüe ehi vahe oyemboivate ai tēi mbahe renducuaēhisave. Iyavei oporandu-randu tēi ñehesa rese secoāha āgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroyaēhisa ⁵ iyavei iporoacasa ndopai vahe ava yaracua rai vahe pāhuve. Ndoicuai rumo mbahe supi tupri vahe yuvireco. Ipihñemoñeta Tūpa rese omahenduhasa pipe mbahe rereco ati āgua yuvireco viña. ⁶ Yayembovihanose mbahe yande rembiereco rese, ahese Tūpa rese yande pihañemoñetasa inungar mbahe sepirusu vahe yandeu. ⁷ Esepia, ndayarui eté niha

mhahe yahase co ivi pipe iyavei ndayarasoi chiveira mhahe yamanose yande yeupi. ⁸ Iyacatu rumo yarecose yande remihura, yande yemonde água avei, sese yayembovihanora yaico. ⁹ Amove rumo ava, “Mhahe rerecosar ité taico” ehi tiête viña, ndoyemoviracuai rumo tecoãhasa upe. Ipare oviapi mhahe têi pipe, setá mhahe pota raisave, ipipe oyeecomomara. Ipare oyemocañi têi. ¹⁰ Esepia, guarepochi pota raisa sui osê opacatu mhahe naporai vahe. Amove ava ipota raisa pipe oyepepi Tūpa reroyasa sui iyavei omombaraisu güecocuer ipipe ahe ae yuvireco.

Tūpa rese yande reco vīracuasa

¹¹ Nde rumo, Tūpa rese ereico vahe, eyepepi opacatu conungar mhahe naporai vahe sui. Eico nde reco ivisa pipe, ndemahenduhaño ité Tūpa rese. Eroya, esaisu, eñemosa avei eico nde reco mbegüesave. ¹² Eyemoviracua ité mhahe têi uve Tūpa reroyasa rese. Erepoi rene tecovesa apirêhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco água ava eta rovai. ¹³ Cūritei Tūpa rovaque, ahe opacatu mhahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuai ¹⁴ ndererovai chira che remimombehu ‘tipo eme, mara ehi, ehi têi vahe yuvireco ndeu’ che yapave. Nderepoi chietera co nde reco tuprisa sui acoi ouse yande Yar Jesucristo. ¹⁵ Acoi oyepotase ari imombehupri curi, ahese Tūpa omboyevira Guahir. Ahe niha ñepei vaheño ité imboeteipri, seco pīrata catu vahe. Aheño ité niha mborereciarivate catu vahe rereciar. ¹⁶ Aheño ité teco apirêhi vahe, tesapesa secoi; ndipoi oyemboya vahe sese, ndipoi eté que ava osepia vahe. ¡Ēgüe tehi, imboeteipri tasecoi opacatu opīratasa apirêhi vahe rese!

¹⁷ Acoi imhahe eta vahe co ivi pipe eyocuai: toyemboivate ai eme, iyavei toyeroya rai eme ombahe eta rese têi yuvireco. Esepia, ahe Ēgüe ehi têi vahe. Iyacatu rumo Tūpa rese oyero-yara yuvireco. Ahe niha opacatu mhahe icatupri vahe ombou yandeu nara yande rembiporugã. ¹⁸ Eyocuai avei evocoi ava: toyuvirecoi mhahe yar nungar mhahe aviye vahe aposa pipe. Iyavei toyemoingatuaño acoi mhahe vireco vahe mboyaño água ambuae ava upe yuvireco. ¹⁹ Evocoiyase virecora mhahe aviye vahe, apirêhi vahe oyeupe nara yuvireco curi tecovesa supi eté vahe rereco água.

Timoteo cuaitarã ipa vahe

²⁰ Timoteo, esãro tupri co porombohesa supi tupri vahe Tūpa ombou vahe ndeu. Ereyapisacai rene ava têi pihanemoñetasa Ēgüe ehi têi vahe rese, iyavei porombohesa

co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe. ²¹ Ipipe sui niha amove ava oyavi Tūpa reroyasa yuvireco.

Aviye, yande Aposar tande rovasa. Aipo rupive.

PABLO REMBICUACHIA IMON̄UVIRIOSA TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, amondo co cuachiar ndeu, che rembiaisú, che rahir nungar, Timoteo. Che niha Jesucristo apóstol aico Tūpa remimbotar rupi acoi “che amondora teco piasu che reroyasar uve” ehi vahe rupi tupri. Ahe cūritei oime yandeu Jesucristo rese yande recose. Yande Ru Tūpa iyavei yande Yar Jesucristo tombou oporovasasa, oporoparaisuerecosa nde reco tupri āgua ndeu.

Pablo oyocuai Timoteo Cristo recocuer mombehu āgua

³ Che yeroqui pāhuve, chemahenduha nde rese pītu, ari yacatu rupi. “Aviye ndeu” ahe Tūpa upe nde recocuer rese. Che aporaviqui tupri ité Tūpa rese che pīhañemoñeta tuprisa pipe yepi inungar che ramoi eta oyapo yuvireco aracahe. ⁴ Ndacheresarai eté acoi nde yaseho agüer sui. Iyavei oroepia pota tēi che yemboviharete āgua. ⁵ Supi eté chemahenduhāño ité nde Tūpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipindar ēgüe ehi yuvireco. Evocoiyase ayeroyaño ité nde rese, nde avei ēgüe erese.

⁶ Sese che oromonguerēhi embouvicha catu co Tūpa ombou vahe ndeu acoi amondose che po nde harive; ahe ereco catu ndeyeupe. ⁷ Esepia, Tūpa nomboui siquiyesa yandeu. Ahe rumo ombou yande reco moviracuasa, poroaisusa, iyavei yande mbopīhañemoñeta tupri āgua. ⁸ Evocoiyase eresiquiye eme catu yande Yar recocuer mombehu. Nderechī chiaveira che roquendasa sui tēi. Esepia, yande Yar recocuer mombehusa sui tēi niha che roquenda yuvireco. Iyacatu rumo, nde avei ereñemosañora co mbahe-mbahe tēi Tūpa pīratasa pipe. Ahe oura ndeu ñehesa pīsirosa resendar mombehusa sui. ⁹ Tūpa niha yande pīsiro iyavei yande renoi yande reco tupri āgua sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tūpa ité yande raisu yipisuive ivi apo viteēhiseve. ¹⁰ Cūritei rumo ahe omboyecua oporoaisusa yande Pīsirosar Jesucristo ouse, acoi ou vahe co ivi pipe manosa pīratasa recopi āgua. Iyavei ñehesa pīsirosa pipe avei oicua uca tecovesa ndopai vahe.

¹¹ Tūpa niha che cuai co ñehesa mombehu āgua. Che cuai avei apóstol che reco āgua iyavei che porombohe āgua. ¹² Sese

niha che opacatu aiporara co mbahe-mbahe tēi vichico. Nachi eté rumo yande Yar rese che yeroyasa pīpe. Esepia, aicua ahe vireco pīratasa acoi ñehesa ombou vahe cheu imo-cañiēhi āgua acoi Jesús yevi āgua rupi eté.

¹³ Erecoveño ité porombohesa aviye vahe che suindar, iyavei eicoño ité Tūpa rese nde yeroyasa pīpe iyavei poroaisusa yareco vahe pīpe Cristo rese yaicose. ¹⁴ Esāro avei co ñehesa aviye vahe Tūpa ombou vahe ndeu Espiritu Santo reco pīratasa pīpe yareco vahe yandeyese.

¹⁵ Ereicua niha co ava opacatu Asia pīpendar oyepepiño che sui yuvireco. Ipāhuve yuvirecoi mbia ñuvirío, ahe serer: Figelo, Hermógenes. ¹⁶ Yande Yar tomondo paraisuerecosa Onesíforo mu upe. Esepia, Onesíforo setá yupagüer che mboviha. Iyavei nochi eté ava rovaque che roquendasa sui. ¹⁷ Ouse rumo Roma ve, ndopituhui eté che reca. ¹⁸ Yande Yar tomondo oporoparaisuerecosa chupe ahe ari pīpe curi. Iyavei nde ereicua tupri ité ahe mbia yande pītivii vahe Efeso ve.

2

Jesucristo sundao oyemoviracua vahe

¹ Iyavei nde no, che rahir, eyemoviracua mbahecuasa Jesucristo ombou vahe pīpe ndeu. ² Acoi che porombohesa eresendu vahe ava rehi rovaque amondo vahe ndeu, embohe tupri mbia oyeroya vahe, oicatu vahe avei ambuae mbohe āgua.

³ Nde eyemoviracuaño teco asi upe Jesucristo uve nara inungar sundao oyemoviracua vahe ité. ⁴ Ñepepe yupe sundao ndosirii eté ocuaita sui. Esepia, ahe oyemoingatu voi eté ocuai āgua güerecuar upe. ⁵ Iyavei iguayí rai vahe, ndoipisii chira porerecosa oguayí tupriēhi pīpe. ⁶ Iyavei yande inungar que ava oñoti vahe mbahe, ahe rane omonuha güemiti yaviyese oyeupe yepi. ⁷ Eyapisaca tupri co che ñehese rese. Yande Yar niha osenducua uca tupriā opacatu co mbahe ndeu.

⁸ Iyavei no ndemahenduha Jesucristo rese. Ahe niha ocuerayevi vahe. Iyavei arachendar mborerecuar David suindar seci. Co niha ñehesa ñepisirosa resendar amombehu vahe vichico. ⁹ Co ñehesa mombehusa sui tēi che mombaraisu yuvireco. Che roquendasave aviye oporapichi vahe che rereco yuvireco. Tūpa Ñehengagüer mombita rumo ndoicatu eté yuvireco. ¹⁰ Sese che añemosañño opacatu mbahe-mbahe tēi upe opacatu Tūpa rembiporavo recocuer aviye āgua rese 'tovireco catu pīsirosa porañete, apirēhi vahe Jesucristo rese yuvireco' che yapave.

¹¹ Co niha supî tupri vahe:

Yamanose Cristo rese, ahese yaicove aveira sese.

¹² Yañemosase mbahe tēi upe, ahese yande yaicora mborerecuar imborerecuasave ipiri.

“Ndaicuai Jesucristo” yahese, ahese ahe avei,

“Ndopocuai vahe” ehiñora yandeu.

¹³ Yepe co coti tēi yarovara yande recocuer seroyaēhisave, ahe rumo ndovirovai chietera güeco ñvisa.

Esepia, ndoicatuî, “Ndahei che ahe aico” ehi vaheñã.

Ava osē tupri vahe güecoñhasa Tūpa upe nara

¹⁴ Emomahenduha yuvireco co ñehesa rese, iyavei eyocuai Tūpa rovaque: topoi ñehepoepi-episa sui yuvireco, co ñehepoepi-episa ēgüe ehi tēi vahe. Esepia, omomara ambuae ava osenduse ñehe rai yuvireco. ¹⁵ Eyapo tupri mbahe opacatu nde catugüer rupi nde recocuer mboyecua āgua Tūpa rovai inungar oporaviqui tupri vahe, nochi vahe. Ēgüe ere, eporombohe tupri ñehesa supî eté vahe rese. ¹⁶ Eyepepi ñehe tēisa, ēgüe ehi tēi vahe sui. Esepia, co nungar ñehesa tēi ombouvicha catu mbahe naporai vahe. ¹⁷ Iyavei iporombohesa rai oyembouvicha inungar caracha vai ndocuera catui vahe, oyembouvicha-vichaño yepi. Ēgüe ehi Himeneo, Fileto ¹⁸ oyavi porombohesa supî eté vahe sui yuvireco. “Opa cuerayevisa. Ndipo iri chira” ehi tēi yuvireco. Ipîpe Jesús reroyasar oipihañemoñeta rerova yuvireco. ¹⁹ Tūpa rumo omondo mbahe moviracua tupri āgua, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opacatu yande Yar rer vireco vahe, toyepipi mbahe naporai vahe sui yuvireco yepi” ehi.

²⁰ Oi guasu pipe, ndahei guarepochi, oro apopri güeraño oime, oime avei ivirape, ñaihu apopri avei no. Ñepeî iporupirã ari imboeteisa pipe nara, ambuae rumo ari rupi iporupirã.

²¹ Acoî ava oñemoatiro vahe co tecocueraî sui Tūpa upe nara, ahe ipehasa inungar vaso oro apopri poromboeteisa pipe iporupirã; ahe ava oyemoingatu voi eté oico mbahe icatupri vahe apo āgua Tūpa upe.

²² Eyepepi mbia chihivahe pihañemoñeta rai tēisa sui. Emohivi tupriño ité nde recocuer sereco. Eyeroyaño ité Tūpa rese. Esaisu catu avei ava, eico avei nde reco tupri pipe, inungar Jesucristo reroyasar oyapo opihañemoñeta tuprisa pipe yuvireco. ²³ Eremboyeroyai rene ñehesa porandu-randu tēisa, ēgüe ehi tēi vahe. Ereicua niha ichui tēi oime yeamotarēhisa yepi. ²⁴ Iyavei yande Yar rese oporaviqui vahe, ndiyai oyeecopi oñehe pipe yuvireco. Iyacatu rumo, aviñera secocuer opacatu upe, oporombohe

tuprira, oñemosañora ombahe mboasiẽhisa pipe oico. ²⁵ Iyavei omboaracuara güeco asiẽhisa pipe acoi ava ndiporeroyai vahe. Esepia, avieteramo Tũpa osecuñarora ipihañemoñeta raisa oyeupe yevi iri ãgua: ipipe sui porombohesa supi eté vahe oicuara yuvireco. ²⁶ Ipipe sui avei toyemopoase, toyuvinose Carugar povri sui semimbotar apo iriẽhi ãgua.

3

Mara ehira ava ari ipa vahe pipe curi

¹ Iyavei tereicua ari ipa vahe yepotasa, ahese oimera tecocuer yavai catu vahe. ² Ahese ava ahe ae tẽi oyeaisura yuvireco, guarepochi tẽi oipota raira, oyemboivate aira, oyemboetei ai tẽi aveira. Oñehe raira Tũpa rese yamotarẽhisave. Nomboyeroyai chira oyesupa yuvireco. Setá aveira, “Aviye ndeu” ndehi vahe ava upe. Iyavei nombotei chira Tũpa rese pihanemoñetasa yuvireco. ³ Ndosaisui chira oyesuindar yuvireco. Niñeroi chiaveira oyeupe yuvireco. Iyavei imahechiroi aira. Noñemosai chira mbahe tẽi apo ãgua yuvireco. Güeco asi pipe avei yuvirecoira. Iyavei opacatu mbahe aviye vahe oyamotarẽhira yuvireco. ⁴ Iyavei omondora ava yamotarẽhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara güemimbotar tẽi oyemboiha ãgua yuvireco. Ipipe rumo Tũpa ndosaisui chira yuvireco. ⁵ Ahe inungar-ra Tũpa rese ité yuvirecoi vahe viña. Tũpa pĩratasa rumo nomboyecuai chietera güembiapo pipe yuvireco oyese.

Sese nde, eyepepiño evocoi nungar ava sui. ⁶ Esepia, evocoi nungar ava pãhuve oime yuviroiqueño tẽi vahe oi rupi cuña ndoicatu vahe angaipa rerecosar mbopa ãgua. Esepia, ahe cuña opihanemoñeta raisa pipe yuvirecoi vahe. ⁷ Yepe oyapisaca tupri tẽira ñehesa rese yuvireco viña, ndosupitĩ eté rumo co porombohesa supi eté vahe renducua ãgua yuvireco. ⁸ Inungar co ava ipaye vahe Janes, Jambres serer vahe oyemboyere Moisés amotarẽhi yuvireco, ãgüe ehi avei evocoi ava porombohesa supi eté vahe amotarẽhisar yuvireco. Ahe oyemomara vahe opihanemoñeta rai pipe yuvireco. Ndoviroyai eté Jesús porombohesa yuvireco. ⁹ Ndoporombopa iri chira rumo yuvireco. Esepia, opacatu ava oicuara yuvireco imbahecuaẽhi rese, inungar co ñuviriõ mbia Moisés amotarẽhimbar yuvirecoi aracahe.

Timoteo cuaitarã ipa vahe

¹⁰ Nde rumo che reco rupi tupri ité ereico. Esepia, ereroya tupriño ité che porombohesa, che pihanemoñetasa, che Cristo rese yeroyasa, che reco mbegüesa, che poroaisusa iyavei che ñemosasa ¹¹ opacatu mbahe tẽi porarasa rese. Nde

niha ereicua opacatu mbahe tēi oime vahe cheu co tecua guasu, Antioquía ve, Iconio ve, Listra ve avei no, iyavei che paraisusa mara-mara tēi che rerecose yuvireco. Yande Yar rumo che pĩsĩro opacatu evocoi mbahe-mbahe tēi sui. ¹² Supi eté opacatu acoi Jesucristo rese güecocuer vireco pota vahe oiporarara mbahe-mbahe tēi yuvireco. ¹³ Ava secocuer naporai vahe rumo, iporombopa serai vahe avei ombouvicha catura güecocuerai; oporombopa-mbopa tēira yuvireco. Iporombopasa pipe rumo ambuae omboyevira chupe.

¹⁴ Nde rumo ereyemoviracuaño itera acoi ereyembohe vahe rese. Ahe ereroya tupriño ité. Esepia niha, nde mbohesar ereicua. ¹⁵ Iyavei eyemomahenduha co rese: nde chĩhivahe suive ité niha ereicua Tũpa ñehe icuachiapri eico. Ahe niha nde mombahecua vahe nde pĩsĩro ãgua Jesucristo reroyasa pipe. ¹⁶ Opacatu co ñehesa icuachiapri ou vahe Tũpa sui, aviye ai eté porombohe ãgua, iyavei poromboyapisaca ãgua, poromboaracua tupri ãgua iyavei ava upe ñehe tupri ãgua secocuer mohĩvi ãgua yepi. ¹⁷ Ichui, ava Tũpa rese yuvirecoi vahe oyemoingatu voira opacatu tecocuer tupri apo ãgua yuvireco.

4

¹ Iyavei no, co rese che orocuai pota Tũpa rovaque, Jesucristo rovaque avei acoi ou vaherã omborerrecuasa reseve oicove vahe, omano vahe recocuer rese porandu ãgua. ² Emombehu Tũpa Ñhengagüer ari rupi. Erova ité ava reco. Eporomboaracua, eporomonguerẽhi tupri avei opacatu nde reco asiẽhisa pipe. ³ Esepia, coiye ava ndosendu pota iri chira porombohesa aviye vahe yuvireco. Ahese güemimbotar tēi osecara ombohe ãgua, güemimbotar tēi avei omombehu ucara oyeupe yuvireco. ⁴ Iyavei oyepepira co mbahe supi eté vahe sui. Viroyara rumo opacatu ava remimombehu tēi yuvireco. ⁵ Nde rumo, ererecoveñora nde aracua tupriisa. Eñemosañõ mbahe naporai vahe upe. Ndehañeco catu ñehesa pĩsĩrosa resendar mombehu ãgua. Emboaviye tupri avei opacatu nde poraviquisa.

⁶ Virovi ari che retecuer mondo ãgua manosave inungar mbahe seropovẽhepri yande Yar upe. ⁷ Ayapopa che recoeté pipe che poraviquisa aviye vahe che amotarẽhimbar pãhuve. Amboaviye che cuaita. Ndayepipi eté che yeroyasa sui. ⁸ Cũritei che rãro ivave co porerrecosa che poraviqui aviye vahe resendar. Yande Yar mborerrecuar seco ĩvi vahe niha omboura cheu ahe ari pipe. Ndahei chira cheu güeraño. Ombou aveira opacatu Cristo raisusa pipe iyevisa osãro vahe upe yuvireco.

Pablo, "Eyu rane che repia" ehi Timoteo upe

⁹ Ndepoyava catu eyu che repia. ¹⁰ Esepia, Demas che reya co mbahe ivi pipendar tēi potasave, ichui tēi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve. ¹¹ Lucas güeraño oicove che piri. Es-eca Marcos, tou nde rupi che p̄t̄iv̄i ãgua mboraviqui rese. ¹² Tíquico amondo tecua Efeso ve. ¹³ Acoi ereyuse, eru avirave che yemboyhasa aseya vahe Troas ve Carpo rētave. Iyavei cuachiar guasu, ambuae cuachiar reseve, ahe aipota catu vahe; erupa eyu.

¹⁴ Alejandro, guarepochi mombesar, oyapo mbahe tēi cheu. Yande Yar rumo oicuara sembiapogüer rese chupe. ¹⁵ Iyavei nde eicua catu ichui. Esepia, ahe yande amotarēhi mbahe yande remimombehu rese oico.

¹⁶ Yipindar añehese che yoepi ãgua mborerecuareta rovai, ndipoi eté que che p̄t̄iv̄iisar; opacatuño ité che reya yuvireco. Tūpa tiñero sese yuvireco chupe. ¹⁷ Yande Yar Jesucristo rumo che p̄t̄iv̄i. Che momirata co ñehesa p̄s̄irosa resendar mombehu tupri ãgua opacatu ava ndahei vahe judío upe. Ëgüe ehi avei che renose mbahe tēi sui. ¹⁸ Ahe che pehara opacatu mbahe-mbahe tēi sui iyavei che p̄s̄irora oyepiri ivave che so ãgua. ¡Ëgüe tehi timboeteisa catu yande Yar apirēhi vahe yepi!

Mahenduhasa opacatu upe

¹⁹ Emombehu che mahenduha Prisca upe, Aquila upe iyavei opacatu Onesíforo rēta pendar upe avei. ²⁰ Erasto opita Corinto ve, Trófimo rumo imbaheasi, evocoyase aseya Mileto ve. ²¹ Ndepoyava catu eyu irohi yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

²² Yande Yar Jesucristo toico nde rese. Iyavei Tūpa tape rovasa opacatu pe rereco. Aviye. Aipo rupive.

PABLO REMBICUACHIA TITO UPE TITO

Pablo mahenduhasa Tito upe

¹ Che, Pablo, Tūpa rembiguai aico iyavei Jesucristo apóstol semimbou aico Tūpa rese yeroyasa mondo āgua sembiporavo eta upe iyavei Tūpa rese pīhañemoñetasa supi tupri vahe cua uca tupri āgua. ² Esepia, tecovesa apirēhi vahe rārosa pipe sui viroyara, oicua aveira yuvireco. Tūpa ndoporombopai vahe niha omombehu co tecovesa mondo āgua ivi apo viteēhiseve oico. ³ Ichui cūrītei arī oyepota yandeu iñehengagüer cua āgua. Sese Tūpa, yande Pīsīrosar, che cuai oñehengagüer mombehu. ⁴ Tito, co che ñehe aicuachía ndeu; nde niha che rahir ité ereico Jesucristo rese yande recosa pipe. Esepia, oyoya yaroya vahe yaico. Yande Ru Tūpa, yande Pīsīrosar Jesucristo tombou oporovasasa nde reco tupri āgua ndeu.

Tito poraviquisa caha pāhu Creta ve

⁵ Che oroeya vitu co caha pāhu Creta ve mbahe opita vite vahe moingatu tupri āgua. Iyavei, “Eiporavo ava, Jesucristo viroya vahe rāro āgua ñepeipei tecua rupindar” ahe acoi ndeu cuese. ⁶ Evocoi Jesucristo viroya vahe rārosar toyuvirecoi güeco tupri āgua. Tipo eme “co oyapo mbahe” ehi-ehi tēi vahe yuvireco oyeupe. Ñepeño güembireco virecora yuvireco; tahir evocoiyase Jesucristo reroyasar pāvera. Iyavei ndoyuvirecoi chira ndoyemboaracuai vahe nungar oporeroyaēhisa pipe ambuae ava ñeheēhi āgua sese yuvireco. ⁷ Acoi Jesucristo reroyasar rārosar yuvirecoi vahe, ahe icuaita mbahe Tūpa upendar rese. Sese taseco ñvi tupri yuvireco. Iyavei toico eme oporeroyaēhisa pipe, toñemoiro eme avei, ndahei chiaveira caguar tēi; ndivava serai chiaveira, tiguarepochi pota rai eme yuvireco. ⁸ Iyacatu rumo omoinguera ava oyepota vahe güētave oyepiri. Iyavei aviye aira yepi. Osāro tuprira güecocuer. Iyavei taseco ñvi güeco catupri pipe Tūpa upe. Tosāro tupri avei opīhañemoñetasa yuvireco. ⁹ Iya oyemboya catu oyembohosa supi tupri vahe rese yuvireco. Ipipe sui tomonguerēhi catu ambuae yuvireco co ñehesa maranehi pipe iyavei ambuae seroīrosar pīhañemoñeta mohivi āgua.

¹⁰ Esepia, oime setá nimbahe reroyai vahe; judío “peyembocircuncida pe ñepisiro āgua” ehi vahe pāhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco. ¹¹ Ēgüe ehi vahe iyacatu

pemonguiriri. Esepia, ahe niha setá ava oñemu vahe omboyepi uca porombohesa supi tupri vahe sui yuvireco. Oporombohe mbahe co coti tēi vahe rese guarepochi rereco āgua tēi yuvireco.

¹² Ñepeí mbia, otūpa ñehe mombehúsar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mímba nungar tēi, icaru ai, yangaipa vai yuvireco yepi” ehi oñehe. ¹³ Supi eté aipo ehi; sese emboaracua pírata ité. Evocoyase tovíroya tupri Tūpa yuvireco. ¹⁴ Iyavei tovíroya eme co judío oyesui tēi mbahe omombehu vahe iyavei ava porocuita tēi yuvireco. Esepia, ahe oyemboyere mbahe supi vahe sui yuvireco.

¹⁵ Acoi ava ndaseco marai vahe upe opacatu mbahe nimarai. Ndiporeroyai vahe, ipihañemoñeta rai tēi vahe upe rumo, ndipoi eté mbahe nimarai vahe. Esepia, ipihañemoñeta, yaracuasa avei naporai eté. ¹⁶ Iyavei, “Che aicua Tūpa” ehi tupri tēi angahu yuvireco. Mbahe sembiapo rese rumo icuasa seroyaēhisa yuvireco. Ahe niha ava ndosepia potai vahe, ndiporeroyai vahe yuvireco, ndoicatuí mbahe aviye vahe apo yuvireco yepi.

2

Porombohesa nimarai vahe

¹ Nde ñehe toyoya tupri co porombohesa nimarai vahe rese yepi. ² Evocoyase mbia oñaro catu vahe Tūpa reroyasar toñearo tupri, imboyeroyapri toyuvirecoi, tosāro tupri güecocuer, tovíreco tupri avei Tūpa reroyasa, oporoaisusa. Iyavei güeco mbegüesa pipe toñemosa mbahe-mbahe tēi upe. ³ Ēgüe tehi avei cuña oñaro vahe Tūpa reroyasar yuvireco: güeco tupri tovíreco oporomboeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboyecuarā güecocuer aviye vahe, ⁴ ombohera cuñatai imer raisu āgua, imembri raisu āgua avei. ⁵ Tombohe avei seco tupri āgua, iñearo tupri āgua angaipa sui iyavei sēta pipendar rese hañeco tupri āgua yuvireco. Tomboaracua avei seco aviye āgua, imer mboyeroya āgua avei. Evocoyase noñehe-ñehe tēi chira ava Tūpa Ñhengagüer rese yuvireco.

⁶ Ēgüe ere avei emonguerēhi mbia chñivahe secocuer rese iñearo tupri āgua. ⁷ Iyavei emboyecua nde recocuer aviye vahe opacatu mbahe rese yuvireco chupe; nde imbohe tuprisa pipe emboyecua nde reco maranehisa, nde poromboeteisa avei. ⁸ Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoyase yande amotarēhimbar yuvinochira ndoicatuise, “Mbahe” ohe āgua yuvireco yandeu.

⁹ Emboaracua avei mbiguai yuvirecoi vahe: toviroya opacatu mbahe rese güerecuar, tomboyeroya imboeteisave, toñhehepoepi eme avei yuvireco. ¹⁰ Iyavei toñomi eme mbahe. Iyacatu rumo seroyapri tupri yuvirecoira. Evocoyase opacatu osepiase seco tuprisa, omboeteira yande Písirosar Tūpa recocuer resendar yembohesa yuvireco.

¹¹ Tūpa niha omboyecua oporoaisusa yandeu. Ahe güeru písirosa opacatu ava upe. ¹² Co poroaisusa Tūpa suindar yande mbohe mbahe-mbahe tēi iyavei yande remimbotar tēi reya āgua. Iyavei yande mbohe co ivi pipe yande ñearo tupri āgua, yande reco ñvi āgua iyavei Tūpa mboetei āgua. ¹³ Iyavei yasāro yande viharetesa pipe Tūpa omboaviye vaheerā güemimombehu, ahe Jesucristo yande Tūpa seco ivaté vahe, yande Písirosar yevi irisa oporañetesa pipe. ¹⁴ Ahe oyemondo oyeyuca uca yande rese yande písiro āgua opacatu mbahe-mbahe tēi sui yande reco moatiro tupri āgua. Evocoyase yande yaico chupe nara güeraño ité yande querēhisave opacatu mbahe aviye vahe apo āgua.

¹⁵ Evocoi rese erembohera, eremonguerēhira, eremboaracua aveira opacatu nde porocuita pipe. Sese tipo eme que nde reroirosar.

3

Jesús reroyasar cuaita

¹ Co rese emomahenduha: toyapo ava mborerecuar guasu porocuita yuvireco iyavei opacatu ambuae mborerecuarrecuarmi porocuita avei. Iyavei toyemoingatu tupri opacatu mbahe aviye vahe apo āgua yuvireco. ² Toñhehe-ñhehe tēi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

³ Esepia, yipindar yande avei ndayande mbahecua yaico iyavei ndayaroyai Tūpa. Ocañi tēi vahe yaico, iyavei yande mbiguai tēi yaico opacatu mbahe yande remimbotar apo pipe; iyavei yaseca-seca mbahe tēi vahe yande yemboviha āgua. Iyavei yaicoño mbahe tēi pipe, yaipotaño tēi ambuae ava mbahe, yamotarēhimbrī yaico iyavei yandeyeupe ae-ae yayeamotarēhi. ⁴ Ipare rumo Tūpa, yande Písirosar, omboyecua güeco tuprisa, oporoaisusa opacatu ava upe. ⁵ Yande písiro, ndahei rumo yande rembiapo aviyesa sui, ahe rumo vireco oporoparaisuerecosa yandeu nara. Ichui omoatiro yande recocuer yande reco mopiasu. Iyavei Espíritu Santo pipe yande recocuer recuñaro tecove piasu rereco āgua. ⁶ Iyavei yande Písirosar Jesucristo rembiapo sui Tūpa omboucatu oEspíritu Santo yandeu, ⁷ ipipe yande reco ai sui yande

renose yande reco ñvi tupri ãgua oporoaisusa pipe 'toipisi co tecovesa apirẽhi güemiario yuvireco' oya.

⁸ Aipo ñehesa supi eté vahe. Che aipota sese ereporombohera. Ipipe Tũpa reroyasar toyapo mbahe aviye vahe yuvireco. Evocoi ñehesa aviye ité opacatu oiporu vahe ñehesa yuvireco. ⁹ Ereyepipi rumo opacatu co nungar mbahe sui: yipindar ñehesa yepoepi tẽisa sui, ipare aracahendar ava recocuer rese ñehesa sui. Ereyepipi aveira iporomoñemoiro serai vahe sui, Moisés porocuaita resendar sui tẽi ñehepoepi episa sui avei. Esepia, evocoi nungar mbahe ãgũe ehi tẽi vahe.

¹⁰ Acoi ava omoimese yemboyahosa Tũpa reroyasar pãhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui. ¹¹ Tereicua evocoi nungar ava oyavi vahe güecocuer yepi, ahe ae oyemocañi vahe oangaipa pipe oico.

Tito upendar ñehesa

¹² Acoi amondose Artemas, anise Tíquico ndeu, eyu pihaiivi che repia tecua Nicópolis ve. Esepia, aheve apita pota sõhisa vahe pituhu rãro. ¹³ Eipitivi opacatu nde catugüer rupi ava recocuer moingatusar Zenas, Apolos avei. Ahe chupe emondo mbahe semimbotar. Evocoiyase toyuviraso tupri oguatasa rupi; tipane eme que mbahe chupe yuvireco. ¹⁴ Iyavei ambuae Jesús reroyasar eipe pendar toyembohe avei yuvireco mbahe tupri apo ãgua iyavei ava mbahe chupe ipane vahe pitivi ãgua. Evocoiyase secocuer aviye itera yuvirecoi.

Mahenduhasa iyavei porovasasa ipa vahe

¹⁵ Opacatu yuvirecoi vahe cohava che piri omondo omahenduhasa yuvireco ndeu. Iyavei emombehu che mahenduhasa yande mboripar iporeroya vahe upe. Tũpa tape rovasa eipeve opacatu. Aipo rupive.

PABLO REMBICUACHIA FILEMÓN UPE FILEMON

Pablo mahenduhasa Filemón upe

¹ Che, Pablo, che roquendasa Jesucristo recocuer sui tēi. Aicuachía co che ñehe yande rivri Timoteo reseve ndeu, Filemón. Nde niha ore rembiaisu iyavei ore ndugüer ité Tüpa upe mboraviqui apo água ereico. ² Iyavei amondo co cuachiar yande reindri Apia upe, Arquipo upe avei. Ahe avei yande ndugüer mboraviqui apo água Tüpa upe nara yuvirecoi, iyavei opacatu Jesús reroyasar nde rētave oñemonuha vahe upe nara. ³ Yande Ru Tüpa, yande Yar Jesucristo tombou oporovasasa, güeco tuprisa avei pēu.

Filemón poroaisusa iyavei Cristo rese iyeroyasa

⁴ Che niha, “Aviye ndeu” ahe yande Ru Tüpa upe che yeruresa pipe nde rese yepi. ⁵ Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar. ⁶ Aporandu Tüpa upe nde rese nde ereyeroyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya. ⁷ Cherorivete, ayemonguerēhi catu opacatu nde poroaisusa rese. Che rivri, nde niha eremonguerēhi catu opacatu yande Yar reroyasar yuvireco.

Pablo oporandu mbahe aviye vahe rese Onésimo upe nara

⁸ Sese yepe che aico Cristo apóstol nde cuai água viña. ⁹⁻¹⁰ Che rumo aporandu ndeu nde poroaisusa rese mbahe aviye vahe apo água co nde rembiguaigüer Onésimo upe nara. Che niha Pablo, acuacuami vichico. Cūrítei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe cohava che roquendasave.

¹¹ Aracaco co nde rembiguai secoise nde piri, ēgüe ehi tēi vahe secocuer ndeu viña. Cūrítei rumo ēgüe ndehi iri chira oico ndeu, iyavei cheu no. ¹² Amboyeví co imondo ndeu eipeve. Eipisi inungar-ra che itera viña. ¹³ Che aipota opita vaherā nde nungar tupri che pītivií água viña, co soquendapri vite che recose Jesucristo ñehengagüer sui. ¹⁴ Che rumo ndaipotai mbahe apo nde pihañemoñetasa cuaēhi viteseva. Nde rumo ereyapora co mbahe aviye vahe nde remimbotar rupi, ndahehi chira che nde cuaisa pipe. ¹⁵ Aviyeteramo Onésimo oyepepi pucu raimi nde sui oyevi iri vaherā nde piri nara. ¹⁶ Ndahe iri chira mbiguai tēi. Ahe rumo aviye catu itera mbiguai güeco agüer sui. Esepia, yande rivri niha yande

rembiaisu secoi cūritei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprira saisusa pipe yande rivri nungar tupri ité yande Yar upe nara.

¹⁷ Inungar nde rivri che rereco eve. Ēgüe ere tupri aveira co mbia pisi. ¹⁸ Acoi oyapose mbahe ndeu, anise virocuase que mbahe nde sui, cheu emombehu. Che evocoiyase amboepira ndeu. ¹⁹ Che Pablo, aicuachía che po pipe ité seroya tupri água, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ēgüe ere cheu. Che rumo, “Ndereve cheu” ndahei eté ndeu. ²⁰ Supi eté, che rivri, eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mbovaha catumi eve.

²¹ Che aicuachía ndeu. Esepia, aicua nde ereyapo tuprira aipo che porandusa, iyavei ereyapo catu itera co sui. ²² Iyavei amoha Tūpa che renose vaheṛã che roquendasa sui pe yeruresa pipe che so água eipeve pe repia. Sese emoingatumi avei che pituhu água.

Mahenduhasa, porovasasa ipa vahe

²³ Che ndugüer, Epafra, omondo omahenduhasa ndeu. Ahe avei soquendapri cohava yande Yar Jesucristo recocuer rese. ²⁴ Iyavei Marcos, Aristarco, Demas, Lucas che ndugüer oporaviqui vahe Tūpa uve, ahe avei omondo omahenduhasa yuvireco ndeu.

²⁵ Yande Yar Jesucristo tape rovasa opacatu eipeve. Aipo rupive.

ICUACHIAPRI HEBREO YUVIRECOI VAHE UPE HEBREOS

Guahir Jesucristo pipe Tūpa oyemboyecua yandeu

¹ Aracahe suive setá yupagüer Tūpa omombehu uca yande ramoi eta upe oñehe mombehusar upe. Iyavei ambuae mbahe rupi oseca imombehu tupri āgua yuvireco chupe. ² Cūrítei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité. ³ Ahe niha Vu Tūpa recocuer porañetesa secoi. Ēgüe ehi eté, ahe Vu recocuer tupri ité. Ahe opacatu mbahe omoviracua oñehe pīratasa pipe. Yande angaipagüer sui yande moatiro pare oso, oguapi Vu acato coti oĩ ivave cute.

Tūpa Rahir seco ivate catu Vu rembiguai iva pendar sui

⁴ Tūpa Rahir secoi ivate catu vahe Vu rembiguai iva pendar yuvirecoi vahe sui. Ahe vireco omborerecuasa ivate catu vahe ichui. ⁵ Esepia, Tūpa aipo ndehi eté güembiguai upe: “Nde che Rahir ereico; co pipe amondo nde recove āgua” ndehi eté.

Iyavei:

“Che Tu aicora, ahe evocoyase che rahir secoira” ndehi avei chupe.

⁶ Ichui rumo ombouse Guahir ñepei vahe co ivi pipe aipo ehi: “Tomboetei opacatu che rembiguai yuvireco”

ehi. ⁷ Evocoyase güembiguai rese oñehe Tūpa aipo ehi icuachiapri aracahendar pipe:

“Ayapo che rembiguai ivitu nungar, tata nungar avei cheu oporaviqui vaherã” ehi.

⁸ Tahir rese ñehesa rumo aipo ehi icuachiapri aracahendar pipe:

“Che Yar Tūpa, nde mborerecuasa rumo apirēhi vaherã ité.

Ereporocuai nde reco ñvi tuprisa pipe yepi.

⁹ Mbahe ihivi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesa ndeu ivate catu vahe opacatu nde mboetasa sui” ehi.

¹⁰ Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo iva.

¹¹ Opacatu co nde rembiapo opa vaherã tēi, inungar turucuar cuacua oyearo vahe opa.

Nde rumo apirēhi vaherã ité ereico.

¹² Ipare ereyapara inungar turucuar yapapri iyavei erese-
cuñarora inungar oturucuar osecuñaro vahe.

¡Nde rumo ndereñecuñaroi chietera!

Iyavei nde recocuer ndopai vaherã ité” ehi.

¹³ Ndahei que ñepei iva pendar güembiguai upe Tũpa aipo ehi:
“Eguapi che acato coti, ahese che amondora nde amo-
tarẽhimbar nde povrive” ehi.

¹⁴ Esepia, opacatu Tũpa rembiguai espĩritu yuvirecoi chupe
oporaviqui ãgua, icuaipri avei ava ipĩsiropirã pĩtivii ãgua.

2

Yandemahemoha tupri yande pĩsirosa rese

¹ Sese iyacatu co ñehesa yasendu vahe rese yayapisaca tupri
catu co tecocuer pĩasu sui yande yepepiẽhi ãgua. ² Esepia,
co Tũpa rembiguai remimombegüer seroyapri ité secoi,
iyavei oyemboangaipa vahe, ndoviroyai vahe avei imom-
baraisupri ité sembiapo rupi yuvirecoi aracahe. ³ ¿Mara ya-
hera pĩha evocoyase yande yañemi Tũpa ñemoirosa sui viña
acoi ndayandemahemoha tupriise co yande pĩsirosa aviye
vahe rese? Esepia, yande Yar ahe rane ité omombehu co
ñehesa ñepĩsirosa resendar. Ipare sendusar, “Supi eté co
ñehesa” ehi yuvireco. Ichui ahe avei omombehu yuvireco
yandeu. ⁴ Iyavei Tũpa oyapo setã mbahe yavai rai vahe
poromondiisa ndayasepia vahe. Iyavei oEspĩritu Santo pipe,
omboyovirati mbahecuasa imbou yandeu güemimbotar rupi
‘toicua yuvireco co ñehesa supi tupri vahe’ oyapave.

Jesucristo ava nungar tupri secoi

⁵ Ndahei güembiguai povrive omondo Tũpa ivi oime vaherã,
acoi oromombehu vahe pẽu. ⁶ Oime rumo icuachiapri araca-
hendar pipe omombehu tupri vahe:

“Che Yar, ¿uma vo evocoyase ava?

¿Mahera ndemahenduha ava tẽi rese, iyavei eresãro no?

⁷ Ndaseta ariimi erereco ivi coti catu nde rembiguai sui.

Ipare voi rumo eremondo nde porañetesa imboetisave
chupe.

⁸ Iyavei opacatu erereco uca mbahe nde rembiapo ipovrive”
ehi imombehu.

Ëgüe ehise Tũpa, ndoseyai eté que ñepei yepe mbahe ipo pen-
darẽhi. Cũritei rumo ndaopacatu tupri vitei mbahe ipovrive.

⁹ Yaicua niha Jesús, ahe Tũpa güembiguai sui ndaseta araviter
ivi coti catu vireco. Oporoaisusa pipe oipota imano ãgua
opacatu ava repirã. Cũritei rumo iyemombaraisu pare,
omondo oporañetesa imboetisave chupe.

¹⁰ Iyavei opacatu mbahe oime Tūpa upe, ichuindar avei ‘toyuviroique opacatu che rahir che reco porañetesave’ oya-pave. Sese omombaraisu uca Guahir Jesucristo ‘tomboaviye tupri rane che remimbotar Poropisrosar güeco āgua’ oya. ¹¹ Esepia, opacatu vireco ñepi Vu yuvireco co seco catupri vahe, seco mbocatuprisar avei. Sese Tahir nochí eté, “Che rivireta peico” ohe āgua viroyasar upe. ¹² Ahe aipo ehi icuachiapri aracahendar pipe:

“Añehera nde rese che rivireta upe.

Asapucái aveira sapucaisa ndeu opacatu ava ndeu oñemonuha vahe pāhuve” ehi.

¹³ Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tūpa rahir cheu ombou vahe rese” ehi icuachiapri pipe aracahe.

¹⁴ Inungar ava vireco vahe guahir, oyoya soho, suvi; ěgüe ehi avei Jesús vireco voho, vuvi yande nungar; omano pipe sui omocañi vaherã iporoyuca ai vahe pĩratasa; ahe Carugar.

¹⁵ Opacatu ava manosa sui osiquiyesa pipe mbiguai tēi nungar yuvirecoi vahe güecove viteseve, evocoi nungar sui senose āgua, ěgüe ehi Jesús. ¹⁶ Esepia, ahe ndoui Tūpa rembiguai pĩtivii āgua, ahe rumo ou Abraham suindareta pĩtivii āgua.

¹⁷ Sese niha tivireta nungar tupri ité oyapo Tūpa, “Toime che rovaque pahi rerecuar ivate catu vahe seco tupri vahe; taseco mbegüe avei, tomondo güetecuer ava angaipa repirã ñeroisa reime āgua” ehi. ¹⁸ Esepia, ahe avei oiporara Carugar poroãtoisa. Sese cūritei ahe oicatu ité ava Carugar remiatoi pĩtivii āgua.

3

Jesús ivate catu vahe Moisés sui

¹ Evocoiyase, che rivireta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secói yandeu apóstol iyavei pahi ivate catu vahe yande yeroyasa. ² Ahe ité niha omboaviye tupri Vu remimbotar, osenoise imbou co tecocuer apo āgua inungar Moisés omboaviye tupri ocuaita Tūpa mbahe rãro aracahe. ³ Jesús rumo imboeteipri catu Moisés sui. Inungar acoi oi aposar imboeteipri catu oi sui secói. ⁴ Esepia, ñepi-peí oi vireco oaposar viña. Tūpa rumo opacatu mbahe aposar secói. ⁵ Supi eté Moisés Tūpa rembiguai güeco pipe omboaviye opacatu oporaviquisa itũparo rese. Esepia, omombehu Tūpa omboyecua pota vahe ava upe yepi. ⁶ Cristo rumo tahir güeco pipe omboaviye ocuaita Vu tũparo rese. Ahe tũparo yande yaico

yayeroyaño itese Cristo rese iyavei yasãroño itese yande yembovïhasa pïpe co mbahe aviye vahe oime vaherã yandeu curi.

Mbituhusa Tũpa upendar yuvirecoi vahe upe

⁷ Sese inungar aipo ehi Espïritu Santo icuachiapri aracahendar pïpe:

“Co pïpeve voi, pesenduse Tũpa ñehe,

⁸ peyepïhamoatai rene catu chupe, ndapeicoi chira ava ndiava reroyai vahe nungar acoi ïvi iporupirẽhisa rupi Tũpa recoãhasar yuvirecoi vahe aracahe.

⁹ Aheve avei acoi che recoãha tẽi pe ramoi mbahe güembiapo pïpe, yepe cuarenta araviter rupi osepia tẽi mbahe che rembiapo yuvireco viña.

¹⁰ Sese añemoïro ahe ava upe, aipo ahe:

‘Ipihañemoñeta rai co coti tẽi vahe rese yepi iyavei ndoicua potai eté che recocuer yuvireco’ ahe chupe.

¹¹ Sese che añemoïro ahe ava upe, ‘Ñepei reseve ndapepituhui chietera che pïtuhusa pïpe’ ahe yuvireco chupe” ehi aracahe.

¹² Che rivireta, peñearo catu; tipo eme que ñepei ipihañemoñeta naporai vahe Tũpa reroyaẽhisa pïpe oyepepi vaherã ichui. ¹³ Iya rumo peyemonguerẽhi catu ñepei-pei ari yacatu rupi cũritei pe recove pïpe angaipa upe pe yembopa uca iriẽhi ãgua, pe mbahe reroya iriẽhi ãgua rese avei. ¹⁴ Esepia, yayemoviracua tuprise Cristo rese yande yeroyasa yipisuive yareco vahe pïpe yande mano ãgua rupi eté, ahese yaico itera sese.

¹⁵ Supi niha acoi aipo ehi ñehesa:

“Co pïpe voi pesenduse Tũpa ñehe,

peyepïhamoatai rene catu chupe; ndapeicoi chira ava ndiava reroyai vahe nungar” ehi vahe.

¹⁶ ¿Ava pïha acoi ava iñehe mara vahe yuvireco Tũpa ñehe rendu pare chupe? Moisés remienose Egipto ïvi sui ãgüe ehi yuvireco. ¹⁷ ¿Ava upe pïha acoi Tũpa oñemoïro cuarenta araviter rupi? Acoi oyemboangaipa vahe omanopa vahe yuvireco ïvi iporupirẽhisa rupi. ¹⁸ ¿Uma upe pïha acoi ñepei reseve, “Ndapeiquei chietera che pïtuhusa pïpe pe pïtuhu ãgua” ehi Tũpa? Acoi viroyaẽhisar upe aipo ehi. ¹⁹ Sese yaicua seroyaẽhi pïpe ndoicatui yuviroique ipïpe.

4

¹ Oime vite Tũpa remimombehu yande yaique vaherã ipïri yande pïtuhu ãgua. Sese iya ité yañearo tupri. Aní chira que ñepei pe pãhu pendar ndoiquei chira. ² Esepia, yandeu avei imombehusa ñehesa poropïsirosa resendar inungar yande ramoi upe ïvi iporupirẽhi rupi yuvireco aracahe. Co ñehesa

rumo ndoipitívii eté ahe ava yuvireco. Esepia, ahe osendu yuvireco seroyaëhisave tēi. ³ Yande rumo yaroya vahe, yaiquera yande pituhu āgua, ahe chupe Tūpa aipo ehi:

“Sese añemoiro ahe ava upe; ñepeí reseve,
‘Ndoyuviroiquei chietera che pituhusa pipe opituhu āgua yuvireco’ ahe” ehi.

Tūpa rumo yipive ité opa omboaviye oporaviquisa iva, ivi. ⁴ Esepia, co imbosietesa ari resendar ñehesa oime icuachiapri aracahendar pipe:

“Tūpa opituhu opacatu oporaviquisa sui imbosietesa ari pipe” ehi.

⁵ Iyavei aipo ehi iri icuachiapri pipe:

“Ndoyuviroiquei chietera che pituhusa pipe opituhu āgua yuvireco” ehi.

⁶ Ipane vite rumo amove ava yuviroique vaheṛā ahe pituhusave. Acoi yipindar osendu tēi vahe rumo ñehesa poropisirosa resendar, ndoyuviroiquei eté seroyaëhisa pipe yuvireco. ⁷ Sese Tūpa omombehu tupri iri ambuae ari, chupe ité, “Co pipe” ehi. Ahe acoi coiyé mborerecuar guasu David upe omombehu ucase aracahe yandeu icuachiapri pipe, aipo ehi vahe:

“Co pipe voi, pesenduse Tūpa ñehē,
peyepihamoatai rene catu chupe” ehi vahe.

⁸ Ehi revo Josué omondose co pituhusa israelita upe aracahe viña, Tūpa evocoyase noñehē iri chira co ambuae ari rese viña. ⁹ Evocoyase oimeño itera mbituhusa iporavopri ava Tūpa upendar upe nara: ¹⁰ Acoi oique vahe evocoyase pituhusa pipe, opituhu oporaviquisa sui inungar Tūpa opituhu ombahe mboaviye pare aracahe. ¹¹ Sese yayemoviracua catura yande reique āgua evocoi mbituhusa pipe. Aní chira ava aracahendar seroyaëhisar recocuer rupi tupri avei yaicora.

¹² Esepia, Tūpa Ñehengagüer oicove vahe, ipirata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oique vahe ité yande aviterve; ēgüe ehi avei iñehengagüer oñatoi eté yande hā, yande espíritu avei. Iyavei omboyecua tupri ité yande pihañemoñeta. ¹³ Ndipoi eté niha mbahe Tūpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

Jesús niha pahi ivate catu vahe secoi

¹⁴ Jesús, Tūpa Rahir, pahi ivate catu vahe secoi yandeu oique vahe ivave Tūpa piri. Sese yayemoviracuaño itera sese yande yeroyasa pipe. ¹⁵ Esepia, yande pahi ivate catu vahe oicuaño

ité yande recocuer pĩrataẽhisa. Ahe avei niha yande nungar aracaco viroparaisu opacatu mbahe-mbahe tẽi güecoãhasa. Ahe rumo ndoyemboangaipai eté ipipe. ¹⁶ Sese yayemboya catura yande yeroyasa pipe yande Ru Tũpa rese. Esepia, ahe yande raisu ité. Ipipe sui tayande paraisuereco güeco aviyesa pipe yande pĩtivii ãgua mbahe tẽi oimese yandeu.

5

¹ Opacatu pahi ivate catu vahe iporavopri secoi ava pãhu sui ava recocuer reropovẽhe ãgua Tũpa upe iyavei porerecosa mondo ãgua chupe, mbahe mĩmba yucapri reropovẽhe ãgua avei ava angaipa repirã. ² Ahe pahi niha oiporara avei teco asisa ambuae ava nungar. Sese güeco asiẽhisa pipe oipĩtivii ava ndayaracuai vahe, oyavi vahe avei. ³ Ahe rumo güeco pĩrataẽhisa pipe viropovẽhe mbahe mĩmba yucapri Tũpa upe oangaipa repirã, opacatu ambuae ava angaipa repirã avei. ⁴ Ndiyai chira que ava oyesui tẽi pahi oyeapo. Tũpa ité rumo osenoira imboetei uca ãgua inungar acoi Aarón upe aracahe. ⁵ Ëgüe ehi avei Cristo, ahe noñeenoi pahi ivate catu vahe güeco ãgua oyesui tẽi. Tũpa ité osenoi imboetei uca ãgua acoi aipo ehise:

“Nde che rahir ereico, co pipe amondo nde recove ãgua” ehi.

⁶ Aipo ehi avei ambuae icuachiapri pipe:

“Nde ereico pahi ivate catu vahe apirẽhi vaherã, inungar tupri mbia Melquisedec serer vahe” ehi.

⁷ Co ivi pipe Cristo oicove vitesse, oyeruqui pĩrata oyasehosa pipe Vu Tũpa upe yepi. Esepia, ahe oicatu ipĩsiro ãgua manosa sui. Ëgüe ehi iporeroya tupriisa pipe, Tu osendu iyeroqui yepi. ⁸ Yepe Tahir ité viña, güeco paraisu pipe rumo oyembohe imboyeroya ãgua; ⁹ evocoiya güeco pipe omboaviye güeco catupriisa. Ipipe sui güeru poropĩsirosa ndopai vahe opacatu viroyasar upe nara. ¹⁰ Esepia, Tũpa niha osenoi pahi ivate catu vahe seco ãgua inungar Melquisedec aracahe.

Peicua catu, “Ndaroyai eté co tecocuer piasu” pe hesa sui

¹¹ Orovireco vite mo setá mbahe ore ñehe ãgua pẽu co mbahe tecocuer resendar rese. Yavai etepri rumo imombehu tupri ãgua. Esepia, pe ndapesenducua tupri vitei eté.

¹² Aracacove peporombohera viña; peipota vite rumo pẽu mbahe ndayavaimi vahe imombehu iri ãgua yembohesa Tũpa suindar. Ndapeyemoviracuai rumo; peihu iri pota cambi mbahe sãta vahe hu rãgüer sui. ¹³ Esepia, acoi Ëgüe ehi vahe pĩtani osi rese ocambu vite vahe nungar tẽi pe recocuer. Ipipe sui ndapeyembohei eté Tũpa Ñehengagüer rese mbahe tupri pe reco ãgua. ¹⁴ Co tembihu sãta vahe rumo ahe ava ocuacua

vahe upe nara. Esepia, ahe oyembohe tupri catu ñehengagüer rese güeco tupri ñgua yepi. Ipípe sui oicua ité mbahe aviye vahe poravo mbahe naporai vahe sui.

6

¹ Sese ndiyai yayembohe yembohesa yipíndar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipípe sui tayaicua seroyasa pipe ambuae mbahe Tüpa suindar co mbahe rese yembohe iri rãgüer sui. Ahe yipíndar vahe co: yande ñecuñarosa, yande reco ai sui yande poisa, manosa apirēhi vahesave yande rerasoēhi ñgua, iyavei Tüpa rese yande yeroyasa, ² yembohesa poroãpiramosa resendar, po mondosa Tüpa reroyasar harive, omano vahe cuerayevisa iyavei ava recocuer rese porandusa resendar avei. ³ Tüpa oipotase yayembohera ambuae mbahe yavai catu vahe rese.

⁴ Acoi ava yipíndar osenducua vahe Tüpa remimbotar, osãha vahe avei Tüpa suindar porerecosa iyavei oyandu ité Espíritu Santo güecocuer pipe, ⁵ osãha vahe avei Tüpa Ñehengagüer aviye vahe iyavei osãha chíhi ipíratasa curi oime vaherã viña, ⁶ oyepepise rumo ichui, ndayaicatu iri seco reroyevi iri ñgua Tüpa upe. Esepia, yaticapri nungar iri eté vireco Tüpa Rahir iyavei ambuae ava omoñehe-ñehe tēi iri sese. ⁷ Esepia, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upe, evocoiyase evocoi nungar ava oipisira porovasasa Tüpa suindar. ⁸ Ahe ivi rese yu pãve tēi oyesuse, ahe naporai eté. Evocoi nungar ava Tüpa poromocañisavrive tēi, sapipirã tēi avei yuvirecoira curi.

Yande remiario aviye vahe yande moviracua tupri vahe

⁹ Che mboripar saisupri, yepe aipo orohe pēu viña, oromoha ité rumo mbahe aviye catu vahe pēu co ñepisirosa pare. ¹⁰ Esepia niha, Tüpa seco aviye vahe, ahe ndasesarai chietera pe rembiapo aviye vahe sui pe poroaisusa pemboyecua vahe peipitiviise seroyasar. Ahe niha co peyapoño vite peico. ¹¹ Ore rumo oroipotaño ité ñepepepe pe pemboyecuaño itera ari cañi rupi eté co pereco vahe pe querēhisa pe remiario aviye vahe rupiti ñgua. ¹² Ndroipotai pe atēhisa perecora co tecocuer upe. Oroipota rumo pe saquicue moñara acoi ava yande Yar rese oyeroyasa pipe iyavei güeco ñemosasa pipe oipisi vahe porerecosa imombehupri Tüpa sui.

¹³ Peyemomahenduha acoi Tüpa güemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui ñgüe ehi vaherã. Sese ahe güerer ité osenoi ¹⁴ aipo

ehi chupe: “Supi eté oroovasa itera, iyavei setara ava nde suindar” ehi. ¹⁵ Evocoyase Abraham osãro güeco mbegüesa pipe, ěgüe ehi ipisi oyeupendar Tũpa remimombehu. ¹⁶ Ava omoingatu potase oñehe, ivate catu vahe rer pipe omoingatu yuvireco yepi. ěgüe ehise yuvireco, ndiya iri eté ipare oñehe vitera sese. ¹⁷ Tũpa güerer pipe ité omoingatu oñehe omombehuse güemimbotar aracahe ‘toicua tupri che remimombehu pisi ãgua che ñehe ñepeí reseve vahe yuvireco, iyavei amboaviye itera che remimombehu chupe’ oyapave aipo ehi aracahe. ¹⁸ ěgüe ehi oime ñuvirío mbahe imboye-poepipirēhi: Tũpa niha ndoporombopai vahe ité, ipipe avei yande monguerēhi catu yande yaseca vahe iporopĩtiviisa iyavei yayeroya vahe ñearosa yandeu ombou vahe rese. ¹⁹ Co mbahe yasãro vahe omoviracua tupri yande hã, inungar mbahe carite guasu mombitasa omoviracua tupri carite ivitu sui. ěgüe ehi yande remiaro oique turucuar guasu tũparo asiasa cupeve oi imaranehi catu vahesave ivave. ²⁰ Aheve Jesús oique yande raperã mboi ãgua. ěgüe ehi ahe apirēhi vahe ité pahi ivate catu vahe güeco ãgua, inungar tupri Melquisedec aracahe.

7

Jesús pahi Melquisedec nungar tupri ité

¹ Co Melquisedec aipo mborereciar guasu Salem pendar, iyavei pahi Tũpa ivate catu vahe upendar secoi aracahe. Abraham oyevise peri rupi ovavasa sui ou mborereciar guasu eta momba pare, ahese aipo osẽ voi eté oso Abraham rovañchi Tũpa porovasasa mondo ãgua chupe. ² Iyavei aipo Abraham omondo oporerecosa vavasa sui mbahe güeru vahe diez vahe sui ñepeí-peí chupe. ‘Mborereciar guasu seco ívi vahe’ oyapave Melquisedec ehi. Iyavei ahe mborereciar Salem pendar, ahe tecua Salem ‘mbahe tupri’ oya; sese mborereciar guasu mbahe tupri vahe secoi. ³ Ahe iyepa rumo ndicuasai eté iyavei ichi, tamoi, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tũpa Rahir recocuer; ahe pahi apirēhi vahe ité.

⁴ Peyapisaca tupri co mbia recocuer rese: ivate ité secoi aracahe. Yande ramoi Abraham teieté avei omondo diez sui ñepeí-peí mbahe porerecosa mborereciar guasu eta sui güembierocua chupe. ⁵ Moisés porocuita pipe rumo opacatu Leví suindar pahi eta yuvirecoi vahe vireco ité ocuita opacatu ava sui diez sui ñepeí-peí iporaviquimi reroqua ãgua yuvireco. Abraham suindar ité niha ěgüe ehi yuvireco. ⁶ Yepe Melquisedec ndahei Leví suindar viña, ahe rumo oipisi ité Abraham sui evocoi porerecosa; Abraham, ahe acoi oipisi

vaherã mbahe Tũpa remimombehu. Ęgũe ehi Melquisedec Abraham rovasa. ⁷ Supi eté sovasapri sui oporovasa vahe ivate catu secoi yepi. ⁸ Evocoi levita suindar oipisi ava poraviqui repri diez sui ñepei-pei. Ahe ava rumo omano vaherã tẽi yuvirecoi. Icuachiapri aracahendar pipe rumo Melquisedec serer vahe oicoveño vahe ité. ⁹ Ndojavii evocoyase opacatu pahi eta Levi suindar omondo vahe porerecosa Abraham rupive chupe yuvireco viña. ¹⁰ Esepia, Abraham oyeseve vite Levi oyesuindar vireco, evocoyase ihaẽhi viteseve oyeepia Melquisedec rese yuvireco aracahe.

¹¹ Ava israelita yuvirecoi vahe oipisi mborocuaita pahi levita sui yuvireco; ahe Aarón suindar yuvirecoi. Supi etese rumo ava virecose Tũpa suindar güeco catuprisa evocoi mborocuaita reroya pipe viña, evocoyase ndoyemboycuai chietera ambuae pahi viña. Ndahei chira rumo ahe Aarón nungar, ahe Melquisedec nungar itera. ¹² Esepia, Tũpa osecuñarose evocoi pahi cuaita, osecuñaro aveira supive mborocuaita; ¹³ iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramoi suindar. Ahe ichui acoi ndipoi eté osẽ vahe ambuae pahi. ¹⁴ Esepia, icuapri ité yande Yar Judá suindar secoise. Iyavei Moisés noñehi ahe ichuindar turi vahe rese oñehese pahi cuaita rese.

¹⁵ Iyavei co oyecua tupri catu itera, oyecuae pahi ipiasu vahe Melquisedec nungar. ¹⁶ Ahe rumo ndahei porocuaita “uma sui osẽra pahiguã” ehi vahe sui oi que pahi güeco ãgua; güecocuer pĩrata ndopai vahe reseve oi que. ¹⁷ Esepia, Tũpa ité aipo ehi oñehese sese:

“Nde pahi apirẽhi vaherã ité ereico inungar Melquisedec” ehi. ¹⁸ Sese mborocuaita aracahendar opa ité. Esepia, ahe nipi-ratai, ndayande pĩtivii eté. ¹⁹ Esepia, Moisés porocuaita ndosecocuer mbocatuprii eté ava. Yande rumo yasãro mbahe aviyeye catu vahe yande recocuer uve nara. Supi niha yayemboya Tũpa rese.

²⁰ Tũpa rumo oñehese omoingatu ñepei reseve güerer pipe. Ambuae pahi rumo ndahei ñepei reseve senoipri yuvirecoi Tũpa rer pipe. ²¹ Yande Yar rumo Tũpa osenoi ñepei reseve güerer pipe pahi seco ãgua icuachiapri pipe aipo ehise chupe: “Yar Tũpa osenoi ñepei reseve, sese nosecuñaroi chietera:

‘Nde pahi apirẽhi vaherã ité ereico’ ehi” ehi icuachiapri pipe. ²² Sese Jesús rese yaicua Tũpa omboaviyera güemimbotar ipiasu vahe yandeu aviyeye catu vahe yipindar vahe sui. ²³ Yipindar setá pahi yuvirecoi. Opa-opaño rumo omano. ²⁴ Jesús rumo nomanoi vahe ité, sese nomondoi chietera pahi güecosa ambuae upe. ²⁵ Sese ahe oicatu ité ñepei

reseve viroyasar Tūpa rese oyemboya vahe p̄isiro āgua apirēhi. Esepia, ahe oicove vaherā ité apirēhi oyerōqui vaherā Vu Tūpa upe sese.

²⁶ Supi eté Jesús pahi ivate catu vahe seci. Evocoi nungar niha ipane ité yandeu yipindar. Ahe ndaseco marai vahe, ndoyapoi vahe mbahe tēi güeco maranehisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui. ²⁷ Ndahei eté ambuae pahi eta nungar seci, ndoyuca ranei ari yacatu rupi mbahe mimba Tūpa upe seropovēhe āgua yipindar oangaipa rese, ipare opacatu ambuae angaipa rese. Ñepi reseve ité rumo güete viropovēhe opacatu ava angaipa repirā. ²⁸ Moisés porocuita rupi iporavopri pahi ivate catu vaherā ava ndahei seco tupri vahe; Tūpa rumo Moisés porocuita pare osenoi ñepi reseve Guahir seco catupri vahe ‘tasecoi pahi ivate catu vahe apirēhi vaherā ité’ oya.

8

Jesús Tūpa remimbotar ipiasu vahe omoime yandeu

¹ Co rupi eté oroyepota ore remimombehu mbahe aviye catu vahe upe. Yareco ité evocoi nungar pahi ivate catu vahe. Ahe oguapi Vu acato coti omborerecuasa pipe ivave oī. ² Aheve pahi seci oporaviqui Vu rēta supi eté vahe pipe. Ahe ivave ité yande Aposar rembiapo, ndahei ava tēi rembiapo.

³ Opacatu pahi ivate catu yuvirecoi vahe senois mbahe oporerecosa iyavei mbahe mimba yucapri viropovēhe va-herā Tūpa upe yuvireco. Sese Jesucristo avei vireco mbahe viropovēhe vaherā Vu Tūpa upe. ⁴ Ahe secoise co ivi pipe viña, ndahei chietera pahi seci viña. Esepia, cohava oime vite ité pahi mbahe viropovēhe vahe Moisés porocuita rupi yuvireco. ⁵ Co ivi pipendar pahi rumo ihañeco iva pendar rahanga rese tēi yuvireco. Yaicua niha ahe sahanga tēi. Esepia, Moisés oyapo potase tūparo, Tūpa aipo ehi chupe: “Emahecua tupri acoi ivitrive amboyecua vahe rese ndeu. Ahe inungar tupri eyapo” ehi chupe. ⁶ Yande pahi ivate catu vahe rumo, Jesús, vireco ocuita aviye catu vahe ambuae pahi sui. Esepia, Tūpa remimbotar ipiasu vahe Jesús güeru vahe yandeu aviye catu vahe ité yipindar vahe sui iyavei sesendar Tūpa remimombehu aviye catu vahe avei.

⁷ Esepia, yipindar Tūpa remimbotar oicatus yande recocuer recuñaro āgua viña, ndipoi chira ambuae semimbotar ipiasu vahe yandeu viña. ⁸ Tūpa rembiepiave rumo ava recocuer mbahe tēi eté. Sese aipo ehi icuachiapri pipe co ava rese aracahe: “Yande Yar aipo ehi:

‘Oimera ari ayapo iri ãgua che remimbotar ipiasu vahe ahe Israel pendar upe, Judá pendar upe avei.

⁹ Ndahoyoyai chira rumo acoi tamoi eta rese yipindar ayapo vahe che remimbotar.

Ahese acoi opa anose ivi Egipto sui, nomboaviyei eté rumo che porocuita yuvireco.

Sese apoi ichui’ ehi yande Yar Tũpa.

¹⁰ ‘Co ari pare rumo na ahera che remimbotar apo Israel pendareta upe’ ehi yande Yar Tũpa,

‘Amondora che porocuita iyapisacasa pipe, aicuachía aveira ipihañemoñetasa pipe.

Evocoyase che iTũpa aicora; ahe evocoyase cheundar yuvirecoira.

¹¹ Nombohe iri chira ondugüer, omu avei che cua uca ãgua yuvireco.

Esepia niha, opacatu chñivahe catu vahe sui, ava ocuacua catu vahe avei che cuara yuvireco.

¹² Iyavei cheñero aveira mbahe tẽi sembiapogüer rese yuvireco chupe; ndayemomahenduha iri chiveira yangaipagüer rese’ ehi yande Yar”

ehi icuachiapri pipe aracahe. ¹³ Oñehese Tũpa güemimbotar piasu rese, omombehu yipindar vahe cañi ãgua; chñimi tẽi ipane icañipa ãgua.

9

Tũparo ivi pipendar iyavei tũparo ìva pendar

¹ Evocoyase yipindar Tũpa remimbotar vireco ava cuaitarã iñemonuha ãgua Tũpa mboeteisa pipe iyavei vireco tũparo co ivi pipendar. ² Ahe tũparo pipe na ehi mbahe imoingatusa: yipindar oi Nimarai Vahe serer. Ipipe oime vera renda iyavei mesa pan sovasapri Tũpa upendar reseve. ³ Imoñuviriosa turucuar tũparo asiassa cupeve oime ambuae oi, ahe serer Nimarai Catu Vahe. ⁴ Aheve oime itaisi rapisa renda oro apopri, aheve avei oime Tũpa porocuita riru oro pipe yaopri. Ahe ipipe oime cambuchi oro apopri ahe tembihu maná riru, ipipe avei oime Aarón pococa ahe sorì vahe, iyavei mborocuita cuachiapri ita ipe vahe rese oime ipipe. ⁵ Ahe mborocuita riru harive oime Tũpa rembiguai rahanga oyovai yuvinochai, “Tũpa oime ité cohave” he ãgua. Ahe ipepo oyopi tupri Tũpa porocuita riru rovapisa yuvireco. Co rupive revo amombehura co mbahe pẽu.

⁶ Evocoi nungar mbahe moingatupri pare, pahi eta yuviroiqueño yipindar oi asiapri pipe ari rupi ocuita apo ãgua. ⁷ Imoñuviriosa oi pipe rumo pahi ivate catu vaheño oique ñepeì reseve ñepeì-peì araviter pipe, iyavei güeique

yacatu viroique mbahe mimba ruvi viropovêhe vaherã Tûpa upe oangaipa rese, ava icuaêhi pipe angaipa oyapo vahe repirã avei. ⁸ Co rese Espiritu Santo oicua uca yandeu avaño tõi ndiya vitei eté oique ipa vahe oi imaranehi catu vahe pipe Tûpa rovai oime vïtese yipindar oi yasiapri. ⁹ Co opacatu mbahe yande mbohe mbahe cûriteindar rese. Esepia, co porerecosa iyavei mbahe seropovêhepri aheve Tûpa upe, nomoatiroi eté imboeteisar pïhañemoñetas. ¹⁰ Ahe rumo carusa, ihusa, ñemoatirosa nungar mbahe resendar tõi; yande retecuer resendar tõi porocuita. Ahe rumo êgüe ehiñomi tõi yuvireco Tûpa remimbotar ipiasu vahe yu ãgua renonde.

¹¹ Poropïsirosar rumo ou cute. Iyavei ahe ité cûritei yande pahi ivate catu vahe secoi mbahe aviye vahe güeru vahe yandeu. Ahe pahi reiquesa rumo ndahei ava rembiapo nungar tõi, ahe rumo aviye catu ité iyavei ndahei eté co ivi pipe yapopri. ¹² Cristo rumo oique ité imaranehi catu vahesave ivave. Ndahei rumo ovesa iyavei guaca rahir ruvi reropovêhe ãgua, ahe rumo viropovêhe vuvi ité opacatu rese; êgüe ehi ahe ñepei reseve oique apirêhi vahe ñepisirosa reime ãgua yandeu. ¹³ Supi eté guaca cuimbahe ruvi iyavei ovesa ruvi, guaca cuña tanimbu acoi imondopri vahe ava seco mara vahe rese, ahe avei vireco raimi tõi pïratasa ava rete moatiro ãgua. ¹⁴ Cristo ruvi rumo vireco catu ité pïratasa. Esepia, Cristo, Espiritu apirêhi vahe pipe, oyemondo ahe ae Tûpa upe inungar mbahe seropovêhepri nimarai vahe, iyavei suvi yande pïhañemoñetas moatiro opacatu yande rembiapo ai manosave yande rereco vahe sui Tûpa oicove vahe upe mbahe apo uca ãgua yandeu.

¹⁵ Sese Jesucristo secoi Vu remimbotar ipiasu vahe moingatusar ava reru ãgua Tûpa upe omano pipe. Ipipe sui oime ñeroisa oyemboangaipa vahe yipindar mborocuitavrive yuvirecoi vahe upe 'toipisi che rembiporavo yuvireco oyeupendar mbahe apirêhi vahe che remimombehugüer rupi' oya. ¹⁶ Que ava oicua ucase güemimbotar ombahe mondo ãgua omano renondeve, icuasa tupri ranera rumo imanosa semimbotar apo ãgua renonde. ¹⁷ Esepia, ndiya vitei eté omano vaherã recove vïteseve mbahe imondosa iyarã upe. Imanore voi rumo aviye imondosa. ¹⁸ Sese yipindar vahe Tûpa remimbotar yaposa mbahe mimba ruvi piyere pipe. ¹⁹ Esepia, Moisés omombehupase mborocuita opacatu ava upe, oipisi ovesa ragüer pïra vahe iyavei ivira hisopo serer vahe rãca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipi cuachiar mborocuita resendar, opacatu ava avei. ²⁰ Evocoiyase aipo

ehi icuachiapri pipe: “Co mbahe ruvi oicua tupri uca co porocuita Tūpa ombou vahe omboyeroya āgua pēu” ehi. ²¹ Mbahe mimba ruvi pipe avei opa Moisés osipi tūparo iyavei opacatu mbahe ipipendar iporupri. ²² Porocuita rupi eté tuvi pipe seni opacatu mbahe oñemoatiropa Tūpa rovaque; ndipoi eté ñeroisa angaipa upe mbahe ruvi piyerepri porēhise.

Tūpa upe güete reropovēhe pipe Cristo omocañi angaipa

²³ Iyacatu ité imoatirosa evocoi nungar mbahe mbahe mimba seropovēhepri ruvi pipe. Esepia, co mbahe iva pendar nungar tēi sahangaposa; iva pendar ité rumo ipotasa seropovēhepirā mbahe aviye catu vahe evocoi sui. ²⁴ Esepia, Cristo ndoiqueei tūparo oi imaranehi catu vahe ava rembiapo pipe tēi. Esepia, ahe iva pendar rahanga tēi. Ēgüe ehi rumo ahe oique ité ivave. Aheve cūritei secoi Tūpa rovai yande pītivi āgua oyerogui pipe. ²⁵ Judío pahi ivate catu vahe niha ñepi reseve oique araviter yacatu oi imaranehi catu vahe pipe mbahe ruvi tēi reropovēhe āgua; ndahei rumo vuvi ité viropovēhe. Cristo rumo ndoyeeropovēhe pihi Tūpa upe. ²⁶ Ēgüe ehise rumo, yipisuive omano pihira viña. Cūritei rumo oyemboyecua co ipa ari rupi ñepi reseve, apirēhi vaherā viropovēhe āgua güete Tūpa upe ‘tocañipa angaipa’ oya. ²⁷ Supi eté opa rane itera ava omano yuvireco, ipare voi ñepi reseve oimera porandusa. ²⁸ Indó, Cristo oyeeropovēhe ñepi reseve opacatu angaipa mocañi āgua. Ipare rumo oyevi irise ou, ndahe iri chira angaipa recocuer rese. Ahe rumo oyevira ou guārosar pĩsiro āgua.

10

¹ Esepia, Moisés porocuita mbahe aviye vahe ou vaherā rahanga tēi, ndahei ahe eté vahe ité. Sese ahe porocuita ndoicatui eté ava Tūpa rese oyemboya vahe reco mohivi tupri āgua mbahe seropovēhepri araviter yacatundar pipe tēi. ² Porocuita oicatus pe angaipa sui pe moatiro tupri āgua, ndapeyandu iri chira pe angaipa viña iyavei pahi ndoviropovēhe iri chiaveira mbahe ruvi Tūpa upe yuvireco viña no. ³ Co seropovēhepri rumo yande momahenduha uca āgua tēi yande angaipagüer rese araviter yacatu. ⁴ Esepia, mbahe mimba ruvi tēi nomocañi eté yande angaipa yande sui.

⁵ Sese Cristo co ivi pipe ouse, aipo ehi Tūpa upe: “Ndereipota iri niha mbahe mimba tēi porerecosa seropovēhepirā ndeyeupe, nde rumo ereyapo che retocuer evocoi nungarā.

6 Ndahei niha nde piha rupi mbahe rapipri mbahe mimba yucapri ndeu seropovēhepri ñepei reseve angaipa mocañi āgua.

7 Evocoyase che aipo ahe:

‘Che ayu nde remimbotar apo āgua, che Ru Tūpa, che resendar icuachiapri remimombehu rupi tupri mboaviye āgua’ ahe” ehi.

8 Yipindar aipo ehi, Tūpa ndoipotai eté, iyavei ndahei ipiha rupi mbahe mimba reropovēhepri, porerecosa mbahe sapipri avei angaipa mboyeho āgua, yepe ahe mborocuaita rupi seropovēhesa viña. 9 Ipare aipo ehi: “Che ayu nde remimbotar apo āgua” ehi. Ahe ipipe omombopa yipindar vahe mbahe seropovēhepri co ambuae mbahe ipiasu vahe apo āgua. 10 Tūpa evocoyase yande peha angaipa sui oyeupe nara. Esepia, Jesucristo oyapo ité semimbotar mbahe ñepei reseve apirēhi vaherã güete mondo pipe.

11 Opacatu judío pahi eta ari yacatu oyapo ocuaita iyavei mbahe mimba avei-vei viropovēhe Tūpa upe yuvireco. Yepe ahe viropovēhe tēi yuvireco viña, nomocañi catui eté rumo angaipa. 12 Jesucristo rumo oyeeropovēhe ñepei reseve angaipa repirã apirēhi vaherã. Ipare oso ivave, oguapi oĩ Vu acato coti. 13 Aheve osãro oĩ Vu Tūpa opase voi omondo yamotarēhimbar ipovrive. 14 Esepia, ñepei reseve oyeeropovēhe pipe osecomohivi tupri Vu Tūpa rembipeha apirēhi vaherã. 15 Iyavei Espiritu Santo aipo ehi tupri avei icuachiapri aracahendar pipe yandeu:

16 “ ‘Co ari pare rumo na ahera che remimbotar apo chupe’ ehi yande Yar Tūpa, ‘Coie amondora che porocuaita ipihañemoñetasa pipe, amondo aveira iyapisacasa pipe’ ehi.

17 Ndayemomahenduha iri chietera yangaipagüer rese iyavei mbahe tēi sembiapogüer rese yuvireco” ehi aracahe.

18 Ëgüe ehi angaipa rese oimese ñeroisa, ahese ndiya iri seropovēhesa mbahe angaipa repirã.

Yayemboya catura Tūpa rese

19 Sese che rivireta, iya ité cūrítei yande reique āgua Tūpa rovai yande siquiyeēhisa pipe Jesucristo ruvi pipe sui. 20 Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tūparo pipe asiasa turucuar yande reique āgua Tūpa rovai. Ahe turucuar inungar Jesús rete. 21 Iyavei ahe yande pahi ivate catu vahe ité seci Vu Tūpa rēta rãrosar; 22 sese yayemboya catura Tūpa rese yande pihañemoñeta tuprisa pipe iyavei yande yeroyasa ipa voi vahe pipe. Supi eté ahe opa yande reco mbocatupri yande pihañemoñeta raisa sui iyavei omoatiro yande rete

i maranehi pipe. ²³ Yayemoviracua catura mbahe aviye vahe yande remiaro pipe yamombehu vahe ava upe yande pihañemoñeta rerovaêhisa pipe. Esepia, Tûpa omboaviye itera mbahe güemimombehugüer yandeu. ²⁴ Iyavei yasecañora ñepeipei yañepitivii vaherã yande yeaisu catu água iyavei mbahe tupri apo água yandeyeupe. ²⁵ Ndayamopanei chira yande ñemonuhasa Tûpa upe. Ndayaicoi chira omopane vahe nungar, iya rumo yayemonguerêhi catura ñepeipei yandeyeupe. Esepia, virovi ari yande Yar yevi iri água.

²⁶ Acoi, “Tayemboangaipaño ité” yahese mbahe supi tupri vahe cua pare yaico, ndipo iri ambuae seropovêhepirã evocoi yande angaipa repirã yandeu; ²⁷ Tûpa ñemoirosa ipĩrata vahe güeraño oimera yandeu iyavei tata guasu apirêhi vahe opara omocañi Tûpa amotarêhimbar yuvirecoi vahe. ²⁸ Ava Moisés porocuaita ndoviroyai vahe que ñuvirío, anise mbosapi rembiepiave, ahe secocuer mombehuse, ahe yucapri ité saisuêhisa pipe yuvirecoi. ²⁹ Peyapisaca tupri co rese: ipĩrata catu oimera Tûpa ñemoirosa tahir reroĩrosar upe curi iyavei acoi ava viresco vahe suvi inungar mbahe êgüe ehi tẽi vahe iyavei viroĩro tẽi vahe guaisusar Espiritu, chupe avei oimera Tûpa ñemoirosa ipĩrata catu vahe. Esepia, co tuvi rese niha seroyapri ité Tûpa remimbotar. Ipipe avei niha ahe ava Tûpa rembipeha yuvirecoi. ³⁰ Yaicua niha yande Yar aipo ehise: “Che ité asepira, sembiapo ai amboyevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi. ³¹ ¡Mbahe tẽi eté yaiquese Tûpa oicove vahe ñemoirosa pipe!

³² Peyemomahenduha acoi aracaco co tesapesa nungar supi eté vahe pisi ramose, peyemoviracuaño ité pe recoãhasa upe pe yemombaraisusa pipe. ³³ Esepia, acoi amove pe pãhu pendar rese iñehe-ñehe tẽi yuvireco, mara-mara tẽi avei pe rereco opacatu ava rovaque. Ambuae pe pãhu pendar evocoyase peipitivii pe yemombaraisusa rese. ³⁴ Pesaisuño ité avei ambuae soquendapri yuvireco. Opase pe mbahe virocua yuvireco pe sui peñemosañ avei pe viharetesa pipe peico. Esepia, peicua ivave pereco mbahe aviye catu vahe iyavei apirêhi vahe. ³⁵ Sese pemocañi tẽi eme Tûpa rese pe yeroyasa. Esepia, evocoiya pe recosa pipe omoime ucara mbahe tupri pẽu curi. ³⁶ Pe rumo peyemoviracuaño itera mbahe-mbahe tẽi upe Tûpa remimbotar apo água semimombehugüer oime vaherã pisi água curi. ³⁷ Supi eté icuachiapri pipe Tûpa aipo ehi:

“Pihaiivi eté oura acoi ou vahevi.

Ndiaracahei chietera.

38 Acoi cheundar seco catupri vahe rumo che rese oyeroyasa pipe oicovera.

Acoi oyepepise rumo che sui, che evocoyase ndavihai chira sese” ehi aracahe.

39 Yande ndahei oyepepi vahe nungar yaico. Evocoi nungar niha ocañi tēi vaherā yuvireco. Yande rumo yayeroya sese; ipipe yañepisiro.

11

Tūpa rese yeroyasa

1 Supi eté yarecose yande yeroyasa Tūpa rese, ahese yaicua ahe ombou itera mbahe yasāro vahe yandeu, iyavei yaicua ité oime mbahe ndayasepiai vahe. 2 Supi eté amove yande ramo aracahendar upe, “Aviye ité” ehi Tūpa oyese yeroyasa pipe sui.

3 Tūpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cūrteindar mbahe yasepia vahe mbahe ndayasepiai vahe apopri.

4 Sese oyeroya pipe Abel viropovēhe oporerrecosa aviye catu vahe Caín porerrecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerrecosa. Yepe Abel omano viña, oimeño vite rumo Tūpa rese yeroya agüer resendar ñehesa.

5 Enoc avei Tūpa rese oyeroyasa pipe serasosa co ivi pipe sui, “Tomano rane” ndehi eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoñhi viteseve, “Enoc recocuer aviye ai rane ité chupe” ehi icuachiapri aracahendar. 6 Ndahei eté rumo Tūpa piha rupi yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

7 Noé avei oyeroya Tūpa rese. “Oimera mbahe tēi co ivi pipe ndapesepia vitei vahe” ehise chupe, viroya voi eté. Evocoyase seroyasave oyapo arca oyesuindar pñisiro āgua. Iyavei sese oyeroya pipe omombehu ava co ivi pipendar cañi āgua. Ahe rumo Tūpa rese oyeroya pipe oñepisiro.

8 Abraham avei oyeroya Tūpa rese. Esepia, Tūpa, “Eso ambuae ivi ndeu amboyecua vaherā vahesave, ahe amondora ndeu” ehise, omboyeroyaño ité. Yepe ahe ivi ndoicuai viña, osēño ité rumo oivi sui oso. 9 Ipare Tūpa rese oyeroya pipe avei secoiño ité ahe ivi pipe. Ndoyavi ambuae ivi pendar secoi vahe; oi mbahe pিরer apopri pipe tēi aheve secoi. Ēgüe ehi tupri avei tahir Isaac iyavei sumino Jacob. Ahe avei oipisi vaherā Tūpa remimombehu ivi yuvireco. 10 Esepia, aipo

Abraham osãroño ité tecua ivave ovíracua vahe. Tũpa niha ahe tecua rãhasar, yaposar avei.

¹¹ Yepe Sara nimembii vahe viña iyavei Abraham ocuacuami, Tũpa rese oyeroyasave rumo oipisi pĩratasa Tũpa sui guahĩ ãgua. Esepia, viroyaño ité Tũpa oñehe omboaviye ãgua chupe. ¹² Evocoyase yepe Abraham ocuacuami viña, vireco rumo guahĩr. Ahe ichuindar sehii eteanga coiye inungar yasitata iyavei inungar ivi cuhi para guasu popi rupindar ndayaipapa catui vahe ité.

¹³ Ahe ava rumo opacatu omanopa tẽi; ndoipisii eté mbahe semimombehugüer oyeupendar. Ahe mbahe amombri rupi osepiãñomi tẽi yuvireco oyeroyasa pipe, soriveteño avei sese. Ëgüe ehi oicuaño ité ndahei co ivi pipendar güecosa; ahe rumo yuvirecoveño raimi tẽi co ivi pipe. ¹⁴ Aipo ehi vahe oicua uca tupri yandeu oseca vite oyeupendar ivi yuvireco. ¹⁵ Ipihañemoñetase rumo ivi güeco agüer rese yuvireco viña, oyevi iriño itera aheve avei yuvireco viña. ¹⁶ Ahe rumo oipota ambuae ivi aviye catu vahe yuvireco, ahe iva pendar. Sese Tũpa nochi eté, “Che Ru Tũpa” oyeupe hese. Esepia, vireco ité tecua imoingatupri chupe.

¹⁷ Tũpa rese yeroyasa pipe avei Abraham oyemoingatu voi guahĩr ñepe vahe Isaac reropovẽhe ãgua Tũpa upe güecoãhasa pipe. Yepe Tũpa aipo ehi chupe aracahe viña: ¹⁸ “Nde rahir Isaac sui setá oimera nde suindar” ehi. ¹⁹ Esepia, oicua ité Tũpa vireco pĩratasa ava omano vahe mbogüerayevi iri ãgua. Evocoyase imano rãgüer sui eté oipisi iri guahĩr aracahe. Ahe evocoyase omboyecua mbahe yandeu.

²⁰ Tũpa rese oyeroya pipe avei Isaac osovasa Jacob, Esaú avei mbahe oime vaherã pisi ãgua.

²¹ Iyavei Tũpa rese oyeroya pipe avei Jacob omano pota ãgua, osovasa ñepepei José rahir. Ahese opococa rese tẽi eté oyemovíracua oyerogui ãgua Tũpa upe imboeteisa pipe.

²² Tũpa rese oyeroya pipe avei José, omano ãgua renonde, aipo ehi: “Yande mu israelita opara yuvĩnose ivi Egipto sui curi” ehi. Ipare oyocuai omu oĩtacuer rerova ãgua aracahe.

²³ Tũpa rese oyeroya pipe avei, ohase Moisés, iyepi oñomi mbosapi yasĩ rupi yuvireco. Esepia, ahe pĩtani icatupri ai, iyavei ndoyembosiquiyei eté mborerecuar guasu porocuita yuca ãgua sui.

²⁴ Tũpa rese oyeroyasa pipe avei, ocuacuase Moisés, ndoipotai eté, “Egipto pendar mborerecuar guasu rayri membri” oyeupe he ãgua. ²⁵ Ahe rumo oipota catu maramara tẽi güereco ãgua Tũpa reroyasar reseve chĩhi rupive mbahe tẽi rese yemboviha rãgüer sui. ²⁶ Aviye catu ité chupe Tũpa rembiporavo upe nara mbahe tẽi porara ãgua Egipto

pendar mbahe eta sepirusu vahe rereco rãgüer sui. Esepia, ahe oicuaño ité oyeupe nara porerecosa Tũpa ombou vaherã.

²⁷ Tũpa rese oyeroya pipe avei osẽ ivi Egipto sui osiquiyẽhisa pipe mborerecuar guasu roriẽhise. Oyemoviracuaño ité oyese mbahe apo água; aviye osepia vahe ité Tũpa acoi ndoyecuai vahe. ²⁸ Tũpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mimba ruvi Tũpa rembiguai oporoyuca vahe ava israelita rahir ipi yucaẽhi água.

²⁹ Tũpa rese oyeroya pipe avei ava israelita osasa para guasu Pĩra Vahe ivi ipiru vahe hari rupi yuviraso. Ipare yamotarẽhimbar Egipto pendar, “Ègüe vahe avei” ehi yuvireco viña, i rumo opaño oyopi.

³⁰ Tũpa rese oyeroya pipe avei israelita oyerese siete ari rupi tecua Jericó rese, opa ñachisa onduru. ³¹ Tũpa rese oyeroya pipe avei Rahab, oyemondo-mondo tẽi vahecuer, nomanoi eté ambuae ava mbahe-mbahe tẽi vahe rupi. Esepia, ahe oipisi tupriño güetave israelita Jericó ivi repiasar.

³² ¡Setá vite ambuae ava recocuer oime amombehu va-herã pẽu! Ipane ité rumo ari imombehupa água: Gedeón, Barac, Sansón, Jefte, David, Samuel iyavei opacatu Tũpa ñehe mombehusar recocuer. ³³ Evocoi avei Tũpa rese oyeroya pipe osecopi ité ambuae ivi pendar, oporocuai tupri güeco ivisa pipe, oipisiño ité Tũpa suindar mbahe semimombehugüer yuvireco, oiyurumboyaño avei yaguar, ³⁴ ombogüe avei tata ipĩrata vahe, oyeepi avei quise pucu pipe oyuca rãgüer sui; ava nipiratai vahecuer rumo oyemomirata yuvireco, oye-moviracua ité vavasave oyese; opaño ité oamotarẽhisar sun-dao osecopi yuvireco. ³⁵ Oime amove cuña ipãhuve vireco iri vahecuer omu manosa sui imbogüerayevipri.

Ambuae rumo omanopaño ité teco rasisa pipe, “Yasẽ catu co nungar mbahe sui” ndehi eté yuvireco cuerayevisa aviye catu vahe pipe güeco água. ³⁶ Ambuae iparaisu catu ava upe oñeeroirosa pipe, onupasa pipe, oapĩchi-pĩchisa pipe, voquendasa pipe avei yuvireco. ³⁷ Ambuae ita pipe oapi-apisave omano, amove imombitesa ivira asiasa pipe, anise ambuae yucasa quise pucu pipe, amove ipãhu pendar oguata tẽi, ovesa, cavara pিরer añomi tẽi iyemondesa, iparaisu mbahe porẽhi yuvireco nombohe catui ava ipihañemoñetasa pipe sereco iyavei mara-mara tẽi vireco yuvireco no. ³⁸ Evocoi seco catupri vahe yuvireco ndiyai co ivi pipendar Tũpa cuaparẽhi upe vireco vaherã oyepãhuve, ahe oguata tẽi ivi iporupirẽhisa rupi, ivitri rupi, mbahecuar rupi avei yuvireco.

³⁹ Yepe ahe opacatu aviye ité Tūpa upe oyeroyasa rese yuvireco viña, ndoipisii eté rumo oyeupe Tūpa remimombehugüer yuvireco. ⁴⁰ Esepia, Tūpa omoime mbahe aviye catu vahe yandeu 'oyoya tupri toipisi güecocuer ihivi tupri água che remimombehugüer rupi yuvireco' ohesa pipe chupe, yandeu opacatu avei.

12

Yamahecuá tupri ra yande yeroyasa pipe Jesús rese

¹ Sese yande, yaicuase setá ité evocoi ava oime omboye-cua vahe Tūpa rese oyeroyasa, iyacatu ité yaseyapa opacatu mbahe ndayande mbohe catui vahe Tūpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tūpa ombou vahe rese yandeu inungar ivava catu vahe. ² Yamahe tupri itera Jesús rese. Ahe ichui niha yareco yande yeroyasa Tūpa rese. Ahe avei oyese yande mboporeroya tupri catu. Oiporara curusu rese omano ochiēhisa pipe. Esepia, ahe oicua ité oparaisu pare virecora oviharetesa, oguapise omborerecuasave Vu acato coti oĩ.

³ Pe avei catu, pepihañemoñeta Jesús recocuer rese; ahe oiporara ité mbahe rasicuer ava yangaipa vahe mara-mara tēi güerecose. Sese pecuerai eme Cristo rese peico água iyavei, "Ndorequerēhi iri" ndapeyei chira. ⁴ Esepia, pe ndape-mano vitei eté angaipa upe pe yembopihaviracuasa pipe. ⁵ Peresarai eté Tūpa pe mboaracuasa sui tahir ité pe recosa pipe; icuachiapri aracahendar pipe aipo ehi:

"Che rahir, eyemoingatu voiño Yar nde mombaraissusa upe nde reco mohivi tupri água, iyavei, 'Ndachequerēhi iri' nderei chiaveira chupe ndeu oñehe pĩratase.

⁶ Esepia, Tūpa osecomohivi tupri ava güembiaissu iyavei omombaraisu rane guahir sereco água" ehi.

⁷ Peñemosañu catu pe mombaraissusa upe pe reco mohivi água. Esepia, Tūpa ēgüe ehise pēu guahir ité pe rereco. ¿Oime pĩha que ñepeí ava guahir upe noñehe pĩratái vahe secocuer mohivi água? ⁸ Tūpa ndape recocuer mohivise inungar oyapo ambuae guahireta upe yepi, pe evocoiyase inungar-ra chĩhivahe ndiyesupai vahe, ēgüe peye tēi peico chupe. ⁹ Iyavei, chĩhivahe tēi vite yaicose, yande yesupa co ivi pipendar yande nupa yande recocuer mohivi água, ahese yamboetei. Sese yamboetei catura yande Ru Tūpa íva pendar tecovesa rereco água. ¹⁰ Yande yesupa co ivi pipendar opihañemoñetagüer rupi tēi yande nupa yaicove raimi tēise co ivi pipe; Tūpa rumo yande mombaraissu yandeu mbahe tupri água rese yande reco maranehi água inungar ahe ndaseco marai vahe. ¹¹ Supi

eté yipindar, poronupasa yaipisi ramose, tasi yandeu. Coiye rumo yande imboyeroyasa pipe yayapo catura mbahe ihivi vahe. Ahe evocoyase yande recocuer rerecora mbahe tupri pipe.

Peicua catu Tūpa ñehe rendu potaēhi sui

¹² Sese pemopoase iri pe reco pīratasa iyavei peyemonguerēhi iri pe guata āgua yande Yar rupi. ¹³ Ipare peseca peri ihivi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

¹⁴ Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe güeco maranehi, ndosepiai chietera yande Yar. ¹⁵ Peñearo tupri catu, tipo eme ava ndoipisi vahe Tūpa porovasasa pe pāhuve, iyavei tipo eme mbahe tēi que ava piha pipe; aviyeteramo opacatu rese ova tiētera. ¹⁶ Tipo eme catu pe pāhu pendar oyemboaguasa tēi vahe. Tipo eme avei ava Tūpa upendar mbahe viroñro vahe pe pāhuve inungar Esaú aracahe. Ahe omondo Tūpa porovasasa oyeupendar tahir ipi güecosa re-sendar mimoi repirā tēi vivri upe. ¹⁷ Iyavei peicua, ipare acoi Esaú oipisi pota Tūpa porovasasa vu sui viña. Ahe rumo ndiya iri eté sovasapirā secoi. Yepe oyasehó iteanga viña, ndiya iri eté rumo mbahe sembierecovi rāgüer mboyevi āgua chupe.

¹⁸ Peyemboyase Tūpa rese, ndahei inungar pe ramoi israelita aracahendar. Esepia, ahe ivitri Sinaí sese yapoco vahe rese tēi oyemboya vahe yuvireco; ahe ivitri rese sendí ité inungar tata rendigüer; oime pītu, pītumimbi vahe, ivitu ai avei sese. ¹⁹ Iyavei ndapesendui mimbi imoñhepři, Tūpa ñehe avei. Aracahendar rumo osendu ité yuvireco. Iñehe renduse rumo, osiquiyepave ndoipota iri ahe oyeupe ñehe yuvireco. ²⁰ Esepia, ahe oyembosiquiye ité evocoi porocuita aipo ehi vahe sui: “Acoi opīro vahe ivitri rese, yepe que mbahe mimba tēi viña, ahe peyapi-yapi yuca ita pipe, anise lanza pipe avei” ehi. ²¹ Ahe mbahe oyecua vahe aipo oporombosiquiye vahe ité. Evocoyase Moisés teieté aipo ehi: “Che siquiyepave arirri eté” ehi.

²² Pe rumo peyemboya iva pendar ivitri Sión ve, Tūpa oicove vahe recuave. Ahe tecua Jerusalén iva pendar. Aheve Tūpa rembiguai setá iteanga vahe oñemonuha imboetei āgua yuvireco yepi. ²³ Iyavei peyemboya opacatu ava Tūpa rahir ipi Cristo reroyasar rese, ahe serer icuachiapri ivave. Peyemboya avei Tūpa rese, ahe niha yande recocuer rese oporandu vahe secoi; iyavei peyemboya ava seco aviyē vahe espíritu yuvirecoi vahe rese. Ahe niha Tūpa osecomohivi tupri sereco. ²⁴ Peyemboya avei Jesús rese, ahe omoime yandeu Tūpa

remimbotar ipiasu vahe, ahe suvi yande moatiro vahe. Ahe aviye catu yandeu Abel ruvi sui.

²⁵ Sese peicua catu, “Ndoroviroyai” peye vaherã acoi pëu oñehe vahe upe. Esepia, Moisés reroyaëhisa pipe pe ramo noñemi eté Tūpa ñemoirosa sui yuvireco, oyeupe, “¡Peicua catu!” ehise co ivi pipe aracahe. Êgüe ehise chupe yuvireco aracahe, êgüe ehi catu iri tiëtera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu. ²⁶ Tūpa oñehe pipe omboriri eté ivi aracahe; cūrutei rumo yandeu aipo ehi: “Che amboriri irira ivi, ndahei chira rumo ivi güeraño, iva avei amboririira” ehi. ²⁷ ‘Amboriri irira’ aipo oyapave aipo ehi: “Opara mbahe omi vahe omocañi güembiapo Tūpa ‘topita apirëhi mbahe nomii vahe’ oyapave” ehi. ²⁸ Tūpa mborerecuasa ombou vahe yandeu ahe nomii chietera. “Aviye ndeu” yahera evocoyase sese chupe; ipipe sui yayerure catu yande piha pipe chupe imboeteisave semimbotar rupi. ²⁹ Esepia niha, ahe inungar tata ñepeï reseve mbahe omocañipa vahe.

13

Mara yahera Tūpa mboviha

¹ Ndapepoi chietera pe yeaisusa sui ñepeï-peï oyeivri nungar pe recosa pipe. ² Iyavei peresarai eme pe avasa sui ava oyepotase pe piri. Esepia, co nungar apo pipe amove ava omoingue Tūpa rembiguai güëtave icuaëhi pipe.

³ Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tēi serecopri rese. Esepia, aviyeteramo êgüe ehi aveira pëu.

⁴ Pe opacatu pemboetei avei mendasa, iyavei peico pe reco maranehisa pipe mendasa rese. Esepia, Tūpa oicuaru oyemboaguasa tēi vahe upe.

⁵ Ndahei guarepochi tēi peipotara. Iya rumo peyembovihaño mbahe pereco vahe rese. Esepia, Tūpa aipo ehi: “Ndoroeiyai chietera, ndapoi chietera nde sui” ehi aracahe.

⁶ Evocoyase aipo yahera Yar rese yande yeroyasa pipe: “Che Yar che pitivii, ndasiquiyei chietera ava tēi sui oyapo potase mbahe cheu” yahera.

⁷ Peyemomahenduha pe rerogatasar rese, pëu Tūpa Ñehengagüer mombehusar rese avei. Pepihañemoñeta tupri secocuer rese, seco apri rese avei; iTūpa reroya agüer rupi tupri avei peico.

⁸ Jesucristo recocuer noñecuñaroi vahe ité, yipisuive secoi apirëhi vahe. ⁹ Peyembopa ucai rene yembohesa co coti tēi vahe upe. Aviye catu yayemomirata Tūpa poroaisusa rese

que mborocuaite tembihu resendar sui. Esepia, co nungar mbahe ndovireco ucai mbahe aviye vahe ohusar upe.

¹⁰ Yande rumo yareco ambuae ité Tūpa upe seropovēhepri. Ahe niha ndiyai eté pahi tūparo yipindar yuvirecoi vahe pendar yuvirohu. ¹¹ Supi eté judío pahi ivate catu vahe viroique mbahe ruvi tēi Tūpa rēta oi imaranehi catu vahe pipe seropovēhe ava angaipa rerocua āgua; ahe mbahe mimba rete rumo osapi tecua ivii yuvireco yepi. ¹² Ēgüe ehi avei niha Jesús iparaisu, omano tecua ivii ava reco mbocatupri āgua vuví pipe. ¹³ Ēgüe yahe aveira yasora Jesús upe yande paraisu āgua supi ava yande reroirosa pipe yaico. ¹⁴ Supi eté, co ivi pipe ndayarecoi eté tecua apirēhi vahe. Yande rumo yaseca evocoi tecua oime vaherā yandeu curi. ¹⁵ Sese Jesús rembiapo rese iyacatu yamboeteira apirēhi vaherā yande Yar Tūpa. Co imboeteisa inungar mbahe seropovēhepri ari rupi chupe. ¡Ēgüe yahera imboetei yande ñehe pipe! ¹⁶ Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropovēhepri Tūpa upe. Ahe niha Tūpa oipota.

¹⁷ Pemboyeroya pe cuaisar, peyapo semimbotar. Esepia, ahe ndopituhui eté pe recocuer rāro yuvireco. Esepia, oicua Tūpa oicuara mbahe sembiapo rese chupe curi. Sese pemboyeroya catu 'tayavai eme iporaviquisa chupe; tasorivete oporaviquisa rese yuvireco' pe yapave. Pemboavaise rumo, nosei chietera mbahe aviye vahe ichui pe recocuer upe nara.

¹⁸ Peyerure Tūpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave. ¹⁹ Che yevi pihaiivi āgua rese ité aporandu pe yeruresa rese pēu Tūpa remimbotar rupi.

Mahenduhasa ipa vahe

²⁰ Tūpa mbahe tupri rerecosar, ahe niha ombogüerayevi vahe yande Yar Jesucristo yande rārosar ivate catu vahe, suvi pipe omboyecua güemimbotar piasu ndopai vahe imbou yandeu, ²¹ tombou pe reco mohivisa iyavei pe reco aviyesa opacatu pe semimbotar apo āgua; iyavei ahe toyapo mbahe opacatu güemimbotar yande rese Jesucristo rembiapo sui. ¡Ēgüe tehi imboeteipri apirēhi tasecoi Cristo yepi!

²² Che rivireta, peñemosañño co che opomboaracua vahe rese, moviro tēi niha co ñehesa aicuachía pēu. ²³ Aipota pe peicua yande rivri Timoteo imosesa soquendasa sui. Oyepota pihavise, arasora cheyeupi che sose pe repia.

²⁴ Pemombehu che mahenduha opacatu ava pe cuaisar upe, opacatu ambuae Tũpa upendar ava upe avei. Ivi Italia rupindar avei ombou omahenduhasa yuvireco pẽu.

²⁵ Aipo rupive, yande Ru Tũpa tape rovasa opacatu.

SANTIAGO REMBICUACHIA SANTIAGO

Mahenduhasa

¹ Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

Mbahecuasa ou vahe Tūpa sui

² Che rivireta, pevihareteñora peico acoi oimese tecoãhasa pëu yepi. ³ Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosã ãgua rese peico. ⁴ Peicoño ité pe reco ñemosasa pipe pe reco mohivi tupricatu ãgua. Evocoyase nipane iri chira mbahe Tūpa suindar pëu.

⁵ Iyavei acoi ipanese que ava pe pãhu pendar upe yaracua ãgua, toporandu Tūpa upe. Evocoyase ahe omboura chupe. Esepia, ahe opacatu upe mbahe ombou güecatëhiëhisa pipe iyavei ombahe mboasiëhisa pipe avei. ⁶ Iyacatu rumo evocoi ava oporandura Tūpa upe sese oyeroyá pipe, ndahei chira opihañemoñeta rerova-rova tëisa pipe inungar acoi ivitu i ombohitu-hitu tëi vahe. ⁷ Acoi ëgüe ehi-ehi tëi vahe ava ndoipisii chira mbahe yande Yar sui yuvireco. ⁸ Esepia, ñepe ari ipihañemoñeta ñepe mbahe rese, ambuae ari ambuae rese. Ndoymoviracuai güeco tupri ãgua rese yuvireco.

⁹ Iyavei que Jesús reroyasar seco mbegüe vahe toyembovihareteño yepi Tūpa omboeco ivate ãgua rese. ¹⁰ Iyavei mbahe yar secoi vahe pe pãhuve, toyemboviha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri ëqüe ehi raimi tëi vahe yuvireco. ¹¹ Evocoyase acoi ari osëse, sacú iteangase, ahese caha opa ipiru; ipotri avei opa oviapi ichui iyavei iporañetesa opa ichui. Ëgüe ehi aveira ava mbahe yar; omanora oporaviquisa sui.

Tecoãhasa, poroãtoisa resendar

¹² Acoi ava oyemoviracua vahe poroãtoisa upe oyembovihara oico. Esepia, osasa tuprise evocoi poroãtoisa, oipisira porerecosa, ahe tecovesa apirëhi vahe Tūpa ombou vahe guaisupar upe. ¹³ Acoi ava oyanduse poroãtoisa oyeupe mbahe tëi apo ãgua, “Tūpa revo ëgüe ehi cheu” ndehi chira. Esepia niha, Tūpa ãtoisar ndipoi eté mbahe tëi oyapo uca vaheerã chupe. Iyavei ahe noñatoi avei mbahe tëi apo ãgua ava. ¹⁴ Co rumo ava opihañemoñeta rai upe oñeatoy uca mbahe tëi apo ãgua yepi. ¹⁵ Güemimbotarai pipe evocoyase oyapo angaipa. Ipare angaipa apo pipe sui ou manosa chupe.

¹⁶ Che riviřeta, che rembiaisu, peyembopai rene. ¹⁷ Esepia, opacatu mbahe aviye vahe ahe Tũpa ombou vahe yandeu. Ahe niha opacatu iva rese mbahe aposar. Ndahei rumo güembiapo nungar secoi. Esepia, sembiapo oñecuñaro vahe. ¹⁸ Ahe rumo ombou ité tecovesa yandeu co ñehesa supi eté vahe pipe ‘toyuvirecoi inungar yipindar mbahe miti ha seropovēhepri cheu opacatu che rembiapo sui’ ohesave yandeu.

Tũpa rese yande pihañemoñetasa supi tupri vahe

¹⁹ Iyavei che riviřeta, che rembiaisu, peyemomahenduha co che ñehe rese: peyapisaca tupri voira ambuae ava ñehe rese, mbegüe rupi rumo peñehera chupe iyavei ndapemba-hemboasi voi tēi chiaveira. ²⁰ Esepia, yambahemboasi voi tēise, ndayayapoi Tũpa remimbotar. ²¹ Evocoyase peseya teco raisa, opacatu ambuae oime vahe mbahe naporai vahe pe pāhuve. Co catu pe yeminisave peroya catu vite Tũpa ñehe omoingue vahe pe piha pipe. Ahe niha vireco pĩratasa pe pĩsiro āgua.

²² Pe rumo pemboaviyera co pe mbohe vahe ñehesa; ndahei acoi pesenduño tēira. Esepia, pesenduño tēise, pe ae peyembopara. ²³ Supi eté acoi ava osenduño tēise Tũpa Ñehengagüer, ipare rumo ndoviroyai, ahe inungar acoi ava osepiaño tēi vahe vova yepiasa pipe. ²⁴ Ipare rumo oyepepise ichui, cūrteimi sesaraiño ichui. ²⁵ Acoi ndasesarai vahe ité rumo güemiendu sui iyavei oyapisaca tupri vahe co mborocuita maranehi mbahe-mbahe tēi sui yande rerocua vahe rese iyavei oyemoviracuaño ité vahe oyapo vaherā iporocuita, ahe oviharetera opacatu güembiapo tupri rese.

²⁶ Amove ava, “Che aguata tupri Tũpa rupi” ehi tēi. Ndoicuai rumo oñehe monguiriri āgua. Evocoyase ahe ae oyembopa oico. Sembieroya evocoyase ēgüe ehi tēi vahe. ²⁷ Yarecose rumo yande rembieroya icatupri, nimarai vahe yande Ru Tũpa rovai, ahese yaipitivira co tirēhi, imer mano vahecuer avei iparaisusa rese. Iyavei ndayayapoi chira mbahe naporai vahe.

2

Ndayamboyoaviratii chira ava mboeteisa sereco

¹ Iyavei no, che riviřeta, pe peroya vahe yande Yar Jesucristo seco porañete vahe peico, ndapeyeaisu yoavii chira. ²⁻³ Inungar-ra que ava mbahe yar oiquese pe ñemonuhasave viña, ahe icuã penda oro vahe, iturucuar catupri ai vahe. Sese pehañeco tupri, “Eguapi co tenda aviye catu vahesave” peyera chupe. Ahe pipeve avei co oiquese pe pāhuve iparaisu vahe oturucuar cuacua vahe reseve, “Eipe peve nde epita,

anise eguapí ivive” aipo peyeñora co chupe viña. ⁴ Evocoiyase ñgüe peyese, peyapo mbahe ndoyoyai vahe, naporai vahe pe pãhuve ae iyavei peyeapo ava poravosar nungar peico pe pihañemoñeta raisa pipe.

⁵ Che rivireta, che rembiaisu, pesendu aipo ñehesa: Tũpa oiporavo ava iparaisu vahe co ivi pipe ‘toyuvirecoi mbahe yar nungar che reroyasa rereco’ oya, iyavei ‘toipisi che remimombehugüer rupi che mborerecuasa oyeupe nara’ oya-pave guaisupar upe. ⁶ Pe rumo seroïrosa pipe pemochi ava iparaisu vahe. ¿Ndahei vo mbahe yar mara-mara tẽi pe rereco yuvireco yepi? Ahe niha pe mbotiriri mborerecuar rovai pe reraso yuvireco yepi. ⁷ Ahe avei niha oñehe-ñehe tẽi seroïrosa pipe yande Yar yaroya vahe rer imboyeroyapri rese yuvireco.

⁸ Supi eté yayapo mbahe aviye vahe yamboaviyese mborocuita ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe. ⁹ Acoi yayeaisu yoavirati tẽise rumo, ahese yayapo angaipa, yayavi mborocuita Tũpa rovai. ¹⁰ Esepia, acoi ava viroya vahe opacatu mborocuita, ipare rumo oime que ñepi nomboaviye tupri vahe, ahe oyavi opacatu mborocuita. ¹¹ Esepia, Tũpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyucaí chira no” ehi. Yepe acoi ndapeyemboaguasai chira viña, pe poroyuca pipe rumo, peyavi mborocuita. ¹² Evocoiyase peñehe tupri iyavei peico tupri aveira. Esepia, oporandura yande recocuer rese yande Yar oporocuita pipe güeru vahe yande reco tupri ñgua. ¹³ Supi eté acoi ndoiparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe ari pipe mborandusave curi.

Yamboaviye itera mbahe; ndahei chira yande ñehe tẽi

¹⁴ Che rivireta, ¿aviyera piha acoi ava, “Ayeroya yande Yar rese” ehi tẽi vahe, ndoyapoise mbahe aviye vahe yuvireco? ¿Oicatura piha ahe oñepisiro aipo ohe pipe tẽi yuvireco?

¹⁵ Inungar-ra oimese que yande rivri, anise yande reindri upe ipanera iturucuarã, semihura ari yacatu rupindar viña.

¹⁶ Evocoiyase que pe aipo peyeñora chupe viña: “Aviye, eso tupri eico. Eyeao esõ sõhisagüer sui, ecaru tupri” peyera. Ipare rumo ndapemondoise mbahe ipane vahe chupe, ¿aviyera piha ava upe aipo yande he tẽi viña? ¹⁷ Ñgüe ehi avei, “Ayeroya yande Yar rese” yande hesa; ndayayapoise rumo mbahe aviye vahe aipo yande hesa pipe, aipo yahe tẽi yaico.

¹⁸ Aviyeteramo ava pe pãhu pendar aipo ehira cheu: “Nde ereyeroya yande Yar rese, che rumo ayapo mbahe tupri” ehi. Che evocoiyase aipo ahera chupe: “Emboyecua ru

nde yeroyasa mbahe nde rembiapoẽhi pipe. Evocoyase che amboyecua che yeroyasa oime vahe che rembiapo pipe ndeu” ahera. ¹⁹ Nde niha aipo, “Che aicua oime ñepe Tũpa” ere. Supi eté aipo ere. Co rumo caruguar avei oicua. Ichui osiquiyepave rumo ahe oriri eté yuvireco. ²⁰ ¡Mbia, tapeico eme ndayaracuai vahe! ¿Ereicua vo co nde mbahe apoẽhisa nde yeroyasa ãgũe ehi tẽi vahe? ²¹ Esepia, Tũpa oipisi yande ramoi Abraham seco tupri pipe oicuvẽhese porerocosa nungar guahir Isaac chupe aracahe. ²² Indó, Abraham yeroyasa omboyecua ité güembiapo catupri reseve. Evocoyase ãgũe ehi ahe güembiapo tupri pipe omboaviye tupri oyeroyasa oico aracahe. ²³ ãgũe ehi yaviye icuachiapri aipo ehi vahe: “Abraham viroya ité Tũpa, evocoyase, ‘Co seco catupri vahe’ ehi Tũpa ipisi” ehi. Ahese ava, “Abraham Tũpa mboripar ité” ehi yuvireco chupe.

²⁴ Indó, Tũpa, “Co seco catupri vahe” ehi ava upe sembiapo tupri repiase yepi, ndahei iyeroyasa rese güeraño. ²⁵ ãgũe ehi tupri avei cuña ndipihai vahe Rahab upe. Esepia, ahe omoingue ñuvirio ava ivi repiasar imondopri güeta pipe, ipare oñomi imondo ambuae peri rupi yamotarẽhisar sui. Ipipe sui Tũpa oipisi inungar-ra seco ivi tupri vahe viña. ²⁶ ãgũe ehi yande rembiapo catupri ndayamboyecuaise yande yeroyasa pipe, ahe inungar avei Espiritu ndasecoise yande rese, yande yeroyasa evocoyase omano tẽi eté oico.

3

Yande ñehe resendar

¹ Che rivireta, yipindar ndapeyeapoi chira setá etepri oporombohe vahe peyepãhuve. Esepia, peicua niha yande oporombohe vahe yaicose, Tũpa oporandu catu itera ambuae ava sui yande porombohe agüer rese yandeu curi. ² Opacatu yande yayavi setá mbahe rese yepi. Oimese que ava ndoyavi vahe oñehe, ahe ava seco ivi tupri vahe. Iyavei oicua tupri opacatu güeco rereco tupri ãgua. ³ Inungar acoi yamondose cavayu yuru penda sese seroguata ãgua. Ahese opacatu cavayu retecuer yaicatu imboyahuva ãgua. ⁴ Inungar tupri avei carite guasu, yepe tuvicha iyavei yepe ivitu omoañi opiratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi. ⁵ ãgũe ehi avei yande ãpecu, yepe chĩhimi tẽi viña, ipipe rumo yayapo tẽi mbahe tuvicha vahe ava upe. Inungar avei que tata chĩhimi vahe sui tẽi yuvi guasu opa ocai. ⁶ ãgũe ehi yande ñehesa tata nungar. Iyavei yande ãpecu pipe opacatu mbahe-mbahe tẽi yamombehu. ¡Evocoi mbahe-mbahe tẽi mombehusar yande resendar ité! Ahe amove ovireco mara

opacatu yande recocuer. Inungar tata ova-ova vahe mbahe rese. Evocoi yande ñehe tẽisa caruguar suindar. ⁷ Ava oicatu opacatu mbahe mimba nimasoi vahe mboaracua ãgua, vĩrai, mboi iyavei mbahe ipi para guasu pipendar avei no. ⁸ Ndiyai eté rumo que ava oipoepi vaheerã oñehe. Yandeu ndiyai eté ipoepi ãgua. Yande ñehesa oporoyuca vahe nungar ité yepi, mbahe tẽi eté. ⁹ Co yande ãpecu pipe yamboetei yande Yar Tũpa, ipipe avei rumo yamomara ava, ahe ava rumo Tũpa oyapo onungar. ¹⁰ Ëgũe ehi eté, yande ñehe pipe yamboetei Tũpa, ipipe avei yaroĩro ava. Che rivireta, ndiyai evocoi nungar mbahe yayapo yepi. ¹¹ ¿Oicatura pĩha osẽ ñepei i ohẽ vahe sui sẽhe vahe, iro vahe avei viña? ¹² ¿Ihara pĩha higuera ivira rese aceituna viña? ¿Iyavei oicatura pĩha uva hi rese oha higo viña no? ¡Aní, ndoicatu eté! Iyavei ndoicatu ñepei i ohẽ vahe sui osẽ i, sẽhe vahe sẽhe asi vahe reseve.

Mbahecuasa supi eté vahe

¹³ Acoi oimese pe pãhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecua tuprisa pipe. ¹⁴ Oimese rumo pe pihave pe poroamotarẽhisa mbahe pota raisa pipe, iyavei peyeupe nara tẽi mbahe peseca, ahese ndiyai peyembovĩa tupri tẽi ‘che yaracua vahe aico’ pe yapave. Esepia, peremira tẽira supi eté vahe mbahe rese. ¹⁵ Ëgũe ehi eté evocoi nungar aracuasa ndahei Tũpa suindar. Ahe rumo co ivi pipendar tẽi vahe, ava pihañemoñeta sui tẽi osẽ vahe iyavei caruguar suindar tẽi avei. ¹⁶ Esepia, poroamotarẽhisa yande mbahe pota raisa pipe yarecose iyavei yaipotase mbahe yandeyeupe nara tẽi, ichui osẽ ñehespoepisa iyavei opacatu mbahe tẽi. ¹⁷ Acoi vireco vahe rumo Tũpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asi chiaveira. Iyavei oyemoingatu voi vahe, ahe oporoparisuereco vahe, nomboyoviratĩ vahe güecocuer. Ahe ipihañemoñetasa ñepei reseve vahe iyavei oyapo tupri vahe mbahe. ¹⁸ Iyavei acoi oseca vahe mbahe tupri yepi, oipisi itera opiha pipe teco ivisa.

4

Co ivi pipendar mbahe raisusa

¹ ¿Que sui pĩha ou vavasa iyavei ñehespoepi-episa pe pãhuve? Ahe ou pe mbahe pota raisa sui pereco vahe pe pihañemoñetasa pipe. ² Pe peipota rai mbahe. Ipore rumo ndapeicatu sereco ãgua. Evocoyase peporoyuca pe mbahe pota raisa pipe. Ndiyai eté rumo pẽu sereco ãgua. Ipipe sui peyeecoãha, pevava avei no. Ndapeyosui

eté rumo mbahe pe remimbotar. Esepia, ndapeporandui Tūpa upe. ³ Acoi peporanduse rumo sese, ndapeipisii. Esepia, peporandu rai tēi, peipota pe yemboviha āgua rese nara tēi. ⁴ ¡Pe mbia, peyavi vahe pe recocuer! ¿Ndapeicuai vo acoi ava Tūpa cuaparēhi mboripar tēi yuvirecoi vahe, ahe Tūpa amotarēhimbar yuvirecoi? Ēgüe ehi eté acoi oipota vahe co ivi pipendar mbahe-mbahe tēi pipe güeco āgua, ahe oyeapo Tūpa amotarēhimbar. ⁵ Supi eté Tūpa Ñehengagüer aipo ehi: “Tūpa osaisu güecatēhisa pipe o Espíritu omondo vahe yande piha pipe” ehi. ⁶ Ahe rumo yande pítivii catu oporoaisusa pipe. Esepia, icuachiapri aracahendar pipe aipo ehi: “Tūpa oyamotarēhi ava oyeecomboivate ai vahe. Oipítivii rumo seco mbegüe vahe saisusave” ehi. ⁷ Sese pemboyeroa catu Tūpa. Peyemoviracua caruguar remimbotar apoēhi āgua. Ahese ahe oyepepíra pe sui. ⁸ Peyemboya Tūpa rese, ahe evocoyase oyemboyara pe rese. Pe, angaipa viyar, ¡peñemoatiro mbahe peyapo vahe sui! ¡Iyavei pemoatiro pe pihañemoñetasa ñuvirío pereco vahe sui! ⁹ ¡Tatasi pēu, tapeyaseho, perorivete iri eme, pemboasi pe angaipa pe yemboviharēhisave! ¹⁰ Peñenopiha Yar rovai imboyeroyasa pipe. Ahe evocoyase pe reco mboivatara.

Peroïro eme pe mboetasa

¹¹ Che rivireta, aní chira peñehe mara peyeupe. Acoi oñehe rai vahe iyavei viroïro vahe ambuae Jesús reroyasar, ahe oñehe rai tēi aveira mborocuaita rese seroïrosave. Ēgüe peyese, evocoyase seroyaēhisa pipe peyemboivate catura mborocuaita sui viña. ¹² Oime rumo ñepeïño ité ombou vahe mborocuaita yandeu iyavei oporandu vahe yande recocuer rese. Ahe güeraño avei oicatu oporopísiro iyavei oporomocañi āgua no. Evocoyase pe, ¡ndiyai pe cotindar reroïro āgua pēu!

Ndayaicuai mbahe oime vaherã yandeu ayihive

¹³ Pesendu pe aipo peye vahe: “Cūrítei, anise ayihive yasora que tecuave, anise que tecua guasuve revo. Aheve yaicora ñepeï araviter yande poraviqui āgua. Ahese yamogana catura guarepochi” aipo peye vahe. ¹⁴ ¡Ndapeicuai rumo mbahe oime vaherã pēu ayihive! ¿Mara ehi piha yande recocuer? Ahe inungar ívichi oyecua raimi tēi vahe, ipare opaño ocañi. ¹⁵ Iyacatu aipo peyera viña: “Oipotase yande Yar yande reco āgua, yayapora co nungar mbahe, que ambuae mbahe” peyera yepi. ¹⁶ Pe rumo peñeheño pe yemboivate aisa pipe mbahe pe rembiaporã rese. Opacatu evocoi nungar mbahe rumo

naporai. ¹⁷ Esepia, acoi oicua vahe mbahe tupri apo ãgua, ipare rumo ndoyapoi eté, ahe oyapo angaipa.

5

Imbahe eta vahe paraisusa resendar

¹ ¡Pe mbahe yar, pesendu co: peyaseho iyavei perãse! Esepia, peiporarara mbahe tēi peico. ² Opacatu pe mbahe eta ocañi tēi vaherã. Esepia, pe mbahe pe reco ati vahe opa ituyu. Iyavei pe turucuar yayi vahe opa avei ohu sasoi. ³ Pe oro, pe guarepochi opa opochi ati-ati no. Ahe niha pe recoãha ãgua, omboyecua vahe mbahe tēi pēu. Iyavei pe mbahe pota raisa ndoyavii pe roho ocai vahe vireco. Esepia, pemonuha guasu tēi mbahe pereco ati vahe sereco co ari ipa vahe pipe. ⁴ Peyapisaca, acoi oipoho vahe mbahe pēu nara yuvireco, chupe ndapemboepii eté. Sese sãsé tēi yuvireco. Ahe rumo yande Yar ipiratã vahe, ivate catu vahe oicua. ⁵ Co ivi pipe tēi pe peyecomoendiyai peico iyavei peyemboviha co ivi pipendar mbahe rese inungar guaca imonguirapri yuca ãgua. Ipipe peyemoingatu pe cañi ãgua. ⁶ Pe ñehe pipe pemombaraisu ava ndoyapoi vahe mbahe yuvireco; yepe, “Mara” ndehi yuvireco pēu viña, pe rumo peyucaño.

Ñemosasa iyavei yeroquisa resendar

⁷ Che rivireta, peñemosañu yande Yar yevi iri ãgua rese. Inungar ava omaheti vahe osãro rane güemiti poho ãgua. Esepia, ahe osãro yipindar oqui vahe iyavei ipa oqui vahe mbahe miti aviye ãgua. ⁸ Pe avei peñemosañu, peyemonguerēhi catu. Esepia, cōimi eté yande Yar yevi ãgua cute.

⁹ Iyavei che rivireta, peñemoiroi rene peyeupe. Evocoiyase Tūpa ndoporandui chira co mbahe rese pēu. Esepia, mborerecuar guasu iba pendar oyemoingatu voi ohã yandeu porandu ãgua. ¹⁰ Che rivireta, peico catu inungar Tūpa ñehe mombehusar aracadendar yuvirecoi vahe. Ahe oñemosañu mbahe rasicuer upe yande Yar rer pipe oñehe ãgua yuvireco. ¹¹ Yande rumo yaicua sovasapri ava oñemosasa vahe mbahe rasicuer upe yuvireco. Pesendu niha pe acoi mbia Job serer vahe ñemosasa. Ipare peicua avei mbahe aviye vahe yande Yar oyapo chupe. Yande Yar niha oporoparaisuereco vahe.

¹² Che rivireta, peyapisaca tupri catu co che ñehe rese. Pe ñehe ãgua ndapeiporui chietera que iba rer iyavei que ambuae mbahe pe ñehe reroya uca ãgua. Iyacatu rumo, “Supi eté” peyese, supiño itera; “Aní” peyese, aní chiño itera Tūpa poronupasa pisiēhi ãgua.

¹³ Aviyeteramo que pe pãhu pendar iparaisura oico; toyerogui. Aviyeteramo oimera que sorivete vahe oico;

ahe tosapucaí Tũpa upe. ¹⁴ Aviyeteramo que ava imbaheasira oico, toñehe evocoyase Jesús reroyasar rãrosar upe. Ahe tomondo aceite yande Yar rer pipe yuvireco sese. Ipare toviroyeroqui yuvireco. ¹⁵ Acoi oyerokuise oyeroyasa pipe sese yuvireco, imbaheasi vahe evocoyase ocuerara; yande Yar avei omopuhara. Acoi angaipa virecose, oime aveira ñerosa chupe. ¹⁶ Sese pemombehu pe angaipa peyeupe, peyeroqui avei peyese pe yembogüera tupri uca água. Ava aviye vahe oyerokuise oquerëhisave opacatu güecocuer pipe, ahe iyeroquisa ipĩratá ité. ¹⁷ Acoi Tũpa ñehe mombehusar Elías yande nungar avei. Ahe oporandu oyerokuisa pipe Tũpa upe, “Toqui eme” ehi. Aipo ehise, ndoqui eté ivi harive mbosapi araviter imombitesa rupi. ¹⁸ Ipare oyerokuí iri, ahese oqui iyavei mbahe miti iha iri.

¹⁹ Che rivireta, acoi oimese oyahuva vahe supi eté vahe sui pe pãhuve, ipare ambuae viroyevise Jesús upe, ²⁰ tapeicua pe acoi viroyevi vahe angaipa viyar secocueraí sui, oipĩsiro ihã imano rãgüer sui. Iyavei omoime ñerosa tuvichá vahe yangaipa upe. Aipo rupive.

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachía co che ñehe pëu, pe Tūpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe. ² Supi eté pe yande Ru Tūpa rembiporavo yipisuive peico semimbotar rupi. Evocoyase oEspíritu Santo pipe pe peha oyeupe nara viroyasar pe reco água ‘imoatiroproi toyuvirecoi che Rahir ruvi pipe oangaipagüer sui’ oya. Peipisi catu Tūpa porovasasa pe reco tupri água.

Tūpa suindar mbahe aviye vahe rãrosa

³ ¡Imboeteipri tasecoi Tūpa, yande Yar Jesucristo Ru! Ahe niha oporoparisuerecosa pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipípe sui yaicuaño ité oimera mbahe aviye vahe Tūpa suindar yandeu. ⁴ Ipípe sui avei Tūpa oipisi ucara pëu pe mombaesa ivave yapocatupri nocañi vaherã, ndituyui vaherã iyavei ndopai vaherã ité. ⁵ Pe peyeroya ité Tūpa rese. Sese niha ahe opíratasa pipe pe repi mbahe tēi sui poropisirosa pe reco água. Ahe vireco vahe imoingatupri ari ipa vahe mboyecua água pëu.

⁶ Co rese peyembovihareteño peico, yepe cūritei pe reco pipe peparaisu pucu raimi tēi setá pe recoãhasa pipe peico viña. ⁷ Esepia, pe yeroyasa Tūpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, “¿Aviye vahe ité pīha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tēi vaherã sui. Ëgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevise curi.

⁸ Pe niha pesaisu yande Yar Jesucristo, yepe ndapesepiai viña; cūritei rumo sepiaēhi pipe peyeroya sese. Sese pereco ité pe viharetesa tuvichá, aviye catu vahe, ndapeicatui vahe ahe imombehu. ⁹ Esepia niha, pesupiti pe remiaro poropisirosa apirēhi vahe peico pe yeroyasa pipe.

¹⁰ Aracahe suive ava Tūpa ñehe mombehusar oicua tupri pota ité co poropisirosa resendar yuvireco ‘¿mara ehi eté pīha co tecocuer?’ oyapave yuvireco. Iyavei oñemoñeta yuvireco Tūpa oporoaisusa pipe pëu mbahe ombou vaherã

rese. ¹¹ Cristo Espíritu senondeve oicua uca mbahe Tūpa ñehe mombehusar upe aipo ehi: “Poropĩsirosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pĩha evocoi mbia?” ehi; “¿Mbahesera vo oimera co Espíritu remimombehu yandeu?” ehi yuvireco. ¹² Tūpa rumo omboyecua chupe, ndahei chupe nara ité imombehupri yuvireco, pēu nara ité rumo. Ahe avei niha poropĩsirosa resendar ñehesa mombehusar omombehu pēu cūritei, Espíritu Santo pĩratasa pipe imboupri iva pendar yandeu. ¡Tūpa rembiguai avei oicua tupri pota tēi cūritei yuvireco viña!

Tūpa yande poravo yande reco maranehi āgua

¹³ Sese pe pihañemoñeta tuprisa pipe pemahemoha tuprira peyese Tūpa porovasasa pēu ombou vaheṛā rese pe yeroya catu āgua acoi Jesucristo oyevise curi. ¹⁴ Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tūpa recocuer cuaēhi viteseve. ¹⁵ Peicora rumo pe reco maranehisa pipe ité. Esepia, Tūpa pe poravo oyeupe nara; ahe ndaseco marai vahe ité. ¹⁶ Supi eté icuachiapri aracahendar pipe aipo ehi imombehu: “Pe tapeico seco maranehi vahe. Esepia, che ndaseco marai vahe aico” ehi.

¹⁷ Tūpa niha opacatu ava upe secocuer rese nomboyoviratii chira oporandu curi, sese pe, “Che Ru” peye vahe chupe peyembosiquiyera mbahe tēi apoēhi āgua imboeteisave co ivi pipe peico vitesve. ¹⁸ Esepia, Tūpa pe pĩsiro aracahendar pe ramoĩ suindar aracuasa ēgüe ehi tēi vahe sui. Peicua tupri ité niha co poropĩsirosa reprĩ nimboepisai eté que mbahe ocañi tēi vaheṛā pipe inungar oro, anise guarepochira viña. ¹⁹ Imboepisa rumo Cristo ruvi maranehi pipe. Ahe seropovēhepri, inungar ovesa nimarai vahe. ²⁰ Ahe Tūpa oiporavo aracahe ivi, iva apoēhi vitesve ēgüe ehi vaheṛā. Cūritei rumo oyemboyecua pēu mbahe tupri āgua. ²¹ Secocuer sui niha peroya Tūpa peico, ahe ombogüerayevi vahe omano vahe pāhu sui, ipare omondo oyemboeteisa, güeco porañetesa avei chupe. Ipape sui peyeroya Tūpa rese iyavei pesāro co mbahe avīye vahe pisi āgua ichui.

²² Cūritei Tūpa Ñehengagüer supi tupri vahe mboyeroyasa pipe imoatirosa pe recocuer pesaisu vaheṛā ambuae Jesús reroyasareta. Evocoyase ēgüe peyera peyeaisu catu opacatu pe pihañemoñeta tuprisa pipe, iyavei opacatu pe pĩratasa pipe. ²³ Pe niha pereco tecovesa piasu, ndahei pe yesupa omano tēi vahe suindar. Ahe rumo Tūpa Ñehengagüer supi tupri apirēhi

vahe reroya pipe. ²⁴ Esepia, icuachiapri aracahendar pipe aipo ehi:

“Opacatu ava inungar caha, iyemboeteisa evocoyase inungar ipotri.

Ipare ahe caha opa omano, ipotri avei opa oviapi;

²⁵ Tūpa Ñehengagüer rumo apirēhi vaherã ité yepi” ehi.

Ahe co ñehesa imombehupri poropĩsirosa resendar pēu nara.

2

¹ Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar.

² Inungar pītanimi ocuacua āgua oipota cambi; ěgüe peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua poropĩsirosa pipe, ³ que peicua itese yande Yar reco aviyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo oviroĩroño yuvireco. Tūpa rumo ahe ita oiporavo aviye catu vahe. ⁵ Ěgüe ehira pe rereco oyeupe inungar ita ndopai vahe; ipipe sui omopuhara otūparoguã pe rese. Iyavei pahi ndaseco marai vahe nungar peicora semimbotar rupi chupe. Pe evocoyase Jesucristo rembiapo pipe sui peyapora Espiritu upendar mbahe aviye vahe. Ahe inungar mbahe seropovēhepri aviye vahe Tūpa upe. ⁶ Esepia, icuachiapri aracahendar pipe aipo ehi:

“Che amondo ñepi ita nungar ava aviye vahe tecua Sión ve imoviracua āgua.

Ahe che rembiporavo iporañete vahe, imboeteipri.

Acoi oyeroyá vahe sese, ahe nochĩ chietera ichui” ehi.

⁷ Pe seroyasar peico vahe upe evocoi ita aviye vahe ité. Seroyasarēhi upe rumo imboaviyesa co ñehesa aipo ehi vahe:

“Oĩ aposar rumo vīroĩroño co ita yuvireco.

Ahe ita rumo coiye vīracuasa aviye catu vahe”

ehi. ⁸ Iyavei omboaviye aipo ñehesa:

“Co ita oipihapi oiti uca ava” ehi. Esepia, Tūpa suindar ñehesa reroyāēhi pipe sui oyemondo uca mbahe tēi pipe yuvireco. Ěgüe ehi vaherã ité rumo ahe secocuer yuvireco.

⁹ Pe rumo ava oyesuindar nungar iporavopri peico Tūpa uve nara, imborerecuasa upendar pahi, iyavei chupendar ava seco maranehi vahe peico. Ěgüe peye Tūpa reco pīratasa mombehu āgua peico. Esepia, ahe pe renose pītumimbisa nungar pe recocuerai sui tesapesa aviye vahe pipe pe reique

ãgua. ¹⁰ Yipindar ndahe vïtei eté Tûpa upendar ava peico, cûritei rumo ahe ité peico; yipindar ndaperecoi Tûpa poroparaïsuerecosa, cûritei rumo pereco ité cute.

Peico catu Tûpa mboetei ãgua

¹¹ Che rivïreta, che rembiaïsu, peico raimi tēi vahe co ivi pipe, pepoi opacatu co ivi pipendar pe pïhañemoñeta raisa sui. Esepia, pemomara uca tēi pe recocuer ipipe. ¹² Pereco tupri pe recocuer aviye vahe ava Tûpa ndoicua vïtei vahe rovaque. Yepe ava remieroïro peico inungar-ra mbahe tēi aposar viña, osepiase rumo pe rembiapo catupri, omboeteira Tûpa yuvireco ahe ari pipe acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe, ¹⁴ anise yivirindar. Ahe pe recua pipendar rãrosar imondopri ava naporai vahe mombaraisu ãgua, iyavei ava seco catupri vahe upe, “Aviye nde recocuer” he ãgua. ¹⁵ Esepia, Tûpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiēhi ãgua.

¹⁶ Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tuprira rumo Tûpa rembiguai pe recosa pipe. ¹⁷ Pemboeteira opacatu ava. Pesaisu catu pe rivïreta Jesús reroyasar; pemboetei Tûpa; pemboyeroya avei mborerecuar guasu.

Yembohesa yande Yar Jesucristo mombaraisu agüer re-sendar

¹⁸ Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco pōrai vahe avei. ¹⁹ Esepia, aviye catu yañemosase mbahe-mbahe tēi ava rembiapo upe Tûpa mboyeroya tupri sa pipe. ²⁰ Mbahe tēi aposa pipe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tûpa upe. ²¹ Pe paraïsu ãgua rese niha Tûpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe rese pe secocuer moña ãgua. ²² Ahe ndoyapoi vahe ité angaipa iyavei ndoporombopai vahe ité. ²³ Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tûpa seco ïvi vahe oicuaru chupe yuvireco” ehiño oyeupe mbahe-mbahe tēi aposar upe. ²⁴ Cristo teieté viraso yande angaipagüer güete pipe curusu rese ‘toyepēpi angaipa sui yuvireco. Ipipe sui toyuvirecoi

teco ñvisave' oyapave yandeu. Ahe niha yapichapri seci pe recocuer moingatú ãgua. ²⁵ Esepia, pe niha yipindar inungar ovesa ocañi tẽi vahe peico viña. Cũritei rumo peyevi Cristo upe. Ahe pe recocuer osãro cũritei inungar ovesa rãrosar.

3

¿Mara ehira ava omenda vahe recocuer yuvireco?

¹⁻² Ëgüe peye aveira cuña, pemboyeroya itera pe mer. Esepia, amove ndoviroya vitei Tũpa Ñhengagüer yuvireco; pemboyecuase rumo pe reco tupriisa imboeteisa avei chupe, avieteramo ahe avei viroyara, yepe ndapeñehei chira chupe viña. ³ Acoi pemboyecua potase pe yemoporañetesa ndahei chira pe rete rese inungar oãca rese mbahe omoporañete ai vahe, ndahei chiaveira pe yemondesa sendi yaí vahe oro nungar, que turucuar porañete catu vahe. ⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiẽhisa pipe. Evocoi nungar aviye catu ité Tũpa rovaque. ⁵ Ëgüe ehi avei cuña seco catupri vahe güeco porañetesa imboyecua aracahe. Ahe oyeroya Tũpa rese yuvireco, omer avei omboyeroya yuvireco. ⁶ Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeẽhisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tũpa omboura güeco tupriisa pipe tecovesa apirẽhi vahe oyoya voi pẽu. Ëgüe peyese, Tũpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepeí oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe. ⁹ Oyapose ava que mbahe tẽi pẽu, anise que oñehe raise, ndapemboyevii chira chupe. Iyacatu rumo mbahe tupriisa pipe pemboyevira chupe. Evocoi nungar mbahe apo ãgua niha Tũpa pe poravo ‘toipisi che porovasasa’ oyapave. ¹⁰ Esepia,

“Peipotase pe recocuer aviye tupri ãgua pe yemboviharetisa pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tẽi sui, pesecara mbahe aviye vahe.

Peseca teco tupriisa peyeupe nara, peguata supi.

¹² Esepia, supi eté, yande Yar osãro ava seco catupri vahe iyavei osendu oyeupe yeruresa.

Ava mbahe tẽi aposar rumo ndoipisii eté” ehi.

13 Ndipoi chira revo que ava mbahe tēi oyapo vahe pe recocuer upe yuvireco, pequerēhise mbahe aviye vahe apo. 14 Peparaisuse rumo mbahe pe rembiapo aviye vahesa rese, ¡sovasapri peico! Peyembosiquiyei rene que ava sui. 15 Pemboeteñora rumo Cristo pe Yar secosa rese pe piha pipe. Peyemoingatu vaira ava pe remiaro rese oporanduse pēu pe querēhisa pipe imombehu tupri āgua. 16 Ēgüe peyera rumo pe reco mbegüesa pipe imboetisave. Peico tuprira pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

17 Tūpa oipotase pe yemombaraisu, aviye catu mbahe aviye vahe apo pipe yepi mbahe tēi apo rāgüer sui. 18 Esepia niha, Cristo teietē omano yande angaipa repirā ñepeí reseve. Güeco maranehi pipe ēgüe ehi ava recocuerai rese opacatu pe reraso āgua Vu Tūpa upe. Ahe omano güete rese. Ipare rumo ocuerayevi güeco espíritu pipe. 19 Güeco espíritu pipe avei oso, omombehu Vu Tūpa remimbotar ava hã soquendapri yuvirecoi vahe upe. 20 Ahe ava Noé recosendar ndiporeroyai vahe yuvireco aracahe. Tūpa osāro güeco mbegüesa pipe secocuer moingatu āgua viña Noé oyapo vitesese arca oico. Ahe ipipe oñepisiro ochomi tēi yuvireco amarusu sui. 21 Ahe i osāhangapo i poroāpiramosa, ahe omboyecua yande ipisiroproi yande recosa. Poroāpiramosa rumo i pipe ndaheí yande rete moatiro āgua. Co rumo yaporandura Tūpa upe, yande pihañemoñetasa moatiro āgua. Ipipe sui evocoiyase yañepisirora yande Yar Jesucristo cuerayevisa pipe. 22 Ahe oso ivave oguapi oñ Vu acato coti. Opacatu sembiguai eta, mborerecuareta, opacatu imborerecuasa ipirata vahe avei ipovri pendar yuvirecoi.

4

Yandehañeco yandeyese mbahecuasa Tūpa suindar yaipisi vahe pipe

1 Cristo oiporara mbahe rasicuer güete rese. Pe avei evocoiyase peyemoingatu voi ēgüe peye vahe rā peico chupe nara. Esepia, acoi ava oyemomborara vahe güete pipe os-eya angaipa yuvireco. 2 Ipipe sui ndoyuvireco iri chira arí rupi ava tēi pihañemoñetasa pipe. Tūpa remimbotar rupi eté rumo oyapo pota mbahe co ivi pipe yuvirecoi vitesese. 3 Ēgüe peye pucu rane niha pe rembiapo ai pipe peico ava Tūpa reroyasarēhi recocuer nungar rupi tupri. Ahese mbahe-mbahe tēi peyapo pe pihañemoñeta raisa pipe, savaiposa, pietasave pe rāse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico. 4 Cūritei rumo pe mboriparer, ndoyembovihai tēi pe rese, ndapeico irise

supi semimbotarai apo ãgua. Ahe oñehe-ñehe tẽi yuvireco pe recocuer piasu rese. ⁵ Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu ãgua omano vahe upe, oicove vite vahe upe avei curi. ⁶ Sese niha co ñehesa pĩsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirã, iespĩritu rumo yuvirecoi apirẽhi inungar Tũpa.

⁷ Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tuprisa pipe. ⁸ Co catu opacatu tupri ité peyeaisura pe piha pipe. Esepia, ãgũe yahera poroaisusa pipe yande ñero voira seta ava yangaipa vahe upe. ⁹ Peipisi tupri ava yuviraso vahe pe rõtave; “¿Mbahe rese piha co ou?” peyei rene pe pihañemoñeta pipe pe piri ou vahe upe. ¹⁰ Ñepeipei yande yaiporura Tũpa suindar mbahecuasa yareco vahe ambuae Jesús reroyasar rese hañeco tupri ãgua. Yaiporu tupri co Tũpa porovasasa setá vahe yande cuaita mboaviye tupri ãgua. ¹¹ Acoi pemombehuse Tũpa suindar mbahe, pemombehura inungar iñehe ité; acoi peporopĩtivii potase, peyapoño opĩratasa pẽu Tũpa ombou vahe pipe. Opacatu mbahe peyapo vahe peyapo ‘tomboetei ava yuvireco Tũpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. ãgũe tehi apirẽhi vaherã ité.

Yemombaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe tẽi yande recoãhasa pẽu ‘ndoyavii, ndipoi chietera evocoi nungar mbahe cheu viña’ pe hesa pipe. ¹³ Yayembovihareteñora rumo ipipe. Esepia, yande rereco yande Yar yemombaraisu agüer nungar pipe yuvireco. Evocoiyase yayemboviharete itera acoi yande Yar oyevisẽ güeco pĩratasa pipe. ¹⁴ Iñehe marase yuvireco pẽu Cristo reroyasar pe recosa rese, sovasapri peico. Esepia, Tũpa Espĩritu güeco porañetesa pipe secoi eté pe rese. ¹⁵ Acoi pe pãhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tẽi aposa rese. Ndahei chiaveira que ambuae ava mbahe rese iñemañeco tẽisa sui ãgũe ehira serecosa. ¹⁶ Co rumo acoi peparaisuse Cristo reroyasar pe recosa pipe, ndapechĩ chietera. Pesapucaira rumo Tũpa upe imboeteisa pipe serer pereco vahe rese.

¹⁷ Esepia, oyepota ité ari Jesús reroyasar upe rane ité tecocuer rese porandu ãgua. ãgũe ehise yandeu, mbahe tẽi

catu itera Jesús reroyasarēhi upe. ¹⁸Yavaise seco catupri vahe upe iñepisiro āgua, ¿mara ehira pīha ava ndaseco pōrai vahe ava angaipa viyar yuvirecoi vahe upe? ¹⁹Sese peyemombarase Tūpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hā rāro āgua. Esepia, ahe niha yeroyasa ité secoi.

5

Aracuasa Jesús reroyasar upe

¹ Che amboaracua pota pe pāhu pendar Jesús reroyasar rārosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, ēgüe ahe aveira acoi yande Yar oyevise curi. ² Pesāro tupri catu Tūpa upendar ava eta pe remiaro co omondo vahe pēu inungar ovesa rese yangarecuar osāro tupri vahe ovesa; peyapora pe querēhisa pipe ité. Ahe niha Tūpa oipota, ndahei ambuae yande cuaisa pipe tēi, ndahei avei guarepochi pota raisave yayapo. Yayapora rumo mboraviqui yande querēhisa pipe ité. ³ Ndapeicoi chira pe remiaro upe inungar que mborerecuar güeco ivatesa pipe oporocuai pīrata vahe. Pemboyecuar rumo pe recocuer aviye vahe chupe imbohesa tupri pipe. ⁴ Evocoiyase acoi oyevise yande Yar, yande rārosar ivate catu vahe, ahese peipisira mbahe porerecosa, teco ori porañete apirēhi vahe.

⁵ Iyavei no pe mbia chīhivahe, pemboyeroyara ava pe rārosar peico. Iyavei opacatu peyemboyeroyara pe reco mbegüesa pipe peyeupe peico. Esepia,

“Tūpa ava oyeecomboivate ai vahe amotarēhimbar secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tūpa pīratasa povrive. Evocoiyase pe reco mboivatera curi. ⁷ Opacatu mbahe rese pe pīhañemoñeta atisa pemombehura Tūpa upe. Esepia, ahe pe rārosar ité secoi.

⁸ Pearacua cañi rene peyesui, pemahemoha ari rupi peyese. Esepia, pe amotarēhimbar Caruguar pe reco momara pota yepi inungar yaguar oñaro vahe oguata tēi oporoeca ‘tamomara ava’ oyapave. ⁹ Sese peyemoviracuara Tūpa rese pe yeroyasa pipe Caruguar upe. Esepia, peicua niha opacatu rupi avei yande rivireta Tūpa rese yuvirecoi vahe iparaisu co nungar mbahe pipe. ¹⁰ Peparaisumi pare rumo, Tūpa teieté pe reco mohivi tuprira, iyavei pe reco moviracuara, pe momirata aveira pe yepepi iriēhi āgua ichui. Ahe niha oporovasasa pipe yande poravo oyeupe nara, yande yaso vaherā supi teco ori ndopai vahesave yande Yar rese yande

recosa pipe. ¹¹ Ëgüe tehi tasecoi güeco pĩratasa apirẽhi vahe pipe.

Mahenduhasa ipa vahe

¹² Yande rivri Silvano omboaviye tupri vahe ité ocuaita yepi, ahe che pĩtiviisa pipe co ayapo imondo che rembicuachía ndipucuimi vahe pe mboaracua catu ãgua ‘ipipe toicua tupri catu yuvireco co porovasasa oipisi vahe, supi eté omboyecua vahe Tũpa poroaisusa’ che hesave. ¡Peyemoviracua tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pẽu. Marcos, che rahir nungar avei imahenduha pe rese. ¹⁴ Peyeovaupite “avirave” apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.

IMOÑUVIRIOSA PEDRO REMBICUACHIA SAN PEDRO

Pedro mahenduhasa Jesús reroyasar upe

¹ Che, Simón Pedro, apóstol, Jesucristo rembiguai aico. Co aicuachía che ñehe pëu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tüpa, yande Písirosar Jesucristo seco ñvi vahe yuvirecoi. ² Tapeipisi catu porovasasa iyavei teco tuprisa Tüpa, yande Yar Jesús cua tupri pipe.

Jesús reroyasar recocuer

³ Tüpa ombou güeco pĩrata pipe opacatu mbahe ipane vahe yande recove água, sese yande pihañemoñeta catu água avei yande secocuer cua tupri pipe. Ahe yande poravo güeco porañetesa pipe, güembaliapo porañete vahe pipe avei. ⁴ Ipipe avei oseyá oñehe imboaviyepirã yandeu; ahe ñehe ãgüe ndehi tẽi vahe, aviye catu vahe ité. Co yandeu ñehesa pipe sui perecora Tüpa reco aviye vahe peyese pe yepipi água mbahe tẽi sui. Ahe acoi oime vahe co ñvi pipe ava remimbotar tẽi sui. ⁵ Sese pe peyeroya vahe Jesús rese, peyemomirata catu aveira peyapo vaheerã mbahe aviye vahe. Peseca aveira Tüpa remimbotar cua tupri catu água. ⁶ Iyavei peñearo tupri ra. Ipare peñemosaño aveira mbahe tẽi upe. Ipipe sui peyemondo tupri catura Tüpa upe. ⁷ Ipare peyeaisura peyeivri nungar pe recosa pipe. Ipipe sui peseca catu vitera ava raisu tupri água.

⁸ Esepia, perecose evocoi nungar mbahe pe recocuer pipe, pembouvicha catuse avei, ahese pe recocuer ãgüe ndehi tẽi chira, peicua tupri catu aveira yande Yar Jesucristo. ⁹ Acoi ndovirecoi vahe rumo evocoi nungar mbahe oyese, ahe oyeapo inungar ndasesapisoi vahe, anise mbahe ndosepia tupri vahe, sesaraiño oangaipa rese ñero agüer sui. ¹⁰ Sese che rivireta, peyemoviracua catu Tüpa pe renoisa mboyecua água iporavopri pe recosave. ãgüe peyese, ndapeviapi chitera mbahe tẽi pipe. ¹¹ Evocoi nungar pipe sui pe pisi tupri ra omborerecuasa ndopai vahe pipe yande Yar, yande Písirosar Jesucristo.

¹² Sese niha opomomahenduhãño itera evocoi nungar mbahe rese, yepe peicua, peicoveño avei mbahe supi tupri vahe rese. ¹³ Aviyeño itera revo che recove viteseve opomomahenduha vite co aracuasa rese. ¹⁴ Esepia, yande Yar Jesucristo oicua uca cõimi che mano água cheu. ¹⁵ Opombohera

rumo opacatu che catugüer rupi co tecocuer rese che manore pe mahenduha água.

Co osepia vahe ité Jesús mborerecuasa yuvireco

¹⁶ Co porombohesa oromombehu vahe pëu yande Yar pĩratasa resendar, iyevi iri água resendar avei, ndahei oreye-sui tẽi. Ore rumo orosepia vahe ité ore resa pipe yande Yar mborerecuasa. ¹⁷ Orosepia niha yande Ru Tũpa omboeteise Guahir iyavei omondose chupe seco porañete iri água aipo ehise oñehe güeco porañetesá pipe: “Co che Rahir, che rembiaisu ité, sese niha che ayemboviharere vichico” ehise. ¹⁸ Ore ité niha aipo ñehesa orendu iva suindar oroicose yande Yar rupi ivitri imboeteipri vahesave.

¹⁹ Ahe ñehesa omboyecua catu ñehesa aracahendar Tũpa ñehe mombehúsar remimombehugüer supi tupri vahe Cristo resendar. Iya ité pëu pe yapisaca tupri água sese; inungar que tataendi pĩtusave osesape vahe oico acoi osẽse voi cõhe rerusar yasitata guasu ou, ãgüe ehi co ñehesa pe piha pipe sesape. ²⁰ Peicua catu co mbahe, co ñehesa aracahendar icuachiapri Tũpa suindar ité, ndahei yandeyesui tẽi yaicua imombehu água. ²¹ Esepia, ndahei ñehe mombehúsar oyesui tẽi omombehu yuvireco. Ahe rumo ava seco catupri vahe ité. Tũpa ité omombehu uca oñehe chupe Espiritu Santo pĩratasa pipe aracahe.

2

Oporombopa vahe porombohesa

¹ Yuvirecove rumo aracahe porombohesar oporombopa tẽi vahe Israel ivi rupi. Oime aveira niha pe pãhuve co nungar oporombopa tẽi vahe yuvireco. Ahe ñemisa pipe oporombohera co coti tẽi vahe ava reco momara tẽi água; evocoiya güeco pipe oicuacuñora oyar opĩsirosar. Co rumo güecocuer momba pihaivi água tẽi ãgüe ehira yuvireco. ² Setá ava oguatara secocuerai rupi. Ipipe sui ambuae ava oñehe rai tẽira porombohesa supi tupri vahe rese yuvireco. ³ Mbahe pota raísa pipe pe mbopara yuvireco co porombohesa co coti tẽi vahe rese. Icañi rumo oimeño itera yuvireco chupe. Yipisuive ité niha ahe imocañipirã yuvirecoi.

⁴ Esepia, aracahe Tũpa niñeroi eté güembiguaí oyemboangaipa vahe upe. Ahe opa ité omondo mbahe tẽisave. ãgüe ehi seyapa pĩtumimbisave, inungar ñapichimbri carena pipe yapocatupri yuvireco cañisave nara. ⁵ Iyavei acoi Tũpa niñeroi avei ava aracahendar ndaseco põrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihivi vahe resendar iyavei

ava siete yuvirecoi vahe supindar, ahe güeraño ité oipĩsĩro. ⁶ Iyavei opa omocañi tata pipe tecua Sodoma, Gomorra avei; ěgüe ehi imbotanimbu tupri 'na ahe aveira niha ambuae ava che reroyaẽhisar upe curi' ohesave. ⁷ Lot güeraño rumo ahese oipĩsĩro. Ahe mbia aviye vahe secocuer; ndoyembovihal tẽi ambuae ava recocuer mbahe-mbahe tẽi yuvirecoi vahe repiase.

⁸ Co mbia aviye vahe secoise ahe ava pãhuve ari rupi, tasi tẽi ipihañemoñeta pipe osepiase, osenduse avei mbahe tẽi yuvirecoi vahe rembiapo. ⁹ Indó, yande Yar oicua viroyasar renose ãgua mbahe tẽi sui; oicua avei mbahe tẽi pipe yuvirecoi vahe rereco imombaraisu ãgua ari cañise curi. ¹⁰ Tũpa omombaraisu catu itera acoi ndopoi vahe güemimbotarai sui, viroĩro vahe yande Yar mborerecuasa, oyeecomboivate ai vahe güemimbotar aposa pipe, acoi osiquiyeẽhisa pipe oñehe rai vahe seco ivate, ipĩrata vahe rese. ¹¹ Tũpa rembiguai eta iva pendar rumo yepe ipĩrata catu vahe, omborerecuasa vireco catu vahe avei yuvireco viña, niñehe-ñehe tẽi rumo Yar rovai yuvireco sese.

¹² Co ava mbahe mimba nungar tẽi ndovirecoimi eté opihañemoñetasa yuvireco. Opoco voiño tẽi mbahe rese; evocoi nungar yuviroha yucapirã tẽi eté. Ahe oñehe rai tẽi vahe mbahe güemienducuaẽhi rese. Mbahe mimba nungar tupri avei rumo omanora yuvireco güecocuerai pipe. ¹³ Oyemombaraisu uca ambuae ava mombaraisusa pipe sui tẽi, "Yayembovaha mbahe yande rembiapo ai rese" ehi tẽi eté yuvireco viña. ¡Oporomochi pipe tẽi rumo yuvirecoi, yuvirasose pe pietasave pe piri, güeco rai reseve oyembovaha oporombopasa tẽi pipe yuvireco!

¹⁴ Osepiase cuña, oipota voiño tẽi; ndaporambai avei iyemboangaipasa chupe. "Yayapoño mbahe" ehiño ndoyembohe catu vahe upe. Evocoi nungar oyembohe-mbohe catu mbahe pota raisa reca ãgua oyeupe yuvireco. Ava ocañi tẽi vaherã yuvirecoi. ¹⁵ Ocañi tẽi secocuer yuvireco Tũpa ñehe mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tẽi apo ãgua guarepochi pota raisa pipe yuvireco. ¹⁶ Tũpa rumo oyaca yangaipa rese guaricu omoñehe ucase ava ñehe pipe chupe. Ahese ramo opoi oaracuaẽhisa sui.

¹⁷ Co ava oporombohe vahe inungar ivicuar ipiru vahe. Iva quiha ivitu remimombo nungar tẽi avei. Apirẽhi vahe ité imombopirã yuvireco pĩtumimbi catu vahesave nara. ¹⁸ Esepia, oñehe tupri ai angahu tẽi ava monguerẽhi ãgua ava pihañemoñeta raisa rupi seroyevi ãgua. Ipipe sui ombopa tẽi ahe ava seco catupri pota vahe yuvireco evocoi nungar

mbahe tēi pipe iyevī iri āgua. ¹⁹ “Opacatu mbahe apo yaicatu yande reco pipe” ehi tēi yuvireco. Ahe ae rumo mbiguai tēi nungar yuvirecoi güecocueraí apo pipe. Esepia, noyuvínose caturi eté ichui. Supi eté, yayapoño itese que mbahe tēi, ahe evocoyase mbiguai nungar ité yande rereco uca. ²⁰ Esepia, acoi oicua vahe yande Yar, yande Pīsīrosar Jesucristo yuvireco, ipipe oyepepi co ivi pipendar mbahe-mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvínose. Ipare mbahe tēi catu yipendar secocuer sui yuvireco chupe. ²¹ Oyeupe Tūpa porocuaíta imondopri aviye vahe cua pare oyepepise ichui, aviye catura revo ndoicuaise co tecocuer ihīvi vahe yuvireco viña. ²² Supi tupri ité yaviye ñehesa sesendar: “Cave rumo ohu iri ogühe. Iyavei cuchi oyasu pare, oyevi iri tuyuve oyemboavaete āgua” ehi vahe.

3

Yande Yar yevisa

¹ Che rivireta, che rembiaisu, co aicuachía iri che ñehe pēu. Ipipe opomopihañemoñeta tupri uca pota che pe mboaracuasa pipe. ² Peyemomahenduha aracahendar Tūpa ñehe mombehusar seco catupri vahe ñehengagüer rese, yande Yar Poropīsīrosar porocuaíta rese avei acoi apóstol pe mbohe vahecuer yuvireco.

³ Peicura ranera co ari imombehupri ipa vahe virovise, oimera ava ahe oviroñora co tecocuer aviye vahe Tūpa suindar güemimbotarai pipe yuvireco ⁴ aipo ehira, “¿Marase tēi vo aipo oura Tūpa Rembiporavo imombehupri ou vaherā curi? Esepia, yande ramoí opa tēi omano yuvireco. Cūritei opacatu ahe tupriño tēi tecocuer aracahe ivi apo suive” ehi tēira yuvireco. ⁵ Ahe nimahenduha potai yuvireco co aracahendar rese. Esepia, Tūpa oyapo oñehe pipe iva, ivi avei, ahe ivi osē vahe i sui, i pāhuve avei secoi. ⁶ Coiye i pipe avei opa omocañi ivi, ombouse amarusu aracahe. ⁷ Cūriteindar rumo iva, ivi imoingatupri tata uve nara Tūpa porocuaíta rupi. Evocoi tata pipe avei ocañi tēira ava mbahe tēi aposar yuvirecoi vahe curi.

⁸ Che rivireta, che rembiaisu, peresarai rene co mbahe sui: yande Yar upe ñepeí ari inungar mil araviter; mil araviter evocoyase inungar ñepeí arimi tēi chupe. ⁹ Esepia, yande Yar ndiaracahei eté oñehe mboaviye āgua; inungar amove ava, “Iharacahe tēi” ehi yuvireco viña. Ahe rumo aviye etepri güeco mbegüesa pipe yandeu. Esepia, ndoipotai que ñepeí yepe yande cañi tēi āgua; ahe rumo oipota opacatú tupri ité yande recocuer ñecuñaro āgua.

¹⁰ Yande Yar ari yande resapiha tēira inungar imonda rai vahe ou pītu pipe yepi. Ahese iva ocañi tupri tēira

viapugüer ipĩrata vahe pipe curi. Opacatu mbahe yapopri opara yuvirocai. Ipipe sui co ivi opacatu ipor reseve ocañi tẽi efera.

¹¹Opacatu ite niha co mbahe yapopri ocañi tẽi vaheã. Sese, ipeyemoviracuaño itera pe reco maranehisa rese Tũpa rese pe pihañemoñetasa pipe! ¹²Pesãroño Tũpa yepotasa resendar ari, iyavei peyapo opacatu peicatugüer rupi 'toyepota poyava voi' pe yapave. Ahe ari pipe iva opara ocañi tẽi ete tata pipe. Ipipe sui opacatu mbahe yapopri ticupa tuprira curi. ¹³Yande rumo yasãro ite iva, ivi ipiasu vahe Tũpa remimombehu. Aheve opacatu ava yuvirecoira güeco aviyesa pipe.

¹⁴Sese che rembiaisu, pesãro vitesese co tecocuer, ãgüe peyera opacatu peicatugüer rupi pe reco tupri ãgua pe angaipaẽhi pipe, pẽu Tũpa, "Peyavi mbahe" ehiẽhi ãgua. ¹⁵Tapeicua co: yande Yar seco mbegüe yandeu yande piñiro ãgua. ãgüe ehi avei yande rembiaisu Pablo icuachia oyeupe Tũpa ombou vahe mbahecuasa pipe pẽu. ¹⁶Opacatu ocuachiar pipe omombehu evocoi nungar mbahe pẽu, yepe amove yavai senducua ãgua yuvireco viña. Sese amove ndoyemoviracua tuprii vahe yande Yar rese iyavei ndoyemboaracua tuprii vahe, ahe co coti tẽi virova ñehesa, inungar oyapo ambuae ñehesa icuachiapri Tũpa suindar rese. Ipipe güecocuer omocañi tẽi ahe.

¹⁷Che rivri, che rembiaisu, peicua ite niha evocoi mbahe; sese peñearo tuprira pe yembopa ucaẽhi ãgua ava ndiporeroyai vahe upe Tũpa rese pe recocuer yemoviracuasa sui pe yepepiẽhi ãgua. ¹⁸Peicua tupri catura rumo yande Yar Poropiñirosar Jesucristo iyavei peicoveño itera iporovasasa pipe. ¡ãgüe tehi imboeteipri tasecoi cũritei apirẽhi vaheã! Aipo rupive che ñehe pẽu.

JUAN REMBICUACHIA YIPĪNDAR VAHE SAN JUAN

Ñehesa tecovesa resendar

¹ Co cuachiar pipe oromombehu pëu co yipisuive secoi vahe. Ahe orosendu, orosepia avei ore resa pipe ité iyavei oropoco ité sese. Ahe niha Tūpa Ñehesa tecovesa resendar. ² Co tecovesa oyemboyecua, orosepia iyavei ahe secocuer oromombehu. Ahe tecovesa apirēhi oromombehu vahe pëu. Ahe Vu rese secoi vahe oyemboyecua vahe oreu. ³ Oromombehu co orosepia vahe, orosendu vahe ñepe vahe nungar pe reco āgua ore rese inungar ore oroico yande Ru Tūpa rese, Tahir Jesucristo rese avei. ⁴ Evocoyase cūrītei oroicuachía evocoi mbahe pëu yande yembovīharete catu āgua.

Tūpa tesapesa secoi

⁵ Iyavei Jesucristo ore mbohe co ñehesa rese, ahe oromombehu pëu: yande Ru Tūpa niha tesapesa secoi; ndipoi eté pītumimbisa sese. ⁶ “Che aico tupri Tūpa rese” yahese, yaicoño rumo angaipa pipe, ahe inungar pītumimbi vahe, ahese yande remira tēi iyavei ndayayapoi mbahe supi tupri vahe. ⁷ Yaicose rumo tesapesa pipe inungar yande Ru Tūpa secoi tesapesa, evocoyase yaico tuprīra yandeyeupe. Iyavei suvi yande moatiro opacatu angaipa sui.

⁸ Iyavei, “Ndarecoi angaipa che piha pipe” yahe tēise, yande ae yayembopa ipipe. Evocoyase mbahe supi eté vahe ndayarecoi yandeyese. ⁹ Acoi yamombehuse yande angaipagüer Tūpa upe, ahese ahe omboura oñeroisa yande angaipa rese yandeu iyavei omoatirora opacatu mbahe-mbahe tēi yande sui. Esepia, ahe seco ñivi vahe. ¹⁰ Iyavei, “Che ndache angaipai eté” yahe tupri tēise yaico, evocoyase Tūpa semirañete ai vahe nungar yareco. Ipipe ndayaroyai iñehengagüer.

2

Jesucristo yande reco moingatusar

¹ Che rahireta, co aicuachía pëu pe angaipaēhi āgua. Que revo ava oime oyemboangaipa vahe pe pāhuve, yareco rumo yande Pītivīsar yande Ru rovai. Ahe Jesucristo, seco ñivi vahe. ² Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi āgua yande sui.

³ Acoi yayapo tuprise Tūpa porocuaita, ahese supi eté yaicua Tūpa. ⁴ Oime amove ava “che aicua Tūpa” ehi

vahe; nomboavíyei rumo iporocuaíta. Ahe semirañete ai vahe, ndovírecoi mbahe supí tuprí vahe oyese. ⁵ Acoi yamboavíyese ñehengagüer, ahese supí eté yasaisu Tüpa. Ipípe sui yaicua yande reco tuprí Jesucristo rese. ⁶ Acoi “aico tuprí Tüpa rese” ehi vahe, ahe secoira Jesucristo nungar.

Mborocuaíta ipíasu vahe resendar

⁷ Iyavei, che rivíreta, ndaicuachiai mborocuaíta ambuae ipíasu vahe pëu. Aheño ité mborocuaíta pereco vahe yípísuive. Ahe acoi yípíndar pesendu vahe. ⁸ Co aicuachía vahe rumo ogüeru mborocuaíta ipíasu vahe. Ahe supí eté tesapesa Jesucristo víreco vahe iyavei pereco vahe avei. Esepia, pítumimbi opara. Tesapesa evocoyase osesape.

⁹ Oime amove ava “che aico tesapesave” ehi angahu tēi vahe; oyamotarēhiño rumo ambuae omboetasa Tüpa reroyasar. Evocoi nungar recocuer pítumimbisave tēi vite. ¹⁰ Acoi osaisu vahe ambuae omboetasa Tüpa reroyasar, ahe secoi tesapesave. Sese nomboangaipa ucai omboetasa. ¹¹ Acoi ndoyambotai vahe omboetasa, pítumimbisa pipe tēi secoi, ndoicuai avei que rupí güecocuer víreco. Esepia, pítumimbi vahe nomboesapísoi.

¹² Che rahíreta, co aicuachía pëu nara. Esepia, Tüpa ñhero pe angaipa rese pëu Jesucristo recocuer pipe. ¹³ Pe, yesupa peico vahe upe co aicuachía. Esepia, peicua yípísuive oicove vahe. Aicuachía avei pëu, mbía chñivahe. Esepia, pesecopí Carugar. ¹⁴ Iyavei pe tahíreta aicuachía opacatu pëu. Esepia, peicua vahe niha yande Ru Tüpa. Aicuachía avei pëu, pe iyésupa. Esepia, peicua yípísuive oicove vahe. Aicuachía avei pëu, mbía chñivahe. Esepia, peyemovíracua etepri, peipísi avei Tüpa Ñehengagüer pe piha pipe. Ipípe pesecopí Carugar.

¹⁵ Evocoyase pesaisu eme co mbahe tēi iví pípendar. Acoi ava co mbahe tēi osaisu vahe, ahe ndosaisui yande Ru Tüpa yuvíreco. ¹⁶ Esepia, opacatu co mbahe tēi ndahei yande Ru Tüpa suindar; ahe rumo co iví pípendar suindar. Ahe niha opacatu yande pihañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai tēisa. ¹⁷ Co iví pípendar mbahe tēi iyavei ava mbahe pota raisa opa pota ité ocañi. Acoi ava oyapo vahe rumo Tüpa remimbotar, yuvírecoira apirēhi vaherā ité.

Mbahe supí eté vahe iyavei mbahe ndahei vahe supí

¹⁸ Che rahíreta, co ari ipa vahe ité yandeu. Iyavei acoi pesendu “oura Jesucristo amotarēhimbar” ehi vahe, ahe cūrítei setá oyemboyecua yamotarēhimbar yuvíreco. Sese yaicua ari ipa vahe yepota água. ¹⁹ Ahe oyepépi yande páhu sui; ndahei eté rumo yande rivíri yuvíreco Tüpa rese. Esepia, acoi yande

rivrí itese, ahese opitara yande pirí yuvireco viña. Ëgüe ehi oyecua ndahei opacatu yande rivrí yuvirecoi.

²⁰ Cristo omondo Espíritu Santo pëu. Sese opacatu pe peicua mbahe supí tuprí vahe. ²¹ Pe niha peicua co mbahe supí eté vahe. Sese aicuachía co pëu. Esepia, mbahe supí eté vahe sui ndoui temira. ²² Acoi “Jesús ndahei Poropisírosar imbouprí” ehi vahe, ahe semira tēi vahe, yamotarēhimbar yuvirecoi. Ahe niha ndoviroyai Tu, Tahír avei yuvireco. ²³ Acoi ava “evocoi ndahei Tūpa Rahír” ehi vahe, ndovirecoi Tu oyese yuvireco. Acoi “evocoi niha Tūpa rahír” ehi vahe rumo, ahe vireco yande Ru Tūpa oyese yuvireco.

²⁴ Sese yipisuipe pesendu vahe ñehesa peyapocatu pe piha pipe. Ëgüe peyese, ahese peico tupríra Jesucristo rese, Tu rese avei. ²⁵ Esepia, Jesucristo aipo ehi: “Pe perecora co tecovesa apirēhi vahe peyese” ehi yandeu.

²⁶ Sese co ava pembopa pota vahe resendar aicuachía pëu. ²⁷ Pe pereco Espíritu Santo Jesucristo ombou vahe pëu. Sese ndiyai eté ambuae pe mbohera. Espíritu ae pe mbohe opacatu mbahe rese oico. Iporombohesa supí eté, ndoporombopai vahe. Sese peicoño Jesucristo rese Espíritu Santo pe mbohesa rupi.

²⁸ Iyavei che rahireta, peicoño ité Cristo rese yareco vaherã sese yande yeroyasa. Acoi ogüeyise íva sui curí, ahese nayachí chietera sovai ichui. ²⁹ Pe niha peicua Jesucristo seco ívi vahe. Iya peicua avei opacatu oyapo vahe mbahe ihívi vahe, ahe Tūpa rahír ité yuvirecoi.

3

Tūpa rahír yuvirecoi vahe

¹ Mara ehi rutei Tūpa yande raisu. Ahe aipo ehi yandeu: “Pe niha che rahireta peico” ehi, ahe supí eté aipo ehi. Sese niha co ava ndoviroyai vahe Tūpa, ndoicatui eté yande recocuer cua āgua. Esepia, ndoicuai Tūpa recocuer yuvireco. ² Che rivireta, yaico ité Tūpa rahír. Yande rumo ndayaicua tuprí vitei yande reco āgua ipare. Cūritei rumo co mbahe yaicua: acoi oyemboyecuase Jesucristo, yaicora inungar. Esepia, yasepia itera opacatu seco reseve. ³ Iyavei opacatu osāro vahe Jesucristo yuvireco, oyepepiño ité opacatu angaipa sui güeco catuprí āgua, inungar ahe secoi.

⁴ Opacatu ava oyemboangaipa vahe, ahe oyavi Tūpa porocuita. Esepia, angaipa Tūpa porocuita mboaviyeēhisa yepi. ⁵ Pe rumo peicua Jesucristo ou co ívi pipe yande angaipagüer mocañi āgua. Ahe niha ndovirecoi eté angaipa oyese. ⁶ Opacatu ava sese yuvirecoi vahe ndoyapoi angaipa.

Acoi ava yangaipa vahe rumo ndosepiai, ndoicuai avei secocuer yuvireco. ⁷ Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo. ⁸ Acoi oyapo vahe angaipa, ahe Caruguar suindar. Esepia, Caruguar yipisuive ité oyapo angaipa. Sese ou Tūpa Rahir Caruguar rembiapo mocañipa água.

⁹ Opacatu yuvirecoi vahe Tūpa rese ndoyapoi angaipa. Esepia, ahe vireco ité Tūpa recocuer oyese yuvireco. Sese ndoicatu iri angaipa apo água yuvireco. Esepia, ahe Tūpa rahir ité yuvirecoi. ¹⁰ Icuapri ité Tūpa rahir yuvireco, icuapri avei Caruguar rahir yuvirecoi vahe. Esepia, acoi ndoyapoi vahe mbahe tupri iyavei ndosaisui vahe Tūpa reroyasar, ahe ndahei eté Tūpa rahir yuvirecoi.

Yayeaisura ñepepei yande yacatu

¹¹ Co niha ñehesa, acoi pesendu vahe yipisuive, ahe co yayeaisura ñepepei. ¹² Ndayaicoi chira inungar Caín, ahe Caruguar remimbohe oyuca vivri. ¿Mahera pīha oyuca? Esepia, tivri oyapo mbahe aviye vahe; Caín rumo oyapo mbahe naporai vahe.

¹³ Che rivireta, pepihañemoñetai rene Tūpa ndoicuai vahe pe roeroise yuvireco. ¹⁴ Yande rumo yaicua aracacondar yande hã cañi tēi agüer. Cūrítei rumo yasē evocoi nungar sui tecovesa apirēhi vahe pipe yande reco água. Esepia, yande niha yasaisu yande rivireta Tūpa rese yuvirecoi vahe. Acoi ndosaisui vahe rumo ahe ihã ocañi tēi vite ité yuvireco. ¹⁵ Opacatu ava ndoyambotai vahe yande rivri, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apirēhi vahe oyese. ¹⁶ Jesucristo niha omondo güecocuer manosave yande recocuer repirã. Ichui yande yaicua poroaisusa. Sese yande avei egüe tayahe yande rivireta rese. ¹⁷ Acoi ava vireco tēi vahe mbahe eta oyeupe nara, osepiaño tēi rumo vivri upe mbahe ipane vahe, iyavei ndoipitivi, ahe ndovirecoi Tūpa poroaisusa oyese yuvireco. ¹⁸ Che rahireta, yande poroaisusa rumo ndahei chira yande ñehe pipe tēi, iyacatu rumo yamboyecua mbahe yande rembiapo pipe.

Yande yeroyasa yareco vahe Tūpa rovai

¹⁹⁻²⁰ Egüe yahese, yande yaicua yande recocuer supi eté vahe pipe yaico. Acoi, “Ndahei revo Tūpa rahir aico” yahese, ahese Tūpa rovaque yayemomahenduhara evocoi nungar rese: “Tūpa niha tuvichá catu yande pihañemoñetasa sui. Ahe opacatu mbahe oicua.” Sese yayeroyara. ²¹ Supi eté che rivireta, yaicua itese yande pīha pipe yande reco tupri Tūpa

rese, ahese yayeroyaño itera sovai. ²² Ahe avei niha ombou opacatu mbahe yandeu yaporanduse chupe. Esepia, yamboyeroya iporocuaíta iyavei yayapo semimbotar yaico. ²³ Co ité iporocuaíta: yaroyara Tahir Jesucristo iyavei yayeaisura ñepeí-peí Tūpa yande cuaisa rupi tupri. ²⁴ Acoi yaroyase iporocuaíta, ahese yaicora Tūpa rese; ahe avei secoira yande rese. Iyavei ahe ombou Espíritu yandeu. Ichui yaicua Tūpa secoi yande rese.

4

Espíritu Tūpa suindar iyavei espíritu Cristo amotarēhimbar

¹ Che rahireta, aní chira peroya opacatu “Espíritu pipe añehe” ehi vahe. Iyacatu rumo pesāha rane ‘¿Tūpa suindar ité pīha?’ pe hesa pipe. Esepia, setá vai oporombohe angahu tēi vahe oguata opacatu ivi rupi yuvireco. ² Co rese peicuara ava Espíritu Tūpa suindar vireco vahe: “Jesucristo ou opacatu güete reseve” ehise, aipo ehi vahe vireco Espíritu Tūpa suindar ité. ³ Acoi aipo ndehi vahe rumo, ndovirecoi eté Espíritu Tūpa suindar oyese. Ahe rumo vireco espíritu Cristo amotarēhimbar tēi. Aracaco niha pesendu ñehesa acoi yamotarēhisar espíritu ou vaherã resendar. Ahe cūrítei secoi co ivi pipe.

⁴ Che rahireta, pe rumo Tūpa suindar peico. Iyavei pesecopi ité acoi semira tēi vahe peico. Esepia, Espíritu secoi vahe pe rese, ahe ipīrata catu Caruguar sui. ⁵ Evocoi co ivi pipendar tēi yuvirecoi vahe. Esepia, oñehe mbahe ivi pipendar rese tēi yuvireco. Iyavei ava supindar ae ité oyapisaca iñehe rese yuvireco. ⁶ Yande rumo Tūpa suindar yaico. Acoi oicua vahe Tūpa oyapisaca yande ñehe rese yuvireco. Acoi ndahei vahe Tūpa rahir, ahe yande ñehe ndosendu potai yuvireco. Sese yande yaicuara vireco vahe Espíritu supi eté vahe, yaicua aveira vireco vahe espíritu oporombopa tēi vahe.

Tūpa oporoaisu vahe

⁷ Che rivireta, che rembiaisu, yayeaisu ñepeí-peí. Esepia, yeaisusa Tūpa suindar. Opacatu osaisu vahe ava, ahe Tūpa rahir, oicua ité avei Tūpa yuvireco. ⁸ Acoi ndosaisui vahe ava, ahe ndoicuai Tūpa yuvireco. Esepia, Tūpa yeaisusa secoi. ⁹ Ēgüe ehi omboyecua oporoaisusa yandeu. Ahe niha, ombou Guahir ñepeí vahe co ivi pipe ichui yande recove āgua. ¹⁰ Ndahei yande rane yasaisu Tūpa. Ahe rane rumo yande raisu iyavei ombou Guahir imano āgua yande angaipa repirã. Ahe niha poroaisusa supi eté vahe.

¹¹ Che rivireta, che rembiaisu, Ēgüe ehi Tūpa yande raisu. Evocoyase Ēgüe vahe aveira yande yayeaisu ñepeí-peí yepi. ¹² Ndipoi eté ava osepia vahe Tūpa. Yayeaisuse rumo, Tūpa

secoi yande rese. Iporoaisusa evocoyase oime ité yande rese. ¹³ Ahe ombou oEspíritu yandeu; ipipe sui yaicua sese yande reco iyavei yaicua ahe secoise yande rese. ¹⁴ Iyavei orosepia vahe, oromombehu: yande Ru ombou Guahir ava ivi pipendar písiro água. ¹⁵ Acoi ava “Jesús niha Tūpa Rahir” ehi vahe, ahe secoi eté Tūpa rese; Tūpa evocoyase secoi sese.

¹⁶ Ēgüe yahe icua, seroya tupri água co Tūpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei secoi sese. ¹⁷ Ēgüe yahe Tūpa poroaisusa mboaviye tupri ichui yande siquiyeēhi água acoi oyepotase ari cañi yandeu. Esepia, yande yaico co ivi pipe inungar Jesucristo. ¹⁸ Yasaisu tupri itese Tūpa, ndipoi chira siquiyesa yandeu. Ēgüe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporoaisu tuprii eté.

¹⁹ Yipindar Tūpa yande raisu. Sese cūritei yande avei yasaisu Tūpa. ²⁰ Amove ava aipo ehi tēi: “Che asaisu Tūpa” ehi. Ahe ramoseve rumo viroiro omboetasa Tūpa reroyasar. Evocoyase ahe semira tēi vahe. Esepia, acoi ndosaisui vahe omboetasa Tūpa reroyasar sepiase, ndoicatu Tūpa ndayasepia vahe raisu água. ²¹ Jesucristo ombou co porocuita yandeu: acoi osaisu vahe Tūpa, tosaisu avei omboetasa seroyasar yuvireco.

5

Yande mbahe-mbahe tēi co ivi pipendar recopisa

¹ Opacatu viroya vahe Jesús Tūpa Rembiporavo Poropísirosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco. ² Yande yasaisuse Tūpa, yayapose avei iporocuita, ahese yaicua yasaisu avei ava Tūpa rahir yuvirecoi vahe. ³ Yamboaviyese Tūpa porocuita, ahese yamboyecua Tūpa raisusa yaico. Iyavei iporocuita ndahei yavai etepri yapo água. ⁴ Esepia, opacatu Tūpa rahir yuvirecoi vahe osecopi mbahe-mbahe tēi ivi pipendar Cristo rese yeroyasa pipe yuvireco. ⁵ Acoi oyeroya vahe Jesucristo Tūpa Rahir secosa rese, ahe oicatu co ivi pipendar mbahe-mbahe tēi recopi água yuvireco.

Tūpa rahir recocuer resendar ñehesa

⁶ Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espíritu avei oseco mombehu. Esepia, ahe omombehu mbahe supi eté vahe yepi. ⁷ Evocoyase oime mbosapi imboyecusar: ⁸ Espíritu, i, iyavei suvi. Ahe mbosapi oyoya tupri. ⁹ Yaroya revo ava remimombehu; Tūpa remimombehu rumo aviye catu vahe

ité ichui. Esepia niha, ahe Guahir omombehu. ¹⁰ Acoi viroya vahe Tūpa Rahir vireco ité ahe semimombehu opiha pipe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehe Tahir resendar. ¹¹ Co Tūpa remimombehu: ahe ombou yandeu tecovesa apirēhi vahe. Co tecovesa Tahir rese seci. ¹² Acoi oipisi vahe Tūpa Rahir opiha pipe, ahe vireco avei co tecovesa. Acoi ndoipisii vahe rumo, ndovirecoi eté tecovesa oyese.

Poromboaracuasa ipa vahe

¹³ Co aicuachía pēu, pe pereco vahe Tūpa Rahir, peicua āgua pe supi eté pereco tecovesa apirēhi.

¹⁴ Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehe osendu. ¹⁵ Evocoyase yaicuae ahe osendu yande yeruresa, yaicua avei mbahe yande porandusa ombou vaherā yandeu.

¹⁶ Acoi osepia vahe yande mboetasa Tūpa reroyasar oyemboangaipa vahe, ahe rumo ndahei manosave nara, oyerokuira sese. Evocoyase Tūpa omondora secove āgua chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei pēu. ¹⁷ Opacatu mbahe-mbahe tēi ahe angaipa. Oime rumo angaipa ndayande rerasoi vahe manosave.

¹⁸ Yaicua Tūpa rahir ndoyapoi angaipa yuvireco. Esepia, Tahir osāro evocoi nungar. Ichui Carugar ndopocoi sese. ¹⁹ Sese yaicua yande Tūpa rahir yaico. Iyavei opacatu ava ndoviroyai vahe Tūpa, ahe Carugar povri pendar tēi yuvirecoi. ²⁰ Iyavei yaicua Tūpa Rahir ogüeru oaracuasa yandeu Tūpa supi eté vahe cua āgua iyavei yaico co supi eté vahe rese. Ahe niha Tahir Jesucristo, ahe avei Tūpa supi eté vahe iyavei tecovesa apirēhi vahe. ²¹ Che rahireta, peñearo tupri tūpa angahu tēi sui. Aipo rupive co che ñehesa amombehu pēu.

IMOÑUVĪRIOSA JUAN REMBICUACHIA SAN JUAN

Mbahe supi eté vahe iyavei yeaisusa

¹ Che, icuapri, aicuachía co che ñehe pëu pe Tūpa rem-biporavo peico vahe opacatu eipeve peico vahe upe. Che niha supi eté opoaisu. Ndahei rumo che güeraño opoaisu, opacatu oicua vahe porombohesa supi eté vahe avei pe raisu yuvireco. ² Opoaisu ité mbahe supi eté vahe yande piha pipe yareco vahe rese. Ahe ndopai chivaherã ité. ³ Yande Ru Tūpa, yande Yar Jesucristo, Tūpa Rahir, tombou oporovasasa, oporoparisuerecosa pëu nara. Tombou avei güeco tuprisa, güeco supi eté vahe pipe oporoaisusa pipe avei pëu.

⁴ Che mboviharete aicuase pe pãhu pendar yuvirecoi vahe güecocuer aviyesa pipe. Esepia, ahe viroya porombohesa supi eté vahe yuvireco. Ahe niha yande Ru Tūpa porocuita yandeu. ⁵ Iyavei, che rivireta, che rembiaisu, tayayeaisu catu ñepeipei. Co aicuachía vahe ndahei porocuita ipiasu vahe. Ahe niha acoi yipindar icuachiapri pëu. ⁶ Co yande yeaisusa, yande guata tupri ãgua Tūpa porocuita rupi. Co Tūpa porocuita yipisuive pesendu vahe, ahe omombehu yande yeaisu tupri ãgua yandeu.

Iporombopa serai vahe resendar

⁷ Setá vai oguata ivi yacatu rupi oporombopa tēi vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa tēi vahe Jesucristo amotarēhimbar yuvirecoi. ⁸ Peñearo catu pe poraviqui repri mocañi tēiñhi ãgua. Tapeipisi catu opacatu Tūpa porerecosa peyeupe nara.

⁹ Oime ava oyepepiño vahe Cristo porombohesa sui. Ahe Tūpa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco Tūpa, Tahir avei oyese. ¹⁰ Acoi oyepotase ava oporombopa tēi vahe pëu, ndovirecoi vahe co porombohesa, ndapeipisii chira pe rētave. Iyavei ndapemboaviravei chiaveira. ¹¹ Acoi pemboaviravese, pe avei pehara sembiapo pipe.

Ñehesa ipa vahe

¹² Che niha amombehu pota setá mbahe pëu. Namombehu potai rumo cuachiar pipe. Che teieté aso pota pëu che ñehe ãgua. Ahese yayemboviharetera oyese.

13 Iyavei Tũpa rembiporavo oñemonuha vahe cohave opacatu omondo omahenduhasa yuvireco pẽu. Aipo rupive co che ñehesa amondo pẽu.

IMOMBOSAPISA JUAN REMBICUACHIA SAN JUAN

Gayo recocuer aviye vahe resendar

¹ Che, icuapri, aicuachía co che ñehe ndeu, che mboripar, che rembiaisu, Gayo. Che supi eté oroaisu yepi.

² Che rembiaisu, che rivri, cūrítei nde recocuer erereco tupri Tūpa rese. Che ayeroqui nde rese opacatu nde reco tupri āgua iyavei tipo eme mbaherasisa ndeu. ³ Che aviharete asenduse yande rivri ñehe nde recocuer resendar yugüeruse cohave. Ahe aipo ehi yuvireco cheu: “Evocoi Gayo oyemoviracua tupri mbahe supi eté vahe pipe” ehi yuvireco ndeu. ⁴ Ndipoi eté niha ambuae ñehesa asendu vahe che mboviharete catu vahe que che rahireta oguatase co porombohesa supi eté vahe rupi yuvireco.

⁵ Che rivri, che rembiaisu, ereyapo tupri opacatu mbahe yande rivireta upe iyavei ambuae tecua pendar oyepota vahe upe avei. ⁶ Ahe omombehu ore ñemonuhasave opacatu nde poroaisusa resendar yuvireco oreu. Eyapo catu mbahe icatupri vahe; eipitivi catu chupe mbahe ipane vahe rese iguataño āgua Tūpa remimbotar rupi yuvireco. ⁷ Esepia, ahe oguata yuvireco Jesucristo rer pipe. Ndoipisi eté rumo mbahe ipane vahe opitivi āgua yuvireco ava Tūpa reroyasarēhi sui. ⁸ Sese yande ēgüe yahera yaico evocoi nungar upe ñehesa supi eté vahe rese ipitivi āgua.

Diótrefes recocuerai iyavei Demetrio recocuer aviyesa

⁹ Che aicuachía che ñehe eipeve Tūpa upe oñemonuha vahe upe cuese. Diótrefes rumo ndoviroyai ore mborerecuasa. Esepia, ahe oipota rai mborerecuar güeco āgua ipāhuve. ¹⁰ Evocoyase asose eipeve, amboaracuara opacatu Tūpa viroya vahe rovai sembiapo ai rese. Esepia, ahe oñehe-ñehe tēi ore rese, ndahei ahe güeraño, ndoipisi potai avei güetave yande rivireta oyepota vahe. Iyavei ndoipotai ambuae upe ipisi āgua sētave. Acoi oipisise, omombo voiño ité ñemonuhasa sui. ¹¹ Che rivri, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tūpa suindar. Acoi oyapo vahe rumo mbahe naporai vahe, ahe ndoicuai vahe Tūpa.

¹² Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombehu. Pe niha peicuaño ore oromombehu mbahe supi eté vahe.

Ñehesa ipa vahe

¹³ Che niha amombehu pota setá mbahe ndeu. Namombehu potai rumo cuachiar pipe tẽi ndeu. ¹⁴ Esepia, aso pota ité nde repia. Ahese voi yañemoñetara oyeovai eté.

¹⁵ Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepei-peiyande mboripareta upe eipeve. Aipo rupive.

JUDAS REMBICUACHIA SAN JUDAS

Judas mahenduhasa Jesús reroyasar upe

¹ Che, Judas, aico Jesucristo rembiguai, Santiago rivri. Che aicuachía co che ñehe pëu. Pe niha yande Ru Tüpa rembiaisu semienoi peico. Jesucristo niha pe rãro opacatu mbahe-mbahe tēi sui. ² Tüpa tombou catu pëu pe paraisuerecosa pe reco tupri ägua pe raisusa pipe.

Oporombohe vahe ava mbopa tēi ägua resendar

³ Che rivireta, che rembiaisu, yipindar chepihañemoñeta ité yande pĩsirosa resendar cuachía ägua pëu viña. Ipore rumo chepihañemoñeta iri: iyaño revo che aicuachía pe yemoviracua tupri catu ägua yembohesa yaroya vahe rese. Ahe yembohesa yaroya vahe ñepeí reseve imondopri opacatu yandeu Jesucristo rese yaico vahe. ⁴ Esepia, amove ava iporombopa serai vahe yuviroique mbegüe angahu pe pãhuve. Aracahe suive rumo Tüpa Ñehengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tüpa aviye ité, ndoyapoi chietera mbahe yandeu” ehi tiēte yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepeí vahe upe yuvireco.

⁵ Che opomomahenduha pota iri acoi peicua tupri vahe rese. Yipindar yande Yar Tüpa vinose yande ramoí eta Egipto sui. Ipore rumo opa omocañi viroyasarēhi. ⁶ Inungar avei Tüpa rembiguai yipindar vahe yuvirecoi, nomboaviyei vahe ocuaita. Ipipe sui Tüpa osoquenda pĩtumimbi ndopai vahe-save ari cañise nara.

⁷ Iyavei ava Sodoma pendar, Gomorra pendar iyavei ahe tecua ivirindar avei inungar acoi Tüpa rembiguai oyemondo mbahe tēi pipe, ahe avei oyemondo vahe oyemboaguasaguasa tēi ägua yuvireco. Iyavei cuimbahe, cuimbahe rese; cuña, cuña rese no. Ipipe sui oiporara tata guasu apirēhi vahe yuvireco. Ahe opita opacatu yande yembosiquiye ägua.

⁸ Ëgüe ehi avei niha evocoi nungar ava pe pãhu pendar. Esepia, ahe oqueraisa nungar reroyasa pipe sui tēi omonguiha viteño güecocuer oangaipa pipe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe íva pendar rese yuvireco. ⁹ Aracahe Tüpa rembiguai ívate vahe Miguel oyepoepi-epi Carugar rese yuvireco Moisés retecuer rese. Yepe ahe Tüpa rembiguai rerecuar viña, ndiyai rumo chupe

ĩñehe mara ãgua Caruguar upe. Evocoyase aipo ehi chupe: “¡Tũpa oicudara co rese ndeu!” ehiño. ¹⁰ Evocoi ava pe pãhu pendar rumo oñehe tẽiño vahe que mbahe ndosenducuai vahe rese yuvireco. Iyavei co mbahe oicua vahe oyesui tẽi inungar mbahe mĩmba ndipĩhañemoñetai vahe oyesui tẽi imbahecua, ahe oiporu yuvireco oyemocañi ãgua tẽi.

¹¹ ¡Iparaisu yuvireco! Caĩn recocuer rupi tupri avei oyapo mbahe yuvireco. Inungar Balaam guarepochi pota raisave tẽi oyavi güeco yuvireco. Inungar Coré omano oporeroyaẽhisa pipe.

¹² Pe peñemonuhase pe yeaisusa pipe pe caru ãgua, ahese ahe avei yuviroique pe pãhuve; noyuvinochi eté ocaru ãgua pe piri. Ndapeicuai rumo ahe pe recocuer monguiha ãgua tẽi yuviroique vahe pe pãhuve. Evocoi inungar ovesa rãrosar oyese tẽi ihañeco vahe yuvireco. Iyavei ahe inungar iva quihã ndovirecoi vahe i, ivitu remimombo tẽi. Ahe avei inungar ivira ndihai vahe ohasa rupi, ipiru vahe, evocoyase ahe sapohopri. ¹³ Inungar avei acoi ¡ai pipe itu omombo tiyui vahe oyesui yepi. Ēgüe ehi avei evocoi mbia rembiapo poromochisa. Iyavei inungar yasitata amove omocañi vahe guaper co coti tẽi oso pĩtumimbisave, ěgüe ehi aveira ava Tũpa sui oyepepi vahe pĩtumimbisa apirẽhive secocuer yuvirecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepiã che queraisa nungar pipe yande Yar turi iva pendar rehĩ reseve ¹⁵ opacatu ava recoãha ãgua iyavei icañi mombehu ãgua opacatu mbahe-mbahe tẽi aposar upe, opacatu oñehe-ñehe tẽi yamotarẽhisave yuvirecoi vahe upe avei” ehi. ¹⁶ Ahe mbia niha oporoviroĩro yuvireco. Iyavei oseca oyeupe nara mbahe güemimbotar tẽi apo ãgua. Ahe oyemboivate ai vahe oñehe pipe tẽi yuvireco. Iyavei oñehe tupri ai angahu tẽi ambuae ava upe imbahe rerocua ãgua ichui.

Jesús reroyasar upendar poromboaracuasa

¹⁷ Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese ¹⁸ aipo ehi vahe: “Co arĩ cañi renonde oimera ava viroĩro ai vahe Tũpa rembiapo yuvireco. Iyavei oyapoño itera güemimbotarai yuvireco” ehi vahe. ¹⁹ Ahe ava niha omboyahoyaho ucara ava Jesús reroyasar yuvireco. Güecocuer ivi pipendar tẽi vireco vahe. Ahe niha ndovirecoi Tũpa Espĩritu yuvireco.

²⁰ Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espĩritu Santo pe rãrosa pipe. ²¹ Peñearo tupri Tũpa pe raisusa

pipe. Iyavei pesãro viteño yande Yar Jesucristo yande paraísuerecosa pipe tecovesa ndopai vahe mondo ãgua yandeu.

²² Pesaisu ava ndoviroya tuprii vahe Jesús. ²³ Amove ava pesecoreroyevi voi icañi rãgüer sui. Ambuae peiparaísuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepei yangaipa pipe pe viapiëhi ãgua.

Tũpa mboetei tupriisa

²⁴⁻²⁵ Tũpa yande Pĩsirosar ñepei vahe vireco pĩratasa pe rãro angaipa pipe pe viapiëhi ãgua. Ahe avei pe rerecora güecocuer porañetesave pe reco angaipaëhisa pipe. Ichui peicora pe viharetesa pipe. Ahe imboeteipri tasecoi. Ëgüe tehi timboyeroyasa seco pĩratasa iyavei imborerecuasa yande Yar Jesucristo sui, yipisui, cũritei apirëhi vaherã.

TŪPA REMIMBOYECUA JUAN UPE APOCALIPSIS

Jesucristo yemoporēhisa

¹ Che, Juan, aicuachía mbahe imboaviye pihaiVIPirā pēu acoi Tūpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pipe imboyecua uca āgua güembiguai che recose cheu. ² Che supi eté amombehu opacatu mbahe asepia vahecuer iyavei amombehu evocoi Tūpa Ñehengagüer acoi Jesucristo oicua uca tupri vahe mbahe supi eté vahe.

³ Sorivete catura acoi ava oyerogui vahe co Tūpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi virovi ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tūpa suindar, ahe yipivé vahe ité, cūrteindar apirēhi vahe avei; siete espíritu suindar avei no, ahe senda rovai yuvino hai vahe, ⁵ iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuaeae tēi mborerecuar sui. Ahe yande raisu iyavei yande pīsiro yande angaipa sui vuvi pipe, ⁶ iyavei yande rereco mborerecuarā, pahiguā avei no Vu Tūpa upe yande poraviqui āgua. jĒgüe tehi imboeteipri tasecoi opīratasa pipe apirēhi vahe rā!

⁷ ¡Esepia, Cristo iva quiha rese oura curi!

Ahese opacatu ava osepiara yuvireco, yamotarēhisarer, oicutu vahecuer avei.

Iyavei opacatu tecua ivi pipendar ahese oyaseho tēira yuvireco sepiase.

Ēgüe ehi etera curi.

⁸ “Che aico yipindar iyavei ipandar” aipo ehi yande Yar Tūpa opacatu mbahe mboavaisarēhi evocoi yipivé vahe ité, cūrteindar apirēhi vahe avei.

Juan osepia oquer nungar pipe Jesucristo porañetesa

⁹ Che, Juan, pe riquehir aico, iyavei che pe nungar Tūpa povri pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico

caha pãhumi para guasu aviterve Patmos serer vahesave Tũpa Ñehengagũer mombehusa pipe sui tẽi, Jesucristo recocuer mombehusa pipe sui tẽi avei no. ¹⁰ Acoi yande Yar ari pipe Espĩritu povrive aicose, asendu che raquicuei oñehe pĩrata vahe aviye acoi mimbĩ ñehe ¹¹ aipo ehi: “Eicuachĩa mbahe eresepia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve, Pẽrgamo ve, Tiatira ve, Sardis ve, Filadelfia ve, ipa Laodicea ve” ehi cheu.

¹² Che evocoyase ayemboyere sese ‘¿ava pĩha oñehe cheu?’ che yapave. Ahese asepia siete tupri vera hi oro apopri, ¹³ iyavei asepia ipãhuve mbia aviye tupri ava itẽ viña, ituru-cuar pucucuer ipi rupi tupri itẽ sese, sumbicuasa evocoyase oro apopri ipochiha rupi tupri itẽ oyepota. ¹⁴ Iha morochĩ inungar acoi mbahe saviyu vahe, inungar avei yesapi ñapĩrata morochĩ vahe, sesa evocoyase aviye tupri itẽ tata rendigũer. ¹⁵ Ipi evocoyase sendi yai etẽ, aviye acoi bronce ocai vahe horno pipe, iyavei ñehe ipĩratá iteanga inungar itu riapugũer. ¹⁶ Oacato coti vireco siete tupri yasitata, iyavei iyuru sui osẽ quise pucu saimbe yoya vahe. Sova evocoyase aviye ari rendigũer ipĩratá vahe.

¹⁷ Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esepia, che yipindar itẽ aico, ipandar avei. ¹⁸ Aicove vahe itẽ; yepe amano viña, cũritei rumo aicove iri ndopai chivaherã itẽ aico. Che areco che mborerecuasa ava recocuer mocañi ãgua. ¹⁹ Sese eicuachĩa co mbahe eresepia vahe: cũriteindar oime vahe mbahe iyavei mbahe oime vaherã curi. ²⁰ Co acoi ndereicuai vahe eresepia vahe siete yasitata che acato coti, ahe yuvirecoi Tũpa rembiguai siete tecua rupindar che reroyasar rãrosar; evocoyase vera hi oro apopri, ahe yuvirecoi siete tupri tecua pipendar che reroyasar” ehi.

2

*Ñehesa siete tupri tecua-tecua pendar Jesús reroyasar upe.
Ñehesa Efeso pendar upe*

¹ “Eicuachĩa Tũpa rembiguai Efeso pendar che reroyasar rãrosar upe: ‘Acoi vireco vahe oacato coti siete yasitata, ahe acoi oguata vahe siete vera hi yacatu rupi, aipo ehi imombehu: ² Che aicua opacatu mbahe pe rembiapo, pe poraviqui pĩratasa iyavei pe yemoviracuasa. Aicua avei ndapeipotai ava naporai vahe pe pãhuve yuvirecoi vaherã. Pesecoãha avei ava, ore apóstol oroico, ehi tẽi vahe; ipare peicua iporombopa tẽisa yuvireco. ³ Che aicua peñemosañõ peyemombaraisu peico che raisupave; ndapecuerai etẽ ipipe.

⁴ Che rumo aicua oime mbahe ndahei vahe che p̄iha rupi pe recocuer: ndapeyeaisu iri inungar yip̄indar. ⁵ Sese peyemomahenduha yip̄indar pe recocuer aviye vahe rese; pemboasi mbahe pe rembiapo, peyevi Tūpa upe; peyeaisu iri catu inungar yip̄indar. Anise ayevira p̄ēu, arocuapara pe vera hi senda sui acoi ndapeyeviise Tūpa upe. ⁶ Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté. ⁷ ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi oyemoviracua vahe mbahe-mbahe t̄ei apoēhi āgua, itohu amondora ivira ha tecovesa resendar oime vahe teco orisave che Ru p̄iri, ehi' erera icuachía chupe.

Ñehesa Esmirna pendar upe

⁸ “Eicuachía avei Tūpa rembiguai Esmirna pendar che reroyasareta rārosar upe: ‘Acoi yip̄indar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa p̄ēu aipo ehi: ⁹ Che aicua pe yemombaraisusa, pe paraisusa avei; pe rumo mbahe yar nungar ité peico iba pendar mbahe rese. Aicua avei pe rese ava semira t̄ei vahe, ore Tūpa rembiporavo judío oroico, ehi t̄ei vahe. Ndahei rumo ahe yuvirecoi. Esepia, Carugar reroyasar t̄ei evocoi yuvirecoi. ¹⁰ Ndapesiquiyei chira pe paraisu āgua sui. Esepia, Carugar osoquenda ucara amove pe p̄ahu pendar secoāha āgua; pe paraisu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahese amondora porerecosa tecovesa p̄ēu. ¹¹ ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi ava oyemoviracua vahe mbahe-mbahe t̄ei apoēhi āgua, ahe imanore ihã ndoiporari chira imoñuviriosa manosa pipe, ehi' erera icuachía chupe.

Ñehesa Pérgamo pendar upe

¹² “Eicuachía avei Tūpa rembiguai Pérgamo pendar che reroyasareta rārosar upe: ‘Aipo ehi acoi vireco vahe quise pucu saimbe yoya vahe: ¹³ Che aicua pe recosa. Aheve acoi Carugar oguapi oī; mborerecuar guasu nungar imboyeroyapri secoi. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca t̄ei che recocuer mombehu tuprisar Antipas evocoi tecua Carugar recosave. ¹⁴ Che rumo aicua mbahe pe resendar: eipeve amove ava ndoyepipi potai eté Balaam porombohesa sui yuvireco. Ahe omboaracua Balac israelita mboangaipa uca āgua, toyuvirohuño mbahe roho seropovēhepri mbahe rahanga upendar t̄ei, oya, iyavei, toyemboaguasaño yuvireco, oyapave avei. ¹⁵ Iyavei amove ava pe p̄ahuve ndoyepipi potai

eté nicolaíta porombohesa sui yuvireco. ¹⁶ Sese pemboasi pe recocueraí, peyevi Tūpa upe, anise che aso poyava voira pēu, ahese avavara chupe yuvireco che yuru pipe sui osē vahe quise pucu pipe, ehi. ¹⁷ ¡Acoi ava osendu pota vahe, toyapisacaño Espiritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tēi apoēhi āgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oī, evocoi ava oipisi vahe güeraño oicuará, ehi' erera icuachía.

Ñehesa Tiatira pendar upe

¹⁸“Eicuachía avei Tūpa rembiguai Tiatira pendar che reroyasareta rārosar upe: “Tūpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu: ¹⁹ Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracuasa. Aicua avei yipindar sui mbahe peyapo catú aviye vahe. ²⁰ Oime rumo mbahe pe rembiavi: peñemosañño evocoi cuña Jezabel pe pāhu pendar upe, ahe acoi oñehe tēi angahu vahe Tūpa rese viña. Ahe rumo ombopa tēi oporombohesa pipe che rembiguai iyemboaguasa-guasa tēi uca āgua sereco iyavei ohu uca mbahe roho mbahe rahanga tēi upe seropovēhepri yuvireco chupe. ²¹ Che amondo vite tēi ari chupe, tombosi oangaipa Tūpa upe oyevi āgua, che yapave viña. Ahe rumo ndopoi potai eté oyemboaguasa tēisa sui. ²² Evocoiyase cūrítei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñño potaise ité yuvireco. ²³ Ipare ayucapara imembrí ichui. Ēgüe ehi opacatu che reroyasar oicuará yuvireco che aicua tupri ité opacatu ava pihanemoñetasa iyavei ñepeipei pe yacatu amondora pe rembiapogüer repri pēu. ²⁴ Pe rumo opacatu Tiatira pendar ndaperoyai vahe co porombohe raisa iyavei ndapeyembohei vahe Carugar suindar aracuasa, ndicuasai yavai vahe, ehi vahe rese, pēu ndarecoi que ambuae che porocuita. ²⁵ Peyemoviracuañño rumo evocoi mbahe pereco vahe rese, acoi che ayevisé voi vitu curi. ²⁶ Acoi ava oyemoviracua vahe mbahe-mbahe tēi apoēhi āgua, oyapo vahe che remimbotar mano rupi eté, chupe amondora mborerecuar seco āgua opacatu ivi rupi ²⁷ inungar che Ru ombou che mborerecuarā cheu; ēgüe ehi aveira oporocuai opacatu tecua rupi inungar acoi vara guarepochí, mbahe riapiipa uca āgua, aviñera acoi mahemoinda ñaihu apopri viña. ²⁸ Iyavei amondora yasitata cōhe rerusar chupe. ²⁹ ¡Acoi

ava osendu pota vahe, toyapisacaño Espíritu omombehu vahe rese opacatu che reroyasar yuvirecoi vahe upe! ehi' erera icuachía.

3

Ñehesa Sardis pendar upe

¹ “Eicuachía avei Tūpa rembiguai Sardis pendar che reroyasareta rãrosar upe: ‘Acoi ava vireco vahe siete tupri Tūpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tūpa upe nara, ehi pēu viña; omano vahe nungar tēi rumo peico. ² Peyemopoase catu peico iyavei pemonguerēhi catu acoi viroya vite vahe. Esepia, oyepepipa pota ité yuvireco viña. Supi eté mbahe pe rembiapo che Ru rovaque, ndahei supi tupri vahe. ³ Peyemomahenduha acoi porombohesa peipisi vahe rese; pepoi rene ichui. Peyevi catu Tūpa upe. Ndapeyemopoaseise rumo, asora pēu inungar imonda rai vahe, ěgüe ahera vicho pe resapiha. ⁴ Oime rumo amove ava pe pāhu pendar ndoyapoi eté angaipa yuvireco, evocoyase inungar ava oguata vahe oturucuar morochi vahe rese, ěgüe ehi aveira ahe güeco maranehi pipe oguata che rupi yuvireco. Esepia, ahe chupe iya ité. ⁵ Acoi ava oyemoviracua vahe mbahe-mbahe tēi apoēhi āgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar pipe sui, asenoira rumo che Ru rovai iyavei sembiguai eta rovaque avei curi. ⁶ ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! ehi' erera icuachía.

Ñehesa Filadelfia pendar upe

⁷ “Eicuachía avei Tūpa rembiguai Filadelfia pendar che reroyasareta rãrosar upe: ‘Co seco maranehi vahe, supi tupri vahe ité, vireco vahe mborerecuasa aracahendar mborerecuar guasu David nungar, acoi omboise que oquenda, ñepepe yepe que ava nomboyai chietera; iyavei acoi omboyase, ñepepe yepe que ava nomboi chiete aveira, ahe aipo ehi: ⁸ Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pēu pemombehu vaherã che recocuer. Ahe que ñepepe yepe ava nomboyai chietera yuvireco. Esepia, yepe pe nipirata tupri vahe, peroya ité rumo che ñehe iyavei ndacheñomi eté ava sui peye. ⁹ Co Carugar reroyasar semira tēi vahe, ore Tūpa rembiporavo judío oroico, ehi tēi vahe, ndahei rumo ahe eté vahe yuvirecoi. Ahe amoñenopi hapa ucara pe rovai, toicua yuvireco che pe raisusa, che yapave. ¹⁰ Esepia, peroya ité che porocuaita,

peyemoviracua ité evocoi mbahe tēi upe peico. Evocoiyase che opoepira acoi ari tecoãhasa ouse opacatu ivi rupindar upe curi. ¹¹ Ayevi poyavara. Peyemoviracua catu Tūpa reroyasa pereco vahe rese. Evocoiyase ñepei yepe que ava ndovirocuai chietera Tūpa suindar porerecosa pe sui. ¹² Acoi oyemoviracua vahe mbahe-mbahe tēi apoēhi āgua yuvireco, ahe che Ru piri nara ité yuvirecoira. Ahe evocoiyase inungarra che Ru Tūpa rēta vīracuasa ndopai vahe yuvireco. Sese arova ucara che Ru Tūpa rer iyavei che Ru Tūpa recua rer avei no, ahe Jerusalén piasu, evocoi ou vaheṛā iva pendar che Ru Tūpa sui, iyavei che rer ipiasu vahe ité arovara sese no. ¹³ ¡Acoi ava osendu pota vahe, toyapisacaño Espiritu remimombhugüer rese che reroyasareta upe! ehi' erera icuachía.

Ñehesa Laodicea pendar upe

¹⁴ “Eicuachía avei Tūpa rembiguai Laodicea pendar che reroyasareta rārosar upe: ‘Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tūpa rembiapo, ahe aipo ehi: ¹⁵⁻¹⁶ Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. I sacu raimi tēi vahe nungar peico pe rembiapo pipe. ¡Ñepei reseve vahe rumo aipota, ndahei iguayi tēi vahe! Pe recocuer rumo iguayi tēi vahe nungar, sese opomboyeviñora cheyesui. ¹⁷ Esepia, pepihañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paraisusa che Ru rovaque inungar ndasesapiso vahe peico. Iyavei ndapeyavi nditurucuai vahe peico. ¹⁸ Sese opomboaracua; peseca iva pendar oro tatave imoatiropri nungar che sui pe paraisuēhi iri āgua che Ru rovaque; peseca avei turucuar morochi vahe teco tuprisa peyeupe che suindar nani tupri vahe nungar pipe pe recoēhi āgua, pe chīēhi āgua avei iyavei inungar ava oseca mosa güesa upe nara osareco iri āgua, ēgüe peye aveira. ¹⁹ Che añehe pīrata seco mohivi āgua che rembiaisu upe yepi. Peyemonguerēhi catu, pemboasi ité pe recocuer che Ru Tūpa upe pe yevi āgua. ²⁰ Esepia, inungar que ava oquenda omotara oquendipive ohā viña, ēgüe ahe pe pihave vichico; pesenduse che ñehe, pemboira cheu. Che evocoiyase aiquera pe piri, yacarura oyepiri. ²¹ Acoi ava oyemoviracua vahe mbahe-mbahe tēi apoēhi āgua yuvireco, ahe amboguapi ucara che ipive imoi che porocuaisave, inungar che mbahe tēi reco reroyi pare, aguapi che Ru ipive vīte. ²² ¡Acoi ava osendu pota vahe, toyapisacaño Espiritu remimombhugüer rese che reroyasareta upe! ehi imombehu pēu' erera icuachía” ehi Jesús cheu.

4

Tūpa mboeteisa ivave

¹ Ipore asepia mbahe inungar oquenda oyemboi vahe ivave. Ahese evocoi ñehesa ipĩrata vahe mimbi nungar yipindar oñeha vahe cheu, ahe asendu iri: “Eyeupi ave. Che evocoyase mbahe amboyecua ndeu mbahe imboaviyepirã curi” ehi.

² Ahe pipeve voi, Espiritu pĩratasa pipe aico iyavei asepia tenda ivave, ahe iharive ñepei uguapi oĩ. ³ Co uguapi vahe ndoyavii eté ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendí vahe, inungar esmeralda. ⁴ Iyavei asepia evocoi rese oyere tupri ambuae veinticuatro tenda, ahe iharive uguapi yuvinoi veinticuatro avei icuaipri yuvirecoi vahe; iturucuar morochí vahe yuvireco iyavei oãca rese omboyere tupri oro apopri yuvireco. ⁵ Evocoyase Tūpa renda sui yuvinose overa-vera vahe, iyavei siapu guasu vahe, osunu vahe no; iyavei siete tupri tataendi sendipa yuvireco evocoi tenda rovai, ahe co siete tupri Tūpa espíritu. ⁶ Evocoi tenda rovai oime avei ndoyavii tupri para guasu tĩpiu vahe oyecua tupri vahe mbahe ipipe.

Ambuae tenda pãhu rupi oyere tupri Tūpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no. ⁷ Yipindar yuvirecove vahe pãhu pendar ahe ndoyavii tupri yagua pĩta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoyavii vira guasu oveve vahe. ⁸ Evocoi iva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndo pituhui eté ari, pĩtu rupi aipo ehi yuvireco:

“¡Santo, santo, santo ité secoi, yande Yar Tūpa ité, ahe mbahe mboavaisarēhi, yipivé vahe ité, cūrteindar, apirēhi vahe!”

ehi yuvireco.

⁹ Evocoi yuvirecove vahe omboetei yuvireco, “Aviye ndeu” ehi co uguapi vahe oĩ tenda harive ndopai vahe upe. ¹⁰ Ēgüe ehise evocoyase veinticuatro tupri icuaipri yuvirecoi vahe, ahe oñenopiha imboeteisa pipe sovai yuvireco. Ipore osequi oãca resendar oyere tupri vahe omborerecuasa resendar sovai aipo ehi:

¹¹ “Ore Yar Tūpa, iya ité nde mboeteisa, ndeu sapucaisa nde pĩratasa rese.

Esepia, nde ereyapo vahe mbahe opacatu; nde remimbotar rupi niha oime opacatu mbahe”

ehi yuvireco chupe.

5

Ovesami upe güeraño iyacatu cuachiar imboyapri mboi ãgua

¹ Che asepia cuachiar Tũpa vireco vahe oacato coti, icuachiapri ipipe coti, ocar coti avei no, imboyapri siete sello pipe. ² Ipare asepia Tũpa rembiguai seco ivate vahe, ahe oporandu pĩrata oico aipo ehi: “¿Ava upe vo iya cuachiar mboi ãgua iyavei sello imboyeroyapri mondoro ãgua no?” ehi. ³ Ndipoi eté rumo que iva pendar, ivi pipendar, ivivri pendar oicatu vaherã cuachiar pipira sepia ãgua viña. ⁴ Evocoiyase che ayasehó iteanga. Esepia, ndipoi eté que ñepeí yepe oime angara aviye vahe cuachiar pipira sepia ãgua viña. ⁵ Ahese icuapri pãhu pendar ñepeí aipo ehi cheu: “Ereyaseho iri eme. Esepia niha, evocoi ava yagua pĩta vahe vahe chupe, Judá suindar, acoi mborerecuar guasu David suindar avei, ahe niha Carugar osecoreroyi. Sese iya ité chupe siete sello mondoro cuachiar pipira ãgua” ehi.

⁶ Evocoiyase, asepia Tũpa rovai iva pendar irungatu yuvirecove vahe pãhuve, icuapri yuvirecoi vahe mbiterve, ñepeí ava Ovesami nungar ihãí, aviye seropovẽhepri. Ahe niha vireco siete tupri sãchi, siete tupri avei sesa; sesa evocoiyase siete tupri Tũpa espíritu yuvirecoi opacatu ivi rupi imboguatapri. ⁷ Ipare evocoi Ovesami oso, oipisi cuachiar evocoi tenda harive oguapi vahe yacato coti sui; ⁸ ipisi pare, evocoi irungatu yuvirecove vahe, iyavei veinticuatro tupri icuapri, ahe oñenopihapa Ovesami rovai yuvireco. Oyacatu ñepeí-peí vireco arpa yuvireco, itaisi riru oro apopri, ahe avei vireco yuvireco, ahe itaisi niha Tũpa reroyasar yeruresa. ⁹ Osapucaí ipiasu vahe sapucaisa pipe aipo ehi yuvireco:

“Ndeu iyacatu ité cuachiar pisi ãgua,

imboyapri mondoro ãgua avei no.

Esepia niha, nde yucapri seropovẽhepri ereico.

Evocoiyase nde ruvi pipe eremboepipa Tũpa upe nara opacatu ava ambuae-ae tẽi vahe, iñehe ambuae-ae tẽi vahe avei, ñepeí-peí tecua yacatu rupindar, ivi rupindar avei yuvireco.

¹⁰ Iyavei eremborerecua uca Tũpa upe nara, erembopahi uca avei no, ipare ahe oporocuirra opacatu ivi rupi yuvireco” ehi osapucaí yuvireco.

¹¹ Ipare asepia, asendu avei Tũpa rembiguai rehii ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuapri ñehe avei asendu setá iteanga yuvirecoi. ¹² Ahe aipo ehi pĩrata yuvireco no:

“¡Co Ovesami yucapirer, ahe chupe iyacatu ité mborerecuasa pisi ãgua, opacatu Tũpa suindar porerecosa pisi ãgua, mbahecuasa, pĩratasa, mboyeroyasa, poromboeteisa, iyavei sapucaisa pisi ãgua avei no!” ehi.

13 Ahese asendu avei opacatu Tũpa rembiapo ivave yuvirecoi vahe, ivi pipendar, ivivri rupindar iyavei para guasu pipendar, aipo ehi yuvireco:

“¡Toime sapucaisa, Tũpa upendar mboyeroyasa, imboeteisa, iyavei pĩratasa, ahe timondosa apirẽhi vaheřã Tũpa acoi güendave oguapi vahe upe, Tahir Ovesami nungar upe avei no!” ehi.

14 Evocoi irungatu ava yuvirecove vahe, “¡Ëgüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopiha yuvireco sovai imboeteisave.

6

Siete sello

1 Ipare asepia acoi Ovesami omondoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pãhu pendar oñehe pĩrata. Iñehe ndoyavii osunu vahe, “¡Eriol!” ehi cheu. 2 Ahese asepia cavayu morochi vahe, ahe ava ihari pendar vireco virapar. Chupe omondo yeguaca yuvireco. Ëgüe ehi ahe osẽ seco pĩrata catu vahe ava reco reroyi ãgua.

3 Omondorose acoi Ovesami imoñuviriosa sello, ahese asendu imoñuviriosa yuvirecove vahe pãhu pendar ñehe, “¡Eriol!” ehi vahe cheu. 4 Ipare osẽ cavayu pĩra vahe, ahe ava ihari pendar oipisi pĩratasa mbahe tupriřa rerocua ãgua ivi pĩpendar ava sui ‘toyeyuca-yuca tẽi yuvireco’ oyapave. Ipare imondosa quise pucu chupe.

5 Omondorose acoi Ovesami imombosapisa sello, ahese asendu imombosapisa yuvirecove vahe pãhu pendar ñehe, “¡Eriol!” ehi vahe cheu. Amahe sese, ipare asepia cavayu sũ vahe, ahe ava ihari pendar vireco opo pipe mbahe rãhasa. 6 Ipare asendu yuvirecove vahe cotindar ñehe, ahe aipo ehi: ‘Nẽpei kilo trigo serocuasa guarepochi ñepei ari resendar mboraviqui repri pipe, mbosapi kilo cebada evocoyase serocuasa avei ñepei ari resendar mboraviqui repri pipe no. Pemocañi eme mbahe quira iyavei uva ricuer avei no’ ehi.

7 Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¡Eriol!” ehi cheu.

8 Amahe, ipare asepia cavayu iyu rasi vahe, ahe ava ihari pendar serer Tehögüer. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa

teco pĩratasa ivi imoirungatusa yahocuer rupi iguata ãgua ava yuca ãgua vavasa pipe, tieporẽhi pipe, mbaherasi pipe, mbahe ipi pipe avei no.

⁹ Evocoi Ovesami omondorose imbopoyandeposa sello, ahese asepia mbahe seropovẽhepri rendavrive ava hã, ahe yucasa vahe yuvireco Tũpa Ñehengagüer mombehusa sui tẽi iyavei Jesús reroyasa sui tẽi avei no. ¹⁰ Ahe aipo ehi pĩrata yuvireco: “Ore Yar Tũpa seco maranehi, supi tupri vahe, ¿mbahese vo eremombaraisura ore yucasarer yuvirecoi vahe ivi pipendar ore repisave?” ehi yuvireco. ¹¹ Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

¹² Ipare Ovesami omondorose imoñepei ovasa sello, ahese oime ivi ririi ipĩratá vahe. Ari evocoiyase sũ, aviye acoi turucuar sũ vahe mano sendar yemondesa iyavei yasi pĩrá inungar tuvi, ¹³ yasitata evocoiyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi. ¹⁴ Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pãhu avei no osiri güenda sui yuvireco. ¹⁵ Mborerecuareta avei co ivi pipendar yuvirecoi vahe opa tẽi oñemi mbahecuar pipe yuvireco, ita guasu pãhu rupi avei yuvireco no, oyoya guasu seco ivate vahe, sundao rerecuareta, mbahe yar seco pĩratá vahe, iyavei opacatú tupri mbiguai eta, ava ndahei vahe mbiguai avei; ¹⁶ iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tẽi Tũpa sui iyavei Ovesami sui acoi ombou vahe co poronupasa ipĩrata vahe oreu! ¹⁷ Esepia, oyepota ité Tũpa ñemoirosa oreu. Ndipoi chietera ava oyemoviracua tupri vahe oyese chupe” ehi yuvireco.

7

Israel suindar iporavopri yuvirecoi vahe

¹ Ipare asepia irungatu tupri Tũpa rembiguai iva pendar yuvinochai vahe irohi coti, norte coti, ari sãsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuẽhi ãgua, que para guasu pipe angara viña, que ñepei yepe ivira ro angara viña no. ² Ipare asepia avei ambuae Tũpa rembiguai iva pendar ou vahe ari sãsa coti sui, ahe vireco oyese Tũpa oicove vahe rer mondosa. Ahe niha osapucaí pĩratá evocoi irungatu tupri Tũpa rembiguai iva pendar yuvirecoi vahe upe, oipisi vahe pĩratasa ivi, para guasu momara ãgua yuvireco, aipo ehi: ³ “¡Ndapemomara vitei chira rumo ivi, para guasu avei, ivira avei no, co ndoromondo

viteiseve ava Tūpa rembiguai eta upe isiva rese Tūpa rer icuachiapri!” ehi.

⁴ Ipare asendu Tūpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoi suindar pãhu sui iporavopri yuvireco. ⁵ Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar, ⁶ doce mil tupri Aser suindar, doce mil tupri Neftalí suindar, doce mil tupri Manasés suindar, ⁷ doce mil tupri Simeón suindar, doce mil tupri Leví suindar, doce mil tupri Isacar suindar, ⁸ doce mil tupri Zabulón suindar, doce mil tupri José suindar, ipa evocoyase doce mil tupri Benjamín suindar.

Ava rehi iturucuar morochi vahe

⁹ Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe ñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa ãgua. Esepia, setá etepri yuvireco iyavei iturucuar morochí vahe pãve; pindo-pindomi vireco opove yuvireco no. ¹⁰ Ipare opacatú guasu oñehe pīrata yuvireco aipo ehi:

“¡Poropisirosa yande Ru Tūpa suindar, ahe oguapi vahe oĩ güendave, iyavei Ovesami suindar avei no!” ehi.

¹¹ Iyavei opacatu Tūpa rembiguai iva pendar yuvirecoi vahe oyere tupri Tūpa renda rese, icuapri rese avei yuvinoha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tūpa mboeteisave yuvireco, ¹² aipo ehi:

“¡Ēgüe tehi!

Sapucaisa, poromboeteisa, mbahecuasa, ‘¡Aviye ndeu’ hesa, poromboyeroyasa, mborerecuasa,

teco pīratasa avei tasecoi yande Ru Tūpa upe!

¡Ēgüe tehi apirēhi vaherã ité yepi!” ehi.

¹³ Ahese icuapri ipãhu pendar aipo ehi cheu cute: “¿Ereicua vo co ava rehi iturucuar morochi vahe pãve yuvirecoi, ereicua que sui pīha yugüeru?” ehi. ¹⁴ Che evocoyase, “Nde rumo ereicua” ahe chupe. Ipare ahe aipo ehi cheu: “Co acoi yuvinohe tupri vahe ité teco asisa sui yuvireco, inungar oyosei, omomorochi vahe oturucuar, ěgüe ehi avei güecocuer imomorochi Ovesami ruvi pipe yuvireco.

¹⁵ “Sese Tūpa renda rovai yuvirecoi, chupe mbahe apo ãgua ari, pītu rupi avei sēta pipe.

Güendave oguapi vahe oĩ, güecocuer pipe osepira.

¹⁶ Evocoi ndiyumbiasí iri chira yuvireco, ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

17 Esepia, evocoi Ovesa secoi Vu renda rovai,
 ahe osãrora ava rehi sereco inungar ovesa rãrosar.
 Ipare opara viraso tecovesa resendar i ndopai vahesave
 imboihu água.
 Tūpa evocoiyase omombituhupara imboyasehosa sui
 yuvireco” ehi.

8

Imoñuvirío ovasa sello iyavei itaisi rapisa oro apopri

1 Ipare coiye cute co Ovesami omondorose imoñuvirío
 ovasa sello cuachiar mboyasa ichui, ahese siu tupri ivave
 ñepe hora yemombitesa rupive. 2 Ichui asepia siete tupri
 Tūpa rembiguai iva pendar yuvinochai vahe Tūpa rovai, chupe
 opa imondosa siete tupri mimbi. 3 Ipare ou ambuae Tūpa
 rembiguai iva pendar oro itaisi rapisa reseve, iyavei ou ohã
 itaisi rapisa renda rovai; ipare imondosa tuvichá itaisi chupe
 oicuvêhe vahe rã oyoya tupri opacatu ava Tūpa upendar
 yeruresa rese oro mbahe reropovêhepri renda harive; ahe
 Tūpa renda rovai chini vahe. 4 Itaisi rãtachi evocoiyase oso
 Tūpa rembiguai iva pendar po sui. Êgüe ehi oyepota oso
 Tūpa recosave, oyoya tupri chupendar yeruresa rese. 5 Ipare
 evocoiyase Tūpa rembiguai iva pendar opoco itaisi rapisa
 rese, omboapipo mbahe reropovêhepri renda pendar tâtapii
 pipe. Ipare opa omombo ivi hari rupi. Aheseve voi osunu
 vahe opororo-roró, overa-vera iyavei ivi oririi.

Siete vahe mimbi

6 Evocoiyase siete tupri Tūpa rembiguai iva pendar oye-
 moingatu voi güemimbi moñehe água yuvireco.

7 Yipindar vahe Tūpa rembiguai omoñehe güemimbi, ahese
 imombosa ivi hari rupi amanda iyavei tata oyeseha vahe tuvi
 rese. Ipare opa ocai ivi mombosapisa yahocuer. Oyoya tupri
 ivira mombosapisa yahocuer rese iyavei capihi reseve avei
 opa yuvirocai.

8 Imoñuviriosa Tūpa rembiguai omoñehe güemimbi. Ahese
 imombosa para guasu pipe inungar tupri acoi ivitri sendi
 vahe tata pipe; ipare para guasu mombosapisa yohacuer
 oyeapo tuvi. 9 Iyavei para guasu mombosapisa yahocuer
 pipendar ava omano yuvireco. Ipare carite guasu mom-
 bosapisa yahocuer pipendar opa tupri avei imocañisa.

10 Ipare imombosapisa Tūpa rembiguai iva pendar
 omoñehe güemimbi, ahese yasitata tuvichá vahe oviapi iva
 sui ou. Sendi guasu inungar acoi ivira rese tata sendi guasu
 vahe. Ahe oviapi iai mombosapisa yahocuer pipe iyavei ivi
 sui i ohẽ vahe mombosapisa yahocuer pipe avei no. 11 Yasitata

rer evocoyase Iro-vahe. Ipare i mombosapisa yahocuer iró iteanga. Evocoi i pipe setá ava omano yuvireco.

¹² Imoirungatusa Tūpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape iri yuvireco ari mombosapisa yahocuer pipe, pĩtu mombosapisa yahocuer pipe avei no.

¹³ Ipare asepia, asendu avei no vira guasu ovevese iva mbiter rupi, aipo ehi pucu oñehe oico: “¡Too, too! ¡Iparaisu catura moco ava yuvirecove vite vahe ivi pipe yuvireco acoi omoñehese ambuae mbosapi Tūpa rembiguai güemimbi yuvireco!” ehi.

9

¹ Tūpa rembiguai imbopoyandeposa omoñehese güemimbi, ahese asepia yasitata oviapi vahe iva sui ou ivive. Ipare chupe imondosa ivicuar picucu pĩtumimbi vahe mboisa. ² Ipare omboise ivicuar rovapisa, ichui opũha tātachi, inungar acoi horno guasu pipe sui osẽ vahe. Evocoyase evocoi tātachi ndosesape uca iri ari upe, niporẽhi iri eté mbahe. ³ Iyavei evocoi tātachi sui opa yuvinose tucru guasu rehii oñemosai opacatu ivi rupi; chupe avei imondosa seco pĩrata ãgua inungar acoi mbaherumbiquiãpe. ⁴ Icuaisa rumo opacatu capihi mbahe rocri iyavei ivira momaraẽhi ãgua, ãgũe ehi rumo acoi ava nomboyecuai vahe osiva rese Tūpa rer, chupe nara ité. ⁵ Nimondosai rumo mborocuita chupe ava yuca ãgua. Ëgũe ehi rumo ‘tomombaraisu pucu rane poyandepo yasi rupi sereco’ oyapave tẽi, inungar tupri acoi mbaherumbiquiãpe rasicuer.

⁶ Evocoi ari rupi ava oipota tẽira omano ãgua yuvireco viña. Imanosa rumo que vitera yuvireco ichui.

⁷ Tucru guasu rehii inungar cavayu imoingatupri vavasave nara yepi; oãca rese evocoyase vireco ndoyavii yeguaca oro apopri, iyavei sova aviye tupri ité ava repiaca. ⁸ Iha ndoyavii cuña ha, sãi evocoyase ndoyavii tupri yagua pĩta rãi. ⁹ Setecuer evocoyase oyopia tupri guarepochi apopri, iyavei ipepo riapugũer aviye tupri ité acoi cãreto riapugũer cavayu vinoña vahe vavasave. ¹⁰ Vireco vuguai rese opopiar aviye mbaherumbiquiãpe popiar. Ahe niha vireco opĩratasa poyandepo yasi rupi ava momara ãgua tẽi. ¹¹ Evocoi tucru guasu rerecuar, ahe icuaipri ivicuar ipicucu vahe mboi ãgua. Ahe serer hebreo ñehe pipe Abadón; griego ñehe pipe evocoyase Apolión ehi.

¹² Opa yipindar vahe mbahe-mbahe tẽi; oime vite rumo co pare ñuvirío mbahe tasi vahe.

¹³ Imoñepei ovasa Tūpa rembiguai omoñehese güemimbi, ahese asendu ñehesa itaisi rapisa renda oro apopri Tūpa rovaindar irungatu sãchi vahe pãhu sui. ¹⁴ Ahe aipo ehi evocoi imoñepei ovasa Tūpa rembiguai upe: “Eyorapa evocoi irungatu Tūpa rembiguai ñapichimbrĩ iai guasu Eufrates ivirindar” ehi. ¹⁵ Evocoiyase opa yorasa ava mombosapisa yahocuer yuca ãgua yuvireco. Esepia, evocoi imoingatupri co ari rupi tuprise nara yuvireco. ¹⁶ Ipare asendu sundao rehi cavayu harive yuvirecoi vahe, ahe setacuer doscientos millones tupri.

¹⁷⁻¹⁸ Ëgüe ehi asepia cavayu rehi che quer nungar pipe, ihari pendar evocoiyase vireco opochiha rupi tupri oyoepisa guarepochi apopri yuvireco, ahe iparagüer pĩra vahe tata nungar, sovi vahe, iyu vahe avei no. Cavayu rehi ãca evocoiyase aviye tupri yagua pĩta ãca, iyuru sui evocoiyase yuvĩnose-nose tata, tãtachi iyavei azufre. Ipipe sui ava mombosapisa yahocuer opa tupri omano yuvireco. ¹⁹ Esepia niha, cavayu pĩratasa iyuru rese chini, suguai rese avei no; ahe suguai ndoyavii tupri ité mboi ãca, ipipe avei ava omomara.

²⁰ Ava rumbirer rumo nomanopa vitei vahe co mbahe tẽi sui yuvireco, nosecuñaro eté güecocuerai yuvireco. Ndopoi potai eté carugar mboetei aisa sui, iyavei opacatu mbahe rahanga tẽi oro apopri, guarepochi, bronce, ita, anise ivira apopri mboeteisa sui avei yuvireco. Evocoi mbahe apopri rumo ndosarecoi vahe, ndosendui vahe ité mbahe, ndoguatai vahe avei. ²¹ Iyavei noñecuñaro potai eté oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

10

Tūpa rembiguai iva pendar vireco vahe icuachiapri cuachiarmi

¹ Ipare asepia ambuae Tūpa rembiguai iva pendar ipĩratá vahe ogüeyise iva sui ou mbahe pĩtu pãhuve; ahe ñaca rese arco iris oyere tupri. Sova sendí aviye ari, setima evocoiyase ndoyavii tata rendigüer opũha tupri vahe. ² Cuachiarmi oyemboi vahe vireco opove. Opi oacato cotindar pipe opĩro para guasu rese, ambuae opive evocoiyase opĩro ivi rese. ³ Evocoiyase sãse pĩratá, inungar yagua pĩta rãse; sãsese, evocoiyase siete tupri osunu vahe ñehe oyendu yuvireco. ⁴ Oñehepase, ahese ñehe che aicuachiarã viña; asendu rumo iva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndereicuachiarã chietera” ehi cheu.

⁵ Evocoiyase Tūpa rembiguai asepia vahecuer, ahe acoi opĩro vahe para guasu rese, ivi rese avei opo oacato cotindar

omopuha iva coti. ⁶ Ichui Tūpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chitera; ⁷ oyepotase rumo imoñuvirío ovasa Tūpa rembiguai upe güemimbi moñehe ãgua, ahese imboaviyesara Tūpa remimbotar yipindar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

⁸ Ñehesa asendu vahe iva sui oñehe iri cheu aipo ehi: “Eso, tereipisi cuachiarmpi imboipri Tūpa rembiguai vireco vahe evocoi opiro vahe para guasu rese ohã, ivi rese avei no” ehi. ⁹ Evocoiyase aso Tūpa rembiguai upe, aporandu cuachiarmpi rese, ahese ahe aipo ehi cheu: “Ndo co, eipisi, ehu. Nde yuru pipe evocoiyase sêhera eiri nungar, nde aviterve rumo irora” ehi cheu.

¹⁰ Ahese aipisi cuachiarmpi cute Tūpa rembiguai sui, ipare ahu; yipindar sêhé che yuru pipe inungar eiri, amocopase rumo, che aviterve iró cheu. ¹¹ Evocoiyase aipo ehi yuvireco cheu: “Nde ereñehe irira Tūpa aipo ehi vahe rese ambuae-ae tecua pipendar rese, ivi rupindar rese, ambuae-ae iñehe vahe rese, mborerecuar rese avei no” ehi.

11

Ñuvirío ava Tūpa recocuer mombehusar

¹ Ipare ombou vara mbahe rãhasa yuvireco cheu, ichui aipo ehi yuvireco cheu no: “Erio, teresãhapa tūparo, mbahe reropovêhepri renda avei, ipare opara ereipapa ipipendar Tūpa mboeteisar retacuer” ehi. ² “Nderesãhai chira rumo ñachimbrí pipe tūparo rocar rupi. Esepia, evocoi opa imondosa ava Tūpa ndoicuai vahe upe, ahe opirora tecua nimarai vahe rese yuvireco cuarenta y dos yasi rupi” ehi. ³ “Ipare ñuvirío ava amondora che recocuer mombehu ãgua opacatu ava upe mil doscientos sesenta ari rupi. Ahe omondera turucuar ipo guasu vahe yuvireco” ehi.

⁴ Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai. ⁵ Acoi que oimese ovireco mara pota vahe, ahese che reco mombehusar yuru sui osêra tata sapipa ãgua; êgüe ehira ava omano que che reco mombehusar reco momara potasar. ⁶ Co ñuvirío vireco opĩratasa oqui vahe mombita ãgua, acoi ari rupi che reco mombehu vitesese yuvireco; iyavei vireco pĩratasa i recuñaro ãgua tuvi pipe yuvireco, imombaraisu uca ãgua avei ivi opacatu-catu tēi mbaherasi pipe güemimbotar rupi.

⁷ Omboaviyepase rumo Tūpa reco mombehusa yuvireco, ahese osêra ivicuar guasu ipicucu vahe sui mbahe ipi vai.

Ahe ovavara sese, osecopira, ichui oyucara. ⁸ Sehögüer evocoyase yangarecuavēhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no. ⁹ Ipare mbosapi ari yemombitesa rupi, ava-ava tēi tecua rupindar, ava ambuae-ae tēi vahe, iñehe ambuae vahe iyavei ambuae-ae ivi rupindar osepiaño tēira sehögüer yuvireco iyavei ahe noñoti ucai chietera ava upe yuvireco. ¹⁰ Ava yuvirecove vahe ivi pipe, ahe oviharetera yuvireco imano rese. Ēgüe ehira sorivete, iporerecora oyese yuvireco. Esepia, evocoi ñuvirío ava Tūpa ñehe mombehusar imombaraisupirer yuvirecoi.

¹¹ Mbosapi ari yemombite pare rumo, Tūpa opa omboğüerayevi, ahese opūhapa yuvireco. Evocoyase ava opacatu osepia vahe osiquiyé iteanga yuvireco ichui. ¹² Ipare ahe ñuvirío osendu yuvireco ñehesa ipīrata vahe iva suindar aipo ehi vahe: “¡Peyeupipa ave ivate!” ehi. Evocoyase opa oyeupi ivave yuviraso iva quiha pāhu rupi oamotarēhisareta rembiepiave. ¹³ Aheseve voi oime ivi ririri tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoyase ava rumbirer, osiquiyepave tēi osapucái Tūpa iva pendar upe imboeteisa pipe yuvireco.

¹⁴ Opa mbahe-mbahe tēi moñuviriosa cute; ou poyava irira rumo imombosapisa.

Imoñuvirío ovasa Tūpa rembiguai omoñehe güemimbi

¹⁵ Imoñuvirío ovasa Tūpa rembiguai omoñehese güemimbi, ahese oyeendu ñehesa ipīrata vahe iva suindar aipo ehi vahe:

“Yande Yar Tūpa, Sembiporavo Poropīsīrosar avei vireco co ivi pipendar mborerecuasa opovrive yuvireco cute.

Ahe evocoyase mborerecuar apirēhi vaherā itera secoi” ehi.

¹⁶ Evocoyase veinticuatro tupri icuaipri, evocoi oguapi vahe yuvinoi Tūpa renda rovai, ahe oyeaivi omboya ité osiva ivi rese imboeteisa pipe yuvireco, ¹⁷ aipo ehi:

“Aviye ndeu ore Yar, Tūpa mbahe mboavaisarēhi, nde acoi yipisuive vahe ité,

ereicoveño avei cūrítei.

Esepia, nde pīratasa tuvichá vahe pipe ereporocuai eico.

¹⁸ Ambuae tecua rehī pendar nde amotarēhí ité yuvireco.

Nde ñemoirosa rumo cūrítei oyepota, iyavei nde porandusa oime vaira ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe,

ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pipe mbahe tēi rerusar” ehi yuvireco.

¹⁹ Ahese oyemboi tūparo iva pendar, iyavei oyecua tupri cuachiar porocuita resendar riru. Ipare overa-vera, siapu guasu, osunu, ivi oririri, amanda osururú avei no.

12

Cuña iyavei mbahe ipi oporomocañi vahe

¹ Evocoyase iva rese oyecua mbahe poromondiisa tuvichá vahe ambuae mbahe mboyecua ãgua: oime cuña iturucuar inungar ari rendigüer, aviye opïro vahe yasi rese ohã, oãca yeguaca rese doce tupri yasitata vireco. ² Co cuña ipuruha oico, sãsé tēi omembri iha pota ãgua oyesui. Esepia niha, oiporará ité tasicuer. ³ Ipare coiye oyecua iva rese ambuae mbahe mboyecua tupri: mbahe ipi pïra vahe, ahe ñaca siete tupri, sãchi evocoyase diez iyavei vireco yeguaca oãca yacatu. ⁴ Suguai evocoyase ombotiriri yasitata iva pendar imombosapisa sui ñepeiyahocuer seraso. Ipare opa omombo ivive. Ahe evocoyase opita osãro cuña imembira pota vahe rovai ohã, “Tahupaño voi imembri oha ramoseve” ehi viña. ⁵ Ipare co cuña membri oha cuimbahemi, ahe mborerecuar virecora mbococa guarepochi apopri, ipirata catu vahe sec-oira opacatu ava ivi rupindar upe. Ichui serocuasa voi serasosa Tūpa rovai. ⁶ Cuña evocoyase oñemi ivi iporupirēhisave oso. Aheve omoingatu Tūpa iyemboerecua ãgua, eipeve icaru ãgua mil doscientos sesenta ari rupi.

⁷ Oime avei vavasa ivave; ahese Tūpa rembiguai iva pendar ivate catu vahe Miguel güeru ovoya eta ovava ãgua mbahe ipi oporomocañi vahe upe ivoya upe avei yuvireco. ⁸ Ndoicatu eté rumo Miguel recopi ãgua yuvireco. Sese ndipoi eté ivave seco ãgua yuvireco chupe. ⁹ Ēgüe ehi imboyepepisa mbahe ipi oporomocañi vahe reco pïratasa sembiguai eta reseve; opa imombosa ivi pipe yuvireco. Evocoi mboi vai, “Carugar” ehi vahe yuvireco chupe; “Satanás” ehi avei yuvireco chupe. Evocoi niha ava ombopa-mbopa tēi vahe opacatu ivi pipe yuvireco.

¹⁰ Evocoyase asendu ñehesa ipirata vahe ivave, aipo ehi vahe:

“Cūrítei oime poropisirosa, pïratasa iyavei yande Tūpa mborerecuasa, Poropisirosar mborerecuasa avei no.

Esepia niha, imboyepepisa iva sui acoi oseca-seca vahe yande rivri Tūpa reroyasareta recocuer momara ãgua pïtu, ari yacatu rupi yande Ru Tūpa rovai.

11 Yande rívrí osecoreroyí Ovesami ruví piyere pípe sui yuvireco iyavei acoi secocuer mombehu tuprísa pípe sui avei no.

Esepia niha, ndosiquiyei eté güetecuer mocañi ãgua yuvireco.

Ahe rumo oyemoingatu voi eté omano ãgua.

12 ¡Peyemboviha catu pe iva iguar peico vahe!

Pe rumo, ¡peparaisu catura ivi pípe, para guasu pípe avei peico vahe!

Esepia niha, Carugar ogüeyi pëu oñemoirosa pípe, oicuase güeco pucuëhi ãgua” ehi.

13 Ipare mbahe ipi oporomocañi vahe oicuase imombopri güecose ivi rese, ahesé omoña cuña imembri cuimbahemi reseve yamotarëhisa pípe. 14 Evocoi cuña upe rumo imondosaño ñuvirío vira guasu pepo iveve ãgua chupendar ivi imoingatupri ava porëhisave seco ãgua, amombri mbahe ipi oporomocañi vahe sui. Aheve oyopoi mbosapi araviter yemombitesa rupive. 15 Ipare mbahe ipi oporomocañi vahe oyuru rupi ombotipimacua cuña raquicuei iai apo ‘tocañi tēi’ oyapave viña. 16 Ivi rumo oime co cuña pítiviisa, ahe oyeca. Ipare opa omoco iai evocoi mbahe ipi oporomocañi vahe rembiapo. 17 Evocoyase, oñemoiró iteanga cuña rese, ipare oso ovava ambuae ichuindar rehí rese, ahe omboyeroya vahe ité Tūpa porocuita yuvireco iyavei yuvirecoi tupri vahe Jesucristo remimombehu rupi. 18 Ipare mbahe ipi oporomocañi vahe opita para guasu popive ohã.

13

Ñuvirío mbahe ipi vai

1 Ipare asepia para guasu pípe sui osëse mbahe ipi vai, ahe siete tupri ñaca vahe iyavei diez tupri sãchi. Guãchi yacatu evocoyase vireco ñepeí-peí oyeguaca, iyavei oãca yacatu rese vireco terer Tūpa upe mbahe tēi vahe. 2 Co mbahe ipi vai aviye tupri acoi yaguar iparaũ vahe; iyavei ipi aviye tupri oso pi, iyuru evocoyase aviye yagua pita yuru. Mbahe ipi oporomocañi vahe evocoyase omondo opiratasa iyavei omborerecuasa chupe. 3 Ñepeí mbahe ipi vai ãca oyeapicha guasu vahe ndoyavii omano vaheerã ité viña; ahe rumo ocuera tupri iriño evocoyase opacatu guasu ava sepiase, ndoyembovihal. Ichui viroya catu yuvireco. 4 Omboetei guasu mbahe ipi oporomocañi vahe sereco yuvireco. Esepia, omondo omborerecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaheerã sese” ehi yuvireco.

⁵ Iyavei mbahe ipi vai upe ipotasa iyemboivate ai āgua oñehe pipe ava rovaque iyavei Tūpa reroiro āgua avei no, iyavei mborerecuar guasu seco āgua cuarenta y dos yasi rupi. ⁶ Ēgüe ehi iñehe mara-mara tēi Tūpa rese, iñehe-ñehe tēi avei serer maranehi rese, sēta rese, iva pendar rese avei no. ⁷ Imondosa avei chupe vavasa apo uca āgua Tūpa upendar ava eta upe secopi āgua. Ipare imondosa avei mborerecuar seco āgua chupe ava ambuae-ae tēi vahe upe, secua ambuae vahe upe, ambuae-ae tēi iñehe vahe upe, iyavei ambuae ivi rupindar upe avei no. ⁸ Ipare omboetei ai sereco yuvireco opacatu ava ivi pipendar acoi ivi apoēhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

¹⁰ “Acoi ava oyeoquenda uca vaherã, oyeoquenda ucaño itera; iyavei acoi ava omano vaherã quise pucu pipe, ipipeño ité omanora.”

Co pipe oyecua Tūpa rese yeroyasa iyavei ipĩratasa ava chu-pendar rese.

¹¹ Ipare asepia ambuae mbahe ipi vai osē vahe ivivri sui. Co vireco ñuvirío guāchi ndoyavii tupri Ovesa rāchi, mbahe ipi oporomocañi vahe ñehe pipe rumo oñehe oico. ¹² Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rāgüer sui. ¹³ Iyavei oyapo setá mbahe poromondiisa mbahe mboyecua āgua. Iva sui eté niha oiti uca tata ivive imbou opacatu ava rembiepiave. ¹⁴ Ombopa tēi ava ivi pipendar yuvirecoi vahe mbahe poromondiisa pipe evocoi imondosa vahe yapo āgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo āgua imboeteisave. ¹⁵ Ipare imondosa pĩratasa chupe tecovesa mondo āgua evocoi sahanga upe ‘toñehe, toyuca uca avei ava opacatu omboeteiēhisar’ oyapave. ¹⁶ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecoprii vahe upe, mbiguai tēi upe, ahe chupe, “Toyecuachía opo oacato cotindarve yuvireco, anise osivave” ehi. ¹⁷ Ahese ava ndipoi eté oicatu vahe mbahe rerocua, anise que mbahe mondo āgua acoi ndovirecoise mbahe ipi vai rer, anise serer retacuer ndovirecoise oyese no.

¹⁸ Iya pereco mbahecuasa co renducua tupri āgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

14

144,000 ava iporavopri sapucaisa

¹ Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evocoi oicuachía vahe Ovesami rer, Tu rer avei osiva rese yuvireco. ² Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, ñgüe ehi siapugüer. ³ Ipare osapucaí sapucaisa ipiasu vahe yuvireco Tüpa rovai iyavei iva pendar irungatu yuvirecove vahe rovai, icuaipri eta rovai avei no. Ñepeí yepe que iva pendar ndoicatui eté evocoi sapucaisa rese oyembohe vaheñã. Ñgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pãhu sui, ahe güeraño tupri ité oicatu osapucaí yuvireco. ⁴ Co ava ndoyapoi vahe ité mbahe co coti tēi cuña rese. Esepia, oñearo tupri güeco catuprisa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pãhu sui iyavei inungar yipindar mbahe seropovēhepri Tüpa upe, Ovesami upe avei. ⁵ Ndipoi eté que temira sese. Esepia niha, ndipoi eté mbahe oyavi vahe yuvireco.

Mbosapi Tüpa rembiguai omombehu iñehe ava upe yuvireco

⁶ Evocoiyase asepia ambuae Tüpa rembiguai iva pendar oveve vahe iva mbiter rupi iyavei vireco Tüpa Ñehengagüer p̄isirosa resendar ndopai vahe imombehu ñgua opacatu ava co ivi pipendar upe: opacatu ivi rupindar upe, ava ambuae-ae vahe upe, iñehe ambuae-ae vahe upe, opacatu tecua rupindar upe avei no. ⁷ Ipare oñehe p̄irata aipo ehi: “Pesiquire Tüpa sui iyavei pesapucaí seco ivatesa rese chupe no. Esepia niha, cūrítei oyepota arí chupe ava recocuer rese iporandu ñgua. Pemboetei catu oyapo vahecuer iva, ivi, para guasu, i ohē vahe avei no” ehi.

⁸ Ambuae Tüpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tēisa resendar pipe!” ehi.

⁹ Ipare ambuae Tüpa rembiguai iva pendar imombosapisa, saquicue moña aipo ehi p̄iratá iri oico: “Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oyecuachía ñgua osiva rese, que opo rese no, ¹⁰ oipisi itera Tüpa ñemoirosa ip̄irata vahe ité; ipare ombaraisura setecuer azufre ocai vahe pipe güembiguai iva pendareta reco maranehi rovaque, Ovesami rovaque avei

no. ¹¹ Tātachi icaigüer pendar evocoiyase oyeupira ndopai vaherã, ahese ndipoi chietera pituhusa pĩtu, arĩ pipe evocoi mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

¹² ¡Ēgüe ehira Tũpa rese ité yuvirecoi vahe yeroyasa oyecua ahe acoi iporocuaíta mboaviye tuprisar, Jesús reroya tuprisar avei yuvireco!

¹³ Ahese asendu ñehesa iva pendar aipo ehi vahe cheu: “Eicuachía co: Co pipe suive sorivete catura acoi ava omano vahe yande Yar rese yuvireco” ehi.

“Ēgüe ehi eté —ehi Espĩritu imombehu—, opituhura oporaviquisa sui yuvireco. Esepia, mbahe sembiapo rerãcua osora ivave supĩ” ehi.

Ivi pipendar recoãhasa

¹⁴ Ahese asepia iva quiha morochĩ vahe; iharive ndoyavii ava oguapĩ vahe oĩ. Vireco niha oyeguaca oro apopri oãca rese iyavei mbahe miti asiasa saimbé vahe vireco opove. ¹⁵ Ipare osẽ ambuae Tũpa rembiguai tũparo sui. Ahe osapucái pĩrata evocoi iva quiha harive chini vahe upe: “¡Eyasía nde remiti iyavei emonuha nde rembiasía! ¡Esepia, nde remiti ivi pendar yaviye ité!” ehi ava recocuer uve chupe. ¹⁶ Evocoiyase evocoi chini vahe oyasia güemiti ivive oico, ahese opa omonuha güembiasía.

¹⁷ Ipare osẽ ambuae Tũpa rembiguai tũparo sui, ahe avei vireco mbahe miti asiasa saimbé vahe. ¹⁸ Ipare ambuae Tũpa rembiguai osẽ mbahe reropovẽhepri renda sui, ahe tata rese hañecosar secoi. Iyavei oñehe pĩrata evocoi vireco vahe mbahe miti asiasa upe aipo ehi: “¡Eyasía uva ha apacuar, evocoi oime vahe ivi pipe! ¡Esepia niha, opa yaviye!” ehi. ¹⁹ Evocoiyase co Tũpa rembiguai inungar oyasia vahe uva ha ěgüe ehi opa ava ipaha ivi pipendar. Ipare opa oyapocatu Tũpa ñemoirosa rãro ãgua. ²⁰ Ipare inungar uva ha icambepri tecua cupeve, ěgüe ehi co ava imombaraisu; ichui osẽ tuvĩ evocoi tipigüer oyepota ité cavayu yuru penda rupi eté sese, ahe ipucucuer trescientos kilómetros tupri ité.

15

Ipa siete tupri Tũpa rembiguai güeru mbaherasi yuvireco

¹ Ipare asepia ivave ambuae mbahe mboyecuasa tuvichá vahe poromondiisa: siete Tũpa rembiguai, siete tupri mbaherasi ipa vahe vireco vahe, ahe ipá vahe ité Tũpa ñemoirosa.

² Iyavei asepia para guasu ndoyavii yepiasa oyeseha vahe tata rese. Ahe ipopive yuvinoha ati mbahe ipi vai recopisar, sahanga recopisar iyavei nomondo uca potai vahe serer

cuachía ãgua yuvireco oyese. Ahe vireco Tũpa upendar arpa yuvireco. ³ Ipare osapucaí Tũpa rembiguai Moisés sapucaisa yuvireco, iyavei Ovesami sapucaisa aipo ehi:

“Tuvichá opacatu mbahe nde rembiapo, che Yar Tũpa opacatu mbahe mboavaisarēhi; nde recocuer supi tupri vahe ité; seco ïvi vahe.

¡Too, nde mborerecuar guasu opacatu ïvi rupindar ereico!” ehi.

⁴ “Yar, nde sui opacatu ité osiquiyera yuvireco nde mboetei ãgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tupri vahe” ehi.

⁵ Ipare asepia ivave oyemboise Tũpa rēta imaranehi vahe. Aheve acoi yapocatusa mborocuaíta resendar. ⁶ Evocoyase ichui yuvinosépa evocoi siete Tũpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuasa ipe vahe oro apopri pipe evocoyase oyeumbicua opochiha rupi tupri yuvireco. ⁷ Ipare ñepei evocoi irungatu ïva pendar yuvirecove vahe pãhu pendar omondo siete tupri Tũpa rembiguai upe siete Tũpa ñemoirosa riru oro apopri, ahe oicove vahe ité, ndopai vahe. ⁸ Ipare Tũpa rēta omboapipo tātachi, evocoi ou vahe Tũpa reco porañetesa iyavei ipĩratasa sui. Aheve ndiyai eté que ava upe seique ãgua acoi opase voi eté omomba siete tupri mbaherasi vai vireco vahecuer siete Tũpa rembiguai.

16

Siete Tũpa ñemoirosa riru

¹ Evocoyase asendu ñehesa ipĩrata vahe osē vahe Tũpa rēta pipe sui. Ahe aipo ehi siete Tũpa rembiguai yuvirecoi vahe upe: “Peso, tapeipiyerepa ïvi hari rupi evocoi siete tupri mbahe riru pipendar Tũpa ñemoirosa” ehi.

² Yipindar vahe Tũpa rembiguai opa oipiyere igua riru pipendar ïvi hari rupi; evocoi opacatu ava vireco vahe mbahe ipi vai rer oyese sahanga mboeteisar tēi avei, ahe chupe oime setá caracha vai tasi vahe.

³ Tũpa rembiguai imoñuviriosa opa oipiyere igua riru pipendar para guasu pipe. Ahe evocoyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

⁴ Tũpa rembiguai imombosapisa opa oipiyere igua riru pipendar ïai pipe, ï ohē vahe pipe avei no. Ipare opa ahe

oyeapo tuvī yuvireco. ⁵ Co pare asendu Tūpa rembiguai i rese ihañeco vahe ñehesa aipo ehi:

“Nde seco tupri vahe ité ereico evocoi ava upe eremouse nde ñemoirosa, che Yar Tūpa,

seco maranehi vahe.

Nde yipisuiendar ité ereico.

⁶ Esepia, ahe opa oyuca ndeundar ava iyavei nde ñehes mombehusar yuvireco.

Cūrutei rumo eremboihu uca tuvī pipe.

¡Evocoi nungar upe aviyesa rupi eté!” ehi.

⁷ Asendu avei ambuae ñehesa mbahe reropovēhesa renda sui aipo ehi vahe: “Supi eté, che Yar Tūpa, opacatu mbahe mboavaisarēhi, nde ava recocuer mombaraisusa supi tupri vahe ité iyavei nde reco űvi vahe ité no” ehi.

⁸ Tūpa rembiguai imoirungatasa, opa oipiyere mbahe riru pipendar ari rese, ipare ari upe imondosa pīratasa ava rapīpa āgua. ⁹ Ipare opacatu ité ava yuvirocaipa tupri; ndoyevī eté rumo Tūpa upe iyavei nomboeteiño ité yuvireco. Ēgüe ehi rumo ñehes mara-mara tēiño mbaherasi rerecose Tūpa upe yuvireco.

¹⁰ Tūpa rembiguai imbopoyandeposa oipiyere mbahe riru pipendar mbahe ipi vai renda rese. Ahese aviyeteramo tēi sereciar ipovri pendar avei pītumimbisave yuvirecoi. Ava evocoiyase oñeapecusuhu-suhu tēi yuvireco mbahe rasicuer pāhuve; ¹¹ ndopoiño ité rumo mbahe-mbahe tēi aposa sui yuvireco, ahe rumo ñehes mara-mara tēiño Tūpa ivate vahe rese oyeupe mbahe tasi vahe pāhuve yuvireco.

¹² Tūpa rembiguai imoñepeī ovasa oipiyere mbahe riru pipendar iai guasu Eufrates pipe. Ahe evocoiyase opa ipiru peri apo āgua añihivei coti sui mborerecuareta yu āgua.

¹³ Ipare asepia mbahe ipi oporomocañi vahe, mbahe ipi vai, ndahei vahe Tūpa ñehes mombehusar supi vahe avei, ahe yuvirecoi vahe yuru rupi yuvinose mbosapi carugar vireque nungar. ¹⁴ Co Carugar suindar yuvirecoi, ahe oyapo poromondiisa mbahe mboyecuasa yuvireco. Ipare opa yuvinose opacatu ivi rupi mborerecuareta monuha āgua vavasave nara, acoi ari cañi pipe Tūpa mbahe mboavaisarēhi amotarēhisave.

¹⁵ “Peyapisaca tupri che ñehes rese, che aviyeteramo tēi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiapo aviye vahe pipe. Ahese nochi chietera oico che sui” ehi.

¹⁶ Ipare opa omonuha mborerecuareta hebreo ñehes pipe serer Armagedón ve.

17 Evocoiyase imbosietesa Tūpa rembiguai oipiyere iñemoirosa mbahe riru sui ivitu rupi. Ipare iva pendar Tūpa rēta pipe sui osē ñehesa ipīrata vahe evocoi ou vahe senda sui: “¡opa ité yaposa cute!” ehi. 18 Ahese oime overa vahe, mbahe siapu guasu vahe iyavei osunu vahe. Ipare ivi oriri ipīrata catu vahe opacatu ivi riri sui ava yuvirecove vitesese ivi pipe. 19 Tecua guasu oyeca-yeca mbosapi rupi, opacatu tecua evocoiyase opa onduru ivi pipendar. Ipare Tūpa oyemomahenduha evocoi tecua guasu Babilonia pendar rembiapo ai rese, evocoiyase omondo oñemoirosa ipīrata catu vahe chupe. 20 Opacatu caha pāhu, ivitri avei ocañipa ité yuvireco. 21 Iyavei yuviroviapipa iva sui ava harive amanda guasu, ahe iposigüer cuarenta kilos rutei. Ava rumo iñehe mara-mara tēiño vite ité Tūpa upe yuvireco amanda sui tēi. Esepia niha, evocoi Tūpa poronupasa ivaté catu vahe.

17

Cuña oyemondo-mondo tēi vahe mocañisa

1 Siete Tūpa rembiguai vireco vahecuer mbahe riru yuvireco, ipāhu pendar ñepeu ou aipo ehi cheu: “Erio, amboyecua co cuña yaguasa serai vahe upe ñemoirosa ndeu, ahe evocoi oguapi i harive oī” ehi. 2 “Co cuña rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

3 Ipare che quer nungar pipe Espiritu omboyecua vahe cheu, Tūpa rembiguai iva pendar che reraso ava porēhisave. Aheve asepia cuña mbahe ipi vai pīra vahe harive chini. Evocoi mbahe ipi vai opacatu rupi oyapete tupri ñehesa vai Tūpa amotarēhisa sereco oyese, iyavei vireco siete tupri oāca, diez tupri guāchi. 4 Co cuña turucuar, suendi vahe, pīra vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasaguasa tēisa; 5 iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tēi vahe si, opacatu ava ivi pipendar secocuer yavaeté vahe si avei no” ehi. 6 Ipare aicua evocoi cuña osavaipo vahe oī Tūpa reroyasar ruvi pipe iyavei acoi Jesús recocuer mombehusa sui tēi yucapri vahe ruvi pipe avei no.

Co asepiase che quer nungar pipe, ndache mbovihai eté. 7 Ahese ahe Tūpa rembiguai iva pendar aipo ehi cheu: “¿Maha-hera vo nderevihai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oāca, diez tupri avei acoi sāchi”

ehi. ⁸ “Acoi mbahe ipi vai erese pia vahe ahe yipive secoi vahe, cūritei rumo ndipo iri; osēra rumo ivicuar guasu ipicucu vahe sui omano āgua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoēhiseve, ahe ndovihai chira yuvireco osepiase evocoi mbahe ipi vai yipive oicove vahe viña, ndoicove iri rumo, oyevi irira curi.

⁹ “Co rese icuasara uma vireco mbahecuasa senducua āgua: Co siete tupri vahe ñaca ahe omombehu ‘siete tupri ivitri’ oya-pave. Ahe iharive evocoi cuña oguapi oī iyavei ahe siete ñaca avei omoporēhi ‘siete tupri mborerecuar’ oyapave. ¹⁰ Cinco tupri mborerecuar evocoi ipāhu pendar ndipo iri yuvireco, ñepeñño evocoyase oporocuai cūritei oico, ambuae rumo ndou vitei. Ouse rumo ipandar, ou raimi tēira. ¹¹ Mbahe ipi vai secoi vahe yipindar, ndoicove iri cūritei, ahe imbohochosa secoira mborerecuarā, yepe siete tupri vahe mborerecuar guasu mboetasa viña, ahe rumo ocañi tēi vaherā secocuer” ehi.

¹² “Evocoi diez tupri vahe sāchi, ahe mborerecuar diez tupri ndoyuviroique vitei vahe oporocuai vaherā yuvireco. Oyoya rumo oporocuai raimi tēira mbahe ipi vai reseve yuvireco curi. ¹³ Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo vaherā pīratasa iporocuai āgua yuvireco. ¹⁴ Ipare ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar, iyavei acoi ava yuvirecoi vahe sese, ahe senoipri yuvirecoi iyavei iporavopri oyemoviracuaño vahe ité supi oguata āgua yuvireco” ehi.

¹⁵ Iyavei Tūpa rembiguai aipo ehi cheu: “Evocoi para guasu erese pia vahe, iharive cuña yaguasa-guasa tēi vahe oguapi oī, ahe ‘ava rehii tecua yacatu rupindar, iñehe ambuae-ae vahe iyavei opacatu ambuae tēi vahe ivi rupindar’ oya-pave. ¹⁶ Evocoi erese pia diez tupri vahe sāchi mbahe ipi vai rese, ahe ndoyambotai chira cuña yaguasa-guasa tēi vahe; iyavei osequi tuprira seya; ohupara soho, ipare opara osapi. ¹⁷ Tūpa niha omondo ipiha pipe mbahe güemimbotar apo āgua ‘ahe toyemonguerēhi yuvireco omborerecuasa mondo āgua mbahe ipi vai upe; tomboaviye rane ité che remimombe-hugüer yuvireco’ oyapave. ¹⁸ Iyavei evocoi cuña yaguasa-guasa tēi vahe erese pia vahe, evocoi niha tecua guasu ivi pipendar mborerecuareta vireco vahe opovrive yepi” ehi Tūpa rembiguai cheu.

Babilonia viapi agüer

¹ Ipare asepia ambuae Tüpa rembiguai ipĩrata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi. ² Iyavei ofehe pĩrata oico aipo ehi:

“¡Oviapi tecua Babilonia cute!

Carugar yuviroique sese, opacatu carugar naporai vahe iyavei vĩrai vai nungar yuviroique sese.

³ Esepia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoyase mborerecuareta ivi pipendar oyapo mbahe tēi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

⁴ Evocoyase asendu ambuae ñehesa iva sui ou vahe, ahe aipo ehi:

“Peyepipi evocoi tecua guasu sui, pe peico vahe cheundar evocoi yangaipa rese imboyoyaēhi āgua.

Iyavei ñepi yepe taperupiti eme imbaherasisa.

⁵ Esepia niha, yangaipagüer oyepota ité ivave.

Tüpa evocoyase oyemomahenduha mbahe-mbahe tēi sembiapogüer rese chupe.

⁶ Inungar ahe ambuae upe, ēgüe peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

⁷ pemondo setecuer mombaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esepia niha, ahe aipo ehi opiha pipe oico:

‘Cohave che aguapi vīte mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

⁸ Sese niha aviyeteramo tēi oura mbaherasisa chupe:

paraisusa, tieporēhi, manosa; ipare sapisara.

Esepia niha, yande Yar Tüpa mbahe mboavaisarēhi secoi, ahe, ‘Tomano’ ehi chupe” ehi.

⁹ Evocoyase mborerecuar ivi pipendar yuvirecoi vahe co cuña resendarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovīhai chira sese osepiase evocoi cuña rātachi yuvireco curi.

¹⁰ Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pĩrata vahe tie viña!

Esepia niha, co aviyeteramo tēi ou nde mombaraisu catusa” ehira yuvireco.

¹¹ Evocoyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovīhai chietera evocoi tecua rese yuvireco. Esepia niha, ndipo iri chietera que virocua vaheṛā imbahe yuvireco ichui, ¹² co opacatu mbahe sepi vaheṛā ahe: oro, guarepochi, ita iporañete ai vahe, mbohīr sendi vahe, turucuar secose vahe, turucuar sendi vahe, iyavei pīraumbi vahe, pīra vahe no; iyavei opacatucatu tēi ivirape sīacua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei; ¹³ mbahe serocuapri yahu vahe canela, tembihu moiacuasa; itaisi, mirra, mbahe sīacua vahe; uva ricuer, mbahe quira, trigo cuhi aviye vahe, trigo avei; iyavei mbahe mimba ovosi vahe no, ovesa, cavayu, cāretomi iyavei mbiguai no. ¹⁴ Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehira.

¹⁵ Evocoyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tēira iyavei ndoyembovīhai tēi chira yuvireco no, ¹⁶ iyavei aipo ehi tēira yuvireco:

“¡Too! ¡Iparaisú iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi,

pīra vahe; oro pipe oyemboetei vahecuer,

itami iporañete vahe pipe iyavei mbohīr sendi vahe pipe oyemboetei vahe no.

¹⁷ ¡Aviyeteramo tēi rumo opa ocañi imbahe eta ichui!” ehi.

Evocoyase opacatu ava carite guasu pipendar rerecur, ava imbehi ivirindar carite guasu reroguardasar, i rupi oporaviqui vahe oyeupe nara mbahe rereco āgua, ahe opaño opita amombrive yuvireco ichui ¹⁸ iyavei co tecua rātachi repiase, ahese osapucaí pīrata tēi yuvireco: “¡Ndipoi eté niha yipisui tecua na ehi vahe!” ehi yuvireco. ¹⁹ Ipare imboasipave omondo ivi cuhi oācave yuvireco, oyaseho iyavei ndoyembovīhai tēi, ipare osapucaí tēi yuvireco aipo ehi:

“¡Too! ¡Iparaisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

¡Aviyeteramo tēi rumo opa ocañi!” ehi.

²⁰ Peyembovīhaño evocoi tecua rese, pe iva pendar, iyavei opacatu chupendar peico vahe, pe no Jesús apóstol peico vahe,

opacatu Tūpa ñehe mombehusar peico vahe avei no.

Esepia niha, co tecua omocañisa pipe Tūpa oyapo mbahe tupri pēu nara.

²¹ Ahese Tūpa rembiguai iva pendar seco pīrata vahe osupi ita inungar mbahe mbocuhisa, ipare omombo para guasu pipe aipo ehi:

“Na ehi aveira tecua guasu Babilonia mocañisa.

Imombopri secoira.

Ipore ndapesepia iri chietera apirēhi vaheṛā” ehi.

²² “Ndasendusa iri chietera ocar rupi arpa moñehesar, mimbī moñehesar, iyavei mimbī guasu moñehesar avei no; ndererecoi chietera ava oporaviqui vaheṛā, ndasendusa iri chiaveira ita mbahe mbocuhisa monarasa nde suindar.

²³ Iyavei ñepe yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondosar seco pīrata etepri vahe opacatu rupi ereico viña.

Iyavei erembopa-mbopa tēi opacatú ambuae tecua rupindar eico nde payesa pipe” ehi

Tūpa rembiguai chupe.

²⁴ Esepia niha, evocoi tecua guasu pipe oyecua Tūpa ñehe mombehusar ruvi, Tūpa upendar ava ruvi, iyavei opacatu ava yucapri vahe ivi pipendar ruvi avei.

19

¹ Co pare, asendu ava rehi ñehe pīrata ivave aipo ehi vahe: “¡Imboetepri yande Yar tasecoi!

Poropīsirosa, teco porañetesa iyavei ipīratasa ahe yande Ru Tūpa suindar.

² Esepia niha, ahe oyapo mbahe supi eté vahe,

“Tocañi’ ehise co cuña oyemboaguasa-guasa tēi vahe nungar tecua guasu upe evocoi niha osecó momara tēi vahe ava ivi pipendar güeco rai pipe; ichui Tūpa osepi oyeupendar” ehi.

³ Ipore aipo ehi iri yuvireco no:

“¡Imboetepri yande Yar tasecoi!

Esepia niha, evocoi tecua rātachi ndopai chietera” ehi.

⁴ Evocoyase veinticuatro tupri iva pendar icuaipri yuvirecoi vahe iyavei irungatu iva pendar yuvirecove vahe, ahe Tūpa mboeteisa pipe oyeaivi ivi rese yuvireco. Ipore aipo ehi yuvireco no: “¡Ēgüe tehi! ¡Imboetepri yande Yar tasecoi!” ehi. ⁵ Evocoyase Tūpa renda sui tupri oyeendu ñehesa aipo ehi vahe:

“¡Pemoetei yande Ru Tūpa opacatu peroya vahe, que seco ivi coti catumi vahe, que seco ivate vahe avei, pe pesiquiye vahe imboyeroya āgual!” ehi.

Pieta mendasa Ovesami resendar

⁶ Asendu avei ava rehii ñehe, inungar acoi itu guasu riapu, ndoyavii avei osunú guasu vahe aipo ehi:

“¡Imboeteipri yande Yar tasecoi!

Esepia niha, yande Yar Tūpa opacatú mbahe mboavaisarēhi omboipi oporocuai.

⁷ Tayayemboviha catu yaico iyavei tayamondo yande viharetesa, yande sapucaisa yande Ru Tūpa upe.

Esepia niha, cūrítei oyepota mendasa ari Ovesami upendar.

Sembireco evocoiyase opa oyemoingatu oico:

⁸ chupe ipotasa iyemonde āgua turucuar secose vahe, ndiquihai, sendi vahe pipe.

Esepia niha, co turucuar secose vahe “Tūpa rese yuvirecoi vahe recocuer ihivi vahe’ oyapave aipo ehi” ehi.

⁹ Evocoiyase Tūpa rembiguai, “Na ere icuachía: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tūpa ñehesa supi tupri vahe ité” ehi.

¹⁰ Ipare añenopiha Tūpa rembiguai rovai imboetei āgua. Ahe rumo aipo ehiño cheu: “Ēgüe erei rene. Esepia, che Tūpa rembiguai tēi aico nde nungar iyavei nde rivireta nungar oguata vahe Jesús ñehengagüer rupi. Emboetei Tūpa” ehi.

Esepia niha, evocoi Jesús recocuer mombehusar moñehe ucasar, ahe niha acoi omombehu uca vahe Tūpa ñehe mombehusar upe.

Cavayu morochi vahe reroguatasar

¹¹ Evocoiyase asepia i va oyemboi vahe. Aheve aviyeteramo tēi cavayu morochi vahe oyemboyecua, evocoiyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepia, güeco ivisa pipe oporocuai iyavei oyapo vavasa. ¹² Sesa evocoiyase ndayaviyei eté acoi tata rendigüer; iyavei oāca rese setá vireco oyeguaca, iyavei vireco terer icuachiapri oyese; ahe güeraño ité oicua. ¹³ Iturucuar evocoiyase imopirapri tuvi pipe; serer evocoiyase, “Tūpa Ñehe” ehi. ¹⁴ Sundao rehii i va pendar saquicuerive yuvirecoi. Iturucuar secose vahe pāve morochi vahe, ndiquihai vahe avei. Ahe cavayu morochi vahe harive yuvirecoi. ¹⁵ Iyuru pipe sui osē quise pucu saimbe vahe opacatu ambuae-ae tecua rupindar momara āgua. Ahe oyocuirai oamotarēhisar guarepochi apopri opo pendar pipe. Iyavei osecoñhara inungar uva opive otiamii vahe yuvireco iyavei ombohura evocoi uva ricuer paraísu catusa resendar pipe. Ahese Tūpa mbahemboavaisarēhi oñemoiro itera chupe. ¹⁶ Oturucuar popi rese vireco icuachiapri ohivipi rese avei aipo ehi vahe:

“Mborerecuareta rerecuar guasu iyavei ava Yar ivate catu vahe” ehi.

¹⁷ Ipare asepia Tūpa rembiguai opūha vahe arisave. Ahe opucaí pīrata opacatu vīrai mbahe rohoguar upe oveve vahe íva rese: “¡Perio! ¡Peñemonuha Tūpa suindar carusa guasusave; ¹⁸ pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ívi coti catumi vahe roho, seco ivate vahe roho avei!” ehi.

¹⁹ Ahese asepia mbahe ípi vai iyavei mborerecuareta ívi pipendar osundao reseve-seve. Ahe oñemonuha yuvireco ovava ãgua evocoi cavayu hari pendar rese iyavei isundao rese avei no. ²⁰ Co mbahe ípi vai yipindar vahe soquendasa, oyoya evocoi Tūpa ñehe mombehusar angahu tēi rese. Ahe acoi oyapo vahe mbahe yavai rai vahe yipindar mbahe ípi vai rovaque, evocoi mbahe yavai rai vahe apo pipe ombopambopa tēi ava, acoi seroyasar vireco vahe mbahe ípi vai reroyese iyavei omboetei vahe sahanga yuvireco. Evocoyase co mbahe ípi vai iyavei Tūpa ñehe mombehusar angahu tēi, ahe opa imombosa secove reseve ípa azufre ocai vahe pipe yuvireco. ²¹ Ambuae evocoyase evocoi cavayu morochi vahe hari pendar yuru pipe sui osē vahe quise pucu pipe opa omano yuvireco. Evocoyase opacatu vīrai mbahe rohoguar opa soho pipe oyemohitaro yuvireco.

20

Mil araviter resendar ñehesa

¹ Ipare asepia Tūpa rembiguai ogüeyi vahe ou íva sui ívicuar guasu ípicucu vahe mboyasar iyavei carena ípo guasu vahe opove vireco. ² Ipare oipisi mbahe ípi oporomocañi vahe mboi nungar aracahendar, ahe niha Caruguar secoi, Satanás serer vahe; ahe oicuhacua carena pipe mil araviter rupi imoi.

³ Ahese omombo ívicuar guasu ípicucu vahe pipe. Aheve osoquenda. Omondo sello soquenda rese opacatu ambuaeae tecua rupindar mbopa-mbopa tēi iriēhi ãgua rese acoi osupitise voi mil araviter. Coiye rumo mil araviter pare, imosesa raimi tēira.

⁴ Ipare asepia tenda, iharive setá ava oguapi yuvinoi evocoi oipisi vahe omborerecuasa yuvireco ava upe mbahe rese porandu ãgua. Iyavei asepia ava hã evocoi opa vahecuer oyasia ñaca yuvireco Jesús recocuer mombehusa sui tēi iyavei Tūpa Ñehengagüer mombehusa pipe sui tēi avei. Ahe ava nombotei vahe mbahe ípi vai yuvireco; sahanga avei nombotei yuvireco no; iyavei nomondo ucai vahe avei osiva rese serer yuvireco, opo rese avei. Ahe asepia opa ocuerayevi yuvireco.

Ipore oporocuai Cristo rese mil araviter rupi yuvireco. ⁵ Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter. ⁶ ¡Sorivete catu acoi ava vireco vahe yipindar cuerayevisa yuvireco! ¡Esepia niha, ahe Tūpa upendar ité yuvirecoi! Imoñuviriosa manosa evocoyase chupe ndipo iri eté. Ēgüe ehira rumo ahe Tūpa upe naraño ité pahi yuvirecoira, Cristo upe avei. Ipore mborerecuar yuvirecoira sese mil araviter rupi.

Caruguar recopisa

⁷ Acoi osupitise rumo mil araviter cute, ahese Caruguar yorasara soquendasa sui. ⁸ Ichui osēra opacatú ava ivi pipendar mbopa-mbopa tēi oico; osēra ivi Gog mbopa tēi āgua, ivi Magog mbopa tēi āgua avei. Ipore omonuhara vavasave nara isundao eta. Esepia niha, ahe sehii etepri yuvireco inungar ivi cuhi para guasu popi rupindar.

⁹ Ēgüe ehi yugüeru ati amombri sui, oyerepa tupri Tūpa recua rese yuvireco no, evocoi tecua Jerusalén sembiáisuse rese avei. Tūpa rumo ombou tata iva sui, ahe ipipe opa tupri ité osapi. ¹⁰ Caruguar evocoyase, ava mbopa-mbopa tēisar, ahe opa imombosa ipa azufre ocai vahe pipe. Aheve acoi opa imombosa mbahe ipi vai iyavei Tūpa ñehe mombehusar angahu tēi vahe avei no. Aheve iparaisura pītu, ari yuvireco apirēhi vaherã.

Tūpa oguapira güendave ava recocuer rese porandu āgua ari ipa vahe pipe

¹¹ Evocoyase asepia tenda imboeteipri, morochi vahe. Iharive oime ava oguapi vahe oī. Sovai ivi iyavei iva opa ocañi tupri tēi. Ndoyecua iri eté co coti rupi yuvireco. ¹² Ipore asepia omano vahecuer seco ivate vahe, seco mbegüemi vahe avei no opūha yuvinoha Tūpa rovai; ahese cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoyase porandusa evocoi cuachiar pipendar mbahe sembiapogüer rese. ¹³ Omano vahecuer opa yuvinose para guasu pipe sui, iyavei tehögüer recosa sui opa yuvinose; ichui opacatú mbahe sembiapogüer rese porandusa yuvireco chupe no. ¹⁴ Ipore manosa recua opa imondosa tata nungar ipa pipe. Evocoi ipa niha imoñuviriosa manosa. ¹⁵ Aheve opa imondosa acoi ndovirecoi vahe güerer icuachiapri cuachiar tecovesa resendar pipe.

¹ Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no. ² Che asepia tecua nimarai vahe, ahe Jerusalén piasu, evocoi ogüeyi vahe Tūpa sui ou. Opacatu imoingatusa tupri vahe, inungar acoi cuña omenda āgua oyemboetei tupri omevi upe. ³ Ipare asendu ñehesa pīrata tenda suindar aipo ehi vahe: “Tūpa cūrutei oicove ava rehii pāhu rupi oico. Ahe oicove vaherā ité sese yuvireco yepi, ahe ava evocoiyase chupe nara ité yuvirecoira. Ahe teieté niha secoira yuvireco chupe. ⁴ Ahe niha omombituhura opacatu ava resai; iyavei ava nomanoi chietera; ndoyasehoi chira yuvireco; ndipoi chira viharēhisa, tecoasisa avei chupe. Esepia niha, opacatu mbahe oime vahecuer yipindar, ndipo iri eté” ehi.

⁵ Ahese evocoi oguapi vahe tenda harive oĩ, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoiyase iya ité peyeroya sese” ehi.

⁶ Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tēira i tecovesa resendar ndasepii vahe pipe. ⁷ Acoi ava oyemoviracua vahe ité mbahe-mbahe tēi apoēhi āgua, ahe oipisira co mbahe opacatu omahera yuvireco. Evocoiyase che aicora chupendar ité, ahe evocoiyase che rahir ité yuvirecoira. ⁸ Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tēi vahe, ipaye serai vahe, mbahe rahanga mboeteisar tēi iyavei opacatu ava semira-mira tēi vahe, ahe opara yuviraso ipa nungar azufre ocai pīrata vahe pipe. Ahe niha imoñuvirío manosa” ehi.

Tecua Jerusalén piasu

⁹ Evocoiyase ou ñepeí siete Tūpa rembiguai pāhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecua cuña omenda vahevi ndeu, Ovesami rebirecovi” ehi. ¹⁰ Evocoi che quer nungar pipe Espiritu osepia uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Tūpa sui. ¹¹ Ahe tecua sendí iteanga Tūpa rendigüer pipe. Sendigüer evocoiyase oyoya tupri ita iporañete vahe rese, oyoya avei ita jaspe serer vahe ipīrerimi vahe rese. ¹² Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoiyase ñepeí-peí Tūpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese. ¹³ Vireco niha mbosapi

oquenda añihivei coti, mbosapi norte coti, mbosapi irohi coti iyavei mbosapi caharu coti no. ¹⁴ Tecua guasu ãchisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

¹⁵ Evocoi Tūpa rembiguai oñehe vahe cheu vireco vara oro apopri tecua rãha ãgua, opacatu soquendipi rãha ãgua, ñachisa rãha ãgua avei no. ¹⁶ Tecua guasu pucucuer oyoya tupri ipigüer rese. Evocoyase Tūpa rembiguai osãha tecua guasu ruvichagüer; osãhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pãve tupri ité no. ¹⁷ Ipare osãha ñachisa: osãhase ipigüer sesenta y cinco metro tupri. Evocoi Tūpa rembiguai osãha ava rembiporu pipe.

¹⁸ Tecua ãchisa ahe ita porañete vahe Jaspe serer vahe apopri; tecua evocoyase oro pãve tupri, aviye vidrio secose catu vahe. ¹⁹ Ñachisa moviracuasa vireco opacatu ambuae ita-ita tēi iporañete vahe pãve: yipindar iviracuasa jaspe, imoñuviriosa zafiro, imombosapisa ágata; imoirungatusa esmeralda; ²⁰ imbopoyandeposa ónice; imoñepei ovasa, cornalina; imoñuvirio ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirio yovaivesa, amatista. ²¹ Doce tupri vahe oquenda guasu ahe doce tupri mbohír; ñepei-pei oquenda ñepei mbohír sui yapopri. Calle guasu tecua aviter rupindar evocoyase oro pãve, inungar vidrio yande porēhi tupri vahe ipipe.

²² Ndasepiyai eté evocoi tecua guasu pipe ñepei yepe tūparo. Esepia niha, yande Yar Tūpa mbahe mboavaisarēhi, Ovesami reseve yuvirecoi aheve. ²³ Evocoi tecua guasu ndovireco iri eté ari, yasi güesape ãgua. Esepia niha, Tūpa ité osesape güendigüer pipe, iyavei Ovesami tataendi nungar seci aheve yuvirecoi vahe upe. ²⁴ Sendigüer osesapera opacatu tecua rupindar iguatasa rupi, iyavei ava mbahe yar mborerecuar ivi pipendar opara güeru ombahe eta porañete vahe yuvireco chupe. ²⁵ Evocoyase soquendipi nimboyasai chietera ari yacatu rupi. Pĩtu ndipoi chiaveira aheve. ²⁶ Ipare opara aheve ambuae tecua mbahe eta, porañete vahe omoingue yuvireco; ²⁷ ava angaipa viyar rumo, Tūpa remimbotarēhi oyapo vahe, iporombopa serai vahe, ahe ndoyuviroiquei chietera aheve. Ëgüe ehi rumo acoi ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

22

¹ Ipare Tūpa rembiguai omboyecua iai tecovesa resendar

cheu, tĩpiu, oyecua tupri, osẽ vahe Tũpa iyavei Ovesami renda porañete vahe sui. ² Calle guasu mbiter rupi oso. Iyavei iai ique yacatũ oime ivira tecovesa resendar, iha vahe doce yupagũer rupi ñepe araviter pipe. Iyavei evocoi ivira ro aviye ai ava opacatu rupindar mbogũera ãgua. ³ Ndipoi chietera aheve que mbahe tẽivri pendar. Tũpa renda porañete vahe iyavei Ovesami renda avei chinira evocoi tecua guasu pipe. Aheve sembiguai eta omboeteira yuvireco. ⁴ Osepiara sova iyavei virecora serer osiva rese yuvireco. ⁵ Aheve ndipoi chietera pĩtu, iyavei ava aheve yuvirecoi vahe ndosecai chietera tataendi. Ndosecai chiaveira que ari gũesape ãgua yuvireco. Esepia niha, yande Yar Tũpa teietẽ osesapera. Ipare ahe ava mborereciar apirẽhi vaherã itẽ yuvirecoira sese.

Cõimi etẽ Jesucristo yevi ãgua

⁶ Ipare Tũpa rembiguai aipo ehi cheu: “Co ñehesa supi tupri vahe itẽ, sese iya itẽ peyeroya. Iyavei yande Yar Tũpa acoi omboyecua tupri vahe mbahe oyesuindar oñehe mombehusar upe, ahe ombou gũembiguai iva pendar mbahe omboaviye poyava voi vaherã mboyecua ãgua viroyasareta upe” ehi.

⁷ “¡Ayevi poyava voira curi! ¡Sorivete catura acoi ava viroya vahe ñehesa Tũpa suindar mbahe oime vaherã resendar co cuachiar pipe!” ehi.

⁸ Che, Juan, asepia iyavei asendu itẽ co mbahe. Sendu pare voi, añenopiha evocoi Tũpa rembiguai rovai imboetei ãgua viña. ⁹ Ahe rumo aipo ehiño cheu: “Aní ereñenopiha che rovai. Esepia niha, che Tũpa rembiguai tẽi aico, nde nungar, nde rivireta nungar avei evocoi oñehe vahe Tũpa Ñhengagũer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tũpa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tũpa suindar mbahe oime vaherã resendar sereco, evocoi icuachiapri cuachiar pipe. Esepia niha, ari cõimi secoi imboaviye ãgua. ¹¹ Acoi ava mbahe tẽi aposar, toyapoño mbahe tẽi; iyavei acoi ava seco rai vahe, taseco raiño itẽ oico; acoi ava seco tupri vahe rumo, ahe toyapoño mbahe tupri oico; iyavei acoi ava Tũpa upe oyemondo tupri vahe itẽ, ahe taseco tupriño avei oico chupe” ehi.

¹² “Supi etẽ ayevi poyavara, iyavei arura mbahe porerecosa ñepepei-pei ava rembiapogũer rupi-rupi amondo vaherã chupe. ¹³ Che aico inungar letra A iyavei Z, yipindar vahe, ipandar vahe avei no; yipive vahe itẽ apirẽhi vaherã” ehi.

¹⁴ “Sorivete catura acoi ava omoatiro vahe gũecocuer. Esepia, ahe oipisira ivira ha tecovesa apirẽhi vahe resendar. Ipipe sui oiquera tecua guasu pipe. ¹⁵ Ava rehii ndiporeroyai vahe rumo opitapara ocarve tẽi yuvireco, iyavei ava ipaye

serai vahe, oyemboaguasa-guasa tēi vahe, oporoyuca vahe, mbahe rahanga upe tēi oyerōqui vahe, iyavei opacatu ava oipota rai vahe oporombopa-mbopa tēi āgua yepi” ehi.

¹⁶ “Che, Jesús, amondo che rembiguai iva pendar mbahe mombehu āgua opacatu che reroyasar upe oñemonuha vahesa rupi-rupi. Che aico mborereciar guasu David suindar. Iyavei aico inungar yasitata guasu sendi vahe añihiveindar no” ehi cheu.

¹⁷ Espiritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acoi ava osendu vahe ñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüerüño; acoi ava oipota vahe, toipisi i tecovesa resendar ndasepii vahe yuvireco.

¹⁸ Opacatu acoi ava osendu vahe co ñehesa Tūpa suindar mbahe oime vaheñã resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboyeapi iri vahe, ahe chupe Tūpa omboyeapi aveira co cuachiar pipendar mbahe-mbahe tēi imombehupri. ¹⁹ Amove que ava virocua vahe co cuachiar pipe sui ñehesa Tūpa suindar, Tūpa avei evocoyase ndoipotai chira chupe co cuachiar pipe imombehupri ivira ha tecovesa resendar rereco āgua iyavei co tecua maranehi pipe seique āgua.

²⁰ Acoi co mbahe mombehusar aipo ehi: “Supi eté ayevi poyavara” ehi.

Ēgüe tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Aviyē, aipo rupive.